


Esuquidistu Chuiquin
Tantiamete



New Testament in Matsés (PE:mf:Matsés)

Esuquidistu Chuiquin Tantiamete

New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
446da786-5bd1-5ffa-85e2-9eff4052cf8b

Contents

Mateyon Dada uaid	1
Madcosën Dada uaid	55
Ducasën Dada uaid	87
Uanën Dada uaid	139
Esus Chuibenequidon Naid	178
Doma yacnocquidon Iste	224
Codinto yacnocquidon Iste 1	249
Codinto yacnocquidon Iste 2	270
Cadasia yacnocquidon Iste	283
Epeso yacnocquidon Iste	292
Pídiapos yacnocquidon Iste	300
Codosas yacnocquidon Iste	306
Tesadonica yacnocquidon Iste 1	312
Tesadonica yacnocquidon Iste 2	317
Timoteyon Iste 1	320
Timoteyon Iste 2	327
Titon Iste	332
Pidemonën Iste	335
Ebedeyon Isadaidbon Iste	337
Santiacon Dada uaid	352
Petedon Dada uaid 1	358
Petedon Dada uaid 2	365
Uanën Dada uaidëmpi 1	369
Uanën Dada uaidëmpi 2	375
Uanën Dada uaidëmpi 3	376
Udasën Dada uaid	377
Esusën Uan Ismiaid	379

MATEYON DADA UAID

Esuquidistu tsusedpabotedi chiaid (Duc 3.23-38)

¹ Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

² Abadauanquibi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic. ³ Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid. ⁴ Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. ⁵ Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. ⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

⁷ Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid. ⁸ Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid. ⁹ Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid. ¹⁰ Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. ¹¹ Osiasën madobic Econias cuëmëdquid. Aid Econias caid aton masesadobëdtabi yuanuen Babidonia yacnocquidon aton nidaidën buampampic.

¹² Buanac shubu dadpen icquid Babidonia caid yacnoshon Econiasën aton mado Sاداتiedën tishmepampic. Sاداتiedën mado Sodobabed cuëmëdpampic. ¹³ Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid. ¹⁴ Asodën madobic Sadoc cuëmëdquid. Sadoquën madobic Aquin cuëmëdquid. Aquinën madobic Ediud cuëmëdquid. ¹⁵ Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid. ¹⁶ Acobon madobic Ose cuëmëdpac caondash. Aidquo Madian bënëd nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquo nec. Isadaidbon cainaidquo nec.

¹⁷ Aidedti Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Econias aton matsesbëdta buanaid ënquin chiombi. Adoshombic Econias ënquin chuiboed chuioaquin padpiden bedanquin aton matses 14tedbidi chuiquin Esusquibi ënquin chiombi.

Esuquidistu tishaid (Duc 2.1-7)

¹⁸ Nëbi aid tishaidquo chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash. ¹⁹ Usundoacsho isun abi inuequidën Osen dada utsin chudaid danec: —“Nëbi mibi bedtiapimbo iquebi,” quequin bedenquo icnuen dada uashun Madia menenu —queuidpac caondash. Nuquin Papan chiapadquo bëdambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquo yequi: —Bedenquo icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidën mayan bëdan Ose ushquin ismepac caondash. —Dabid yampidën tsyuecquid icsho mibi chuinu, Ose. Tantia. Chudenquo icquin Nuquin Papan Mayanën Madia bacuë usundomiaye. Dacuëdenda. Dacuëdenquo icquin Madia min shubuno buanta. ²¹ Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquo iquenda,” quequin Esus cuënta —quequin mayan bëdan Ose ushquin ismepac caondash.

²² Aden mayan bëdan Esus tishte chiacpadomboen Nuquin Papan ambi chiaid naden dada uamepampic.

²³ “Dadan inacmaidëmbi bacuë usundoshon dada bacuë tishendac. Aidi Imanued cuënëndac.

‘Nuquin Papapadquidquiobidi matseshbēd tabadnuec choash nec,’ quequin Imanued cuēnendac.”

quequin Esus tishte Nuquin Papan dada uamepampic.

²⁴ Aden mayan bēdan chiac isucunshumbien aidēn chiapadomboen Osen aton shubuno Madia buampac caondash. ²⁵ Buanshun Osen chudenquo icnubi dada bacuē tishpac caondash. Tishacsho Esus cuēmpac caondash.

2

Uispa isquido Esus isec choaid

¹ Nidaid Udeya caid yacno tabadquin shubu daēdpactsēcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuēmēdquid icpac caondash. Aid icnubi matses utsibo uispa isquido Esus isnuec ushē choacmiuēsh chopac caondash. Edusaden yacno choquin ² anocquido chuituidpac caondash. —Min matses isadaidbo chuiquid dapa ictequidquo nēbi tishsaidēmpi ŷmidambo icctseque? Isnu. Aid tishaid tantiamete uispa isombique. ŷMitsimbo icctseque? Isnu. “Chuiquid dapa bēdamboshē ictequid nec,” quiash aid isnuec chopobi —quetuidpac caondash.

³ Adsho tantiash dachuēdcuededpac caondash abitedimbo. —Padtec. ŷMidapadquid bacuē nependabac? —quecuededpac caondash Edodes isadaidbo ancaquid ambi ancaidobēdi.

⁴ Adshumbien Edodesēn abi yacno tsusiobo cho-chomepac caondash. —ŷMitsicquid caique? Tiantianu —queshun abi yacno Moisesēn dada uampid chuibanquido abi chuiquid dapabobēda cho-chomepac caondash. Cho-chomeshumbic: —ŷMitsishunquo Nuquin Papan chomiaid min matses chuiquid dapa ictequid tishpash? ŷAda Nuquin Papan chiaid isbanquin tantio? —caquien: ⁵ —Ai, tantiembi. “Nidaid Udeya caid yacno tabadquin shubu daēdpactsēcquid Beden caid yacnoshon aid bacuē tishendac,” quiampicpadembi tantiembi. Nuquin Papan ambi chiaid nuquin tsusedpa dada uamepampic naden. ⁶ Shubu daēdpactsēcquid Beden caid yacnoquido chiec:

“Beden yacno tabadec nidaid Udeya caidēn tabadquido mibi nec.

‘Chuiquid dapa nibēdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidēmbi isadaidbo matses chuiquid dapa icquin bēdamboen tabadmendac,”

—quequin Nuquin Papan Esus tishte chiaid chuiyac caondash tsusiobon Edodes caid chuiquin.

⁷ Adoaquien Edodesēn ambi ancaido isadaidbo ismenquo icquin matses utsibo uispa isquido chomeshun chuimepac caondash. —ŷNēbida tishaid tantiamete uispa isquin tauao? ŷNēid inchēshēn ushēmbida isbeno? ŷĒndenda isbenonda? En chui. Tiantianu —cac chuisho ⁸ tantiashun: —Beden yacno istan. Ano nidshun mimbi chiapadquid bacuē istan. Aid bacuē istanec cuenquin ēbi chuibenta. Ēmbitsen istanu. “Nuquin Papan chomiaid chuiquid dapa ictequid bēdambo iquec,” quequin Ēmbitsen istanu —capac caondash Edodesēn muaquimbi. —Cuesunenu —quequimbi adopac caondash.

⁹ Adoaquien ushē choacmiuēsh bed-bedquesho ambi isbēquin tsibambēboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuē ictsaid shubu nēid iquec —quec. ¹⁰ Adsho isashien cuishonquepac caondash uispa isquido. ¹¹ Adash shubun puduedshun isquien aton tita Madiabēd bacuē icctsec. Aid isashic: —Matses chuiquid dapa ictequid nec. Matses bēdambo icmetequid nec —quequin aton matsesēn nacpadomboen ismequin danēshēn sebudpac caondash. Adshumbic ambi bēboed aton na bēdambo icquid chīcshun menepac caondash nēidtedi. Nēidic shocosh piu. Nēidic bēdambo nuadnuc tauitequid. Nēidic bēdambo noadec danoshquete. Aidtedi menepac caondash. Adoash ushtopac caondash. ¹² Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choeboedēn nidenquo yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidēn mayan bēdan Ose ushquin ismepac caondash. —Isucunanec cuenta. Bacuēmpi aton titabēda buanec nidaid utsi Equipito caid yacno cuenta. Ēmbi chiabi choenda. Anobi tabadta. Edodesēn: “Bacuēmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bēdan.

¹⁴ Aden ushquin ismiac isucuntantsequi inchëshêmbi puduanec aton bacuë anibêdta buanec nidaid utsi Equipito caid yacno Ose nidpac caondash. ¹⁵ Equipito yacno nidash ambobi tabadpac caondash. Isadaidbo ancaquid Edodes unêsabi icnuc Equipito yacno tabadpac caondash. Esus tishabi icnubi êndenquimboshê Nuquin Papan tantiamiac ambi chiaid chuibanquidên Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindami,’ quiosh Nuquin Papa,” quequin Nuquin Papan chiaid dada uapampic.

Bacuëbo dadpen cuesun siatanaid

¹⁶ Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuipac caondash. —Uispa isquidon chuibocpatsêccquid comapenec onquecuenabi ictsêccquidotedi dada bacuëmpibotedi cuesun siatan. Beden yacnocquidon bacuëbobêdtabi uano pauequidon bacuëbotsen cuesun siatan —cac cuesun siatampac caondash. ¹⁷ Aden cuesun siatanambo icnubi Nuquin Papan adote chiaid êndenquimboshê Edemias cuêmêdquidên dada uapampic naden chuiquin. ¹⁸ “Abi yacnuësh aton bacuëbo nibêdanzo isash isadaidbon chidobo sedenqueuedenedac.

Unêsaid tantiec baded ênêdenquo yec sedenquebudnendac,”

quequin chiampicpadomboen aton bacuëbo nibêdamepac caondash.

¹⁹ Yuecquio ictaniashic isadaidbo ancaquid Edodes caid unêsac caondash. Adambic nidaid utsi Equipito caid yacno tabadsho Nuquin Papan abi yacnoshon uaidên mayan bédan Ose ushquin ismepac caondash. ²⁰ —“Bacuëbo cuesun siatan,” quiondaid unêsacoshe. Min chido min bacuëbêdta buanec min nidaid Isadaid caidên nidoata —caquien ²¹ isucunanec aidên chuibocno buanec nidpac caondash.

²² Aton nidaidên nidshun aton matsesên chiaid tantiapac caondash. —¿Ada tantio? Udeya yacnocquido ancadened unêsaidên mado Adquedayo caid ancanquidquibidien nechitec —quesho tantiashien dacuêdtampac caondash Ose. Adshobien Nuquin Papan Ose ushquin ismeoapac caondash. —Cuesunenushê. Min nidaid Udeya caidên nidenda —quequin ushquin ismiac isucunanec aid nidaid Isadaid caidêmbidi nidec aid nidaid cuëshê utsi Cadidia caidên nidpac caondash. Udeya caidên nidenquo yec uquêmbo nidpac caondash. ²³ Uquêmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

3

Uan acten mentoanquidên chuibeniaid

(*Mad 1.1-8; Duc 3.1-9, 15-17; Uan 1.19-28*)

¹ Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibêdacno capucuenequin Nuquin Papan chiaid chuibenequid nepac caondash. ² Adquid icquin Esus chote chuibampac caondash naden. —Mibi icsaid ênash bédamboec tabadta. Nuquin Icbombo choeque —quequin chuipac caondash. ³ Aden Uanên chuite chuiquin Nuquin Papan isadaidbo tsusedpa Isayas cuêmêdquid dada uamepampic naden.

“Masiuidpambo yacno shubu nibêdacno capuquin êcac matses chosho chuibenendac.

‘Chuiquid dapa choeque. Podqued andêdbanshunta,’ quiacimboen:

‘Nuquin Icbombo choeque.

Icsaid ênash bédamboec tabadta,’ quequin chuibenendac,”

quequin Isayasên Uanên chuite chuipampic.

⁴ Nadquid Uan icpondash. Aton dashcute nëish yua dapa cameyo caidên bu daêdcaid dasiuidpondash. Tsipantebic nidaidên capuquid yua bitsi nacnenaid tsiupondash. Aton pete bacumbêd shioshbimboecquid icpondash. ⁵ Aidên Nuquin Papan chiaid chuibenesho tantianuec nëidtedi matses cho-chopac caondash. Nêdic shubu dadpen icquid Edusaden caid yacnocquido. Nêdic nidaid Udeya caid yacnocquido. Nêdic acte Odan caid cuêman tabadquido. Aidtedi cho-chopac caondash. ⁶ Cho-choshon Uanên chuisho tantiash: —Nuquin Papan chiaid niac-niaquec icsapobi. Icsaboedi aid tantiec bédamboec tabadti-adquio iquebi —quesho: —“Nêid Nuquin Papa tantianu,” quequid nec —quequin acte Odan caidên mentopac caondash Uanên.

⁷ Adnubien padiseyobohêd saduseyobo Uan isec cho-chopac caondash. Padiseyobo isadaidbo tsusedpabon chiaid namequido nec. Saduseyobobic: —Matses unêsaid uincuenenquo iquendac —quequido nec. Aido cho-chosho isun Uanên: —Nisibimboecquido mibi nec. Adquidên icsa uacimboen matses icsa uaquido mibi nec. Bédambo icquid damianquiec mibi iquec. “Nuquin Papan mibi cuidnushe. Tantiatan,” quequin çtsuntsin

chiac cho? ⁸ Mentomete bunec Nuquin Papan chiaid niac-niacboedi ënash bëdamboec tabadta. ⁹ “Ëbipadquid Abadauanën tsyuecquidouditsëqui Nuquin Papan bëdamboen isec,” quequin tantienda. ¿Adquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icsho isun nëid cuënotebi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiata. ¹⁰ “Icsambo icquid nec,” qeshun ambi nitsinaid cuëte bacuësa dëdshun nëdëncacimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chiec.

¹¹ Adshumbic padpiden chuiquin Esusën nate chuipac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Ëbi bëdiactsëc tantiaquid ictsëcnic aidquien comapenen tantiaquidquio yec bëdamboshë iquendac. “Aidquio bëdamboshë icquid icnuc ¿atotsieshshun icsaquidquibi: ‘Aid choec,’ quequin chuiquidquio Nuquin Papan ëbi icmeposh?” quec tsadebi. Ëmbi chuiboed choshon: “Ëbi tantiaquid nec,” qeshun aton Mayan menequin bëdamboec tabadte mibi tantiamendac. Abi tantiesaboen cuidendac. ¹² Piacbo choeshshun putu bushcaquin secacimboen abi tantiesabo chian anëdënquiacno nësecaindac. Adshumbic abi tantiaquido abëdi tabadmendac —quepac caondash Uan acten mentoanquid.

Uanën Esus mentoaid

(*Mad 1.9-11; Duc 3.21-22; Uan 1.32-34*)

¹³ Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: —Ëbitsen mento —quetuidpac caondash. ¹⁴ Adshobien Uanën: —Padenquio iquembi. Nuquin Papan chomiaid icquin mimibi ëbi naquien bëdambo ictsiash. ¿Atotsieshshun ëbi aden chie? Padi —qeshobien: ¹⁵ —En na. Bëdambo iquec. Ëbi mentoquin mimbi Nuquin Papan chiacpadomboen natsiaque. Ëbi acten mento —qesho tantiasun Esus acten mentopac caondash Uanën.

¹⁶ Adoac Esus pudundonobien canchedacimboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec. ¹⁷ Adnubien abucuëshquio Nuquin Papa onquiampac caondash. —Nëid ëmbi tantiaidquio con Mado nec. Ëmbi chiacpadomboen nasho isash bëdambo iquebi —quepac caondash Esus caic.

4

Satanasën Esus icsamenuequin tanuidaïd

(*Mad 1.12-13; Duc 4.1-13*)

¹ Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënnquid Satanasën Esus icsamenuequin ma tanu —quequin ambo nidmepac caondash.

² Adoquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntscnuc 40tedec ushquin penquio yec comapenec bumpac caondash. ³ Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien ⁴ Esus: —Padi. Nuquin Papan chiaid dada uapampid nad iquec. “¿Petueidi tantiecta matses bëdamboec tabadpec? Nuquin Papan chiacpadomboenuidi naiquien matses bëdamboec tabadtsiash,” quequin dada uapampid iquec —quepac caondash Esus.

⁵ Adsho tantiasumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasën Esus manidtomepac caondash abucquio. ⁶ Adotanquimbien padpiden chuiquin: —¿Nuquin Papa caidën Madombobida mibi neque? Aidën Mado yec nëuëshquio pudunta. Nuquin Papan mibi paëdmenquio ictsiash. Nadentsen Nuquin Papan chiaid dada uapampic.

“‘Uidën uata,’ quequin ambi abi yacnoshon uaido mayan bëdabo Nuquin Papan chiac mibi uidën uaindac paëdenquio icnuc.

‘Cuënoten tadquëdnushe,’ qeshun adoendac,”

quequin Nuquin Papan chiaid dada uapampique. Pudunta —caquien ⁷ Esus: —Padi. Nuquin Papan chiaid dada uapampid nad iquec. “¿Icsamboen tantiaquin ëmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

⁸ Adoaquien Satanasën padpiden buanquin macuësh dapa abucquicquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash. ⁹ Adoshombic: —Nëidtedi mibi menetsiambique. Èbi con icbo cata. Èbi aden chuiquin ismienen danëshën sebudta. Adsho isun èmbi ismiactedi mibi menembi. Aidën icbo mibi icmembi —caquien ¹⁰ Esusën: —Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsëcquiobi mimbi tantiaiduidtsëqui min Icbombo neque. Aidën namiaidquio icta,” quequin dada uapampique. Cuenta —capac caondash Esusën. ¹¹ Adoaquien Satanas cuempac caondash. Cuenubien Nuquin Papan abi yacnoshon uaido mayan bédabo choshon abëdi tabadquin Esus bédambo icmepac caondash.

Cadidia yacnoshon Esusën chuibeniaid
(Mad 1.14-15; Duc 4.14-15)

¹² Adashic aton nidaid Cadidia caidën Esus nidpac caondash. —Mibi acten mentonaid Uan bedshun quënën nauedac caosh —quesho tantiash nidpac caondash. ¹³ Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. ¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamampicpadec ambo tabadpac caondash Esus. Naden dada uapampic.

¹⁵ “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëmë tabadquidon.

Nëidic isadaidpembo dadpen tabadacno Cadidia caidën tabadquidon.

¹⁶ Aidtedishun Nuquin Papan chomiaid tantiendac.

Pabiate cuënëdacimboec icsamboec tabadquin Nuquin Papa tantienquio icboedombi tantibenendac.

Nuquin Papa tantiamenuen chuibansho tantiashun matsesën paposhquiacimboen Nuquin Papa tantibenendac.

Abi tantienquio icsho Nuquin Papan cuidtsenaidombi Nuquin Papa tantibenendac ushash isucunacimboen,”

quequin Isayas Esus choash tabadte dada uamepampic Nuquin Papan.

¹⁷ Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiacpadec bédamboec tabadta. Nèbi Nuquin Papan abëd tabadtequido icmequin matses bédamboen tabadmendac —quepac caondash Esus ambibi naid chiequi.

Nuëcquid bedquido Esusën: Cho, caid
(Mad 1.16-20; Duc 5.1-11)

¹⁸ Aden chuibenec chian dapa Cadidia caid cuëman nidquin isquien dadan aton ut-sibëdtambi nëshaid dapambo acte nënepec. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusën. ¹⁹ Adshumbien Esusën: —Nuquibi icnu. Cho. Nuëcquid bedquid icboedi nèbi èbi chuibanquid mibi icmenu ²⁰ —caquien aton nëshaid nianec nidquimbi Esus tsibanampac caondash.

²¹ Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien ²² aton papabëdta cano nianec Esusbëd icnuec nidpac caondash.

Mates dadpen Esusën chuibeniaid
(Duc 6.17-19)

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiecm pudueduenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bédamboen iste matses chuibeniatic caondash. Adshumbic daicsaidotedi bédamebampac caondash. ²⁴ Adoshon istanquin: —Bédamequidquio nec —quequin isboedon Esusën naid chuibenepac caondash. Ènapen nidec nidaid utsi Sidia caidën nidshun chuibeniatic caondash. Aden chiac daicsaidotedi bë-bëpac caondash. Dada paëmshë icquido yec podobitsi icsa dapuduedaido yec unësanequido yec dada shëquëquenquio icquido yec quenuc bë-bëacsho aidtedi bédamepac caondash Esusën.

²⁵ Aden: —Bëdamiosh —quequin chiac isec cho-choash dadpenquoio tsucus-tsucustsëcquio yec tsidadash niqianquin Esus tsibanampac caondash. Nëidtedshun tsibananac caondash. Nëidic nidaid Cadidia caidën tabadquidon. Nëidic shubu dadpen icquid Decapodis caid yacno tabadquidon. Nëidic shubu dadpen icquid Edusaden caid yacnoquidon. Nëidic nidaid Udeya caidën tabadquidon. Nëidic acte Odan caid uquë cuëma utsiuc tabadquidon. Aidedtedshun Esus tsibanampac caondash.

5

Nadquido bëdambo iquendac, quequin Esusën chiaid (Duc 6.20-23)

¹ Matses dadpeshun tsibananac macuësh dapa cuëte nibëdpamboecquid pudundoc poctsebi Esus tsaduidpondash. Abi tsibananash matses dadpen abi datsidadnubien abëd icquido Esusën dayunquoio tabadpondash. ² Adshobien Nuquin Papan matses bëdamboen isquin bëdambo icmete Esusën matses abitedi chuibampondash.

³ —¿Mitsipadquid Nuquin Papan bëdambo icmepec? Nadquid caimbique. Tantia. Mibitedi chuinu. “Èbemi bëdamboec tabadtiaipimbo iquebi. Bëdapenquoio iquebi. Nuquin Papan bëdamboen tabadmiaquini bëdamboec tabadtsiac,” quequid Nuquin Papan: “Èbëd tabadtequid nec,” quequin bëdambo icmendac.

⁴ “Matses abitedi icsamboec tabadnuc ëbitsen icsamboec tabadquid nebi,” quec shu- buquimbi abi tantiansho Nuquin Papan bëdamboen isquin bëdambo icmendac.

⁵ Aton nauidi tantienquoio icquin Nuquin Papa tantiaquin utsibotsen tantiaquid Nuquin Papan bëdambo icmendac. Yuecshun ambi nidaid chuca uaidën tabadmendac.

⁶ Pete bunacimboec ambi chiacpadec bëdamboec tabadte bunquid Nuquin Papan bëdamboen tabadmendac.

⁷ Abi chieshënquidi chieshënenquoio icquin bëdamboen isquid Nuquin Papan bëdamboen isendac.

⁸ Ambi chiacpadomboenuidi nate bunquid Nuquin Papan bëdambo icmequin abibi bëismendac.

⁹ Aton matses chieshënanasho isash: “Padi. Chën. Bëdamboequien tabadtia,” quequid Nuquin Papan bëdambo icmequin con mado caindac. Adquidbidi ademibidi con champi caindac.

¹⁰ Nuquin Papa tantiec bëdamboec tabadsho utsin chieshënaid Nuquin Papan bëdambo icmequin unësacsho abëdi tabadmendac. ¹¹ “Esus tantiaquid nec,” qeshun utsin mibi chieshënuin chiacsho Nuquin Papan abëd tabadmenuen mibi bëdambo icmendac. Mibi cueso ademibidi mibi bëdambo icmendac. Ademibidi mibi muauasho Nuquin Papan mibi bëdambo icmendac. ¹² Aden utsibon: “Esus tantiaquid nec,” qeshun chieshënaqui cuisshonqueta. “Ènden tsusedpabon Nuquin Papan chiaid chuisho chieshënuin cuesunepampic. Adoacsho Nuquin Papan bëdamboen isquin abëdi tabadmec. Ademibidi utsibon chieshënacsho ëbi bëdamboen isquin unësacsho abëdi tabadmendac,” quiaish cuisshonqueta —quequin chuipondash Esusën.

Abi tantiaquido bëdamboec tabadte chiaid (Mad 9.50; Duc 14.34-35)

¹³ Abi macuësh dapa poctse tsadquin Esusën chuibampondash. —“Ma utsibotsen Nuquin Papa tantianu,” quec sa pambid casecac batambo yec petiadquio yacimboc icta. Aden Nuquin Papan chiacpadec bëdamboec tabadquin mimbi utsibo bëdamboec tabadte bumetsiac. Sa batambo icquid bëdambo iquec. Sa batambo icboedi batapenquoio yec icsasho ¿mitsipadentsi batambo icmeoapec? Adotiapimbo iquec. Sa icsambo yacasho penquoio icquin secatequid nec. Ademibidi matses bëdamboec tabadenquoio yec icsambo icsho Nuquin Papan chian anëdënquiacno nësacatequid nendac —quepondash Esus.

¹⁴ Adashic padpidec onquec: —Nuquin Papan chiacpadec bëdamboec tabadte utsibo tantiamequido mibi neque. Aden tantiamenuc bëdamboec tabadta. ¿Nuntanshunda ëapadic? Padenquoio. Umanuschumbien ma tantianueshun ëaquid. Ademibidi: “Ma Nuquin Papan chiacpadec tabadte tantianu,” quiaish ënëdenquoio yec bëdamboec tabadquin ismeta. Adsho isash: “Nuquin Papa tantiec bëdamboec tabadquid nec,” quetsiash utsibo. ¹⁵ ¿Utsibo chuinu- uecta abentsëqui uano icpadic? Padenquoio. “Ma nëidën tantianu,” quec aïdbëdi bëdamboec tabadquin chuibanquid. ¹⁶ Ademibidi ëbi tantiesabobëd tabadquin: “Ma Nuquin Papa tantianu,” quequin ënenquoio icquin Nuquin Papan chiacpadomboen nata. “ ‘Nuquin Papa bëdambo iquec,’ ma utsibotsen quenu,” qeshun adota —quequin Esusën chuipondash.

Nuquin Papan Moises chuimiai chiaid

¹⁷ Nadentsen Esusën chuipondash. —Ëmbi chuibansho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbêdta con tsusedpabo utsibo dada uamiampid chienquio icquin utsi uapac,” mimi ãbi capec. Mambi utsi uainquio yoc. Nuquin Papan chiaid utsi uainquio icquin ambi chiacstedimbo namenuc nebiq. ¹⁸ Abimbo chuinu. Tantia. Abubêdta nidaid nibêdamiabi icnuc Nuquin Papan chiaid bñndutiapimbo iquendac. Ambi chiacstedimbo naquin Nuquin Papan nainendac.

¹⁹ Padnubic Nuquin Papan: “Nadomboen nata,” quequin chiaid abentsëqui niacquin aid chiaidbidi adomboembidi niacmequid Nuquin Papan: “Bêdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bêdamboec tabadnuna,” quequid abi yacno nidacsho Nuquin Papan: “Bêdamboshê icquid nec,” caindac. ²⁰ Moisesën dada uampid chuibanquido padiseyobobêd Nuquin Papa yacno puduedtequidoen mimi dampec. Aido bêdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bêdamboec tabadquidien puduedtsiash —quequin chuipondash Esusën.

*Chieshëmënquido nêish bêdante chiaid
(Duc 12.57-59)*

²¹ Adshumbic Esusën padpiden chuiopondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidên cuesunemequin cuidquid,” quequin chuiampid mimi tantiec. ²² “Nadquidotsen cuidtequido nec,” quequin chuinu. Tantia. Aton matses nêishênash aton nêish bêdanenquio icsho Nuquin Papan cuidtequido nendac. Utsibic chieshëmênenec icsamboec cuëmênquido isadaidbo tsusiobon cuidacsho isun: “Bêdamboen naic,” catsiambi. Nêidic aton matses chieshênquid shêpiaquid Nuquin Papan icsano nêsecaquin cuidtequido nendac. ²³ “Chieshëmênquid Nuquin Papan cuidtequid nendac,” quequin ãmbi chuisho tantiashun bêdamboen nata. Nuquin Papa tabadte shubu uashunaidên puduedash: “Ambi chiacpadomboen musuc menenu,” mibi quepec. Aden musuc menenumbi mimi naid tantiata. “¿Ada ãbi chieshênquid icpec? ¿Ëmbi chieshêmeboedta icpec?” quequin tantiata. ²⁴ Adshun: “Ai, ãmbi chieshêmeboed iquec,” qeshun Nuquin Papa tantiaquin mimi bêboed meniabi mibêd chieshênamboed yacno nidash aidbêd bêdamboec onqueta. Adec bêdamboec onquiash padpidec choashun Nuquin Papa tantiaquin meneta. Adec mibêd chieshênamboebêdi bêdamboec onqueta.

²⁵ Mibêd chieshênamboed utsimbic: “Nêid cuidmenuen cuidte chuiquid yacno buanchitembimi iquec,” qeshun: “Baded nid,” cac podquedên nidec aidbêd bêdamboec onquenidta: “Ma nêish bêdanu,” quiash. “Matses cuidte chuiquidên cuidchitoshe,” quiash badequido mibêd chieshênamboebêd bêdamboec isnanta. Abi yacno buanacsho cuidte chuiquidên: “Icsambo iqueque. Quênên nauedta. Ëmbi chiacsted piucquid ãmbi bedabi icnuc ma tsadpanu,” mibi catsiash. Quênên nauedshun ²⁶ ambi chiacsted piucquid nibêdnuc mibi cuemenguio ictsiashe. Mibêd chieshênamboebêdi bêdamboec onqueta. “Nuquin Papan adembidi cuidnushe,” quiash adta —quequin Esusën chuipondash.

Icsaquin chudaid chiaid

²⁷ Adshumbic naden Esusën chuipondash. —Chiaid utsitsen mimi tantiec. “Min chidopenquio chudenda. Min bñênpenquio chudmenda. Aben uequid chudenda. Aben uequidên dada chudmenda,” quequin Nuquin Papan chiaid nuquin tsusedpan dada uapampic. ²⁸ Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquo tantiequi matses icsapic. ²⁹ Eshên isec mibi min chidopenquio bunec icsaic. Eshê chichshumiachimboec icsainquio yec ênêdash mibi bêdambo ictsiaic. Icsaid ênenquio icquid Nuquin Papan chian anêdênquiacno nêsecaquin cuidendac. ³⁰ Min chidopenquio chudte bunquin mêismec mibi icsaic. Mêteshuniac bedtiapimbo yachimboen mibi icsaid ênta. Ênenquio icquid Nuquin Papan cuidendac —quequin Esusën chuipondash.

*Aton chidobêd cuêshêdte chiaid
(Mat 19.3-9; Mad 10.11-12; Duc 16.18)*

³¹ Nadentsen Esusën chuipondash. —Nuquin Papan Moises chuimiaid utsitsen mimi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. ³² Utsitsen chuinu. Aton chidon bñênpenquio chudmesho istuidshun Moisesën chiacpadomboen nac bêdambo ictsiashe. Aton chido dada utsi chudmesa icshobi

dadan ambembi dada uaid menequin nidmiac icsambo ictsiash. Aden nidmequin chido icsametsiash. Chido nidmiacsho bedquidtsen icsatsiash —quepondash Esus.

Abimbo chiacimboen chienda, quequin Esusèn chiaid

³³ Adshumbic Esusèn padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “Nuquin Papa utsi uatiapimbo yacimboen abimbo caimbi,” quequin chiaid niactemaid nec. Niachso Nuquin Papan cuidendac,” quequin Moisesèn chuiampic. ³⁴⁻³⁶ Aidèn chiacpadec muainquo ictiadquidi mimbi abimbo chiacimboen utsi uain icsamboen chiec. “Abi cuëmédquid cuënec muasho ëbi cuidtsiash. Nuquin Papa cuëmédquid cuënenquo yec muasho Nuquin Papan ëbi cuidenquo ictsiash,” qeshun mimbi utsi chiec. “Abu utsi uatiapimbo yacimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacimboen ëmbi chiacpadomboen naimbi,” mibi queopec. Adembidi chiec mibi Edusaden queopec. Adembidi con mapi quequin mimbi chieque. Aden abimbo chiacimboen chienda. “Nuquin Papa cuëmédquid cuënenquo iccombi,” mibi quenubi abu abi tabadaid icnu ashunquo Nuquin Papan abitedi namendac. Nidaid Nuquin Papan tincate nec. Edusaden yacnoshombic Nuquin Papan chomiaidèn bédamboen namendac yuecshun. ¿Min mapin icboda mibi nedi? Padenquo. ¿Mimbida min mapi masedcamedi? Padenquo. Aton Icbombien Nuquin Papan naique. Abimbo chiacimboen icsamboen chienda. ³⁷ Adec muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidèn Satanasèn tantiamiacpadec mibi muapeque. Adenda —quepondash Esus.

*Chieshënc cuidnanenda, quiaid
(Duc 6.29-30)*

³⁸ Adashic padpidec Esus onquec: —Nuquin Papan Moises chuiquin dada uamiampid mimbi tantiaobod nad iquec. “Chieshëncin ëshë ansiac adecbidi cuidnanec ëshë anenanquid. Chieshëncin sêsiac adecbidi cuidnanec sêscenanquid,” quequin chiaid icruc ³⁹ utsitsen chuinu. Tantia. Mibi cuesquid cuidenda. Chieshënaqui cuidnanenquo icquin adembi bédamboen ista. ⁴⁰ Min matses: “Ëbi cuidquin mimbi ëbi meniambo iqueque. Min dashcute beccho,” qesho mimbi menenquo icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chitshun meneta. Adec bédamboec tabadta. ⁴¹ Utsibic: “Nëbi nidtuidquin con na buanec nid,” quequin ancabudac nëbi nidtuidenquo icquin udimbo buanshunta. ⁴² Aton na nibédquid: “Mitsana beccho,” qesho meneta. Utsibic: “Mitsana buanshun bëuaindami,” qesho: “Padi,” cainda. Meneta. Aden bédamboen nata —quepondash Esus.

*Chieshëncquidobi bédamboen iste chiaid
(Duc 6.27-28, 32-36)*

⁴³ Adshumbic abi macuësh dapa poctse tsadquin bédamboec tabadte Esusèn chuipondash. Nuquin Papan Moises chuiquin dada uamiampid mimbi tantiaobod nad iquec. “Mibi tantiaquidombo tantiaquin mibi chieshëncquido chieshënta,” quequin chuiampic. ⁴⁴ Utsi mibi chuinu. Tantia. Mibi chieshëncquidobi bédamboen isquin tantiaata. Chieshënaqui: “Ëbi chieshëncquid bédamboen ista, Papa,” quequin Nuquin Papa chianeta. ⁴⁵ Aden chianec Nuquin Papabimboec mibi ictsiac. Mibi utsibo bédamboen nashunquid ictsiac. ¿Bédambo icquido yacnouidida Nuquin Papan ushë chëncamepadic? Padenquo. Icsaido yacnotsen ushë chëncamec. ¿Bédambo icquido yacnouidida ue chomepadic? Padenquo. Icsaido yacnotsen ue chomec. Bédambo icquidobëdtabi icsambo icquido Nuquin Papan bédamboen nashunec. ⁴⁶ ¿Mibéd tantiananquido min shubun icquiduidi mimbi bédamboen nashunsho isunda Nuquin Papan mibi: “Bédambo iquec,” capec? Padenquo. Mimbi icsambo iquec caidontsen ambi tantiaido nashuntsiash. Aidombien piucquid bedshumëncquido icquimbi aton shubun icquiduidi nashuntsiashe. Aden nainda. Utsibotsen bédamboen nashunta. ⁴⁷ ¿Min shubun icquidobëduidida mibi onquec tabadpe? Nuquin Papa tantiesaboen adpec. Utsibotsen bédamboen ista. ⁴⁸ Nuquin Papabimboec icta. Bédambo icquid icta. Bédambo icquidobëdta icsambo icquidobi Nuquin Papan bédamboen tantiacpadomboen utsibotsen bédamboen tantiaata —quepondash Esus.

6

Utsibo bédamboen nashunte chiaid

¹ Adshumbic abi macuësh dapa poctse tsadquin Esusèn chuipondash. —Nadquid icsambo iquec. Nuquin Papa tantienquo icquimbi aton matses ismenuenuidi naic icsambo iquec. Adquid Nuquin Papan bédamboen istiapimbo iqueque. “Utsibo nashunu,” quequin

utsibo ismenquo icquin nata. ² “Aton na nibêdquido menenu,” qeshun utsibo ismequin menenda. Ismenquo icquin meniac bédambo ictsiash. “Nuquin Papa tantiaquid nebi,” quec muaquidên nacpaden nainda. Nuquin Papa tantiaquid damenuembien muaquidên matses dadpen yacnoshonuidi menedenepec. Adosho isun aton matsesênuidi bédamboen isnubi Nuquin Papan bédamboen istiapimbo iquec. ³ Aton na nibêdquido menequin utsibo ismenda. Meneshun: “Menebanombi,” quequin utsibo chienda. ⁴ Adsho isun mimbi utsibo ismenquo icquin naid tantiaquid icquin Nuquin Papan bédamboen isquin abêdi mibi tabadmendac —quequin Esusên chuipondash.

Nuquin Papa chianete Esusên chiaid
(Duc 11.2-4)

⁵ Adshumbic Nuquin Papa chianetetsen Esusên chuipondash naden. —Bédambo icquid damianquidên nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidtoshon comapenec onquequin Nuquin Papa chianepec. Adash umanuc puduenshun matses dadpen ismenuenuidi padpiden adembidi chianec. Adquid aton matsesên: “Bédambo iquec,” canubi Nuquin Papan padenquo iquec. Bédamboen istiapimbo iquendac. ⁶ Mibi adenda. Utsibo ismenuenuidi nainquo icquin matsesên isacmaidquo Nuquin Papambo tantiaquioquin chianeta. Aden chianequid mibi icsho Nuquin Papan mimbi utsibo ismenquo icquin naidtedi tantiaquid icquin mibi bédamboen isquin abêdi tabadmendac.

⁷ Nuquin Papa chuiquin bédamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquo chuibudac nuqui tantiaboedên nuqui nashuntsiash. Padenquo icac nuqui nashunenquo ictsiash,” qeshun Nuquin Papa tantiesabon yuen chuibudacimboen nainda. ⁸ Adoenquo icquin Nuquin Papa chianeta. Mimbi chiabi: “Adopashuni. Aid nibêdnuc unêsebi. Utsi icnuc bédambo ictsiabi,” quequin mimbi otacquo tantiaid Nuquin Papan tantieque. ⁹ Naden Nuquin Papa chuuta.

“Bédamboshê icquid icsho matses abitedishunquo mibi tantiapashun, Papa.

¹⁰ Matses abitedishunquo mibi con Icho capashun. Mibi yacnoshon mimbi uaido mayan bédabon mimbi chiapadomboenuidi naic.

Adomboembidi mimbi chiapadomboen matses abitedishunquo napashun.

¹¹ Bumianenda, Papa. Badiadquidên badiadquidênquien con pete icmeta.

¹² Utsibon chieshênauqui ëbi cuidnanenquo icsho isun ëbi icsashobi cuidenquo icquin ëbi bédamboen ista, Papa.

¹³ Mimbi chiaid ëbi niacmenda, Papa.

‘Icsamenushe,’ qeshun Satanas ëbi yuamenda, Papa.

Abitedishun Icombo yec abitedimbo namequidquo mibi nec, Papa.

Ëmbi mibi chuisho tantiata, Papa.

Ënenquo icquin abitedishunquo: ‘Bédambo iquec,’ mibi capashun. Padi,”

quequin Nuquin Papa chianeta —quequin Esusên chuipondash.

¹⁴ Adashic nadpondash: —Utsibo bédamboen ista. Cuidnanec chieshênanenda. Cuidnanec chieshênanenquo icsho isun Nuquin Papan mibi cuidenquo icquin bédamboen istsiash.

¹⁵ Cuidnanec chieshênansho isun Nuquin Papan mibi bédamboen istiapimbo ictsiash —uequin Esusên chuipondash.

Buna mêmunte chiaid

¹⁶ Adshumbic utsibo ismenquo icte utsi Esusên naden chuipondash. —Tantia. Nuquin Papauidi tantianuequin buna mêmunquid chuinu. Muaquidên nacbimboen ismenda. Muaquido: “Buna mêmunquid nec,” aton matses camenuc abibi maniumêdash nênuquidbitsêcquic mamênenuquo iquec. Adec buna mêmunquid tanec muaic. Adsho isun matsesên bédambo icquid danubi Nuquin Papan: “Icsambo icquid nec,” qeshun bédamboen istiapimbo iquec. ¹⁷ “Nuquin Papauidi tantiaquin nêidtedec ushquin buna mêmunu,” qeshun Nuquin Papambo tantiaquin nata. “Utsibon tantianushe,” qeshun bédamboen min manêdaid shueshcata. Adash bédamboec mamênta. Aden utsibo ismenuenuidi nainda. ¹⁸ Aden bédamboen manêdaid shueshcata isun: “Buna mêmunec nec,” cainquo ictsiash utsibon mibi chuiquin. Nuquin Papambien: “Ëbiuidtsêqui tantianuen naic,” quequin tantiatsiash. Adshun mimbi utsibo ismenquo icquin naidtedi tantiaquid icquin abêdi mibi tabadmendac —quequin chuipondash Esusên.

Nuquin Papa yacno tabadte bunta, quiaid
(Duc 12.34)

¹⁹ Adshumbic padpiden Esusën chuipondash. —Ëmbi chuiboedquo tantiasun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesën ampeshuntequid yec quec icsabudtequid nec. Adquiduidi tantienda. ²⁰ Icsabudesambo tantiata. Nuquin Papambo tantiec aiddëd tabadte bunquin ambi chiacpadomboen nata. Chodquetiapimbo icquid yec shënbudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata. ²¹ Mibi bunaidquo ënenquo icquin tantiec mibi tabadtsiac. Nuquin Papabëd tabadte bunquin aid tantiata —quepondash Esus.

Pabiate shëcuë cuembo icquid chiaid
(Duc 11.34-36)

²² Adshumbic abi macuësh dapa poctse tsadquin utsitsen Esusën chuipondash. —Pabiate shëcuë cuembo icquin Nuquin Papa tantiaquiec mitsanauidi tantienquo yec mibi bëdamboec tabadtsiac. ²³ Pabiate cuënëdabimboec yec Nuquin Papa tantienquo yec mitsanauidi tantiec ¿bëdamboecta tabadtsia? Padenquo. Adec mibi icsamboec tabadtsiaque. Adenda —quequin chuipondash Esusën.

Bedteuidi tantienda, quiaid
(Duc 16.13)

²⁴ Adshumbic naden Esusën chuipondash. —Mitsanauidi tantiec mibi icsamboec tabadtsiac. ¿“Naic cho,” quequin daëdshun chiacta aid daëdi mimbi nashumpatsia? Padenquo mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidtsëqui tantiata —quequin Esusën chuipondash.

Nuquin Papan abi tantiaquido dayun uaid
(Duc 12.22-31)

²⁵ Adshumbic Esusën padpiden chuipondash. —Ëmbi aden chuisho tantiasu dacuëndenda. “¿Atotsimbi pepe? ¿Atotsimbi acepe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebëdta dasiuidte icmeque. “Con na nibëdtsiasu,” quiasu dacuëdec tabadenda. ²⁶ ¿Uicchunënda ambibi cuëte ëshë siac bacuëacsho chepadic? Padenquo. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchun abipadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuëndenda. ²⁷ ¿“Unëstiapimbo iquebi. Dacuëdebi,” quequidta unësenquo icpadic? Adequi dacuëdquid unëstiashe. Unësteuidi dacuëdënenda.

²⁸ “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëec bëdamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bëdamboshë isadpadic? Padenquo. Nuquin Papan uacpadquioibi iquec. ²⁹ ¿Cuëte bacuëec bëdamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquo. Adpenquien icpampic. ³⁰ Cuëte bacuëec bëdamboshë isadboed abadiadtsëcshumbi isac ënden chodquiac. Aid badedquo chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquo. Mibi dasiuidte icmeque. Dacuëndenda. Mitsana nibëdquio icte dacuëdënquimbi mimbi Nuquin Papa bëdiactsëc tantiatseque. ³¹ Dacuëdec tabadenda. “¿Atotsimbi pepe? ¿Atotsimbi acepe? ¿Atotsibi dasiuidpe?” quec dacuëndenda. ³² Nuquin Papa tantiesaboen adquid bedteuidi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. ³³ Adenquo yec: “Con Icho mibi nec, Papa,” quequin ambi tantiacpadec bëdamboec tabadte bunta. Adec tabadec: “Aid nibëdnuc unësebi,” quequin mimbi tantiaidtedi Nuquin Papan mitsana icmetsiasu. ³⁴ Èbi adsho tantiasu badiad utsi caic: “Aid badiadën ¿atotsimbi nape?” quec dacuëndenda. Aid badiadën Nuquin Papan ambi tantiacpadomboen mibi nametsiashe. Nëid ushëmbi: “Naden naimbi,” quequin tantiec tabadnuna dacuëdënquo yec —quequin chuipondash Esusën.

7

Utsibo icsaid chienda, quiaid
(Duc 6.37-38, 41-42)

¹ Naden Esusën Nuquin Papan chiacpadec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. ² “Icsambo aid iquec,” mimbi cac adembidi aidontsen mibi adoatsiashe.

²¹ Utsitsen Esusèn chuipondash. —Èbi caic: “Con Icho mibi nec. Mibi tantiebique. Mibi yacno èbi puduedme,” ¿quequidtedida Nuquin Papa yacno puduedpatsiash? Padenquo. Nuquin Papan chiacpadomboen naquidquien abi yacno puduedtsiash. ²² Nuquin Papa yacno èmbi yuedte ushèn matses dadpeshun èbi chuiuidendac. “Con Icho mibi nec. Mibi caic: ‘Aidèn namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuedaido cuemequinc comapenen tantiaquin ismequinc caombique. Nuquin Papa yacno èbi puduedme,” ²³ qesho èbimbo tantiec Nuquin Papan chiacpadec bédamboec tabadabi icsho: “Èmbi tantiacmaidquo mibi neque. Baded cuenta. Icsamboec tabadquid mibi neque,” caindami. Èbi adsho tantiash muainquo yec bédamboec tabadta —quepondash Esus.

Shubu uaquidbimboecquid chiaid
(Duc 6.47-49)

²⁴ Adshumbic Esusèn padpiden chuipondash naden chuiquin. —Èmbi chiacpadomboen nata. Aden mimbi bédamboen natsiaque. Shubu uaquin bédamboen tantiaquidbimboec mibi ictsiaque. Tantia. Chuinu. Bédamboen tantiaquidèn mananènquo shubu uaquin buintad nitsinquid. ²⁵ Aden shubu uan ue dapa conquequidbèdi chonoc shubu chimeshadenquo icquid. Shubu nuntan anchiuidenquo icquid. ²⁶ Aden èmbi chiacpadomboen naquid icnubi utsibo èbi tantiesa iquendac. Aido shubu uaquin tantienquo icquidbimboec iquec. Tantienquo icquidèn nadoquid. Acte cuidi cuèmanquiobi shubu uaquin badedi unèstscquidquo cueste nitsinquid. ²⁷ Adquid nitsinaid ue dapabèd conquequid choquin shubu chimeshquid. Adecbidi acte cubudtoquidèn shubu nuntan mauanquid. Aden tantesa uatsècquidbimboec èbi tantiesa iquec. Adquid Nuquin Papan cuidtequido neque. Èbi tantiata —quequin chuipondash Esusèn.

(Mad 1.22)

²⁸⁻²⁹ Adsho tantiash: —Ma comapenen tantiaquidquo Esus neyoc. Nuquin matses tsusiobon Moisesèn chiampid bèdiactsc tantiatscquin chuitsèccosh. Padnuen Esusènquo comapenen tantiaquin chuiposh —quecuededpondash matses dadpenquo.

8

Esusèn daicsaid bédamiaid
(Mad 1.40-45; Duc 5.12-16)

¹ Ambobi macuësh poctse tsadquin ènquin chuitanequien Esus macuësh budpondash. Adec budanec nidsho isumbien matses dadpeshun tsibanampondash.

² Adnubien dada ushumbo yec daicsaidquo choshon Esus ismenuen danèshèn sebudpondash. —Èbi bédamete bunquin mimbi èbi bédametsiaque. Èbi bédame, Icho —caquien Esus: ³ —Ai, mibi bédamete bunebi. Mibi bédanendac —quequin mishtemaidquiobi mishnubi badedquo bédampondash daicsaid nibèdquiec. ⁴ Adsho Esusèn: —Utsibo chienquo yec nèish yua abided unès uaquido ismenuec nidta. Mibi isash: “Bédamiaid nec,” quequin ma aidon tantianu. Moisesèn chuipampicpadomboen nanuen: “Nuquin Papan bédamioshi,” quequin Nuquin Papa menetequid buanquin ismec nidta —quequin Esusèn chuipondash. Adtanec shubu dadpen icquid Capednaun caid yacno chopondash Esus.

Sondado chuiquid dapan yua Esusèn bédamiaid
(Duc 7.1-10)

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituipondash. ⁶ —Tantia. Chuinu, Icho. Con shubun icquid con yua shèquèquenquo iccosh. Natiambo yec unèstiatscquico iccoshe. Bédameta ⁷ —qesho tantiashun: —Ai, bédamec nidnu. Nid —caquien: ⁸ —Padi. Mibi bédamboshè icquidquo nec. Èbibi icsactscquid icquin mibi con shubun puduedmetiapimbo iquebique. Nèshunquiobi bédameta. Nidenquo icquin nèshunquiobi mimbi: “Bédanta,” cac con yua bédantsiashe. Mimbi tantiacpadomboen namequidquo mibi nec. ⁹ Èbibi chuiquid dapan namiac sondado utsibo namequid nebi. Èmbi: “Nid,” cac badedi nidec. Èmbi: “Baded cho,” cac badedquo choec. Con yuan èmbi: “Nata,” cac èmbi chiacpadomboen naic. Mibi adquidquibidi neque. Con yua bédameta —quepondash sondado chuiquid dapa.

¹⁰ Adsho tantiashun Esusèn abi tsibambèquido chuipondash. —Bédamboen nèidèn chuipec. “Comapenen tantiaquin chuiquinuidi con yua bédametsiash,” quequin èbi bédamboen tantiaquid nec. Isadaidbo adquid nibèdec. Isadaidbon èbi bèdiactsc tantiabededtsec. ¹¹ Tantia. Chuinu. Matses utsi icquimbi sondado chuiquid dapan èbi bédamboen tantiec. Adec nidaid utsi-utsiec yacnoquido isadaidpembo èbi tantiaquido yanash Nuquin Papa yacno puduedendac. Ambo puduedash isadaidbo tsusedpabobèd

tabadendac. Abadauan caid yec Acobo caid yec Isac caid yec quequidobèd tabadendac. ¹² Padnuen Nuquin Papan con matses caido isadaidbo dadpenquo Nuquin Papa yacno puduedenquo iquendac. Abi tantiesabo icsho Nuquin Papan cacumequin icsaido nèsecacno mibi nidmendac. Adoac mibi tènquebudquindac —quequin abi tsibambèquido isadaidbo chuipondash Esusèn. ¹³ Adshumbic sondado chuiquid dapa chuiquin: —Nidec nid. Mimbì tantiapadec min yua bèdaneque —cac nidshun isquien bèdanac Esusèn chuibocpadequi.

Petedon nachi Esusèn bèdamiaid
(Mad 1.29-31; Duc 4.38-39)

¹⁴ Adash yuec-yuecpectsèc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. ¹⁵ Uesho istuidshun mèdinquin Esusèn bèdamepondash. Aden bèdamiac Esus pemepondash.

Esusèn matses dadpen bèdamiaid
(Mad 1.32-34; Duc 4.40-41)

¹⁶ Petedon nachi bèdamiaid inchèshbudtsèqui Esus ismenuequin matses daicsaido dadpen bè-bèpondash. Bè-bèshobien podobitsi icsa dapuduedaido comapenec cuèdquin cuemeshumbic daicsaidotsen Esusèn bèdamebampondash. ¹⁷ “Nuqui icsaid ucquin nuqui daicsaidobi bèdamiac,” quequin èndenquo Nuquin Papan Papan Esusèn nate Isayas dada uamepampicpadomboen nanuen adopondash Esusèn.

Abèd icte bunquido Esusèn chiaid
(Duc 9.57-62)

¹⁸ Adashic abi isnuec matses dadpenquo datsidadsho isash abèd icquido chiec: —Chian potec nidnu. Nid —quianec chian yacno nidec puduampondash Esus. ¹⁹ Puduanec nidaneshobien Moisesèn dada uampid chuibanquidèn Esus chinuntuidpondash. —Con Icho mibi caindambi. Mibèd nidendabi —caquien: ²⁰ —Èbèdta nide? Tantia. Mibi chuinu. Bèdi chèshè shècuèn ushquid. Uicchun shubu uash abuc ushquid. Padnueni con shubu nibèdnuc Nuquin Papan matsesmiaid yec quenenenquo yec capucuenendac. *¿Ada mibi adpatsia?* —capondash Esusèn Moisesèn chiampid chuibanquid chuiquin.

²¹ Adnubien abèd capucuenoebod utsin: —Chiata, Icho. Con pa unèsoshe. Chococatambono —caquien: ²² —Padi. Cho. Ma unèsaidèn tantienquo yachimboen èbi tantienquo icquidon ma papa chococanu. Èbèdtan bèdamboen naic cho —capondash Esusèn amè unèsaid chuiquin. Adobidanec nidanepondash chian yacno.

Natiambo cunquenuc acte tèccuasquiaid Esusèn ènèdmiaid
(Mad 4.35-41; Duc 8.22-25)

²³ Chian budash Esus chedo cano antabèdtopondash. Adashic potenuc puduampondash. ²⁴ Aden potenubi nènantanquo icnuc cunquetuidpondash. Adnubien acte comapenec tèccuasquiampondash. Adec acte tèccuasquenuc cano acte ancushad-ancushadquiec yampondash cano mentoadtiadtsècquo yec. Adsho isun abèd icquidon: —Dacuèdampambo iquec —quetanquin isquien Esus ushpec.

²⁵ Adshobien tinquin: —Nuqui mentoadeque. Isucun, Icho. Baded èbi nashun —caquien: ²⁶ —¿Atotsi quiash dacuède? Èbi bèdiactsèc tantiatsec dacuèdquidquido mibi neque. Istac —quetanec nidtoshon actebèdtabi cunquequid chuipondash. —Padi. Ènèdta —caquien natiambo cunqueboedi badedquo ènèdpondash cano mentoadtsenquionobi. Actetsen tèccuasquenquo yampondash. ²⁷ Adsho isashien: —¿Mitsipadquidènquo actebèdta cunquequid ènèdmepashba? —quecuededpondash Esusbèd icquido.

Dada daèd dapuduedaido podobitsi icsabo Esusèn cuemiaid
(Mad 5.1-20; Duc 8.26-39)

²⁸ Aden chian potians pudundonobien Cadada yacnocquid podobitsi icsa dadpen dapuduedaid dada daèd choshon Esus chuituidpondash. Aid daèd unèsaido chococaid shècuèmbi tabadpondash. Matses cuesunete bunquiec dacuèdampambo icsho isash aid yacno matses nidenquo icpondash. ²⁹ Aidon podobitsi icsabon oncamiacpadomboen comapenec cuèdquin Esus chuituidpondash. —¿Nuquin Papa caidèn Madombo icquin èbi natiamenquin cuidnueta cho? *¿Nuquin Papan cuidte ushè choabi icnubida èbi cuide?* —capondash dada daèdshun abi oncamequidèn chiaid chuiquin.

³⁰ Uano chancho dadpenshun natiacquin udquin pebededpondash. ³¹ Adnubien podobitsi icsabon aid dada daèd oncameoac: —Èbitedi cuemiac chancho icbo-icboec dapuededtsiabi —quecuededpondash podobitsi icsabo. ³² Adsho tantiashun Esusèn: —Ai, mimbì tantiapadec nid —cac nidash chancho icbo-icboec dapuduednubi chancho abitedi

macuësh budec acte nësebudec mentoadbudnepondash nibëdquiec yec. Adec podobitsi icsabo dapuduenanec nidnubi dada daëd bédambo yampondash.

³³ Adsho istanequien chancho pemequido aton matses chiec niqianec shubu dadpen yacno nidanepondash. Chancho mentoadbudneboedbëda podobitsi icsabo dapudue-meboed uesquin chuituidpac caondash. —Nuqui dacuëdëmboedobi bédambo yanosh —quequin ³⁴ chuituidaquien anocquido abitedi Esus isec cho-chopondash. Adec cho-choshombien: —Dacuëdampambo mibi iqueque. Èbi yacno choenda. Nidec nid —cabedepondash. Adoac Esus nidpondash.

9

Shëquëquenquo icquid Esusën bédamiaid

(Mad 2.1-12; Duc 5.17-26)

¹—Nid —cac nidanec chian budash cano antabëdtoshon chian potiaşh abi iccondacnobi Esus choapondash. ² Adnubien utsibon dada shëquëquenquo icquid Esus ismenuen aton uetechobi bēpondash. Bēsho isumbien Esusën: —Èbi caic: “Aidën bédametsiaşh,” queshun bēac —quequin daicsaid chuipondash naden. —Dacuëdenda, madosio. Ambi chiaid niac-niaquec icsaboedi cuidmenquo icquin Nuquin Papa mibi bédamboen ismembique —capondash Esusën.

³ Adsho tantiash aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

⁴ Uanuësh adsho ambembi tantiashumbien Esusën aido chuipondash. —¿Atotsi quequin mimi èbi chieshēmpē? ⁵ Ambi namiaid icquin èmbi: “Nuquin Papa cuidmenquo icquin mibi bédamboen ismembī” cac Nuquin Papan nēid cuidenquo iquendac. Adembidi ambi namiaid icquin èmbi: “Caputa,” cac nēid capuendac. ⁶ Istac. Mibi ismembique. “Nuquin Papan chomiaid nec. Icsaidobi Nuquin Papa bédamboen ismequid nec,⁷ mabi canu,” queshun naimbique. Istac —quetanquin dada shëquëquenquo icquid chuiquin: —Caputa —capondash Esusën. ⁷ Adoac bēdanash aton shubuno nidpondash. ⁸ Adsho isashien: —Adquidshenda nepēc. Nuquin Papan namiaid icquimbien adochitec. Abi namequid Nuquin Papa bédambo iquec —quecuededpondash isquido.

Èbēd iquec cho, quequin Esusën Mateyo chiaid

(Mad 2.13-17; Duc 5.27-32)

⁹ Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na èmbi chiacctedi piucquid bedshun èbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec ¹⁰ nidequi con shubun Esusbēd puduedpondabi.

Adec puduedsho isashien matses dadpen pudued-puduedpondash. Esusbēd pec tabadnuec èbēdtan piucquid bedshunquidobēdi con matsesën: “Icsaido nec,” caidombo pudued-puduedpondash. ¹¹ Adsho isumbien Esus chieshēnquido Padiseyobo caidon Esusbēd icquido chuituidpondash. —¿Atotsi quiaşh mibi chuiquid Esus caid icsaquidobēdi pec tabadpec? Icsambo iquec —capondash Esus chieshēnquidon.

¹² Adsho tantiash Esus nadpondash. —¿Bédambo icquidta dauëchoquidën dauë menepadic? Padenquo. Ma daicsaidi dauëchoquidën menepaid yoc. Adembidi icsaidobi abi icsaid ucquin bédambo icmenuec nebi. ¹³ Nuquin Papan naden dada uamiampid pausudshun bédamboen naic nid. “Èmbi chiacpadomboen abentse-abentsen mimi naic. Adoquimbi èmbi chiaid utsi niaquec mimi icsaido caido mimi bédamboen istiapimbo iquec. Adsho isun: ‘Mibi bédambo iquec,’ catiapimbo iquebi” quequin Nuquin Papan dada uamiampid pausudta. Èbibi matses bédamboen ismequid nebi. Muaquido: “Bédambo icquid nebi,” quesho bédambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” quesho: “Icsainquo yec ènēda,” canuec nebi —quepondash Esus abi chieshēnquido chiec.

Esusën buna mëmunquido chiaid

(Mad 2.18-22; Duc 5.33-39)

¹⁴ Adnubien Uan acten mentoanquidbēd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquido nebi. Padiseyobo adembidi naquidquido nec. ¿Atotsieshun mibēd icquidon aden nainquo icpec? ¿Natiapimboda iquec? —caquien ¹⁵ Esus nadpondash. —¿Icbon: “Pec cho,” cacta aid

tantiec sedenquecuededquin buna mēmumpadic? Padenquo. Adquidbēdtan pec cuishon-quec tabadquid. Ico nibēdanan sedenquecuededquin buna mēmunquid. Ēbi nibēdanan ēbēd icquidon ēbiuidi tantianuen buna mēmumendac —quepondash Esus.

¹⁶ Adshumbic Esusēn naden chuipondash. —Dashcute chuca cuēshun dashcute shēni nedesquaiadbēdta tuscaisa. Aden tuscashun panac shēni badedquo nedesquequid. ¹⁷ —¿“Machi sandono,” qeshun tsitsan shēnimbida sandopadic? Padenquo. “Machi sebud-nushē,” qeshun tsitsan shēni sandoenquo icquid. Tsitsan chuca daēdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquo icquin ambi bēdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbēd icquido chiec.

Champi uincuemiaidbēdta chido bēdamiaid
(Mad 5.21-43; Duc 8.40-56)

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unēstiadtscquo iccoshe. Mishec cho. Mimi mishac bēdantsiashe —capondash. —Mibi con Ico canu —quequin danēshēn sebudquin ismepon-dash. ¹⁹ Adoaquien Esus aidbēdi nidpondash.

²⁰⁻²¹ Nidnubien chido intac butted-buttedec seta 12tedi matamec bēdanenquo yec nacchoadbudquidēn Esusēn cachotsēqui choquin: —Bēdamanquidēn dashcute mishec bēdampatsias hmanendac —qeshun ismenquo icquin dashcute cuēmano mishtsac caon-dash. ²² Adoaquien biddaquin isun Esusēn chuipondash. —Dacuēdenda. Mibi: “Aidēn nac bēdantsiabi,” quiacpadece mibi bēdanendac —Esus quenubi bēdampondash.

²³ Aid bēdamebidanec nidequi chuibante shubun tabadsho isquidēn shubun pudued-shun isquien matses dadpen tabadec. Champi unēsacsho isash sedenquecuededec tabadec. Nēdic matses unēscon matseēn nacpadomboen shoncate shoncaquido. Nēdic comapenec sedenquecuededquido dadpen. Aidedi icpondash. ²⁴ Adshobien Esusēn abitedi chuiquin: —Baded umanuc niecun. Champi unēsabi iqueque —capondash. Adoac: —“Champi unēsabi iquec,” quepequien iquec —qeshun Esus mamēnshumbedpondash. ²⁵ Niecunan Esusēn champi uiacno quēnēn puduedtanquin mēdinac champi uincuenash bēdambo yec capupondash. ²⁶ Adsho isun champi unēsaid uincuemiaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniace caondash.

Bēshuaid daēd Esusēn bēdamiaid
(Duc 18.35-43)

²⁷ Auēshquo puduanec nidshobien bēshuaid daēdshun chinunshun comapenec cuēdquin Esus chuituidpondash. —Dabidēn tsyuecquid Nuquin Papan chomiaid icquin bēdamboen isquin ēbi bēdame —quebud-quebudpondash. ²⁸ Shubu utsin puduedash abēdi tabadshobien Esusēn: —“Ēbi bēdametsias,” ¿caindabi ique? —caquien: —Ai, adebi —quepondash. ²⁹ Adshobien aid daēdi bēmishquin: —Mimbi tantiacpadece bēdanta —cac ³⁰ bēdampondash. Adsho isun Esusēn: —“Bēdamioshi,” quequin utsibo chienda —capondash. ³¹ Adoboqui anocquidotedi chuiben-chuibempac caondash.

Esusēn onquesa bēdamiaid

³² Bēshuaid bēdamiaid puduenubien podobitsi icsa dapuduedaid onquesa dada Esus ismenuen bēpondash. ³³ Bēacsho isun Esusēn podobitsi icsa dapuduemiace bēdanash on-quiampondash. Aden bēdamesho isash: —Nuquin nidaid Isadaid caidēnshun adoēn ictenec —quecuededpondash isquido.

³⁴ Adnubien Esus chieshēnquido Padiseyobo: —Podobitsi icsan icbon namiaid icquin podobitsi icsa cuemequidien nechitec —quecuededpondash Esus caic.

Esusēn matses tantiaquiaid

³⁵ Aden onquesa bēdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bēdamboen iste chuipondash. Adshumbic anocquido daicsaidotedi bēdamebampondash. Adenuidi shubu dadpen yacno-yacnomboen chuibanquimbi matses bēdamebampondash. ³⁶ Abi tantienquo icquido dadpen cho-chosho isash unēsquo icnuc shubiantiadquo icpon-dash Esus. —Abi isquid nibēdnuc bacuēbo icsamboec tabadacimboc icsambo iquec. Nuquin Papa bēdamboen ismete chiabi yac tantienquo yec natia chieshēmēnec bēdamboec tabadtiapimbo iquec —quiaish shubiantiadquo icpondash Esus.

³⁷ Adshumbic abēd icquido chuipondash. —Pete dadpen nitsinaid caniacsho bedtanenquo icnuc sinash chodquebudnequid. Adecbidi Nuquin Papan chiaid chuibanquid nibēdnuc matses icsamboec tabadec. Aden chuibanquid nuquipadquid daēdpactsēcquo iqueque. ³⁸ Nuquin Papa chianeta. “Matses dadpenshunquo mimi bēdamboen iste

tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusën abèd icquido chuiquin.

10

Esusbèd icquido 12tedi chiaid
(Mad 3.13-19; Duc 6.12-16)

¹ Adshumbic Esusën abèd icquido 12tedi chuipondash. —Èmbi naid chuibeneta. Èmbi namiaid icquin èmbi nabocpadomboen podobitsi icsa matses dapuedaid mimbi cuemendac. Adembidi daicsaïdo abitedi mimbi bédamendac —quequin chuipondashi nëidtedi. ² Nèidic Petedo caidbidi Simon cuëmédquid. Nèidic abèdta tishaid Andedes cuëmédquid. Nèidic Sebedeyon mado abi daèdi. Abentsëc Acobo icnuc utsi Uan icpondash. ³ Nèidic Uedipe. Nèidic Badtodome cuëmédquid. Nèidic Tomas. Nèidic èbibi Mateyo con matses piucquid bedshundenedi. Nèidic Acobo cuëmédquid utsi Adpeon mado. Nèidic Debeyo caidbidi Tadeyo cuëmédquid. ⁴ Nèidic Simon cuëmédquid utsi con matses yuaquido cuemete bunquid. Nèidic Iscadiote caidbidi Udas cuëmédquid abi chieshênquido Esus bedmequid. Aitedi abèd icquido icsho chuipondashi.

Abèd icquido: Chuibeneta, caid
(Mad 6.7-13; Duc 9.1-6)

⁵ Adshumbic: —Èmbi chiacpadomboen chuibenenuc nidshun isadaidpembo chienda. Aido yacno nidenda. Nidaïd cuëshë Samadia caid yacnocquidon shubu datambidanta. ⁶ Nuquin matses isadaïdbouidi chuibeneta. Bènudshun podque tantienquo yacimboben nuquin matsesën Nuquin Papano tantienquo iqueque. ⁷ “Mibi icsaid ènash bédamboec tabadta. Nèbi abèd tabadtequido icmequin Nuquin Papan matses bédamboen tabadmendac,” quequin chuibeneta. ⁸ Adembidi daicsaïdo bédamequinc unèsaido uincuemequinc dada ushumbo yec daicsaïdo bédamequinc podobitsi icsa dapuedaido cuemeshunquinc cabeneta. Adoshon: “Piucquid beccho,” cainda. Èmbi nabocpadomboembidi mibi namembique. “Piucquid beccho,” quequin nainquo iccombique. Adembidi nashumbanta. ⁹ Aden chuibenec nidquin min piucquid buanenda. ¹⁰ Adembidi pete sandoaid buanenda. Dashcute utsibèdta tapucudte utsi sandoshon buanenda. Mibi tidinquette cueste abentsèqui buanta. Adec mèdadauidquido chosho isun mimbi bédamaïdon: “Mibi bédambo iquec. Èbi yacno ushec cho,” mibi cac bédambo ictsiash. Adembidi: “Mitsana nibèdsho isun mibi menenu,” mibi cac bédambo ictsiash.

¹¹ Aden chuibenec shubu dadpen icquid yacno nidshun bédambo icquid istuidta. Istuidshun: “Min shubu yacno ushec nidnu,” mimbi cac: “Ai,” quesho tantiasht aidèn shubun ushta. Auëshquoï nidabi yec aidèn shubunuidi ushta. ¹² Aidèn shubun puduedshun: “Mibi isnuec chopobi,” cata. Adoshombic: “Nèid shubun icquido Nuquin Papan bédambo icmepashun,” quequin aido bédamboen ista. ¹³ Adoac anocquidon mibi bédamboen iso: “Nuquin Papan bédambo icmepashun,” mimbi canubi Nuquin Papan aido bédambo icmendac. Anocquidon mibi chieshênsho Nuquin Papan aido bédamboen istiapimbo iquec. ¹⁴ Shubu dadpen icquid utsi yacno mibi nidacsho anocquidon cuemiac naden ismeta. Auëshquoï puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaïd putu tasequeta. ¹⁵ Mimbi adosho isun matses cuidte ushèmbi Nuquin Papan aido comapenen cuidendac. Èndenquimbo shubu dadpen yacnocquidotedi cuidquin Nuquin Papan uesquin unès uapampic. Aid shubu dadpen icquid abentsëc Sodoma canubi shubu dadpen icquid utsi Comoda capampic. Aid daèd yacnocquido bèdiactëc cuidshun mimbi chiaïd tantienquo icquido comapenen cuidendac —quepondash Esus abèd icquido chiech.

Esus tantiaquido chieshênte chiaïd

¹⁶ Adashic padpiden chuoaic: —Èmbi naid chuibenequido icsho utsin-utsinquin mibi chieshênendac. Bèdi nèish yua acte bunacimboec chieshêmênquido mibi cueste bunendac. Aidobèd chieshênanenda. “¿Mitsipadomboen chiac Nuquin Papan chiaïd tantiabempatsiash?” queshun bédamboen tantiaquin bédamboen chuita. ¹⁷ Mibi chieshênquin cuesunetiadquido iquendac. Mibi bedshun: “Cuesmenu,” queshun abi chuiquido mibi cuidmenuen Nuquin Papan chiaïd chuibante shubuno mibi buanendac. Ashunquoï mibi cueshcaten cueshcaïndac. ¹⁸ Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma èbi chuiquidon chuiquid dapa bédta isadaïdpembo èmbi naid chuibanu,” èbi quenuc mibi aden buanendac. ¹⁹ Adoac dacuèdenda. “Chuiquid dapa yacnoshon ¿atotsimbi chuipatsiaba? ¿Adambi bédamboen chuipatsiaba?” quec dacuèdenda. Chuiquid dapa mimbi bèisnubi

Nuquin Papan ambi tantiacpadomboen mibi oncamendac. ²⁰ Aden aton Mayanèn ambi tantiacpadomboen mibi oncamendac —quepondash Esus.

²¹ Adashic padpidec onquec: —Èbi chieshênquidon èbi tantiaquidotsen comapenen chieshênendac. “Esus tantiaquid nec,” gueshun aton buchimbi aton utsi cuesunemendac. Amèmbi ambi tishmiaid cuesunemendac. Aton bacuèbombi chieshtoshon anibèda amè cuesunemendac. ²² “Esus tantiaquid nec,” gueshun matses dadpeshun aden chieshênaqui chieshtoenquo icquin èbi tantiaquo Nuquin Papan abi yacno mibi puduedmendac. ²³ Shubu dadpen yacno nidacsho chieshênac shubu dadpen icquid utsi yacno cuenta. Anoshontsen èmbi naid chuisho chieshênoac shubu dadpen icquid utsi yacnotsen cuenoata. Adequidi cuendeneta. Nèid nidaid Isadaid caidèn shubu dadpen icquid abitedi yacno nidabi icnubi choindabi. Nuquin matses isadaidbo abitedi chiabi icnubi Nuquin Papa yacnuèsh choindabi.

²⁴ Mibi tantiamequid nebi. Èmbi tantiamiaido icsho èbi icbocpadomboembidi mibi chieshênendac. Abi chuiquid dapa chieshênacpadembidi ambi namiaidotsen chieshênquid. Icho chieshênquimbi yuabotsen chieshênquid. ²⁵ Adembidi èmbi chiacpadomboen natiadquo icsho mibitsen chieshênendac. Nuquin Papa yacno puduedmianquid icsho: “Ma podobitsi icsan icho Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshênendac —quequin chuipondash Esusèn abèd icquido chuiquin.

Dacuèdenquo icquin chui, quequin chiaid
(Duc 12.2-7)

²⁶ Adshumbic padpiden chuiquin: —Mibi chieshênquido dacuèdênenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsècquin chiaid Nuquin Papan utsibo tantiamendac. Adembidi mimbi bédamboen naidtedi Nuquin Papan utsibo tantiamendac. ²⁷ Nèbi èmbi mibitedictsèqui chuiboed dacuèdenquo icquin utsibo chuibeneta. ²⁸ Chuibenesho min dadauidtsèqui cuesunetequid dacuèdênenda. Min tantiate unèstiapimbo icquid icsho nibèdametiapimbo iquec. Min dada unèsan min tantiate abi icsho cuidnuequin chian anèdênquequid nèsecanquid tantiata. Adquid Nuquin Papa icsho dacuèdènta.

²⁹ Utsibon chieshênaqui dacuèdenda. Nuquin Papan mibi tantieque. ¿Padichucu cuesaid isashta unèsquio icti? Padenquo. Padnuen ambi tantiacpadomboembi padichucu dadpen icquid abentsèc cuesac paèdsho Nuquin Papan tantiec. ³⁰ Adembidi min manèdaid Nuquin Papan tambanaidquo nec. Aden min manèdaid abentsèc paèdsho aidèn tantiec. ³¹ Aden min manèdaid tambanquid icquin padichucu bèdiactsèc tantiatsècquin mibien comapenen tantieque. Mibi chieshênquido dacuèdênenda —quequin chuipondashi Esusèn.

Esus con Icho nec, quequido chiaid
(Duc 12.8-9)

³² Adshumbic padpiden chuiquin: —Utsibo chuiquin: “Con Icho Esus nec. Nuquin Papa yacno èbi puduedmequid nec,” quequin chianequid Nuquin Papa yacno chosho isun: “Nèid èbi tantiaquid neque. Puduedmeta, Papa,” quequin Nuquin Papambo chiendambi. ³³ Padnuen utsibo chieshec: “Con icho Esus catiapimbo iquebi. Tantiatiapimbo iquebi,” quequid bédamboen istiapimbo iquebi. “Nuquin Papa yacno puduednu,” qesho: “Padi. Èbi tantiaquidpenquo neque. Puduedmenda,” quequin Nuquin Papa chiendambi —quequin Esusèn chuipondashi.

Esus tantiaquidobèdi cuèshèdte chiaid
(Duc 12.51-53; 14.26-27)

³⁴ Adshumbic padpiden chuiquin: —Èmbi chuiboed tantiaquid: “Nuquin Papa yacnuèsh choquid icquin abitedimbo bédamboen tabadmetsiash,” ¿caquindabi ique? Padenquo ictsiambi. Èbi tantiaquidobèd èbi tantiesabo cuèshèdenquo icte danenda. Èbi tantiaquidobèdi èbi tantiesabo cuèshèdendac. ³⁵ Amèbèd aton mado cuèshèdendac. Adecbidi anibèd aton champi cuèshèdendac. Adecbidi aton chayabèd aton babanèn cuèshèdendac. ³⁶ Aden aton shubun icquidombi èbi tantiaquid chieshênendac.

³⁷ Padnubic aton matsesuidi tantiaquidèn èbi bèdiactsèc tantiatsèctsiash. Aton tita tantiaquinc aton papa tantiaquinc cain aidèn chiacpadomboenuidtsèqui naquidèn èbi bèdiactsèc tantiatsècquin èmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bédambo icmetuidtsèqui bunquin èbi bèdiactsèc tantiatsècquin èmbi chiacpadomboen natiapimbo ictsiash. Adquido bédamboen istiapimbo iquebi. Èbi tantiesabo nec. ³⁸ Utsibon chieshênac èbi tantiatsècboedi badedi chieshtoshon èmbi chiacpadomboen natiapimbo yantsiash. Adquidotsen èbi tantiaquidpenquo iquendac. ³⁹ Matses ambi naiduidi naquid Nuquin Papa yacno puduedtiapimbo iquendac.

Padnuen ëbi tantiaquin ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquo ictsiash —quequin Esusën chuipondashi.

Nuquin Papan bédambo icmete chiaid
(Mad 9.41)

⁴⁰ Adshumbic Esusën ëbi chedo padpiden chuipondash. —Mibi chieshënquido icnubi mibi bédamboen isquid iquendac. Ëmbi naid mimbi chuisho tantiash: “Ai, abimbo caic,” qeshun ëbi tantiabenquin ëbi chomequidtsen tantiabenendac. ⁴¹ “Naden naindami,” quequin ambi chiaid chuibenequid Nuquin Papan bédamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bédamboen chuisho tantianu,” quequid icsho Nuquin Papan bédamboen isendac. Adembidi abi tantiec ambi chiacpadec bédamboec tabadquid Nuquin Papan bédamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” qeshun bédamboen isquidotsen Nuquin Papan bédamboen isendac. ⁴² Adembidi ëbi tantiaquid yec acte bundoacsho acte menequid Nuquin Papan cuidnanquin bédambo icmendac. Adembidi utsibon Esus tantiaquido bédamboen nashunsho Nuquin Papan bédambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

11

Uan acten mentoanquidën chuimiai
(Duc 7.18-23)

¹ Esusën: —Chuibenetan —cac abëd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeni ac caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbëd icoaic cho-chopondac.

² Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abëd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambëd icquidon Esus chuituidpondash. ³ —Uanën: “Chuitan,” cac chobi. ¿Ëmbi cainaid Nuquin Papan chomiaidquida mibi nepe? Mibi adquidpenquo icnuc ¿ada utsi chopatsiash? —caquien ⁴ Esusën: —Ëmbi nadati-ambo icquin nabamboebëdta ëmbi chuiboed Uan chiec nid. ⁵ “Bëshuacboedën isbenosh. Canite icsaidi capucuenosh. Daushumbo icquid nami mishadenquo icquid bédanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantiënquo icquido Nuquin Papan bédamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquido nec,” quequin ëbi tantiendac. ⁶ Adshumbic nadentsen chuita. “‘Muambo nec, ëbi cainquo icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bédambo icmendac,’ quiosh,” quequin chiec nid —cac nidanepondash Uambëd icquido.

Uan acten mentoanquid chiaid
(Duc 7.24-35)

⁷ Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuc nidonda? ¿Cunquequidën ishacunaid isnuecta nidtionda? Padenquo. ⁸ ¿Dashcute bédaidquido dasiuidaid isnuecta nidtionda? Padenquo. Icsactsëcquid Uan dasiuidpondash. Dashcute bédamboshë icquid dasiuidquido ancanquidën shubu dapan tabadquido nec. ⁹ Ad icnuc ¿atotsi quenuc nidonda? “Naden naindami,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquido Uan nec. ¹⁰ Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bédambo icquid choeque. Icsainquo yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic. ¹¹ “Nuquin Papan chomiaidquido choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bédapabi Uan ictsec. Padnuen ëmbi Nuquin Papan chiacpadomboen nabansho isash ëbi tantiaquido bédamboshë iquendac. ¹² Uanën chuisho Nuquin Papa tantiabenacpadomboen ëmbitsen Nuquin Papan bédamboen iste chuisho tantiashun adembidi abi icsaid ënshun icsaboedon dadpeshun Nuquin Papa tantiendac. ¹³ Nëbi Uanën: “Nuquin Papan abi yacnoshon bédambo icquid chomendac,” quequin chuipondash. ¿Ambiada adopondash? Padenquo. Èndenquimboshë tauamboen

nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bédambo icquid chomete chuiquin dada uamianepampic. ¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncamaidquio Edias cuëmédquid choendac,” quequin Ediasbimboecquid Uan chote chuipampic. Bédamboen tantiaquin: “Nuquin tsusedpa Ediasbimboecquid Uan nec,” mimi bédasiac. ¹⁵ Bédamboen tantiaquidën adembidi tantiatsiash —quepondash Esus abi datsidadquido chiec.

¹⁶ Aden chuisho tantiash chieshtoshobien Esusën chuipondash naden. —Nuquin Papan chiaid tantienquio icquido yec nêmo icquido ¿midapadquidoen nec? Bacuëbo nêishnanabictscëquiec mibi iquec. Bacuëbo: “Èmbi chiapadomboen nanuna,” queuidash ambi chiapadomboen aton utsibon nainquio icsho isash nêishash chushcananquid. ¹⁷ “‘Cuédënuna,’ queuidbosh ëbi cuédënubi ma mibi cuédënenuio icboc. ‘Sedenquenuna,’ queuidbosh ëbi sedenquenubi ma mibi sedenquenquio icboc,” quetsash bacuëbo nêishnanabictscëquiec ma mibi iqueyoc. Adec nêishëmênquido yec icsambo ma mibi iqueyoc. ¹⁸ Uan pete utsi-utsien pesa iccosh. Adebidi acte paëmo icquid aquesambo niosh. Adquid icsho isash nêishash: “Èmbi nacpadomboen naisa nec. Podobitsi icsa dapuduedashien nechitec,” mibi quepondac. ¹⁹ Èbien nuquin matsesën piacbimboen pequid nec. Adembidi actequid acquid nebi. Adsho isash nêishun ëbitsen icsamboen chuishunquin: “Peteuidi tantiaquin nua pequid nec. Tantiadenuen acte paëmo icquid acquid nec. Adebidi nuquin matses piucquid bedshunquidobéd onquec icsambo icquid caidobéd onquec quequid ma aidobédi icsambo icquid nepayoc,” mimi ëbi capec. Padnuen bédamboen tantiaquidën Nuquin Papan chiapadomboen nasho isun Uambêda ëbi: “Bédambo iquec,” caindac —quepondash Esus abi chieshênquido chiec.

Shubu dadpen icquidën tabadquido cuidte chiaid
(Duc 10.13-15)

²⁰ Adshumbic Esusën padpiden chuipondash. —Nëbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bédamboec tabadtiadquio iquebi,” quetiadquidi chieshec adenquio iquec —qeshun Esusën naden chushcapondash. ²¹ —Shubu dadpen icquid Codasin caid yacnocquidobédi shubu dadpen icquid utsi Betsaida caid yacnocquido Nuquin Papan cuidtequido nec. Èmbi aido ismebocpadomboen ismiac isadaidpembo cuidadenquio ictsempampic. Aden ismiaquin: “Ai, icsapobi,” quiash shubibudequi icsainquio yec ënêdtsempampic. Shubu dadpen icquid Tido caid yacnocquidobédi shubu dadpen icquid utsi Sidon caid yacnocquido adtsempampic. ²² Nuquin Papan matses abitedi cuidte ushën: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobêda bēdiactscë cuidendac. Adoshombic: “Comapenen tantiaquin ismiaqui tantienquio icquido nec,” qeshun Codasin caid yacnocquidobêda Betsaida caid yacnocquido comapenec sidquenec cuidendac. ²³ Adembidi nêmo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquio yec Nuquin Papa chieshênquido cuidacno nidmetequido ma mibi nepayoc. Èdenquimboshë yampido shubu dadpen icquid Sodoma caid yacnocquido cuidquin Nuquin Papan nibêdamepampic. Èmbi mibi ismebocpadomboen ismiac aidon abi icsaid ëntsempampic. Abi icsaid ënsho Nuquin Papan cuidenquio ictsempampic. Cuidenquio yac nëbi aton matses abi ictsiash. ²⁴ Nuquin Papan matses abitedi cuidte ushën: “Comapenen tantiaquin ismiacmaido nec,” qeshun Sodoma caid yacnocquido bēdiactscë cuidendac. Nuquin Papan chomiaid icquin ëmbi ismeboedo Capednaun caid yacnocquidoen comapenec sidquenec cuidendac —quequin abi tantiesabo Esusën chushcapondash.

Esusën dayacquiobimboecnuc icmete chiaid
(Duc 10.21-22)

²⁵ Adshumbic Esusën Nuquin Papa chuipondash. —Mibi bédamboshë iquec, Papa. Mibi yacnocquidotedishun Icombo yec nidaidën tabadquidotedishun Icbobidi mibi nec. Mimi tantiamiabi: “Dadpen tantiaquid nebi,” quequidombi ëbi tantiabi iquec. Mimi tantiamiac nēidon ëbi tantiec. Aden mimi bédamboen naic. ²⁶ Mimi tantiacpadomboen mimi bédamboen naic. Mibi bédamboshë iquec, Papa —quequin Esusën Nuquin Papa chuipondash.

²⁷ Adshumbic abi datsidadquido chuipondash. —Nuquin Papan ambi tantiaidtedi ëbi chuimec. Èmbi naboebêda ëmbi nate abitedi con Pan ambentsëqui tantiec utsibon tantienquio icnuc. Adembidi Nuquin Papan natebêda ambi naboe abitedi ëmbentsëqui tantiemi. Aden Nuquin Papa tantiaquin: “Nêidtedi matses bédamboen tantiamemi,”

queshun: “Nuquin Papa nadquoio iquec,” quequin tantiamembi. ²⁸ Èbi tantiata. Dayacquoio yaczimboecnuc mibi bédambo icmembique. “¿Mitsipadequiibi Nuquin Papa yacno puduedpe?” quec ¿uimambo yaczimboecta mibi icpe? Adquidèn èbi tantiasho Nuquin Papa yacno puduedtequid mibi icmembique. Èbi tantiata. ²⁹ Con Icbo èbi cata. Con yuambo icquin èmbi chiacpadomboen nasho mibi bédamboen isquin dayacquoio yaczimboecnuc mibi bédambo icmembique. Ancanesambo yec bédambo icquidin neque. Con Icbo èbi cata. Adsho mibi bédambo icmembique. ³⁰ Mibi ancainquio icquin dayacquoio yaczimboecnuc bédamboen mibi tabadmembique. Con Icbo èbi cata —quequin chuipondash Esusèn.

12

Esusbèd icquidon petsècsho istuidshun chushcaid

(*Mad 2.23-28; Duc 6.1-5*)

¹ Adshumbic chonoattemaid ushèn Esusbèd capucuenequin tied matanquin bundotsècshun tiedèn caniquid èschicshun petempi petsèccondambi. ² Pesho istuidshumbini con tsusedpabon chiampid namequido padiseyobon: —Is. Mibèd icquido chonoattemaid ushèmbi chonoadeque —capondash Esus chuiquin.

³ Adoaquien Esus: —Ma icsapenquoio icpayoc. ¿Nuquin tsusedpa Dabidèn bundoshon ambi petemaidquo pepampid chuiquin dada uapampid isamboda ictio? ⁴ Aidèn Nuquin Papa tabadte shubu uashunaid abí puduedtemaidèn puduedshun ambi petemaid pan sanaid istuidpampic. Aid panèmpi nèish yua abided unès uaquidon petequid nepampic. Aid panèmpi bedshun abèd icquidobèdtan Dabidèn pepampic. Aden nuqui bédambo icquid caidèn ambi natemaidi napampic. ⁵ Adembidì chonoattemaid ushèn natemaid chiaid niacquimbi nèish yua abided unès uaquidon aid ushèmbi Nuquin Papa tabadte shubu uashunaidèn puduedshun nacnendenepc. Nuquin Papan chiacpadomboen naiqui icsainquoio icpec. ⁶ Nuquin Papa tabadte shubu uashunaid tantiaquin adopec. Aid shubu bédapabi icnuc bédamboshè icquid nebi. ⁷ Nuquin Papan naden chiaid mimbi bédamboen tantienquoio iquec.

“Èmbi chiacpadomboen abentse-abentsen mimbi naic.

Adoquimbi èmbi chiaid utsi niaquec mimbi icsaido caido mimbi bédamboen istiapimbo iquec.

Adsho isun: ‘Mibi bédambo iquec,’ catiapimbo iquebi.”

quequin Nuquin Papan chiaid bédamboen tantiaashun èbèd icquidon bédamboen nasho mimbi chushcainquoio ictsenoc. ⁸ Tantia. Nuquin Papan chomiaid icquin chonoattemaid ushè èmbibi chiampid icnuc èmbi tantiacpadomboen aid ushèmbi èbi tantiaquido namembique —quepondash Esus èmbi petsècsho istuidquido chieic.

Mèicsatsaid bédamiaid

(*Mad 3.1-6; Duc 6.6-11*)

⁹ Adanec nidec Nuquin Papan chiaid chuibante shubun puduedshun ¹⁰ isaquien mèicsatsaid icpondash. Adnubien padiseyobon: —Chonoattemaid ushèmbi bédamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —queshun Esus chuituidpondash. —¿Nadquid chonoattemaid ushèmbi matses bédamequinda Nuquin Papan chiaid niacpec? —caquien ¹¹ Esusèn: —¿Ada min nèish yua obeca caid icpec? Adquid chonoattemaid ushèn shècuè uquèduc ampaèdacsho istuidshun ¿chiquenquioda mimbi icpatsia? Ai, mimbi chictsiac. Chonoattemaid ushèmbi mimbi chonoadquin chicpatsiac. ¹² Aden min obeca bèdiactsèc tantiec mibi bédapabi icnuc matses tantiaquoioquin nashunquid bédamboshè ictsiash. Nadquid chonoattemaid ushèmbi matses aden bédamboen nashunquidèn Nuquin Papan chiaid niaquienquoio ictsiash —quequin Esusèn abi icsamenu caquido chuipondash.

¹³ Adotanquimbien Esusèn mèicsatsaid chuiquin: —Mècuetà —cac mècuec bédampondash aton mèdante abiuc daèdi bédambo yec. ¹⁴ Adsho isashien abi chieshènquido padiseyobo nèishquiopac caondash. Adec nèishanec nidash aton matses utsibobèd: —Cuesunequimbien Esus ictiad —quecuedepac caondash.

Esusèn nate èndenquimboshè chiampid

¹⁵ Adnubien Esus: —Èbi cuesunetiadquoio iquec —quianec auèshquiobi puduanec nidpondash. Nidsho isumbien matses dadpeshun tsibanampondash. Adshumbic aidon bèaid daicsaidotedi bédamebampondash. ¹⁶ Adshumbic ambi bédamiaido chuiquin: —“Bèdamioshi,” quenda —quequin chuipondash Esusèn: —Èbi abi chuiquid dapa icmenushè —quish adpondash Esus. ¹⁷ Aden Esusèn nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Èmbi chomiaid èmbi chiacpadomboen naquidquoio nec.

Aid tantiaquieci bēdambo iquebi.

Con Mayan bēdambo icquid abēdi tabadmembī.

Adoac ěmbi bēdamboen iste isadaidbobēdta matses utsibo abitedi bēdamboen chiendac.

¹⁹ Chushcanante bunenquio yec ancanenquio iquendac.

Chuiquid dapa ictiapimbo iquendac.

²⁰ Icsambo icquido yec shubiquido yec natiaic tabadquido yec daicsaido yec quequidon abi bēdiactsēc tantiabentsēcsho bēdamboen isquin bēdamboen tantiamendac.

Nuquin Papan chiacpadec cuidte ushē choabi icnuc adoendac.

²¹ ‘Nuquin Papan tantiacpadomboen matses bēdamboen namendac,’ qeshun nidaid utsi-utsiec yacnocquidon matses dadpenshun aidi tantierendac,’

quequin Esusēn bēdamboen nate chuiampic Isayasēn.

Podobitsi icsan namiaidi Esus nec, quiaid

(*Mad 3.20-30; Duc 11.14-23; 12.10*)

²² Adnubien Esus ismenuen daicsaid bēpondash. Dapuduedshun podobitsi icsan bēshu uain eme uaidi onquesa nepondash. Isenquio yec onquenquio icshobien Esusēn bēdamepondash. Adoac isbenequi onquiampondash. ²³ Adsho isashien Esus datsidadquido: —Is. Comapenen tantiaquin nabanquidquio nēid neque. ¿Nuquin tsusedpa Dabidēn tsyuecquidta nepec? Adquid yec nuqui cainaidquio Nuquin Papan chomiaidien nechitec —quequededpondash.

²⁴ Adsho tantiaish Esus chieshēnquido padiseyobo: —¿Aidta nedic? Ma aidpenquio neyoc. Betsibu caidēn podobitsi icsan icbon namiaid icquimbien Esusēn podobitsi icsa cuemechitec —quequin otacquo tantiapandash.

²⁵ Adshobien Esusēn aidon otacquo tantiaid ambembi tantiaishun naden chuipondash. —¿Adquidēnda aton yuabi cuemepatsiash? Padenquio. Chuiquid dapan aton yuabo nēishtanquin chushcac cuēsh-cuēshēdec aton yuabo uesadec nietsiash. Aido nibēdnuc chuiquid dapa ictiapimbo ictsiash. Adecbidi shubu dadpen icquidēn tabadquido chushcananash cuēsh-cuēshēdec niqian shubu dadpen icboedi daēdpactsēc yanec. ²⁶ “Betsibu caidbidi Satanas caidēmbi namiaquien podobitsi icsa cuemechitec,” mimbī ěbi capoc. ¿Ambi naid nashobida Satanasēn aton yuabo podobitsi icsabo cuemepatsiash? Padenquio ictsiash. Satanasēn cuemiac aibdēdi aton yuabo cuēsh-cuēshēdtsiash. Adnuc Satanas aton icbopenquio yantsiash. ²⁷ Mibēd icquidon podobitsi icsa dapuduedaid cuemiac caosh. ¿Cuemesho isun mimbī ěbi chiacpadomboen: “Betsibu caidēn namiaquien nachitec,” cainda ictio? Ma mimbī padenquio icpaboc. Mimbī adoac: “Mimbī icsamboen chiech,” quetsenosh podobitsi icsa dapuduedaid cuemequido mibēd icquido. ²⁸ Nuquin Papan Mayanēn namiaquimbī podobitsi icsa cuemioc. ěmbi adosho isash: “Nēbi matsesbēd icquin Nuquin Papan namiaidēn naosh,” quetiadquidi mibi nec —quepondash Esus.

²⁹ Adashic abi onquec: —Tantia. Mibi chuinu. Ampenuesho icbon istuidac ampequidēn icbo uidēn uabi ampeshunquid. Adecbidi Satanas bēdiactsēc tantiaquid icnuc ěbien comapenen tantiaquidquio nec. Uidēn uacimboben nadatiambo icquin nabanquin aton yua cuemepombi.

³⁰ ěbi con icbo cainquio icquido Satanasēn yuabo nec. Adquid icquin ěbi chieshēnquin ěbi tantiatsēcquido cuēshēdmendac. Adquidbidi mibi nec —quequin Esusēn abi chieshēnquido chuipondash.

³¹ Adshumbic nadentsen chuipondash. —Nuquin Papan chiaid niac-niacboedēmbi ěnacsho Nuquin Papan bēdamboen isec. Nuquin Papan icsamboen chuishunquidēmbi abi icsaid ěnacsho Nuquin Papan bēdamboen isec. Aton Mayanēn namiacsho isash: “Icsambo iquec,” quequin bēdamboen tantienquio icsho Nuquin Papan bēdamboen istiapimbo iquec.

³² ěbi chieshēnquin icsamboen chuishunquidēmbi ěnacsho Nuquin Papan bēdamboen isec. Aton Mayanēn namiacsho isash: “Icsambo iquec,” quequin icsamboen tantiaisho Nuquin Papan bēdamboen istiapimbo iquec. Aden ěnenquio icquin icsamboen tantiaisho adem-bidi ěnenquio icquin bēdamboen istiapimbo iquendac —quequin abi chieshēnquido Esusēn chuipondash.

Bēdambo icquid nec, quequin tantiate chiaid

(*Mat 7.15-20; Duc 6.43-45*)

³³ Adshumbic naden bēdamboec tabadte Esusēn chuipondash. —Cuēte bēdan bacuē bēdambo iquec. Cuēte icsan bacuē icsambo iquec. Chetequid isun cuēte dada matsesēn tantiec. Adembidi matses bēdambo icquid bēdamboec onquec bēdamboec tabadsho isun: “Aid bēdambo icquid nec,” quequin matsesēn tantiatsiash. ³⁴ Ma mibi adquidpenquio neyoc. Nisibimboec icsa uanquido mibi nec. ¿Icsambo icquinda mimbī bēdamboen chuidio?. Ma mimbī padenquio icboc. Mimbī icsamboen tantiaid ma mimbī utsibo icsamboen

chuihoc. ³⁵ Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimi icsamboen chuihoc. ³⁶ Ambi cuidte ushën Nuquin Papan: “¿Ada bëdamboen tantiaquin chuidenio?” quequin matses abitedi chuimendac. ³⁷ Adoac abimbo chiec: “Ai, bëdamboen nadeniombi,” qesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” qesho icsano nidmequin cuideque. Icsamboec onqueboedi ënëda —quequin Esusën abi chieshënkuido chuipondash.

Padiseyobon: Èbi isme, quequin Esus chiaid
(Mad 8.12; Duc 11.29-32)

³⁸ Aden chuisho tantiaishumbien abi chieshënkuido utsibon Esus chuituidpondash. —“Nuquin Papan chomiaidini nec,” quequin ëbi ismequin nadatiambo icquin nabanta. Isnu —quepondash padiseyobo Moisesën dada uapampid chuihanquidobëdi.

³⁹ Adoaquien Esus: —Padi. Nuquin Papan chiaid niac-niaquec mibi icsamboshë iquec. Èbi tantiate bunenquo icquimbi mimi: “Èbi isme,” ëbi capec. Adsho nëbi mibi ismenquo iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi. ⁴⁰ Chishcambieccquid dapan chebudac aidën pucun uec daëdec ushacno ucbudac Onas padpidec nidpampic. Adecbidi unësascho chococac Onas yampicpadec daëdec ushacno uincuenendabi. Aden ismendambi. ⁴¹ Èbi tantienquo yec mibi icsambo iquec. Padnuen Nuquin Papan chiaid Onasën chuihanac shubu dadpenquo icquid Ninibe caid yacnocquido badedi icsainquo yec ënëdpampic. Nuquin Papan chiaid chuihanquid Onas bëdambo icpampic. Èbien bëdamboshë icquidquo nec. Adquid icquin nadatiambo icquin dadpen ismiaqui mimi ëbi tantienquo iquec. Aden ëbi tantienquo icquido icsho Nuquin Papan matses abitedi cuidte ushën Ninibe caid yacnocquido: “Icsambo iquec,” mibi caindac. ⁴² Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantie chopampidënsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamidënkuido Sadomonën bëdamboen chuipec,” quepampic. Èmbien abitedi tantiaquid icquin nadatiambo icquin ismeuidpoc. Adoqui mimi tantienquo icpec —quepondash Esus abi chieshënkuido chiec.

Abi nianaïd podobitsi icsa dapuedoaid
(Duc 11.24-26)

⁴³ Adshumbic naden Esusën chuipondash. —Icsaquido mibi nec. Podobitsi icsa dapuedaïdbimboecquid mibi nec. Tantia. Mibi chuinu. Abi dapuedaïd matses nianashi podobitsi icsa abi dapuedtequid nibëdacno yuec capucuen-capucuenec. Adtanequi: “Èbi icbocnobi dapuedoac nidebi,” quianec choec. ⁴⁴ Chonobi ambi niamboed matses: “Èbi dapuedaïd podobitsi icsa nibëdnuc bëdambo iquebi. Adquid chomeoatiapimbo iquebi. Èmbimbo naic bëdamboec tabadquidquo nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquo nëid nec,” quianec ⁴⁵ abipadquid utsi bedec nidoaic. Nidshumbic 7tedi icsamboshë icquido istuidshun bëash aidobëdi dapuedec. Adnuc podobitsi icsa abentsëc dapuedaïd yec ënden icsambo icboedi aido dadpen dapuedaïd yec buëdanquiec aid matses icsamboshë yanec. Adquo mibi iquec. “Bëdambo iquebi,” queboedi nëbi mibi icsamboshë yanec —quequin Esusën chuipondash.

Anibëdi Esusën utsibo choaid
(Mad 3.31-35; Duc 8.19-21)

⁴⁶ Adanec shubun puduedshun Esusën abëd puduedquido dadpen chuinubi aton utsibo aton titabëdi Esus isnuec chopac caondash. Umanuc tabadnubi ⁴⁷ utsin puduedshun Esus chuituidpondash. —Mibi isec tita min utsibobëdi choaccosh. Umanuc tabadec —caquien badedi nidenquo yec ⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin ⁴⁹ abëd icquido mëdquin ismepondash. —Nëid ëbëd icquido con utsibo caimbi. ⁵⁰ Nuquin Papan chiacpadomboen naquidquo icsho con matses caimbi. Con utsi caquinc con chibi caquinc con ta caquinc caimbi —quepondash Esus.

13

Piacbo ëshë siaïd chiaïd
(Mad 4.1-9; Duc 8.4-8)

¹ Adtanec nidec chian budash cuëmano tabadtuidpondash. ² Tabadtuidsho isash matses dadpenquoio cho-choash tsucus-tsucustsëcquoio yec Esus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

³ Adshumbic abi tantiate chiuinen naden ompoacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquoio. ⁴ “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid. ⁵ Èshë utsibic nidaid tsasimbo yacno siac badedi dëyucuidash ⁶ aton tapun nidaidën puduedenquoio icnuc ushë chënquequidën badedi unësquid. ⁷ Èshë utsibic nisanquid diadacno siaid dëyucash caniduidtsëcsho nisanquidën dayunac unësquid. ⁸ Padnuen ëshë utsi-utsiec nidaid bëdanquoio siac dëyucash caniaash dadpenquoio ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

⁹ Adashic: —¿Min pabiäte shëcuë nibëdquieta iquec? Èmbi chuiboed bëdamboec pausudta —quepondash Esus.

Ompoacbimboen chiec nebi, quiaid

(Mad 4.10-12; Duc 8.9-10)

¹⁰ Adsho tantiaashun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien ¹¹ Esus nadpondash. —Utsibo tantiamenquoio icquin Nuquin Papabëd tabadte chuiquin nëbi mibiuidtsëqui tantiamembi. ¹² Nuquin Papa tantiatiaidquoio icquidën ëbi tantiaasho bëdamboen tantiamendambi. Nuquin Papa tantiauidtsëcquidën ëbi tantienquoio icsho ëmbi ompoacbimboen chiac tantienquoio ictsiash. ¹³ Ompoacbimboen aido dadpen chuibanembi. Èmbi naid isun ëbi tantienquoio iquec. Èmbi chuisho pamumëdacbimboen tantienquoio iquec. Adsho aidon tantiatiapimbo icnuc chiembi. ¹⁴ Nëidon tantienquoio icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquoio iquendac.

Ismiac isquiboshombi: ‘Ai, aidi nec,’ cainquoio iquendac.

¹⁵ Ai, ëmbi chiaid tantiatiapimbo iquec.

Ushacbimboen tantienquoio yec pamumëdacbimboec chieshëmënnquidombo iquec.

Èbi tantiate bunenquoio iquec.

Èmbi chiaid tantiaquidombien paposhquiachimboen bëdamboen tantiabentsiash.

Pausunacbimboen tantiaashun ëmbi chiacpadomboen natiadquoio yansho aton chiesh bëdametsiambi. Aton chiesh bëdamete bunenquoio iquec,”

quequin Nuquin Papan dada uamepampic —quepondash Esus abëd icquido chiec.

¹⁶ Adashic aidobidi chiec: —Isayasën chiacpadomboen utsibon ëbi tantienquoio icnubi mimbien ëbi tantiec. Èbi isec mibi tabadec. Èmbi chuibansho tantiaash: “Ai, abimbo caic,” quec mibi bëdambo iquec. ¹⁷ Èbi chote chuiampidobëdtan bëdamboec tabadquido dadpenshun mimi bëdambon ëbi isacpadomboen ëbi iste bunequi ëbi isambobi unëspampic. Mimi ëmbi chuisho tantiacpadomboen tantiatiaidquoio yequi tantiambobi unëspampic —quepondash Esus.

Piacbo siaid sebadënquoio chiaid

(Mad 4.13-20; Duc 8.11-15)

¹⁸ Adashic abi onquec: —Tantia. Èmbi piacbo ëshë siaid quequin chuiboed sebadënquoio mibi chiuinu. ¹⁹ Nuquin Papabëd tabadte chiaid piacbo ëshë siaidbimboecquid nec. Nuquin Papan chiaid chiaqui tantiaidenquoio icsho Satanasën nac badedi bëshumpec. Uicchunën piacbo ëshë paëdaid badedi chiacbimboen adopec. ²⁰ Utsibic Nuquin Papan chiaid chiaqui bëdiactsëc tantiauidtsash: “Bëdambo iquec,” quec cuishonqueuidtsec. ²¹ Adsho: “Nuquin Papan chiaid tantiaquid nec,” qeshun utsibon chieshënac badedi chieshtoshon tantienquoio yanendac. Piacbo ëshë tapunuidtsash unësacbimboen adoendac. ²² Utsibic Nuquin Papan chiaid tantiatiasashi ambi dacuëdquin tantiaiduidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquoio icpec. Isitodon dayunac unësacbimboen adoendac. ²³ Padnuen utsibon tantiate nidaid bëdan siaidbimboecquid nec. Nuquin Papan chiaid chuisho tantiaquioshon ambi tantiaid bënuainquoio icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsëc adquidbidi yanendac —quequin abi tantiate chuipondash Esusën.

Èshë icsambo icquid seuanaid chiaid

²⁴ Adshumbic Esusën naden chuipondash. —Tantia. Nuquin Papan namiaid tantiamenuen utsi chiacimboen chuinu. Tiedën caniquid pete adosbiecquid icbon siac caondash. ²⁵ Adanec nidambic inchëshëmbi choshon chieshëmënkuidën êshë icsambo icquidtsen daëd uain seuanac caondash. ²⁶ Adoac adosbiecquid canidotsëcnubi abëdi tancandaëdpamboec icsambo icquid canidotsac caondash. ²⁷ Adsho istanquin yuabon aton icho chuituidpac caondash. “¿Pete êshëda sio?” cac: “Ai,” qesho tantia: “Icsambo icquidbëd tancandaëdec canidopacoc. ¿Mitsipaden sio?” quequin yuabon icho chuipac caondash. ²⁸ Adoquien: “Chieshëmënkuidëmbien seuanchitash,” cac: “¿Chichshunetanquindambi icpe?” yua qesho: ²⁹ “Padi. Petebëdi chiquidtsiash. ³⁰ Aidbëdi ma canipanuna. Êshëacsho tacuesquimbi teshun sianun nanuna. Adoshombic icsambo icquid tsindobanshun nêdëncanun nanuna. Icsambo icquid nêdëncatanquimbic pete bedshun sandoshon shubun dectandonon nanuna,” quepac caondash tied icho —quequin Esusën chuipondash.

Esus tantiaquido dadpen yante chiaid
(Mad 4.30-32; Duc 13.18-19)

³¹ Adshumbic abi tantiaquido dadpen yante tantiamenuen Esusën naden chuipondash. —Cuëte bacuë êshëmpi ³² pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquo yanendac —quepondash Esus.

Abi bëdamboen tantiate Esusën chiaid
(Mad 4.33-34; Duc 13.20-21)

³³ Adshumbic Esusën abi bëdamboen tantiate chuipondash. —¿Mitsipad nami uaid icpec? Aniactëc nami uashun utsibëda daëd uain cabiunac abichobi batambo yanec. Adembidi ëbi bëdiactëc tantiatsëcboedi ëmbi chiaid tantiahi ëbi bëdamboen tantiaquid yanendac ³⁴ —quequin Esusën chuipondash. Sebadënquo chienquo icquin ompoacbimboenuidi Esusën chuipondash. ³⁵ Aden Esusën chuie chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec. “Sebadënquo chienquo icquin ompoacbimboenuidi chuibanendambi. Êndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec. Nëbimbi chuibanendac,” quequin nuquin tsusedpan Esusën chuie dada uapampic.

Êshë icsambo icquid seuanaid sebadënquo chiaid

³⁶ Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmënkuidën êshë icsambo icquid siaid nec,” quequin mimbi chuiboed en sebadënquo chui, Ichob. Tantianu. ¿Atotsi chuitiadquido icquin aden chio? ³⁷ —caquien Esusën chuipondash naden. —Tantia. Mibi chuinu. Pete êshë bëdambo icquid sequidbimboecquid nebi. Nuquin Papan chiaidquido tantiamequin matses bëdambo icmequid nebi. ³⁸ Padnuc tied dapabimboecquid nidaidën tabadquidtedi nec. Padnuc pete êshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënquid Satanasën yuaido icsambo icquid siaidbimboecquid nec. ³⁹ Padnuc êshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquin icsametiadquido iquec. Adsho badedi cuidenquo icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuen ambi chiapadën Nuquin Papan abi yacnoshon uaido mayan bëdabon ëmbi chiapadomboen naindac. ⁴⁰ Icsambo icquid tsindoshon nêdëncacimboen Nuquin Papan cuidte ushëmbi icsambo icquido cuidendac. ⁴¹ Êmbimboen mayan bëdabo namendac. “Icsamianquidobëda icsaidotedi bedshun chian anêdënquiacno nêseca,” quequin ëmbi chiac ⁴² bedshun chian anêdënquiacno nêsecaindac. Adoac natiaic mëyadbudëc sidquequiendac. ⁴³ Padnuen ëbi tantiec bëdamboec tabadquido Nuquin Papan yacno nidash icsatiapimbo icquid iquendac. Êmbi aden chuiboed tantiaishun ëmbi chiapadomboen nata —quepondash Esus.

Nuquin Papabëd tabadte bunquiota, quiaid

⁴⁴ Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan êndenquimbo ompoampid piucquid dadpenquo icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icho aid piucquid meneshun: “Nëbi con tied nec,” qeshun piucquid ompoampid bedpac

caondash. Adomboen matsesën Nuquin Papabéd tabadte bunquin aton nauidi nainquio icquin Nuquin Papan chiacpadomboenuidi nac bédambo ictsiash.

⁴⁵ Tántia. Casëdu bédaidquio bunaidtsen mibi chuinu. Dadan casëdu bédaidquio bunquin bednuen nibënenepac caondash. ⁴⁶ Adshun bédaidquio istuidash: “Nadquid utsi nibëdec,” quíash comapenec bunquiac caondash. Adshun aton na abitedimbo menequin piucquid bedshun casëdu icho menequin aid casëdu bedac caondash. Adomboen Nuquin Papabéd tabadte bunquin matsesën ëbi tantiaquiac bédambo ictsiash —quepondash Esus.

Nuquin Papan cuidte ushë Esusën chiaid

⁴⁷ Adshumbic Esusën naden chuipondash. —Tántia. Mibi chuinu. Nuëcquid nibedac bimboen naindami. Isadaidbon nuëcquid dadpenquio bedte nëshaid dapa acte nënequin ⁴⁸ nëshaid cubu-cubuctsëcquio icnu nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaidbon nuëcquid bedquid. ⁴⁹ Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedac bimboen matses bédambo icquido Nuquin Papa yacno nidmequimbi ⁵⁰ icsambo icquido chian anëdënquiacno nësecaindac. Adoac natiaic shubiquiendac —quequin Esusën Nuquin Papan cuidte chuipondash.

⁵¹ Adshumbic: —¿Ada ëmbi chuiboedtedi tantie? —caquini: —Ai, tantiembi —quepondac. ⁵² Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbédta aton na chuca ismequin chiacbimboen mimbi naindac. Nuquin Papan chiaid ëndenquimbo dada uampidbédtabi Nuquin Papan chiaid utsi ëmbi chuiboedquio mimbi chiendac —quepondash Esus.

Nasaded yacno Esus nidaid

(*Mad 6.1-6; Duc 4.16-30; Uan 4.44*)

⁵³ Adanec auëshquiobi nidequi ⁵⁴ abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiebampash neba? ¿Mitsipadec comapenen tantiaquin bédamequid yampash? ⁵⁵ ¿Nuqui isacmaida nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidedti aton utsibo iccosh. ⁵⁶ Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquio neyoc —quequin ⁵⁷ Esus chieshënquin tantienquio icpondash.

Adsho tantiashun Esusën nadopondash: —Nuquin Papan: “Ëmbi tantiamiacpaden chuibanta,” caidën chiac utsibon tantiaquid. Adquidën abi caniacnoshon chuiban-sho tantienquio icquid —quepondash Esus. ⁵⁸ Adshun nadatiambo icquin nabanquin daëdpactsëc ismetsëccondash: —“Nuquin Papan chomiaidquio nec,” quetiapiombo iquec —qeshun.

14

Uan acten mentoanquid

unës uaid

(*Mad 6.14-29; Duc 9.7-9*)

¹ Adnubien ancaquidën Edodes caidën Esusën comapenen tantiaquin nabanaid chuisho tantiapac caondash. ² Adshumbic aton yuabo chuipac caondash. —Uan pado acten mentoandened nepash icnui. Ëmbi mapi butemiondaidi uincuempash icnui. Adquid icquin comapenen tantiaquin nabampash icnui —quepac caondash Edodes.

³⁻⁴ Edodesën Uan cuesuniac caondaid chuinu. Tántia. Uanën: —Mimbi bedaid Edodias caid min chidopenquio nec. Min utsi Uedipe caidën chido bedshun Nuquin Papan chiaid mimbi niaquec —cadoniaquien Edodesën chieshtoshon uidën uameshun Uan quënën nauedmepac caondash.

⁵ Adshumbic Uan cuesunetiadquio icquimbi aton matses: —Nuquin Papan chiaid chuibanquidquio nec —qesho tantiashun aido dacuëdënquin Uan badedi cuesunenquio icpac caondash.

⁶ Adshumbic Edodesën: —Ëbi tishaid ushë nec —qeshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaido baidaquin ismepac caondash. Adsho isumbic Edodesën: —Bédamboenshë mimbi naic —qeshun ⁷ naden chuipac caondash. —Tántia, champi. ¿Atotsi buneque? Mibi bunaidquio mibi menenu. “Nuquin Papan cuidnushe,” quíash muatiapimbo iquebique. En ëbi chui —capac caondash Edodesën. ⁸ Adoaquien champin aton tita chuitampac caondash.

Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaid dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemete bumpac caondash.

⁹ Adoquien Edodesën: —¿Atotsi quepequini ado? ¿Adoenquo ictiadtsimbi icpoba? —quequin ambi chuiboed niactiadquico icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰ Adoac quënën tsadacnobi Uan mapi buteshun ¹¹ mapi pada-padaid ananshun buanshun champi menepac caondash yuabon. Adoquien champin ani menenun buampac caondash.

¹² Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemiaid

(*Mad 6.30-44; Duc 9.10-17; Uan 6.1-14*)

¹³ Nidshumbic: —Mibi acten mentondaid mapi butiaccosh —catuidpondash. Adsho tantianec cano antabëdtoshon chian potiasch pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

¹⁴ Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquico icquin daicsaidotedi bëdamebampondash.

¹⁵ Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien ¹⁶ Esusën: —Padi. Ma tabadnu. Mimbibi peme —capondashi.

¹⁷ Adoquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac. ¹⁸ Adsho: —Aidtedtsëqui beccho —cac meniondambi.

¹⁹ Adoquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquien Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

²⁰ Adoquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubucubuctsëcquico iquec pete cuësh-cuëshaid napi uaid. ²¹ Aden matses dadpenquico pemebampondash. Aido dadatedi tambanac 5000tedi icpondash. Aton chido aton bacuëbôbëdta tambanambo iccondambi.

Acte bëntse Esus choaid

(*Mad 6.45-52; Uan 6.16-21*)

²² Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. ²³ Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

²⁴ Adnubien chian dapa potequi abëd icquidotsen inchëshpondash. Chian nënantanquico yanubi cunquetuidpondash. Adnuc acte comapenec tëcguasquiampondash uncadenquico yec. Comapenec acte ishcdnuc cano mentoadtiadpambo icpondash.

²⁵ Adnubien badiacte anoentsëqui acte bëntse Esus chopondash. ²⁶ Acte bëntse chosho isashini: —Podobitsi nec —quiasch dacuëdtanec sidquecuededpondac. ²⁷ Adshobini Esusën: —Ëbien neque. Dacuëdenda —capondash. ²⁸ Adoquien Petedon: —¿Con Icbombobida ne? Con Icho icquin: “Acte bëntse cho,” ëbi ca —capondash.

²⁹ Adsho tantiasnun Esusën: —En cho —caquien Petedo canonoesch budanec acte bëntse Esus bëquedbanec niduidtsëccondash. ³⁰ Esusuidi isec bëdamboec niduidtsequi acte comapenec tëcguasquesho isash dacuëdtanec acte bëntse niduidtsëcboedi mentoadtsempondash. —Ëbi bed, Icho. Mentoadebique —caquien ³¹ Esusën badedquico bedtanquin indopondash. Aden indoequi: —“Con icbon ëbi bëdamboen nametsiasch,” queboedi ¿atotsi quiasch dacuëdtano? Ëbi bëdiactsëc tantiatsëcquid mibi nec —quepondash Esus Petedo caic.

³² Adtanec Petedobëdi cano antsadtonobien cunqueboedi cunquenquico yampondash. Actetsen tëcguasquenquico yanondash. ³³ Adsho isun cano antabëdquidon: —Mibi bëdamboshë iquec. Comapenen tantiaquidquico yec Nuquin Papan Madombo mibi nec —quequin Esus tantiabededpondash.

Quenesaded yacnoshon Esusën bédamaïd
(Mad 6.53-56)

³⁴ Adshic chian potiaſh Quenesaded yacno pudundopondash. ³⁵ Pudundoshon isun anocquidon: —Esus chosh—quequin uanocquido abitedi chuibeniac daicsaido abitedi bēbēpondash. ³⁶ Bē-bēshumbic: —Dashcuteuidtsēqui mishashi bēdantsiaſh—queshun Esus chuituidquin: —Min dashcute cuēmano daicsaido mishme —cac mishmiaqui bēdampondash abitedi.

15

Padiseyobo icsaid Esusën chiaïd
(Mad 7.1-13)

¹ Adnubien padiseyobo Moisesën dada uampid chuibanquidobēdi ſhubu dadpen icquid Edusaden caïd yacnuēſh cho-choquin Esus istuidpondash. ² Istuidashic: —¿Atotsieshun mibēd icquidon nuquin tsusedpabon chiaïd niac-niacpaboc? Penush mēpamēdenquo icquin nuquin tsusedpabon chiaïd ma niac-niacpaboc—quepondash Esus chieſhēnquido.

³ Adsho tantiaſhun Esusën: —Ma mimbi. ¿Atotsieshun Nuquin Papan chiaïdquido niac-niaque? Nuquin tsusedpabon chiaçpadomboen naquin ma mimbi Nuquin Papan chiaïdquido niac-niacpaboc. ⁴ Tantia. Mibi chuinu. “Titabēdta papa chieſhēnenquo icquin bēdamboen tantiaſh,” quequin Nuquin Papan chiaçpidquido ma mimbi niacpaboc. Adembidi: “Con pa unēſpashun, quec chieſhēmēnquid icſho unēs uaquid. Adembidi ani icsamboen chuishunſho unēs uaquid,” quequin Nuquin Papan chiaçpid utſi mimbi niacpec. ⁵ Aid niacquin nuquin tsusedpabon ambembi chiaïdien mimbi chieç. “Anibēdta amē naden cudasēnac bēdambo icſtiaſh,” mibi quepec. “Nuquin Papa menetequid nēïdted con piuçquid iquec. Mitsana nibēdsho menetiadquidi mibi menenquo iquemi. Nuquin Papa menetequid nec, quequidē ⁶ cudasēnac bēdambo icſtiaſh,” mibi quepec. Aden nuquin matsesën chiaïd naquin Nuquin Papan chiaïdquo ma mimbi niac-niacpaboc. ⁷ “Nuquin Papa tantiaquidquido nebi,” quec muaquid mibi nec. Èdenquimboshē Nuquin Papan chuimiac nuquin tsusedpa Isayas caïdēn mimbi icsamboen tantiate chuiquin dada uapampic naden.

⁸ “Isadaïdbo: ‘Nuquin Papambo tantiembi,’ quepec.

Adboedēmbi ēmbi chiaïd niacquin ēbi tantienquo iquec.

⁹ “Ma Nuquin Papan ēbi bēdamboen isnu,” queboedēmbi ēbi bēdamboen tantienquo iquec.

Èmbi chiaïdquido namenquo icquin aton matsesën chiaïduidi namepec.”

quequin Isayasën Nuquin Papan chiaïd dada uapampic—quequin Esusën abi chieſhēnquido chushcapondash.

Ana ſhēcūēnuēſh choaid chiaïd
(Mad 7.14-23)

¹⁰ Adshumbic abi isec datsidadquido ompoachimboen chuipondash. —Tantia. Mibitedi chuinu. ¹¹ Ana ſhēcūēn puduedaïdēn matses icsaten mimbi dampec. ¿Adquidēnda matses icsapeç? Padenquo. Ana ſhēcūēnuēſh choaidēmbien matses icsatsiaſh—quequin Esusën chuipondash. ¹² Adnubien abēd icquidon: —Mimbi aden chuiboed tantiaſhun padiseyobon mibi chieſhēnosh, Içbo—caquien: ¹³—Dacuēdenda. Içsa beſcatanquin tsindoshon nēdēncacimboen ambi tantiamiabi yaido ambembi chuïquido Nuquin Papan cuideque. ¹⁴ Dacuēdenda. Padiseyobo bēſhuaidbimboec icquido neque. Bēſhuaidēn aton matses bēſhuaid utſi bēdamboen buantiapimbo iquec. Buanuec abi ſhēcūē ampaēdtsiaſh. Adembidi Nuquin Papan chiaïdpenquo namequin aton matses bēdamboen tantiametiapimbo iquec—quepondash Esus abēd icquido chieç.

¹⁵ Adshobien Petedon: —Mimbi ana ſhēcūēnuēſh choaid quequin chuiboed tantiambo iccombique. Aid ſebadēnquo chui. Tantianu, Içbo—caquien: ¹⁶—¿Tantiamboda icco?

¹⁷ Chuinu. Tantia. Ana ſhēcūēn puduedaïd mimbi peboed min pucun uedoash chimute ſhēcūēnuēſh choec. Adquidēn Nuquin Papan chiaïd niacmenquo iquec. ¹⁸ Matses onquaidimbi ana ſhēcūēnuēſh choaid caoc. Abibi uquēduçueſh onquec: “Adoembi,” quequin otacquo tantiaquin naic matses icsatsiaſh. ¹⁹ Içsambo icquido yec: “Ai, adoembi,” quequin otacquo tantiaſhun Nuquin Papan chiaïd niacſtiaſh nadquidēn. Nēdic unēs uanquid. Nēdic aton chidopenquo chudquid. Nēdic aton bēnēpenquo chudmequid. Nēdic aben uequid. Nēdic ampequid. Nēdic muaquid. Nēdic icsamboec chuishumēnquid.

²⁰ Adquidtedi: “Ai, adote bunebi” quequin otacquo tantiaſh icsaquid nec. Padnuen penush mēpamēdenquo icquin Nuquin Papan chiaïd niaquenquo icſtiaſh—quepondash Esus abēd icquido chieç.

Isadaïdpembo chidon Esus tantiaïd
(Mad 7.24-30)

²¹ Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

²² Adnubien anocquid cananeyabo chidon Esus cuëntuidpondash. —Tsusedpa Dabidën tsyuecquid Nuquin Papan namiaid icquin ëbi bédamboen ista. Con champi podobitsi icsa dapuduedaid yec natiambo iqueque. Con champi bédameta—caquien ²³ Esusën ëcbedenquio icpondash. Ëcbedenquio yaqui chidon tsibanbanquin cuënbampondash. Adsho tantiahsun Esusbéd icquidon: —Chieshanquiecuëdpeque. Cuemepa—caquien ²⁴ Esusën cuemenquio icquimbi aid chuiquin: —Nuquin Papan chiacpaden Isadaidbo matsesba Nuquin Papa bédamboen ismete tantiamenuc nebi. Bënudac bimboec icquin Nuquin Papa tantienquio icsho aidoba tantiamenuc nebi—quepondash Esus.

²⁵ Adsho tantiahs nidenquio yec chido cuëdboed Esus ismequin danëshën sebudtsec: —Ëbi nashunta, Icho. Con champi bédameta—qeshobien Esusën: ²⁶ —¿Aton bacuëbo pemenquio icquimbi aton opa pemiata bédambo icpatsiash? Padenquio. Adembidi Nuquin Papan con matses caidotedi tantamiabi utsibo ëmbi nashunac icsambo ictsiash. Isadaidboba tantiamenuc nebi—quepondash Esus.

²⁷ Adsho tantiahsun chidon: —Ai, abimbo mimbi caic. Padnuen bacuëbon pequin paëdmiaid opashëmpin petsëcquid. Adembidi mimbi comapenen tantiaquin nabanaqui isadaidbo dadpen bédanubi isadaidpembo abentsëc tantiaquid icsho ëbi nashunquin con champi bédameta ²⁸ —caquien Esusën: —Ai. Ëbi tantiaquidquio mibi nec. Mimbi chiacpadec min champi bédanendac—quesho tantianec aton shubuno nidshun isquien aton champi bédanac Esusën chuinubi.

Daicsaido dadpen Esusën bédamiaid

²⁹ Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

³⁰ Tabadtuidsho isun matses dadpenquio cho-choquin daicsaido dadpen Esus ismenuen bē-bēpondash. Tidinequido yec bëshuaido yec shëquëquenquio icquido yec onquesabo yec daicsaido utsibotedi yec quenuc bē-bēpondash. Adsho Esusën bédamebampondash.

³¹ Bédamiaic onquenquio icboedi onquianondash. Bëshuacboedëmbi isbenondash. Capuenquio icboedi capucuenondash. Daicsaido utsibo adecbidi bédanondash. Adsho isquido nadpondash. —¿Adquidta ictenec? Nuquin matses isadaidbon tantiaidën Nuquin Papan namiaid icquin bédamepash icnui. Nuquin Papa bédambo iquec—quepondash Esusën bédamiaid tantiahs.

Matses 4000tedi pemiaid

(Mad 8.1-10)

³² Adec tabadsho isashien Esus: —Nëido tantiac unësquio iquec. Ëmbi nabansho isnuec choash 3tedec ushquin piac ambi bëboed pete naimëdaccosh. Ëmbi: “Nid,” cac nidnuequi bunambi padishtsiash. Pemiabi nidmetiapimbo iquebi—quepondash. ³³ Adsho tantiahsun abéd icquidon: —¿Midambo pete bedtiapimbo iquec? Pemetiapimbo matses dadpen iquec—capondash.

³⁴ Adoquien Esusën: —¿Tedtsi panëmpi iquec? —cac: —Sieteted ictsec. Nuëcquidëmpi daëdpactsëc ictsec—quesho ³⁵ tantiahsunmbien abi datsidadquido chuiquin: —Nëmbo tabadbud—capondash. Adoac tabadbudpondash abitedi.

³⁶ Adshumbic panëmpibëdta nuëcquidëmpi bedshun Nuquin Papa chuipondash. —Nëid mimbi uaid bédambo iquec, Papa—qeshun pete cuësh-cuëshbantsëcsun abéd icquido menebampondash: —Pemeban—quequin. Adoac abitedimbo pemebampondash. ³⁷ Aden pemiatic abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsëcquio icnuc sandobampondambi. ³⁸ Esusën pemiaido dadpenquio icpondash. Tambanac 4000tedi dada icpondash. Chido bacuëbobëdta tambanambo iccondambi. ³⁹ Adashic: —Nidanec nid—quepondash Esus ambi pemeboedo caic. Aido nidanenubi chian budash cano antabëdtoshon Esusën chian potepondash. Chian potiash nidaid Mactada caid yacno pudundopondash.

16

Saduseyobon: Ëbi isme, quiaid

(Mad 8.11-13; Duc 12.54-56)

¹ Pudundoanec nidshobi anocquidon abi chieshënquidon Esus chuituidpondash. —“Nuquin Papan chomiaid nebi,” quequin comapenen tantiaquin nabanquin ëbi isme—cabededpondash padiseyobobëdta saduseyobon.

² Adshobien Esusën: —Nuquin matsesën chiaid mimbi tantiec. “Inchëshbudtsëqui abu piumbo icsho isash: ‘Tanunquio badiadec,’ quequid. ³ Badiadnubi abu inchëshpambo icsho

isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiacimboen bédamboen tantiatiadquidi Nuquin Papan nêmbobobi naid mimbi tantienquio iquec. ⁴ Icsambo icquid icquimbi mimbi: “Ëbi isme,” cadednepec. Nêbi mibi ismenquio iquembi. Nuquin Papan nuquin tsusedpa Onas chishcambieccquid dapan chebudacsho daëdec ushun ucbudmiacimboec unês uacsho chococac daëdec ushash uincuenendabi. Aden ëbi tantiesabo ismendambi —quianec nidpondash Esus.

Padiseyobon chiaid tantienda, quiaid
(Mad 8.14-21)

⁵ Adanec nidec chian budash cano antabêdtoshon chian poteoapondash. Chian potequien Esusbêd icquido: —Pete nianchitombi. Bêtiadquidi nepobi —quepondash. ⁶ Adshobien Esusën abêd icquido chuiquin: —Padiseyobêdtan saduseyobon naid pan bidiscameteimbocquid iqueque. Ista —caquien ⁷ tantienquio yec abêd icquido naded onquecuededpondash. —Nuqui niamboed pete chiequi nepanui —quepondash. ⁸ Adsho ambembi tantiash Esus: —Ëbi bēdiactsēc tantiatsēcquid mibi nec. ¿Mimbi pete niamboed chiectabi nedi? Padenquio. ⁹ ¿Bêshunashta mibi nepe? Pete Stedtsēcboedi ëmbi 5000tedi pemiaidên napi uaid dadpen iccondaid ¿tantienuoda yano? ¹⁰ ¿Adembidi pete 7tedi ictsēcboedi ëmbi 4000tedi pemiaidên napi uaid dadpen tsitsanên sandoboed tantienquioda yano? ¹¹ ¿Aden comapenen tantiaquid icquimbidambi pete niamboed chuipadi? Padenquio. Pan bidiscamete pictsēc cabiunac pan abichobi nua bidisquiacimbocquid padiseyobêdtan saduseyobon chiaid iquec —quepondash Esus.

¹² Aden chuisho tantiash abêd icquido nadpondash. —Pan chienquio icquimbi nuquin matses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbêdta saduseyobon chiaid tantienda,” quepecshenda niosh —quepondash Esusbêd icquido.

Nuquin Papan Mado mibi nec, quiaid
(Mad 8.27-30; Duc 9.18-21)

¹³ Adash yuectaniash puduanec nidequien Esus nidaid utsi Sesadeya Uedipo caidên nidanepondash. Adshumbic abêd icquido chuimepondash. —Utsibon ¿tsutsi ëbi caosh? —caquien: ¹⁴ —“Uan pado acten mentoanondaidien nec,” mibi caosh. Utsimbic: “Edias cuëmêdquid Nuquin Papan ambi tantiad oncamiampid nepanui,” mibi caosh. Utsimbic: “Edemias cuëmêdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abêd icquidon. ¹⁵ Adsho tantiashun Esusën: —Ma mimbibi. ¿tsutsi ëbi mimbi cao? —caquien ¹⁶ Petedo Simon caidên: —“Quidistu caid Nuquin Papan chomiaidquio nec,” caombi mibi. Aton Madombo mibi nec —capondash.

¹⁷ Adsho tantiashun Esusën: —Nuquin Papan aden tantiamiac mimbi bédamboen chioc, Petedo. Onasën mado Simon caid yec matsesien mibi nec. Adquid icquimbi matsesën tantiad chienquio icquin Nuquin Papan tantiamiaidquio mimbi abimbo chioc. ¹⁸ Tantia. Ëmbitsen mibi chuinu. “Cuënoteimbocquid nec,” quequin mibi Petedo cuë nondambi. “Cuënote dapa utsi ictiapimbo yacimboc chieshtoenquio icquid iquendac,” qeshun mibia ëbi tantiaquido chuiquid dapambo icmendambi. Adec mibi namiaido ëbi tantiaquido iquendac. Satanasën aido: “Nêid yuanu. Utsibic chieshtomenu. Utsibic unês uamenu,” caqui abi ëbi tantiaquido iquendac. ¹⁹ Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidsen mimbi chiendac —quepondash Esus Petedo chiech.

²⁰ Adashic abêd icquido abitedi chuioc: —“Nuquin Papan chomiaidquio nec,” quequin utsibo ëbi chienda —quepondash Esus.

Abi unês uate Esusën chiaid
(Mad 8.31–9.1; Duc 9.22-27)

²¹ Adshumbic tauaquin abi unês uate chuidondash. —Shubu dadpen icquid Edusaden caid yacno nidendabi. Anoshon nuquin matsesën ëbi chieshênquidendac nêidtedshun. Nêidic tsusiobon. Nêidic nêish yua abided unês uaquido chuiquid dapabon. Nêidic Moisesën dada uampid chuibanquidon. Aitededshun mëyanquioquin ëbi unês uamendac. Adoacsho chococac daëdec ushash uincuenendabi —quequin chuisho ²² tantiashun Petedon uanotantsēcquin tsadumbudshun Esus chuipondash. —Unêsquio icnuc mimbi chieque. Aden chienda. Ma mibi unês uatiapimbo icpayoc —capondash Petedon. ²³ Adoquien Esusën: —Satanasën oncamiac Petedo adec onquec —qeshun Petedo isquin Satanas chushcapondash naden. —Cuen, Satanas. Nuquin Papan chiaid mimbi ëbi niacmetiadquio iqueque. Cuen —quetanec Petedobi chiech: —Matsesën tantiad chuiquimbi Nuquin Papan tantiadquio mimbi chienquio iccoco —capondash.

²⁴ Adashic abèd icquidotedi chuoiaic: —Èbi tantiaquidon aton nauidi nainquo icquin èmbi chiacpadomboen natsiash. Adsho chieshèménquidon: “Unès uachitomane,” cac chieshtoenuquo icquin èbi tantiatsiash. Adquid èbi tantiaquidquo nec. ²⁵ Padnuen èbi tantiatsèquid: “Esus tantiasho unès uachitoshè,” quiash èbi tantienquo yanec unèsash Nuquin Papan cuidaidobèd nidendac. Padnuen chieshtoenuquo icquin èbi tantiaquid Nuquin Papa yacno tabadendac. ²⁶ ¿Nuquin Papa tantienquo yec tabadecta matses bédambo icpatsiash? Abi bunaidtedi bedquin Nuquin Papa tantienquo yec unèsash ¿mitsimbo tabadpatsiash? Nuquin Papabèd tabadte bunquin ¿atotsi menepatsiash? ¿Piuquid meniashta Nuquin Papa yacno tabadpatsiash? Padenquo. Adotiapimbo iquec. ¿Atoda meniantiapimbo iquec? ²⁷ Èmbien matses cuidte chiendac. Nuquin Papa yacnuèsh ambi abi yacnoshon uaido mayan bédabobèd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bédamboec tabadquid Nuquin Papabèd tabadmequin Nuquin Papa tantienquo yec icsaquido icsano nidmendambi. ²⁸ Tantia. Chuinu. Utsi-utsièc unèsabi icquin èbi tantiaquido dadpen yansho mimbi isendac — quepondash Esus.

17

Esus bëchamauanquiecsho isaid (Mad 9.2-13; Duc 9.28-36)

¹ Aden chiash 6tedec ushanec nidquimbi Esusèn abèd icquido 3tedtsèqui buampondash. Petedo yec Acobo yec Acobon buchi Uan yec quetsècnuc buanash macuèsh dapa dectatoash mananènquo tabadtuidpac caondash. ² Tabadtuidshun isquien Esus utsiacimboc isadpec. Aton dashcutebèdi aton bétantete ushèbimboec bëchamauanquiec yanac caondash.

³ Esus bëchamauanquiec incubien dada utsi daèd isadcuenash Esusbèd onquiampac caondash. Abentsèc Moises yampid icnubi utsi Edias Nuquin Papan ambi tantiaid oncamiampid icpac caondash. ⁴ Adsho isashien Petedo: —Mibi adec tabadsho isash bédambo iquebi. Mibi nèmbobi tabadmenun abentsèc chotsecnuc shubumpi uatsècnuna, Icbo. Mitsana natsècquin Moisesèn na natsècquin Ediasèn na natsècquin canuna. ¿Ada bèda icpec? —quenubi ⁵ abu ushu bëchamauanquiec icquidèn isadenquo icnuc bètimpac caondash. Adnubien abu ushu nènantanuèshquo Nuquin Papa onquiampac caondash. — Nèid con Madombo nec. Èmbi tantiaidquo yec èmbi bédamboen isaidquo neque. Nèidquo tantia —quec dacuèdampamboec onquenubien ⁶ uinte paèdtampamboec dacuèdtanec uebudcuèdpc caondash Petedo chedo.

⁷ Adshobien Esusèn camishquin: —Dacuèdenda. Nidto —cac ⁸ nidtoquin isquien Esus abentsèqui iquec.

⁹ Adtanec macuèsh budequi Esus: —Mimbi isboed nèbi utsibo chienda. Unès uac èbi uincuenacsho isun chianta —quepac caondash abèd icquido chiec.

¹⁰ Adsho tantian Petedo chedo: —“Nuquin Papan chomiaidquo nec,” quequin nèbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequin iccosh —queshobien ¹¹ Esusèn: —Abimbo chiosh. “Edias yampid bèyuc choshon: “Nuquin Papan chomiac bédambo icquid choeque. Bédamboec tabadta,” quequin chiendac,” quequin abimbo chiosh. ¹² Adquid Ediasbimboecquid chondash. Choacsho tantienquo icquin matsesèn abi bunacpaden unès uapac caondash. Adembidi Nuquin Papan chomiaid icsho èbitsen chieshènquin unès uaindac —quesho tantian: ¹³ —“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

Madompi dapuedaid podobitsi icsa cuemiaid (Mad 9.14-29; Duc 9.37-43)

¹⁴ Bëchamauanquiec ictanec choequi abèd icquido utsibo yacno choquin matses dadpen aido datsidadacsho Esusèn istuidpondash. Adec Esus chosho isumbien unèsanetsèquidèn papan Esus ismequin danèshèn sebudshun chuipondash. ¹⁵ —Con mado bédamboen isquin bédameta, Icbo. Baded-badedquiec unèsanec cuèten pichiquianec. Adebidi unèsanec acten mentoadtsenaccosh. ¹⁶ Mibèd icquidon bédamete danquin bèuidombi. “Nè bédame,” cac bédamenuen tanuidosh. Bédamenquo iccoshe. Mimbimbo bédameta —caquien ¹⁷ Esusèn ambo icquidotedi chuipondash. —Èmbi nadatiambo icquin nabanquin ismiaqui mimbi èbi tantienquo iquec. Adsho isash chieshtoash cuentiaidquo icchitebi. Adtiaidquo yequi padenquo iquec nebique. Min mado beccho —cac ¹⁸ bèsho istanquin Esusèn podobitsi icsa chushcapondash. —Padi. Daicsa uainda —cac podobitsi icsa cuenubi madompi bédampondash.

¹⁹ Adsho isun abéd icquidon Esus chuipondash utsibo tantiamenquo icquin. —Èmbi: “Cuemenu,” cac ¿atotsi quiash podobitsi icsa cuenenquo icposh? —caquien: ²⁰ —Nuquin Papa bédamboen tantiaquin mimbi bédamboen natsenoc. Mimbi bédiactšéc tantiatsec. Pete èshèmpi mostasa caid pistsècquidi siac nua yec canitsiash. Adecbidi Nuquin Papa tantiatšecboedi: “Ambi natiapimbo ictequid nibèdec,” quequin abimbo tantiaquidquo yanshun companen tantiaquidimboec mibi ictsiac. Adquidèn néd macuèshquibi cain: “Uquè manèd,” cac manèdtsiash. Aden mimbi: “Èbi bédamboen nameta, Papa,” quequin Nuquin Papa chianiac aidèmbi mimbi: “Èmbi natiapimbo ictequid nec,” caid mibi bédamboen nametsiash. ²¹ Nèbi èmbi cuemeboed abembi cuentiapimbo icquid nec. Nuquin Papauidi tantianuen buna mèmunquin Nuquin Papa chianeshun adquid cuemequid —quequin Esusèn chuipondashi.

Abi unèste Esusèn chuioaid
(Mad 9.30-32; Duc 9.43-45)

²² Adanec aton nidaid Cadidia yacnobi capucuenequimbi Esusèn abéd icquido chuipondash. —Èbèd icquid abentsècshun èbi chieshènquido èbi bedmendac. ²³ Bedshun èbi unès uamendac. Aden unès uamiacsho chococaquini daèdec ushash uincuenendac —quesho tantiantnequien abéd icquido: —Unèsquo icnuc chiec —quiash shubiantiadtsècquo icpondash.

Chuiquid dapa menetequid piucquid Petedon istuidaid

²⁴ Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuquin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ¿ada min icbon dos dada uatsaid piucquid shocoshèmpi abentsèc menepatsiash? —cac ²⁵ Petedo: —Ai, menetsiash —quepac caondash. Adanec nidec shubun puduedshobien Esusèn ambia Petedo chuipondash. —¿Atotsi mimbi chie, Simon? Aton matsesèn na nacnemenuen ¿tsutsi chuiquid dapon piucquid bedshumpec? ¿Ada aton matses piucquid bedshumpec? Aido bedshunenquo icquin ¿ada ambi bédaido aton yuabo piucquid bedshumpec? —caquien ²⁶ Petedo: —Ma aton yuabo bedshumpaid yoc. Aton matses piucquid bedshunenquo iquec —quesho tantiashien: —Adembidi aton Mado icsho aton shubu nacnemenuen Nuquin Papan èbi bedshuniambo iquec. ²⁷ Aden tantiaquimbi: “Nèishnushè,” qeshun menenun nanuna. Chianèn ansemetan. Tauaquin ansemiaidi ancanshun anisquin 4 dada uatsaid piucquid shocoshèmpi abentsèc mimbi istuidendac. Aid bedshun piucquid bedshumènquido menetanta. “Nè con icbon nabèdi con na nec,” quequin menetanta —capondash Esusèn. Adoac Petedon Esusèn chiacpadomboen menetampac caondash.

18

¿Mitsicquid chuiquid dapa mimbi icmepatsia?

quequin chiaid
(Mad 9.33-37; Duc 9.46-48)

¹ Adshumbic abéd icquidon Esus chuipondash. —Abitedishun Icho icquin matses mimbi namendac. Èbi chedo caic ¿mitsicquid mibèdtan chuiquid dapa mimbi icmepatsia? —quesho ² tantiashun abi tabadacno nènantanquo bacuè tsaduntsècshun Esusèn chuipondash. ³ —Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuèn amèn chiacpadomboen nacimboen èbi tantiaquiota. Adash ambi namiaid yanash Nuquin Papa yacno mibi puduedendac. ⁴ Aden èmbi chiacpadomboen naquidquo icsho mibi Nuquin Papan: “Bédamboshè iquec,” caindac. ⁵ Nadquid bacuèbèda èbi tantiabentsècquid bédamboen tantiaquidèn èbitsen bédamboen tantindac —quepondash Esus.

Tantiabentsècquido icsamete chiaid
(Mad 9.42-48; Duc 17.1-2)

⁶ Adshumbic padpiden chiec: —Èbi tantiabentsècquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unèsacsho isun: “Bédambo iquec,” catsiambi. “Cuènote yuèmboshè icquid tèdecanshun acte nènepatecnèdan,” caimbi icsamiente bunquidquo. ⁷ Aden èbi tantiatsècquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuisho tantiequi icsainda. Mèdanten naic mibi icsaic. Mèteshuniac bedtiapimbo yacimboec icsainquo yec ènèda. Taèn capuec mibi icsaic. Tateshuniac caputiapimbo yacimboec icsainquo yec ènèda. Ènèdenquo icsho Nuquin

Papan mibi cuidendac. ⁹ Adecbidi èshèn isec mibi icsate bunquiec. Èshè chicshuniacimb-boec icsainquo yec ènèdacsho: “Bèdambo iquec,” catsiambi. Ènèdenquo icsho Nuquin Papan chian anèdènquiacno nèsecaindac —quequin Esusèn chuipondash.

Matses èbi tantiamete Nuquin Papa bunaid

(Duc 15.3-7)

¹⁰ Adashic padpidec: —Nadquid bacuèmpin èbi tantiatsècsho isun: “¿Adtsècquidèmpinquoibida bèdamboen tantiapèc?” cainda. Nuquin Papan abi yacnoshon uaid mayan bèda aid bacuèbo dayun uaquid icquin Nuquin Papa yacno puduedshun mimbi mamènshumboe Nuquin Papa chuinushe. Adtsècquidèmpi mamènshunenda. Èbi tantiabentsècquido con Pan tantiaqueique. ¹¹ Èmbitsen aido tantiembi. “Bènudaid istuidacimbboen èbi tantienquo icquidobi èbi tantiaquido icmenu,” quiash matsesondabi —quepondash Esus.

¹² Adashic padpidec: —¿Mitsipadquio nuquin matses icpec? Nèish yua obeca dadpen 100ted dayun uaquidèn aton yua tambanac abentsèc nibèdsho istanquin utsitedi nianshun aid abentsèc nibènbenequin istuidquid. ¹³ Aden istuidash comapenec cuishonquequid: “Con yua nibèdantsenquiac,” quiash. Aton yua utsi yacno bèash abi icboctedi icsho isash bèdambo icquid. Adecbidi matsèsèn èbi tantiabensho isash Nuquin Papabèd cuishonquebi bènudaid istuidacimbboec. ¹⁴ Icsaido cuidacno matses nidmete Nuquin Papa bunenquo iquec. Matses bèdamboen isquin abèd tabadmete Nuquin Papa bunquiec —quepondash Esus.

Chieshènkuidobèdi onquete chiaid

(Duc 17.3)

¹⁵ Adashic padpidec: —¿Ada èbi tantiaquid utsin mibi icsa uaosh? “Ai, icsa uaoshi. Chieshèntiantiaquio icchitosh,” qeshun nadoac bèdambo ictsiash. Aid abentsèqui chuiquin aidbèd bèdamboec onquequin: “Èbi icsa uaquin Nuquin Papan chiaid mimbi niac-niaccoc. Adecc icsainquo yec ènèda,” mimbi cac: “Ai, adebi,” quiash mibèdi bèdamboec tabadtsiash Nuquin Papa tantiesabimbboec icuidboedi. ¹⁶ Mimbi: “Icsainquo yec ènèda,” caqui: “Padi. Adequi icsaibi,” qesho tantiasun èbi tantiaquid utsi beduanshun aidbèdtan chuitanta. “Nuquin Papan chiaid niac-niacsho isun daèdshun chiaid abimbo chiaid nec,” quequin chiaid tantiaquin adota. ¹⁷ Mimbi buanaidèntsen: “Adecc icsainda,” caqui: “Adequi icsaibi,” qesho tantiatanec choashun mibèdtan èbi tantiec iccuededquido chuiquido chuituida. “Mimbtsen chuitanta,” cac aidontsen chiaqui tantienquo icsho isun: “Nuquin Papan chiaid niac-niacquid yec Esus tantiesabimbboecquid nec,” qeshun èbi tantiaquido cuèdènacno chomenda. ¹⁸ Aden mimbi: “Esus tantiesabimbboecquid neque. Cuèdènacno chomenquo ictiad,” casho Nuquin Papan: “Bèdamboen naic,” mibi catsiash. Adembidi mimbi: “Adecc icsaboedi icsainquo yec ènèdsho isun cuèdènacno chomeoanuna,” qeshun chomeoasho Nuquin Papan: “Bèdamboen naic,” catsiash.

¹⁹ Padpiden chuinu. Tanta. Mimbi: “Nuquin Papa chuinuna,” cac: “Ai, adonona,” qesho tantiasun aidbèdtan mimbi Nuquin Papa chianiac mimbi chiacpadomboen Nuquin Papan natsiash. ²⁰ Èbi tantiec daèd tabadnuc aidbèd con Mayan yec èbèd yacimbboec tantiadendac. Adecc tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

Yuan bèdamboen istiapimbo yaid

²¹ Adecc: —Icsa uanec chieshtomiantiaquio iquec —Esus qesho tantiasumbien Petedon Esus chuipondash. —¿Icsa uanec chieshtomianquid tedentsimbi chieshenquo icquin bèdamboen ispe? Chieshènquin padpiden icsa uac ¿padpidendambi bèdamboen isoape? ¿Mèdante utsiuc daèd tauadoquin sietetedembi nashun padpiden bèdamboen isenquo icquin ènacta bèdambo icpatsiash? —caquien ²² Esusèn: —“Mèdante utsiuc daèd tauadoec sietetedi” quequin daèdpacksècquio mimbi chuipèc. ⁷⁰ por 7 caid ¿tedtsi icpec? Aidteden 490tedembi ènenquo icquin bèdamboen isoadoniac bèdambo ictsiash —quepondash Esus.

²³ Adashic abi onquec: —Nuquin Papan chiacpadomboen matses bèdamboen iste mibi chuinu. Tanta. Tsusion yuabo dadpen icpac caondash. “Ma bènu,” quequin ambi meniactedi piucquid bednuen aton yuabo aton shubuno chomepac caondash. ²⁴ Abia chomiaidèn piucquid dadpenquioshè bedshun aton icbo meniampac icpac caondash. ²⁵ Adsho icbon: “Mimbi bedactedi beccho,” cac: “Nibèdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuèbobèdtabi cuèsh-cuèshèdmeshun aidtedi piucquid bednu. Mibi icsambo iqueque,” cac ²⁶ yua abi yuaquid ismequin danèshèn sebudash: “Padi. Èbi yuamenuen cuèsh-cuèshèdmenda. Chiata. Yuecsun aidtedi bedshun mibi menenun nanu,” capac caondash. ²⁷ Adoquien icbon

bédamboen isquin: “Padi. Èbi menenda. Mibi utsibo yuamenquo iquembique. Dacuèdenda. Nidec nid,” quequin icbon aton yua bédamboen nidmepac caondash.

²⁸ Adoac nidquimbien aid yuan icbon bédamboen isboedèn ambi: “Ma bënu,” quequin piucquid daèdpactsèc meniaid yua utsi istuidpac caondash. Istuidshumbic bedtanquin tètèdinquin: “Mimbi bedactedi piucquid beccho. Unès uachitomane,” caquien ²⁹ aidtsen ambi piucquid bedshunondaïd ismenuen danèshèn sebutdsec: “Chiata. Èbi unès uanda. Yuecshun bedshun mibi menenun nanu. Chiata,” quepac caondash yua utsi. ³⁰ Adsho tantiahsun icbon bédamboen isboedëmbi chieshënquin: “Padi. Mibi cuidmèmbi,” qeshun quènèn nauedmepac caondash. “Piucquid aïdted abi menianenquo yacpadequi ma quènënuèsh mëyadbudchitono,” qeshun nauedmiac caondash.

³¹ Aden chieshënquin quènèn nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bédamboen isboedëmbi min yua utsi quènèn nauedmiac: ‘Piucquid menianenquo iquec,’ qeshun,” quequin icbo chuipac caondash. ³² Adsho tantiahsun icbon ambi cuidenquo icquin bédamboen isboed chomesun chushcapac caondash. ‘Icsambo icquidquo mibi nec. ‘Chiata. Mibi menenun nanu,’ mibi qesho: ‘Padi. Èbi menenda,’ quequin mibi bédamboen isombi. ³³ Èmbi mibi adobocpadombon utsi bédamboen istiapimboda icco? ‘Ma bënu,’ qeshun mimbi meniactedi bëabi icsho bédamboen isec mibitsen bédambo ictsenac. Mibi yacpadec nèishun mibi cuidembi,” quepac caondash icbo. ³⁴ Adshun quènèn nauedmepac caondash. “Ambi bedactedi piucquid dadpenquo menias ma puduempnanu,” qeshun quènèn nauedmiac caondash. ³⁵ Aden matses yuan icbon nacpadombon Nuquin Papan naindac. Utsibon chieshënaqui chieshënansho Nuquin Papan mibi bédamboen istiapimbo iqueque. Chieshënanenda. Mibi chieshënidobi bédamboen ista —quepondash Esus.

19

Chidobèd cuèshèdte Esusèn chiaïd (Mad 10.1-12; Duc 16.18)

¹ Adanec nidaïd cuèshè Cadidia caïd yacnuèsh puduanec nidec nidaïd cuèshè utsi Udeya caïdèn nidquin acte Odan caïd potebidanec Esus nidpondash. ² Adec nidshobien matses dadpenhun tsibanampondash. Abi tsibanansho isun nidtuidshun daicsaïdtedi Esusèn bédamepondash.

³ Adnubien tsusedpabon chiampid namequido padiseyobon chieshënquin: —Nuquin Papan chiaïd niacmenu —quequin Esus chuituidpondash. —ÈAtotsi mimbi chuïpe? Dada uashun aton chidobi nidmete èmitsipaden mimbi chuïpe? En chui. Tiantianu —capondash.

⁴ Adoquien Esus: —èNuquin Papan chiaïd isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispacoc. ⁵ Adembidi: “Dadan canite chido uaid icsho dadan aton chido bedquid. Amè chedobèd icboedi aton chido bedash aid nianenquo yec aïdbèd tantiananquiec dada aton chidobèd abentsèc yachimboec tabadquid,” quequin dada uaid ma mimbi ispacoc. ⁶ Aden Nuquin Papan tantiacpadombon aton chido nianenquo yec aïdbèdi tantiananquiec abentsèc yachimboec tabadac bédambo ictsiash. Padnuen aton chido nianec aïdbèdi cuèshèdquin Nuquin Papan chiaïd niactsiash. Adecbidi chido aton bènè nianec icsaquid —Esus qesho ⁷ tantiahsumbien abi chieshënidon: —èAbimboda mimbi capadi? Nuquin Papan chiaïd dada uaqin èatotsieshun Moisesèn naden chuipampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesèn dada uapampid ma icpayoc —quequin chuïpondash Esus chieshënidon.

⁸ Adsho tantiahsun Esusèn chuïpondash. —Ai, Nuquin Papan chiacpadec aton chidobèd bédamboec tabadiapimbo icsho isun Nuquin Papan Moises aden dada uamepampic. Tauamboen matses uaqin Nuquin Papan aden chiambo icpampic. ⁹ Tanti. Mibi chuïnu. Aton chidobèd cuèshèdshun chido utsi bedquin Nuquin Papan chiaïd niactsiash. Padnuen aton chidon bènèpenquo chudmesho istuidash aïdbèd cuèshèdquin Nuquin Papan chiaïd niaquenquo ictsiash —quepondash Esus.

¹⁰ Adnubien abèd icquidon: —Adotiapimbo icte mimbi chuïpec. Aton chidobèd cuèshèdenquo icte mimbi chuïsho tantiahsun: “Aton chido bedesambo dada bédambo ictsiash,” caïmbi —quepondash abèd icquido. ¹¹ Adsho tantiahsun Esus: —Ai, utsi-utsiec pabiate shècuè nibèdabimboen èmbi chiaïd tantiatiapimbo iquec. Utsibon aton chido bedash Nuquin Papan chiacpadec bédamboec tabadquid nec. ¹² Utsibic mimbi chiacpadquid chido bedesa iquec. Nèidtedi chido bedesa iquec. Nèidic aton padibi impadishtsaïd. Nèidic matsesèn inicsa uaid. Nèidic: “Nuquin Papan yuambo icquin aïdèn chiacpadombonuidi

naquin chido bedtiapimbo iquebi,” queshun chido bedesa. Adquidtedi chido bedesa nec. Ēmbi chuiboed tantiashun ěmbi chiacpadomboen nac bĕdambo ictsiash—quepondash Esus.

Esusĕn bacuĕbo chiaid

(*Mad 10.13-16; Duc 18.15-17*)

¹³ Adnubien Esus ismenuen bacuĕbo bĕ-bĕpondash. —Mamishquin ma Nuquin Papa Esusĕn chuinu —quequin bĕ-bĕsho isumbimbi: —Padi. Bĕenda —cauidpondac. ¹⁴ Adshobini Esusĕn: —Chĕn. Ma bĕnu. Cuemenda. Bacuĕbimboecquid Nuquin Papa yacno puduedtequid nec. Amĕn chuisho tantiash bacuĕ badedi: “Abimbo caic,” quiacbimboen ěbi tantiaquid Nuquin Papa yacno puduedtequid nec. Bacuĕbo bĕdambo iqueque. Beccho —cac bĕ-bĕpondash. ¹⁵ Adshobien mamishbanquin Nuquin Papa chuipondash. Adobidanec nidondash Esus.

Cania aton na dadpenquoio dayun uaquid Esusbĕd onquiaid

(*Mad 10.17-31; Duc 18.18-30*)

¹⁶ Adnubien dada caniampinquoio Esus chuituidpondash. —Mibi bĕdambo iquec. Bĕdamboen chuiquidquoio mibi neque. Ēbi chui. Padpidec unĕstiapimbo icquid icmenun bĕdambo icquid Nuquin Papan abi yacno puduedmetsiash. ĴAtotsi nasho Nuquin Papan ěbi bĕdambo capatsiash? —caquien ¹⁷ Esusĕn: —ĴMitsipadquid bĕdambo icquid cai? Nuquin Papauidtsĕqui bĕdambo icquid nec. Aidbĕd tabadnuen ambi Moises dada uamiampictedi nata —capondash. ¹⁸ Adoaquien cania: —Nuquin Papan chiaid Ĵmitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquoio chudenda. Min bĕnĕpenquoio chudmenda. Ampenda. Muainda. ¹⁹ Titabĕdta papa chieshĕnenquoio icquin bĕdamboen tantiata. Ademibidi mibibi datantiadacimboben matses utsi abitedi tantiaquiota,” quequin chiaid caimbi —capondash Esusĕn. ²⁰ Adsho tantiash cania: —Aidtedi niaquenquoio icquin nabanquidquoio nebi. Bacuĕctĕsĕc icquimbi tauaondambi. “Nuquin Papabĕd tabadnuen Ĵatotsimbi utsi nape?” caimbi —quepondash.

²¹ Adsho tantiashumbien Esusĕn: —Nuquin Papan chiaid niaquesambo ictiadquoio icquin mimbi dayun uaidtedi uesquin menequin piucquid bedta. Piucquid bedshun piucquid nibĕdquido min piucquid uesquin menebanta. Adsho abĕd tabadmenun Nuquin Papan mibi bĕdamboen istisiashe. Adota. Adotanequic ěbĕd iquec cho —caquien ²² cania: —Con na dadpenquoio icsho uesquin menetiapimbo iquebi —quiash shubiantiadtsĕcquoio ictanec nidpondash Esusĕn chiacpadomboen natiapimbo yec.

²³ Adsho isun Esusĕn abĕd icquido chuipondash. —Chuinu. Tanta. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedĕmbi ěbi tantiatiapimbo iquec. Aton nauidtsĕqui tantiec. ²⁴ ĴAda nĕishamĕn pinchuc chichte ancumpadic? Padenquoio. Adecbidi aton na dadpenquoio dayun uaquidĕn aton nauidtsĕqui tantiaquin ěmbi chiacpadomboen natiapimbo yec Nuquin Papa yacno tabatiapimbo iquendac —quequin Esusĕn chuipondash.

²⁵ Adec: —ĴAda nĕishamĕn pinchuc chichte ancumpadic? —quesho tantiashien abĕd icquido nadpondash. —ĴTsudain Nuquin Papa yacno puduedtequid icchitotsiash? Nibĕdchitequien iquec —quesho tantiashumbien ²⁶ Esusĕn abĕd icquido bĕisquin naden chuipondash. —Matses namiantiapimbo icnuc Nuquin Papain namianquidquoio nec. Ambi natiapimbo ictequid nibĕdec —quepondash.

²⁷ Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibĕd icnuec chopondabi. ĴMitsimbo tabadtequidini nepe? ĴAtotsimbi nape? —caquien ²⁸ Esusĕn: —Tantia. Mibi chuinu. Nuquin Papan ambi uaid abitedi chuca uabocnoĕshquoio ěbĕdta chuiquid mibitedi iquendac ěmbi abitedi namiacnuĕshquoio. Ēbĕd icquido icsho isun Nuquin Papan mibi chuiquid icmendac. Nuquin tsusedpa Acobon mado Ĵtedtsi icpampic? Aidtedi 12tedshun tsyuecquidon shubu 12tedi shubunshubunquiec chuiquid dapabo mibitedi iquendac. ²⁹ Utsibontsen ěbi tantiendac. Aton shubu nianquin abĕdta tishaido nianquinc aton tita nianquinc aton papa nianquinc aton bacuĕbo nianquinc aton tied nianquinc cain ěbi tantiaquin ěmbi chiacpadomboen naquid iquendac. Adsho nĕbi unĕsabi icsho ambi nianaidobĕd tabadacimbocnuc bĕdambo icmendambi. Adoshombic unĕsacsho Nuquin Papa yacno tabadmendambi padpidec unĕsenquoio icnuc. ³⁰ Nidaidĕnuĕsh chuiquid dapambo icboedi Nuquin Papa yacnuĕsh utsi-utsiec chuiquidpenquoio iquendac. Utsibic nĕuĕshquoio chuiquidpenquoio icboedi Nuquin Papa yacnoshon: “Bĕdambo icquid nec,” quequin chuiquid dapa icmendac —quepondash Esus.

¹ Adshumbic abèd icquido Esusèn ompoacbimboen chuipondash. —Tantia. Èbi tanti-aquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. ² Istuidshumbic: “Badiadnubi tauashun ushè budtsambi mimi ènacsho nèidtedi piucquid mibi menenu. Naic cho,” cac chonoadec cho-chopac caondash. ³ Ushè abucquio yanubi tied icbon pete meniagno nidsun utsibo nainquio yec samèdsho istuidpac caondash. ⁴ Adoshombic aidotsen chuiquin: “Con tied neshcaic cho. Mibi bédamboen cuidquin menenu,” cac ⁵ tied neshcaic nidpac caondash. Ushè cuembo icnubi tied icbon padpidec pete meniagno nidoashun utsitsen istuidshun adembidi aton tied neshcamepac caondash. Ushè budambic padpiden utsitsen. ⁶ Inchèshbudtsèqui nidoaquin utsibo nainquio yec samèdsho istuidoashun: “¿Atotsi quiaish samèduidequi ique?” cac ⁷ samèdquido: “Chonoa uanquid nibèdosh,” qesho tantiashun tied icbon: “Mimbtsen con tied neshcaic cho. Mibi menenu,” cac tied neshcaic nidaneopac caondash inchèshbudtsèqui neshcaquin tauaic.

⁸ Inchèshsècnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushè budambi choboedotsen meneta. Adoshombic ushè cuembo icnuc choboedotsen. Adoshombic ushè abuctoan choboedotsen. Adoshombic badiadnubi abia choboedo ènquimbi meneta,” cac menequin tauapac caondash. ⁹ Inchèshbudtsèqui chonoadec choboedoba menequin badiadnuc chonoadec taèboed tied icbon: “Menenu,” cactedquio piucquid menepac caondash.

¹⁰ Adosho isashien badiadnubi choboedo: “Aido aden meneshun nuqui chonoadquiboed yuapambo nuqui menec,” qeshobi aidtedtsècbidi piucquid menepac caondash. ¹¹ Aidtedtsècbidi meniaquien tied icbo chushcapac caondash. ¹² “Tsyuec chonoadboed meniactedtsècbidi menioshi. Icsambo iquec. Inchèshbudtsèqui chotsash daèdpactsèc chonoadtsècquid meniactedtsèc yuec chonoadquid piucquid meniac icsambo iquec. Chun mèyadec yuecquio chonoadobi. Aidtedtsèc menianec mibi chieshanquiec iquec. Èbi dadpen meniac bédambo ictsiaish,” quequin chushcapac caondash.

¹³ Adoaquien tied icbon: “¿Chieshanquiectabi ique? Èmbi: ‘Nèidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquio menepaboc. ¹⁴ Mimbi bedboed buanec nid. Èbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? ¹⁵ ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimi èbi nèishèmpe? Aden nèishènac ¿ada bédambo iquec?” quequin tied icbon chuipac caondash —quequin ompoacbimboen chuipondash Esusèn. ¹⁶ Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquio icmendac —quequin chuipondash Esusèn.

Abi unèste Esusèn padpiden chuoaid
(Mad 10.32-34; Duc 18.31-34)

¹⁷ Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquio icquin abèd icquido 12tedi icquid chuinen uanotantsècquin buampondashi. ¹⁸ Buanshun chuipondashi naden: —Edusaden yacno nidacsho Nuquin Papan matsesmiad icsho èbi chieshènquido èbi bedmendac. Nèish yua abided unès uaquido chuiquid dapabobèdtan Moisesèn dada uampid chuibanquidun èbi bedshun: “Ma unès uamenu,” qeshun ¹⁹ matses utsibo isadaidpembo èbi bedmendac. Aden bedmiac matses utsibon mamènshunquin èbi cueshcaten comapenen cueshcaindac. Adshumbic èbi unès uanen cuستن dectanendac. Aden unès uaqi daèdec ushash uincuenendabi —quequin Esusèn abi unès uate padpiden chuoapondashi.

Uanèn titan chiaid
(Mad 10.35-45)

²⁰ Adnubien Sebedeyon chido Uanèn titan Esus chuituidpondash. Uambèdta Acobo aton mado daèdi bèshun ismequin danèshèn sebudtanquin chuipondash. —Èmbi chiacpadomboen èbi nashunta, Icho —caquien: ²¹ —¿Atotsi cai? —capondash Esusèn. Adoaquien: —Nèid con mado daèdi nec. Abitedishun icho icquin mibèdtan chuiquid dapa con mado abi daèdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusèn: ²² —Èmbi naid tantienguio icquin mimi chuipec —quequin ani chuishumbic Uanbèdta Acobo Esusèn chuipondash. —¿Ada èbi mèyadacpadquiecbidi mèyadtsia? ¿Ada chieshtoenguio icpatsia? —caquien Uan: —Ai, chieshtoenguio ictsiabi. Mibèd mèyadtsiabi —quepondash.

²³ Adsho tantiashien: —Ai, èbi tantiaquid yec mibi mèyadendac. Padnuembi èbèdtan chuiquid dapa icmequin mibi èbi datsadmetiapimbo iquec. Nuquin Papambien ambi tantiacpadomboen èbèdtan chuiquid dapa icmendac —quequin Esusèn chuipondash.

²⁴ Adnubimbi: —Chuiquid dapa ëbi icme —Esus casho tantiaashun Uan chedo nëishëmpondac. ²⁵ Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. ²⁶ Ëbi tantiaquido icquin mimbi adoenuo iquendac. “Bëdambo mibi iquec,” Nuquin Papa cametiadquio icquin utsibo tantiaquin mimbi utsibo nashuntsiac. ²⁷ Bëdambo icquid ictiadquio icquin yuan aton icbo nashunacimboen mimbi utsibo nashuntsiac. ²⁸ Ademibidi Nuquin Papan matsesmiad icquin matses nashunquid nebi. Ancainquio icquin matses tantiaquin Nuquin Papa icsaquidobi cuidmenquio icnuec ëbided cuidadec unësendabi —quequin Esusën abëd icquido chuipondash.

Bëshuaid daëd Esusën bëdamiad
(*Mad 10.46-52; Duc 18.35-43*)

²⁹ Adashic yuecquio ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpeshun Esus tsibanampondash. ³⁰ Adnubien aid podqued cuëman bëshuaid dada daëd tsadpondash. —Esus cuenec —quesho tantiaashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquio icquin ëbi bëdamboen ista, Icho —quepondash Esus caic.

³¹ Adsho tantiaashun matses dadpeshun chushcapondash. —Padi. Chën. Adec cuëdec chieshanquiec mibi iqueque —caquien abi niachidanec buëdanquiec cuëdpondash. —Tsusedpa Dabidën tsyuecquid Nuquin Papan namiaidquio icquin ëbi bëdamboen ista, Icho —queoapondash.

³² Adoquien Esusën nidtuidshun ëcbedpondash. —¿Atotsi chuinuec ne? —caquien: ³³ —Isbente bunquiebi, Icho —quepondash. ³⁴ Adsho tantiaash: —Unësquio iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdashun aidëntsen Esus tsibanampondash bëshuacboedëmbi.

Edusaden yacnoshon chuiquid dapabimboecnuc Esus bëdamboen isaid

21

Edusaden yacnoshon chuiquid dapabimboecnuc Esus bëdamboen isaid
(*Mad 11.1-11; Duc 19.28-40; Uan 12.12-19*)

¹ Adanec nidequi shubu dadpen icquid Edusaden caid anoentsëqui macuësh dapa Odibos caid poctec shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash. ² —Nëid podquedën nidquin shubu daëdpactsëc yacno nidshun cabayobitsecquid aton bacuë caniatseëcbëda mimbi badedquio istuidendac. Istuidshun tënëshaid tēdiadsho tēchicta. ³ Mimbi tēchicsho isquidën: —¿Atotsi acnun nai? —cac: —Nuquin Icho: “Bedtan, quiosh,” mimbi cac: “Ai, buantan,” quendac —quequin Esusën chuipondash. ⁴ Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

⁵ “Shubu dadpen icquid Sion caidën tabadquido chui. Edusaden cain Sion capec. ‘Is. Mibi chuiquid dapa cabayobitsecquidën bacuë caniatseëc catsadtoash choeque. Ancanquio yec bëdamboshë icquidquio neque. Is,’ quequin chui,” quequin dada uapampic. ⁶ Aden dada uampicpadomboen ambi: —Bedtan —caidon bedtampondash.

⁷ Adotanquin cabayobitsecquid anibëda caniatseëc bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatseëquën Esus catsadtopondash.

⁸ Adanec nidsho istanquin matses dadpeshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobieccquid tetanequin podqued ansambampondash: —Chuiquid dapa Esus nec —queshun. ⁹ Matses dadpen bëyuc nidnubi aidtedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec.

Nuquin Papan chomiaid yec mibi bëdamboshë iquec.

Mibi chomequid Nuquin Papatsen bëdamboshë iquec. Adeduya,”

quec cuëdëncuededpondash.

¹⁰ Adec Edusaden yacno matses dadpenquio cuëdënidec nidsho isashien Edusaden yacnocquido: —¿Tsutsi tantiec cuëdëncuededpec? —quepondash. ¹¹ Adsho tantiaashun Esusbëd nidquido: —Esusquio tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh canionaid Nuquin Papan chiaidquio chuiquid Esus tantiec nec —quepondash.

*Esusën chushcaquin cuemiaid**(Mad 11.15-19; Duc 19.45-48; Uan 2.13-22)*

¹² Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio puduedenquio yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bëdamboen isnu,” qeshun pichicametsiash —quequin aton nëish yua menequin piucquid dadpenquio bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. ¹³ —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoenquio iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenec bë-bëpondash. Aden bë-bëshobien Esusën bëdamepondash.

¹⁵ Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec —quec Esus caic cuëdëncuedesho tantiashi nëishquiopondash. ¹⁶ Adshumbic: —Icsambo iquec —qeshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuiampic.

“Nuquin Papan oncamiac bacuëmpin aton bacuë utsibëdtan:

‘Nuquin Papa bëdambo iquec,’ caindac.”

quequin chuiampic —quepondash Esus. ¹⁷ Adanec nidec shubu dadpen icquid Betania yacno nidash ushtuidpondash.

*Esusën cuëte unës uaid**(Mad 11.12-14, 20-26)*

¹⁸ Badiadnubi ënden aubidi nidoaic Edusaden yacnobidi nidoapondash. Piabi nidec bundoshon ¹⁹ podquoc cuëman nidquid cuëtempo icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquico icpec. Adsho isumbien Esusën: —Adequi bacuëesambo yec unësta —capondash. Adoac badedquico unëspondash.

²⁰ Adosho isun abëd icquidon: —¿Atotsi quiash badedquico unësposh? —caquien ²¹ Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquio icquin: “Nuquin Papan ambi chiacpadomboen naquidquico nec,” qeshun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain: “Mananuc tabadboedi adquiecbidi acte nantan tabadoata,” mimbi cac nëid macuësh acte nantan tabadoatsiash.

²² “Ambi chiacpadomboen naquidquico Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiash —quequin Esusën abëd icquido chuipondash.

*¿Tsuntsin: Naic nid, cac nai? quequin Esus chuimiaid**(Mad 11.27-33; Duc 20.1-8)*

²³ Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiasun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tantianu —caquien ²⁴ Esusën: —En mimbia chui. Ëmbia tantianu. Mimbi chuisho tantiasun ëbi namequidtsen chuinu. ²⁵ ¿Tsuntsin namiac Uan padon acten mentopadenec? ¿Ambembida napadenec? —capondash Esusën. Adoacquen badedquico chienquio yec uanontantsec tabadec onquecuedepondash Esus chieshënquido. —¿Atotsi nuqui chuipeba? “Nuquin Papan namiaidquico Uan pado nepadenec,” cac Esusën: “¿Atotsieshun aidën chiacpadomboen nainquico iquec?” canushe. Aden chienquien ictiad. ²⁶ Nuqui: “Ambembi napondash,” qesho tantiasun nëmbo icquidon nëishënushe: “Nuquin Papan namiaid Uan pado niondash,” qeshun. Aden chienquien ictiad —quepac caondash Esus chieshënquido. Isadaidbo tsusiobobëdi nëish abided unës uaquido chuiquid dapabo adpac caondash. ²⁷ Adashien Esus padpiden chuioaic: —Tsaudi. ¿Tsundan chiaquien nachitondash? —qeshobien: —Mimbi chienquio icsho tantiasun ëmbitsen ëbi namequid chienquio iquembi —capondash Esusën abi chieshënquido cuidquin chuiquin.

Mado daëdshun nacbimboecquido chiaid

²⁸ Adshumbic Esusën padpiden chuipondash. —Tantia. Mibi chuïnu. Ēmbi chiaid tantiahsun çmitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: ²⁹ “Padi,” quec chieshuidboedi yuec-yuecpectsëtanec: “Tiedimbi neshcatanchitec,” quïash neshcaic nidac caondash.

³⁰ Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquo icpac caondash. ³¹ çmitsicquidën aton papan chiacpadomboen napac caondash? En chui. Tantianu —caquien Esus chieshënquido: —Abia chiac chieshuidboedën —quesho tantiahsumbien Esusën: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidacimbocquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenyash abëd tabadtequido yanendac. Mibien padenquo iquec. ³² Uan pado acten mentoandenedën Nuquin Papan chiaid chuiquin bëdamboec tabadte chui padenec. Adsho mimbi tantienquo icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ëntiadquidi mimbi ënenquo iccondac. Aton papan chiaid niacquidbimboecquid mibi nec —quepondash Esus abi chieshënquido chiec.

*Abi chieshënquido icsaid Esusën chuioid**(Mad 12.1-12; Duc 20.9-19)*

³³ Adshumbic Esusën abi chieshënquido ompoacbimboen chuipondash naden. —Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacnempac caondash. Adoshombic: “Ampequid chosho isnu,” qeshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash. ³⁴ Adash yuectaneshumbien abëd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. ³⁵ Adec aton icbon tiedno nidanicshobien neshcaquidn cudasënquin chieshëmpac caondash. Abentsëc cuesunetanquin utsi cuënoten seshunequopac caondash. Utsibic cuesquin cuemepac caondash. ³⁶ Aden cuemiaid choshon chuituidaquien icbon nidboedtedpenquo dadpenquo aton yua utsibo chui pac caondash. “Bedtan,” cac nidanec tiedno choacsho isun adem bidi cuesun siapac caondash.

³⁷ Adoacsho tantiahsun aton madombo caic: “Bedtan,” quepac caondash. “Con mado cuesunenquo icquin ëmbi chetequid menetsiashe,” qeshun aton madotsen nidmepac caondash ³⁸ Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiashe. Nëbien aton mado cuesunetiaid. Aid nibëdnuc icbo unësan aidën natedi nuquin nabi ictsiashe,” qeshun ³⁹ tied tsitsuno buanshun cuesunepac caondash —quequin Esusën chuipondash.

⁴⁰ Adshumbic ambi chuiboedquo abi datsidadquido chuimenuen chuipondash. —Ēmbi chuiboed tantiahsun çatotsi mibi quepatsia? “Min mado cuesuniaccosh,” cac çatotsi tied icbon napatsiashe? —quesho ⁴¹ tantiahsun datsidadquido: —Aïdo icsamboshë icsho comapenen cuidtsiashe. Adshumbic ambi chetequid sinacsho abi cudasënesambo utsibo aton tied neshcametsiashe —quecuededpondash datsidadquido.

⁴² Adsho tantiahsun Esusën: —Ai, abimbo caic. Adem bidi ambi chomiaid chieshënsho Nuquin Papan mibi cuidendac. çNuquin Papan chiaid isabida ictio? Naden chiampid ma mimbi ispaboc.

“Buintad bëdambo icquid istuidashi: ‘Nëidquo shubu uanun nitsinembï,’ quetiadquidi isuidacimbocno Nuquin Papan namiaid chieshënac.

Aden buintad isuidaid utsin bedshun shubu uanun nitsinacimbocno Nuquin Papan tantiamiapadomboen utsibon ambi namiaid tantiosh.

Adsho isun: ‘Nuquin Papan namiaid bëdambo iquec,’ caimbi,”

quequin dada uapampic. ⁴³ Aden ambi namiaid ëbi chieshënsho isash mibi caic Nuquin Papa nadpec. “Ēmbi con matses caid isadaïdo ëbi bëdamboen tantiametiadquidi chuiquid dapabon namenquo icsho isun utsibotsen: ‘Ēbi chuiquid icta,’ caindambi,” quepec Nuquin Papa. Aden ambi chiacpadquidën bëdamboen chuibanac abi tantiaquido dadpen yanendac. ⁴⁴ Mibien Nuquin Papan cuidtequido nec. Cuëte uebudquin catashac canite uesadec podquëd-podquëdacimbocnuc mibi comapenen cuidendac —quepondash Esus abi chieshënquido chiec.

⁴⁵ Adsho tantiahsun padiseyobobëd tan nëish abided unës uaquido chuiquid dapabon: —Nuquin cachitec —quequin tantiabempanëdash. ⁴⁶ Adshumbic Esus cuesunenuen

bedtiadquo icquimbi bedenquo icpanēdash. —Abi datsidadquidon: “Nuquin Papan chiaid chuibanquidquo Esus nec,” qeshun Esus bedsho isun nuqui cuesnushe —qeshun aton matses dacuēdēnquin bedenquo icpanēdash.

22

Cacuidanaid chiaid (Duc 14.15-24)

¹ Adshumbic Esusēn padpiden ompoacbimboembidi chuipondash naden. ² —Tantia. Isadaidbon nacpadomboen aton mado chido bednesho tantiaashun amēn matses dadpen: “Pec cho,” cauidaib mibi chuinu. ³ Chuiquid dapan aton yuabo chuiquin: “ ‘Con icbon madon chido bedeqe. Aidbēd cuishonquenuen pec cho,’ quequin ěmbi tantiaidotedi chuitan,” cac yuabon chuitanaqui choenquo icpac caondash.

⁴ Adsho isumbien chuiquid dapan aton yua utsibo chuiquin: “Nēish nua bēchichoquidquo dadpen codoquiacoshe. Padpiden chuitan,” cac chuitanoaqui ⁵ choenquibodi icpac caondash. Adec cacuidanquiec abentsēc aton tied nantan nidnubi utsi piucquid bednequin ambi aton na menebante shubuno nidpac caondash. ⁶ Utsimbic abi: “Pec cho,” cashobi yuabo mēyanquin cuesun secapac caondash.

⁷ Adoshobien chuiquid dapan nēishtanquin shēpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nēdēncapac caondash. ⁸ Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. ⁹ Ěmbi: ‘Pec cho,’ cacmaidobi chuibenetan. Podquedēn nidquin mimbi istuidaidtedi: ‘Pec cho,’ cabenetan,” cac nidshun ¹⁰ ambi istuidaidtedi chuibenetanac matses dadpenquo pec cho-chopac caondash. Icsambo icquidobēdi bēdambo icquido cho-choash chuiquid dapan shubun puduedash pec tabadte quēnē dapan tabadcuēdedpac caondash tsucus-tsucustsēcquo yec.

¹¹ Adshun chuiquid dapantsen puduedshun isquien dashcute bēdaidquo dasiuidabi icquid abentsēc tsadtsec. ¹² Adshobien chuiquid dapan: “ĶAtotsi quiash dashcute bēdaidquo dasiuidambi cho, buchi?” caqui ěbedenquo yec tsadec. ¹³ Adshobien chuiquid dapan: “ ‘Chido bedacno isnuec dashcute bēdaidquo dasiuidquid,’ quepadenec. Mibi icsambo iqueque. Mibi cuidnu,” qeshun aton yuabo chiec: “Shēbunshun buanshun icsano netan,” capac caondash. Adoac taneshun netanac mēyadquiec natiaic shubiquiopac caondash.

¹⁴ Adembidi Nuquin Papan ambi matses bēdamboen iste dadpen tantiamiaqui utsin-utsinquin tantienquo iquendac. “Abi yacno puduednu,” queuidboedi bēdambo icte bunenquo yec abi tantiatipimbo icsho Nuquin Papan comapenen cuidendac. Utsi daēdpactsēquien Nuquin Papan tanticpade abēd tabadtequid iquendac —quequin Esusēn chuipondash.

Chuiquid dapa piucquid menete chiaid (Mad 12.13-17; Duc 20.20-26)

¹⁵ Adsho tantianec nidash abi chieshēnquido padiseyobo: —Esus icsamboen chuime-nuna. Icsamboen chuisho tantiaashun bedshun uēs umechitono —qeshun ambi chuibanquin tantiamiaido chuipac caondash. ¹⁶ —Icsamboen chuimetan —caquien chuiquid dapa Edodes caid tantiaquidobēdtan icsamboen chuimenuc cho-choshon chuituidpondash. —Bēdamboen chuiquid mibi neque. En ěbi chui. Tantanu. Muesambo icquin Nuquin Papan chiapadec bēdamboec tabadte mimbi abimbo chuipoc. Matses dacuēdēnquo icquin Nuquin Papan chiaidquo mimbi chuipoc. ¹⁷ Adquid icquin Ķatotsi mimbi chuipe? Tantanu. Chui. Nuquin matses yuaquid chuiquid dapa Sesad caidēn: “Piucquid shocoshēmpi dadpen beccho,” cac nuqui meniac Ķada bēdambo icpatsiash? —capondash. ¹⁸ Adoquien Esusēn ambembi tantiaashun: —Bēdambo icquid damianquiec mibi muambo nec. ĶAtotsieshun ěbi icsamboen chuimetiaidquo ique? —quetanquin: ¹⁹ —Chuiquid dapa menetequid piucquid shocoshēmpi beccho —ambi cac ²⁰ bēsho bedshun Esusēn chuipondash. —Nē tsutsibimboecnuc dada uaid nē iquec? ĶTsutsi cuēmēdquidbēda dada uac? En chui. Tantanu —caquien: ²¹ —Ma nuqui yuaquid chuiquid dapambo Sesad neyoc —quepondash. Adsho tantiaashumbien Esusēn: —Abibimboecnuc dada uaid abi cuēmēdquid dada uaid bedtequid shocosh icnuc Sesadēn na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidēn chiapadomboen nabanta —quequin Esusēn bēdamboen chuipondash. ²² Adsho tantiaish icsamboen chuimetiaidquo icboedi: —Bēdamboen chuipoc —quetanec nidanepondash.

Matses uincuemete chiaid (Mad 12.18-27; Duc 20.27-40)

²³ Adnubien aid ushëmbi Saduseyubo: —Matses unësaid uincuenesambo nec — quequidotsen: —Esus icsamboen chuimenu —quec cho-chopondash. ²⁴ —Bëdamboen chuiquidquo mibi neque. Mimbi chuisho tantianu. ¿Mitsipaden mimbi chuiplatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësascho aton utsin aid chido bedshun: ‘Con buchin bacuëbo nibëdeque. Con buchin mado-bimboecnuc tishmenu,’ quequin tishmequid,” quequin Moisesën dada uapampic. ²⁵ Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash ²⁶ bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidoudi beduid-beduidpac caondash. Bacuë tishmiabi-tishmiabiec abitedi unësbudnepac caondash. ²⁷ Adashic bacuë tishambobi aid chidotsen unëspac caondash. ²⁸ Aid abitedi uincuemiac ¿mitsicquidën chido icpatsiash? —caquien ²⁹ Esusën: —Nuquin Papan chi-aidquo tantienquo icquin Nuquin Papan nadatiambo icquin nabanquin uincuemete mimbi tantienquo iqueque. Chuinu. Tantia.

³⁰ Uincuemiac dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bëdabobimboec matses uincuemiaido iquendac. Aden uincuemiaidën chido bedesa —quepondash Esus. ³¹ Adshumbic padpiden chuipondash. —Ambi unësaid uincuemete chuiquin Nuquin Papan dada uamepampic ¿isbanabida ictio? Ma mimbi aid isbampaboc. ³² Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiate unësambo icnuc abi Nuquin Papa tantiatsiash —quepondash Esus. ³³ Adsho tantiash abi datsidadquido: —¿Mitsipadquid nepec? Bëdamboenshëen chuipec —quepondash.

Moisesën dada uampid chiaid

(Mad 12.28-34)

³⁴ Aden unësaid uincuemete chuisho tantiashumbien Saduseyobon padpiden: —En chui —cainquo icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash. ³⁵ Cho-choquin abentsëcshun Nuquin Papan Moises dada uamiampid tantiaquidquo icquin chuimetuidpondash. ³⁶ —Chuiquidquo mibi neque. En ëbi chui. Tantianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bëdamboshë iquec,” capatsiash? —caquien ³⁷ Esus: —“Nuquin Papa tantiaquiec ambi chiapadec tabadte bunquiota,” quequin ³⁸ chiampidba naic Nuquin Papan chiapadec mibi bëdamboec tabadtsiandac. ³⁹ Adembidi Moisesën chiampid utsitsen naic matses bëdamboec tabadtsiash. “Min dada mibibi datantiadac bimboen utsibotsen tantiaquiota,” quequin chiampicpadomboen nasho Nuquin Papan bëdambo catsiash. ⁴⁰ Aden matses bëdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bëdamboen chuipondash abi chieshënquido chuiquin.

Nuquin Papan chomiaidquo chiaid

(Mad 12.35-37; Duc 20.41-44)

⁴¹ Adshumbic Esusënsen abi icsamboen chuimete bunquido Padiseyobo chuipondash. ⁴² —Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madouidida nepec? —capondash Esusën abibi cadquimbi. Adoquien badedi: —Nuquin tsusedpa yampid Dabidën tsyuecquid icsho Dabidën mado caimbi —quepondash Padiseyobo.

⁴³ Adsho tantiashumbien Esusën: —¿Bëdamboenda chuidio? Mimbi chiapadquid aton mado icsho ¿atotsieshun Nuquin Papan Mayanën tantiamiacpadomboen Dabidën con Icho capampic? Naden Dabidën dada uapampic.

⁴⁴ “Nuquin Papan con Icho naden chiendac.

‘Con abiuc tsadash abitedishun Icbombo icnush nëmbo cho.

Mibi chieshënquidobi con Icho mibi camenu,’ quequin Nuquin Papan con Icho chiendac,” quequin Dabidën dada uapampic. ⁴⁵ Con mado cainquo icquin con Icho capampic Dabidën. ¿Atotsieshun mimbi: “Dabidën mado nec,” quequin tantiape? —caquien

⁴⁶ ëcbedenquo yec otacquio tabadpondash. Esusën bëdamboen chuisho tantiash: —Icsamboen chienquien icchitec. Ëmbi padpiden: “Icsamboen chuimenu,” cac bëdamboembidi chuiotsiash —qeshun abi chieshënquido abitedishun Esus padpiden chuimenquo icquin ënaccondash.

23

*Bêdambo icquid damianquido tanenda, quiaid
(Mad 12.38-39; Duc 11.43, 46; 20.46)*

¹ Adshumbic Esusën abêd icquidobêda abi datsidadquido tantamequin chuipondash.
² —Tantia. Moisesën dada uampid chuibanquidobêdan tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec. ³ Aden Moisesën dada uampid abimbo chiac adenuidi mimbi nac bêdambo ictsias. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niac-niaquec. ⁴ Chieshêmênquido nec. Nuquin Papan chiaid nametiadquidêmbi tsusedpabon ambembi chiaid dadpenquio namepec chushcanquin. “Matsesën aiddi natiapimbo iquec. Padi icnuna. Nuquin matsesën chiampidtedi nainda,” catiadquidi adoenquio iquec.

⁵ Aden padiseyobon Nuquin Papa tantiaquidquido damequin matses ismenuenuidi naic. Nuquin Papan chiaid dada uaidêmpi sauedtsash bêdectamêdec abiuc daêdi pêdectamêdec qeshun matses ismenuenuidi naic. Adembidi aton dashcute tédiade nacnenuenuquin: “ ‘Nuquin Papa chianequidquido nec,’ ma êbi canu,” qeshun sedquid shoyonaid ênapenpactsêcnuc cuididicash matses ismenuenec matses tabadacno capucuenepc. Adec Nuquin Papa chianequid damianquiec. ⁶ “Chuiquid dapa nec,” cameteuidi bunec. Isedec puduedash: “Chuiquid dapa icsho icbon abêdi tsadmequid,” quiash icbobêdi tsadte bunquiec. Nuquin Papan chiaid chuibante shubun puduedash: “Tsusio dâpambo nec,” camenuenec utsibobêd tabadenquio yec tsusiobobêduidi tabadquid nec. ⁷ “Chuiquidquido yec mibi bêdambo iquec,” camete bunquiec matses dadpen tabadacno nidtenepec.

⁸ Mibitsen adenda. Utsibo: “Mibiuidtsêqui bêdambo iquec, Icho,” camenuenec adenda. Min Icho abentsêcquiobi êbi iquec. Êbi abentsêqui con Icho cata. Con yuabo yec con utsibo mibi neque. Bêdamboec isnanta. ⁹ Adembidi mibi chuibanquid chuiquimbi: “Mibiuidtsêqui bêdambo iquec, Papa,” cainda. Nuquin Papauidtsêqui aden chuita. ¹⁰ Adembidi: “Chuiquid dapa yec mibiuidtsêqui bêdambo iquec,” utsibo camenuenuidi nainda. Êbiuidtsêqui mibi chuiquid dapa nec. Nuquin Papa yacnuêshquio choquid êbipadquidquido utsi nibêdec.

¹¹ Padnuen ambi chiacpadomboen utsibo nashunquidquido utsibo dêniacte bunenquio icquid Nuquin Papan bêdamboshê catsias. ¹² Utsien abibi cadequi: “Êbiuidtsêqui bêdambo iquec,” quequin utsibo ismenuenuidi naquido Nuquin Papan icsambo catsias. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquio icsho Nuquin Papan bêdambo caindac —quepondash Esus abi datsidadaido chiec.

*Abi chieshênquido Esusën chushcaid
(Mad 12.40; Duc 11.39-45, 52; 20.47)*

¹³ Adshumbic abi chieshênquidotsen chuipondash. —Tantia. Moisesën chiampid chuibanquidobêda Padiseyobo mibi chuinu. Nuquin Papan cuidtequidombo mibi nec. Bêdambo icquid damianquiec mibi icsambo iquec. Nuquin matses: “Nuquin Papabêd tabadte tantianu,” qeshobi mimbi bêdamboen chienquio iquec. Êmbi Nuquin Papabêd tabadte bêdamboen chuisho mimbi tantienquio iquec. Aden tantienquio icquin: “Aidën chiaid tantienda,” quequin mimbi utsibotsen Nuquin Papabêd tabadte tantiametiapimbo iquec.

¹⁴ Nuquin Papan cuidtequido mibi nec. Muaquin unêsboedên niante piucquid bedshunquido mibi nec. Nuquin Papa tantiaquidquido damenuen utsibo tantiamequinuidi buêdpambo cuêdquin Nuquin Papa chiacimboen mimbi chianepec. Aid abimbo mimbi chienquio iquec. Adec chieshanquiesho isun Nuquin Papan mibi comapenen cuidendac.

¹⁵ Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasën yuambo yanec Nuquin Papan cuidtequidombo iquendac.

¹⁶ Nuquin Papan cuidtequido mibi nec. Isadaidbo chuiquid icquin bêdamboen tantiamenuen mimbi ichitec. “ ‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidên Nuquin Papan chiaid niacquid,” quetiadquidi mibi adenquio iccoc. “ ‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquio iccoc. Padenquio yec: “ ‘Nuquin Papa tabadte shubu uashunaid dapan icquid shocosh piu nacnenaidquido utsi uatiapimbo yacpaden abimbo chiombi,’ quequid muesa nec,” quechitequien mibi iquec. ¹⁷ Aden tantienquio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bêdapenquioda icpec? “Aid bêdamboshê icnubi aid nuntan icquid bêdiactsêc bêdambo iquec,” caimbi. Mimbien icsamboen tantiec.

¹⁸ Nadentsen mimbi icsamboen chiech. “Nuquin Papa tabadte shubu uashunaid dapa yacnoshon: Mabi Nuquin Papan bédamboen isnu, quequin nëish pichicate nacnenaïd dapa utsi uatiapimbo yacpaden abimbo caimbi,” quequid muesa nec,” quetiadquidi mibi adenquo iccoc. “Nuquin Papa mabi bédamboen isnuquequin pichicatequid nëish utsi uatiapimbo yacpaden abimbo caimbi,” quequid muesa nec,” mibi quepec. ¹⁹ Adenda mimbi bédamboen chuipe? Pashuachimboen mimbi bédamboen tantienquo iquec. ¿Mitsicquid bédambo iquec? “Mabi Nuquin Papan bédamboen isnu,” quequin nëish pichicate nacnenaïd dapa bédambo icnuc aidën pichicatequidi nëishquo bédapabi ictsec. Nuquin Papamboen bédamboshë iquec. ²⁰ Nëish pichicate nacnenaïd caic: “Aid utsi uatiapimbo yacpaden abimbo caimbi,” quequin aid nantequid nëish abitedi chiaïdbidi nec. Adembidi ambi: “Mabi bédamboen isnu,” caid Nuquin Papatsen chuipec. ²¹ Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiech. ²² Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaïdtsen chiech. Nuquin Papa tsadaïd cain Nuquin Papambo chiech. Aidën chiaïdquo tantiec: “Abimbo cacbimboen chuiquid icsaquid nec,” quetiadquidi mibi adenquo iccoc.

²³ Bédambo icquid damianquid yec Nuquin Papan cuïdtequido mibi nec. Nuquin Papan chiaïd abentsëqui tantiatëcquin min tiedën canitëcquid musuquëmpi bedshun Nuquin Papa mimbi menepec. Aden menequid icquimbi mimbi Nuquin Papan chiaïd utsi dadpen niac-niacpec. Chieshëmiänquid icboedi: “Èbi bédamboen ista,” qesho bédamboen istiapimbo mibi iquec. Adembidi bédambo icquidi muauaquin mimbi tsusio icsamboen cuïdmec. Adembidi mimbi Nuquin Papa abimbo tantienquo iquec. Aden mimbi Nuquin Papan chiaïd niac-niacpec. Ambi chiaïcpadomboen Nuquin Papa menequid icquimbi ambi chiaïd utsi abitedi natiadquidi ma mimbi nainquo icpaboc. ²⁴ Tantesa uatsëcquimbi mimbi utsibo icsamboen chiech. Manuampi nibedbantsëcquimbi utsi nuacquid nibedquabi abi nësamëdpanumbobi acachimboembiën mimbi nachitec. “Nuquin Papa meneta,” quequin chiaïduïdtsëqui natsëcshun adenuïdtsëqui mimbi utsibo namepec. Adenuïdtsëqui namequimbi Nuquin Papan chiaïd utsien mimbi niac-niacchitec.

²⁵ Nuquin Papan cuïdtequido mibi nec. Padiseyobo yec Moisesën dada uapampid chuibänquido yec quequimbi mimbi icsamboen naic. Pada-padaïdbëda dëshote chieshänquin cachocuïdtsëqui dapanshun anauc ampanambo icquidi ampanaid damianachimboec mibi bédamboec tabadquid damianquiech. Nuquin Papan chiaïd dadpen nainquo icquin mitsanauidi bednuen mibi bunauïdidi mimbi napec. ²⁶ Pamumëdachimboec tantiatiapimbo mibi iquec. Dëshote abichobi bédamboen ampanachimboec icsaïd ucudash bédambo icta. Adec icsainquo yec ënëdash Nuquin Papan chiaïcpadec mibi bédamboec tabadtsiac.

²⁷ Bédamboec tabadquido mimbi damesho isun Nuquin Papan mibi cuïdendac. Unësaïd chococacno bédamboen nacnenaïd bédambo isadec ënden pisenambi. ²⁸ Adembidi bédamboec tabadquid mimbi damec. Matses ismec bédamboec tabadshumbic omposhon Nuquin Papan chiaïd niac-niacquin mimbi natemaidien mimbi nachitec.

Padiseyobo chedo cuïdte chiaïd
(Duc 11.47-51)

²⁹ Nuquin Papan cuïdtequidombo mibi nec. Nuquin Papan oncamaïdobëdta bédamboec tabadquido nuquin tsusedpabon unës uampido tantiaquin aïdo chococampicno shubu uaqun mimbi nacnempec. ³⁰ Adoshombic: “Nëmbö con tsusedpabon chieshënquin unës uampid chococac. Aïdbëd tabadquin ëmbi unës uainquo ictsenëdac. Èmbien bédamboen istsenëdac,” qeshun mimbi aïdo chococacno nacnempec. ³¹ Adoböedëmbi nuquin tsusedpabon bédambo icquid unës uampicpadomboen adoante bunquin mimbitsen chieshtoshon adoaindac. ³² Ai, nuquin tsusedpabon Nuquin Papan oncamaïmpid unës uacpadombota—quepondash Esus abi unës uate chiech.

³³ Adashic abi padiseyobo chiech: —Nisibimboec icsa uanquido mibi nec. Adquido icsho Nuquin Papan icsano nësecaquin mibi cuïdendac. ³⁴ Icsaïdo icsho isun: “Ma Nuquin Papan bédamboen iste tantiamenu,” qeshun Nuquin Papan chiaïd chuibänquido utsi-utsien mibi yacno nidmendambi. Adquid mibi yacno cho-choacsho mimbi dadpen unës uaindac. Utsi-utsien cüesten decanquin utsi-utsien Nuquin Papan chiaïd chuibante shubunoshon cüeshcaten mimbi cüeshcaïndac. Utsi-utsien cüesnuëquin nadancatanequin shubu utsin shubu utsinquin mimbi cüemetanendac. ³⁵ Adoshö isun Nuquin Papan mibi cuïdendac. Nuquin Papan chiaïcpadec bédamboec tabadsho tsusedpan chieshënquin tauamboen cüesuniampid Abed nepampic. Adoshombic adecbidi bédamboec tabadsho tsusedpa utsibon utsi-utsien unës uapampic. Adoshombic ënquin Bedequias caidën mado Sacadias caid unës uapampic. Aïdi Nuquin Papa tabadte shubu uashunaid dayunshunquo cüesunepampic.

Aidtedi unēs uampido tantiaquin aidō unēs uaquido cuidacimbōen Nuquin Papan mibitsen cuidquiendac. ³⁶ “Yuecshun min tsyuecquido cuidendac,” quec nenquo iquebi. Nēbi caimbi —capondash Esusēn abi chieshēnquido chuiquin.

Edusaden yacnocquido Esusēn shubi uaid
(Duc 13.34-35)

³⁷ Adshumbic Esusēn chuiopondash. —Tantia, Edusaden yacnocquido. Mibitsen chuinu. Mibi tantiac unēsquo iquec. Mibi yacnobidi tabadquin Nuquin Papan oncamiaidōn chuisho nuquin tsusedpabon unēs uapampic. Adembidi Nuquin Papan: “Isadaidbo chiec nid,” caido chosho utsi-utsien cuēnoten seshunequiopampic. Adembidi mimbi nēbi naindac. Adquidombo icsho mibi tantiaquiembi. *¿Mitsipadec cachina aton bacuē cud-aspic? “Penushe,”* quiash aton bacuēmpi nua shocoshon madacch cudasquid. Adecbidi: “Satanasēn yuanushe,” quiash cudasquieci mibi Nuquin Papa bēdamboen ismete tantiametiadquido iccobi. “Tantiamentu,” cac tantiate bunenquo mibi icchitoc. ³⁸ Ēbi nidambic ēbi tantiatipimbo icsho Nuquin Papan namiac min shububēdtabi mibi nibēdamendac. ³⁹ Nēbi mimbi ēbi isenquo yanendac. Padnuen min matsesēn yuecash chosho ēbi isendac. Aden isash: “Nuquin Papa yacnuēsh choquid bēdambo iquec,” min matses quendac —quequin Edusaden yacnocquido Esusēn chuipondash.

24

Nuquin Papa tabadte shubu uashunaid nibēdante chiaid
(Mad 13.1-2; Duc 21.5-6)

¹ Adash Nuquin Papa tabadte shubu uashunaid daquēnē uacno tabadanec nidequi Esusbēd icquido Nuquin Papa tabadte shubu uashunaid caic: —En is, Icho. Nēid shubu bēdamboen nacnenaidquido neque —quepondash. ² Adsho tantiahsun Esusēn: —Mimbi isboedquido cuēnote bēdamboen nacnenaid matses utsibon cuēnote chīc-chiquendac nibēdquiecnuc —capondash.

Nuquin Papan cuidte ushē chiaid
(Mad 13.3-13; Duc 21.7-19)

³ Adanec nidequi macuēsh dapa Odibos caidēn pudundoec poctsebi tabadtuidshun abēd icquidōn utsibo tantiamenquo icquin Esus chuipondash. —En mibi chote chui. Tiantianu. “Nēbi choec,” quequin mibi chote *¿mitsipadembimbi tantiape?* Adecbidi *¿atotsi isashini: “Nuquin Papan cuidte nēbi nec,”* quepe? —capondash abēd icquidōn. ⁴ Adoquien Esusēn nadēn chuipondash: —Tantia. Mibi chuinu. Muaquidoba choendac. Aidon chuisho tantiahs: “Abimboen chuiचितec,” quenda. ⁵ Adquidō choshon: “Nuquin Papan chomiaidquido Quidistu caid nebi,” quequin muaquin chiaqui dadpēnshun: “Ai, abimboen mimbi caic,” capendac.

⁶ Ēbi choabi icnuc: “Matses dadpenquo cuesnan-cuesnanac caosh,” quecuedendac. Adsho tantiahs dacuēdenda. Nuquin Papan matses abitedi cuidte ushē choabi icnuc ambi tantiapadec matses adonanendac. ⁷ Adec matses utsi dadpen icquido matses utsibobēd cuesnanendac. Nidaid utsi-utsiec yacno pete nibēdquieci icted-ictedendac. Nidaid utsi-utsiec yacno nidaidquibōi compānec uēdēquedenendac. ⁸ Adsho isash chido bacuē nēncuenacsho isun: “Nēbien tishचितec,” quequin tantiacimbōen tantiaata. “Nuquin Papan abitedi cuidte nēbi nec,” quequin tantiaata —quepondash Esus.

⁹ Adashic abi onquec: —Ēmbi chiacpadquido icnuc chieshēmēnquidōn ēbi tantiaquido bedshun chieshēnquin utsi-utsien cuesendac. Utsi-utsien unēs uaindac. Aden nidaid utsi-utsiec yacno tabadquidōn dadpēnshun ēbi tantiaquido chieshēnquendac. ¹⁰ Adoac ēbi tantiatēchoedēmbi chieshtoshon ēbi tantienquo yanendac. Aidēmbi ēbi tantiaquid ompodacsho istuidmeshun mēyamendac. Adashic abipadquid utsibobēd chieshēnanendac.

¹¹ Padnuen muaquido: “Nuquin Papan chuiboedquido chuinu. Tantia,” quependac dadpen. Adsho tantiahsun dadpēnshun: “Ai, abimboen mimbi chiec,” caindac. ¹² Matses dadpenquo icsamboecshē tabadsho isun ēbi tantiatēchoedēmbi ēbi tantienquo yanendac. ¹³ Padnuembi ēbi choabi icshobi ēnenquo icquin ēbi tantiaquido Nuquin Papa yacno tabadmendac.

¹⁴ Ēbi choabi icnuc: “Ma matses abitedishun Nuquin Papabēd tabadte tiantianu,” qeshun ēbi tantiaquidōn nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

Matses icsamboshē icquid chote chiaid
(Mad 13.14-20; Duc 21.20-24; 17.22-24)

¹⁵ Adashic abi onquec: —Ēbi chote ushē nēbi yanuc matses icsamboshē icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid

tantienda. Ĕmbi chiacpadomboenuidi nata,” quequin Nuquin Papa chieshēnquin chiendac. Ĕndenquimbo nuquin tsusedpa Danied caidēn aden icsa uate chuiquin Nuquin Papan chiaid dada uapampic. Aidēn dada uampid mimbisaidquio nec. ¹⁶ Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuēsh dapa yacno ompodec cuenac bēdambo ictsiash.

¹⁷ Adec cuenec shubu dayun icquido puduedenquio yec: “Con na bednu,” quenquio yec umanucuēshi cuenac bēdambo ictsiash. ¹⁸ Adecbidi badedquio cuenuen tied nantan icquidon aton dashcute utsi aton shubuno beduanenquio yac bēdambo ictsiash. ¹⁹ Nidequi bacuē usunquid yec bacuē chishmequid yec quec badedquio cuentiapimbo yec mēyadquiendac. ²⁰ Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushē,” quiaish “Chonoadenquio icte ushēnquio cuemenquio icpashuni,” queoata. ²¹ Aden Nuquin Papa tabadte shubu uashunaid dapa icsa uate bunquid icsamboshē icquid choan matses dadpenquio natiambo chieshēmēnquieq tabadendac. Nuquin Papan tauamboen matses uac adec tabadenquio ictenec. Nēbi adec tabadenquio iquec. Aido icsamboeshē tabadquido nibēdanambic utsibo adquidpenquio yanoaindac. ²² Adec icsamboeshē tabadte tantiaquin Nuquin Papan: “Ĕmbi Esus tantiaquid icmiaido uesquin cuesun sianushē. Matses abitedi nibēdanushē,” qeshun yuenquio icsamboen tabadmenquio icquin ēnēdmendac —quepondash Esus.

²³ Nuquin Papan aden ēnēdmiabi yac icsamboeshē tabadec utsibo: “Is. Nēid Nuquin Papan chomiaidquio Quidistu neque,” quependac. Utsibic: “Is. Nēidquien Nuquin Papan chomiaidquio Quidistu caid neque,” quequin icsamboen chuoaindac. Adsho tantiashun: “Nuquin Icbo Esus choashien nec,” cainda.

²⁴ Adec muaquidoba choendac. “Nuquin Papan chomiaidquio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiaind nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ēbi tantiaquidontsen: “Ai, abimbo caic,” catsempendac. Nuquin Papan bēdamboen tantiamiado yec adtiapimbo iquendac. ²⁵ “Chieshēmēnquido iquendac,” quequin tantienquio icquidēn ēbi tantienquio yanushē,” qeshun: “Aden ēbi tantiaquido chieshēnquiendac,” quequin chiombi —quepondash Esus.

²⁶ Adashic padpidec onquec: —Ĕmbi aden chuibod tantiashun utsibo muasho tantienda. Ĕbi caic: “Utsibo ismenquio yec matses nibēdacno choac caoshe. Isnu. Nid,” cac istanenda. Adembidi: “Choash nēid shubun puduedac caoshe. Isnu. Nid,” cac adembidi istanenda. Muambo neque. ²⁷ Ĕbimbo padpidec choquimbimbi abitedimbo ismendac. Abu ushēmbi yec bed-bedquetanesho ĵada matsesēn abitedishunquio isenquio icpadic? Ai, isec. Adembidi ēbi choasho matses abitedishunquio isendac. ²⁸ Adec choendabi. ĵAda edeste pisen chec budenquio icpadic? Ai, budec. Adecbidi Nuquin Papan cuidte ushē chonoc choendabi —quepondash Esus.

Abi chote Esusēn chiaid

(Mad 13.24-37; Duc 21.25-33)

²⁹ Adashic padpiden chiec: —Aden matses icsamboshē icquidon ēbi tantiaquid natiamenubi ushē chēnquenquio yanendac. Inchēshēn ushēsēn chēnquenquio yanendac. Uispachiedo paēdbudnendac. Uispabimboecquid abitedimbo uēdēquendac. ³⁰ Adnubini abitedishun Icbo yec dacuēdampambo yec abucuēsh choendac. Ĕbi nadatiambo icquin nabanquidquio yec chosho isash cuidadtequido abitedimbo dacuēdec natiac shubiquiendac. ³¹ Adnuc nua shoncanubimbi Nuquin Papan abi yacnoshon uaido mayan bēdabo: “Bedtan,” caindac. Adoac nidaid utsi-utsiec yacno nidshun ēbi tantiaquido abitedimbo bedtanendac.

³² Ĕmbi chuibocpadquieq yansho isun: “Esus chote nēbi nec,” quequin tantiata. ĵMitsipaden: “Seta taēec,” quequin tantiapec? Suc seccuduquiaid isun: “Nēbi seta taēec,” quequin tantiaquid. ³³ Adembidi Ĕmbi chuibod isun: “Nēbimbobi Esus choec,” quequin tantiata.

³⁴ ĵMuectabi nedi? Ĕmbi chuibocpadquio iquendac. Ĕmbi chiacpadec yanabi matses abitedi nibēdantiapimbo iquendac. ³⁵ Abimbo caimbi. Abu nibēdanendac. Nidaidsen nibēdanendac. Padnuen Ĕmbi chuibodquio nibēdantiapimbo iquendac. Bēnudenquio iquendac. Ucuttiapimbo iquendac. Ĕmbi chuibocpadquio iquendac —quepondash Esus abēd icquido chiec.

Esus chote ushē tantienquio icte chiaid

(Mad 13.32-33; Duc 17.26-35)

³⁶ Adashic abi onquec Esus: —Ĕmbi chote tantienquio iquembi. “Aid ushēnquio choendabi,” quetiapimbo iquebi. Adembidi mayan bēdabon tantienquio iquec. Ĕmbibi Nuquin Papan Madonquioibi tantienquio iquembi. Nuquin Papanuidtsēquien tantiec. ³⁷ Matses ēbi

caic: “Nëbi choec,” quetiapimbo icnuc choendabi. Noen cano nacnenubi çmitsipaden aton matses icsambo icquidon tantiapampic? ³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiapadomboen cano dapa anshubu uaquin nacnesh puduedpampic. ³⁹ Aton matses: “Nëbimbobini Nuquin Papan cuidchitec,” quenquo icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adecbidi Nuquin Papan cuidtequido ëbi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen beduamendambi. Ëmbi: “Bedtan,” cac tied nantan dada daëd icsho istuidshun ëbi tantiaquid abentsëc icsho beduanendac. Utsibic ëbi tantiesä icsho nianendac. ⁴¹ Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesä icsho nianendac.

⁴² Aden ëmbi chuiboed tantishun: “¿Nëbida con Icho chopeba?” quequin ënenquo icquin tantia. Ëbi chote mimbi tantienquo iquec. ⁴³ ¿“Nëbi ampequidën ampec,” quequina tantiapadic? Padenquo. Tantaquidënquien aid ushënquo aton na bëdamboen isquin ampemenquo ictsiash. Aden tantienquo icquin: “Ampesho isnu,” quequin ënenquo icquin isquid. ⁴⁴ Adembidi ëbi chote ushë mimbi tantienquo ye. ¿“Nëbida nuquin Icho chopeba?” quec Nuquin Papabëd tabadte bunec bëdamboec tabadta. Matses dadpen: “Nëbien chochitec,” quenquo icnubini choendac —quepondash Esus abëd icquido chieç.

Esus bëdamboen cainte chiaid
(Duc 12.41-48)

⁴⁵ Adshumbic abi bëdamboen cainte Esusën chuipondash. —Tantia. Aton icho tantiaquin yua bëdambo icquidën naid mibi chuinu. Icbon: “Ëbi nidan mibëdta yuaido pete sandoaid musucshun ëmbi chiapadën ëmbi chiapadënquien menianeta,” cac yua bëdambo icquidën adotsiash. ⁴⁶ Adnubien icbon choshon ambi chiapadomboen yuan nasho isun bëdamboen istsiash. ⁴⁷ Adshumbic aton yua chuitsiash. “Bëdamboen tantiaquid mibi neque. Con yua utsibo namequin con natedi dayun uata,” catsiash icbon yua bëdambo icquid caquin. ⁴⁸ Padnuen yua icsambo icquid: “Ëndenquimbo con icho nidondash. Choenquien ichitec. Con nauidi nanu,” ⁴⁹ quaiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash. ⁵⁰ Adec: “¿Nëbida con icho chopeba?” quenquo icnubien aton icho chotsiash. ⁵¹ Choshon ambi chiapadomboen nainquo icsho istuidshumbic: “Icsambo iquec,” qeshun comapenen cuesquin cuesunetsiash. Adembidi Nuquin Papan icsambo icquido cuidendac. Bëdambo icquid damianquido cuidacno icsamboshë yacno nidmendac. Adoac natiaic shubiquiendac —quequin abi bëdamboen cainte Esusën chuipondash.

25

Chido 10tedshun cainaid

chiaid

¹ Adshumbic Esusën ompoacbimboen chuiquin abi chote ushë tantienquo icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aidbëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icho-icboen buanuen sanambededpac caondash. ² Aid chido Stedi tantienquo icquido icnubi 5tedbidi bëdamboen tantiaquido icpac caondash. ³ Tantienquo icquidon: “Tabote bëchi naimëdsho cushtonon buanu,” quenquo icquin bëchi icsadbuttsaid taboteuidtsëqui sananquin caimpac caondash. ⁴ Padnuen bëdamboen tantiaquidon naimëdsho cushtonoquin tabotebëdta sedunten cushtoaid bëchi sananquin caimpac caondash. ⁵ Aden cainaquid: “Chido bedtanu,” quianec nidboed choenquo icsho isash abitedi ushcastoash ushacuededpac caondash. ⁶ Inchësh poctsemboen: “Choque. Bëquednu. Nid,” cac ⁷ isucunshun chidobon tabonon tabote dëbedpac caondash. Adoshon bëdamboen tantiaquidon ambi bëboed bëchi cushtonobien ⁸ icsamboen tantiaquidon: “Bëchi beccho. Con na naimëdeque,” caquien bëchi bëboedën ⁹ bëdamboen tantiaquidon: “Padi. Mibi meniäc con na uesadtsiash. Aid uesadan shubun puduedabi nuquitedi inchëshsiac. Pucquid menequin bëchi cushtoquid baded cushtometan,” capac caondash. ¹⁰ Adoac bëchi bedec nidnubien chido bedtanec dada chopac caondash. Chosho bëdamboen tantiaquidon aton tabote taboshon chido bedtanec choquid bëquedstampac caondash. Adtanec abëdi choash puduedshun bëtashte puduedtiapimbo icnuc bëdamboen bëtashtapac caondash.

¹¹ Adnubien bédamboen tantienquoio icquido bëchi bedtanec chopac caondash. Choshon shëcuë bëtashacsho isun: “Shëcuë shëcne, buchi. Èbitsen puduednu,” ¹² caquien chido bedquid: “Padi. Èmbi tantiacmaido mibi nec,” quepac caondash.

¹³ Èmbi chuiboed tantiaashun chido icsamboen tantiaquido tanenda. Bédamboen nabi icsho: “Èmbi tantiacmaid mibi neque. Puduedenda,” aido cacbimboen èmbitsen Nuquin Papa yacno puduedmenquoio icquin cacumechitomane. Èbi chote ushë tantiaidenquoio icnuc: “¿Nëbida con Icho chopeba?” quequin èbi bédamboen tantiec èmbi chiapadec bédamboec tabadta —quepondash Esus abëd icquido chiec.

Icbon piucquid daëd uaid chiaid
(Duc 19.11-27)

¹⁴ Adshumbic abi tantiaquidon ambi chiapadomboen nate Esusën ompoacbimboen chuiopondash. Ènapen nidnun aton piucquid dadpen dayun uaquidën aton yuabo: “Èbi piucquid daëd uashunta,” quequin chuipac caondash. ¹⁵ “Nëidën bédamboen tantiaquidquo icquin con piucquid èbi daëd uashuntsiash,” qeshun aton yua piucquid 5tedi meniäc caondash. Adshumbic: “Nëidëntsen bédamboen tantiaquin ademibidi con piucquid èbi daëd uashuntsiash,” qeshun utsitsen 2tedi menepac caondash. Adshumbic: “Nëidëntsen bëdiäcstëc tantiaçtëcquin ademibidi èbi con piucquid daëd uashuntsëcstiasch,” qeshun utsitsen piucquid abentsëcquiobi menetsac caondash. Adanec nidpac caondash icbo. ¹⁶ Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udicstëc dëniäcquin bedoapac caondash. Sincoted icboedi 5tedbidi bedoapac caondash 10ted icnuc. ¹⁷ Ademibidi piucquid 2ted meneboedën 2bidi daëd uapac caondash 4tedi icnuc. ¹⁸ Padnuen abentsëc meneboedën chieshquin aid daëd uainquoio icquin ambi uëdëshcaboed shëcuë anantsëcquin piucquid abentsëqui ompopac caondash.

¹⁹ Yuecquoio ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac ²⁰ sincoted meniondaidën: “Is, icbo. Mimbi èbi meniondaidtedbidi daëd uaombi. Nëbi mitsana 10tedi iquec,” caquien ²¹ icbon: “Ai, con na daëdpactstëc icboedi daëd uaquin mimbi bédamboen nac. Nëbi èbëdtan chuiquid dapa icta. Èbëd cuishonquec tabadec cho,” capac caondash. ²² Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien ²³ icbon: “Ai, èmbi chiapadomboen mimbi con na daëd uac. Nëbi èbëdtan chuiquid icta. Mibitsen èbëd cuishonquec tabadec cho,” capac caondash.

²⁴ Adnubien piucquid abentsëcquiobi meniondaidën chieshquidëntsen: “Mimbi ancaidon nidsinaid peteuidi bedquid mibi nec, icbo. Mimbi chiapadomboen nainquoio icsho isash chushcanquidquoio mibi nec. ²⁵ Adec dacuëdampambo icquid icsho mibi dacuëdënquin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien ²⁶ icbon: “Chieshquieç mibi icsac. Èmbi chiapadomboen nambo mimbi iquec. Èbi caic: ‘Ancanquid icquin èbi chushcanushe,’ qeshun ²⁷ nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,” ²⁸ quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniäc 10ted icboedi 11ted yanac caondash. Adshumbic chieshquid comapenen cuidpac caondash. ²⁹ Ademibidi naindambi. Èbi tantiaquin èmbi chiapadomboen naquid ademibidi namequin bédamboen tantiamendambi. Èbi tantiesabo èmbi chiaid niacquid bédamboen tantiamenquoio iquendambi. ³⁰ Aid yua icsambo icquid cuidacimboen Nuquin Papan èbi tantiesabo cuidquiendac. Ambi icsaido cuidquiäcno nësecac natiaic shubiquiendac —quepondash Esus abëd icquido chiec.

Matses nashunesa cuidte chiaid

³¹ Adshumbic Esusën padpiden chuiopondash. —Nuquin Papan abi yacnoshon uaido mayan bédabobëd choec: “Abitedishun Icbomboeni nec,” quiash bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. ³² Adshumbic matses abitedimbo cho-chomequin tsidadmendambi. Adshumbic icbon aton nauidquoio tsinacacimboen èbi tantiaquido naden chiendambi. ³³ “Èbëd tabadtequido mibi neque. Nëmbo con abiuç tabadec cho,” caindambi. Adshumbic èbi tantiesabo chuiquin: “Èbi tantiesabo cuidadtequido mibi neque. Con copioc tabadec cho,” caindambi. ³⁴ Adshumbic èbi tantiaquido padpiden chuiopaindambi. “Èbëdi tabadec cho. Matses uaquin tauabi èdenquimboshë mibi caic: ‘Aido èbi tantiaquido icmeshun èbëdi tabadmendambi,’ quequin Nuquin Papan tantiaidombo yec èbëdi bédamboec tabadec cho. ³⁵ Mimbi èbi nashundenec. Bundoacsho mimbi èbi pemedeneç. Acte bundoacsho ademibidi mimbi

ëbi acmedenec. Mimi isacmaidquio icsho mimi ëbi yuedtenec. ³⁶ Con dashcute nibêdsho mimi ëbi dashcute menedenec. Daicsabudtsash unêstiadtsêcquio icsho ëbi tantiec mibi datsatenec. Quênên nauedacsho mimi ëbi isuan-isuandenec,” caindambi. ³⁷ Adoquien bédamboec tabadquido: “Tantiadenquio icnuc mimi chuipec, icbo, ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. ³⁸ ¿Ëmbi isacmaidquio icshodambi mibi yuedtionda? Mambi padambo yoc. ¿Dashcute nibêdshodambi mibi dashcute menepacti? Mambi padambo yoc. ³⁹ Mibi daicsacsho datsadambo iquebi. Quênên nauedacsho mibi istianiambo iquembi. Mimi tantiadenquio icnuc chuipec,” ëbi caindac. ⁴⁰ Adoac naden chiendambi. “Tantia. Mibi chuinu. Ëmbi chiacpadambo ëbi tantiacquido utsibo bédamboen isquin mimi nashundenec. Aden ëbibi nashunacimboen mimi utsibo nashuneneque. Èbêdi tabadec cho,” caindambi.

⁴¹ Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobêdta ênenquio icquin cuidacno nid. ⁴² Ëmbi chiacpadambo ëbi tantiaquido nashunesambo mibi icteneque. Bundoacsho mimi ëbi pemenquio ictenec. Acte bundoacsho mimi ëbi acmenquio ictenec. ⁴³ Mimi isacmaid icsho mimi ëbi cacumedenec. Dashcute nibêdsho mimi ëbi menenquio ictenec. Daicsacsho isash mibi ëbi datsadenquio ictenec. Quênên nauedacsho mimi ëbi istanenquio ictenec,” caindambi. ⁴⁴ Aden chiaquien: “Tantiadenquio icnuc mimi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ëmbi isacmaid icsho mambi mibi isambo yoc. ¿Min dashcute nibêdshodambi mibi istionda? Mambi padambo yoc. Mambi mibi daicsacsho isambo yoc. Mibi quênên nauedaid tantiambo iccondambi. Tantiadenquio icnuc mimi chuipec,” caindabi ëmbi chiacpadamboen naisabon. ⁴⁵ Adoac naden chiendambi. “Ëbi tantiacquido nashunenquio icquin ëbibi nashunenquio yacimboen ëmbi chiacpadamboen naisabo mibi neque. Nuquin Papan cuidacno nid,” caindambi. ⁴⁶ Adoac icsamboec tabadquido ênenquio icquin cuidacnombo nidnubi bédamboec tabadquido Nuquin Papa yacno ênêdenquio yec tabadendac —quequin Esusên chuipondash.

26

Esus bedshun unês uanuequin chiaid

(*Mad 14.1-2; Duc 22.1-2; Uan 11.45-53*)

¹ Aden abi chote ênquin chuitanquimbic abi unês uatetsen abêd icquido Esusên chuipondash. ² —Daêdec ushun nuquin matsesên obeca bacuê unês uaindac. Tsusedpabon: “Ma con mado unês uainquio icnu,” qeshun obeca bacuê abided unês uampid tantiaquin badiadshun penun obeca bacuê unês uaindac. Aid ushêmbi ëbi bedshun cuesten dectamendac —quepondash Esus.

³ Adnubien tsusiobobêdi con matses chuiquid dapa dadpen abi chuiquid dapambo Caipas cuêmêdquidên shubun pudued-puduedpac caondash. ⁴ Adashic: —Nêbien Esus unês uametiad utsibo ismenquio icquin bedshun. ⁵ Nuquin matses obeca pec tabadnuc bedenquien ictiad. “Esus bédambo icquidi cuesunec,” qeshun obeca penuec cho-choquidon nuqui cuesnushe —quepac caondash.

Chidon Esus machiuinaid

(*Mad 14.3-9; Uan 12.1-8*)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bédamiondaid Simon caidên shubun puduedpondash. ⁷ Puduedshun pec samêdshobien chidon puduedshun ambi piucquid dadpenquio menequin bedaid têchumpin icquid bédambo nuadquid Esus machiuimpondash: —Esus bédamboshê icquid nec —qeshun. ⁸ Adsho isumbien Esusbêd icquidon: —¿Adenda bédamboen nai? Ma icsambo yoc. ⁹ Utsibo menequin dadpen piucquid bedshun piucquid nibêdquido aid piucquid menetiadquidi mibi nec —quequin chido chushcapondash.

¹⁰ Adsho tantiasumbien Esusên: —¿Atotsieshun chido chushcai? Ëbi bédamboen tantiaquin ëbi ismequin bédamboen nashunebique. Chushcainda. ¹¹ Mimi chuiboed piucquid nibêdquido ênêdenquio yec mibêdi tabadendac. Èbien mibêdi tabadenquio yanendac. ¹² Ëbi unês uashun chococate tantiacimboen machiuinoshibique. Chushcainda. ¹³ Ëmbi chiaid chuibeniacnoshon nêid chidon ëbi machiuimboed chiendac —quepondash Esus abêd icquido chiec.

Udasên Esus bedmenun piucquid bedaid

(*Mad 14.10-11; Duc 22.3-6*)

¹⁴ Adnubien Udas Iscadiote caid Esusbēdi icboedi Esus chieshēnquido chuiquid dapabo chiec nidpac caondash. ¹⁵ Nidshumbic chuituidpac caondash. —Utsibo ismenquio icquin mibiuidtsēqui Esus bedmenu. *¿Tedtsi piucquid ēbi menetsia?* —caquien badedi pudunquin piucquid shocoshēmpi 30ted icnuc tambantanquin menepac caondash: —Baded ēbi bedme —quequin. ¹⁶ Meniac bedanec nidec: —*¿Mitsishunquiemi utsibo ismenquio icquin Esus bedmepeba?* —quepanēdash Udas. Adashic Esusbēdi tabadoaic chopondash.

Unēsush abēd icquidobēd Esus pec tabadaid
(1Cod 11.23-26)

¹⁷ Adnubien Esusbēd icquidon: —Equipito yacnuēsh cuenun pan bidiscamiabi yampid 7tedec ushquin tantiaquin tauaid ushē nēid nec —queshun Esus chuipondash. —Nuquin Papan nuquin tsusedpabo unēs uamenquio icquin matamiampid inchēsh tantiaquin obeca bacuē penuen *¿mitsishunquiemi mibi codocashumpe?* —caquien Esusēn: ¹⁸ —Edusaden yacno nidshun ēmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nēbi Nuquin Papan chiacpadomboen uesquin nabanemi,’ quiosh. Min shubumbo caic: ‘Aidēn shubun puduedshun Nuquin Papan nampid tantiaquin obeca bacuē pec tabadcuedednu,’ quiosh,” quequin chiec nid ¹⁹ —cac nidquimbi shubu icbo chuituidac caondash. Adoac: —Ai, ma chobono —quesho tantiahsambien abia nidboedon aidēn shubun puduedshun penuen nēish yua obeca codocapaccondash. Adnubien Esus chedo puduedpondash.

²⁰ Inchēshēmbi abēd icquido 12tedbēd samēdquin Esusēn pepondash. ²¹ Pec samēdquin Esusēn chuipondash. —Tantia. Mibi chuinu. *Ēbi chieshēnquido ēbi bedmequid abentsēc nēmbobi iquec* —quesho tantiahsun ²² unēsquio yanshun abentsēcshun abentsēcshunquien Esus chuipondash abēd icquidon. —*¿Ēbida cai, Icbo?* —quequin abi chuishobien ²³ Esusēn: —*Ēbēdan Pete codocaid ēnē punquid ēbi bedmequid nendac.* ²⁴ *Ēbi Nuquin Papan chiaid dada uamepampicpadquid matsesmiaid yec unēsēndabi. Padnuen ēbi bedmequid comapenen cuidtequidquio nec. Anin aid tishenquio icpatecnēdan. Cuidac natiaquiendac —quepondash Udas caic.*

²⁵ Adoquien Udasēn abi bedmequidēnquio: —*¿Ēbida cai, Icbo?* —caquien: —Ai, mibibimbi caic —capondash. Adoac Udas puduenanec nidpondash.

²⁶ Adshumbic Esusēn Pete sananquin: —Mimbi Pete uaid nēid nec. Mibi bēdambo iquec, Papa —quequin Nuquin Papa chuitanquin cuēsh-cuēshbanshun abēd icquido menebampondash. —Nēid cuēsh-cuēshquin nibēdamiacimboben ēbi mēyanquin unēs uaindac. *Ēbi unēs uate tantiaquin nēid peta —cac pebededsēccondambi.* ²⁷ Adshumbien Esusēn dēshoten actequid cushotshon sananquin: —Mimbi uaid nēid nec. Mibi bēdambo iquec, Papa —quequin Nuquin Papa chuishun: —Nēid abitedishun acbeded —cac dēshoten abentsen cushtoaid pictsē-pictsen acbampondambi. ²⁸ Aid actequid acshobien Esusēn: —Nuquin Papan chiaid nuquin tsusedpan dada uapampicpadec ēbided cuidadec unēsēndabi. Nēid acquin: “Esused Nuquin Papan cuidac aton intac siebudpamboec unēsposh. Aton Madoded cuidshun Nuquin Papan ēbi padenquio iquec,” quequin nēid acquin tantiaata —capondashi.

²⁹ Adashic: —Nadquid actequid padpiden aquec cuishonquec mibēdi tabadenquio iquendabi. Nuquin Papan abitedishun Icbombo icmiac abi yacnombo mibēdi cuishonquec tabadendabi —quepondash Esus ēbi chedo chiec. ³⁰ Adashic cuēdēnten abentsec cuēdēnash macuēsh dapa Odibos caid pudundonoec nidanepondash Esus Udas Esus chieshēnquido chiec nidbon.

Petedo chieshuidte Esusēn chiaid
(Mad 14.26-31; Duc 22.31-34; Uan 13.36-38)

³¹ Macuēsh dapa Odibos caid yacno nidquimbi Esusēn chuipondashi. —Nēid inchēshēmbi Nuquin Papan chiacpadec ēbi nianec mibitedi niquendac. Nuquin Papan naden chuipampic. “‘Icbo cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac. ³² Padnueni unēsash uincuenendac. Adanec mibi cainuec nidaid cuēshē utsi Cadidia caid yacno ēbia nidendabi —quepondash Esus abēd icquido chiec.

³³ Adoquien Petedo: —Mibi cuesnuec cho-chosho isash utsibo dacuēdec niquenuec ēbimboen cuenēnquimbo ictsiandac —queshobien ³⁴ Esusēn: —Tantia. Mibi chuinu. Nēid inchēshēmbi cachina bēnē cuēdanabi icnuc: “*Ēmbi isacmaidquio aidi nec,*” mimbi ēbi caindac. Cachina bēnē cuēdanabi icnuc 3tedec mibi adendac —caquien ³⁵ Petedo: —Pada. Adtiapimboeni iquec. Chieshēmēnquidon: “*Esusbēd icquid mibi neque. Mibi cuesunenu,*” caqui: “*Ēmbi isacmaid neque. Padi,*” quenquio iquendabi. Mibēdquiobi unēsstianabi —Petedo quenubini: —Ai, ēbibe adēchidi ictsiac —quecuededpondabi Esusbēd icquidotedi.

*Quetsemani caid yacnoshon Esusën Nuquin Papa chiaid**(Mad 14.32-42; Duc 22.39-46)*

³⁶ Adanec nidequi cuête dadpen nitsinacno Quetsemani yacno nidpondash. Auëshquio Esus nadpondash. —Ambobi tabadta. Udictsëc nidshun Nuquin Papa chuitanu — quepondash.

³⁷ Adashic Petedobëdta Sebedeyon mado daëd buanec nidpondash. Udictsëc nidequi unëshquio yanec shubiantiadtsëcquio yampac caondash. ³⁸ Adshumbic Petedo chiec: — “Matsestedi icsaid ëmbi bedshunsho isun Nuquin Papan ëbi istiapimbo yanendac,” quiaş unëshquio iquebi. Èbi yacpadec ushenquio yec nëmbobi isec tabadta —quianec ³⁹ udictsëc nidash nidaidën uebudshun Nuquin Papa chuipac caondash. —¿Ada mimbi ëbi unësh uamenquio icpatsia, Papa? Mimbi: “Ai, mibi unësh uamenquio iquembi,” cac bëdambo ictsiabi. Mimbi: “Nëbi mibi unësh uamenu,” cac mimbi tantiacpadequi unëshendabi —quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: —Ushenquio yec isequi tabadta —caboqui. —¿Yuec-yuecpactsec ushenquio icquin istiapimboda icco? ⁴¹ “Satanasën icsamenushë,” qeshun ushenquio icquin Nuquin Papa chuita. “Ushenquio iquebi,” queboedobi ushcas mëmunenquio yec mibi ushpec —capac caondash Esusën Petedo chedo chuiquin.

⁴² Adtanec padpidec nidoashun Nuquin Papa chuioaic: —Èbi unësh uametiadquio icquin ëbi unësh uameta, Papa. Èbi unësh uametiapimbo icquin mimbi ëbi unësh uamenquio ictsiac. Mimbi tantiacpadomboen nata, Papa —quetanec ⁴³ choaquin isquien Petedo chedo ushoaic ushcas mëmuntiapimbo yec.

⁴⁴ Adsho istanec nidoashun ambi chuibocpadomboembidi Esusën Nuquin Papa chuitanepac caondash tedesteden.

⁴⁵ Adtanec choaquin ushach uestho istuidoashun: —¿Ushecta ue? Nëbimbobi ëbi unësh uamenuen ëbëd ichoedëmbi icsambo icquido ëbi bedmeque. ⁴⁶ Nidnu nid. Is. Èbi bedmenuec ëbi bedmequid choeque —quepondash Esus Udas chosho isash.

*Abi chieshënquidon Esus bedaid**(Mad 14.43-50; Duc 22.47-53; Uan 18.2-11)*

⁴⁷ Adnubien Udasën Esusbëd ichoedën bedtanac matses dadpen cuesantiadpambo yec chështebëdta cuate sanambededtsëcquieac cho-chopondash. Nësh yua abided unësh uaquido chuiquid dapabobëdan con matses tsusiobon: —Bedtan —cac cho-chopondash. ⁴⁸ Ambi bedtanaidobëd cho-choquimbien Udasën: —“Nëd Esus nec,” quequin adoendambi —abi quiacpadembi ⁴⁹ Esus tansudcatuidpondash: —Chobi, Icho —quequin. ⁵⁰ Adoaquien Esusën: —Èmbi tantiaobedquio mibi nec. Èmbi adoboedënquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

⁵¹ Aden Esus bedshobien abëd icquidën abi tsiusudaid chështe chictanquin chuiquid dapan yua pateshunepondash. ⁵² Adoshobien Esusën: —Padi. Chën. Min chështe tsiusudoata. Cuesanquid icsho adembidi cuidnushe. ⁵³ ¿Tantienquioda ique? Èmbi chiac con Pan ambi abi yacnoshon uaido mayan bëdabo dadpenquioshë ëbi cudasmenuen chometsiash. ⁵⁴ Nuquin Papan aden ëbi cudasmiac bedadtiapimbo icsho ¿mitsipaden Nuquin Papan chuiquin dada uamiampicpadomboen ëbi naden bedpatsiash? —capondash pateshunianquid chuiquin.

⁵⁵ Adashic abi bedquido chiec: —¿Atotsi quenuac chështebëdta cuate sanambededtsëcquieac ëbi bednuec cho? ¿Nuqui chuiquid dapan chiaid niac-niacquin matses cuesanquido chuiquid dapadabi nedi? Mabí mimbi isboedquobi neyoc. Badiadquidën badiadquidënquien Nuquin Papa tabadte shubu uashunaid daquënë uaidën puduedshun chuideneshobi ma mimbi ëbi bedenquio icboc. ⁵⁶ Padenquio ichoedombi Nuquin Papan tantiacpadënquiobi mimbi ëbi bedec. Èbi bedte chuiquin Nuquin Papan nuquin tsusedpa dada uamiampicpadomboen mimbi ëbi bedec —quequin Esusën chuinubini niquepondac: —Cuenenquio ictsiabi —queboedi.

*Caipas caid yacno Esus buanid**(Mad 14.53-65; Duc 22.54-55, 63-71; Uan 18.12-14, 19-24)*

⁵⁷ Adnubien chuiquid dapambo Caipas cuëmëdquid yacno Moisesën dada uampid chuibanquidobëdi tsusio utsibo cho-chopac caondash. Adnubien ambobi Esus bëpac caondash. ⁵⁸ Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuac puduedash chuiquid dapan namiaido sondadobëdi tsadtuidpac caondash Petedo.

⁵⁹ Adnubien cho-choboedo tsusio dapabo: —Esus unès uamenuen: “Esus icsasho isombi,” quequin muaquidon chuisho tantianuna —qeshun chomiac muaquido dadpen-shun: —Esusèn icsamboen nasho isombi —quequin chuipac caondash. ⁶⁰ Aden Esusèn naid muaquin chuiquin Esus unès uatiadquo icquid chiambo icpac caondash. Adnubien muaquin daëdshun chuituidpac caondash. ⁶¹ —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

⁶² Adshobien chuiquid dapabo chuiquidèn Esus chuiquin: —¿Atotsi quenuc ado? ¿Atotsi nëidèn chiec? —caquien ⁶³ Esusèn ëcbedenquo icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaidquo aton Madombobida mibi nepe? —caquien ⁶⁴ Esusèn: —Ai, mimbì chiaidquo nebi. Tantia. Mibitedi chuinu. Nuquin Papan abitedishun Icbombo icmiacshobini mimbì isendac. Adecbidi Nuquin Papa yacnuësh padpidec choec abu ushu yacnuësh choshobini mimbì isendac —quepac caondash Esus.

⁶⁵ Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatiapambo iquebi. Ambibi Nuquin Papa muauasho tantiashun ⁶⁶ ¿Atotsi natiadquo ique? —caquien abëdtan chuiquid utsibo: —Adquid cuidquid quedeneque. Unès uame-quimbien ictiad —quecuededpac caondash.

⁶⁷ Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc Esus dashcuten bëpuctanquin mëdanten bëcues-bëcuespac caondash. ⁶⁸ Bëcuestanquin: —“Nuquin Papan madombobien nec,” canu. En chui. Tantienu. ¿Tsundan mibi naoshe? —cabededtsëcquien mamënshumpac caondash Esus.

*Esus caic: Ëmbi isacmaid nec, quequin Petedon chiaid
(Mad 14.66-72; Duc 22.56-62; Uan 18.15-18, 25-27)*

⁶⁹ Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbëd ma mibi icpaboc —caquien: ⁷⁰ —Tantiadenquo icnuc mimbì chiec. Ëmbi isacmaidquo mimbì chiec —quec Petedo muaic taëpac caondash.

⁷¹ Adanec daquënë uaidèn puduedte shëcuë dayun nidash nidtuidpac caondash.

⁷² Adshobien chido yua utsin: —Nasaded yacnocquid Esusbëd ma nëid icpaboc —caquien ⁷² Petedo: —Ma ëmbi isacmaidquo Esus neyoc. Abimbo caimbi. Nuquin Papan cuidchitoshe muasho —queopac caondash muequi.

⁷³ Adash yuec-yuecpactsëcshumbien ambo tabadquidontsen Petedo chuipac caondash. —Aidbëd icquidien mibi nec. Cadidia yacnocquid onquiacimboc ma mibi onquepayoc —qesho tantiash ⁷⁴ Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquo neyoc —queopac caondash.

Adec 3tedec Petedo muanubien cachina bënë cuëdampac caondash. ⁷⁵ Adsho tantiashun Petedon Esusèn chuiboedquo tantiactampac caondash. —Cachina bënë cuëdanabi icnuc mimbì ëbi caic: “Ëmbi isacmaid nec,” capendac tedesteden —quequin Esusèn chuiboedquo tantiactanec umanuc puduenanec nidec Esus muauabosh natiac shubinidpac caondash.

27

Pidato caid yacno

Esus buanaid

(Mad 15.1; Duc 23.1-2; Uan 18.28-32)

¹ Adnubien chuiquid dapabo aton tsusio utsibödi Esus isec ushenquo badiadpondash. Badiadshun Esus chieshënquin: —Nuqui yuaquid ancanquid Esus unès uamec nidnu. Nid —qeshun ² podo cataneshun ancanquid Pidato cuëmëdquid ismenuen Esus buampac caondash.

Esus bedmequid Udas têtaniadaid

³ Adnubien Udas Esus bedmeboed: —Unès uamechitembien iquec. Unès uametiapimbo iquebi. Ëmbi bedboed piucquid shocoshëmpi 30ted meneoatanu —quianec abi meneboed tsusiobo menenuc nidpac caondash. ⁴ Nidshun tsusiobo chuituidpac caondash. —Icsachitobi. Unès uanuequido bëdambo icquidi bedmechitombi. Nëid mimbì meneboed mibi menenuc chobi. Në bed —caquien tsusiobo: —Padi. ¿Atotsieshun nai? Ma mimbì bedmepaboc —quepac caondash Udas caic. ⁵ Adoquien Nuquin Papa tabadte shubu

uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

⁶ Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibêdta dayun uatiapimbo iquec. Unës uanuen meniaid shocoshëmpi dayun uatemaide quedenegue. ⁷ Matsu nacnenquidën tied bedquin nëid menenuna. Nuquin matsепенquio isedquido unësacsho ambo chococanun aid tied bednuna —qeshun piucquid meniac caondash. ⁸ Aidon bedacsho isun nëbi aid tied cuënquin naadopec. —Unës uamequidën bedaid tied nec —capec. ⁹ Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “Aid bednuen Isadaidbon piucquid shocoshëmpi 30ted meneuidaid bedoashun ¹⁰ matsu nacnenquidën tied bedquin meneoapondash,” quequin Nuquin Papan chiaid dada uaombi,” quepampic Edemias.

Pidato caidën Esus chuimiaid

(Mad 15.2-5; Duc 23.3-5; Uan 18.33-38)

¹¹ Adnubien isadaidbo yuaquid ancanquid Pidaton Esus bëacsho chuipac caondash. —¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash. ¹² Adnubien abi chieshënquidon muaquin Esusën naid Pidato chuipac caondash. Adsho tantiashun Esusën êcbedenquio icpac caondash.

¹³ Adshobien Pidaton Esus padpiden chuioaquin: —Mibi icsaid dadpen chuipac. ¿Tantienquioda ique? ¿Êcbedantiapimboda ique? —caquien ¹⁴ êcbedenquio icpac caondash Esusën. —Nëidon muauac nebi —quequin chienquio icsho tantiash: —Adquid tantiambo iqumbi —quepac caondash Pidato.

Esus unës ua, quequin chiaid

(Mad 15.6-15; Duc 23.13-25; Uan 18.38-19.16)

¹⁵ Nuquin Papan isadaidbo unës uainquio icquin matamiampid tantiate ushëmbi seta utsin-utsinquin Pidaton quëhën nauedaïd isadaidbo abentsëc cuemedenedec. Pidaton: —¿Tsutsi abentsëquimbi cuemepe? —cac isadaidbon chiacpadquid abentsëc cuemedenedec. ¹⁶ Esus bëabi icnuc uimanëmënquidquio Badabas cuëmëdquid nauedpac caondash.

¹⁷ Adnubien Esus cuidte chuisho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. ¹⁸ —Esus chieshënquidon: “Nuqui padenquio yanuc nuqui dêniaquec Esus chuiquid dapa yanushe,” qeshun Esus bëaccosh. Nëmbo tabadquidon: “Esusquio cueme,” capashuni —quequin tantiaquin aden chuipanëdash Pidaton.

¹⁹ Adashic matses icsaïdo cuidte chuinuec tsadte dapan abucquio tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “Aid dada bédambo icquid neque. Unës uamenda. Dacuëdampambo icsho ushquin isombique. Unës uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

²⁰ Adnubien Esus chieshënquido tsusiobon ambo tabadquido chuïbudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

²¹ Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. ²² Adoquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten decantanquin unës ua —quecuededpondash.

²³ Adoquien Pidaton: —¿Atotsieshshun mimbi adope? ¿Atotsi icsa uasho mimbi adope? —caquien buëdanquiecuëdec: —Cuesten decantanquin unës ua —quecuededpondash.

²⁴ Adsho —Padi icnuna —caqui niacbidanquiecuëdequi unës uate bunquiecuëcuesantidpambo yansho isash: —Acte beccho —quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: —Nëid unës uame-tiapimbo iquebi. Nëid unës uamete bunec mibien cuidatëquidombo nendac. Êmbien adotiapimbo iquec. Mëpamëdec bëchish ucudacimboec mimbi icsamiaïd ucudebi —quish mëpamëdquin ismepondash Pidaton. ²⁵ Adsho tantiashien: —Con nabobëdtsëqui adequi cuidatëquidombo icnuna —quecuededpondash abitedimbo.

²⁶ Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten decantanquin unës uatan —quequin sondado buamepac caondash Pidaton.

Esus mamëshunaid

(Mad 15.16-20; Uan 19.2-3)

²⁷ Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamëshshumbedepac caondash unës uanumbi. ²⁸ Abi dasiuidaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin ²⁹ mauete pinchuc-pinchucpambo icnuc nacnenaïd mauemepac caondash. Adshumbic aton matses chuiquid dapan sananacimboben sananuc abiucshun cuate sanamepac caondash. Adshumbic aton matses chuiquid dapa ismiacimboben mamëshshunquin: —Is. Isadaïdbo chuiquid dapambo neque —queshun danëshën sëbudquin Esus ismepac caondash. ³⁰ Adshumbic dacuishtucatanquin ambi cuate sanameboed bedshuntanquin aidëmbi matombudnepac caondash. ³¹ Aden mamëshshuntanquin ambi dasiumboed chictanquin aton dashcutebidi dasiunoapac caondash. Adoshon: —Ma unësnequin cuesten dectanec nidnu. Nid —quequin Esus buampac caondash.

Esus cuesten dectanaïd

(*Mad 15.21-32; Duc 23.26-43; Uan 19.17-27*)

³² Buanquin Esus abi dectante cuate yuëmemebanquimbi dada nidaid Sidene caïd yacnuësh choquid Simon cuëmëdquid Esusën yuëmiaïd sondadon chiadtomebidampondash. ³³ Adobidanec nidec macuësh dapa yacno matses mapi canitebimboec isadquid Codocota caïd yacno chopondash.

³⁴ Choshombien sondadon uba chinaïd actequid paëmbo dauë nêcushaid Esus meneuidpondash. —Në. Ac —cac pictsëc tantanec: —Padi —quepondash aquenquio yec. ³⁵ Adshobien cuate napotiaïd bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun têchun sandoshon cadotanequin dada uatempi puduemiaïd isbanquin Esusën dashcute bedbampondash. ³⁶ Adash: —Esus unëso isnu —quec sonadado tabadcuedepondash.

³⁷ Adshumbic: —“Nadquid icsho cuidquin unës uac,” quequin ma isquidon tantianu —queshun cuate cuëshën naden dada uapacondash. —Nëïdquio Esus nec. Isadaïdbo chuiquid dapambo nec —quequin dada uaid Esusën mapino dectampondash. ³⁸ Ampequid daëd cuesten ëquë dectambudcuenquin dectantanquin nênantanquio Esus dectampondash.

³⁹ Adshobien podqued cuëmanquio Esus diaðsho isbidanequin chieshënquin chuipondash. ⁴⁰ —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaïd yec bud. Nuquin Papan madombo yec unësenquio yec auëshquiobi bud —cabidanepondash. ⁴¹ Adechbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamëshshunec nadpondash. ⁴² —Utsibo ismuenbien comapenen tantiaquin matses bédamechitosh. Ademebidi comapenen tantiaquin nacnenash budsho isnuqui. “Isadaïdbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaïd yec Nuquin Papan Madombo nec,” quetsiabi. ⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan madmenu. Unësenquio icsho isnu —quepondash tsusiobo. ⁴⁴ Adnubien abëdta cuesten dectamboedon ampequidontsen Esus mamëshshumpondash.

Esus unësaid

(*Mad 15.33-41; Duc 23.44-49; Uan 19.28-30*)

⁴⁵ Adnubien ushë cuembo icnuc inchëshbocpadquiec inchëshpondash. Ushë cuembo icnuc inchështanec ushë budambi ushëmbo yanoapondash. ⁴⁶ Ushëmbo yanubien Esus comapene cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bédamboen isenquio yano, Papa Edoen? —quec adondash.

⁴⁷ Adec cuëdsho tantiaish isquido nadpondash. —Edias yampid cuëchitequien nec —quiampondash. ⁴⁸ Adnubien Esus isec tabadquid abentsëc titinquianec nidshun shapushapupactsëcquid bedtampondash. Bedtanshumbic actequid mucacquid anidtsëcquidën shapu-shapupactsëcquid punshun cuate dëdectanshun abuc sananec: —Chishmenu —queuidpondash. ⁴⁹ Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

⁵⁰ Adnubien padpidec buëdanquiec cuëdtanec Esus unëspondash. ⁵¹ Esus unësñubi Nuquin Papa tabadte shubu uashunaid yacnuësh: —“Quënë uquëduquidën Nuquin Papa tabadtembo nec,” caïdën utsi puduednushe —queshun dashcute ënapen icquid dectanaïd abucüësh canchedbudcuenac caondash abitiombi. Nuquin Papan ambi bédamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash. ⁵² Adec unësaid nauedaid shëcuë bëtashte cuënote dapambo cuëshëdnubien Nuquin Papa tantiaquido ënden unësaïdo abentse-abentsec uincuenanec chopac caondash. ⁵³ Esus uincuenan adec uincuenaidon shubu dadpen icquid Edusaden caïd yacno nidshun matses dadpen ismepac caondash.

⁵⁴ Nidaid uédëquenec dacuédampambo icsho isashien: —Esus unëso isnu —quish tabadquido sondado chedo abi chuiquidbëdi dacuédtanec: —Ma Nuquin Papan Madombobi nepayoc —quepac caondash.

⁵⁵ Adnubien chidobo Cadidia yacnuësh Esusbéd choquin abi codocashumboedo Esus unëso isnuec ancunshun isec tabadpac caondash. ⁵⁶ Nèidted icpac caondash. Nèidic Madia Mactada yacnuësh choquid. Nèidic Madia utsi Acobon tita. Aid Ose cuëmédquidën titabidi niosh. Nèidic Sebedeyon chido Uanën tita. Aid Acobo cuëmédquidën titabidi niosh. Aidedi uanoshon isbededec tabadpac caondash.

Esus chococaid

(*Mad 15.42-47; Duc 23.50-56; Uan 19.38-42*)

⁵⁷ Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnoquid Ose caid: —Esus tantiaquid nebi —quianec Esus bedec chopac caondash. ⁵⁸ Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. ⁵⁹ Aden bedtanshun Osen Esus dashcute bëchish nibédquidënquo nuamboshë icnuc datanedonepac caondash. ⁶⁰ Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caondash Ose. ⁶¹ Adnubien Madia utsibéd Mactada yacnuësh choquid Osen Esus nauedsho isbosh ambobi tsadpac caondash.

Esus nauedaid isec sondado tabadaid

⁶² Isadaidbon obeca bacuë unës uacpadën Esus unës uamiash abentsec ushashi chonoadtemaid ushëmbi Esus chieshënquido Pidato caid chiec nidpac caondash. Padiseyobobëdi nidshun chuiquid dapabon Pidato chuituidpac caondash. ⁶³ —Esus nadpadenec. “Unësash daëdec ushash uincuenendabi,” quec muapadeneque. ⁶⁴ Daëdec ushquin min sondado Esus nauedaid cudasmeta. Esusbéd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë icctiashe. Min sondado: “Cudasta,” quequin chuita —capac caondash Esus chieshënquidon. ⁶⁵ Adoaquien Pidaton: —Ai, con sondado buantan. Aden buanshun: “Unësaid nauedaid cudasec databëda,” cata —capac caondash. ⁶⁶ Adoaquien isadaidbo tsusiobon sondado buanshun cuënote dapa bëtashaid bucun bëbitaccapac caondash. —Bëbitaccaid isash: “Chuiquid dapan bëbitaccamiaid nec. Cuidnushe. Esus chictiapimbo iquebi,” ma quenu —queshun bucun bëbitaccapac caondash. Adoshon: —Beduanushe. Isquieq tabadta —capac caondash sondado chedo chuiquin.

28

Esus uincuenaid

(*Mad 16.1-8; Duc 24.1-12; Uan 20.1-10*)

¹ Esus unësbon abentsec ushash abi chonoadtemaidëntsen abentsecbidi ushash dominco badiadnuc chidobo Esus nauedshun bëtimboed isec tabadnuec padpidec choapac caondash. Mactada yacnuësh choquid Madia utsibéd isec choapac caondash. ² Choash isec tabadnubi nidaid uédëquiampac caondash. Adnubien Nuquin Papan abi yacnoshon uaid mayan bëda abucuësh budtanquin cuënote dapa bëtashaid shëcbempac caondash. Adtanec cuënoten tsadtopac caondash. ³ Mayan bëda yec abu bed-bedquiacbimboec ushëmboshë bëchamauanquieq icpac caondash. Aton dashcute adquiobidi bëchish nibédquieq ushumboshë icpac caondash. ⁴ Adec dacuédampambo icsho isashien unësaid cudasquido sondado dacuédtanec uédëquenec tantiadempambo yec padishbudnepac caondash abitedi.

⁵ Adnubien mayan bëdan Madia chedo chuipac caondash. —Dacuëndenda. Cuesten decantanquin unës uaboed Esus isnuec mibi tabadec. ⁶ Nibëdec. Nidosh. Ambi chuibocpadequin uincuenash nidosh. Abi uebocno en isec cho —cac chidobon anisnubien padpidec onquequin chuiopac caondash. ⁷ —Mimbi isboed Esusbéd icboedo chiec nid. Badedquido nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien ⁸ auëshquibi chidobo dacuédboedi cuishonquec titinquier nec nidanepac caondash.

⁹ Titinguianec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icho nec —quequin ismenuen danëshën sebudquin taë uidën uapac caondash. ¹⁰ Adoaquien Esusën: —Dacuëndenda. Con utsibo ëbéd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuensho isun sondadon muauaid

¹¹ Madia nidnubien Esus nauedaid isquido sondado abi chomeboedo isadaidbo chuiquido chiec chopac caondash. Mayan bēda chonoc Esus uincuemboed chuituidpac caondash.

¹² Adoaquin isadaidbo chuiquidon aton chuiquid utsibobēd onqeshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —qeshun piucquid dadpenquo menepac caondash. ¹³ —Mimbi isboedquo chienquo icquin naden chuita. “Ēbi chedo ushtoan abēd icboedon Esus ampequin beduanaccosh,” quequin utsibo chuita. ¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —qeshun ¹⁵ piucquid meniac bedanec nidec isadaidbo chuiquidon chiacpadec muapac caondash sondado. Adembidi nēbi isadaidbo dadpeshun: “Esus ampiac,” quequin chiuoac.

Ēbi chuibeneta, quequin Esusēn chiaid

(*Mad 16.14-18; Duc 24.36-49; Uan 20.19-23*)

¹⁶ Adnubini Esusbēd icboedo 11tedi yec Esusēn chiacnombo Cadidia yacno nidec macuēsh dapa yacno nidanepondac. ¹⁷ Macuēsh dapa yacno nidquimbi Esus istuidpondambi. Istuidshumbic: —Con Icbo neque. Ismenu —qeshun danēshēn sebudpondambi. Utsibombien: —¿Con Icbombobida nepeba? —capondash.

¹⁸ Adsho isun Esusēn anoentsēqui choquin chuituidpondash. —Ēbipadquid utsi nibēdec. Nuquin Papan uaido abitedi con na nec. Abitedishun Icbombo icquin abitedimbo namequidquo nebique. Mibitsen namenu. ¹⁹ Nidaid utsi-utsiec yacno nidshun ēbi tantiaquido icmenuen matses abitedi ěmbi chiaid chuibeneta. Adoac ēbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nēibēd Nuquin Papan Mayan tabadeque. Utsibo ismenu,” quetanquin aden acten mentobeneta. ²⁰ Mimbi mentoaido chuiban. “Nuquin Ibon chiacpadec bēdamboec tabadnuna,” quequin ěmbi chuiboedtedi chuiban. Mimbi adosho isash mibēd iquendabi. Nidaid abitedi nibēdanabi icnuc mibi chedo nianenquo iquendambi. Adembidi ēbi tantiaquidotedi niantiapimbo iquebi —quepondash Esus ěnquimbi chiec.

MADCOSEN DADA UAID

*Bëyuc choshon Uanën Esus chote chiaid
(Mat 3.1-12; Duc 3.1-18; Uan 1.19-28)*

¹ Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chiec onquiaid Nuquin Papan Isayas dada uamiampid nad iquec: “Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ënshun mibi cainquidombo iguendac, mado.

³ Shubu nibëdacnoshon comapenec onquequin mibi chotequid aidën chuibanendac naden: Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquio icsho mibi cuidenquio yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiacpadomboen naquid acten mentobampondash Uanën. ⁵ Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chiec utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash. ⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsiuquid niondash. Shioshbimboecquid shuishun pequid niondash. Bacun chequid niondash. ⁷ Aidëmbi naden chuibampondash: —Con tsyuecquid choendac. Aidi nadatiambocquin naquidquio nendac. Aidi bëdamboshëcquid icnuc ëbi icsaquid icsho çatotsieshun aid choec quequin chuiquidquio Nuquin Papan icmiosi? quec tsadebi. ⁸ Mibi acten mentoquid nebi; aidien abipadquiocquid aton Mayan menianquidquio nendac — quepondash Uan.

*Esus acten mentoaid
(Mat 3.13-17; Duc 3.21-22)*

⁹ Adnubien ambi chian-chianaidquio Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. ¹⁰ Aden acten mentoac Esus pudundonobi abu bëcadoacnoëshquio dëbimbimboec isadquid abipadquiocquid aton Mayan bede-bedequemboc Esusbëd icnuc budpondash. ¹¹ Aden budmetanec ambi bëcadoacnoëshi: —Mibentsëcquiobi icsho ëmbi tantiaidquio mibi nec, mado. Èmbi bëdamboen isaidquio mibi nec —quepondash aton Papa Esus chiec.

*Esus Nuquin Papan chiaid niacmenuequin Satanasën tanaid
(Mat 4.1-11; Duc 4.1-13)*

¹² Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. ¹³ Ambo tsadquimbi ushë abentsëc nidmec utsi choaid abutometsëcquiec tabadpondash. Ambo tabadshobi Nuquin Papan chiaid niacmenuequin tanu quianec mayan icsan icho Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbededpondash.

*Cadidia yacnoshon tauamboen chuibanaid
(Mat 4.12-17; Duc 4.14-15)*

¹⁴ Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. ¹⁵ —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantia —quepondash Esus comapenec onquec.

*Èbëd iquec cho Esusën abia caido
(Mat 4.18-22; Duc 5.8-11)*

¹⁶ Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. ¹⁷ Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Èbëd iquec cho —quepondash Esus. ¹⁸ Adsho tantiash nëshaid abëd icquid menianec abi chuiquidbëd nidanepondash.

¹⁹ Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. ²⁰ Aden nacnesho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemaiad
(Duc 4.33-37)

²¹ Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ènapen capuenquo yec Nuquin Papan chiaid chuibante shubun puduedpondash. Puduedshun iccuedquido Nuquin Papan chiaid Esusën chuipondash. ²² Aden chuisho tantiashun: —Ambia tantiaquidën chiacpadomboen Esusën chuibanec. Utsimbien adomboen chienquo iccosh —quec onquec tabadcuededpondash. ²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: ²⁴ —Esus Nasaded yacnoësh choquid mibëd icquidpenquo nebique. Nidec nid. ¿Chian anëdënquiacno èbitedi nidmenuecta cho? Nuquin Papan Madombo icsaisa nec quequin èmbi tantiaid mibi nec —quec mayan icsa dapuduedtsaid onquepondash. ²⁵ Adoquien: —Otaquio tabad —quetanquin: —Dapuduen —capondash Esusën. ²⁶ Adoac comapenec abi dapuduedaid uëdëquenec sidquianec dapuduepondash.

²⁷ Adsho isash: —¿Abimbodambi ispo? ¿Mitsipadquidquo nepec? Ambi tantiamaiad utsin nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec. ²⁸ Adec onquecuedesh auëshquo nidaneshun ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

Simonën nachi bëdamiaid
(Mat 8.14-15; Duc 4.38-39)

²⁹ Ambi chuisho tantiaboedo nidanenubien Petedo Simon caidën shubu yacno Esus Acobo Uan aidtedi nidpondash. Aidën shubun icquidbidi aton utsi Andedes icpondash. ³⁰ Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. ³¹ Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquo bëdampondash. Adec bëdanash nidtoshon codocashun abi choquidtedi pemebampondash Simonën nachin.

Esusën dadpen bëdamiaid
(Mat 8.16-17; Duc 4.40-41)

³² Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuduedaidtedi bë-bëpondash. ³³ Bë-bëash Simonën shubu shëcuë cuëmano puduedabi tabadcuededpondash. ³⁴ Adsho isun daicsaidtedi Esusën bëdamebampondash. Adembidi mayan icsa dapuduedaid dapuduemebampondash oncamenquicquin. Nuquin Papan Madombo abi yacno yuedmianquid abentsëquiobi mibi nec quequin chuinushe queshun oncamenquicquidpondash.

Shubu nibëdacno Nuquin Papabëd onque Esus onquiaid
(Duc 4.43-44)

³⁵ Adashic badiadte naoentsëqui yanubi isucunanec puduanec shubu nibëdacno Esus nidpondash. Nidec tabaduidshun Nuquin Papabëd onquequin chuibampondash. ³⁶ Esus nidachshobi isucunshun Petedo Simombëd icquidën nibënampondash. ³⁷ Aden nibënquin istuidashi: —Mibi isec cho-choquidtedishun mibi nibëmbededec —quepondash Esus caic.

³⁸ Adoquien Esus: —Capucuenquin utsibotsen Nuquin Papan shubu abentsëquën yuedanquid iquec quequin chuibenic chobique. Shubu utsi-utsiec dadpen yacno nidnu. Nid —quepondash. ³⁹ Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuiopondash. Adembidi mayan icsa dapudueoapondash.

Nami mishac tantiadenquiocquid bēdamiaid
(Mat 8.2-4; Duc 5.12-13)

⁴⁰ Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bēdame —quequin Esus chiec comapenec cuēdpondash.

⁴¹ Adec cuēdshobi nēid isash unēsquo iquebi quequin ëquēducshun tantiaquin mishec Esus: —Mibi bēdamembique. Bēdambo icta ⁴² —quenubi daicsaid nibēdquo yec bēdampondash.

⁴³ Aden bēdametanquin nidmepondash: —Nidec nid. ⁴⁴ Nidquimbi, Esusën bēdamioishi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bēdambo icquin anocquid, Nuquin Papa matses chiec onquianequid, isme. Adoshon dēbimbicquid daēd meneta Moisesën chiacpadomboen ma anocquidēn napanueshun. Aden meniac abentsēc cuesuneshun utsi cuesunenu quenquiocquin cuesuniāidēn intac puntanequin intac mibi dasecashion dēbimbicquid utsi cuemeshun naden aidēn mibi chuipec. Nuquin Papan mibi bēdamboen istiapimbochoedi nēbi bēdamboen mibi isendac. Aden chuiquin mibi bēdamiaid Nuquin Papan naid nec quequin tantiatsiash —quepondash Esus ambi bēdameboed chiec. ⁴⁵ Adsho tantiaboshombi niachidanquin Esusën bēdamioishi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibēdacno capupondash. Adnubien Esus nibēnec nidaid utsi-utsiec yacnoēsh dadpen cho-chopondash.

2

Cuembo yec uishquiaid Esusën bēdamiaid
(Mat 9.2-8; Duc 5.18-26)

¹ Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash. ² Dadpen cho-choash puduedash tsucus-tsucustsēcquo yec tabadnubi adecbidi shēcūē cuēmano tabadpondash. Adec tabadsho isun Esusën Nuquin Papa yacno shubu abentsēcquēn tabadte iquec quequin chuibampondash. ³ Adnubien cuembo yec uishquiaid bēc dada daēd-daēdquiec 4ted cho-chopondash. ⁴ Cho-choshon matses tsucus-tsucustsēcquo yec tabadsho isun dectatoshon macano nacenaid chic-chictanquin Esusën dayunquo uishquiaid imbudpondash. ⁵ Aton dayunquo imbudsho isun Esusën bēdamec quequin abi imbudoedēn tantiec quequin ambibi tantiapondash Esusën. Adashic: —Mado, mibi cuidenquo yec mibi icsaid bēpiscudobi —quepondash Esus.

⁶ Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquin icsamboen tantiapondash. ⁷ ¿Atotsi quiash adec Esus onquepeque? Tantianu. Nuquin Papa icsamboen chuiquidien aid nechitec. Nuquin Papauidi matses cuidenquo yec abi icsaid bēpiscudquid nec, quetsēcquiec tabadpondash.

⁸ Aidon tantiaid tantiec nadpondash Esus: —¿Atotsieshun aden mimbi icsamboen tantiape? ⁹ ¿Mibi cuidenquo yec mibi icsaid bēpiscudobi quequin ëmbi chiaidquo bēdantequidpenda nedic? Adecbidi, ¿Mibi icsambochoedi mibi bēdanoque. Nidtoshon mibi imbudoed chiadtoshon buanec nid quequin ëmbi chiaid bēdantequidpembidida neoadic? ¹⁰ Ai, adquidquibidi nec. Mibi cuidenquo yec mibi icsaid bēpiscudobi queboed chidon tishac matses yanaid yequi chuiquidquo Esus nec quequin tantiesabo mibi nepec. Adquid icsho ëbi tantiamenequin ¹¹ cuembo yec uishquiaid naden chiembique Tantia. Mibi icsambochoedi mibi bēdamiombique. Nidtoshon mibi imbudoed chiadtoshon buanec nid —capondash Esusën. ¹² Adoquien nidtoshon abi imbudoed chiadtoshon buampondash. Aden buansho isash: —Nideque. Is. Adomboen nasho isambocondambi —quetsēcquiec onquiash Nuquin Papan naid nec quec cuēdēncuededpondash.

Ēbēd iquec cho Esusën Debi caid
(Mat 9.9-13; Duc 5.27-32)

¹³ Adashic padpidec chian Cadidia caid cuēmano nidoapondash Esus. Ambobi tabadnubien aidēn chiaid tantianuec matses dadpen cho-choapondash. Cho-choasho isun Nuquin Papan chiaid chuibanoapondash Esusën. ¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuēnondash. Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaidpembo ancaquidēn, Con matsespembon piucquid bedshunta, cac bedshunoaquid

Debi nepondash. Adshobien: —Ëbéd iquec cho —Esusën cac: —Ai, mibéd nidnu. Nid —quianec badedi Esus tsibananec Debi nidpondash.

¹⁵ Adshumbic Debin shubuno nidshun Esusbéd icquidon pepondash. Ashunquiobidi aton na buansho isun piucquid bedshunquid Debipadquidën utsin-utsinquier pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquier pepondash. Debin shubuno Esus tsibanec choquid dadpen icpondash. ¹⁶ Aden adquidbédtan Esusën pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbédambi isadaidbon nadomboen nata quequin chiaid naisabédambi mibi chuiquidën pepeç? Tantiyanu. Èbi chui —quepondash padiseyobo Esusbéd icquido chiec.

¹⁷ Adsho tantiashien Esus: —¿Dada bédambocquidta dauëchoquidën bédametequid nedic? Padenquo. Daicsaidien dauëchoquidën bédamec. Adquiecbidi, icsaisa nebi quequin ambibi tantiaquid icsho mibi icsaid ënta. Aden ënash ëbéd icquid mibi iquendac quequin chiesha nebi. Icsaquid nebi qeshun mibi icsaid ënta. Aden ënash, ëbéd icquid mibi iquendac quequin chuiquid nebi —quepondash Esus.

*¿Atotsi quiash mibéd icquid buna mëmunesa nec? quiaid
(Mat 9.14-17; Duc 5.33-39)*

¹⁸ Adnubien abi chuiquid quënën nauedan aid tantiec unësquiocquin Uan acten mentoanquidbéd icquidën buna mëmunubi padiseyobobéd icquidon unësaid tantiec unësquiocquin buna mëmunoapondash. Aden buna mëmunsho isanec nidequi Esus yacno nidash Esusbéd icquidon buna mëmunenquo icsho isash utsibo: —¿Atotsieshun Uambéd icquidon adembidi padiseyobobéd icquidon buna mëmunubi mibéd icquidon buna mëmunenquo icpeç? Tantiyanu. Chui —quepondash.

¹⁹⁻²⁰ Adoaquien Esus: —Aton chido bednun pambid meniac chidon codocacsho abi inquidën abéd icquido menec. Aden meniac isuidesa abéd icquido nec. Adecbidi ëbi abi chuiquid icnuc ëbéd icquidon buna mëmunenquiocquin isuidenquo iquec. Yuecash chido inquid nibédanan abéd icboedo unësquiocquin buna mëmunquin isuidpeç. Adecbidi ëbi nibédanan ëbéd icboedo unësquio yampeç.

²¹ “Adembidi dashcute shë nibédta chucambocquid bëtuscaisa matses nec. Shë nibédta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec. ²² Adembidi dadpen icquid chodo uashun sandoc. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquiocquin. Adecbidi Nuquin Papan tantiacpadec pausudnu qeshun mibi icsaid ënacsho isun Nuquin Papan pausunendac —quepondash Esus.

*Chonoadtemaid ushë icbo nebi quiaid
(Mat 12.1-8; Duc 6.1-5)*

²³ Adnubien chonoadtemaid ushë utsi icnuc ënapen capuenquiocquin tied matanquin adosbiecquid trico caid ëshë bedshun Esusbéd icquidon pepondash. ²⁴ Adshobien: —Mibéd icquido is. Chonoadtemaid ushën chonoadeque. Abi chuiquid mibi iquec ¿atotsi quiash, Padi. Chën, quenquo ique? —quepondash padiseyobo Esus caic.

²⁵ Adoaquien Esus: —¿Chuiquid Dabidbéd icquidon natia bunquin ambi petemaid pepondash quequin dada uapampid tantiaimboda icconda? ²⁶ Nad icpampic. Abéd icquidobéd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniac sanaid bedshun ambi petemaid abéd icquidobédambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidtsëqui nec quenquiocquin abéd icquido tantiaquin pan bedshun aidobédambi pepampic chuiquid dapa Dabidën —quepondash Esus padiseyobo caic.

²⁷ Aden chuishumbic naden padiseyobo Esusën chuiopondash: —Nabanash tiboedte matses bumpeç quequin tantiaquin abitedi uabanquin ënashini con pabédi tiboquepampic. Adashic yuecash, Chonoadtemaid ushë nec, quepadenebi con pabédi. Aden chiequi matses tiboedte ushë aton icbo ictiapimbo iquec. ²⁸ Aid ushë icbo icquin ëbéd icquidon bunquin pebededsho isash, Padi. Chonoadtemaid ushë neque. Aden penda, quenquioccobi —quepondash Esus abi chieshënquido padiseyobo chiec.

3

*Mëuesadaid Esusën bédamiaid
(Mat 12.9-14; Duc 6.6-11)*

¹ Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi ² Esus chieshënquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bédamepeque. Nëid badiadën bédamesho isun bedmeshun quënën nauedmenu quetsëcquiec padiseyobo tabad-cuededpondash. ³ Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

⁴ Adoac nënantanquio nidtoash mëuesadaid nidnubi iccuededquido chiec Esus onque-pondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses bédamepe? ¿Bédamenquiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

⁵ Adoaquien nëishtanquimbi abi chieshënquido bëisbanec Esus, Nuquin Papan chiaid tantianquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bédampondash. ⁶ Adosho isash puduenanec nidquin edodesho padiseyobon badedquio istuidpondash. Aido istuidash: —Esus cuesunete mibi bunacpadquiec bunebi. ¿Mitsi-padentsimbi cuesunemenuen bedmepeba? —quecuededpondash padiseyobo.

Esus yacno matses dadpen choaid

⁷ Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash. ⁸ Adnubien Esusën nabansho isboedon chiac nidaid Udeya caid yacnoquido dadpen cho-chonobi adecbidi Edusaden yacnoquido cho-chonobi adecbidi Idumeya yacnoquido cho-chonobi adecbidi acte Odan caid uquë cuëma utsiuquido cho-chonobi adecbidi shubu dadpen icquid Tido caid yacnoquido cho-chonobi adecbidi shubu dadpen icquid Sidon caid yacnoquido cho-chopondash. Esus yacno ambi nabanaid utsibon chuisho tantias cho-chopondash. ⁹ Adec cho-choash tsucus-tsucustsëcquio yec tabadquin tsicatic nënantanquio tsadacnoëshi catashnushe quiash Esus: —Cano bec cho —quiampondash abëd icquidquico caic. ¹⁰ Dadpen bédamiosh cadoshe. Ëbitsen bédanu quequin ambibi tantiaquin Esus mishbededpondash. ¹¹ Adembidi tantiaquin mishnuec mayan icsa dapuedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash. ¹² Adoaquien: —Padi. Aden ëbi chienda —quepondash Esus.

Abëd 12ted icquid Esusën tantiamenu caid

(Mat 10.1-4; Duc 6.12-16)

¹³ Adashic macuësh dapa yacno nidnushi abëd 12ted icquido chomeshun nadopondash: ¹⁴ Ëmbi tantiacpadomboen mibitedi tantiamembi. Adquid icquin ëbëd tabadquin ëmbi chiacpadomboen mimbi tantiamenendac. Aden tantiamenacsho isun ëmbi chiacpadomboen chuimenuen mibitsen nidmembi. ¹⁵ Adembidi mayan icsa dapuedaid dapuduemequidbidi mibi icmembi quequin abëd icquido Esusën chuipondash. ¹⁶ Ambi tantiamenu caid nëidtedi icpondash: Simon cashumbic Esusën Petedo capondash, ¹⁷ utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncaïn Buanedquis quequin Esusën cuëmpondash. ¹⁸ Utsibic Andedes, utsibic Uedipe, utsibic Badtodome, utsibic Mateyo cuëshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. ¹⁹ Utsibic Udas Iscadote, aidi abi chieshënquido Esus bedmenush Esusbëd capuquid nepondash. Aidedi Esusën tantiamequin chuiquin ismiaido niondash.

Bedtsibu caidën dausunaid Esus nec quiaid

(Mat 12.22-32; Duc 11.14-23; 12.10)

²⁰ Aidedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuiabanubi Esusbëd icquidon penquio icpondash. ²¹ Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²² Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuedaid dapuduemec —quepondash.

²³ Adoaquien Esus: —Mimbi icsamboen tantieque. Mibi chuibanu. Tantieq tabadta. ¿Mayan icsan icho ambi dapuduedmiaid dapudemequidta nepadic? Padenquio. ²⁴ Adquiecbidi shubu icho abèd icquido cuèshèdmesa nec. ²⁵ Icbon abèd icquido cuèshèdmiash shubu abentsèquèn tabadtiapimbo iquendac. ²⁶ Adembidi ambi dapuduedmiaid dapuduemiamsh adquidèn icho ictiapimbo Satanas iquec. Icho icnuequid abèd icquid pudemesa nec. ²⁷ Dadpeshun icho Satanas nec. Adquid icquin ambi matses dapuduedmiaid dèniacanquidènuidquio nadatiambocquin nabanquin cuemepec. Adquid icquin èmbi nac mayan icsa dapuduedaid Satanasèn yua icboedi icbombo tantiec bèdambo yanec èbèd iquendac. ²⁸ Abimbo chiembique. Tantiata. Matses cuidenquiocquin abi icsaid bèpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho tantiashun Nuquin Papan aid pauquendac. ²⁹ Utsien Nuquin Papan Mayan abipadquidèn tantiamiac nasho isun Satanasèn naid nec qesho pauquenquio iquendac. Adquid ènèdenquio yec icsaquid nendac —quepondash Esus ³⁰ Satanasèn tantiamiac mayan icsa dapudemequid Esus nec abi caquido chieq.

Esus yacno aton utsibo anibèd choaid
(Mat 12.46-50; Duc 8.19-21)

³¹ Adashic Esus yacno aton utsibo anibèd chopondash. Aido choshon matses dadpen nuntan tabadsho istuidash: —Èbi choaid con mado chuita —quepondash utsi chieq. ³² Adoac puduedshun Esus nènantan tsadsho isun: —Titabèd min utsibo choshon umanucshun mibi isnuen cainec —quequin chuituidpondash. ³³ Adoaquien Esus: —Adquid utsi chuinu. Tantiata. ³⁴ Nè tabadquido èbèd icquido neque. Is —quepondash Esus abèd iccuededquido chieq. ³⁵ Adashic: —Nuquin Papan chiacpadomboen nabanquid èbèd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

4

Tantiamequin pete èshè nèsecain chiaid
(Mat 13.1-9, 18-23; Duc 8.4-15)

¹ Adashic padpidec chian cuèmano nidshun Esusèn tantiamequin chuibanoapondash. Aden chuibanuc cho-choquid dadpen icsho isash cano antabèdtopondash cho-choquid acte cuèmano tabadnubi. ² Adec tabadshobi, matses nadquio iquec quequin tantiaquin tiedèn caniquid èshè Esusèn tantiamequin naden chuibampondash: ³ —Tied icho pete èshè nèsecanuec aton tied yacno nidquid. ⁴ Adec nèsecanuec nidshun pete èshè nèsecac maisec pudun-pudunaid uicchunèn chequid. ⁵ Adnubien nidaid cuènote dadpen samèdacno utsi-utsiec paèdash badedquio dèyucuidtsash ⁶ tapunenquio iquec ushèn shoedec. ⁷ Adnubien pete èshè utsi-utsiec nisanquid dèyucacno paèdash dèyucash canidouditsacsho nisanquidèn bètinao podò sinash bacuètiapimbo iquec. ⁸ Adnubien nidaid bèdambo yacno paèdaid dèyucaid caniaash dadpen pete èshè icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

⁹ Aden chiash: —Èmbi chuiboed tantianu quiaash bèdamboen tantiec papuduedta —quepondash Esus.

¹⁰ Aden chuibanash udictsèc Esusbèdi nidshun utsibo choenquiocsho isun databèdtuidquin abèd icquidon: —Mimbi chuibamboed tantianu. Èbi chui —capondash Esus chuiquin.

¹¹ Adoaquien: —Nuquin Papan shubun tabadquid tantiamendambi utsiboembi, Mibi nadquido iquec, quenquiocquin chuibanoc. ¹² Aden chiac: “Nuquin Papan nabamboed isto-istoboedi ma padenquio tabadteneyoc. Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid èntsiandac. Aden abi icsaid ènsho isun cuidenquio yec Nuquin Papa abi icsaid bèpiscudtsiandac” —quepondash Esus abèd icquido caic.

¹³ Aden chiashic: —¿Mimbítsen èmbi chuiboed tantienquioda ique? Aidi tantienquiocquin ¿mitsipadentsi adomboembidi chuibanasho mimbi tantiapè? Èmbi chuiboed nad iqueque. Tantiata. Chuinu. ¹⁴ Pete èshè sequidbimboecquid Nuquin Papan chiaid chuibanquidquio nec. Èshè ambi siaidbimboecquid Nuquin Papan chiaid nec. Abi paèdacno nidaidbimboecquid matsèsèn tantiate nec. ¹⁵ Nidaidèn paèdash pete èshè dèyuctiapimbocsho uicchunèn chiaidbimboec matses utsi-utsiec iquec. Adquid Nuquin Papan chiaid tantiash papuduednu qesho Satanasèn bèpiscudmiac tantienquio yanec Nuquin Papa yacno puduedtiapimbo iquec. ¹⁶⁻¹⁷ Nidaid cuènote dadpen samèdacno pete èshè paèdash badedquio dèyucuidtsash tapunenquio yec ushèn shoedaibimboec matses utsi-utsiec iquec. Adquid Nuquin Papan

chiaid tantiauidash bédambo iquec queboedi ¿Esus tantiaquid nebi quecta icco? quequin utsibon mamènshunac badedquio tantiesa nebi quendac. ¹⁸⁻¹⁹ Nisanquid dèyucacno pete èshè paèdash dèyucash canidouidsacscho nisanquidèn bétinac podo sinash bacuèesabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nènaid, abi icsaid aidtedi tantiaquin Nuquin Papan chiaid tantiesa yanshun bédamboec tabadaid ismesa yanec. Adquidèn Nuquin Papan chiaid tantiaquid utsi icmetiapimbo iquec. ²⁰ Èshè utsibic nidaid bédambocquidèn paèdash dèyucash caniasch dadpen bacuè icquidbimboec matses utsi-utsiec iquendac. Adquid Nuquin Papan chiaid tantiadonec bédamboec tabadquin utsi ismequid nec. Aden ismiac Nuquin Papan chiaid tantiaquid daèdpactsèc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshè yanendac —quepondash Esus abèd icquido tantiamenuec.

Tabote nēnantan nanac chēnquiacbimboec ictiad quiaid
(Duc 8.16-18)

²¹ Aden chuishumbic abèd icquido naden Esusèn chuipondash: —¿Tabote icbon ambi dayun uaboed taboshon tsadte tédion nanshun isaidta nedic? Adembidi ¿Tabote matsun bétashun isaidta neoadic? Padenquio. Nēnantan tabote nanac chēnquiacbimboec ismenu quec ictiad. ²² Adquibidi abi yacno yuedanquid ambi dayun uapampidi nēbi Nuquin Papan dayun uainquicoquin èbi chomeshun ismec. Adembidi con mado chuiban quenquiochoedēmbi nēbi èbi ismec ma con mado chuibanu quequid con Pa nec. ²³ Ambi chiaid tantianu qeshun tantiaquiec papudedta —quepondash Esus.

²⁴ Aden chiash Esus: —Chiaid bēda tantiatequidquio iquec qeshun tantiaquiec papudedquid icta. Aden chiaiduidi tantiec papudedquid abipadquid bédambocquid ambia tantiaquidèn Nuquin Papan mibi icmendac. ²⁵ Adquid ambi tantiadoniadquio iquendac. Aden tantienquioctscquidèn tantiaid bēda uesadendac nibèdquiec —quepondash.

Ambi siaboed icbon isenquiocnoc bacuèec quiaid

²⁶ Adec onquequin abèd icquidquio chuishumbic cho-choquidtsen naden Esusèn chuipondash: —Nuquin Papan shubu abentsèquèn tabadec caidaidquio chuibanu. Tantiata. Nidaid bēdan tiedèn caniquid pete èshè siash ²⁷ tabadquin cainquidquio icbo nec. Dadpen ushquin ambi seboed isenquio yec icbo tabadnubi ²⁸ ambi seboed dèyucash caniec taitanec bacuèec. ²⁹ Ambi siaid isenquiocnoc canitanec bacuèacscho badedquio bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidèn isenquiocnobi. Papudedquioshon tantiabeneç. Adquid isash con shubun puduedquido neque. Bednu quependac Nuquin Papa —quepondash Esus.

Mostasa caid èshè chiaid
(Mat 13.31-35; Duc 13.18-19)

³⁰⁻³² Adec onquequin chuibanashic Esus: —Nadquio Nuquin Papan shubun icquido iqueque. Chuinu. Tantiata. Mostasa caid pistsc èshèmpi ictscquid nèsecaid dèyucash nuamboshè caniec cuidi-cuidipambo iquec shubu-shubupambo yec podoec. Ambo uicchunèn shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

³³ Aden chuibanashumbic adomboembidi Esusèn chuibanpondash. Aden chuibanash, aidtedquio tantiapec abibi qeshumbic aden chiaid chuiquin èmpondash Esusèn. ³⁴ Aden abited chuibanashumbic abèd icquiduidtsèqui bédamboen tantiamequin chuipondash.

Acte tèccoasquiaid ènèd cac ènèdaid
(Mat 8.23-27; Duc 8.22-25)

³⁵ Adashic abi ushèmbi inchèshbudtsèc cano antabèdtoanec Esus: —Chian uquè cuèma utsiac nuquiduidtsèqui nidnu. Nid —quiampondash abèd icquido caic. ³⁶ Aden chiac chian cuèman tabadcuèdedquido niananec badedquio nidquin canon Esus buampondash. Abèd icquidn potenubien cano antabèdtoanquin utsin-utsinquin potepondash. ³⁷ Aden potenubien cunquequid dapan acte tèccoasquequin cano acte uemiaidèn mentoadtsempondash Esus tèotadec ushubi. ³⁸ Adec uec usho: —Cunquequid dapan acte tèccoascaidèn nuqui mentoeque. Isucunta, icbo —quequin Esus timpondash.

³⁹ Aden tinac uètsèdtoshon Esusèn: —Mibi comapeneç cunqueque. Ènèd —cac badedquio ènèdpondash. Adembidi: —Mibi comapeneç tèccoasqueque. Ènèd —cac badedquio ènèdoapondash acte.

⁴⁰ Aden ènèdmetanec Esus: —¿Atotsi quiasch èbi tantienquio yec dacuèdcuedede? Èbi tantiesa mibi nepec —quepondash abèd icquido caic. ⁴¹ Adec Esus cuèmbi badedquio cunquequid dapa ènèdposh. Adecbidi acte tèccoasquequid ènèdoaposh. ¿Mitsipadquidèn

napeba? Ënëd cacpadequi ënëdposh —quec abibi onquecuededequi uëdëquianquiopondash abëd icquido.

5

Mayan icsa dadpen dapuduedaid bëdamiad
(Mat 8.28-34; Duc 8.26-39)

¹ Adshumbic acte tēcocoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash. ² Ambobi choash pudundosh mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. ³ Aidi unësaid chococate cuënote dapa shëcuë uaidën tabadquid icpac caondash. Aidi shocosh bucn mëdantebëdta taë taniaid icboedi nadatiambo yanshobi mëtanetiapimbo yampac caondash. ⁴ Abi mëtaniaid shocosh bucu seccuduatanquin tës-tëstenepac caondash. Adosh isac abi tanebocpadquid utsi nibëdpac caondash. ⁵ Aidi inchëshën capucuenequi mëyanacimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon chosho isanec titinquianec choash: —¿Tsusio, ada cho? —quiashic: ⁷ —¿Mibëd icquidtabi nedi? Mimi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquëmbi. Abimbo chiëmbi quequin ëbi chuita —quepondash mayan icsa dapuduedaid Esus chieci. ⁸ Adec mayan icsa dapuduedaid abi onqueshobien Esusën: —Dapuduen —cashic: ⁹ —¿Tutsi cuëmëdquid mibi ne? —quepondash Esus.

Adoaguen: —Dadpenquioshë. Cuëte podotedi dapuedondaid nebi —quepondash mayan icsa dapuduedaid abentsëc yacimboec onquec.

¹⁰ Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin çnëid nidaidën adabi tabadmetsia? —quepondash mayan icsatedi.

¹¹ Adnubien macuësh potseshun chancho dadpenshun pec tabadpondash. ¹² Aden pec tabadsho isashien: —¿Ada mimi ëbitedi chancho dapuedmetsia? —quepondash mayan icsa Esus caic.

¹³ Adoaguen: —Dada dapuduencedash chancho dapueduedcuededa —Esusën cac dapuduencedash acte dapa quiusudacnombo comapenec niquec pudun-pudunec mentoadbudnepondash chancho nibëdquieci.

¹⁴ Adsho isash chancho pemequin isquido chieci nidanepondash. Adec nidquimbi shubu dadpen icquid uano-uanoec tabadquido chuituidac aidotsen isec cho-chopondash. ¹⁵ Esus yacno cho-choshon mayan icsa dapuduedaid bëdamiash quequin chuituidac mayan icsa dapuduedaid icboedi naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquicochoedi tantieci tsadsho adembidi isbededoapondash. Adec tsadsho comapenen isbededequi nadatiambocquin naid nepeci quetsëcquieci tabadcuededpondash. ¹⁶ Adec tabadsho isun mayan icsa dapuduedaid bëdamequin chancho dapuedmesho isboedon cho-choquido tantiamenuen chuibampondash. ¹⁷ Aden chuisho tantiaishun cho-choboedon: —Nëmbo tabadenquio yec nidec nid. Mibëd tabadtiapimbo iquebique —capondash comapenen Esus chushcaquin.

¹⁸ Adsho tantiaish cano yacno nidequi cano Esus antabëdtonobien mayan icsa dadpen dapuduemoed choash: —Mibëd icte bunebi. ¿Adabi buane? —quepondash. ¹⁹ Adoaguen: —Padi. Min shubuno nidtan. Ambo nidshun mibi bëdamequin mayan icsa dadpen dapuduemoed Nuquin Papa tantiaquin chuiban. Nuquin Papan ëbi ad icsa unësqioocquin dapuduemic quequin chuiban —quepondash Esus. ²⁰ Aden Esusën chiaquin nidpondash. Nidequi shubu dadpen icquid yacno-yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi. Adopenshenda Esusën bëdamiash, quec abibi onquec tabadcuededpondash.

Nua intac budaid bëdameshun champi unësaid bëdamiad
(Mat 9.18-26; Duc 8.40-56)

²¹ Adshumbic canon Esusbëd icquidon padpiden abi chobocmibidi chian poteoapondash. Adec chosho isash matses dadpen chian cuëmano padpidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. ²² Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bëdambocquid nec quequin ismenuec Esus tauebudshun: ²³ —Con champi unëseque. Aid mishquin bëdamec cho —cac ²⁴ Aidobëdi Esus nidpondash.

Adec nidshobi matses dadpenshun tsibanampondash. Tsucus-tsucustsëcquio yec nidquin Esus tsibanampondash. ²⁵ Esus tsibanquidquio chido utsi icpondash. Aid chido

seta 12ted matamec intac budash bēdanenquiocquid icpac caondash. ²⁶ Dauē meniaqui bēdanenquio icpac caondash. Dauēchoquid utsi-utsien piucquid menequin dauē bedshun chequi bēdanenquio yec intac nuambo yampac caondash aton piucquid naimēdnubi. ²⁷ Adec intac icnubi capuquin Esusēn nabanaid chuisho tantianec nidquimbi matses dadpeshun tsibananubi aidēntsen tsibanampondash. Aden matses dadpeshun tsibananubi ismenquiocquin cachoc choshon Esusēn dashcute mishpac caondash. ²⁸ Aden aton dashcutuidtsēqui mishec bēdampatsiash icmane queshun mishtsequi bēdampac caondash. ²⁹ Intac bēdanenquiocquid Esus mishec bēdampac caondash. Ēmbi tantiacpadquiequi bēdanobi quequin ambibi tantiapondash.

³⁰ Adec chido bēdanubien ėmbi nadatiambocquin naoc quequin tantiec amibidi bidadquin isec Esus: —¿Tsuntsimbini mishposh? —quepondash.

³¹ Aden chuisho tantiashun abēd icquidēnquio: —Tsucus-tsucustsēcquio matses dadpen iquec, ¿tsuntsimbini mishosh, quecta ique? —capondash.

³² Adec abēd icquid cuēdnubi onquenquiocquin, ¿Midaquidēnquio mishoshibique? Isnu, abibi quequin matses utsi-utsien bēispondash Esusēn. ³³ Aden bēisbanubi, ėmbi mishoc quenquio yec bēdamboed uēdēquec choequi mibi nadatiambocquin naquid nec quequin tantiequi Esusēn taēno uebudshun abi mishec bēdanaid chuibampondash. ³⁴ Adoquien Esusēn: —Champi, mimi tantiacpadquiequi mibi bēdanoc. Dada icsambo icboedí nēbi dada bēdambo mibi iqueque. Bēdambo yec nid —capondash chido chuiquin.

³⁵ Aden nidmenubien Aidon shubun icquid cho-choshon: —Min champi unēsoshe. Tsusio chomenda —capondash Aido chuiquin.

³⁶ Adnubien Aido Nuquin Papan chiaid chuibante shubun tabadquido isquid caic: —Dacuēdenquiocquin ėbi tantiata —quepondash Esus.

³⁷ Aden Aido chuishun Esusēn: —Cho-choenda —capondash abi tsibanuequido chuiquin. Aden chianec Petedobēda Acobo Uan, Acobon utsimbo aidtedi buanec Esus nidpondash. ³⁸ Adec nidequi Aidon shubuno choquin comapenec shubicuededsho tantiatuidpondash. ³⁹ Aden tantiequi puduedash Esus: —¿Atotsi quec comapenec shubicuedede? Champi unēsenquio yec ushachimboec uec nec —quepondash.

⁴⁰ Adshobien tantiesa icquin mamēnshumbedepondash. Adoquien aidtedi puduemish champin tita aton papa chedo abēd icquidbēd champi yacno Esus puduedpondash. ⁴¹ Ambo choshon mēdante mēdintanquin Esusēn: —Talita, cumi —capondash. Aton onqueten, Champi, isucunash nidto, quequin adopondash. ⁴² Adoac badedquio isucunash nidtoash capupondash. Champi seta 12ted icquid niondash. Aidi bēdansho isun abitedishun, Adopeshenda iquec quequin isbedepondash. ⁴³ Aden champi bēdameshun Esusēn: —Ēmbi naboed utsi chienda. Abimbo caimbi. Abentsēcquiobi chienda —capondash. Aden chuitanequi: —Champi peme —quepondash Esus.

6

*Abi icnēdacnoshon Esus chieshēnquido
(Mat 13.53-58)*

¹ Auēshquio puduanec nidequi abi icnēdacno Nasaded caid yacno Esus choapondash. Abēdi abēd icquido chopondash. ² Ambo tabadashic chonoadtemaid ushēn Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusēn. Aden chuibansho tantienquiocquid abentsēc: —¿Mitsishun chuibansho tantiashun adomboen Esusēn chuibampec? —quepondash.

Adnubien utsi: —¿Mitsicquidēn ismiac Esusēn nadatiambocquin nabampec? —queoapondash.

³ Adnubien utsi: —Nēmbocquid, cuēte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nēidtedi nēmbō tabadquid nec. Nēidic Acobo, utsibic Ose, utsibic Udas, utsibic Simon. Nēmbobidi aton chibi chedo tabadoaic —quetsēcquieq tabadec onquecuededec chieshcuedepondash.

⁴ Aden chieshēnaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshēnquid aton matses iquendac. Aton shubun icquido adechidi iquendac —quepondash Nasaded yacnocquido chiec. ⁵ Aido abi chieshēnquid icsho isun nadatiambocquin nabantiapimbo icpondash. Ēbi bēdamepec quequin tantiaquidquido daēdpactsēc icsho mishquin bēdamepondash. ⁶ ¿Atotsi quish ėmbi chiaid tantiatipimbo icpec? Adembidi nadatiambocquin nasho istiapimbo icpec quepondash Esus abibi onquec.

*Abēd icquido Esusēn nidmiaid
(Mat 10.5-42; Duc 9.1-6)*

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash. ⁷ Adec cuenadquin chuibanequi abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshun-daëdshunquien chuibanec nid. Chuibanquimbi mayan icsa dapuduedaid dapuduemeta. ⁸ Nidquin dadpen mitsana sauedshun buanenda. ⁹ Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuidec nidaneta. ¹⁰ Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta. ¹¹ Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

¹² Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon. ¹³ Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichquid ënë dachinquin bédameoapondash Esusën nidmiaidon.

*Uan acten mentoanquid mapi butiaid
(Mat 14.1-12; Duc 9.7-9)*

¹⁴ Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpeshun Esusën nabanaid tantiapondash. Aden tantiash: —Uan acten mentoanonda mapi butemeboed uincuempash icnui. Adec uincueshun nadatiambocquin nabanec nepanui —quecuededpondash tantiaquido.

¹⁵ Adnubien utsibo: —Ediasien nechitec. Nuquin Papan chiampicpadquiech choashien nec —quecuededpondash.

Adnubien utsibo: —Nuquin Papan chiaid chuiampidien Esus yanchitash —quecuededpondash.

¹⁶ Adnubien Edodes: —Ëmbi mapi butemiondaid, Uan pado, uincuempash icnui —quepac caondash.

¹⁷ Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: ¹⁸ —Mìn utsin chido mimbi bedaid natemaid niosh —qeshun Nuquin Papan Moises dada uamepampicpaden Uanën Edodes chui pac caondash. Adoac, Uanën chuisho dadpeshun tantianushe qeshun Uan bedmeshun quënën nauedmepac caondash Edodesën. ¹⁹ Adoacien Uan Edodiasën chieshëquin: —Uan cuesunemetiadquidi mibi nec —quepac caondash aton bënë Edodes caic. ²⁰ Uan bédambocquid Nuquin Papan chomiaidbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuibamenuen chomednepac caondash. Uanën chuibansho tantiash: ¿Atotsimbi nëid napeba? Ambi chuibanaid bédambo iquec. Aidën chuisho tantiash bédambo iquebi, abibi qeshumbic Edodesën chomedednepac caondash chuisho tantianuen.

²¹ Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dadabobidi chomeoapac caondash. ²² Aden aidtedi chomiaish tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bédamboen mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Èbi chui. ²³ Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

²⁴ Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Èbi chui,” Edodesën caoshi. ¿Atotsimbi chuipe, tita? —quepac caondash ani chiech.

Adsho tantiashun anin: —Uanën mapi bunebi quequin chuita —capac caondash aton champi chuiquin.

²⁵ Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

²⁶ Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiado quenushe qeshun adoembi abibi qeshun: ²⁷ —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin ²⁸ maspanën nandoshon bëshun champi meniac bedshun champin aton tita menetuidpac caondash. ²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

Dada 5000ted Esusën pemiaid

(Mat 14.13-21; Duc 9.10-17; Uan 6.1-14)

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. ³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquo iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

³² Aden chiashic cano antabëdtoanec matses nibëdacno nidpondash aidtedtsëqui. ³³ Adec nidsho isash matses dadpen abi nidte yacno tantiec: —U nidanec —quiashe titinguec choec abia cho-chopondash. Abia titinguequid cuensho isash utsi-utsiec dadpen titinguec cho-choapondash. ³⁴ Adec aidtedi abia cho-choambien Esusbëd icquido choapondash. Pudundoquimbi matses dadpenishun abi cainec tabadsho isashien Esus, Abi tantiamequin Nuquin Papan chiaid chuiquid nibëdadbimboecnuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: —Icbo, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. ³⁶ Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷ Adoaquien Esusën: —Mimbibi nëdtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquo yoc —quepondash abëd icquido Esus caic.

³⁸ Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid doted iquec —quepondash.

³⁹ Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. ⁴⁰ Adoac ambi chiacnedtedquieq tabadbudpondash. ⁴¹ Adec tabadbudsho isun panëmpibëda nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismemb —qeshun cuësh-cuëshun: —Meneban —Esusën cac abëd icquidon menebampondash. ⁴² Menebanac piash: —Padi. Piombi —quecuededpondash pequido. ⁴³ Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. ⁴⁴ Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadatedicttsëqui tambampondash 5000ted iquec quequin.

Acte bëntse Esus choaid

(Mat 14.22-27, 34-36; Uan 6.16-21)

⁴⁵ Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmianec —quepondash Esus abëd icquido caic. ⁴⁶ Adoac canon potenubi matsestedi nidmianec matses nibëdacno macuësh yacno Nuquin Papa chuinuec Esus nidpondash. ⁴⁷ Adnubien inchëshbudtsëqui abëd icquido acte nënantanquo canon noadpondash. Ambobi noadnubi Esus abentsëqui mananuc tsadpondash. ⁴⁸ Ashunquo Esusën isaquien abëd icquido bëdiacttsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadiapimboecno acte bëntse choquin abëd icquido Esusën ismetuidpondash. ⁴⁹ Datantsensho isash, Mayambien nechitec, quequin ambibi tantiec sidquecuededec ⁵⁰ dacuëdcuededpondash.

Adsho isumbien: —Ëbibi nebique. Dacuëdenquo yec tabadta —capondash Esusën. ⁵¹ Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepec —quepondash abëd icquido. ⁵² Panëmpi daëdpactsëc icttsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquo icoapondash pamunacnimboecquin.

⁵³ Ashunquio chian potiashic nidaid Quenesaded caid yacno choshon cano nëshpondash. ⁵⁴ Aden nëshash mananuc pudundosho isec anocquido, Aidi bédamianquid nec, quequin ambibi tantiaquimbi ⁵⁵ daicsaid aton ueten nandoshon Esus yacno bë-bëpondash. ⁵⁶ Adecbidi shubu dadpen yacno-yacnomboec Esus puduedcuenesho isun adembidi anocquidon, Bédamequid nec, qeshun daicsaido bë-bëpondash. Adoac —Min dashcute ëbi mishme —capondash bë-bëaidon. Aden ambi tantiacpaden Esusën dashcute mishash bédancuededpondash.

7

Nuquin Papan paucaid (Mat 15.1-20)

¹ Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, ² Ęmbi mishboed mishtemaid ictsiash, qesa iquec tsusedpabon chuinëdacpadquiec mëpanudabi Esusbéd icquidon pesho ispondash. ³ Padiseyobo isadaidbobidi yec tsusedpabon chuinëdacpadquiec penush mëpanudanequid nec. ⁴ Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquibidi nec. Adembidi matsu nacenaid cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinëdacpadomboen naquidquido nec.

⁵ Aden nabanquidquido padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbéd icquido mëpanudenquioscho isash padiseyobo: —Atotsieshun mibéd icquidon tsusedpabon chuinëdacpadomboen nainquiocquin mëpanudabi pepec —quepondash Esus caic.

⁶ Adoquien Esus: —Isayasën ëndenquido dada uaquin mibitedi bédamboen chiampidpadquid mibi nec. Ambi dada uampid nad iqueque. Tantia:

“Nuquin Papa bédambocquid nec quequin chiacpadomboen tantiesa isadaidbo nec.

⁷ Abia Yampidënquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquido nec.”

⁸ Aden tsusedpabon chuinëdacpadomboen nabanquin Abia Yampidënquio chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepamid tantiamenuec.

⁹ Aden chuishumbic adomboembidi chuioaic: —Badedquido Nuquin Papan chiaid chieshënquin tsusedpabon nadomboen nata quequin chuinëdacpadomboen nabanquidquido mibi nec. ¿Aden naquinda Nuquin Papan chiacpadomboen mimbi nape? ¹⁰ Nuquin Papan chiacpadomboen Moisesën dada uampid nad iquec: “Titan papabëdan chiaid chieshenquiocquin naban.” Adquidën chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec. ¹¹ Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuioaic. Aden chuiquin papabëda tita tantiaquin nashunenquiocquin Nuquin Papan chiaid niacquid mibi nec. ¹² Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic. ¹³ Aden chuiquimbi titabëda papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

¹⁴ Aden Nuquin Papan chiacpadomboen niacquido chiashic: —Utsibo, tantiec cho. Mibi bédamboen chuinu. Bédamboec papuduedta. ¹⁵ Tsusedpabon chuinëdacpadquiec mëpanudabi mimbi piad min tantiate icsabudtemaid nendac. Icsamboen tantiec mibi icsaic. ¹⁶ Ęmbi chiaid tantiaquin utsi chuibanta —quepondash Esus.

¹⁷ Aden chiash iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantieme —quepondash abéd icquido. ¹⁸ Adoquien: —Utsitedishun tantienquido icbocpadquido mibitedi neque. Tantia. Mimbi piadën mimbi tantiaid icsabudtiapimbo iquec. ¹⁹ ¿Min tantiate yacnoda mimbi piad

nidpec? Padenquo. Mimbi piaid min pucu yacno bud-budec auëshquio chimu nëncuenash puduenec —quepondash abèd icquido caic.

²⁰ Aden chiec onquiashic: —Mimbi tantiacpadquiequi mibi icsabudec. ²¹ Chido mimbi inacmaid isash chudtiadquio iquec quequin mimbi tantiacpadomboen chido isuidtiapim-bocquin mimbi chudted-chudtedec. Utsin na bedtiadquio iquebi quequin mimbi tantiacpadomboen mimbi ampec. Cuesunetiadquio iquebi quequin mimbi tantiacpadomboen mimbi cuesunepec. Utsin chido chudtiadquio iquec quequin mimbi tantiacpadomboen aidi mimbi chudpec. Dada utsin èbi bédaidquiocsho ispec quequin mimbi tantiacpadomboen min bènèpenquo chudmequid mibi nec. ²² Utsin bedactedì bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquio mibi yampec. Mibibi icsambocquid nec quiash chieshèmèquid mibi nendac. Adquid abimbo chiacimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bédambo icsho isash chieshènquid mibi icpec. Utsi icsamboen chuiquid mibi nendac. Utsin chuisho, Èbentsèqui tantiaquidquio nebi, quequin mamènshunquid mibi nendac. Adembidi nasho mamènshunoquidbidi mibi nendac. Èmbia tantiaquid nebi, quequin mibibi nabanaid icsa isash bédambo iquec quec mibi mamènec tsadec. ²³ Èmbi chuiboedtedi icsaquidèn naid nec. Aden tantiaquid icsabudte nec —quepondash Esus.

Sidopenisia caid yacnoësh chido ambi tantiacpadquieq bédanaid

(Mat 15.21-28)

²⁴ Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsèqui yacno choash shubun puduedash: —Nèmbo èbi choaid chienda —quepondash Esus. Ambi chiapadpenquiocnoc chuisho tantiapondash anocquidon. ²⁵ Adoac: —Esus chosh —quesho tantiasien mayan icsa dapuduedaidèn tita Esus tabadacno nidpondash. Adec nidec puduedequi Esus taebudpondash chuiquid dapa nec quequin tantiec. ²⁶ Isadaidpembon chido nidaid Sidopenisia caid yacnocquid niondash. Aidi Esus taebudash: —Con champi mayan icsa dapuduedaid dapudume, tsusio, —quepondash comapen chiec.

²⁷ Adoquien Esus: —Mabi con matses isadaidboba bédamenuc choboc. ¿Bacuèbo cubd-abicnubi opashèmpida pete menequin anin bènepadic? Padenquo. Adembidi, ¿isadaidbotedi bédamiabidambi matses utsibo, isadaidpembo, bédamepadi? —quepondash Esus.

²⁸ Adsho tantiasien chido: —Icbo, mimbi bédamboen chiec. Padnuen anin meniac bacuèbon pete sananaid cuèshèmpi paèdtsacsho opashèmpin ambibi bedshun pec. Adembidi mimbi nadatiambocquin nabanac isadaidbo dadpen bédanubi isadaidpembo abentsèc tantiaquid yec bédanoapec —quepondash chido.

²⁹ Aden chidon chuishobien: —Bédamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid —capondash Esusèn isadaidpembon chido chuiquin.

³⁰ Adsho tantianec choec shubun puduedquin isaquien aton champi uebocno ènden mayan icsa niquian bédanash abi ushaidèmbi uec.

Pashu buèd onquenquiocquid Esusèn bédamaid

³¹ Adashien Tido caid anoentsècuèsh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash. ³² Ambo choash tsadnubien dada icsa, pashu buèd onquenquiocquid, Esus yacno bèash tsadquin: —Nèid mishquin bédame —capondash.

³³ Adsho tantiasien iccuedquido ismenquiocnuen uidictèc dada icsa buanshun aton mèdeante bushbi pashun pabiate pausuntanquin chicpondash Esusèn. Adshun, min anatsen mishnu quetanquin ismequin uicchun mèpidadtanquin pashun ana mishpondash.

³⁴ Aden amishec abuc isec: —Epata —quepondash. Paucud, quec adpondash Esus. ³⁵ Adec Esus cuèdnubi pashu buèd onquenquiocboedi tantiadcuenash onquiampondash.

³⁶ Aden pashuaid bédamiash: —Esusèn naid nec quequin chienda —quepondash Esus. Adoboqui niachidanquin chuibampondash. ³⁷ Aden chuisho tantias: —Adquidshenda Esus nepec. Ambi naidtedi bédambo iquec. Pashu paucquid nec. Adembidi ana onquesa oncamequid nec —quec onquecuededpondash.

8

4000ted matses Esusèn pemaiid

(Mat 15.32-39)

¹ Adashic Esus yacno matses dadpen padpidec cho-choash yuec tabadec bundocuededpondash. Adsho isun abèd icquido chomiash Esus nadpondash: ²—Matses bunec tabadsho

isash unësquoio iquebi. Daëdec ushec ëbëd tabadquin aton pete uesquin piac. ³ Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen chochoash nec —quepondash Esus abëd icquido chiec.

⁴ Adoaquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

⁵ Adsho tantiashien: —¿Tedtsi panëmpi mitsana iquec? —quepondash Esus.

Adoaquien: —Siete iquec —quepondash abëd icquido.

⁶ Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. ⁷ Ademibidi nuëccquid dëmishaid daëdpactsëcbidi bedshun: —Mimbi meniaid nec quequin tantiembi, Papa —queshun: —Nëidtsen meneban —Esusën cac menebanoapondash. ⁸ Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. ⁹ Peboedo dada caniaid dadpen 4000ted icpondash. Chidon aton bacuëbobëdtambi pepondash. ¹⁰ Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid

(Mat 16.1-4; Duc 12.54-56)

¹¹ Aden potiash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹² Adsho tantiash, Ëbi tantiesa nec, quec unësquoio yec tsadequi —Ëmbi naid dadpen mimbi ispaboc. ¿Adosho isboshida, Ëbi isme, queoape? Nadatiambocquin nabanquin ëbi isme caqui ismenquoio iquembi. Abimbo caimbi —quepondash Esus. ¹³ Aden chianec nidec cano antabëdtoanquin uguë cuëma utsiuc poteopondash.

Nuquin Papan chiaidbëda ambi chiaid daëd uaqin chuiquid padiseyobo

(Mat 16.5-12)

¹⁴ Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc. ¹⁵ Aden potequimbi Esusën nadopondash: —Pan uanuequidën trico caid putubëda bidiscamete acte pistsëc cacushaqui nua yec bidisquec. Ademibidi padiseyobon Nuquin Papan chiaidbëdtabi ambibi tantiaquin chiaid daëd uaqin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidi Edodesbopadquid icmane qeshun ambi tantiacpadomboen nabanenda —capondash Esusën abëd icquido chuiquin.

¹⁶ Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta icbon chuipec? —quec onquecuededpondash.

¹⁷ Aden chiec onquecuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquoio yec bëshu tsadac bimboecta tsadpo? ¹⁸ Adecbidi ¿Ëmbi chuibanaid tantienquoio yec pashuac bimboecta tsadoapo? ¹⁹ ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseted iccosh —quepondash abëd icquido.

²⁰ Adoaquien: —Ademibidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

²¹ Adoaquien Esus: —¿Nadatiambocquid Esus nec quequin ëbi tantienquioda mimbi icpe? —quepondash abëd icquido caic.

Betsaida caid yacnoshon bëshu bëdamiaid

²² Adshumbic Betsaida caid yacno poteopondash Esusbëdtambidi. Aden potiash chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamianquidquio icquin mishquin bëdame —capondash Esus chuiquin. ²³ Adsho Esusën bëshu mëdinanquin Betsaida caid anoentsëqui buanshun uicchun bëcuishuatanquin bëmishhec: —¿Ada mimbi iseqe? Ëbi chui —capondash Esusën.

²⁴ Adsho tantiash Esus isquin: —Bëdamboen isenquiocquin cuëte podo inchëshquio yac bimboecnuc mibi isembi —capondash bëshuaidën. ²⁵ Aden chuishobi Esusën bëshuaid padpiden bëmishoaquien bëucudquiopondash bëdamboen isec. ²⁶ Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

Quidistu mibimbo neyoc, Petedo quiaid
(*Mat 16.13-20; Duc 9.18-21*)

²⁷ Aden nidmiashic ancanquid Uedipo caid tabadaid nidaid Sesadeya caid yacno nidequ: —¿Atotsi Matsesèn èbi capec? —quepondash Esus abèd icquido chiec.

²⁸ Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid èndenquimbo chiampidpadquidien Esus nechitec, quec —quepondash abèd icquido Esus caic.

²⁹ Adsho tantiashun: —Ma mibitedishun ¿atotsibi cai? —capondash Esusèn.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abèd icquid utsibo onquiacbimboen chuioaic.

³⁰ Adsho: —Mimbi chuiboed utsi chienda. Abentsècquiobi chienda —capondash Esusèn abèd icquido comapenen chuiquin.

Abi unès uate Esusèn chiaid
(*Mat 16.21-28; Duc 9.22-27*)

³¹ Aden chuishun abi unès uate tantiamequin abèd icquido Esusèn chuipondash. Nuquin Papan chomiaid yec matsesacsho isadaidbo tsusiobon chieshènquin èbi mèyanendac. Aden mèyanquin unès uaqui daèdec ushash uincuenoaindabi, quequin Esusèn chuipondash.

³² Abi unès uatequid chuipecshenda niøndash. Aden Esusèn chiaquien aibdètsèqui uano nidshun Petedon: —Aden tantiacquin chienda —capac caøndash.

³³ Aden Petedon chuisho tantiash aucbidi bidadquín abèd icquid utsibo isec Esus nadpondash: —Nidec nid, Satanás. Nuquin Papan tantiacpadpenquiocnoc èbi niacmenuequin icsamboen chuiquid mibi neque. Satanásèn mua uac matsesèn tantiacpaden mimbi tantiec —quepondash Esus Petedo comapenen chushcaic. Petedo Satanásbimboecquid nec quequin Satanás capondash Esusèn Petedo chuiquin.

³⁴ Aden Petedo chuibanashic abèd icnuec cho-choquid utsibo caic: —Cho —quepondash Esus. Chosho isash: —Esuspadquid icnu qeshun mibi bunaid nainquiocquin èmbi chiaid tantiacquín nabanta. Èbi mèyanacpadembidi mibi mèyante icnuc niaquenda. ³⁵ Esus tantiacquín ambi chiacpadomboen nanu queboedi unèsmane quequin naisa Nuquin Papa yacno puduedtiapimbo iquendac. Esus tantiacquid nebi quequin tantiec mèyante icnuc unèsmane quenquiocquin èbi chuibanec tabadquid Nuquin Papa yacno tabadendac. ³⁶ Aden aton na dadpen bedbanashic Esus tantiesha yec unèsash Nuquin Papa yacno puduedtiapimbo iquendac. ¿Adquidta bédambo icpadic? ³⁷ ¿Nuquin Papa mitsana menecta abi yacno puduedpatsia? Padenquic. ³⁸ Utsi icnubi dacuèdec Esus tantiacquid nebi quesa chido aton bènè bunenquio yec dada utsibèd tabadquidbimboecquid nec. Adquid chuiquin, Con utsi nec, caisa nendabi. Adembidi èmbi chiaid chiesha caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan èbi icmiac èmbi abucshun uaido mayan bédabobèdi nidaidèn choaindabi. Adec aidoobèdi choashun èbi chieshènquid isec, Con utsi nec, queoatiapimbo iquendabi —quepondash Esus cho-choquido caic.

9

¹ Aden chiashic Esus: —Nèbimbobi tabadquid èbi tantiacquid utsi-utsiec unèsabicquin nidaidèn tabadquin Nuquin Papan nadatiambocquin nabanaqui Nuquin Papan shubun icquid abi tantiacquid utsi dadpen yansho isendac —quepondash.

Esus bédaidquio icmiaid
(*Mat 17.1-13; Duc 9.28-36*)

² Aden chuibanashic Sted ushash: —Nidnu. Nid —quianec Esusbèd Petedo, Acobo, Uan, aitedi ambi chiactedi macuèsh dapa yacno nidpondash. Ambo nidash tabadquimbi abi bédambo isadaid aidon ispac caøndash. ³ Abi dasiuidaid dashcute icboedi nac-nacquio yampac caøndash. ⁴ Edias, Moises, aid daèd ènden yampidi Esusbèd onquesho ispac caøndash Esusbèd choboedon. ⁵ Aden isequi: —Chuiquid Dapa, nuquibi nèmbo choash tabadquin mibi isec bédambo iquebi. Min shubumpi 3ted icnuc shubu uanuna mitsana, Moisesèn na, Ediasèn na, aited icnuc —quepac caøndash Petedo. ⁶ ¿Atotsimbi chuipe? quetiapimbo yec dacuèdcuededquin aden chuipac caøndash Petedon.

⁷ Adec tabadshobien abu ushu choquidèn ambo tabadquidtedi bêtimpac caøndash. Aden bêtinacnoèshquiobi Esus chiec onquiampac caøndash: —Esus, con madombo con dayunquiocquid nec. Adquid icquin chuibanasho bédamboen tantiata —capac caøndash Nuquin Papan.

⁸ Adsho isbanquin isaquien Esusbèd choboeuidi icoapac caøndash.

⁹ Adanec macuèsh yacnoèsh budtanequi: —Mimbi isboed nèbi chienda. Èbi Nuquin Papan mado matsesacsho unèsmiac èbi uincuenan mimbi isboed chuita —capac caøndash

Esusën. ¹⁰ Adsho tantiash utsi chienquoio yec abi uincuemete ¿mitsipadquio icpec? quec abibi onquecuededpac caondash Esusbëd chobedo.

¹¹ Adec onquecuededash: —Nuquin Papan chomiaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic —quepondash abëd icquido Esus caic.

¹² Adoaquien: —Ai, Ediasën matses bëdamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec matsesash nëbi tabadsho matsesën chieshënquin mëyanendac quequin chuiampid nec. ¹³ Ediasën chiampicpadquie Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Ëndenquimboshë Edias chiec onquequid dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash —quepondash Esus abëd icquido chiec.

*Mayan icsan buëd onquetiapimbo icmiaid Esusën bëdamiaid
(Mat 17.14-21; Duc 9.37-43)*

¹⁴ Adec onquetanec choquin isquien matses dadpeshun abëd icquid utsibo Esusën niamboed tsusedpabon nadomboen nata quequin chiaid tantiamquidon comapenec onquecuededquin bëtimpundash. ¹⁵ Adnubien Esus chosho isash iccuededquido, Bëdamianquid choec. ¿Atotsi aidën napatsiashe? Isnu, quetanec titinque choec: —¿Ada cho? —quepondash.

¹⁶ Adoaquien: —¿Atotsi quec ëbëd icquidbëd comapenec onquecuedede? —quepondash Esus.

¹⁷ Adshobien: —Chuiquid Dapa, mibi ismenuen con mado bëombi. Mayan icsan buëd oncamenquoio yaid nec. ¹⁸ Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquoio iccosh —quepondash mayan icsan buëd onquetiapimbo icmiaidën papa.

¹⁹ Aden chuisho tantiash abëd icquido caic: —Esus nadatiambocquid nec quequin ëbi tantiesha mibi nepec. ¿Tedectsi icshun ëmbi chiacpaden mimbi tantiabempe? Mibi tantiesha icsho ¿mitsipadembimbi tantiampe? —queshumbic: —Madompi bec cho —capondash Esusën.

²⁰ Adsho tantiashun bëpondash. Bëshobi Esus istanquin mayan icsan abi dapudedaid comapenen cuididicamiampundash. Aden nac madompi uebudec ëcbacush-ëcbacushpambo yec cuididiquepondash.

²¹ Adsho isash: —¿Tedtsi seta matamec ad iccondashe? Chui. Tantianu —quepondash Esus madompin papa chiec.

Adoaquien: —Bacuë ictsequi ad iccondash. ²² Cuëte dëtsiadaoid nënedeniosh abi dapudedaidën. Actetsen nënedeniosh unësmenuequin. Mibi bëdamequidquio icquin ëbëdta tantiaquin ëbi con mado bëdameshun —quepondash madompin papa Esus caic.

²³ Adoaquien: —¿Mibi bëdamequidquio icquin ëbi con mado bëdameshun quecta ique? Nuquin Papa nadatiambocquin naquid nec quequin tantiaquidën tantiacpadomboen Nuquin Papan naindac —quepondash Esus.

²⁴ Adsho tantiash: —Tantiembi. Ëmbi abimbo tantienquioscho isun ëbi tantiambe, Icho —quepondash madompin papa Esus caic.

²⁵ Adsho tantiashun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Adembidi tantiametiampimbo icmequidbidi mibi neque. Ambo tabadenquoio yec dapuduen —capondash Esusën.

²⁶ Aden chiaquien sidquec madompi cuididiquenubi dapuduempondash. Adnubien unësabimboec madompi uesho isash: —Unësosh —quepondash isquido. ²⁷ Adnubien madompi mëdintanquin Esusën uëtsëndopondash. Adoa abembi nidtopondash.

²⁸ Adnubien shubun puduedacsho: —¿Atotsieshumbimbi mayan icsa dapuduetiapimbo icpo? —quepondash abëd icquido Esus caic utsibon tantienquiocnobi.

²⁹ Adoaquien Esus: —Dapuduen quequinuidi chuibudaqui adquidquio dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

*Abi unës uate chuioaid
(Mat 17.22-23; Duc 9.43-45)*

³⁰⁻³¹ Aden chianec nidaid Cadidia caid matanec nidpondash. Nidquimbi, Ëbëd icquid 12tedtsëqui chuibanu, quec utsibo ismenquoio yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempondash —quepondash Esus. Abi uincuentequid chiecshenda adec Esus

onquepondash. ³² Aden chuisho bédamboen tantienquoio yequi dacuèdec ëbi bédamboen tantiamequin chui quetiapimbo icpondash abèd icquido.

¿Mitsicquid chuiquid dapa icpece? quequin chiaid
(Mat 18.1-5; Duc 9.46-48)

³³ Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedën choec atotsi chiec onquecuededo? —capondash Esusën abèd icquido chuiquin. ³⁴ Adsho tantias cuèdenquicpondash abèd icquido. ¿Esusbèd icquid mitsicquid chuiquid dapa icpeque? Tantaranu, quec onquequin ambi chiaid chienquoio yec tabadpondash. ³⁵ Adec tabadnubi abi tsadacnoëshi: —Cho —quiampondash Esus abèd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

³⁶ Adec onqueshumbic bacuëmpi abentsëc mëdintanquin abèd icquid tabadacno nënantanquoio tsadumbudpondash. Aden tsadumbudshun bacuë icuquequi: ³⁷ —Esus tantiaquid nebi quequin ismequin bacuë yuedquin nashunquid ëbi yuedquin nashunac bimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoac bimboecquid neoaindac —quepondash Esus abèd icquido chiec.

Nuqui chieshënesa nuqui bédamboen chuibanquid nec quiaid
(Mat 10.42; Duc 9.49-50)

³⁸ Adnubien utsin naid chiec Uan onquedopondash: —Icbo, mimbi chiacpadomboen utsin chuisho tantiapombi. Aidën: “Esus nadatiambocquin naquidquio nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbèd icquidpenquoio mibi neque. Adenda quequin chuiapombi —quepondash Uan.

³⁹ Adoaquien Esus: —Padicnuna. Nadatiambocquin naquidquio Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. ⁴⁰ Nuqui chieshënesa nuqui bédamboen chuibanquid adquid nec. ⁴¹ Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bédamboen naoaindac —quepondash Esus.

Icsa uanquin tantiabenicquid ismequid cuidendac quiaid
(Mat 18.6-9; Duc 17.1-2)

⁴² Abi Esusën onquequin chuibanec: —Adembidi abi icsacpadomboen bédamboen tantiabenicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbèdta têtaneshun acte dapa nënepatecnëdan. ⁴³⁻⁴⁴ Adembidi mimbi icsamboen tantiaquin mishaid ëntiapimbocquin ismedeniad adomboembidi utsin tantiec. Bednu quenquoio yec mëtaniac bimboec tsad ënëdenquoio yec chian anëdënquiacno nidmane quiaish. ⁴⁵⁻⁴⁶ Adecbidi capuquin mibi icsaid mimbi ismebeneque. Capunu quequin tantienquoio yec tateshuniac bimboec tsadta ënëdenquoio yec chian anëdënquiacno nidmane quiaish. Adec mibi tsadnuc adquiecbidi mimbi ismiad tantiec tsadendac. ⁴⁷ Adecbidi ëshën isec mibi icsaid ëntiapimbocquin mimbi ismedoniad adomboembidi utsin tantiec. Èshë chicshuniac bimboec tsad ënëdenquoio yec chian anëdënquiacno nidmane quiaish ma mibi tsadacpadece mimbi ismiad tsadoapanu. ⁴⁸ Icsa uadenequin ënenquoio yash unësash chian anëdënquiacno nidash unësenquiocshobi chodquiaid pequid macun mibi pendac. Ènëdenquoio yec chian anëdënquiacno mibi tabadendac. Icsadenequin ënenquocquid comapenen cuidequid nendac. ⁴⁹ Sa casecac pambid batambo yac bimboec Esuspadquid icnu quiaish mibi icsaid ënëdnuen mëmunc mibi bédambo yampec. ⁵⁰ Sa batambocquid bédambo iquec. Sa batamboceodi batapenquoio yec icsasho ¿mitsipadentsi batambo icmeoapec? Sa batambocquid casecac daëdash batambo yacpadece utsibèd bédamboec tabadta —quepondash Esus.

10

Aton chido bedshun nidmequid
(Mat 19.1-12; Duc 16.18)

¹ Aden abèd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adec chochosho isun Nuquin Papan chiaid chuibanopondash Esusën.

² Adecbidi cho-choquid padiseyobon Esus Nuquin Papan chiaid icsamboen chuinu queshun: —Aton chido bedash bunenquoio yanshun cuemec. ¿Aden naicta bédambo iqueque? Tantaranu. Chui —capondash Esus chuiquin.

³ Adoaquien: —¿Atotsi quequin Moisesën chuiampic? —queoapondash Esus.

⁴ Adoaquien: —Aton chido bedash bunenquoio yanshun, Con chido icsambocquid nec, quequin ambi tantiacpaden aton bënëñ dada uashun nidmiacsho isash, Padi, quenquicompic Moises —quepondash padiseyobo.

⁵ Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquoio Moises icpampic. ⁶ Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. ⁷ Adomboembidi nanuec dada aton tita aton papabëd tabadenquoio yec aton chido bedash abëdi ambi quënë uaidëmbi tabadec. ⁸ Aden aton chido bedash tabadequim mattses abentsëc icboedi daëdec. Mattses daëd icboedi abentsëc yacimboec tabadec. ⁹ Aden dada aton chidobëdta Nuquin Papan daëd uacsho ma cuëshëdmenquoio icpanuna —quepondash Esus.

¹⁰ Aden chiash shubun puduedacsho: —Mimbi chuiboed ëbitedi tantiamë —capondash abëd icquidon.

¹¹ Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. ¹² Adembidi chido aton bënëñ bedac aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

Esus yacno bacuëbo bë-beaid
(Mat 19.13-15; Duc 18.15-17)

¹³ Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon. ¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquoio bacuëbo neque. Adomboembidi badedquio Nuquin Papan chiaid tantientadac. Nuquin Papan shubu abentsëquën tabadquid aido nec. ¹⁵ Abimbo chiembique. Tantia. Nuquin Papan chiaid bacuëbon badedquio tantiacpaden tantiesa Nuquin Papa yacno puduedtiapimbo iquendac —quepondash Esus. ¹⁶ Aden chuitanquin bacuëbo dayumbanquin mattseshc, Nëid bacuë bëdambo icme, Papa, quequin Nuquin Papa chuipondash Esusën.

Na dadpen icquid chiaid
(Mat 19.16-30; Duc 18.18-30)

¹⁷ Aden bacuëbo chianec aëshquoio puduanec nidshobien dada abentsëc titinguec choquin bëquedtanec danëshën sebudash tsadec: —Chuibanquin tantiamianquid, bëdamboquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

¹⁸ Adoaquien Esus: —¿Nuquin Papabëdtabidabi mibi bëdamboquid nec, ëbi cape mimbi? Nuquin Papauidtsëqui bëdamboquidquoio nec ¹⁹ —quequin chiec abi onquec: —¿Nuquin Papan nadomboen nata quequin dada uamiampitdëdi nabanquidta ne? Aidtedi mimbi tantiapec. Nad iqueque. Tantia: “cuesunianenda; adembidi min chidoidi chudquid icta; adembidi, ampënda; adecbidi, utsi chiec muainda; adecbidi, utsin na bedesabimboec muainda; adembidi papabëditan titan chiaid chieshënenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.

²⁰ Adoaquien: —Abimbo chiembique. Tantia, Icho. Aidtedi nabanquidquoio nebi. Bacuëtsëc icquimbi adquid nabanondambi ënenquicquoin —quepondash choboed.

²¹ Adsho tantias, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiad nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquio menëbanquin piucquid bedshun aton na nibëdquid menëban. Aden menëbanash Nuquin Papan chiaid tantiaquidquoio mibi iquendac. Adec Nuquin Papa tantiaquidquoio yec ëbëd iquec cho —quepondash Esus.

²² Adsho tantias choboed mamënenquoio yec unësquoio yec nidpondash con na menëban-tiapimbo iquebi quiash.

²³ Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

²⁴ Aden Esusën chuisho tantias, ¿Abimboda capec? quequin ambibi tantiec abëd icquido otacquoio tabadsho isec Esus: —Abuido, Nuquin Papan shubu abentsëquën mattses badedquio puduedtiapimbo iquec. ²⁵ Adembidi shëcuën puduedte nidaidën capuquid dapan badedquio tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid mattsesën badedquio tantiatiapimbo iquec. Ambi tantiacpadequi puduedte bunec —quepondash Esus.

²⁶ Adsho tantiash abëd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimbo noc ζtsutsi puduedquid icpeba? —quepondash abëd icquido Esus chiec.

²⁷ Adoquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbo noc Nuquin Papambien abi yacno yuedanquid mibi tantiamendac —quepondash Esus.

²⁸ Aden chiaquien Petedo nadpondash: —Chuinu. Tantia, Icho. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

²⁹ Adoquien: —Abimbo chiembique. Tantia. Esusbëd icnu qeshun Nuquin Papan shubu abentsëquën tabadte iquec quequin chuinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbo sho ³⁰ daëd uaquin Nuquin Papan menendac. Nëbi shubu utsin-utsinquec mibi puduedcuene. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnu mibi chieshënuquidbidi iquendac. Yuecash ënëdenquo yec Nuquin Papan shubun mibi tabadendac mibi chieshënuquid nibëdacno. ³¹ Nidaidëshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunsa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid
(Mat 20.17-19; Duc 18.31-34)*

³² Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquidoidtsëqui padpiden chuioanu —quiash Esus nidtuidshun cho-chosho isquin naden abi mëyante chuiquin tauapondash: ³³ —Chuinu. Bëdamboen tantia. Nuquiabi Edusaden yacno nidec. Ambo nidacsho ëbi bedshun ëbi matesaid Nuquin Papan madombo isadaidbo tsusiobo menendac. Aden meniac icsaquidimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqeshun ëbi buanshun isadaidpembo ancaquid ëbi meneoaindac. ³⁴ Aden meniac bedshun aidon ëbi oncain mamënshumbedequimbi dacuishtuashumbi cuestasquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

*Ëbi daëdi nashunta Acobo Uambëd quiaid
(Mat 20.20-28)*

³⁵ Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Ëbi daëdshun chiacpadamboen ëbi daëdi nashunenquioda mimbi icpe? —quepondash.

³⁶ Adoquien: —¿Atotsimbi mibi nashuneque? Ëbi chui. Tiantianu —capondash Esusën.

³⁷ Adoquien: —Abuc nidoash chuiquid dapambo mibi icquin utsi ismequin min dayunquo ëquë tsadumbucuenquin ëbi daëdi tsadunta —capondash Uanën Acobobëdttan Esus chuiquin.

³⁸ Aden aid daëdshun chiaquien: —Tantienquiocquin mimbi chioc. Icsaquid matsestedi nec, quequin Nuquin Papan aidu cudenquiocquin ëbi aton madombo bëdamboquidted cuidendac. ¿Ada ëbipadquid mibi icpatsia? —capondash Esusën.

³⁹ Adoquien: —Ai, adquid tantiembi —quepondash.

Adoquien: —Ai, adomboembidi mimbitsen tantiendac —quepondash Esus. ⁴⁰ Aden chiec abi onquec: —Abuc nidash chuiquidquo iquec con dayunquo ëquë tsadbucuenec tsadec cho, quetiapimbo iquebi. Nuquin Papambien ambi tantiaidquo aden chiendac. Ëmbi padenquo iquec —quepondash Esus Uambëdta Acobo chiec.

⁴¹ Aden Esusën chiaqui abëd icquidquo utsitedi Acobobëdttan Uanën chuiboed tantiash nëishcuededpondash. ⁴² Adec nëishash tabadsho isash: —Cho —quepondash Esus. Aden chomias: —Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec. ⁴³ Aden namesa mibi nec. Chuiquid dapa icnu quiash utsi nashunquid icta. ⁴⁴ Adecbidi tsusio icnu quiash yuabimboe yec utsin namiaid icta. ⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquo yec nashumënquidquo nebi. Adquid yec matses icsaid bedshunash ëbided cuidadec unësendabi —quepondash Esus.

Bëshuaid, Badtimeyo cuëmédquid bédamiaid

(Mat 20.29-34; Duc 18.35-43)

⁴⁶ Aden chiashic Edico caid yacno chonobi abi tsibanquid utsibo dadpen chochopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmédquid podqued cuëman tsadpondash. Piuçquid bednu quequin cainec podqued cuëman tsadpondash. ⁴⁷ Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

⁴⁸ Adec cuëdsho tantiaquin: —Esus cuënenquoio yec otacquoio tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹ Adoac nidtuidshun Esusën: —Cuënquid chome —capondash.

Adoquien: —“Chome,” queque. Nidtoash nid —capondash utsibon.

⁵⁰ Adsho tantiaquin bëshuaid aton dashcute bëntsecquid chicaneç badedquio nidtoanec Esus yacno chopondash. ⁵¹ Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Içbo —quepondash bëshuaid.

⁵² Adoquien: —Esusën ëbi bëshuaid bëuquec quequin mimbi tantiapadquieç mibi bédanoque. Nidec nid —Esus quenubi isbenquiopondash bëshuaidën. Adec bédanshun Esus nidsho isun tsibampondash.

11

Chuiquid dapabimboec yec Edusaden yacno Esus choaid

(Mat 21.1-11; Duc 19.28-40; Uan 12.12-19)

¹ Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidtedi macuësh Odibos caid potsembo icpondash. Ambo choash ëbéd icquid daéd shubuno nidmenu quequin tantiec nadpondash Esus: ² —Në shubu dadpen yacno nidec nid. Ambo nidshun cabayobiecquidën bacuë caniabictscquid tènëshac tsadsho mimbi istuidendac. Aidi mates catsadabiecquid neque. Aidi istuidshun tènëshaid tècheicshun sananquin bëta. ³ Aden bedsho isun, ¿Atotsi canun aid bede? cac, Bëoaimbi. Nèid nuquin içbo bunaid nec, cata. Mimbi aden chiac, Buanec nid, quendac —quepondash Esus abéd icquid daéd chiec.

⁴ Aden Esusën chiaquien abi daëdi nidpondash. Adec nidanequimbi cabayobiecquid caniabictscquid shubu shëcuë cuëmano tènëshac tsadsho istuidshun tènëshaid tècheicpondash.

⁵ Aden tènëshaid tècheicsho isun: —¿Mitsipaden tantiaquin ëmbi tènëshaid mimbi tècheiqueque? Tantuanu. Chui —capondash anocquidën.

⁶ Adoquien: —Tènëshaid tècheicshun bëta, con içbo quebocpaden naimbi —capondash tècheicquidën.

Adoquien: —Buanec nid —queoapondash.

⁷ Adoac Esus yacno buampondash. Aden bëshun aton dashcute bëntsecquid chicshun cabayobiecquid capupondash ma chuiquid aidën catsadtonoeshun. Adoaidën Esus catsadtopondash. ⁸ Adembidi chuiquid Esus nec quequin ismequin utsibontsen aton dashcute bëntsecquid chichededshun podqued ansambampondash ma chuiquid dapa bédambocquid capuneshun. Adembidi tantiaquin utsibon budëdbiecquid podo tebededshun podqued ansambanoapondash. ⁹ Aden ansambanash mates dadpen bëyucanec nidanenubi Esus nënantanquoio nidnuc aidtedbidi tsyuec choquin tsibambëpondash. Adec abitedi nidanec Esus tantiec nadeç cuëdëncuededpondash: —¿Adeduya! Nuquin Papan bédambo icmiaid ambi tantiapadomboen chuitanta quequin chomiaid nec. Tsusedpa chuiquid dapa, Dabid cuëmédquidën tsyuecquid, shubu abentsëqui tabadquido chuiquid dapambo choec nec. ¹⁰ Èbi chuiquid dapa Nuquin Papan abuc tabadquidën chomiaid Esus nec. Nuquin Papa bédamboshë iquec. ¿Adeduya! —quec cuëdëncuededpondash Esusbéd nidquido.

¹¹ Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneapondash Esus.

Cuëte bacuësa chiaid

(Mat 21.18-19)

¹² Abadiadtsashi Betania yacnoësh nidanec Esus bundopondash. ¹³ Adec bundoshombi cuëte icueda caid podo buntac-buntacpambo ancuenquoio nidsho istuidec Esus: —Icueda

podo buntac-buntacpambo podoash nideque. Isbono. ¿Bacuëashida neque? —quianec nidpondash. Adec nidquimbi icueda podouidquio icsho ispondash. Ushê utsin bacuëtiadquidi bacuëabi podopac. ¹⁴ Ad icsho isun Esusèn: —Adequi bacuëesa icsho ma matsesèn chenquio icpanuna —capondash. Aden chuisho tantiapondash abêd icquidon.

Nuquin Papa tabadte shubu uashunaid yacnoshon cuemiaid
(Mat 21.12-17; Duc 19.45-48; Uan 2.12-22)

¹⁵ Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidèn puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidèn capuquidbêdta podochoquid chedo menebanquidèn tsadtetsen nebudquin icbotedi puduemebampondash. ¹⁶ Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusèn chushcaquin. ¹⁷ Aden chushcasic: —¿Ëbi tabadte shubu uashunaid matsesèn ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. ¹⁸ Aden Esusèn chuisho tantiash, Icsambocquid Esus neque. Unês uatiad, quequin ambibi tantiabededec isadaidbo tsusiobo tabadcuededpondash. Utsiboen: —Chuiquid dapan chiacpadomboen Esusèn chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo. ¹⁹ Adnubien inchêshbudtsëqui Edusaden yacnoësh nidoapondash Esus.

Cuëte bidiquiaid
(Mat 21.20-22)

²⁰ Abadiadtsashi Edusaden yacno nidoaquimbi cuëte icueda caid bidiquiaicsho istuidpondash. ²¹ Aden istuidash Esusèn icueda bacuëesa chiaid tantiec Petedo: —Cuëte bacuëabicsho mimbi chuiboed bidiquiaie. Is, Icho —quepondash.

²² Adoaquien Esus: —Nuquin Papa nadatiambocquin nabanquid nec, quequin tanti aquiota. ²³ Abimbo chiembique. Nuquin Papa nadatiambocquin nabanquidquio nec, quequin abimbo tantiasho isun mimbi chiacpadomboembidi naindac. Aden tantiaquin mimbi nêid macuësh cain, Mananuc tabadboedi adquiecbidi acte nantan tabadoata, mimbi cac nêid macuësh acte nantan tabadoaindac. ²⁴ Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. ²⁵ Aden Nuquin Papa chuinish mibi utsin icsambocquin naid tantienquio yec bēpiscudta. Adsho abucshun isash Nuquin Papan mimbi icsa uanquin naid tantienquio yec bēpiscudendac. ²⁶ Adenquio mibi icsho isun Nuquin Papan mibi icsa uanaid bēpiscudenquiocquin mimbi chiaid tantiatiapimbo iquendac —quepondash Esus abêd icquido caic.

¿Mitsicquidèn chuibanta caid mibi ne? quiaid
(Mat 21.23-27; Duc 20.1-8)

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidèn puduedash capusho isash isadaidbo tsusiobo: ²⁸ —¿Mitsicquidèn chuibanta cac chuiquid dapabimboecquin mimbi chieque? Tantianu. Chui —capondash.

²⁹⁻³⁰ Adoaquien: —Adembidi ¿Atotsi tantiaquin mimbi chuipe? Chui. Tantianu. ¿Matses mentondaidèn, Uan padon Nuquin Papan chuimiapadomboen nabanquinda nadiondash? Padenquio, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantianu. Aden mimbi chiac ëmbitsen mibi chiembi —capondash Esusèn tsusiobo chuiquin.

³¹ Aden Esusèn chuisho tantiash uidictsc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui qesho tantiash, ¿Atotsieshun aidèn chiaid tantienquio icconda? quetsiash Esus. ³² Naden Uan padon ambi tantiacpadomboen naondash, nuqui qesho tantiashun, ¿atotsi napatsiash Uanèn chuisho tantiondaidon? Aidon, Nuquin Papan chuimiaid Uan pado niondash, quequin tantiabededquin nuqui cuënoten seshunetsiash —quecuededpondash. ³³ Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquio iquembi —quepondash isadaidbo tsusiobo Esus chiec.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquio yacpadembi ëbi chuiquin tantiamequid mibi chienquio icoaimbi —quepondash Esus abi chiehênquido isadaidbo tsusiobo chiec.

12

Tied icbo nashunta quequin chiaid
(*Mat 21.33-46; Duc 20.9-19*)

¹ Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tantia. Icbon aton tiedën uba caiduidquo nitsinshun cuate bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nacnemposh. Aden nacnenshun uba ampensushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

² “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. ³ Adec nidboed tied yacno chosho isun tied icbo nashunquidon bedshun cuestasquin menenquiocquin aton icbo yacno nidmeaposh. ⁴ Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestasquin aidtsen aton icbo yacno nidmeaposh tied icbo nashunquidon.

⁵ “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

⁶ “Adsho isash tied icbo nadposh: Nëid, con madombo abentsëqui nec. Èbi cudasaid nec. Aidi tsyuec con tied yacno nidmembidi. Aidi chosho isun, Tied icbon madombo nec, qeshun bédamboen istsiash, qeshun aton madombo nidmeposh.

⁷ “Aden nidmiac ancuenquo chosho isash, Tied icbon madombo choeque. Is. Aton papa unësan aton papa yacpadec icbo icoanushe qeshun tied icbo nuqi icnun aidi cuesunenuna, quecuededposh tied icbo nashunquido.

⁸ “Adec onquetanquin aton icbon madombotsen bedshun cuesuneshun daquënë uaid mabudacquin nebudposh. ⁹ Adoacsho tantiasun ¿atotsi tied icbon napec? Naden naindac. Utsibëd aton tied yacno nidshun abi nashunquidon cuesuneshun utsibo abi nashunquido icmendac —quepondash Esus.

¹⁰ Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia.

“Shubu uanuequidën buintad isuidaids utsin abia nitsinaid icoaposh. Adquiobidi Nuquin Papan chuimiaid matsesën tantiauidaids iquendac.

¹¹ Nuquin Papan naid bédambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquo tantiec”

—quepondash Esus Nuquin Papan chiampidquo chiec. Nuquin Papain shubu abentsëquënë abi tantiaquido yuedanquid nendac, quequin utsi chiacbimboec abibi chiadquin Esusën chuibampondash.

¹² Adsho tantias, Èbitedishun isuidaibimboecnuc chuibanec quequin tantiec isadaidbo tsusiobo Esus bedtiadquido icpondash. Adnubien Esus onquesho dadpenshun tantiabedpondash. Dadpen icsho isash dacuëdcuededec Esus bednu quenquo yec nidanepondash chieshëmëquido isadaidbo tsusiobo.

Bec cho quequin bedshunquid nec, quequin chiaid
(*Mat 22.15-22; Duc 20.20-26*)

¹³ Isadaidbo tsusiobo nidshun padiseyobo edodesbobëda istuidshun: —Nëidon Esus icsamboen chuimetsias —qeshun aido Esus yacno nidmepondash. ¹⁴ Aden nidmiac Esus yacno chosho abentsëcshun Esus nadopondash: —Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantiu. Shocosh piucquid bec cho quequin bedshunquid, isadaidpëmbo ancaquid, Sesad cuëmëdquid nec. ¿Aden meniaid bédambo iquec, quequin Nuquin Papan chiaidta nepec? ¹⁵ ¿Adambi menepeba? —quepondash padiseyobobëd edodesbo Esus caic.

Adoquien, Èbi icsamboen chuimenuc adec onquec, quequin ambibi tantiec: —Shocosh piucquid bec cho ma isnu —quepondash Esus.

¹⁶ Adsho tantiasun bëpondash. Adoquien: —Sananquin isme. ¿Tsutsibimboecnuc dada uaid iqueque? Chui. Tantiu —capondash Esusën.

Adoquien: —Isadaidpëmbo ancaquid, Sesad bimboecnuc dada uaid nec —quepondash. ¹⁷ Adoquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icho icquin, Nata, cacpadomboen naban —capondash Esusën.

Aden bédamboen chuisho tantias, Bédamboenshendä tantiapec, quequin ambibi tantiec Esus chieshëmëquido tabadcuëdedpondash.

*Abuc tabadequi, ¿mitsicquidën chido neque? chui quiaid**(Mat 22.23-33; Duc 20.27-40)*

¹⁸ Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash: ¹⁹ —Moisesën dada uapampid nad iqueque. Tántia. chuínu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuipampid nec — quepondash saduseyobo. ²⁰ Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. ²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën ²² aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidotsen unësoapondash. ²³ Adec unësash abuc tabadequi, ¿mitsicquidën chido aid icpatsiashe? Chui. Tántianu —capondash saduseyobon Esus chuiquin.

²⁴ Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. ²⁵ Nad iqueque. Tántia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec mates uincuenash unësesa iquec caidesa nendac. ²⁶ Adembidi unësash uincuenaid tantianu qeshun ¿Moisesën dada uaid isenquioda ictionda? Aidën cuëtempi abibi nëdënqesho istanec nidtuidquin nadeq Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiapampic Moisesën. ²⁷ Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuínu. Tántia. Unësaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantierendac —quepondash Esus mates uincuenta iquec quequin saduseyobo tantiamenuec.

*Naden nata quequin chiaid ¿mitsicquid adquidpadquid utsi nibëdpec? quiaid**(Mat 22.34-40)*

²⁸ Adec Esusbëd saduseyobo onquecuedednubien tsusedpabon nadomboen nata quequin chiaid tantiamenuec abentsëc chopondash. Bëdamboen Esusën saduseyobo chuisho tantias Esus icsamboen chuimenuc aidtsen: —Ëmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? —quepondash.

²⁹ Adoaquien Esus nadpondash: —Nëid chiaidpadquid utsi nibëdeque. Chuínu. Tántia. “Nuquin Icho Nuquin Papa nec. Nuquin Icho Abentsëcquiobi iquec. ³⁰ Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquio yec Nuquin Papa bunacpadquiec icnu quec bëdamboec tabadta. Adembidi ambi tantiacpaden tantianu quequin adombota. Adembidi aid tantiaquin bëdamboen nabanquiota. ³¹ Aden nabanquin Nuquin Papa bëdambo icmequin utsibo adembidi bëdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec —quepondash Esus.

³² Adoaquien Esus icsamboen chuimenuc choboed nadpondash: —Mimbi chuiboed abimbo iquec. Nuquin Papa abentsëcquiobi iquec. Aidpadquid utsi nibëdec. ³³ Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bëdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen istiapimbo iquendac —queoapondash choboed.

³⁴ Aden choboedën bëdamboen chuioasho tantias: —Nuquin Papan shubu abentsëquën tabadaid mimbi bëdamboen tantiatsempoc —quepondash Esus.

Adoac Esus icsamboen chuimenuc quetiapimbo icpondash utsibo.

*¿Tsuntsin mado Quidistu nepec? quiaid**(Mat 22.42-46; Duc 20.41-44)*

³⁵ Abi icsamboen chuimenuequid utsi nibëdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidën mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. ³⁶ Naden Nuquin Papan Mayanën Dabid chuimiampic:

“Icho utsi icsho mibi chiembique. Tantia, mado, quequin chiec Icho Dapa nadpampic: Èquë con dayun abiuquio cainec tsadec cho ma mibi chieshënuquidtedi mimbi namiaid ma icpanu,”

quequin chuipampic. ³⁷ Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidën icbo yec ¿mitsipadectsi Dabidën tsyuecquid icoapec? —quepondash Esus abibi chiadequi.

Aden chiec onquesho tantiash badedquio tantiatiadquio yampondash utsibo. Bëdamboen chiec, quequin comapenen tantiapondash.

Nuquin Papan chiaid tantiamequidon chuisho tantienda quiaid

(Mat 23.1-36; Duc 11.37-54; 20.45-47)

³⁸ Aden tantiamequimbi Esusën nadopondash: —Tsusedpabon nadomboen nata quequin chiaid tantiamequidën chuibancho tantienda. Aido nadquid iqueque. Tantia. Tsusio-bimboec isadnu quiash abi dasiuidaid ënapen icquid dasiuidtenequid aido nec. Adecbidi tantiaquidquio yec tsusiobimboec isadnu quiash aton matses dadpen yacno capuquid nec. ³⁹ Adomboembidi ëbi isoanu quiash Nuquin Papan chiaid chuibante shubun puduedash tsusiobëd tsadec. Adomboembidi ismenu quiash isedquido dadpen yacno choash shubu icbon dayunquio tsadoaic. ⁴⁰ Aido bëdamboen nashumbimboen nianten na ampequid nec. Ademebidi bëdambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

Nuquin Papa tantiaquin nianten meniaid

(Duc 21.1-4)

⁴¹ Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacentiasih quequin aton na bedtequid bë-bëquin sandobansho isec tsadpondash. Adec tsadquid isquimbi aton na dadpen icquidën aton na bedtequid sando-sandonobi ⁴² aton na daëdpactsëcquidquio nianten choquimbi aton shocosh piucquid daëdquibictscëcquid sandopondash aton na utsi nibëdquiocnoc.

⁴³ Adosho isun abëd icquido chomeshun Esusën nadopondash: —Abimbo chiembique. Tantia. Nianten aton na bedtequid dayun uanu quenquioctscëcquin Nuquin Papa tantiaquiquin sandoquidquio nec utsibon aden sandoenquiocnobi. ⁴⁴ Utsibon aton na bedtequid dadpen uesenquiocquin sandobededpash. Aido daëdpactsëc icquid sandoacimboen sandoquido nec quequin tantiembi. Adquidpenquio nianten nec. ¿Bednu tedtsimbi dayunoape? quenquiocquin aton na daëdquibictscëcquid nibëdquiocnoc sandoposh nianten. Dadpen icquid sandoacimboen sandosho aid isembi —quepondash Esus.

13

Nuquin Papa tabadte shubu uashunaid chic-chicte chiaid

(Mat 24.1-2; Duc 21.5-6)

¹ Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaïd bëdaïdquio iqueque. Is, Icho —quepondash abëd icquid abentsëc Esus caic.

² Adoaquien: —¿Nëid shubu dapa isecta ne? Shubu uaquin cuënote dapa tsindonëdaïd mimbi nëbi isaïd chic-chicac nibëdquienac —quepondash Esus.

Abitedi naimbudte tauanun ismete chiaid

(Mat 24.3-28; Duc 21.7-24; 17.22-24)

³ Aden chiashic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aïdted icpondash. Utsibon tantienquiocnoc aïdon: ⁴ —Cuënote nacnenaïd nebudte mimbi chuïboed ¿mitsipadën nebudte icpeque? Tantianu. Èbi chui. Ademebidi aïdi tauanun ismete ¿atotsi icoapeque? Tantianu. Aid chuïoa —capondash.

⁵ Adoaquien Esusën nadopondash: —Muaquin chiaid tantiamane queshun Nuquin Papan chiaid isban-isanquiota. ⁶ Nuquin Papan chomiaid nebi quec muaquid chochoendac. Aid chosh, quequin chiac utsin-utsinquier, Abimbo caic, quequin tantiabed-edendac. ⁷ Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiaish dacuëndenda. Ad icnuc abitedi naimbudte ushë choabi iquendac. ⁸ Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcuendac canchednuec. Adecbidi bunquiqote iquendac. Aidedi icsamboshëcquid taëyendac.

⁹ “Adquid yanubi Nuquin Papan chiapadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpemo ancaquid dapabo yacno buanaqui mimi tantiaid Nuquin Papan chiaid mimi chuibanendac. ¹⁰ Nuquin Papa yacno yuedanquid iquec quequin mimi chiendac. Nidaitedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec. ¹¹ Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimi chuibanendac.

¹² “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caïndac. Adembidi aton bacuëbo tantiesia icquin aton papan chiaid niacquin adembidi aton titan chiaid niacoquin cuesunemendac. ¹³ Esus tantiaquid chieshëncquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mibi iquendac.

¹⁴ “Adnubien Nuquin Papa chieshënte ushë choendac. Aid chonoc Edusaden yacno abi chieshëncquid dapa choash, Nuquin Papa caid nebi, quiaish Nuquin Papa tabadte shubu uashunaidën tsadendac. Adsho isash cuesunenushë quiaish anoentsëqui icquido cuenenquicboedi ma cuempanuna. Abimbo chiembique. Bëdamboen tantiaita caimbi. ¹⁵ Adecbidi shubu macano pada-padapambo yacno tabadquido yec umanuc decatote uaid dectandoaidën budanec can na bednu quenquio yec cuenta. ¹⁶ Adecbidi aton tied nantan tabadquid yec aton dashcute bëntsecquid chicshun dectanaid bednuec bidiadenquio yec badedquio cuenta. ¹⁷ Bacuë usunquid adecbidi bacuë chishmequin buanquid badedquio cuentiapimbocsho mëyampec. Adquid tantiec utsibo unësquio ichitech. Nuquin Papa chieshënte ushë icsamboshë iquendac. Adnuc badedquio cuenta. ¹⁸ Nuquin Papa chieshënte ushë icnuc ma ue dapa sequenquicpanuna, quequin Nuquin Papa chuidedchuidedta. Adoac ma badedquio cuempanu. ¹⁹ Comapenen Nuquin Papa chieshëncquid abi tantiaquido icsa uaquin mëyanendac. Yuen naindac. Adoaidpadquid ëden nibëdondash. Adecbidi adoaidpadquid nibëdendac. ²⁰ Nuquin Papa ëmenuen chuideneta. Nuquin Papa chuiquin, Chën, Papa, mimi cainquiocnoc matsestedi nibëdtsiandac. Èbi tantiaquid ambi cuënaido tantiec, Chën, quequin Nuquin Papan ëmendac. ²¹ Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, quesho tantienquio icta. ²² Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshëncquidombidi nadatiambocquin nabanendac. Adosho isun ëbi tantiaquidëmbi utsin-utsinquier tantiauidtsendac adquid. Nuquin Papapenquio aid nec, quequin Nuquin Papambo tantiaita. ²³ Ad iquendac quequin chiombique. Ad icnuc chieshenquocquin Nuquin Papan chiaid tantiaquiota —capondash Esusën.

Nuquin Papan madombo choaid
(Mat 24.29-35, 42-44; Duc 21.25-36)

²⁴ Aden chiash abi onquec: —Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquiocnoc unës uaindac. ²⁵ Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanasbëd icquido ¿mitsimbo nuqui cuempeba? quendac.

²⁶ “Adnubien Nuquin Papan madombo matsesäi ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac matsesën. ²⁷ Adnubien Nuquin Papan uaido mayan bëdabo, Èmbi nidtan, cac nidanendac. Nuquin Papan cuënaido bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido —quepondash Esus.

²⁸ Aden chiashic: —Abi chiembique. Tantia. Suc seccuduquiac nëbi cunquecuenec, quequin matsesën tantiec. ²⁹ Adomboembidi ěmbi chuibamboed tauadosho isash Nuquin Papa chieshěnte ushě choeque. Ista, quec chuinanta. ³⁰ Abimbo chiembique. Tantiata. ěmbi chuibamboed naimbudabicnuc ěmbi chuibamboed tantiaquiděn tsyuecquido naimědbudenquio iquendac. ³¹ Aden matsesěn isubien nidaidbědi abu ěnědendac. ěmbi chiaidtedi abimbo yec adquiouidi iquendac.

Něid ushěnquio tauadoendac, quetiapimbo matses iquec quiaid

³² “Adnuc něid ushěnquio Nuquin Papa chieshěnquin tauaindac quetiapimbo matses iquec. Ambi uaido mayan bědabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsěcquiobien adquid tantiaquid nec. ³³ Aid tauadote ushě choaid tantiatiapimbocquin Nuquin Papan chiaid niacmane qeshun isbanquin nabanta. ³⁴ Nad iqueque. Tantia. Chuinu. Utsibo yacno nidnun aběd tabadquido naden chuiposh. Min utsibo chieshěnenquiocquin shubu isquid icta quequin chianec nidposh. ³⁵ Adec icbo nidan abi choate ushě mimbi tantienquio iqueque. Běshunenquiocquin tantiaquiota. Inchěshbudtsěqui choapatsiash, quequin tantiaata. Adembidi inchěshpotssembo chopatsiash qeshun adembidi tantiaquiota. Adembidi, cachina cuědanubi chopatsiash, qeshun isucunshun tantiadenequiota ³⁶ ěmbi tantienquiocnoc con icbo chochitondac, qeshun. ³⁷ Adquiecbidi bědamboec tabadquin Nuquin Papan chiaid isted-istedta Nuquin Papa chieshěnquiděn niacmenushe qeshun —quepondash Esus.

14

Esus cuesunete bunaid chiaid

(Mat 26.1-5; Duc 22.1-2; Uan 11.45-53)

¹ Adashic, běyuc tishaid uněsmenuequid aton shubu datamenuequin Isadaidbo tsusedpabon nidaiděn capuquid yuaded cuesunepampic. Aid tantiaid ushěbědtabi pan bidisquesa tantiaid ushě Pascuas caid daědec ushash choendac. Aid chonoshe qeshun isadaidbo tsusiobon Esus niběmbededpondash. ² Aden niběnec: —Pascuas ushě tantiec Edu-saden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash něishun comapenen nuqi cuestasiashe —quepondash isadaidbo tsusiobo.

Esus uněsec qeshun nachimboen noadte machiuinte chiaid

(Mat 26.6-13; Uan 12.1-8)

³ Adnubien Betania caid yacno tabadquin Esusěn Simoněn shubun puduedshun pondash. Simon daushachimboecquid, nami mishac tantiadenuiocquid icsho Esusěn bědamiad nepondash. Adec puduedshun pec tabadnubi comapenec noadquid běec chido puduedpondash. Piuquid dadpen menequin comapenec noadquid bedquid chido nec. Ambi bedaidd sedunte postichoquid děusunaid děchictanquin Esus chidon machiuiimpodash.

⁴ Aden machiuinsho isash utsibo něishun: —ĵAtotsieshun machiuiino? ⁵ Noadte menequin piucquid dadpen bedshun aton na nibědquid dadpen menetsiandac —quec onquecued-edpanědash Esus machiumboed chido chushcaic. ⁶ Aden chushcacho tantiasien Esus onquec nadpondash: —Chushcainda. ĵMitsanada nediosh? Ambi noadte machiumboed bědaidquio nec. ⁷ Badiadquiděn-badiadquiděnquiec ěnědenquio yec aton na nibědquid ěnabi iquec. Aidi menenu qeshun mimbi menepec. ěbien nashuntiapimbo iquendac. ⁸ ěbi uněsabicnuc něid chidon tantiaquin chococanuequin nachimboen noadte machiuiimpaboc. ⁹ Abimbo chiembique. Tantia. Nuquin Papan shubu abentsěquěn tabadaid chuiquimbi ěbi machiumboeděn naidtsen tantiaquidon chuiben-chuibenendac —quepondash Esus.

Esus bedmembali, Udas quiaid

(Mat 26.14-16; Duc 22.3-6)

¹⁰ Adnubien Udas Iscadiote, Esusběd icquid abentsěc, Esus bedmenu, quianec isadaidbo tsusiobo yacno nidpondash. ¹¹ Adec něidequi isadaidbo tsusiobo yacno choshon Esus mibi bedmembali quequin chuituidac bědambo icpac caondash aids. Adembidi: —Esus ěbi bedmesho isun piucquid mibi menembi —quecuededpac caondash. Adsho tantiasien nidanec, ĵMitsipadentsimbi bedmepe? quec tabadquin caimpac caondash Udasěn.

Nidaiděn capuquidded cuesuniaid aběd icquidobědtan piaid

(Mat 26.17-29; Duc 22.7-23; Uan 13.21-30; 1Cod 11.23-26)

¹² Adashien penun isadaidbo utsibon nidaiděn capuquid cuesunenubien: —Cuesuniaid pambid penu qeshun, ĵmitsishunquiembi nacenpatsia? —quepondash Esusběd icquido.

¹³ Adsho tantiash Esus abëd icquid daëd chiec nadpondash: —Edusaden yacno nidquimbi dadan acte bësho istuidash tsibananec aidbëdi nidta. ¹⁴ Aden aid tsibanec puduedash, ¿Ëbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icho chuita. ¹⁵ Aden chiac buanshun dectatomeshun abuc quënë dapa mibi ismendac. Ambo pete sante cueste iquendac. Ashunquio penun nacenta — quepondash Esus ambi daëd chuimiad caic.

¹⁶ Aden chiac abëd icquid daëd Edusaden yacno nidquin Esusën chiacpadomboen bëquedshun tsibananash puduedshun penun nacnempondash.

¹⁷ Adnubien inchëshbudtsëqui aid daëdtsëqui yacno Esusbëd icquid utsibo chopondash. ¹⁸ Adec choash pec tabadnubien: —Abimbo chiembique. Tantia. Èbëdtan pequid abentsëcshun isadaidbo tsusibo ëbi bedmendac —quepondash Esus.

¹⁹ Adsho tantiash, Icsambo iquec, quequin tantiec: —¿Ëbida chienquio ique? — quepondash abëd icquidtedi.

²⁰ Adoaquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënquido bedmendac. ²¹ Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Èbi bedmequid icsamboshë iquendac. Abi cuidte icsamboshë icnushe qeshun aidi tishenquicpatecnëdan —quepondash Esus.

²² Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: —Nëid pete cuëshë ëmbi piad con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiata — capondash Esusën.

²³ Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac apondash.

²⁴ —Nëid acquin Esused Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin tantiata.

²⁵ Uba caid ënë nidaidëshun padpiden aquenquicquimbi Nuquin Papan shubunshun actequid chuca mibëdtambi aquendambi —quepondash Esus abëd icquido caic.

²⁶ Aden chiash Nuquin Papan naid chiec cuëdënanec macuësh Odibos caid yacno nidoapondash.

*Esus tantiesa nebi quequin Petedon chuite chiaid
(Mat 26.30-35; Duc 22.31-34; Uan 13.36-38)*

²⁷ Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëndendac.”

quequin Nuquin Papan chuipampid nec. ²⁸ Unës uac uincuenash Cadidia yacno ëbia nidoaindabi. Mibitsen ambo nidta —capondash Esusën abëd icquido chuiquin.

²⁹ Adoaquien: —Esus tantiaquid nebi quenquio utsitedi icnuc ëbien padenquio iquec — quepondash Petedo.

³⁰ Aden Petedon chuisho tantiash: —Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac —quepondash Esus Petedo caic.

³¹ Adsho tantiash: —Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquio iquendabi —quepondash Petedo comapenec onquec. Adecbidi Esusbëd icquidtedi onquepondash.

*Quetsemani caid yacno choash tabadaid chiaid
(Mat 26.36-46; Duc 22.39-46)*

³² Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinuec udi nidebique. Nëmbobi tabad —quepac caondash Esus abëd icquido caic.

³³ Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash. ³⁴ Adquio iquec: —Èbibi unësquioshë yec uidictsëc nidebi. Chieshtomane qeshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec. ³⁵ Aden chianec uidictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec. ³⁶ Aden chuishumbic: —Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquio

iquembi qeshun mimbi adoenquioctsiandac, Papa. Ēbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

³⁷ Aden chiash choquin abēd choboed 3ted icquid usho istuidec Petedo caic: —Simon, ¿ushecta ne? ¿Ēbibi chieshmane quiash yuecpectsēc iquec ushenquoio yec tabadiapimboda icco? ³⁸ Chieshmane qeshun Nuquin Papa chuita Nuquin Papan chiaid niacmenuequidēn Satanas caidēn chiaid tantiamane qeshun. Chieshenquoio iquebi quiash dacuēdash bad-edquoio mibi chieshendac —quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuiopac caondash. ⁴⁰ Adtanec choashumbic abēd chobedo adecbidi ushachsho istuidoapac caondash. Ushcasquiec tabadec, Ushenquioccobi, quequin chuitiapimbo yec otacquoio tabadpac caondash.

⁴¹ Adnubien padpidec nidoashun Nuquin Papa chuioatanec choec: —¿Uimabudashta tiboquec ushec ne? Padi. Ushenquoio yec isucun. Nuquin Papan madombo chidon tishac matsesaid ēbi icsho nēbimbobi ēbi chieshēnquidon bedmeque. ⁴² Nidtoash ēbēdi nid. Ēnden choaye. Is —quetuidpac caondash Esus abi bednuec choquido isec.

Esus bedshun buante chiaid

(*Mat 26.47-56; Duc 22.47-53; Uan 18.2-11*)

⁴³ Aden chuinubien Esusbēd ichoedquiobi Udasbēd matses dadpen cho-chopondash. Cho-choquid utsi-utsiec chēshte sanampamboec chonobi utsi cueste sanampamboec cho-pondash. Aided Udasēn chiac isadaidbo tsusiobon chomiaido nepondash.

⁴⁴ Esus bednuequid tantiamenuen ambiabi Udasēn: —Ēmibi tanchoccaid mimbi bedtequid nendac. Aidquioibi bedshun buanta. Cuenushe qeshun bēdamboen ista —capac caondash. ⁴⁵ Aden chiashic aidobēdi choquimbi: —Icho —quequin Udasēn Esus tanchoccatuidpondash.

⁴⁶ Aden Udasēn tanchoccasho isun Esus bedpondash. ⁴⁷ Adnubien anocquid abentsēcshun chēshte sananquin isadaidbo tsusio dapan ancaidēn pabiate auc abentsēc pateshunepondash.

⁴⁸ Adnubien: —¿Cuesanquid Esus nec, qeshun utsin cueste sananubi utsibon chēshte sananec ēbi bedecta cho-choec ne? ⁴⁹ Badiadquidēn-badiadquidēnquiec Nuquin Papa tabadte shubu uashunaid umanuc daquēnē uaidēn tabadquin matses tantiamenuen chuiban-iombi mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiapadomboen nēbi mimbi ēbi bedec, —quepondash Esus abi bedquido caic. ⁵⁰ Adec onqesho tantiaashun cuenquin abēd icquidtedishun Esus niampondash.

⁵¹ Adec cuenubini nēbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshēnquidon bedpondashi. ⁵² Aden bedac dasiuidte bēdaidquio nianec dadauidquio cuempondabi.

Isadaidbo tsusiobo iccuedadacno Esus buante chiaid

(*Mat 26.57-68; Duc 22.54-55, 63-71; Uan 18.12-14, 19-24*)

⁵³ Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo ut-sibo iccuedec tabadpondash. ⁵⁴ Aden Esus buanubi tsyuec choquin Petedo cuemboedēn tsibananec isadaidbo tsusio dapan shubu umanuc daquēnē uaidēn puduedpondash. Adec puduedash Esus cuenushe quequin isquido tabadacno ambotsen cuēte cuēec tsadpondash Petedo. ⁵⁵ Adec Petedo tsadnubien Esus unēs uate bunquin Esus icsambocquid nec quequin chuiquid ¿Ada icpec? quequin nibēnquin adquid tsusiobon istuidabicpondash. ⁵⁶ Abimbo chiacimboen dadpenshun chuibededpondash. Aden chuiquin abentsēcshun chiapadomboen chienquiocquin utsin chuioapondash.

⁵⁷ Adnubien, Chuinu. Tantiā, qeshun Esusën chiacimboen utsi uain chuipondash utsibon. ⁵⁸ Aden chuinubien utsi onquec: —Naden Esusën chuisho tantiomboque. Tantiā, Chuinu. “Nēid, Nuquin Papa tabadte shubu uashunaid chichanendambi. Aden chicban-shumbic daēdec ushquin matsesēn naidpenquoio isadnuc ēmbibi naindambi,” quequin Esusën chuipondash —quepondash utsi. ⁵⁹ Aden abentsēcshun chuinubi utsin aden chienquiocquin chuipondash.

⁶⁰ Aden chuisho tantiaash isadaidbo tsusio dapa nēnantanquoio nidtoash nidquin: —¿Mimbi chiapadomboen chiecta nec? ¿Abimbo chuiquidta nēidtedi neque? Chui. Tantiān —capondash isadaidbo tsusio dapan Esus chuiquin.

⁶¹ Adsho tantiaash ēcbedenquoio yec otacquoio nidsho isash: —¿Nuquin Papan chomiaidquio, Quidistu caid, Bēdamboquidēn mado nebi, quecta mibi ique? —queapondash isadaidbo tsusio dapa Esus caic.

⁶² Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidèn dayun abiucquoio tsadash abu ushun èbi chosho matsesèn isendac — quepondash Esus.

⁶³ Adsho tantiash, Icsamboen chiec, quec abi daèd dasiuidaid bèntsecquid dached-dachedquiash: —¿Atotsieshun Esusèn icsamboen naosh, quequin chuimenuen utsi nibèmpe nuqui? ⁶⁴ Nuquin Papa icsamboen Esusèn chuisho mimi tantioc. ¿Midapaden mimi chieque? Tiantianu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unès uametiad —quecuededpondash.

⁶⁵ Adsho tantiashun Esus dacuishtuaquin utsibon tauapondash. Adotanquin dashcuten bèpucshun ambibi cuestanequi: —¿Tsuntsin mibi cuespoh? Comapenen tantiaquidquoio mibi neque. Èbi chui. Tiantianu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus èmbi tantiacmaidquoio nec quiaid

(*Mat 26.69-75; Duc 22.56-62; Uan 18.15-18, 25-29*)

⁶⁶ Adnubien Petedo umanic daquènè uaidèn tsadnubi isadaidbo tsusio dapan yua chido chopondash. ⁶⁷ Choshon Petedo cuète cuèc tsadsho isun: —Nasaded caid yacnoquid Esusbèd icquid mibi nec —capondash.

⁶⁸ Adoaquien, Esusbèd icquid nebi, quetiapimbo yec Petedo: —¿Atotsi mibi quepe? Tantienuquoio yec tsadebi —quepondash.

Adtanec puuedte shècuè anoentsèqui niduntidash tsadnuc cachina bènè cuèdpondash.

⁶⁹ Adec Petedo ambo tsadsho chido yuaidèn istuidtanquin padpiden: —Esusbèd icquidquoio nèid nec —quequin anocquido chuoapondash.

⁷⁰ Adoaquien: —¿Aidbèd icquidtabi nedi? —quepondash Petedo.

Adnubien yuecpactsèc yash: —Aidbèdi Cadidia yacnoquid mibi nec —quepondash ambobidi tabadquido.

⁷¹ Adoaquien: —Èmbi tantiacmaidquoio nec quequin abimbo chiemi. Èmbi abimbo chienquoio icsho ma èbi chian anèdènquiacono Nuquin Papan nènepanuna —quepondash Petedo comapenen chiec.

⁷² Adnubien cachina padpidec cuèdpondash. Adsho tantiashun, “Cachina daèdec cuèdabicnuc èmbi tantiacmaidquoio Esus nec, quequin mimi chiendac tedestedec onquequin,” quequin Esusèn chioshi quequin tantiec unèsquoio yanec shubianquiopondash Petedo.

15

Pidato yacno nidshun Esus meniaid

(*Mat 27.1-2, 15-31; Duc 23.1-5, 13-25; Uan 18.28–19.16*)

¹ Badiadnuc isadaidbo tsusiobo iccuededpondash. Nèidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mètaneshun buanshun isadaidpempo ancaquid Pidato caid menepondash. ² Aden meniac Pidato: —¿Isadaidbo ancaquidta mibi neque? Èbi chui. Tiantianu —capondash Pidaton Esus chuiquin.

Adoaquien: —Mimbibi aden chuiPAYOC —quepondash Esus.

³ Adnubien, Esus icsaded-icsadedosh, quequin chiec isadaidbo tsusiobo onquecued-ednuc cuèdenquoio yec Esus tsadpondash. ⁴ Adec tsadsho isun: —¿Ècbedanenquoio yec otacquioda tsade? Mibi icsaid dadpen nèidon chuibanec —Pidaton caqui ⁵ adquiechidi Esus tsadpondash. Adec tsadsho isash ¿Mitsipadquidquoio Esus nepec? Utsimbien, Icsapenquiocquid nebi, quequin chuipec, Aden chienquoio Esusèn iquec, quequin ambibi tantiec Pidato tsadpondash.

⁶ Adashic, isadaidbon nidaidèn capuquidded cuesunepampid tantiaid Pascuas caid ushè choaidèn-choaidènquien, Quènèn nauedmiaid abentsèc nidmenu. ¿Mitsiquidimbi nidmepeque? Chui. Tiantianu, quequin isadaidbo Pidaton chuided-chuidedpadenec. Adoaquien ismequin, Nèid nidme, cac nidmedenepadenec. ⁷ Aden chuidenequin ambi quènèn nauedmiaid Badabas cuèmèdquid nepondash. Aidèmbi utsibobèdtan Domanobo bunenquiocquin cuesquin tauasho isun bedmeshun quènèn nauedmepac caondash.

⁸ Adnubien Pidaton seta utsin quènèn nauedmiaid abentsèc ambi nidmiondacpaden nèbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quènèn nauedmiaid abentsècta mimi nidmepatsia —quecuededpondash aido Pidato caic.

⁹ Adec onquesho tantiash Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, èbi chui. Tiantianu —capondash. ¹⁰ Esusbidi tsusio icpec matses quenushe quiaish isadaidbo tsusiobo Esus unès uate bumpec quequin

tantiaquin Pidaton aden chuipondash. ¹¹ Aden tantiec, ¿Adami Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen. ¹² Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

¹³ Adoaquien: —Cueste nitsinshun dectan —quec comapenec cuëdcuededpondash isadaidbo.

¹⁴ Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoaic comapenec cuëdcuededpondash.

¹⁵ Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe queshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

Sondadon Esus mamëshumbedaid chiaid

¹⁶ Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash. ¹⁷ Choshon dashcute abichobicquid bëdaidquio bedshun ancanquid dasiuidacimbocnuc dasiunshun pinchuc-pinchucquid mauete uashun Esus matoncashun ¹⁸ ancanquid cuënacpaden cuë nec: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. ¹⁹ Adoquimbi ancanquidën sanante cueste bëdaidquibimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash. ²⁰ Aden mamëshumbededquin mëyanshun dashcute bëdamboquid ambi dasiumboed dachichshun aton dashcutebi dasiunshun cuesten dectanuequin Esus buampondash.

Esus cuesten dectante chiaid

(Mat 27.32-44; Duc 23.26-43; Uan 19.17-27)

²¹ Aden abi dectante cueste Esusën buantiapimboenoc nidquimbi abi datanquid cueste chiadtometanquin buamepondash sondadon. Abi datanquid Sidene caid yacnocquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmëdquid niondash. ²² Aden cueste Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. ²³ Ambo choshon uba sicaid paëacsho paëmboquid dauë cacushtanquin meniäc aquenquicopondash Esusën. ²⁴ Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tëchun sandoshon cadotanequin dada uatsaidëmpi puduemiaid isbanquin Esusën dashcute bedbampondash.

²⁵ Ushë dectatoec 9 yanuc Esus cuesten dectampondash. ²⁶ Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. ²⁷ Cuesunetanquin ampequid daëd ëquë dectambudcuenshun nënantanquio Esus dectampondash. ²⁸ “Dectanquin icsaquidbëdta dectanendac,” quequin Nuquin Papan chuimiampicpadembi napondash. ²⁹ Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamëshumbededpondash. Adec cuenquin mamëshunquin: —Nuquin Papa tabadte shubu uashunaid chichanshun daëdec ushquin chuca uaimbi, quequin chiec mibi onquiondaque. ³⁰ Abimbo chuiquid yec unëstiapimboquid nebi quianec mibibi budta —cabidanepondash.

³¹ Aden cuenquidën chuinubi ademibidi isadaidbo tsusio dapabotedi tsusedpabon nadomboen nata quequin chiaid tantiaquid chedo onquecuedec: —Utsi-utsien bëdamequimbi utsi unësacscho uincumeboed yec mëtoccid abembi chiquidtiapimboquid nec —quepondash isadaidbo tsusiobo Esus caic. ³² —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiadembi —quepondash. Aden cuenquidën mamëshunubi abëdta dectanaidën ademibidi chuioapondash.

Esus unës uate chiaid

(Mat 27.45-56; Duc 23.44-49; Uan 19.28-30)

³³ Adnubien ushë cuemboenoc 12 yanan inchëshquio icboedi ushë budec 3 yanuc uëshëmbo yanoapondash. ³⁴ Ushë 3 yanuc: —Eloi, Eloi, ¿lama sabactani? —quequin aton papa chiec Esus comapenec cuëdpondash. Aton onqueten: Papa Edoen, ¿atotsieshumbini bidiaquid isenquio ique? quec adpondash Esus.

³⁵ Aden Nuquin Papa Esusën chuisho tantiaquido, Nuquin Papa cuëneg, quenquio yec: —Edias cuëneque. Tantia —quepondash.

³⁶ Aden tantianubi badedi titinqeshun sicaid mucambocquid nëcushtanquin puntanquin cuate dëdectanshun acmenuequin ëccuëscadonequi: —Chiata. Edias Esus bedec chonoshe caimbono —quepondash.

³⁷ Adnubien comapenec cuëdec Esus unësbudpondash.

³⁸ Esus unësbudnubi abi inçhëshacimboecnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec. ³⁹ Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

⁴⁰ Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuuctsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash. ⁴¹ Aidon Esus Cadidia caid yacno capusho isun abi nashumboedo nepondash. Aidobëdtan isquido chido utsibo Edusaden yacno choshon Esus buansho isun tsibanquido icpondash.

Esus chococate chiaid

(Mat 27.57-61; Duc 23.50-56; Uan 19.38-42)

⁴² Adashic biednes ushë budtsambi: —Inçhëshbudtsëqui seis icnuc chonoadtemaid ushë chonoshe Esus unësoshe chococatanu —guianec Esus tantiaquid utsi nidpondash. ⁴³ Aidi, Ose Adimateya caid yacnoshon tishaid Pidato yacno nidpondash. ⁴⁴ Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unëscacosh? quequin tantiesia icquin sondado chuiquid Pidaton chomeshun: —¿Ada Esus unësossh? —capondash.

⁴⁵ Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

⁴⁶ Adoac nidshun unësaid dabiadate bedshun Esusën dada imbudshun dataneshun macuësh dapa cuënote shëcuë uaqin ambi nacnenaidën nauedshun cuënote dapan bëtashpondash. ⁴⁷ Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

16

Esus uincuenta chiaid

(Mat 28.1-10; Duc 24.1-12; Uan 20.1-10)

¹ Aden isashic sabado chonoadtemaid ushë inçhëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. ² Bedtsash badiadtsëcnubi dominco ushë caidën Esus chococacno nidanequi: ³ —¿Tsuentsin cuënote shëcnepeba? —quec onquecuededpac caondash.

⁴ Adec onquequin ancuenquio isquien cuënote ënden shëcniac. Cuënote dapa yuëmbocquid nepondash. ⁵ Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquio tsadpondash. Aidi isash dacuëdcuededec tabadpac caondash chidobo.

⁶ Adec dacuëdec tabadsho isun: —Dacuëdenquio yec tabad. Esus cuesten dectanaid mimbi nibënaid tantiembi. Uincuenash nidac. Nëmboobi nanac ueuidoshe. Is. ⁷ Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquio utsibobëdta chuituidec nid —quepondash nëbi caniquid chidobo chiech.

⁸ Aden chuisho tantiash uëdëquequi chococaid shëcuënuësh puduenanec titinquec dacuëdec onquenquio yec nidanepac caondash chidobo.

Esus abuc indote chiaid

(Mat 28.16-20; Duc 24.13-53; Uan 20.11-23)

⁹ Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. ¹⁰ Aden ismiac Esusbëd icboedo yacno nidash puduedshun aido shubisho Esusën abi ismiad Madian chuituidpondash. ¹¹ Esus uincuenash capusho isombi, Madia quesho tantiash, Aidquio mimbi isambo iquec, quec tantienquio yec tabadcuuededpondash.

¹² Adashic tantienquo yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. ¹³ Aden ismiac aid daëdi auctibi Edusaden yacno nidshun ambi isboed chuoapondash. Adembidi tantienquo icoapondash utsibon.

¹⁴ Adashic, abëd icquidquo 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquo mimbi icpoc. Chobique. Is —capondash Esusën.

¹⁵ Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbisen chuiban. ¹⁶ Aden chuisho tantiaquid, Èbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboconoc. ¹⁷ Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuedmendac. Adembidi, utsi onquiaid tantienquiocboedëmbi tantiaquin ëbi chuibanendac. ¹⁸ Adecbidi, nisinquo piaqui bidisquenquo iquendac. Adecbidi, unësmenuequin acmiaqui unësenquo iquendac. Adembidi, utsi unëstsenho mishac bëdanendac. Nuquin Papan nadatiambocquin namiaidënquo adobanendac — quepondash Esus.

¹⁹ Aden chuiquin ënacsho Esus abuc buanaqui Nuquin Papan dayun abiucquo Esus tsadtuidpondash. ²⁰ Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Èmbi abimbo chuiboedquo mimbi isec aidquo tantianeta. Padi. Aidtedi dada uaombi.

DUCASËN DADA UAID

Mibi ismenuequin dada uaquid Ducas nebi.

¹ Utsin-utsinquier ambi naidbëdtabi Esuquidistu chuibanquin dada uaid dadpen iquec.
² Aidon Esuquidistun tauain naidbëdtabi ambi naid utsitedi isted-istedquin chuibanquin chiapaden dada uaidtedi nec. ³ Esuquidistu chuibanquin dada uaid isbanquimbi Esuquidistu isnëdaidon chuibanaid tantianshun aitedi mibi chuibanquin dada uaimbi, chuiquid dapa, Teyopido. ⁴ Abimbo iquec quequin ëmbi dada uaid ma tantianpanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵ Nidaid Udeya caid yacno Edodes cuëmëdquid ancanquid icnubien Nuquin Papan nami-aidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquid-bidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. ⁶ Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. ⁷ Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸ Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. ⁹ Ambi noadte bëda tauite ushë chonoc Sacadias aid shubun puduedpanëdash. Ènden abipadquid utsibobëdtan abi cuëmëdquid-cuëmëdquidquien dada uashun dada uatempi tēchun sandoshon cadotaniac ambi dada uatsaidëmpi abia pudue-nacsho isacpade Sacadias puduedpanëdash. ¹⁰ Noadte bëda tauinec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecued-panëdash.

¹¹ Adnubien utsi puduedtemaid quënë yacno Sacadias icnubi ambobi Nuquin Ichon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. ¹² Adec tabadsho isash dacuëdampambo iquec, quetanec Sacadias uëdëquiampañdash. ¹³ Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëndenda, Sacadias. Min chido Edisabedën min mado tishendac. Min mado tishacsho Uan cuënta. ¹⁴ Min chidon tishaid isash mibi bëdambo iguendac. Aidi mibi bëdambo icmequid iquendac. Aidën chuibanaid tantiansh matses dadpen bëdambo iguendac. ¹⁵ Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. ¹⁶ Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac. ¹⁷ Min mado Nuquin Icho bëyucanec choendac. Tsusedpa Ediasën chiampicpadiquei dacuëndequio icquin cuembo chuibanquidquio min mado iguendac. Aden chuibanquid Nuquin Icho bëyucanec choendac. Tsusedpabon tishmiadën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iguendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Ichon matses aido icmenuen min madon chuibanendac —quepanëdash Nuquin Papan uaid mayan bëda.

¹⁸ Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboe tantiape? Con chidobëdi tsusio budpobi —capanëdash.

¹⁹ Adoquien: —Èbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiapadomboen mibi chuimenuen chomiaid nebique. ²⁰ Tantia. Chuinu. Min chidon bacuë tishendac, quequin Nuquin Papan chiaid ëmbi chuiboe tantienquo icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹ Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo. ²² Aden yuen caim-budnubien puduenash onquenuequi buëd cuëndequioapanëdash Sacadias. Adsho isun: —Ushquin isachimboen isbenac —cabededpanëdash. Adnubien Sacadiasën iccuededquido nidmenuen mëdante uic-uicapanëdash.

²³ Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. ²⁴ Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec

aton shubu nuntan icpanëdash. ²⁵ Adec tabadec Nuquin Papan naid chiec nadec Edisabed onquepanëdash: —Bacuë usundoenquiopec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

Esus tishendac, quequin chiaid

²⁶ Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. ²⁷ Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. ²⁸ Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icho mibëdi tabadendac —capanëdash Cabadedën.

²⁹ Adoquien Madia, ¿Atotsi quepeba? quequin otacquo tantiec tsadpanëdash. ³⁰ Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque. ³¹ Chuinu. Tantiata. Bacuë usundoshon min mado mimbi tishendac. Tishun, Ëmbi tishaid Nuquin Papa yacno yuedanquidquio nec, quequin Esus cuënta. ³² Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. ³³ Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴ Adoquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵ Adoquien: —Nuquin Papan Mayan mibëdi tabadnuc mimbi tishendac. Aden Nadatiambocquien naidënuquo Madia usundomiaid, icsa nibëdquid, Nuquin Papan madombobi nec, utsibon cabededendac. ³⁶ Min utsi Edisabed macho icquin bacuë usundoenquiochoedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. ³⁷ Utsin natiapimbo yaid Nuquin Papan naidquio nec —quepanëdash Cabaded.

³⁸ Adoquien Madia: —Ai, con Ichon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacenanc Madia tsusedpa Udan tsyuecquidon nidaid macuësh yacno badedi nidpanëdash. ⁴⁰ Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. ⁴¹ Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed ⁴² Madia chiec nadec comapenec onquepanëdash: —Nuquin Papan bëdamboshë icmiaidquio mibi nec. Mimbi usundoaid adembidi bëdamboshë icmiaidquio nec. ⁴³ Nuquin Ichon tita mibi yec ¿atotsi quiash ëbi isnuec cho? ⁴⁴ Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. ⁴⁵ Nuquin Ichon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

Nuquin Papan naid chiec Madia cuëdënaid

⁴⁶ Adnubien Madia nadec onquec cuëdëmpañëdash:

“Nuquin Papan naid chuibanu. Tantiata.

⁴⁷ Ëbi usundomiaid Nuquin Papa yacno Yuedanquid nec, quequin tantiec bëdambo iquebi.

⁴⁸⁻⁴⁹ Ëbi ambi namiaid icsho bëdamboen isquin Nuquin Papan naosh.

Adoacsho, Nuquin Papan bëdamboshë icmiaid Madia nec, quequin abitedishunquio tantiatedendac.

Adembidi aton tsyuecquidon tantiatededoaic.

Nuquin Papa icsaisa iquec. Icsatiapimbo iquec.

⁵⁰ Ambi chiaid tantiaquin naquid icsho,

Mimbi naid icsa cuidnu, quenquiocquin abëdi shubu abentsëquën tabadacimboecnuc adquid tabadmendac.

Adenuidi tantiaquin nampidquio abi iquec.

⁵¹ Nadatiambocquien naded-nadedquidquio Nuquin Papa nec.

Ëmbibi tantiacpadomboen naimbi, quequid icsho isun Nuquin Papan cacumiac uano tabadendac.

⁵² Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

⁵³ Ambi chiaid tantiec bédamboec tabadte comapenec bunquiacpaden naquidquo Nuquin Papan icmendac.

Con na ëmbi bedaiduidi tantiec bédamboec tabadebi quequid unësacsho cacumiac uano tabadendac.

⁵⁴ Chuiquid Dapa Abentsëcquiobi chidon usundoendac, quequin ambi tsusedpabo chuimi-ampicpadomboen Nuquin Papan ëbi usundomiac.

⁵⁵ Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdënash Madia ënëdpanëdash. ⁵⁶ Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

Uan tishaid

⁵⁷ Adnubien Edisabedën bacuë tishte ushë chonoc dada bacuë tishpanëdash. ⁵⁸ Bacuë tishenquiochoedëmbi nëbi aton bacuë tishosh, qesho tantiashton matses ado shubu utsinquidotedi Edisabedbëd bédambo icpanëdash.

⁵⁹ Adashic, 8tedec ushtanquin Edisabedën madon shui dëbid dëteshunu qesho tantiashton utsibo cho-chopanëdash. Choash puduedash bacuëmpi aton papa cuëmëdquid cuënu quenubi ⁶⁰ Edisabed: —Padenquo. Abi cuëmëdquid Uan nec —quepanëdash.

⁶¹ Adoaquien utsibo: —Min matses utsi Uan cuëmëdquid nibëdec —qeshun ⁶² Sacadias ismenuequin mëdante uic-uiccaquin: —Abi cuëmëdquid chui. Tantianu —capanëdash utsibon.

⁶³ Adoaquien dada uate bedshun, Abi cuëmëdquid Uan nec, quequin dada uaqin Sacadiasën ismepanëdash.

Adoaquien: —¿Abimboda mimbi cape? —quecuededpanëdash utsibo.

⁶⁴ Adnubien Nuquin Papan oncameoac Nuquin Papan naid Sacadiasën chuibanpanëdash. ⁶⁵ Aden chuibansho tantiashton: —Dacuëdampambo iquec. ¿Atotsiepushun onquenquiochoedëmbi nëbi onquequin Nuquin Papan naid chuibanpec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash. ⁶⁶ Adoac: —¿Mitsipadquidquo aton mado nepec? —quecuededpanëdash Sacadiasën mado Nuquin Papan tantiamiaidquo isbededec.

Sacadias oncamiaid

⁶⁷ Adnubien Uanën papa Sacadias Nuquin Papan Mayanën oncamiac nadec Esus chieconquepanëdash:

⁶⁸ “Nuquin Papa isadaidbon Icho nec, quequin chuibanuna. Aidën isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidën mënchictequidquo isadaidbo iquendac.

⁶⁹ Abi mënchicquid nadatiamboquid nendac.

Tsusedpa Dabidën tsyuecquidquo aid nendac.

⁷⁰ Ambi chuimiaidon chiampicpadembi

Nuquin Papan adquidquo icmianac.

⁷¹⁻⁷³ Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo

aton tsyuecquidbëdtabi abi chieshënquido

nidiapimbo yacnombo abi yacno yuedanquid

Nuquin Icho Abentsëcquiobi nec.

⁷⁴ Abi cudasquin mënchicaid yec dacuëdenquo yec

Nuquin Papan namiaidombo iquendac.

⁷⁵ Adquid yec icsaisa abipadquo bédamboec tabadquid icsho

nuquid aidën isendac ënenquiocquin.”

Adec Esus chieconquiashic nadec aton mado chieconqueapanëdash:

⁷⁶ “Adnubien nëbi Nuquin Papan chomiaid chuibanquidquo

mibi nec, quequin utsibon mibi cuëmendac, mado.

Nuquin Icho choec, quequin utsibon tantiabincuc

bëyuc tantiashton abi chuiquidquo mibi iquendac.

⁷⁷ Adquid icquin mibi icsaquid icsho cuidnushe quiash

abided cuidadquid tantiashton isash Nuquin Papa mibi icsaid tantienquo yec bëpiscudendac, quequin chuibanquid mibi iquendac, mado.

⁷⁸ Nuquin Papan matses tantiaquin naquidquo icquin abipadquidquo icsaisa abi yacnoshon chomiaidquo iquendac.

⁷⁹ Aidën tantiamiac unēsash abi iquendac.

Adquid shubu abentsēquēn tabadacpadecec tabadendac, quequin mimbi chiendac, mado,”

quec Uanēn papa Sacadias Nuquin Papan Mayanēn oncamiac onquepanēdash.

Matses nibēdacno Uan tabadcueniaid

⁸⁰ Adashic, Sacadiasēn bacuē Uan caniacsho Nuquin Papan tantiamiaid yequi matses nibēdacno tabadcueneapanēdash ambi Esus chuibante ushē choabicnuc.

2

Esus tishaid

(Mat 1.18-25)

¹ Adnubien, Doma yacno tabadquid, isadaidbo ancaquid dapambo, empedadod caid, Aucusto cuēmēdquid icpanēdash. Aucuston, ζĒmbi ancaid isadaidbo aton nabēdta tedtsi iqueque? Isquin tantiata, quequin Sidenio cuēmēdquid chuipanēdash. ² Sidenio nidaid Sidia caid yacnocquido chuiquid, cobednadod caid icpanēdash.

³ Min tsusedpa tishampid yacnoshon mibi cuēmēdquid mitsanabēdtabi dada uanuec niddan, cac abēd icquido buanec isadaidbo nidaneapanēdash.

⁴ Adec utsibo nidnubien Ose aton chido Madiabēdi nidaid Cadidia caid shubu dadpen icquid Nasaded caid yacnoēsh puduanec nidequi aton tsusedpa Dabid caid tishampidnom-bobi nidaid Udeya caid yacno shubu dadpen icquid Beden caid yacno chopanēdash. ⁵ Aton chido Madia bacuē nua usunquidbēdi Ose abī cuēmēdquid aton nabēdtabi dada uanuec Beden yacno chopanēdash. ⁶ Ambo choquin aton bacuē nuambo usumpanēdash. ⁷ Ambo matses dadpen cho-choash shubu abitedi puduedash tsucus-tsucustsēcquio tabadnuc nidaidēn capuquid tabadacno puduedshun ambi bēyuc usundoaid Madian tishpanēdash. Tishun dashcute cuēsh-cuēshun dapucshun nidaidēn capuquidēn pete sanaid cuesten ambi bēyuc tishaid dada bacuē Madian nampañdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibēdacno obeca dadpen pemebanquin buanquido inchēshbudtsēqui choec tabadtuidpanēdash. ⁹ Inchēshbudtsēqui choash tabadnubien inchēshnuc Nuquin Papan chomiaid ambi uaid mayan bēda abuc chopanēdash. Aid uēshēmbo chēnquenic obeca pemebanquin buanquido dacuēdcuededpanēdash. ¹⁰ Dacuēdsho isash: —Chiaid bēda chuinuc chobique. Dacuēdenquiocquin tantiata. Chuinu. Ēmbi chuitequid bēda mibi, Cuishon, quetequid nendac. ¹¹ Nēbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. ¹² Abi tishacno nidshun naden mimbi aidi ispec. Dashcute cuēsh-cuēshun dapucaid nidaidēn capuquidēn pete santen uesho mimbi istuidendac. Bacuēmpi adqueic uesho istuidash, Nuquin Papan chomiaid Quidistu nec, mibi quependac. ¹³ Aden chiec Nuquin Papan uaid mayan bēda onquenubien abēdi abipadquid utsi dadpen choash Nuquin Papan naid chiec nadec cuēdēncuededpanēdash:

¹⁴ “Nuquin Papa abucquio tabadquid abitedi uaquidquo bēdamboshē iquec.

Nuquin Papan bēdamboen isaido ma abēdi tabadpanuna,”

quec cuēdēmpañdash. ¹⁵ Adec cuēdēnash Nuquin Papan uaido mayan bēdabo abuc nidoapanēdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuquid tantiambeoed bacuēmpi isnuec Beden yacno nidnu. Nid —quianec nidpanēdash. ¹⁶ Adec nidshun nidaidēn capuquidēn pete santen bacuē nanacsho istuidpanēdash. ¹⁷ Isanec nidquimbi ambi isboedbēda ambi tantiaboed chiac ¹⁸ tantiaquidtedi: —ζMidapadquidien capec? —quecuededpanēdash. ¹⁹ Aden obeca pemebanquin buanquidon chiaid tantiash bēpiscudenquio yec Esusēn tita, Madia, ζMitsipadquid con bacuē nepec? quequin bēpiscudenquiocquin tantiadenepañdash.

²⁰ Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ēmbi isboed ēmbi tantiaboed Nuquin Papan naidquio nec —quequin chiec onquecuededpanēdash.

Nuquin Papa tabadte shubu uashunaid yacno Esus buanaid

²¹ Adnubien 7tedec ushtanquin aton madon shui dēbid dētemiacsho isun, Nuquin Papan uaid mayan bēdan chiacpadomboen cuēnaid Esus nec, quequin Madian aton mado cuēmpañdash.

²² Adshumbic, bacuē tishun aid bacuēn shui dēbid dētemeshun ushē abentsēc nidan utsi chotsēcnic Moises Nuquin Papan dada uamiacpaden nanuen Madiabēdta Osen

Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepanëdash. ²³ Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. ²⁴ Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bëdambocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

²⁵ Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpanëdash. Aidi isadaidbo chuiquid dapa abentsëcquiobi cainquidquio icpanëdash. Aidi Nuquin Papan aton Mayan meniaidquio icpanëdash. ²⁶ Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bëdamboen isaidquio choacsho unësabicquoin isendambi, quequin tantia-panëdash. ²⁷ Ademibidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpanëdash. ²⁸ Esus bësho isun Simeyonën Esus bedshun icucquin Nuquin Papan naid naden chuibampanëdash:

²⁹⁻³⁰ “Abitedishun Icho icquin mimbi ëndenquio chiampid nëbi nëid isembi.

Nëid isash unësmanc quenquio yec, Cuishon, quec unësebi, Papa.

³¹ Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

³² Nëidëmbi mimbi tantiacpaden chuibanquin

isadaidbo bëdambo icmendac,”

quepanëdash Simeyon.

³³ Aden chuibanubi, ¿Midapadquidquien con mado capec? quequin Madian aton bënëbëdtambi tantiaquinëdash. ³⁴ Esus chuibanquin naimbudshun Osebëdta Madia chiec Simeyon: —Bëdambo icmiaid mibi daëdi nec —quepanëdash. Aden chuishumbic Madi-aidtsëqui naden Simeyonën chuiopanëdash: —Chuinu. Tantiata. Nëid bacuë tantiesadaidbo utsi-utsiec icsho Nuquin Papan uguë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bëdambo iquendac. Min bacuë, Esus, Nuquin Papa yacno puduedmianquid nec, qesho tantiaishun matses dadpeshun icsamboen chuided-chuidedendac. ³⁵ Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac —quepanëdash Simeyon Madia chiec.

³⁶ Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsuseda Ashed icpampic. Aid aton bënënen bedac abëdi seta 7ted matamias tabadnubi ³⁷ aton bënë unësapanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mëmumbudnequin Nuquin Papa chuidenapanëdash. ³⁸ Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

³⁹ Adashic, Nuquin Papan naden nata quequin chiacpaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash.

⁴⁰ Ambo tabadnubi aton bacuë Esus dada bëdambo yec canicuepanëdash. Aidi comapenen tantiaquidquio Nuquin Papan bëdamboen isaidquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹ Adashic, Ëmbi bëyuc tishaid unës uamenushë qeshun intaquën aton shubu shëcuë ëcnoshcacsho isun aidon bëyuc tishaid unësmanquicquoin Nuquin Papan uaid mayan bëdan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiacpadequi setan-setanquieci nidenapanëdash. ⁴² Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. ⁴³ Adec ambo nidashic nami uabicquid petequid tantiaid ushëtedi tantieci tabadtenapanëdash. ⁴⁴ Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd choboedo yacno capuquin Esus nibëmbenapanëdash. ⁴⁵ Aden nibënquin istuidabi yec Edusaden yacno padpidec nidoapanëdash. ⁴⁶ Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onquecuededsho istuidpanëdash. ⁴⁷ Adec onquec tsadsho isquin,

Bëdamboen tantiaquin chuibanquidquio nëid nec, quequin utsibon tantiabededpanëdash.
⁴⁸ Adnubien, ¿Mitsipadquid con mado nepec? quequin otacquio Madian tantiapanëdash.
 Aden tantiequi: —¿Atotsi quiash ëbi daëdi tantienquio yec nëmbo choash mibi tabade,
 mado? Unësquioacquin papabëdtambi mibi nibëmbeniombi —capanëdash anin.

⁴⁹ Adoaquien Esus: —¿Atotsieshun ëbi nibëno? Con Pa shubu uashunaidën tabadnuec
 chobosh nëbi. ¿Tantienquioda mimbi icpe? ⁵⁰ Aden Esusën chuisho anibëdtan Osen tantien-
 quioacpanëdash.

⁵¹ Adashien: —Nidnu. Nid, mado —anin cac cacuidenquio yec Nasaded yacno anibëdi
 choash tabadquin Madian chiaidbëdta Osen chiaid tantiaquin Esusën nadenepanëdash.
 Adec tabadnubi aton titan ambi isboedbëdta ambi tantienquio yaid bëpiscudenquioacquin
 tantiadnenepanëdash.

⁵² Adnubien comapenen tantiec bëdamboec canidopanëdash. Adquid icsho Esus Nuquin
 Papan bëdamboen isacpadomboen adomboembidi matsesën isbededpanëdash.

3

Esus choec, quequin Uan mentoanquidën chiaid

(Mat 3.1-12; Mad 1.1-8; Uan 1.19-28)

¹ Adashic, seta 15ted matamec Tibedio Sesad cuëmëdquid, Doma yacno tabadequi abitedi
 ancaquid dapa, empedadod caid icpanëdash. Aidi Doma yacnocquido ancaquid dapa ic-
 nubien Ponso Pidato cuëmëdquid, nidaid Udeya caid yacnocquido ancaquid, cobednadod
 caid icpanëdash. Aid daëd ancanquid icnubien Edodes cuëmëdquid, nidaid Cadidia caid
 yacnocquido ancaquid, cobednadod caidbidi icpanëdash. Ancanquid aitedi icnubien
 Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite
 caid yacnocquido ancaquid, cobednadod caidbidi icpanëdash. Ancanquid aitedi icnu-
 bien Disanias cuëmëdquid nidaid Abidinia caid yacnocquido ancanquid cobednadod caid
 icpanëdash. ² Ancanquid aitedi icnubien Anasbëdi Caipas isadaidbo tsusio dapabo ic-
 panëdash. Aid daëdi isadaidbo tsusio icnubien Uan, Sacadiasën mado matses nibëdacnombo
 tabadshobi Nuquin Papan, Ëmbi chiaid chuibanta, capanëdash. ³ Adoac acte Odan caid
 cuëmano capuquimbi naden chuibampanëdash. Mimbi tantiaid icsa ënta. Aden ënsho
 isun mimbi icsambocquin nabod tantienquio yacnimboen Nuquin Papan mibi bëdamboen
 isendac. Ëmbi tantiaid icsa nainquioacquin ënu, mibi qesho tantianshun mibi acten
 mentono, quequin cho-choquid cho-choquidquien Uanën chuidednepanëdash.

⁴ Èndenquimbo Nuquin Papan tantiamiac Isayasën Uan chuiquin dada uampicpadequi
 Uan icpanëdash. Naden Isayasën Uan chuiquin dada uapampic:

“Matses nibëdacnombo tabadquidën ëcauanshun naden chiendac:

Nuquin Icombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquio chosho isnu quequin cuembocnoc andëdshun

ambescabanacnimboen abimbo chuiquidënquio chiaid tantianu, quequin mimbi tantiaid
 icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuem-
 bocnoc mimbi tantiabenendac,”

quequin Isayasën Uan tishabicnuc chuiquin dada uapampid nec.

⁷ Aden ënden chiampicpadequi Esus bëyucanequin acten mentomenuec cho-choquid dap-
 den icsho Uanën nadopanëdash: —Nisin bacuë anipadquid nec. Aidbimboecquid icsam-
 bocquid mibi neyoc. Mibi adquid icsho isun ¿tsuntsin Nuquin Papan cuidnushe qeshun
 ambi mënchictequid icta, quequin mibi chiosh? ¿Aidën chiaid tantiashta acten men-
 tomenuec cho? ⁸ Mentomete bunquin mimbi tantiaid icsa ënshun bëdamboec tabadquin
 utsibo ismebanta. Nuquin tsusedpa Abadauan Nuquin Papan bëdamboen isaidquio ic-
 pampic. Ambi tishmiaidën tishmiaid caidaid ëbi icsho Nuquin Papan bëdamboen isaidquio
 nëbi, quequin tantienda. Abadauampadquid ambi chiaid tantiaquid bunquin, Matses icta,
 Nuquin Papan cac cuënotëbi matses iquendac —quepanëdash Uan. ⁹ Adequi onquebudec:
 —Cuëte icsatedi matenu, quequin cuëte bacuëesa dëdshun mateshun icbon nëndëcaquin
 tauec. Adquiecbidi tantiaid icsambocquid cuëshëdmenu, qeshun bëdamboec isadaid
 ismesa cuëshëdmeshun chian anëdënquequid Nuquin Papan nënendac —quepanëdash Uan.

¹⁰ Adoaquien: —Chian anëdënquequid Nuquin Papan nësiate ictiapimbocquin ¿atotsimbi
 napeba? —quepanëdash iccuededquido.

¹¹ Adoaquien: —Mibi dasiuidaid daëd icsho dashcute nibëdquid isun mitsana abentsëc
 meneta. Adembidi pete nibëdquid icsho isun meneta —capanëdash Uanën.

¹² Adecbidi ancanquid dapan matses utsin na bedtequid nëidted bedta caidotsen
 acten mentomenuec cho-chopanëdash. Choshon Uanën chuibansho tantias: —Chian
 anëdënquequid nësiate ictiapimbocquin ¿atotsimbi napeba? —quepanëdash.

¹³ Adoquien: —Ancanquid dapan chiacstedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

¹⁴ Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoquien: —Mitsana bedtequid bunquin icsamboen bedenda. Ütsin naid tantiashun mua uaqin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

¹⁵ Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? —quecuededpanëdash cho-choquido.

¹⁶ Adsho tantiash: —Mibi acten mentoquidquio nebi. Padnuen ëbipadquidpenquo nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan. ¹⁷ Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. ¹⁸ Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

¹⁹ Adshumbic, ancanquid Edodesën tantiaid icsatsen Uanën chuibampanëdash: —Mín utsin chido, mimbí bedaid, mimbí tantiaid icsa neque. Mimbí tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. ²⁰ Aden ambi tantiaid icsa chuibansho tantiashun Edodesën Uan bedmeshun quënën nauedmepanëdash abitedishun tantianushe qeshun.

Esus acten mentoaid

(Mat 3.13-17; Mad 1.9-11)

²¹ Quënën nauedabicquín matses dadpen acten mentobampanëdash Uanën. Utsiboba mentoshombic Esustsen mentopanëdash. Adoquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëncianec ²² dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucueh Esus chiec nadec aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi

(Mat 1.1-17)

²³ Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiash aton matses nadpanëdash. Osen mado nec, quiaish, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icbo icnuc Esusën tsusedpabo nëidtedi iquéc: aton buchido Edi cuëmëdquid icpanëdash. ²⁴ Aidën papabic Matac cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, ²⁵ aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, ²⁶ aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, ²⁷ aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, ²⁸ aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, ²⁹ aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matac cuëmëdquid, ³⁰ aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, ³¹ aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid, ³² aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid, ³³ aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid, ³⁴ aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid, ³⁵ aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid,

aidèn papabic Sada cuëmédquid, ³⁶ aidèn papabic Cainan cuëmédquid, aidèn papabic Adpashad cuëmédquid, aidèn papabic Sen cuëmédquid, aidèn papabic Noe cuëmédquid, aidèn papabic Damec cuëmédquid, ³⁷ aidèn papabic Matusaden cuëmédquid, aidèn papabic Enoc cuëmédquid, aidèn papabic Aded cuëmédquid, aidèn papabic Macadaded cuëmédquid, aidèn papabic Cainan cuëmédquid, ³⁸ aidèn papabic Enos cuëmédquid, aidèn papabic Sed cuëmédquid, aidèn papa abia uampid Adan cuëmédquid, aidèn papambo Nuquin Papa abia yanampidquio nec. Abi tabadec. Aidedi Esusèn tsusedpabo nec.

4

Satanas Esus icsamete bunaid (*Mat 4.1-11; Mad 1.12-13*)

¹ Adshumbic, Matses nebi, quequin Nuquin Papan chiacpaden nanuen acten mentoepanédash Esusèn. Aden Uanèn acten mentoquien Nuquin Papan Mayanèn chiacpadec acte Odan caid yacnoèsh puduanec matses nibèdacnombo nidash tsadpanédash. ² Ushè utsi nidash utsi choaid abuctotsècquiecnuc ambobi tsadpanédash. Aidedi ushquin penquo yash Esus bundopanédash.

³ Bundoacsho isash Nuquin Papa chieshènquid choash Satanas nadpanédash: —Nuquin Papan madombo icquin penun cuènotebi pete icta cata —capanédash Satanasèn Esus chuiquin.

⁴ Adoaquien: —Padi: “Peteuidi pec bédamboec tabadtemaid nec,” quequin dada uapampic —quepanédash Esus Satanas caic.

⁵ Adoshombic, macuèsh dapa abucquio yacno Esus buanshun Satanasèn badedquio nidaidtedi isembampanédash. ⁶ Ismiash: —Nidaidèn icquidtedishun icbo icmiaidquio nebi. Abitedi con na nec. Èmbi menenu cac aidedi mitsana iquendac. Nidaidèn tabadquidtedi chuiquid dapa mibi icmete bunebi. Adquid mibi icnuc mibi buntequid nibèdendac. ⁷ Nidaidèn tabadquidtedi chuiquid dapa icnu quequin, Con icbo mibi nec, èbi casho adquid mibi icmèmbi —quepanédash Satanas Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa abentsècquio mibi tantiaiduidtsèqui min icbombo neque. Aidèn namiaidquio icta” —quepanédash Esus Satanas caic.

⁹ Adoshombic Edusaden yacno Esus buanshun Satanasèn Nuquin Papa tabadte shubu uashunaid macano abucquio tsadumpanédash. Aden tsadunshun: —Mibi Nuquin Papan madombo yec nèuèshquio dacuèdenquio yec pudunta. ¹⁰ Naden dada uapampid iqueque. Tanti. Chuinu.

“Mibi pudunsho isun, Tsicatequin bédamboen budmeta, quequin Nuquin Papan ambi uaido mayan bédabo chiendac.

¹¹ Aidombi min taèn tsasimbocquid tincanushe queshun uidèn uaquin mibi bédamboen budmendac.”

Aden min Papan chiaid icnuc dacuèdenquio yec pudunta —capanédash Satanasèn Esus chuiquin.

¹² Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanédash Esus Satanas caic.

¹³ Aden chiaquien Satanasèn Esus icsamboen namenuen tanquin naimbudpanédash. Aden naimbudequi, Padpidemboen èmbi chiaid namenuquin Esus tanun nanuna, quequin ambibi tantianec Esus nianec Satanas nidpanédash.

Nasaded yacnoquido Esus bunesabo (*Mat 4.12-17; 13.53-58; Mad 1.14-15; 6.1-6*)

¹⁴ Adashic, Nuquin Papan Mayanèn tantiamiaidquio iquequi matses nibèdacnoèsh Cadidia yacno Esus choapanédash. Choacsho isun, Nuquin Papan Mayanèn tantiamiaidquio nec, quequin abi isquidon chiac dèuequidon tantianpanédash. ¹⁵ Adnubic, Nuquin Papan chiaid chuibante shubu utsin-utsinquec puduedcuenequin Nuquin Papan chiaid Esusèn chuibampanédash. Aden chuisho tantiashe, Nuquin Papan chiaid tantiaquidquio Esus nec, quec cuèdencuedpanédash.

¹⁶ Adashic, Nasaded yacno abi caninèdacno Esus nidoapanédash. Ambo choash chonoadtemaid ushèn Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanédash. ¹⁷ Nidtosho isun Nuquin Papan chiaid Isayas cuëmédquidèn dada uapampid anocquidèn Esus menepanédash. Aden aid meniac sananquin seccudoabanquin isbanec nadec Esus onquepanédash:

18 “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuequin chuibanta caidquio nebi.

19 Aidën Nuquin Icbon bëdamboen iste chuibanta caidquio nebi.”

20 Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash. 21 Adoac: —Nuquin Papan chiaid mimbi tantiaiboed nëbimbobi tauadoec —quepanëdash Esus abibi chiaidequi.

22 Adoaquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

23 Adoaquien: —Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuipampid nec. Ëmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec. 24 Abimbo chiembique. Tantiata —quiasch Esus abi onquec: —Nuquin Papan ëmbi tantiamiacpaden chuibanta caidën abi caniacnoshon chuibansho tantienquiocquid icpec. 25 Ëndenquimboshë adomboembidi Nuquin Papan ëmbi tantiamiacpaden chuibanta caid Edias cuëmëdquidën chuibansho tantiesa icpampic. Aidi icnubien isadaidbon bënua chidobo dadpen icpampic. Aido adquid icnubien seta abentsëc chotsëcnc matamec aton pete nibëdquieq yanubi isadaidbon bënua bunc tabadpampic. 26 Adec bunc tabadsho isun, Isadaidbon bënua yacno nidta, quenquiocquin isadaidpembon bënua yacno pemenuc nidta cac Edias nidshun ambi chiacpadomboen isadaidpembon bënua nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsëqui icpampic. 27 Adashic, adecbidi isadaidbo abi daushumbo yacno mishac mishadenquio yacimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembo abentsëc Naman cuëmëdquid Ediseyon bëdamepampic. Ëbi bëdamepec, quequin tantiec aton nidaid Sidia caid yacnoësh choacsho Ediseyon Naman bëdamepampic —quepanëdash Esus.

28 Aden Esusën isadaidpembo nashumpampid chuisho tantiasch iccuededquido isadaidbo comapenec nëishpanëdash. Isadaidpembobëd isadaidbo ictiapimbo iquec, quec iccuededquido nëishpanëdash. 29 Adec nëishash nidanec nuntanuësh puduenanec shubu ënëdacno nidshun acte dapa quiusudacnombo nebudnuequin Esus buamanpëdash. 30 Aden nidmiaquien matses dadpen icquid natsusash Esus nidpanëdash.

*Mayan icsa dapuduedaid cuemete
(Mad 1.21-28)*

31 Adec abi caniacnoësh Nasaded caid yacno nidtanashi nidaid Cadidia yacno nidequi Capednaun caid yacno Esus choapanëdash. Ambo choash chonoadtemaid ushë icnuc Nuquin Papan chiaid chuibante shubun puduedshun Nuquin Papan chiaid chuibampänëdash. 32 Aden chuibansho tantiasch: —Ambia tantiaquidën chiacpaden chuibanquidien Esus nechitec —quecuededpanëdash anocquido.

33 Aden Esusën chuibanubien Nuquin Papan chiaid chuibante shubu nuntan mayan icsa dapuduedaid icpanëdash. Aidi comapenec sidquetanec onquec: 34 —¿Nasaded yacnocquid Esus caid atotsi quec mibi cho? ¿Ëbipadquidtedi naimbudmenuecta cho? Ëmbi isaid mibi nec. Nuquin Papan bëdamboen isaidquio, icsapenquiocquidquio mibi nec —mayan icsan caquien: 35 —Otaquio tabad. Adec tabadec dapuduenta —Esusën cac mayan icsan abi dapuduedaid tacpanën nebudec icsa uainquio yec dapuduempänëdash.

36 Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec —quepanëdash Capednaun yacnocquido. 37 Aden tantiaquien Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapänëdash.

*Daicsambocquid dadpen Esusën bëdamiaid
(Mat 8.14-17; Mad 1.29-34)*

38 Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien:

³⁹ Simonën nachi yacno choash dayunquo nidtuidec: —Chumbocquid dauebudta — Esus quenubi badedquo dauebudpanëdash. Adec dauebudash nidtoshon codocashun Esusbëd icquido pemeapanëdash Simonën nachin.

⁴⁰ Adshumbic, inchëshbudtsëqui daicsaid utsi-utsien bē-bēpanëdash. Aden bē-bēsho isun damishquin Esusën bēdameapanëdash. ⁴¹ Adembidi mayan icsa utsi-utsien dapudue-mepanëdash. Adoac, Nuquin Papan madombobi mibi nec, quec sidquesho tantiahsun: —Nuquin Papan chomiaid nec, quequin ëbi chiec adec onquenda —Esusën cac mayan icsa ënëdpanëdash.

⁴² Adashic, badiadnuc matses nibëdacno Esus nidpanëdash. Esus nidacsho isun matses dadpeshun nibënquin istuidshun: —Nidenquo yec ëbëdi tabadta —capanëdash istuidquidon.

⁴³ Adoquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuc nidendabi. Nuquin Papan chomiaid icquin chuibanun nabono —quepanëdash Esus abi nibënquin istuidquido chiec.

⁴⁴ Aden chiashic Nuquin Papan chiaid chuibante shubu utsin-utsinquec pudued-cuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

5

Abëd tabadmenuen chomiaid (Mat 4.18-22; Mad 1.16-20)

¹ Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuedquido dadpen tabadpanëdash. ² Adnubien masi yacno aton cano daëd nëshun icbon aton nëshaidtedi pambampanëdash. ³ Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccueddec tabadshobi cano antsadquin Esusën chuibampanëdash.

⁴ Aden chuibanquin nainshun: —Shodombo yacno nuëcquid bednuquin nëshaid nënebanta, Simon —capanëdash Esusën.

⁵ Adoquien: —Icbo, inchëshëmbi nuëcquid bednuen nëshaid nënebenuquin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

⁶ Adash shodombo yacno nidshun nëshaid nënetanquin nuëcquid dadpenquioshë bedac nëshaid tēsëdec taëpanëdash. ⁷ Adsho isun abëdtan nuëcquid beduidboedo cuënquin, Cadoc cho, quequin ismiac aido cano utsin choshon cano cubu-cubutsëcquiocnoc nuëcquid sandoc cano daëd mentoadtsempanëdash.

⁸ Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquo yec nidaneta. Icsambocquid nebique —capanëdash Esus chuiquin. ⁹ Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo. ¹⁰ Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëdenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucenuquin abuc tabadaid mimbi chuiban-chuibanendac —quepanëdash Esus Petedo caic. ¹¹ Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

Daushumbocquid bëdamiaid (Mat 8.1-4; Mad 1.40-45)

¹² Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

¹³ Adsho tantiahsun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquo bëdampanëdash.

¹⁴ Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdamo icmiaid cuidequidquo meneta —capanëdash Esusën ambi bëdameboed chuiquin.

¹⁵ Adnubien Esusën bëdamesho isquidon Esusën bëdamiaid chuibanac matses dadpen Esusën chiaid tantianec cho-chopanëdash. Adecbidi, daicsambocquido bëdanuec cho-choacsho Esusën bëdameapanëdash. ¹⁶ Adashien matses nibëdacnombo nidash Nuquin Papa chiec onquepanëdash.

Dada shëquëquenquiocquid bëdamiaid
(*Mat 9.1-8; Mad 2.1-12*)

¹⁷ Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuec Esus icpanëdash. ¹⁸ Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan nënantanquio Esus icnubi ¹⁹ matses tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

²⁰ Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquo yec bëpiscudtequidquio mibi nendac —quepanëdash Esus.

²¹ Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papanuidi tantiaid icsa cuidenquo yec bëpiscudquidquio nec —quepanëdash ambibi tantiacpadec onquec.

²² Aidon tantiaid tantiec Esus: —¿Atotsi quiash mimbibi icsamboen tantiec onquepe? ²³ ¿Mimbi tantiaid icsa cuidenquo yec bëpiscudtequidquio nendac ëmbi chiaidquio bédantequidpenda nedic? Adecbidi, ¿Mibi icsambochoedi mibi bédanoque. Nidtoash nida, quequin chiaid bédantequidpenda nedic? ²⁴ Nuquin Papan chomiaid icquimbimimbi tantiaid icsa cuidenquo yec bëpiscudtequidquio nendac ëmbi cac ad iquendac. Nuquin Papan chuimiiaidquio nec mibitëdi camenuen dada shëquëquenquiocquid naden chiembigue Tanti. Nidtoash nidquin min di buanec nid —capanëdash Esusën dada shëquëquenquiocquid chuiquin. ²⁵ Adoac nidtoshon aton di bedanec Nuquin Papan naboad chuibanequi aton shubuno nidpanëdash.

²⁶ Adsho isash tantiadempambo yec Nuquin Papan naid chiec onquecuededec tabadpanëdash: —Aden bëdamiaid isenquiochoedëmbi nëbimbobi aid isbempombi —quecuededpanëdash.

Debi, ëbi tsibanec cho, quequin Esusën chiaid
(*Mat 9.9-13; Mad 2.13-17*)

²⁷ Adashic, capucuenequin Debi cuëmëdquid Esusën istuidpanëdash. Debi nec queshumbi Mateyo cuëmpañëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiapaden Debin utsibon na bedtequid bedbansho isun: —Èmbi chiaid tantianush ëbi tsibanec cho —Esusën cac ²⁸ Debi nidtoanec aton natedi nianec Esus tsibananec nidpanëdash.

²⁹ Adshun aton shubuno Esus buanshun Debin pemepañëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepañëdash. ³⁰ Aden adquidobëdtan Esusën pesho isash padiseyobo: —¿Atotsieshun mibi chuquidbëdtan mibitedishun icsambocquidbëdtan pepeba? —quepanëdash Esusbëd icquido caic.

³¹ Aden chuisho tantiash Esus nadpanëdash: —Èbi bëdamec cho, quenquio bëdambocquid iquec. Daicsambocquidien, Èbi bëdamec cho, quendac. ³² Adecbidi, Nuquin Papan bëdamboen isaidquio icsho, Mimbi tantiaid icsa ënta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

Buna mëmunaid
(*Mat 9.14-17; Mad 2.18-22*)

³³ Aden Esusën chuibanusho tantiashun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquio mibëd icquido iquec. Aidon buna mëmunenquiocquin peshun sicaid actenec —quepanëdash padiseyobo Esus chiec.

³⁴ Adoaquien: —Aton chido bednun pambid meniäc chidon codocacsho abi inquidën abëd icquido menec. Aden meniäc isuidesa abëd icquido nec. Adecbidi ëbi abi chuquid icnuc ëbëd icquidon buna mëmunenquiocquin isuidenquio iquec. ³⁵ Yuecash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶ Aden chuibanequi abi Esus onquec: —Dashcute chuca cuëshun dashcute shënbëdta nancenquin bëtuscaisa matses nec. Cuëshquin dashcute chuca icsa uaic. Adecbidi shëni

tuscaid bêtèsèdec. ³⁷ Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shênin icsa sandoshon nequid bēenquiocquin. ³⁸ Adembidi, ěmbi ěnden tantiauiduidi tantianu, quequin Nuquin Papan nēbi chiaid pausudtequid bēda tantiauidquid yanec icsabudendac. Mibi adquid iquec, quequin tantiaquin utsi chiacchimboen Esusèn padiseyobo chuipanēdash. ³⁹ Adashic ambi ěnden chiaid tantienquocboedi nēbi Nuquin Papan chiaid utsi chuibanac tantiaquidquio iquendac —quepanēdash Esus.

6

Chonoadtemaid ushē tantiaquid

(Mat 12.1-8; Mad 2.23-28)

¹ Adashic, chonoadtemaid ushē icnuc Esusbēdtan abēd icquidon tied matanquin tiedēn caniquid ěshchicshun abēd icquidon bitsi tsucucashun pebededpanēdash. ² Aden pesho isquin padiseyobon: —¿Atotsieshun chonoadtemaid ushēn chonoadpeque? Tantianu. Ěbi chui —capanēdash Esusbēd icquido chuiquin.

³ Adoaquien: —¿Tsusedpa Dabid caidbēd icquidon piasquin pepampid tantiamboda ique? ⁴ Naden chuipampid neque. Tantia. Abēd icquidobēd Nuquin Papa tabadte shubu uashunaid puduedtemaid quēnēn puduedshun Nuquin Papa tantiaquin pan meniac nanaid chuiquid dapan bēdshun abēd icquido menebanshun aidobēdtambi pepampic. Aid pan Nuquin Papan namiaidēnuidtsēqui petequid nepampic —quequin padiseyobo chuishun Esusèn nadopanēdash: ⁵ —Ěbia: Tiboquenu, quiash tsadacpadec matses: Nēid chonoadtemaid ushē nec, quequin tantiec. Adnubini aid ushē icbo yec tiedēn caniquid ěshchicshun bitsi tsucucasho isash: Mimbic icsamboen naic, quetiapimbo iquebi.

Mēuesadaid bēdamiaid

(Mat 12.9-14; Mad 3.1-6)

⁶ Adashic, chonoadtemaid ushē utsin Nuquin Papan chiaid chuibante shubun puduedshun Esusèn chuibanubien abiucquio mēuesadaid dada icpanēdash. ⁷ Ambobidi tabadquimbic Esus chieshēnquidon, Chonoadtemaid ushēn Esusèn bēdamenushe. Isnu, quequin padiseyobon caimbededpanēdash. ⁸ Aden cainubien abi chieshēnquidon tantiaid tantiaquin mēuesadaid isquin: —Nēnantanquio nidto —Esusèn cac mēuesadaid nēnantanquio nidtoash nidpanēdash.

⁹ Adsho isashien: —Tantianu. Chui. ¿Chonoadtemaid ushēn matses tantiaquindambi bēdamboen nape? ¿Adoenquiocquindambi bēdametemaid ushē nēid neque? ¿Mibi nēbi bēdametiapimbo iquebi, quequindambi chuipe? ¿Adoac daicsaid utsi-utsec unēssec? —quepanēdash Esus.

¹⁰ Aden chuishumbic iccuededquido isbanquin: —Ěbi mēd —cac Esus mēdequi mēuesadaid bēdampanēdash.

¹¹ Adē mēuesadaid bēdansho isashien comapenec nēishash: —¿Mitsipadentsimbi Esus acpe? —quec onquecuededpanēdash abi chieshēnquido.

Esusèn, Ěbi chuibeneta, caido

(Mat 10.1-4; Mad 3.13-19)

¹² Adashic, ushē utsin macuēsh yacno matses nibēdacno Nuquin Papa chiec onquenuec nidash inchēshēn ushenquio yec Nuquin Papa chiec Esus onquepanēdash. ¹³ Badiadshun abēd icquido dadpen chomeshun, Ěbi chuibeneta, quequin 12tedictseqi chuipanēdash.

¹⁴ Nēidic, Simon, Esusèn Petedo caid; utsibic, Andedes, Simonēn utsibi; utsibic, Acobo; utsibic, Uan; utsibic, Uedipe; utsibic, Badtodome; ¹⁵ utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaid-pembo bunesa; ¹⁶ utsibic, Udas, Acobon mado; utsibic, Udas Iscadiote, yuecshun Esus chieshēnquido Esus bēdmequid. Aidtedi, Esusèn, Ěbi chuibeneta, caido icpanēdash.

Nuquin Papan bēdamboen isaïdo icnuc ambi icsamboen isaïdo

(Mat 4.23-25; 5.1-12)

¹⁷ Adashic macuēsh yacnoēsh abēd 12ted icquido pada-padambo yacno budash abi tsibanquido dadpen icsho isash Esus nidtuidpanēdash. Nēidted icpanēdash: Nēidic, Edusaden yacnoēsh choquido; utsibic, Acte Dapa cuēman shubu dadpen icquid Tido caid yacnoēsh choquido; utsibic, Sidon caid yacnoēsh choquido. Aido Esusèn chuibansho tantianuec chochoash tabadnubi, Ěbi bēdamepec, quequin tantiec utsibo choash tabadpanēdash. ¹⁸ Adec choquido mayan icsa dapuduedaid icsho isun Esusèn dapuduemepanēdash. ¹⁹ Adsho isun nadatiambocquid Esus neque. Mishnu, qeshun mishequi bēdancuededpanēdash.

²⁰ Adshumbic abēd icquidombo isbanquin naden Esusèn chuibanpanēdash:

—Nëmbo mibi icnuc mitsana nibëdtenesho isun Nuquin Papan bédamboen isaïdo iquec abuc nidan con natedi mitsana nendac.

²¹ “Nëuëshquïo bundodenesho isun Nuquin Papan bédamboen isaïdo yec abuc ëbëd tabadec bundoesa iquendac.

“Nëuëshquïo mates Nuquin Papan chiaïd tantiesa icsho isash unëshquïo yec shubided-nequid Nuquin Papan bédamboen isaïd yec abuc nidash ëbëd tabadec bédambo iquebi quependac adquïdo.

²² “Esus tantiaquïd icsho chïeshënquïn pudued cainquïo yaïd adembïdi mua uaquïn chuïshunaid Nuquin Papan bédamboen isaïdquïo nec.

²³ “Adomboembïdi ëmbï ëndenquïmbo chuïmiaïd aton matesën icsamboen chuïshundeni-ampic. Adomboembïdi mibi min matesën icsamboen chuïshundenetsïash. Nïdaïdënshun adoaid iquec Nuquin Papa yacno choacsho ambi bédambo icmiaïd mibi iquendac. Adquïd iquendabi quequïn tantiec mibi icsamboen chuïshunaquï, Cuïshon, queta.

²⁴ “Padnuen, con na dadpen iquec, quequïn tantiec bédamboec tabadebi, qesho Nuquin Papan icsamboen isaïdo mibi nec. Nïdaïdënshun mimbi bedeniaïduïdi tantiec Nuquin Papa yacno puduedtiapimbocquïd mibi iquendac. Nïdaïdën bédamboec tabadquïn ënden bedondaïdi mibi nec.

²⁵ “Nïdaïdënshun abi bunaidtedi bedquïdo Nuquin Papan icsamboen isaïdo nec. Abi bunaiduïdi tantiaquïn Nuquin Papan chiaïd tantianu qeshun tantiatiapimbo iquendac.

“Mitsanauidi tantiec, Bédambo iquebi, quec mamë nec tabadquïdo icsho Nuquin Papan icsamboen isaïdo mibi nec. Adquïdo Nuquin Papa yacno puduedte bunsho, Padi, cac shubiiquendac.

²⁶ “Bédambocquïd nec, quequïn mibi dadpenshun chuïsho tantienda. Adomboembïdi mua uain Nuquin Papan ëndenquïmbo chuïmiaïdpembon chuïpampic. Aidon chiaïd tantiashun tsusedpabon Nuquin Papan chiaïd tantienquïo yanampic. Adquïdo Nuquin Papan icsamboen isaïdo nec —quepanëdash Esus.

Mibi uïmanëquïdo tantiaquïn nabanta, quiaïd

(Mat 5.38-48; 7.12)

²⁷ Aden chiashic abi Esus onquec: —Ëmbï chiaïd tantiaquïdquïo nad iqueque. Chuïnu. Tantiata. Mibi chïeshënquïdo bédamboen tantiaquïn nabanta. ²⁸ Adembïdi mibi icsamboen chuïquïd bédamboen chuita. Adembïdi, ëbi icsamboen naquïdo bédamboen tantiaquïn cuidanda, Papa, quequïn Nuquin Papa chuita. ²⁹ Adembïdi mibi cuesquïd cuidanda. Adembïdi mibi icsamboen nadenesho cuidenquïocquïn adembï bédamboen nabanta. Adembïdi ampequïn min dashcute bedanec nidsho isun, Chiata. Dadamicquïdtsen buan, cata. ³⁰ Utsibic, aton na nibëdquïd, Bec cho, qesho meneta. Adembïdi utsin mitsana ampesho isun cuidenquïocquïn bédamboen naoata. ³¹ Adembïdi ëbi bédamboen nashuntiadquïdi nepec quequïn mimbi tantiacpadomboen utsi tantiaquïn nashunta.

³² “Ëbëd tantiananquïduïdi tantianu, quec ðbédamboda mibi icpe? Padenquïo. Adembïdi Esus tantiesan abipadquïocquïdo tantiec. ³³ Adecbïdi, Ëbi bédamboen tantiaquïn nashunquïduïdi tantiaquïn nashunoanu quec ðbédamboda mibi icpe? Padenquïo. Esus tantiesan adembïdi nashunquïdquïo nec. ³⁴ Adecbïdi, Ëbi menequïduïdi menenu, quec ðbédamboda mibi icpe? Padenquïo. Esus tantiesan adenuïdi menec. ³⁵ Naden nata, quequïn chuïnu. Tantiã. Mibi chïeshënquïd icsho aid tantiaquïn bédamboen nabanta. Adembïdi mibi meniantiapimbocquïd, Bec cho, qesho, Yuecash cuidnanun nanuna, quenquïocquïn meneta. Mimbi adosho isun Nuquin Papan mibi bédamboen isendac. Adobanec bédambo iquebi quec mibi tabadendac. Adomboen nabanquïdo Nuquin Papan nacpadomboen nabanquïd nendac. Adquïdo aton mado iquendac. ³⁶ Nuquin Papan abi chïeshënquïdo nashundeniacpadomboen mibi chïeshënquïdo nashundeneta —quepanëdash Esus.

Icsambocquïd nec, quequïn chienda, quiaïd

(Mat 7.1-5)

³⁷ Aden chuïbanashic Esus abi onquec: —Ëmbï tantiacpadomboen naisa icsambocquïd nec, quenda. Adesa abi yacno choacsho Bédambocquïd neque. Puduedme, Nuquin Papan caindac. Adecbïdi, Icsambocquïd iquec. Aid cuidtiadquïdi Nuquin Papa nec, quenda. Adenquïo icsho Nuquin Papan cuidenquïoctequïd mibi iquendac. Mibi icsamboen tantiaquïn utsin nasho isash cuidnanenquïo yec bëpiscudta. Adquïd, Cuidnu, quenquïo yec mimbi icsamboen tantiaquïn naid Nuquin Papa bëpiscudendac. ³⁸ Aton na nibëdquïd bédamboen tantiaquïn meneta. Adembïdi, mibi tantiaquïn abi utsibëd bédamboec tabadtequïd Nuquin Papan mibi menendac. Utsi tantiaquïn mimbi meniacpadomboen mibi tantiaquïn bédamboen tabadmetequïd daëd uashun Nuquin Papan mibi meneoaindac —quepanëdash Esus.

³⁹ Aden chuishumbic utsin tantienquo ictequid abêd icquido naden Esusên chuipanêdash: —¿Podquedên nidnu quec bêshuaid utsi bêyucampecta nidtic? Nidnu, quianec nidec abi daêdi nidaid shêcuê ampaêdpatsiash. ⁴⁰ Adembidi tantianuequidên abi tantiamequid dêniactiapimbo iquec. Tantiamic abi tantiamequidpadquid iquendac —quepanêdash Esus.

⁴¹ Adoshombic ademi tantiamequin naden Esusên chuipanêdash: —¿Atotsi quiash utsi bêtsiadaid pistsêcquid isequi mibi bêtsiadaid dapa isadtiapimbo icpec? ¿Mibibi bêtsiadaid dapa bêbedadabicquin mitsipadentsi mimbî utsi bêtsiadaid pistsêcquid bedshunuen ispe? ⁴² Adembidi, utsin tantiaid icsa abentsêc icnubien mimbî tantiaid icsa utsi-utsiec icnuc ¿atotsieshun, Mimbî tantiaid icsa ênta, quequin utsi chuipe? Mimbî tantiaid icsa nibêdacimboen mimbî chuipeque. Adoenda. Mimbî tantiaid icsa ênshun utsin tantiaid icsa icsho isun êmenuequin chui —capanêdash Esusên.

Cuête abipadquid aton bacuê nec, quequin chiaid
(Mat 7.17-20; 12.34-35)

⁴³ Adoshombic, adembidi Esusên chuipanêdash: —Cuête bédan bacuê adquiobidi bacuê. Cuête icsan bacuê adquiobidi bacuêoac. ⁴⁴ Chetequid isun cuête dada matsesên tantiec. Aden tantiec nisanquidên bacuê isash, Dadain bacuê nec, quenquo matses iquec. Adecbidi, echo bacuê isash, Bata nec, quenquo matses icoac. ⁴⁵ Adembidi bêdamboen tantiaquidên ambi tantiacpadomboen utsi bêdamboen tantiaquin nabanendac. Adecbidi ambi tantiacpadec bêdamboec onquec. Adembidi icsamboen tantiaquidên ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanêdash Esus.

Tantiaquidquo icnuc tantiauidquid nec, quequin chiaid
(Mat 7.24-27)

⁴⁶ Adoshombic: —¿Atotsieshun, Con Icho mibi nec, qeshumbi êmbi chiacpadomboen naisa mibi ne? ⁴⁷ Êbi yacno choshon êmbi chuibansho tantiaquiash nidshun nadomboen naquidquo iqueque. Chuinu. Tantiata. ⁴⁸ Cunquequid dapan chimeshnushe qeshun shubu uaquidên shêcuê êquêduc uêdêshcashun buintad nitsinquid. Adembidi, natiamianquec cametequid yanabicnuc tantesa uainquiocnuen êbi tantiaquidquo icquin êmbi chiaid papudedshun adomboembidi nabanquid nec. Adquidên tantesa uainquo iquendac. ⁴⁹ Utsibic nad iqueque. Tantia. Êquêduc uêdêshcabi nitsinaid cunquequid dapan chimeshunendac. Adecbidi, êmbi chiaid papudeduidtsacpadomboen nabanenquo yec natiamianquid chonoc abi papudeduidtsaid bêpiscudendac. Adquid uquê nêsecatequid nendac —quepanêdash Esus.

7

Sondado chuiquidên tantiaid
(Mat 8.5-13)

¹ Aden iccuedequido chuiquin nainash Capednaun caid yacno Esus nidoapanêdash. ² Capednaun caid yacno choash Esus tabadnubien isadaidpembon sondado chuiquidên yua abi cudasaid unêstiadsêcquio icpanêdash. ³ Aton yua unêstiadsêcquio icnubien, Nênquid bêdamequid Esus nêmbobi iquec, quequin utsibon chiac:

—Aidên con yua bêdametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanêdash sondado chuiquid.

⁴⁻⁵ Adoaquien: —Ai —quianec Esus yacno isadaidbo tsusiobo nidshun chuituidec: —Sondado chuiquidên chuitan caido nebi. Con yua unêstiadsêcquio iqueque. Esus bêdamequid neque. Chuitan, cac mibi chiec chobi. Sondado chuiquid bêdambocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bêdametiadquidi mibi nec —quepanêdash isadaidbo tsusiobo Esus caic.

Adoac aidobêdi Esus nidpanêdash. ⁶ Adec aidobêd Esus nidshobi sondado chuiquidên chomiaid utsibo choquin bêquedtuiddash nadpanêdash: —Sondado chuiquidên chomiaid nebi. Aidên chiaid chuinuec chopobi. Naden chuita, caposhi: “Padicnuna, Icho. Icsambocquid nebique. Mibi bêdambocquid iquec con shubun puduedenquiocquid mibi nec. ⁷ Êbi icsambocquid iquec mibi bêquedec nidenquiocobi. Mibi bêdamequid yec con shubun puduedenquiocquid mibi yacnoshombi, Bêdanta, mimbî cac con yua bêdampec. ⁸ Êbien sondado chuiquid nec. Êmbi nidta cacpadquiequi sondado nidec. Adecbidi, Cho, êmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidên cacbopademi mibi chuipombi —quepanêdash sondado chuiquidên chuitan caido Esus caic.

⁹ Adoquien: —¿Abimbobida cai? —queshun ambi chiaid tantiamenuequin iccuédquido Esusën bëisbanquin nadopanëdash: —Chuinu. Tantiata. Sondado chuiquid isadaid-pembo ëbi tantiaquidpadquid isadaidbo nibëdec —quepanëdash Esus. ¹⁰ Aden chiaquien sondado chuiquidën chuitan caido auchbidi nidoash shubun puduedshun sondado chuiquidën yua bëdamiaid istuidpanëdash.

Nianten mado uincuen uaid

¹¹ Adashic, ushë utsin shubu dadpen icquid Nain caid yacno Esus nidpanëdash. Aidbëdi abëd icquido nidpanëdash. Adecbidi matses utsibo dadpen nidpanëdash. ¹² Adec nidequi Nain tsasi uaid quënë shëcuë anoentsëqui choquimbi unësaid bëquido bëqueduidpanëdash. Unësaid epa icnubi ani niantepanëdash. Niantebëd Nain yacnocquido dadpen chochopanëdash. ¹³ Adec cho-choec niantepanëdash. Niantebëd Nain yacnocquido dadpen chochopanëdash. ¹⁴ Adec, Ènëd, quetanec uidictëc nidshun unësaid nanaid Esusën mishnubi abi bëquido nidtuidpanëdash. Niduidsho isun: —Abuido, uëtsëdtota —cac ¹⁵ uëdtsëdtoash tsadec unësaidboed onquepanëdash. Adsho isash ani caic: —Në, unësaidboedi min mado uincuenoshe. Abëdi nidec nid —capanëdash Esusën.

¹⁶ Aden unësaid uincuemesho isash cho-choquido: —Adopenshenda uincuemec —queshun Nuquin Papan naid chuibanpanëdash. Aden chuibanec: —Nuquin Papan matses bëdamboen isnuen ambi chomiaidquio nuquibëd icmiosh —quec isquido onquecuedepanëdash.

¹⁷ Aden isash nidshun unësaid uincuemiaid isquidon chuibancho isadaidbon nidaid Udeya caid yacnocquidon tantiabempanëdash. Adembidi chiac dëuequidontsen tantiabempanëdash.

Ëbitedishun cainaid mibi nec, quequin Uanën chiaid
(Mat 11.2-19)

¹⁸ Adnubien, acten mentoanondaid Uan cuëmëdquid quënë nauedaid icsho abëd icquidon Esusën nabanaid chuibanpanëdash. Adoquien abëd icquido daëd chomeshun Uanën nadopanëdash: ¹⁹ —Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenec, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

²⁰ Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenec ¿Adambi utsi caimpe?” quiosh Uan —quepanëdash Uanën chomiaido Esus caic.

²¹ Aden chiaquien icsambocquid bëdamequinc, mayan icsa dapuduedaid dapudue-mequinc, bëshuaid bëdamequinc caquin Esusën ismëbampanëdash. ²² Aden nabanquin nainashic: —Mibi chuiquid Uan caid yacno nidshun ëmbi nabamobedtedi mimbis isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bëdanosh. Adembidi pashun tantiabenossh. Adembidi unësaid uincuemiosh. Adembidi aton na nibëdquido tantiamenuequin Nuquin Papan chiaid Esusën chuibanosh, quequin Uan chuitanta. ²³ Èmbi aden nabansho isun tantesa uainquiocquin Nuquin Papan bëdamboen isaidquid nendac, Esus quiosh quequin Uan chuitanta —quepanëdash Esus Uanën chomiaid daëd chiech.

²⁴ Adashic, Uanën chomiaido nidambi iccuededquido tantiamëbanuec Uan chiech Esus nadpanëdash: —¿Atotsi isnuec matses nibëdacno nidonda? ¿Cunquequidën ishcuinaid isnuecta nidtonda? ²⁵ ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta nidtonda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. ²⁶ Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Èbi ëndenquimbo chuiquido ëbi isesabo icpampic. ²⁷ Èbi cain naden Uan Nuquin Papan chuimiampid nec: “Mibi choec quequin chuibanquidba chomëmbi.

Mibi choec quequin chuibanac ambi tantiaid icsa ënshun mibi cainquidombo iquendac.” Aden ëbi cain Uan chuiquin dada uapampid nec.

²⁸ “Adëmbi Uan chuibanu. Tantiata. Nuquin Papan chuimiaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquio icpash. Isash, Nëid Nuquin Papan chomiaid nec, quetsemposh Uan. Aidi quënë nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanëdash Esus.

²⁹ Aden Esusën chuibansho tantiash: —Nuquin Papan naid bédambo iquec — quepanédash Uanën mentobanondaido. ³⁰ Utsiboen ambi tantiaid icsa énenquo icquin Uan Esusën chuisho tantiash, Nuquin Papan naid bédambo iquec, quetiapimbo aido icpanédash. Aido padiseyobobéd matsesën naden nata quequin chiaid tantiamequido icpanédash.

³¹ Aden Uan chiash Esus: —¿Nuquin Papan chiaid nëbi chuisho tantiesha mitsipadquid nepeque? ³² Adquid chinu. Tantia. Ambi tantiacpaden naisa icsho isash bacuëbo yacimboec nëishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquo iquec. Adquidën Nuquin Papan chuimaidën nabansho icsamboen ispec. ³³ Nua cubudquin pesa Uan icsho isash, Mayan icsa dapuedaid nec, queposh Uanën chuisho tantiesha. ³⁴ Èmbi peshun acsho isec, Nua peshun tantienquiocquin acquid nepec. Aidbidi icsambocquidobéd icquid nec, èbi caposh. ³⁵ Aden tantienquiocquid, Bédamboen tantianu, queshun bédamboen tantiaquidënquo chuibansho tantiash abi tantiamequidpadquid iquendac —quepanédash Esus.

Chidon Esus tanoshcaid

³⁶ Adashic, Èbi yacno pec cho, padiseyobo abentsëcshun cac aidbéd nidash shubun puduedash pete santen cuëshnudash Esus uepanédash. ³⁷ Adec Esus puduedash uesho isquidon chiac utsin, Icsambocquid nec, caid chido choquin noadte bēda danoshquete aton shubumpichobi bēpanédash. ³⁸ Aden bēequi Esus yuedacno choash puduedshun abi bēdamequid Esus istuidash, Èbi bēdamequid bēdambo iquec, quequin ambibi tantiec shubiec Esusën taēno tsadbudshun aton bēunën tapascapanédash. Aden tapascac taē chucusho isun aton manēdaidën taucshun taē tachoccabanshun noadte bēdan chidon tanoshcapanédash. Chidon aton na bedtequid dadpen menequin comapenec noadte bēda bedshun Esusën taē tanoshcapanédash chidon.

³⁹ Chidon adosho isash Esus yuedquid, Simon caid, abibi onquec: “Èmbi yuedaid Nuquin Papan chuimaid iquec, Èbi mishquid icsambocquid nec,” quequin chido mishmenquo icpec, quepanédash Simon.

⁴⁰ Adoaquien, tantiaquidquo icquin Esusën: —Mibi tantiamequin chinu. Tantiata, Simon —capanédash.

Adoaquien: —Aden chuiban. Tantanu —quepanédash Simon.

⁴¹ Aden tantiashun Esusën Simon ambi tantiaid icsa tantiamenuen utsi chuiquin nadopanédash: —Bec cho. Yuecshun menenun nanuna, quepondash daēd. Abentsëcshun dadpen bedshunubi utsin daēdpectsëc bedshumpondash. ⁴² Aden bedshunshun yuecshun ambi bedshunacti abi daēdi meniantipimbo icpondash. Adsho isun: “Padī. Mimbi bedondaid èbi cuidenda,” quequin abi bedshunēdaidën abi daēdi chuipondash. Adoacsho, ¿Mitsiquid abi bedshunēdaid énenquiocquin tantiec bēpiscudenquo icpec? —quepanédash Esus Simon caic.

⁴³ Adoaquien: —Ambi dadpen meneshun cuidenda caidien nechitec —quepanédash Simon.

Aden chiaquien: —Ai, bēdamboen tantiaquin mimbi chioc —quiash ⁴⁴ Simon ismenuec Esus chido yacmi bidadshun naden chuipanédash: —Min shubun puduedacsho mimbi taē pante èbi menenquiococ. ¿Nēid chido isquindactio? Aidëmbien aton bēunën taē chucu uashun aton manēdaidën con taē bēchishaid ucposh. ⁴⁵ Min shubun èbi puduedsho isun tanhoccanesa mibi nec. Padnueni èbi puduedacsho isun nēid chidon èbi tantiaquioquin yuen con taē tachoccaniosh. ⁴⁶ Bēchin manoshcanesa mibi iccoc. Padnueni nēid chidombi noadte bēdan tanoshcaniosh. ⁴⁷ Adembidi mibi chiembique. Tantiata. Mayan icsa dadpenshun tantiamiaid icsho nēid chido bēdamepombi. Aden bēdamiashic abi icsaid tantienquo yec bēpiscudpobi. Èmbi aden nac èbi comapenen tantiaquioquin èbi nashunquidquo nēid chido nec. Padnuen utsi icsaid daēdpectsëc mibi icsaidtedtsëcbidi icpec. Adquid icsaid bēpiscudebi èbi quenuc èbi bēdiactsëc tantiatsec mibi nashumēnec —quepanédash Esus Simon caic.

⁴⁸ Aden Simon chiashic chido caic: —Icsaquid nec, quenquiocquin icsainquo yacimboecquid mibi isembi —quepanédash Esus chido chuioaic.

⁴⁹ Adsho tantiash: —Icsainquo yacimboecquid mibi isembi, quec ¿mitsipadquid Esus nepec? —quepanédash iccuededquido. ⁵⁰ Aden iccuededquidon tantianubi chido caic Esus: —Èbi tantiaquid yec Nuquin Papa yacno puduedquid mibi neyoc. Bēdamboec tabadaid tantiamiaid mibi iqueque. Dacuēdenquo yec nidta —quepanédash chido caic.

¹ Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yacimboec nidaidën tabadaid chuibenepanëdash. Abi bédamequid tsibananec chidobo nidpanëdash. ² Ambi mayan icsa dapuduemiaidobëdtan ambi bédamiidon Esus tsibanampanëdash. Madia, Macada yacnoshon tishaid chedon Esus tsibanampanëdash. Mayan icsa 7ted dapuduemiaid Madia icpanëdash. ³ Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(*Mat 13.1-23; Mad 4.1-20*)

⁴ Aden chuibeniash tabaduidtsëcnubi ambi chuiquin tantiambeodo cho-choquin tsibanampanëdash. Cho-chosho isun, Mibibimboecnuc chiemi, quenquiocquin Esusën nadopanëdash: ⁵ —Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec. ⁶ Utsibic, cuënote dadpen samëdacno secac badedquido dëyucuidtsash nidaid ëquëduc tapun nidenquido iquec bidiquequid. ⁷ Utsibic, nisanquid dëyucacno secac aidbëdi dëyucash canidouidsacsho nisanquidën bëtinaç unësquid. ⁸ Utsibic, nidaid bëdan secac dëyucash caniaash dadpen ëshëendac —quepanëdash Esus.

Aden chuibanashic: —Tantiate bédambocquidën ëmbi chuiboed tantiapec —quepanëdash.

⁹ Adoquien: —¿Mitsipadquid tantiaid mimbi chuiboed icpec? Èbitedi tantiamequin chuiioa —capanëdash abëd icquidon.

¹⁰ Adoquien: —¿Mitsipadequini Nuquin Papa yacno tabadpe? queboedëmbi nëbi mimbi tantienec. Padnuec utsibon tantienquido yaid aid iquec. Aden chiac:

“Èshë bédambocquid icquimbi tantiesa icquin ma Nuquin Papa yacno isenquiocpanuna. Adembidi tantiate bédambocquid icquimbi tantiesa icquin ma abimbo chiaid tantienquiocpanuna”

—quepanëdash Esus.

¹¹ Aden chiashic: —Èmbi chuiboed nad iqueque. Tantia. Chuiinu. Tiedën caniquid pete ëshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. ¹² Podquedën nidaid tsasimbocquidbimboecquid nad iquec. Nuquin Papan chiaid tantiaash papuduedtiapimboçsho Satansën bëpiscudmiaid adquid nec. ¹³ Cuënote dadpen samëdacno nidaidbimboecquid nadquid iquendac. Nuquin Papan chiaid tantiaash, Bëdambo iquebi, quiaashic natiamianquieç cametequid icnuc aid tantieç Nuquin Papan chiaid papudueduidquid iquendac. ¹⁴ Nisanquid dëyucaid dadpen yacno nidaidbimboecquid nad iquec. Nuquin Papan chiaid tantiaash abi bunaid, abi nënaid, ambi natequid adquid tantiaquin Nuquin Papan chiaid bëtashacimboec icnuc bédamboec tabadaid ismesa yampec. Aden bédamboec tabadaid ismesa yanuc utsin Nuquin Papan chiaid tantiatiapimbo iquendac. ¹⁵ Nidaid bédabimboecquidien nad iquec. Nuquin Papan chiaid tantiadonec bédamboec tabadquin utsi ismequidquido nec. Adquid natiamianquid chonoc tantesa uainquiocquin ënenquiocquin ismendac. Aden ismiac Èsus tantiaquid utsi dadpen yampec —quepanëdash Esus ambi chuiboed abëd icquido tantiamenuc.

Tabote nënantan nanac chënquiacbimboecquid

(*Mad 4.21-25*)

¹⁶ Aden chuishumbic naden Esusën chuiioapanëdash: —Tabote taboshon matsun bëtashesa. Adembidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid. ¹⁷ Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquido yaid aidëmbi chuibanendac. ¹⁸ Ad icnuc ëmbi chiaid bédamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadec tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bédamboen tantiembi, qeshun papuduedmenquiocquin bédamboen ismesa nec. Aden ambi tantiauidaid uesadendac —quepanëdash Esus.

Aton utsibo aton titabëd choaid

(*Mat 12.46-50; Mad 3.31-35*)

¹⁹ Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Èbi choaid chuita, cac ²⁰ shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

²¹ Adoaquien: —Adquid chuinu. Tantia. Nuquin Papan chiaid tantiaishun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanëdash Esus.

*Acte tēccoasquesho ënëdmiaid
(Mat 8.23-27; Mad 4.35-41)*

²² Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash. ²³ Adec nidec cano anuequi Esus ushtopanëdash. Adec ushnubien cunquequid dapa comapenec cunquenubi acte tēccoasquequidën acte uemiac cano mentoadtsempanëdash. Adsho isash dacuëdec ²⁴ Esus ushacno nidshun tinec abëd icquido: —Nuqui mentoadeque. Isucun, Icbo —quec comapenec cuëdpanëdash abëd icquido. Adsho tantiaish isucunash nidtoshon: —Mibi comapenec cunqueque. Ënëd —Esusën cac cunquequid badedquio ënëdpanëdash. Adembi: —Mibi comapenec tēccoasqueque. Ënëd —Esusën cac badedquio acte tēccoasquequid ënëdoapanëdash. ²⁵ Aden ënëdmetanec: —¿Atotsi quiash ëbi tantienquio yec dacuëdcedede? —Esusën caquien abëd icquido dacuëdcededquiequi, ¿Mitsipadquid nepec? Cunquequidbëdtabi acte tēccoasquequid ënëd cacpadequi ënëdchitosh, quec abëd icquido abibi onquecuededpanëdash.

*Mayan icsa dapuduedaid dapuduequin bëdamiaid
(Mat 8.28-34; Mad 5.1-20)*

²⁶ Adshumbic, acte tēccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash. ²⁷ Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuëc cuënote yacno tabadpanëdash. ²⁸ Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien ²⁹ mayan icsa chuiquin: —Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

³⁰ Adquid nec, quequin tantiaquin Esusën: —¿Ttsutsi cuëmëdquid mibi ne? —capanëdash.

Adoaquien: —Sincó midted dapuduedondaid nebi —quepanëdash mayan icsa dapuduedaid onquec. ³¹ Aden chiasic: —Mibi bëdamboquid cadoque. Ënenquiocquin mëyanacno cuidnequin ëbitedi idmenda —quiashic ³² chanco dadpeshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoaquien: —Aido dapuduedtan —Esusën cac ³³ dapuduenequi chanco mayan icsa dadpen dapuduedash acte quiusudacno chanco comapenec niquec chian pudunpudunec mentoadbudnec nibëdquiec unësbunepanëdash.

³⁴ Adsho isash chanco pemequin isquido titinquianec shubu dadpen yacno choshon ambi isboed chuituidac ³⁵ anocquido istanu quianec Esus yacno cho-chopanëdash. Adec choshon mayan icsa dapuduequin bëdamiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcededpanëdash. ³⁶ Dacuëdsho isun mayan icsa dapuduequin bëdamiaid isquidon ambi isboed dacuëdquido chuipanëdash. ³⁷ Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

³⁸ Adsho isun: —Mibëd nidtiadquio iquebi —quepanëdash ambi mayan icsa dapuduequin bëdamiaid Esus chiec.

³⁹ Adoaquien: —Padí. Min shubuno nid. Ambo tabadquin Nuquin Papan naid mayan icsa mibi dapuduedaid dapuduequiaid anocquido chuibanta —quianec Esus canon nidpanëdash. Aid nidnubien mayan icsa dapuduequin bëdamiaid nidanec aton shubu yacno choshon anocquidtedi Esusën naid abi mayan icsa dapuduequin bëdamiaid chuibanoapanëdash.

*Chido intac budaid bëdanaid icnuc champi uincuemiaid
(Mat 9.18-26; Mad 5.21-43)*

⁴⁰ Adashic chian potiaish cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. ⁴¹ Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: ⁴² —Con champi abentsëc tishaid unësanekidquio iccosh. Aton seta 12ted icquid niosh. Ëbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquoio yec Esus dat-sidadpanëdash. ⁴³ Adnubien, chido seta 12ted matamec intac budaid chopanëdash. Aidi dauëchoquid dadpenshun bëdametiapimbo icpanëdash. ⁴⁴ Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquoio bëdampanëdash.

⁴⁵ Aden mishac: —¿Tsuntsimbini mishosh? —quepanëdash Esus. Aden chuisho tantiasch abi datsidash capuquido mishambo yec otacquoio tabadcuededpanëdash. Adec tabadnubien: —Matses dadpenshun tsucus-tsucustsëcquiocquin mibi cuëscabededec —capanëdash Petedon.

⁴⁶ Adoquien: —Matses abentsëcshun ëbi mishosh. Ëmbi nadatiambocquin natequid bëuesadtsac —quepanëdash Esus.

⁴⁷ Adec Esus onquesho tantiasch chido, Ambi tantiacpadomboen ëbi isec, quec abibi onquequi dacuëdec uedëquequi Esusën taëno uebudtuidpanëdash. Adec uebudec dat-sidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

⁴⁸ Adoquien: —Mimbi tantiacpadquiec mibi bëdanaye. Dacuëdenquoio yec bëdamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

⁵⁰ Aden chuisho tantiasch: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

⁵¹ Aden chianec Aidon shubuno nidash cho-choquidotedi, Ëbëd puduedenda, quequin chianec Petedo, Uan, Acobo aited buanec Aido cuëmëdquidën champi yacno Esus puduedpanëdash. ⁵² Ambo puduedshun anocquido unësquoio yec shubisho tantiaschun: —Mibi shubieque. Ënëda. Champi unësenquoio yec usheque —capanëdash Esusën.

⁵³ Adsho tantiaschun, Champi unësacsho isombi, quequin Esus tantienquiocquin shubiquidon mamënshumbededpanëdash. ⁵⁴ Mamënshumbedednubi Esusën Aido cuëmëdquidën champin mëdante mëdinquin: —Nidto, champi —comapenen cac ⁵⁵ aton tiboedte unësabi yec champi badedquoio nidtopanëdash. Champi nidtosh isash: —Peme —quepanëdash Esus. ⁵⁶ Aton champi nidtosh isash: —Adopenshenda iquec —quepanëdash ani amëbëdi.

Adoquien: —Mimbi isboed chuibanenda —quepanëdash Esus.

9

Esusën ëbi chuibeneta, quequin ambi nidmiaido
(Mat 10.5-15; 14.1-12; Mad 6.7-29)

¹ Adashic ambi ëbi chuibeneta caido 12tedtsëqui chometanquin Esusën nadopanëdash: —Ëmbi nadatiambocquin nabanacpaden mibitedishun nabanendac. Mayan icsa dapudue-mequinc daicsaido bëdamequinc cain mibi capucueniacnoshon mimbi ismebenendac. ² Nibë mibi nideque. Adec capucuenequin chuibenequimbi bëdamebeneta. ³ Nidquin cueste uidën nidte buanenda. Shictoadte buanenda. Petequid buanenda. Mitsana bedtequid buanenda. Dashcute utsi buanenda. Buanenquoio yec dadauidquoio nidtan. ⁴ Adec nidash mibi yuedquidën shubun puduedshun ëmbi chiacpadomboen nabanec anouidi tabadta. ⁵ Mibi nidacno mibi yuedquid nibëdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta —capanëdash Esusën abëd icquido chuiquin.

⁶ Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papabëd tabadaid chuibanquimbi daicsaido bëdamebenepanëdash.

⁷ Adnubien Esusën nabansho isquidon Edodes chuibanpanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantiaschun, ¿Tsudain nepec? Edodesën caquien,

Acten mentoanondaid, Uan cuëmëdquid uincuempash icnui, quenubien; ⁸ Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanëdash, quequin chuipanëdash Esusën nabansho isun chuiquidon Edodes tantiamequin.

⁹ Adoquien: —Mambi uincuentiapimboconoc Uan mapi budtemiondac. ¿Tsudain ëmbi tantiacmãidquoio adobanquid icpec? —quiashic Esus iste bumpanëdash Edodes.

Matses dadpen pemiaid
(Mat 14.13-21; Mad 6.30-44; Uan 6.1-14)

¹⁰ Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibanansho tantiasch Esus abëd icquido bëyucanec

shubu dadpen icquid Betsaida caid anoentsèqui nidpanèdash. ¹¹ Aido nidsho isun cho-choquidon tsibanampanèdash. Adsho isun Esusèn Nuquin Papa yacno tabadaid chuibanquimbi daicsaido bédamepanèdash.

¹² Adashic ushè budtsan Esusbèd icquidombo Esusèn dayunquio choshon: —Nèmbob shubu nibèdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanèdash Esus chuiquin.

¹³ Adoaquien: —Padi. Mimbibi aido pemeban —capanèdash Esusèn.

Aden chiaquien: —¿Ma nèmbobi panèmpi mèdante auc abentsècted icnubi nuècquid daèd iquec. Aidtedtsèqui icsho isunda cho-choquidtedi pemenuequin èbitedi bedtan, cai? —quecuedepanèdash abèd icquido.

¹⁴ Ambobi tabadsho chido bacuèbobèdtabi tambanenquio icquimbi dadauidquio, 5000ted icnuc tambampanèdash.

Adoaquien: —Nèidtedi uano 50ted-50tedquien tabadme —Esusèn cac ¹⁵ ambi chiacpadomboen tabadmepanèdash. ¹⁶ Aden tabadmesho isun panèmpi Stedbèdta nuècquid daèd sananquin abuc isec: —Mibi bédambocquid icquin mimbi meniaid nèid pete nec, Papa —quec onqueshun pete cuèsh-cuèshun: —Meneban —Esusèn caquien abèd icquidon menebampanèdash.

¹⁷ Aden menebanac piash cubudambic napi uaid sandobanquin tsitsan 12ted icnuc Esusbèd icquidon bedbampanèdash.

Chuiquid dapa abentsècquiobi iquec, quiaid

(Mat 16.13-19; Mad 8.27-29)

¹⁸ Adashic, matses nibèdacno abèd icquido icnubi Nuquin Papa chiec Esus onquepanèdash. Adec onqueshumbic: —¿Tsutsi èbi tsibanquidon èbi capec? —capanèdash Esusèn.

¹⁹ Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanèdash abèd icquido.

²⁰ Adoaquien: —¿Ma, mimbi, tsutsi èbi cape? —capanèdash Esusèn.

Adoaquien Petedo: —Chuiquid dapa abentsècquiobi, Nuquin Papan chomiaidquio yec Quidistu caid ma mibi neyoc —quepanèdash.

Abi unèste chiaid

(Mat 16.20-28; Mad 8.30-9.1)

²¹ Adoaquien: —Mimbi èbi tantiaid nèbi utsi chienda —quepanèdash Esus comapenen chiec. ²² Aden comapenen chiashic Esus: —Èbi matsesaid icsho natiambocquin mèyanatequid iquendabi. Èbi chieshènquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiamequido yec quec aidtedi èbi chieshènquido nec. Aidon naden chiendac: ¿Esus chuiquid dapa abentsècquiobi Nuquin Papan chomiaidta nedic? Aidpenquio nec, quequin èbi cuesunependac aidombi. Adoaquini daèdec ushacsho uincuen uaindac —quepanèdash Esus abi uincuen uate chiec.

²³ Aden chiashic: —Èbi tantiaquid icnuequin ambibi tantiacpadomboen nainquicoquin èmbi chiacpadomboen nabantiadquidi nec. Èbi mèyanacpaden mèyanuc unèsmene quenquidocquin tantesa uainquocquid. Èbi tantiaquidquio iquendac adquid. Nidaidèn tabadaiduidi tantiaquid iquec Nuquin Papa yacno nidenquio iquendac. ²⁴ Cuesunenu cac unèsmene quiaish Esus tantiaquid nebi queboedi Esus tantiesa nebi quequid unèsash Nuquin Papa yacno tabadenquio iquendac. Utsibo, Esus tantiaquid nebi, quiaishic abi cuesunenuquid icnuc adecbidi Esus tantiaquid nebi, queoapec. Adquid unèsash Nuquin Papa yacno tabadendac. ²⁵ ¿Atotsieshshun Nuquin Papa yacno tabadaid tantienquio yec nidaidèn bédamboec tabadnuequin bedted-bedtede? Mimbi bedaidènquio Nuquin Papa yacno puduedtiapimbo mibi iquec. ²⁶ Esusbèdtabi ambi chiaid tantiaquid nebi nidaidènuèsh quetiapimboquid icsho adquidi èmbi tantiaid nec, queoatiapimbo iquendabi con pa yacnocquidtedishun tantianubi. ²⁷ Nad iquendac. Tantiaquota. Chuinu. Èbi tantiaquid dadpen yansho ènabicquid utsin-utsinquien isendac —quepanèdash Esus.

Esus bed-bedquesho istiapimbo yaid

(Mat 17.1-8; Mad 9.2-8)

²⁸ Aden chiashic Esus mèdante utsiuc tauadoec ushash Nuquin Papa chiec onquenuec macuèsh yacno nidoapanèdash. Petedo, Uan, Acobo aided buanec macuèsh yacno Esus nidpanèdash. ²⁹ Adec macuèsh yacno nidash Nuquin Papa chiec Esus onquenubi aton

bësbed aton dashcutebëdi nac-nacquio ushë chënquiacbimboec icpanëdash. ³⁰ Adsho isnubien badedquio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. ³¹ Aid daëdi Esusbëd tabadquin Nuquin Papan tantiampicpadece Edusaden yacnoshon Esus unës uate ushë chiec onqueuededpanëdash. ³² Adnubien Esusbëd chobedo abëd icquido 3ted ushcasmash tabadtuidquin Esusbëd utsi daëd nac-nacquiocquid dasiuidacimboec bed-bedquesho isbededpanëdash. ³³ Esusbëd daëd nid-tuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icho. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

³⁴ Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd chobedo dacuëdpanëdash.

³⁵ Adnubien abu ushunuësh onquec: —Nëidic ëbëd icte bunquidquio, con madombo, ëmbi bëdamboen isaidquio neque. Aidën chiaidquio tantiata —quepanëdash Nuquin Papa Esusbëd icquido tedestedshun isenquiocnobi.

³⁶ Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

Mayan icsa dapuduedaid madompi

(*Mat 17.14-21; Mad 9.14-29*)

³⁷ Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. ³⁸⁻³⁹ Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquio sidquianesho aidëmbidi bedshun bëcunedeniac con mado ëbcacushaniosh. Dapuduenquio icquin con mado aidën uimambo icmedeniosh. ⁴⁰ Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuequin aidon tanac dapuduenquio iccosh —quepanëdash dada abentsëc Esus caic.

⁴¹ Adoquien ambi nianaïdo caic Esus nadpanëdash: —Nadatiambocquid Nuquin Papa nec, quequin tanties mibitedi neque. ¿Tedectsi icshun ëmbi chiacpaden mimi tantiabempe? ¿Mimbi tantienquiocsho isash tedectsiashini chieshtope? —quetanquin: —Mín mado bec cho —Esusën cac aton mado aton papan bëpanëdash. ⁴² Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

⁴³ Adsho isash: —Nuquin Papan nadatiambocquin naid uinsadpambo iquec —quequededpanëdash isquido.

Abi unëste chuioaid

(*Mat 17.22-23; Mad 9.30-32*)

⁴⁴ Adoquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiec.

⁴⁵ Aden chuisho abëd icquidon tantienquiocpanëdash. Aden tantienquio yec, Mimbi chiai-d tantienquio iquëmbi, quetiapimbo yec otacquio tabadcuededpanëdash abëd icquido.

¿Tsutsi chuiquid dapa icpec? quequin chiaid

(*Mat 18.1-5; Mad 9.33-37*)

⁴⁶ Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onqueuededpanëdash. ¿Ëbida chuiquid dapa icpe? quec ambibi tantiequi adpanëdash.

⁴⁷ Adoquien Esus tantiaquidquio icquin bacuëmpi chomeshun aton dayunquio tabëcash: ⁴⁸ —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiacpadom-boen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoindac. Nidaïdënuësh utsi nashunquidquio ichoedi aidquiobi Nuquin Papan chuiquid dapa icta caindac —quepanëdash Esus abëd icquido caic.

Abimbo tantiaquid ëbëd icquid nec quiaid

(*Mad 9.38-40*)

⁴⁹ Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuc nadposh: “Esus, nadatiambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

⁵⁰ Adoquien: —Adquid, Padicnuna, cainda. Nadatiambocquin naquidquo Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

Esus bunesabo, Samadia yacnocquido

⁵¹ Adashic Esus abi abuc indote ushë chote anoentsëqui yanan, Unësmane quenquo yec nidebi, quequin ambibi tantianec Edusaden yacni Esus nidoapanëdash. ⁵² Adec nidnun ambi bëyucmiaido Esusën abia nidmic nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien ⁵³ Esus isadaidbo nec, quequin yuedenquiocpanëdash Samadia yacnocquidon.

⁵⁴ Adoquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icho? —quepanëdash.

⁵⁵ Adoquien: —Padicnuna. ¿Matses unësmenuectabi chodio? —quianec ⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid

(Mat 8.19-22)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

⁵⁸ Adoquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi:

—Con pa unësacsho chococashun mibi tsibanec nidendabi, Icho —quepanëdash.

⁶⁰ Adoquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuquin abi yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icho —caquien:

⁶² —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

10

Abi bëyucanec nidquid 72ted icquido

(Mat 11.20-27; 13.16-17)

¹ Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. ² Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icombobi, mibi cadoque. Mibi tantiamenuen chuibanquid dadpen nidmeta, Papa, quequin chui. ³ Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iguendac. ⁴ Ëbi chuibenec nidanequin mitsana buanenda. Mitsana bedtequidbëda shictoade buanenda. Tapucudte tapucudenquo yec nidanetan. Adec nidanequin utsi bëquedash tabadenquiocquin datambidanec shubun puduedec nidta. ⁵ Shubun puduedshun naden shubu icho chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. ⁶ Aden chiac shubu icho bëdamboec tabadnuquid icsho Nuquin Papan abi bëdamboec tabadte aid shubun icquido menendac. Shubu utsi icho ëbi chieshënquid ictsias. Adquid yec mimbi chiaid tantianu quesa aid shubu icho icpec. Adquid icsho Nuquin Papan abi bëdamboec tabadte aid shubun icquido menenquo iguendac. ⁷ Mibi yuedacnouidsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸ “Shubu dadpen yacno mibi choacsho yuedshun pete meniac isuidec, Utsitsen bec cho, quenda. ⁹ Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. ¹⁰ Shubu dadpen yacno choshon mibi yuedquid nibëdsho isun aton podquedën nidquin naden chuita: ¹¹ Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iguendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. ¹² Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi

choabicnuc Sodoma yacnoquido icpampic. Ĕbi choabicnuc aidon Ĕbi tantiatiapimbo icpampic. Adquido Nuquin Papan bĔdiactsĕc cuidendac —quepanĕdash Esus.

¹³ Aden ambi nidmetequid 72ted icquido chuibanshumbic utsibo isacimboben Esusĕn nadopanĕdash: —Nĕbi icquido, shubu dadpen icquid tantiec unĕsquioquin mibi chiem-bique. Tantiata. Shubu dadpen icquid Codasin caid yacnoshon Ĕmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnoquido mibi nec. Aden Ĕmbi nasho isash Ĕbi tantiesa mibi icoapec. Ĕnden yampido isadaidpembon Ĕmbi nadatiambocquin nabansho isun, Icsaquin nebi, qeshun unĕsquiocnoc shubigun abi icsaid Ĕntsempampic. ¹⁴ Aden Tido yacnoquidobĕdan Sidon yacnoquidon tantiaahun abi icsaid Ĕntsempampic. Adquido Nuquin Papan bĔdiactsĕc cuidendac. Isadaidbo Codasin yacnoquidobĕd Betsaida yacnoquido Ĕbi isquido mibitĕdi nec. Ĕbi tantiesa icsho Nuquin Papan mibi comapenen cuidendac. ¹⁵ Adecbidi, nĕbi icquido, Capednaun yacnoquido mibi unĕsash ĩNuquin Papa yacnoda mibi nidpe? Padenquo. Ĕmbi nadatiambocquin nabansho isun tantiesa yec chian anĕdĕnquiacno mibi nidendac —quepanĕdash Esus abi tantiesabo chiacimboc ec onquec.

¹⁶ Aden chiašic, ambi nidmenu caido 72ted icquido tantiamenuen chuibudec: —Mibitedishun Ĕbi chiac Ĕbi tantiaquido utsibo iquendac. Adquibidi mimbi Ĕbi chiac Ĕbi tantiesabo icoaindac. Adomboembidi Ĕbi chuibansho tantienquo yash Ĕbi chomiondaid tantiesambo nendac —quepanĕdash Esus. Aden chiac ambi nidmenu caido nidanepanĕdash.

¹⁷ Adeç nidanequin Esusĕn chiacpaden nabeniashic, Bĕdambo iquebi, quecuededec Esus yacno cho-choapanĕdash. Adeç cho-choash: —Mimbi chiacpaden nabanombi. Aden nabanquimbic, Esusĕn nadatiambocquin naidĕnquo dapudenta Ĕmbi caidtedi mayan icsa dapuduemposh, Icbo —quecuededpanĕdash ambi nidmiaido 72ted icquido ambi naboeð Esus chuibanec.

¹⁸ Adoaquin: —Ĕmbi nadatiambocquin nabanquin tantiamiac mibitedishun mayan icsa dadpen dapuduembedednubi abi dĕniacacimbocnuc bedquetanacimboc Satanab abucuĕsh badedquo paĕdsho isec niobi. ¹⁹ Ĕmbi nadatiambocquin nabanacpadquid mibitĕdi icmebanombi. Aden mibitĕdi adquid icmiaçho mibi chieshĕnquidon mibi icsa uatiapimbo iquendac. Mibi chieshĕnquin icsa uanuequido nisibimbocquido nec. Aidobidi icsa uanuequid yec chichumbimbocquido neoac. Adquid nisi icsho catashac mibi petiapimbo iquec. Adomboembidi catashac chichunĕn mibi setiapimbo icoaic. Adquid-bimboc mibi chieshĕnquid icsho Ĕmbi chiacpadomben nabanac mibi icsa uatiapimbo iquendac. ²⁰ Aden nabanac mibi icsa uatiapimbo icsho isash, Bĕdambo iquebi, quenda. Nuquin Papan abi yacno chomenuequin Ĕbi cuĕmĕdquid Ĕnden dada uaid iquec abi yacno Ĕbi puduedte iquec, quequin tantiec, Bĕdambo iquebi, quianta —capanĕdash Esusĕn ambi nidmiaido chuiquin.

²¹ Aden chuibanshumbic ambi nidmiaidon chiaid tantiaš, Bĕdambo iquebi, quequin Nuquin Papa Esusĕn nadopanĕdash: —Abu icbo nidaid icbobidi mibi nec, Papa. Adquid icquin Ĕmbi nidmiaido mimbi tantiamiacpadomben nadatiambocquin aidon nabededosh. Aden nabededshun chuisho tantiaš bĕdambo iquebi. Dadpen tantiaquido mimbi nadatiambocquin naid tantiamenquocquimbi, Ĕmbi namiaido, daĕdpactsĕc tantiaquidobien mimbi tantiamioc, Papa. Mimbi tantiacpaden tantiamiac Ĕmbi nidmiaidon nabededosh, Papa —quepanĕdash Esus Nuquin Papa chiec.

²² Aden Nuquin Papa chiec onquequin nainec: —Con pa abia yampid icquin abitĕdi tantiaquidquo nec. Aidĕn abipadquid icmiaid nebi. Aid abentsĕquiobi Ĕbi bĕdamboen tantiaquidquo con pa nec. Adecbidi abĕd abia yampid icquin con pa bĕdamboen tantiaquidquo nebi. Adquid icquin, Con pa nad iquec, quequin Ĕbi tantiaquido tantiamendambi —quepanĕdash Esus abi tantiec choaš iccuededquido caic.

²³ Aden iccuededquo chuibanshumbic naden ambi 72ted icquido nidmian choboe-douidsĕqui Esusĕn chuoapanĕdash: —Ĕbi tantiaquido icquin Ĕmbi tantiamiacpaden mimbi nabansho isun Nuquin Papan bĕdambo iquebi camiaido mibitĕdi nec. ²⁴ Nuquin Papan chiaid chiampidobĕd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon Ĕbi istiapimbo icoapampic —quepanĕdash Esus.

Utsi tantiaquin bĕdamboen naquidquo

²⁵ Adashic, ĩTantiaquidquoda Esus neque? Tantiabono, abibi quequin dada utsin: —ĩNuquin Papa yacno tabadnuen atotsimbi napeba? chuibanquin tantiamequidĕn Ĕbi chui —capanĕdash.

²⁶ Adoaquien: —Ambi Nuquin Papan naden nata quequin chiaid Moises dada uami-ampid ¿mitsipaden chuipec? ¿Aid isquin atotsi mimbi tantiape? —quepanèdash Esus abi chuimequid caic.

²⁷ Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnèdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bédamboen nadeneta.” Utsibic, “Nuquin Papa tantiaquid nebi quequin ambi chiacpadamboen tantiaquiota. Aden nabanquimbi utsibo adembidi bédambo icmequin naban. Èbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanèdash Esus chuimeboed Esus caic.

²⁸ Adoaquien: —Bédamboen mimbi chioque. Nuquin Papan chiacpadamboen nabanec Nuquin Papa yacno mibi tabadendac —quepanèdash Esus.

²⁹ Aden Esusèn chiac èbi otacquio icsho isash Nuquin Papan chiacpadpenquiocquid nepec, quequin iccuededquid utsibon èbi chuishiash quequin tantiaquin Esusèn chuimeboed: —¿Mitsicquid con utsi nepec? —quepanèdash.

³⁰ Adoaquien Esus: —Utsi chuinu. Tantiata. Edusaden yacnoèsh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebèdtabi chicshun icsa uabudtsècquien cuestanquin niamposh. ³¹ Adoambi, cuestanquin nianaid uiacno podquedèn choquin isadaidbo tsusion, Con matses nenushe. Isnu, quenquiocquin uano datamposh. ³² Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. ³³ Utsibic, Samadia yacnoèsh choquid aid podquedèmbi choquin cuestanquin nianaid istuidash unèsquiocquin ³⁴ aton dayun tsadbudshun cuestanquin nianaidèn chiuètedi aton dauèmbi bènoshcashun bétaneshumposh. Aden bétaneshunshun cuestanquin nianaid aton cabayo canandoash aton cabayobèdi nidequi capuquido puduedmete shubu yacno choash abèdi tabadquin bédamboen isquin nashumposh. ³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Èmbi bëboed ampequidon cuestanquin nianaid bédamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanèdash Esus. ³⁶ Aden chuishumbic: —Èmbi chui-boed utsi-utsiec icposh. ¿Mitsicquid ampequidon cuestanquin nianaidèn utsibimboecquid icposh? —capanèdash Esusèn.

³⁷ Adoaquien: —Ampequidon cuestanquin nianaid istuidash unèsquio yanquin abi nashumboedien con utsi nec, capendac —quepanèdash Esus chuimequid.

Adoaquien: —Adembidi mimbembi èmbi chuiboedbimboecnuc utsibo tantiaquin nashunoata —quepanèdash Esus.

Madtan nabanubi Madian tantiaid

³⁸ Adashic, Esusbèd nidequi abèd icquido shubu daèdpactsèc yacno chosho isun anocquid chidon Madta caidèmbi Esusbèda abèd icquido aton shubun yuedpanèdash. ³⁹ Adoac ambo puduedash tsadquin Esusèn chuibansho Madian Madtan chibinquo datsadbudshun tantiaipanèdash. ⁴⁰ Adec tsadquin Madian tantianubi Madtan ambi natiadquio yaidtedi tantiaquin nabampanèdash. Aden nabanequi Esus yacno choshon: —¿Con chibin èbèdtambi nainquiocsho isenquioda mimbi ique? Min utsibèdtan nabanta, cata, Icho —capanèdash Madtan Esus chuiquin.

⁴¹ Adoaquien: —Mimbi natiadquio yaid dadpen tantiaquidquio mibi iqueque. ⁴² Èbi tantiaquidquio icta. Adquid min utsimbo Madia icsho, Padicnuna. Min utsibèdtan nabanta, catiapimbo iquebi —quepanèdash Esus Madta caic.

11

Nuquin Papa chiec onquianete (Mat 6.9-15; 7.7-11)

¹ Adashic ushè utsin Nuquin Papa chiec Esus onquepanèdash. Aden Nuquin Papa chiec onquequin nainacsho isun abèd icquidon nadopanèdash: —Nuquin Papa chiec onquianeta quequin Uan padon abèd icquido tantiamapanèdash. Adembidi Nuquin Papa chiec onqueta quequin èbitedi tantiamequin chuioa, Icho —capanèdash.

² Adoaquien: —Nuquin Papabèd onquequin naden chuita:

“Bédambocquidquio mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bédabon mimbi chiacpadamboenuidi naic.

Adomboembidi matses abitedishunquoio napashun, Papa.

³Tantiaquidquoio, mibi cadoque. Bumianenquiocquin badiadquidën-badiadquidënquien con pete ëbi bedmedene, Papa.

⁴Adecbidi utsin ëbi chieshënsho cuidenquoio yec ëbi abi icsaid bëpiscudacpadquiequi ëbi icsasho cuidenquoio yec bëpiscudoata, Papa.

Adembidi, Satanasën icsa uanushe qeshun ëbi cudasquin dayun uata, Papa, quequin chuita”

—quepanëdash Esus.

⁵Adtanegic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimbi bedshumpatsia? ⁶Inchëshpotsembo pete bedshunuec mibëd nashunanquid yacno nidash: “Ëbi yacno utsi chosho pete nibëdnubi yuedombi. Con pete nibëdsho isash pemenun bedec chobi. Mimbi meniaid cuidquin adquidi mibi meneoaimbi,” quepatsiac mibi mibëd nashunanquid caic.

⁷“Adoaquien, nuntanuehë: ‘Padi. Shëcnandombi. Con bacuë ishcnec din ictoshon mibi menetiapimbo iquebi,’ quequin mibëd nashunanquidën mibi chuitsiash.

⁸“Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquoio. Mimbi nidenquiocquin chuidonesho tantiashun mimbi chuiboedtedi mibi menepatsiash — quepanëdash Esus.

⁹⁻¹⁰Aden chiec abi onquec: —Adomboembidi Nuquin Papa chuidonesho mimbi bedtiadquoio yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

¹¹“Adembidi chuinu. Tantia. ¿Min mado, Nuëcquid bec cho, qeshoda mimbi nisimbo menedi? ¹²Adembidi, ¿Cachinan bacuë bec cho, qeshoda mimbi chichun menedi?

¹³Padenquoio. ¿Aden icsaquid icquin min bacuë tantiaquin bëdamboen menequid mibi icnu Nuquin Papa icsaisa icquin mibi, Min Mayan ëbi mene, qesho tantiashun menenquioda mibi ictic? —quepanëdash Esus.

Bedtsibun namiaid Esus nec, quequin chiaid
(Mat 12.22-30; Mad 3.19-27)

¹⁴Adashic, mayan icsa dapudedquin eme uaid icsho Esusën istanquin: —Dapuduen —cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcuededpanëdash.

¹⁵Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnu —quepanëdash Esus chieshënquido.

¹⁶Adnubien iccuededquid utsibo: —Nuquin Papan chomiaidquoio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

¹⁷Aden chuisho tantiash tantiaquidquoio yec abi icsamboen chuimenuequido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. ¹⁸Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic? ¹⁹Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquoio mibi icpe? ²⁰¿Nuquin Papan tantiamiac mayan icsa dapuduemequid ëbi yec ambi chomiaidquoio matses chuiquid dapa mibi yacno ënden choabida ictio? —quepanëdash Esus abi chuimequido chiec.

²¹Aden chiashic abi onquec: —Mibitedi tantiamenuen utsi chuinu. Bëdamboen tantiatata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. ²²Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

Abibi dapuduemoed mayan icsa dapudedoaid
(Mat 12.43-45)

²⁴ Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibêdacno nidash capuquin abi dapuedbocpadquid istuidenquo icposh. Adquid istuidambo yec, Abibidi dapuedoanu, quianec anobidi nidoaposh. ²⁵ Adec nidshun abi dapuduemboed naden istuidposh. Mayan icsa nidan, Èbibi bédambo iquec. Adash bédambo tabadnu, abibi quiaishic, Nuquin Papa tantianu, quenquiocposh. Aden chienquiocsh aton Mayan Nuquin Papan aid menetiapimbo icnuc abi dapuduemboed choshon aid abentsêcquio ²⁶ istuidashic nidoashun abipadquid chuituidac utsi 7ted abêdi choash abitedi dapuedcuededac dada icsamboshê yamposh —quepanêdash Esus.

²⁷ Aden Esusën chiambien iccuededquid chido: —Mibi tishacsho shuma chishmiondaid Nuquin Papan bédamboen isaid icpec —quepanêdash Esus caic.

²⁸ Adoquien: —Aden nasho padenquo. Nuquin Papan chiaid tantiashun nabansho Nuquin Papan bédamboen isaidquio nec —quepanêdash Esus chido caic.

Onasën ismiampicpaden ismiad

(Mat 12.38-42; Mad 8.12)

²⁹ Adnubien abi yacno cho-choash utsi dadpen iccuededsho isun Esusën nadopanêdash: —Nêbi nidaidên tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquo iquendac. Nuquin Papan Onas ismiampicpaden ismiad mimbi isendac. ³⁰ Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnocquidon êmbededpampic. ³¹ Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonên chiaid tantianuec ênapenuêsh choshon tantiash, Abimbo iquec, quepampic. Nuquin Papan matsesën naid icsa ambi naid bédabêda chuibante ushê chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bédamboen tantiaquin chuiquid dapa Sadomon icnepampic. Abitedi tantiampidquio nêmbobi iqueque. Èmbi chiaid tantiata. ³² Ademibidi, matses icsaidbêda ambi bédamboen naid Nuquin Papan chuibante ushê chonoc Ninibe yacnocquidon Onasën chiaid tantiacpadomboen Nuquin Papan chiaid abimbo iquec, quequin tantienquo icsho Nuquin Papan mibitedi isendac. Nuquin Papan chuimiapaden Onasën chuisho Ninibe yacnocquidon tantiabnedpampic. Onas Nuquin Papan matses icsaid cuidte chuimiadquio icpampic. Padnuen mibi icsaid bedshunash abided cuidadtequid nêmbobi iqueque. Èmbi chiaid tantiata —quepanêdash Esus abibi chiadequi.

Tabote taboshon bêtashenquo yacbimboec abi bédamboec tabadaid ismequid

(Mat 5.15; 6.22-23)

³³ Aden chuishumbic Esusën abi chuibanec: —Tabote taboshon ompoesa. Ademibidi matsun bêtashesambo icbo nec. Ma êmbi yuedaidon isnueshun tabote nênantan nanquid. ³⁴ Adoaidbimboec min tantiate iquec. Min tantiate bédambocquid icquin bédamboec tabadquin ismequid mibi nendac. Bêtashacbimboec min tantiate icnuc icsamboen ismequid mibi nendac. ³⁵ Con icbo èbi bednuec choec qeshun bêpiscudenquiocquin isted-istedta. ³⁶ Min tantiate icsaisa icsho Nuquin Papan chiacpadomboen tantiaquidquio aidi nec, quequin utsibon mibi isendac —quepanêdash Esus.

Nuquin Papan icsamboen isaidquio

(Mat 23.1-26; Mad 12.28-40; Duc 20.45-47)

³⁷ Aden Esusën chuibanshobien padiseyobo abentsêcshun: —¿Ada èbi yacno pec nidtsia? —capanêdash. Adoac aidbêdi nidash pete sanaid cueste dayunquio Esus tsadbudpanêdash.

³⁸ Adec Esus tsadsho isash, ¿Adpecshenda iquec. Penush mêpamêdenquo Esus icpec? quec abibi onquequin padiseyobon Esus yuedquidêmbi tantiapapanêdash.

³⁹ Adoquien, tantiaquidquio iquec Esus nadpanêdash: —Ëndenquimbo padiseyobon peshun acnun dêshote cachocbêdtabi pada-padaid cachoc bédamboen dapanta quequin chuinëdacpaden mimbi naoaic. Aden dapanshun mimbi codocaidbêdtabi mimbi actequid nitsinaid anauc ampanenquo mimbi icpec. Mibitedi adquio iquec. Nesquin bêchish iquec dapanudquin mimbi tantiaid icsa ênenquo mimbi icpec. Adecbidi, mibi bunaid bednuen icsamboen naquin ampequid mibi nec. ⁴⁰ Nuquin Papan chiaid tantiesabimboecquid mibitedi nec. Nuquin Papan matses uaquin dadabêdtabi tantiate uainquioda icpampic. ⁴¹ Ai. Adquid icnuc aton na nibêdquid tantiaquin mimbi pada-padaidên nitsinaidpadquid menebanta. Aden mimbi nadenesho isun Nuquin Papan min tantiatebêda min dada bédamboen isendac —quepanêdash Esus.

⁴² Aden chiashic padiseyobo caic Esus nadpanêdash: —Uno bedanquin dies yacno ênquin min tiedên caniquid êshê tambanshun, Nuquin Papan chiacpaden con na 9ted

icnubi abentsëc Nuquin Papan na nec, quequin aid abentsëc menuequin mimbi dayun uaic penquiocquin. Aden nabanquin Nuquin Papan ambi matses bédamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bédamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo.⁴³ Adembidi, tsusio dapabimboecsho bédamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtene. Adomboembidi tantiec matses iccuededacno nidequi, Èbi bèquedquidon èbi tsusio dapabimboecsho isash onquequin chuiplashuni quec mibi capuec. Aden tantiaquid Nuquin Papan icsamboen isaidquio mibi nec.⁴⁴ Adembidi, matses unësaid chococate manenushe qeshun ismequin mabiunu, quenquo yacpadomboen èbi icsaid tantianushe quequin ompoquid mibi nec — quepanëdash Esus padiseyobo chiec.

⁴⁵ Adoquien, Nuquin Papan naden nata quequin chiaid tantiembi, quish utsibo tantiamequid abentsëc: —Padiseyobo chuiquin èbipadquido mimbi chuiwopec —quepanëdash.

⁴⁶ Adoquien: —Nuquin Papan èndenquimbo naden nata quequin chiaidbèdta mimbi naden nata quequin chiaid dadpen chuibanquin matses mimbi namec. Adoac aitted matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

⁴⁷ “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ènenquiocquin tantianu quiacimboen mimbi shubumpi uabanec. Èmbi shubumpi uaido isun utsibon bédamboen ispashuni, quequin aden mimbi nabanec.⁴⁸ Aden naquin tantiec, Nuquin Papan chuimiaido cuesunequin bédamboen tsusedpabon napampic, quiacimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquio mibi nec.⁴⁹ Èmbi chiacpaden chuibanta, cabicquin naden Nuquin Papan chuiampic. Èmbi chuimiaid utsi-utsien aton matsesën mëyampec. Utsi-utsien mëyanshun cuesuneppec, quec Nuquin Papan abitedi tantiaquidquido adpampic.⁵⁰ Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nèbi icquido icquin Nuquin Papan chuimiaid tantiesambo mibi nec. Adquido iquec ènden mëyanampidpadquido mibi neoaic. Aido cuesuniampidpadquido mibi neoaic.⁵¹ Tsusedpaban abia abed cuesunepampid icnubi ambi tsyuec Sacadias cuesunepampic. Aid Nuquin Papan tabadte shubu uashunaid dayunquobi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nèbi icquid neoaic.

⁵² “Nuquin Papan naden nata quequin chiaid tantiembi, qeshun utsibo tantiamenquocsho Nuquin Papan icsamboen isaïdo mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo iccoaic — quepanëdash Esus Nuquin Papan naden nata quequin chiaiduidi tantiaquid chiec.

⁵³ Aden chiashic, Èbèdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: —Esus icsamboen chuimenu —quiampanëdash.⁵⁴ Adquid icquin Esusën chuibanacno nidanshun chuimeoanuequin naden padiseyobon tantiapnanëdash: Èbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantias, Nuquin Papan chomiaid nec, quec mibi muasho tantianshun, Unës uametiadquido iquebi, quequin Esus chiembi, quequin tantiaquin Esus chuimepanëdash padiseyobon.

12

Natiamiantequidbèdtabi dayacmetequid
(Mat 10.28-31)

¹ Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquo yec tabadpanëdash. Aido tsucus-tsucustsëcquo yec tabadnubien abèd icquido Esusën nadopanëdash: —Sicaïd nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbèdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bédamboen ista.² Matsesën ompoquin naid Nuquin Papan abitedi ismendac. Matsesën ompoquin chienquo yaïdbidi abitedi tantiamendac.³ Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaïd Nuquin Papan matsestedi tantiamenuen chuioaindac.

⁴ “Adembidi chuinu. Tantiata. Mibi cuesunenuequid dacuëdënenda. Adquidën mibi cuesunequin mibi nibëdametiapimbo iquendac. ⁵ Nuquin Papauidtsëqui dacuëdënta. Icsadnednequid icsho aidën mibi cuesunemeshun chian anëdënnequid nësecaindac. Adoanquiduidtsëqui dacuëdënta. ⁶ Nuquin Papa tantiquid yec dacuëdënda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaguinda Nuquin Papan mibi tantienquid ictic? ⁷ Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaguin Nuquin Papan mibi tantienquioda ictic? Mibi comapenen tantiec.

Esus tantiquid nebi, quequin utsibon tantianubi chiaid
(Mat 10.32-33; 12.32; 10.19-20)

⁸ “Abi chiembique. Tantiaguota. Utsibo icnubi Esus tantiquid nebi, quequin abimbo chuiquid Nuquin Papa yacno chosho isun, Nëid ëbi tantiquid neque. Puduedme, quequin chiendambi. ⁹ Adecbidi, utsibo icnubi, Esus tantiquid nebi, quetiapimbocquid Nuquin Papa yacno chosho isun, Nëid ëbi tantiesha neque. Puduedmenda, quequin Nuquin Papan uaido mayan bëdabo chiendambi. ¹⁰ Èbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Èmbi mibi icsamboen chienquo yacimboec bëpiscudta, Papa, qesho tantiash aidën icsamboen chienquo yacimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquio iquendac.

¹¹ “Adembidi chuinu. Tantiaguota. Mibi chieshënquido iquendac. Adquid icquin chuiquid dapa yacno Esus tantiaguido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. ¹² Nuquin Papan Mayanën mimbi chuibante mibi tantiamequie — quepanëdash Esus abëd icquido caic.

Aton na dadpen icquidën tantiiaid icsa

¹³ Adashic, abi datsidadquid abentsëcshun: —Con pa unësan con pan na dadpen con buchun bedbanosh. Mimbi dadpen bedbamboec musuctanquin min utsi meneta, quequin con buchi chuita —capanëdash Esus chuiquin.

¹⁴ Adoquien: —¿Buchibëdta mibi chuiquidtabi nepe? —quepanëdash Esus abi chuita caquid caic. ¹⁵ Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquio mibi Nuquin Papa yacno puduedtiapimbo iquendac.

¹⁶ “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh: ¹⁷ ‘Con tiedën caniquid bacuëd dadpen iqueue. ¿Atontsimbimbi aidtedi dayun uapeba? ¹⁸ Naden naimbi. Tiedën caniquid ëshë dayun uate shubu shënitedi chichanshun aidtedi nuamboshëcnuic shubu uabanuna. Aden nuamboshëcnuic shubu uashun aidënquio con tiedën caniquid bacuëtedi sandoshon dayun uanuna. ¹⁹ Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aquendambi. Aden naic, Bëdambo iquebi,’ quec aton na dadpen icquid abibi onqueposh.

²⁰ “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuipe —quepanëdash Esus.

²¹ Aden chiashic: —Aton na dadpenuidi tantiaguin Nuquin Papan chiapaden naisa yec aton na nianec unëssh Nuquin Papa yacno tabadtiapimbo iquec —quepanëdash Esus.

¿Atotsimbi napeba? quesa icta, quequin chiaid
(Mat 6.25-34)

²² Aden iccuededquido chuishumbic Esusën abëd icquido nadopanëdash: —Aton na dadpen icquidën tantiapaden tantienda. ¿Con na nibëdnuc atotsimbi pepeba? quec dacuëdënda. Adecbidi, ¿Atotsimbi dasiuidpeba? quec dacuëdënda. ²³ Bëdamboec tabadnuequin mibi piasteuudi tantienda. Adembidi, Con dada bëdambo icmenuequin, Dashcute bedteuudi tantienda. ²⁴ ¿Uicchunënda ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? ²⁵ Adecbidi, ¿mibi unëste ushë abimbo chonoc, Padi, quepecta mibi icti? Padenquio. ²⁶ Adec mibi unëste chonoc, Padi, quetiapimbo mibi iquec ¿atotsi quiaish ¿atotsimbi pepeba? quepe mibi?

²⁷ “Adembidi, cuètempi chuinu. Tantia. ¿Cuètempinda aton bacuè ictequid daèdcapec? Padenquo. Adoenquo yaid aton bacuè ictequid bèdaidquo iquec. Cuètempi bacuè ictequid bèdaidquo yacpadquid chuiquid dapa Sadomonèn dashcute adquo ictiapimbo icpampic. ²⁸ Padnuen cuète bacuè ictequid bèdaidquo icboedi badedquo sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidè bedmenquoda icpadic? Èbi bedmenquo ictsiash quequin Nuquin Papa bèdiactsec tantienda. ²⁹ Aden tantienquo yec ¿Atotsimbi peshun aque? quec dacuèdenda. ³⁰ Nuquin Papa tantiesan abi bunaiduidi tantianubi Nuquin Papa tantiaquidquo icquin pete actequidbèda èbi bedmedonec, quequin tantiec tabadta. ³¹ Adembidi, Nuquin Papabèd tabadnu quequin tantiec tabadta. Aden tantiaquin mimbi bedtiadquo yaid mimbi bedendac.

Abi yacno choacsho meniaid
(Mat 6.19-21)

³² “Nuquin Papan abi yacno mibi chomeque. Dacuèdenda, èbi tantiaquido caimbi. ³³ Ambo nidabi icquin mitsana menebanquin mitsana bedtequid bedshun aton na nibèdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidèn bedtemaidquo iquendac. Capishton petemaidquo aid iquendac. ³⁴ Mimbi tantiaidquo mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bèdamboec tabadte cudasquin mimbi dayun uaid iquendac —quepanèdash Esus.

Chieshenquiocquin caintequid
(Mat 24.45-51)

³⁵⁻³⁶ Aden chuishumbic Esusèn nadopanèdash: —Aton icbo u isec nidan con icbo chonoshe quiash dasiuidacchobi ushenquiocquin tabote dèbedtonequin, Con icbo chosho puduedmeshun nashunu, quequin aton yuabon caimpec. ³⁷ Aden abi cainquido aton icbon bèdambo icmequin nadopec: “Èmbimbo mibi pemenu. Nèmba tabadec cho,” qeshun ambi yuaido ichonquo pemequin bèdambo icmendac. ³⁸ Adembidi, icbo inchèshpotsembro choshon abi nashunuequin cainquido icsho icbon bèdambo icmiaido iquendac. Adembidi, cachina cuèdanabi badiadabicnuc choshon abi cainquido icbon bèdambo icmiaido iquendac. ³⁹ Adquidpenquo icbo utsi chuinu. Tantia. Aidi abi cainquid nibèdnubi aton na icnuc isedtanec choshon isac ampequid ènden nidac. Adsho isash, Ampequid choec, quequin tantiaquid yec nidenquo ictsenobi, quependac icbo. ⁴⁰ Adquiecbidi ampequid choachimboec Nuquin Icho choeque. Ad icnuc, Chosho èmbibi tantienquiocchitomane qeshun chieshenquiocquin èbi cainta —capanèdash Esusèn.

⁴¹ Aden Esusèn chuisho tantiaish Petedo: —¿Utsi chuiquin mibèd icquidouidi tantiamenuenda chio? ¿Abitedi tantiamenuenda chio? Tantienu. Èbi chui —quepanèdash Esus caic.

⁴² Adoquien: —¿Icbon chiac mitsipadquiocquin ambi namiaido bèdamboen napeba? Adquid chuinu: Pete tambanshun mususchun èmbi namiaid utsidedi bèdamboen menebanta, quequin ambi namiaid utsi abentsèc chianec icbo nidac. ⁴³ Adec nidashic choshon ambi chiacpaden ambi namiaidèn chieshenquiocquin nabanacsho isun icbon bèdambo icmiaid nendac. Adquid naden chuipec: Èbi nidan chieshenquiocquin mimbi nabanoque. ⁴⁴ Èmbi namiaid utsibotedi èbipadquiocquin chuiquid icta. Adquid icquin con natedi dayun uata, quequin chiendac icbon. ⁴⁵ Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshènquin cuesbanshun ambentsèqui nua peshun tantienquo yanquin aquec. ⁴⁶ Aden nabanquin tantienquiocnoc aton icbo choshon ambi namiaidèn icsamboen cuesbanaido isun icbon compapen cuesquin abi tantiesan utsibo ambi nidmiacnombo aidi nidmeoaindac.

⁴⁷ “Adembidi, ambi chiacpaden nabanesa icsho isun, Comapenen cuesta, icbon cac cuesendac. ⁴⁸ Aton icbo bunaid tantiabicquidèn cuesmetiadquiocquin nabansho aton icbon bèdiactsec cuesmendac. Adembidi, Nuquin Papan dadpen tantiamiaido ambi chiacpaden nashuntiadquo iquendac. Adembidi, icbon dadpen meniaidon dadpen meneoatiadquidi nendac —quepanèdash Esus.

Utsibèd bèdamboec tabadnu quesa icquin cuèshèdmequid
(Mat 10.34-36)

⁴⁹ Aden chiashic abi onquec: —Èbi tantiaquid icnuc èbi tantiesan yec cuèshèdendac. Aido ènden cuèshèdondan èbi tantiaquidombo bèdamboec tabadtsiandac, quec tsadebi. ⁵⁰ Adecbidi, Yuecshun èbi unès uanun mèyantequid iquendac, quequin tantiec, Ènden mèyanonaid iquec abuc Nuquin Papabèd tabadtsiandabi, quec tsadebi. ⁵¹ ¿Nidaidènshun abitedi bèdamboen tabadmenu quectabi chodionda? Padenquo. Èmbi chiaid tantiesan èbi

tantiaquidbëd icboedi cuëshëdtsiash quianec chopondabi. ⁵² Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshëdec adquid. ⁵³ Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëndendac. Shubu utsin aton mado ëbi tantiaquid icnuc aton papa adquid icnu quenquio yec cuëshëndendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëndendac. Shubu utsin, aton champi ëbi tantiaquid icnuc aton tita padenquio yec cuëshëndendac. Shubu utsin aton chaya ëbi tantiaquid icnuc aton babanën padenquio yec cuëshëndendac. Shubu utsin, aton babanën ëbi tantiaquid icnuc aton chaya padenquio yec cuëshëndendac —quepanëdash Esus. Abi tantiesha cuëshëdtequid chuibanec.

Nuquin Papan ismiantie isun nad iquendac, quequin tantiaid
(Mat 16.1-4; Mad 8.11-13)

⁵⁴ Aden abëd icquidombo chuishumbic Esusën naden iccuededquido chuioapanëdash: —Inchësh chosho isec, Ue choec, quiacpadec choec. ⁵⁵ Adecbidi, ushë chënquec chosho isash, Chumbo yamec quiacpadec iquec. ⁵⁶ Aden isquin mimbi ëmbi nidaidëshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquio icquin çatotsieshun abucshun Nuquin Papan chomiaid isumbi tantienquiocquin mibi icsaid ënenquio ique? —quepanëdash Esus iccuededquido caic.

Utsibëd chushcananquid
(Mat 5.25-26)

⁵⁷ Aden chiashic: —Utsibëd chushcananquido mibi nec. Adec tabadec çatotsi quiasch, Naden natiadquidi nebi, quequin tantiaschun mibi icsaid ënenquio ique? ⁵⁸ Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bédamenuen, Mimbi chiacpadomboen mibi nashunu, quequin bédamboen chuita. Mibi adenquio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. ⁵⁹ Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanëdash Esus.

13

Utsibo unësmiacpadec unësmemane quequin mibi icsaid ënta caid

¹ Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiaschun iccuededquid utsibo: —Chuinu. Tantia. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaidën intacbëd daëdash chididiquiosh, quequin chuipanëdash. Aid chiaid tantiaschun. Çatotsi icsamboen nasho aido cuesunemepashba? caimbi mibi —quecuedpanëdash Esus chiech.

² Adoaquien: —ÇCadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemiasch, quequinda mimbi tantiepe? ³ Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe qeshun. ⁴ Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaaid uebudquin abëd icquido 18ted cuesac unësosh, quiosh. ÇEdusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequinda mimbi tantiepe? ⁵ Mimbi icsamboen tantieque. Utsibo unëscapadec unësmene quequin mibitedishun mibi icsaid ënta —capanëdash Esusën abi chuimeboedo chuiquin.

⁶ Aden chuishumbic utsitsen chiech: —Icbon cuëte icnuc nadpec: ‘ÇCon cuëte ada bacuëashë? Istanu,’ quianec icbo nidpec. Adec nidshun isquien bacuë nibëdec. ⁷ Adsho isun icbon abi neshcashunquid chuiquin nadopec: ‘Seta tedested matamiasch cuëte yacno cuësnuec choudobi. Bacuëambo iqueque. ÇBacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

⁸ ‘Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tasheshcatanquin seta abentsëc matamequin nidaid chëshë chodquiaid ëbi bédamboen tasiameta. Adoac bacuëtsiash. ⁹ Aden seta abentsëc matamiasch choquin bacuëacsho isash bédambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiacpadec tabadenquicoeboedi bédamboen chiac bédamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaïd bédamiaïd

¹⁰ Adashic, chonoadtemaid ushën Nuquin Papan chiaid chuibante shubun puduedshun Nuquin Papan chiaid Esusën tantiamenubien ¹¹ seta dadpen 18tedi matamequin mayan icsan shuabudaaid icpanëdash. ¹² Adquid icsho isun Esusën: —Shuabudaaid icboedi nëbi cacueoaid mibi iquendac, chido —cashun ¹³ mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴ Aden chonoadtemaid ushën Esusën chido bédamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bédamenu quequin nëid ushënquo bédamenda. Chonoadtequid ushënquo bédameta —capanëdash iccuededquido chuiquin.

¹⁵ Adoaquien Esus: —Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono qeshun mimbi yuaid tēneshacchobi acte yacno buanenquioda mimbi icpe? ¹⁶ ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mēnchiquenquiodambi icpe? —quepanëdash Esus nëid ushën bédamenda quequido tantiamequin chiec.

¹⁷ Aden Esusën chuisho tantias, Adenda, quequin bédamboen chiombi, quetiapimbo yec otacquo tabadcuedednubi utsibotedi, Esusën nadatiambocquin naidtedi bédambo iquec, quec bédambo yec tabadpanëdash.

Cuēte ēshēmpi chiaid

(Mat 13.31-32; Mad 4.30-32)

¹⁸ Adashic: —¿Nuquin Papan shubun icquido mitsipadquidquo icpec? ¹⁹ Nadquidquo iqueque. Chuinu. Tantia. Icbon cuēte ēshē pistsēcquicoquid mostasa caid nësecaid dēyucash nuamboshë caniec. Aid cuēte caniaidēn cuidin podochoquidēn shubu uabededec. Adquiecbidi, Nuquin Papan chiaid chuisho tantiasēcquidēn tantiaibenash bédambocquid icsho isash matses utsibo ēbi tantiaquid Nuquin Papan shubun icquido dadpen yanec —quepanëdash Esus.

Sicaid nami uaidpadquid

(Mat 13.31-33)

²⁰ Aden chuishumbic utsitsen chuioaic: —¿Nuquin Papan shubun icquido mitsipadquidquo icpec? ²¹ Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amēec bidisquedoec. Adomboembidi ēmbi chiaid ēbi tantiaquidēn chuibanac ēbi tantiaquid dadpen yanec utsibon isenquicnobi —quepanëdash Esus.

Pudued-puduedtequid shēcuē pistsēcquo chiaid

(Mat 7.13-14, 21-23)

²² Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daēdpactsēcquid utsi-utsiec yacnotsen isbidanoquin anocquidotsen tantiamenuen chuibenenu, quec Esus nidpanëdash. ²³ Adec nidsho isun iccuededquid abentsēcshun nadopanëdash: —¿Nuquin Papa yacno matses daēdpactsēceta nidpec? Tiantianu. Èbi chui.

Adoaquien Esusën nadopanëdash: ²⁴ —Nuquin Papa yacno pudued-puduedtequid shēcuē pistsēcquo iquendac. Esusquo tantiec aidēmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, ²⁵ Nuquin Icbon, Èbi yacno puduedte ushë naimbudosh, caqui cho-choshon, Èbi puduedme, quequin comapen cuēmbededpec.

“Adoaquien: ‘Èbēd icquidpenquo mibi neque. Mibi puduedmetiapimbo iquebique. Mibēd icquido yacno nidan,’ caindac Nuquin Icbon adquid.

²⁶ “Adoaquien: ‘Mibēdtambi peshun acbededombi. Èbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

²⁷ “Adoaquien: ‘Icsaquido mibi neque. Nēmo puduedenda,’ quepec Icho. ²⁸ Aden chiaqui Abadauan yec Isac yec Acobo yec quec Nuquin Papan chuimiaido aidtedi Nuquin Icho yacno tabadsho isash abi tantiesa adtiapimbo yec chian anēdēnquiacno tabadec shubiquiec, Nuquin Papa icsambo iquec, quec nēishpec. ²⁹ Nuquin Papa yacno abi tantiesa puduedtiapimbo nobien nidaidtedi yacnoēsh utsibo dadpen cho-choshon Nuquin Papan abia yuedaidobēdan tsyuec choquidon peshun aquendac. ³⁰ Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

Edusaden isash anocquido Esus unēsquiqtequid

(Mat 23.37-39)

³¹ Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nēuēshquio nidec nid —capanēdash Esus chuiquin.

³² Adoquien: —Edodes cuesunemenuecbimboec onquequidquio nec. Aid yacno nidshun naden chuita. Nēbi mayan icsa dapuduemequin utsibo bēdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushē utsin-utsinquien adomboembidi nabanoaimbi. Adobanquimbi naimbudembi. ³³ Adobanequi nēbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ŷEdusaden yacno choabidabi unēs uapec? quiosh, Esus quequin Edodes chuita —capanēdash Esusën.

³⁴ Adashic choequi macuēsh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanēdash: —Nuquin Papan chuimiaido cuesunequido mibi nec. Adembidi, Nuquin Papan mibi yacno chomiaido cuēnoten se-sequido mibi neoaic. Ēbi tantiaquid icmenu, quequin chuideniombi. Cachinan, Con bacuē chieshēnquid choec, qeshun nua shocotsēcschun aton bacuē cudasquin mabēsec aton podon. Adembidi: Mibi chieshēnquid choec, qeshun mibi cudasquin chuibanombi. Aden chuisho tantiatipimbo yec mibi tabadpoc. ³⁵ Adquido yec nēbi min shubun icquido cudasquid ēbipadquid nibēdec. Nad iqueque. Tanta. Mibi chieshēnec cuesunenuequido choabincuc ēbi nidacsho yuen ēbi isenquio mibi iquendac. Yuecash abucueš choasho isash, Ambi chomiaid Nuquin Papan bēdamboen isaidquio nec, quequin tantienquicboedēmbi tantiendac —quepanēdash Esus Edusaden uano icnuc Edusaden yacnocquido tantiamequin chiacbimboec onquec.

14

Padiseyobon shubun Esus puduedash tabadaid

¹ Adashic, chonoadtemaid ushē utsin padiseyobo tsusio dapa isedec Esus puduedsho isun, Nēid ushēn natemaid icnuc Esusën bēdamenushe qeshun isnuēquin padiseyobo utsibo tabadquin caimbededpanēdash. ² Aden caimbedednubien podo nidte chedo bidisquiaid uano tsadsho isun Esusën: ³ —ŷChonoadtemaid ushēn daicsambocquid bēdamenquicte ushē nec, quequina mimi tantiapē? —caquien ⁴ abi caimbededquido otacquo tabadcuēdedpanēdash. Adec aido otacquo tabadcuēdednubien podo nidte chedo bidisquiaid dada Esusën bedshun bēdameshun: —Nidec nid —cac bēdambo yec nidpanēdash.

⁵ Aden aid nidmeshun abi bēdamenushe quequin caimbededquido caic: —ŷChonoadtemaid ushēn nua uēdēshcaidēn min baca ampaēdacsho isun badedquio bedtanquin indoenquioda mimi ictsia? —quepanēdash Esus. ⁶ Aden chuisho tantiash adquiobidi otacquo tabadcuēdedpanēdash.

⁷ Adashic, tsusiobon dayunquio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusën nadopanēdash: ⁸ —Pec cho, cac choshon tsadte bētinenda. Tsadte mimi bētinambien shubu icbon ambi pec cho caid utsi mibi chuiquid tsusio chosho ⁹ isun: “Chuiquid dapa choeque. Uano tabad,” icbon cac icsamboen naombi quiaš natiac uano tsadpec mibi. ¹⁰ Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nēmbi, chuiquidbēd tsadec cho,” capec mibi shubu icbon. ¹¹ Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanēdash Esus abēda yuedaido caic.

¹² Aden aido chuishumbic abi yuedquid Esus nadpanēdash: —Pemenu, quequin mibēd icquid min utsibo aton na dadpen icquidoudi pec cho cainda. Aido pemiac, mibi pec cho caoac. ¹³ Pemenu, quequin aton na nibēdquido, daicsaidobēda bēshuaido pec cho cata. ¹⁴ Adquido mibi cuidquin pemetiapimbo iquec. Adquido pemias, Bēdambo iquebi, mibi quepec. Nuquin Papa yacno nidash puduedsho ambi bēdambo icmiaid mibi iquendac —quepanēdash Esus abi yuedquid caic.

Nuquin Papa yacnoshon pequido

¹⁵ Aden Esusën chuisho tantiash abēdtan pec tsadquid abentsēc: —Nuquin Papa yacno nidshun abēdtambi pec bēdambo iquebi —quepanēdash.

¹⁶ Adoquien aidi tantiamenuen utsi chiacbimboec Esus nadpanēdash: —Yuednu, quequin nadēnquio pec chota, quequin ambi yuedtequid dadpen chuiposh. ¹⁷ Ambi chiacpadēn ushē chonoc: ‘Ēmbi chuiboedtedi pec cho quequin chuitanta,’ cac aton yua nidposh. ¹⁸ Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaid abentsēc nadposh: ‘Ēmbi sēuēmboc dēdabi nidtiapimbo iquebi,’ queposh.

¹⁹ “Utsibic: ‘Baca bedshun, Bëdamboen nimbanquinda buaneque. Isnu,’ qeshun isedtanenquocquin ambi bedboed nimbameposh.

²⁰ “Utsibic: ‘Con chido bedombique. Nidenquo iquebi,’ queposh.

²¹ “Aden chuisho tantiash nidshun aidon chiacpaden aton yuan icbo chuioaposh. Adsho tantiash nëishun icbon: ‘Èmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

²² “Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

²³ “Adoaquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna. ²⁴ Abia ëmbi pec cho caidon ëbëdtambi petiapimbo iquendac,’ queposh icbo —quepanëdash Esus.

Esuspadquio ictequidquio

²⁵ Adashic, nidsho matses dadpeshun tsibanac abi choacmi bidiadshun isec Esus nadpanëdash: ²⁶ —Èbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. ²⁷ Unësmanc quiash mëyanac dayactiapimbocquid ëbipadquio ictiapimbo icoaindac —quepanëdash Esus.

²⁸ Aden chieç Esus abi onquec: —¿Shubu uanu, qeshun abia shubu uaid isec, Nëidtenquo nanu, qeshun aidtedquibidi bëshun toccashun shubu uainquioda icpec? ²⁹ Aden tantienquiocquidën abentse-abentsen bë-bëtsëcquin baded naintiapimbo iquec. ³⁰ Adsho isun utsibon mamëshumpec. Bëdamboen isun shubu uaquidpadquid, Esuspadquio icnu, qeshun ëmbi chiaid bëdamboen tantiabenash adquibidi icpec. Èbi tantiauidtsëcquid ëbipadquio ictiapimbo iquec.

³¹ “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo chochoec,’ qesho tantiashun nëmbobi icquido chuiquidën naden tantiapec: ‘Èbëd icquido daëdpactsëc iquec. Aidtedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec. ³² Padnuen, abëd icquido dayactiapimbo icsho isun chuiquidën: Chuiquid utsi bëquedanta. Bëquedshun, Mibëdi ictsiabi. Èbëd icquido chuiquid icta, ëbi chuiquid quiosh, quequin chuita, quequin chuiposh. ³³ Adembidi ëbipadquio icnuequidon bëdamboen tantiata. ¿Èbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanëdash Esus abi tsibananquido chieç.

Sa batapentsëcquiocquid (*Mat 5.13; Mad 9.50*)

³⁴ Aden chiashic Esus nadpanëdash: —Sa batambo iquec. Casacac utsibëd daëdash batambo iquec. ¿Sa batapentsëcquiocquid casacac batamboda icpadic? ³⁵ Padenquio. Secatequid adquid nendac. Adecbidi Esuspadquio icnu quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tantienu, qeshun tantiacpadomboen nabanta —quepanëdash Esus.

15

Obeca abentsëc bënudtequid (*Mat 18.10-14*)

¹ Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantienu, quiash Esus datsidadpanëdash. ² Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aqec, quec abibi onquecuededpanëdash.

³ Adoaquien, tantiaquidquio iquec Esus: ⁴ —¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibëneç nidenquioda mibi icpe? ⁵ Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. ⁶ Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipoc. ⁷ Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuedependac —quepanëdash Esus.

Aton na bedtequid bënudtequid

⁸ Aden icbon aton yua bēnudaidd chuishumbic utsi chiec Esus nadpanēdash: —¿Aton na bedtequid shocoshēmpi 10ted icboedi abentsēc nibēdsho isun tabote taboshon besaquin chidon nibēnenquioda icpec? ⁹ Ai. Aden nibēnquin istuidshun abēd icquido chomeshun: ‘Con shocoshēmpi abentsēc niadachoeidi nibēnquin istuidash bēdambo iquebi,’ quepec chido.

¹⁰ “Adechidi matses abentsēcshun abi icsaid ēnsho isash abi yacnocquido ambi uaido mayan bēdabobēdi Nuquin Papa bēdambo iquebi, quecuededec —quepanēdash Esus.

Aton mado cuēshēdquid

¹¹ Aden chido chiashic utsi chiacbimboec Esus nadpanēdash: —Aton mado daēd icnubi ¹² tsyuec tishaid aton papa caic: ‘Tsiusio budquin mimbi chiondacaden nēbi ēbi aidded meneta, papa,’ quepondash. Adoac aton na musucshun aton mado abi daēdi menebampondash.

¹³ “Aden meniac daēdpactsēc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimēdpondash. ¹⁴ Aden aton natedi naimēdambic tiedēn caniquid unēsbumian abi nidacnocquidon pete naimēdan tsusion mado chedo comapenec bundocuededpondash. ¹⁵ Adec bundoquiec abi nidacnocquid abentsēc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ qeshun aton chancho yacno tsusion mado nidmepondash. ¹⁶ Aden nidmiac nidquin chancho pemebanequi ambi chancho pemiaid petiadquio yec tabadshobi anocquidon menenquio icpondash.

¹⁷ “Adec natiambo bunec tabadquin aton papa ambi nianondaibēdta abi icsaid ut-sidedi tantiec abibi onquec nadpondash: ‘Con pan namiaidon pete dadpen icnubi con na nibēdnuc unēspebi. ¹⁸ Nēbi con pa yacno nidshun naden con pa chiēmbi: Nuquin Papan chiacpaden nainquioquon mibi tantienquio yec nidshun icsamboen nabanombique. ¹⁹ Adquid icsho con mado nec, ēbi cainda, papa. Nēbi min yuapadquid ēbi icme,’ quequin chiēmbi, ²⁰ abibi quianec aton papa yacno nidoapondash. Adec nidec ancuenquio yacno aton mado nidondaidd casenash chosho isash unēsquiocnoc aton mado bēquedquin dayumbudshun shubi uatanguin aton papan tanchocapondash. ²¹ Adoac ambibi tantiabocpaden aton papa chuiquin: ‘Nuquin Papan chiacpaden nainquioquon mibi tantienquio yec nidshun icsamboen nabanec tabadteniobi. Aden naquid con mado ēbi cainda, papa. Min yuapadquid ēbi icme,’ capondash aton madon.

²² “Aden chiaquien bēdambo yanshun ambi namiaidombo naden aton papan chuipondash: ‘Con mado ēnden nidondaidd choaoshe. Dasiuidte bēdaiddquio bēshun con mado dasiuinta. Adoshombic mēusudtetsen mēusunta. Adoshombic tapucudtetsen tasiuinta. ²³ Adoshombic, bacan bacuē nuacquid dapa bedshun cuesuneta nuquitedi bēdamboec tabadquin penun. ²⁴ Con mado unēsacimbocboedi nēbi ēbēdi tabadoaic. Aidi bēnudacimbocboedi nēbi istuidacimbocboe choash iquec,’ cac bacan bacuē cuesuneshun codocacsho pebededpondash.

²⁵ “Adnubien bēyuc tishaid tied nantan icpondash. Auēshquio nidec shubu anoentsēqui choquin tentenate cuēdēmec matses cuēdēnsho tantiatuidpondash. ²⁶ Aden tantiatuidashien aton papan namiaid istuidash: ‘¿Atotsi naic nec?’ quepondash bēyuc tishaid.

²⁷ “Adoquien: ‘Min utsi ēnden nidondaidd choaposh. Aidi chosho isash unēsquiocquin nuquitedi bēdamboec tabadquin pemenuquin aton bacan bacuē nuacquid dapa papan cuesunemiosh,’ cac ²⁸ bēyuc tishaid nēishash shubun puduedenquio icpondash.

“Adsho isash, Puduedenquio iccosh, quequin chiac bēyuc tishaid yacno nidshun: ‘Min utsibobēd bēdambo icnuec cho, mado,’ capondash aton papan. ²⁹ Adoquien: ‘Seta dadpen matamequin mimbi chiacpadomboen nabanteniombi. Adquid icsho ēbēd capuquidobēdta ēbi pemenuen yua utsin bacuē mimbi cuesunemenquiocpaboc. ³⁰ Nēbi mimbi meniaiddedi naimbudquinc, chido dada dadpen chudmequid chudquinc caic min mado choacsho isun bacan bacuē nuacquid mimbi cuesunemepaboc,’ quequin bēyuc tishaidēn aton papa chushcapondash.

³¹ “Adoquien: ‘Mado, ēbēd icquid mibi nec. Adquid icnuc con natedi mitsana neyoc. ³² Min utsi unēsacimbocboedi nēbi choash tabadoaic. Aidi bēnudacimbocboedi nēbi istuidaidd nec,’ quequin aton papan choboeđen buchi chuipondash —quepanēdash Esus.

16

Icbon na icsamboen isquid

¹ Adshumbic, abēd icquido Esusēn naden chuipanēdash: —Icbon, Con na dadpen isquid icta, caid icnubi: Mimbi con na ista caidēn mitsana uesbudec, quequin utsibon chuiposh. ² Adoac, ambi con na ista caid chomiash icbo nadposh: ‘Mimbi con na ista caidēn mitsana uesbudec, quequin chioshi. Adoac, con na isquid mibi ictiapimbo iquec, caimbi. Nēbi

ÿËmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,' quepash icbo.

³“Aden chiac icbon na isquid otacquoio onquec: ‘ÿIcbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi. ⁴Naden natsiambi. Con icbon na meniondaish abitedi cuidmenquoio yac ëbi yuedtsiash,' quepash.

⁵“Aden tantiashun ambi icbon na meniondaid abentse-abentsen chomiach bëyuc choquid chuiquin: ‘ÿTedsï ëmbi con icbon na meniaqui mimbi cuidenquiocpaccoc?’ caquien:

⁶“‘Bëchi shocosh nuacquid dapan cushtoaid 15tedi bedshun cuidamboccombi,’ quepash.

“Adoquien: ‘Mimbi 15ted bedombi, quequin dada uaid secashun dada uatempï bedshun shocosh dapa bëchi cushtoaid 7ted bedshun cuidembi, quequin dada uata.’

⁷“Aden bëyuc choquid chuishumbic utsi chosho isun: ‘ÿCon icbon na tedsï bedshun cuidenquoio mimbi icpo?’ caquien:

“‘Tsitsan dapa dadpen 1000ted tiedën caniquid ëshë bedombi,’ quepash.

“Adoquien: ‘Mimbi aidted bedombi quequin dada uaid secashun dada uatempï utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiquid. Adoac ambi chiacpaden ambi bedaid cuidambocquidën dada uaposh.

⁸⁻⁹“Aden dada uabansho isun dada uatempitëdi bedshun icbo yacno nidshun meniac isbanec icbo tantiaquidquio iquec nadpash: ‘Muaquin mimbi dada uamebanquin mibi yuedmetequid con na mimbi aido meniogue. Nidec nid,’ caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

¹⁰ Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac. ¹¹ Adembidi mimbi nidaidënshun bedquin mimbi icsamboen nabansho isun, ÿËbi tantiaquid bëdamboen ista, quequinda Nuquin Papan mibi chuipeba? Padenquoio iquec. ¹² Adembidi, ÿtsin na isquin bëdamboen nashunenquoio icsho isun abi yacno chosho isun mibi menependa ictic? Padenquoio.

¹³ “Adecbidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquibidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanëdash Esus.

¹⁴ Aden chuibanubi aton na bedtequid ambi tantiaidquio icnuc chieshec padiseyobo tabadcuededpanëdash. ¹⁵ Adec tabadsho isun Esusën: —Bëdamboen nashumbimboen ismequido mibitëdi icsho mimbi omпоquin naidtedi Nuquin Papan isquin tantiec. Adembidi, Bëdamboen naquidbimboecsho matsesën ispashuni, quequin tantiaquin nasho Nuquin Papan bëdamboen istiapimbo iquec.

¹⁶ “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampibëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquoio yec ambibi tantiacpadece puduedte bunec. ¹⁷ Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

Aton chido nianquid

(Mat 19.1-12; Mad 10.1-12)

¹⁸ “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic —quepanëdash Esus.

Aton na dadpen icquid icnubien aton na nibëdquid

¹⁹ Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquio dasiuidquidën badiadquidën-badiadquidënquien nua peshun acpash. ²⁰ Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadpash. ²¹ Bunquieac ambo tsadec aton na dadpen icquidën peshun secaid bedshun penuec tsadtsëcsho menenquiocpash. Aden menenquiocnoc tsadshobi opa choquin aton chiuë Dëtasuntuidpash.

²² “Adnubien, aton na nibêdquid Dasado unëso isun Nuquin Papan uaido mayan bédabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi ²³ chian anêdênquiaçnoshon mëyanaid icquin abucquio isquien aton na nibêdquid unësboedi Dasado Abadauanën dayunquio tsadpec. ²⁴ Adec aid daëdi tsadsho isun aton na dadpen icboedën Abadauan chuiquin: ‘Ëbi antauidëque. Con ana dauebudoaquin ëbi ëçpanun Dasado acte bëme, papa,’ caposh.

²⁵ “Adoquien: ‘Chuinu. Tantia, abuido. Ënden nidaidën tabadquin mitsana dadpen bedbanec bédambo mibi tabadnubien Dasado comapenec bunquieç tsadposh. Nëbi aidi ënabi bédamboec tabadnubien anchumbo yec mibi tènquebudec. ²⁶ Adboedi, uquëmbo mibi iquec cuëma utsiuc potetemaic icnuc nêuëshquio nidtiapimbo iquec. Adquibidi mibi yacnocquido nêmbô chotiapimbo icoaic,’ quequin Abadauanën aton na dadpen icboed chuiquosh.

²⁷ “Adoquien: ‘Ëbi yacno potetemaic icnuc con pan shubu yacno Dasado nidme. ²⁸ Con buchi ado mëdante auc abentsëc Stedi unësabi yec nidaidëmbi tabadeque. Con buchi ado nêmbô mëyanacno chonoshe qeshun Dasado aido chuimetanta, papa,’ queposh aton na dadpen icboed.

²⁹ “Adoquien: ‘Nuquin Papan chiaid, Moisesën dada uampidbêdta dada uaid utsi isec tsusiobo onquepayoc. Aden chiaid ma min buchi adon tantiaquopanuna,’ quequin Abadauanën chuiquosh.

³⁰ “Adoquien: ‘Aid tantienquioçtsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiquosh.

³¹ “Adoquien: ‘Padicnuna. Nuquin Papa tantiesa icquin uincuemiadën chiaid min utsibon tantienquio icpatsiash,’ caposh Abadauanën aton na dadpen icboed chuiquin — quepanêdash Esus.

17

*Matses icsaid chiaid, ambi Esus tantiaid chiaid, ambi natequid chiaid
(Mat 18.6-7, 21-22; Mad 9.42)*

¹ Aden chuishumbic abêd icquido Esusën nadopanêdash: —Icsa uanquid iquendac. Adquid Nuquin Papan comapenen cuidendac. ² Adquid ëbi tantiabenicquid icsa uan-abicsho cuënote yuëmboquid têtanetanquin acte shodomboshë yacno nênepatecnêdan. ³ Aid tantieç aidpadquid icmane quequin bédamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënêdnuna,’ qesho tantiaish aidi icsainquio yacbimboec bëpiscudta. ⁴ Mibi icsamboen nash choec: ‘Icsaobique. Ënêdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënêdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedebidi aidi icsambo yenquio yacbimboec bëpiscudoata — capanêdash Esusën abêd icquido chuiquin.

⁵ Adoquien: —Nuquin Papa nadatiambocquin nabanquidquio nec, quequin tanti-aquidquio ictiadquio iquebique. Adquid ëbi icme, icbo —capanêdash abêd icquidon Esus chuiquin.

⁶ Adoquien: —Cuëtëmpi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nêid cuëtëmpi caic, Cuëte mananuc tabadboedi adquiecbidi acte nantan tabadoata, quequin mimbi chiacpadec acte nantantsen abi tabadacpadebidi tabadoaindac —quepanêdash Esus.

⁷ Aden chiashic Esus abi onquec: —ÿMin yua mimbi neshcata cac nidshun neshcaquin nainash shubuno chosho isun: “Nêmbô tsadquin pec cho,” caquina mimbi icpe? ⁸ Padenquio. “Con pete codocashun ëbi pemeshun acte menetanquin mimbitsen peshun acta,” mimbi caic. ⁹ Aden mimbi chiac mimbi chuiboedtedictsëqui nabanquin mimbi yuaidën naimbudec. Aden naimbudsho isash: “ÿBêdamboen mimbi naoc,” quecta mimbi icpe? ¹⁰ Padenquio. Ambembi nainquio iccosh. Mimbi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icho caic: “Mimbi chui-boedtedi nabampombi. Mimbi namiaid icquin ëmbi nabodet ëmbi natequiduidi napombi,” quequin mimbi chuite nendac —quepanêdash Esus.

Daushumbocquido bédamiaid

¹¹ Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec ¹² shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquedtuippanëdash. ¹³ Adquido yec uano tabadquin: —Ëbitedi bëdamboen tantiaquin nadatiambocquin naban, icho —cabededpanëdash comapenen cuënquin.

¹⁴ Adsho tantiashun Esusën: —Isadaidbo tsusiobo yacno nidshun ismetanta —capanëdash. Adoac nidanequi abitedi bëdambudnapanëdash.

¹⁵ Adoac bëdamboed abentsëc dëbidiadanec Nuquin Papan naid chiec onquec choaic

¹⁶ Esusën taëno tsadbudash: —Mimbi bëdameboc bëdambo iquebi —quepanëdash Esus caic. Aidi Samadia yacnocquid isadaidpemo napanëdash.

¹⁷ Adoaquien: —¿Diestedidambi bëdamepo? —quepanëdash Esus dëbidiadanec choboed caic.

¹⁸ Aden chiashic iccuededquidtedi caic: —Nëidi isadaidpemo yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquo icpec —quepanëdash Esus. ¹⁹ Aden chuishumbic: —Mimbi tantiacpadequi mibi bëdanoque. Nidtoanec nid —capanëdash Esusën daushumbo ichoedi chuiquin.

Chuiquid dapabëd bëdamboec tabadte chote ushë

(Mat 24.23-28, 36-41)

²⁰ Adshumbic: —¿Chuiquid dapa abentsëcbëd bëdamboec tabadte ushë choaid mitsipadënquo nuqui ispeque? Tiantianu. Ëbi chui —capanëdash padiseyobon Esus chuiquin.

Adoaquien: —Chuiquid dapabëd bëdamboec tabadte ushë chote ismete nibëdendac.

²¹ Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icpaoic. Chuiquid dapa abentsëcbëd tabadte nëmbobi iquec caimbi —quepanëdash Esus padiseyobo abi chuimeboedo caic.

²² Aden padiseyobo chuishumbic abëd icquido Esusën nadopanëdash: —Yuecash nati-amiantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquo mimbi iquendac. ²³ Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. ²⁴ Nuquin Papa yacno bëdamboec tabadte ushë chonoc abu bedquetaniacimboec uëshëmbo chënquec ëbi chosho abitedishun isbededendac. ²⁵ Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec —quepanëdash Esus.

²⁶ Aden chiec Esus abi onquec: —Ëndenquimboshë Noe tabadnuc matsesën icsamboen tantiaded-tantiadednëdacadomboen ëbi choate ushë icnuc adembidi matsesën tiantienepec. ²⁷ Naded tabadpampic: Nuquin Papan chiaid tanties cuidte ushë choec, benquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabadpampic. Nuquin Papan chiaid tanties aiquec abi bunaiduidtsëqui tantiaquid icoapampic. Nidaidën tabadaiduidquo tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. ²⁹ Aden nabanquin Nuquin Papan chiaid tantienquo icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquacimboecquid nëdënquetequid ue sequiacimboec sequiquidën Sodoma yacnocquidtedi Nuquin Papan chiaid tantiesabo unës uabunepampic —quepanëdash Esus.

³⁰ Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tanties yec abi bunaiduidtsëqui tantiaquid iquendac. ³¹ Shubu macano yacno decataoash mibi tsadnuc ëbi choate ushë chosho isash budanec mitsana bednu quec shubuno puduedenquo yec cuenta. Adecbidi, tied nantan mibi icnuc aid ushë chosho isash shubu yacno mitsana bednuc nidenquo yec badedquo cuenta. ³² Mibi yacnocquidtedi unës uanushe bidaidshun isenquo yec cuenta, cac Dod cuenubien aton na tantiec aton chido auebidi bidaidsho unës uampidpadquid iquenda. ³³ Unësmanc queshun ambi tantiacpadecc tabadquid unësash mëyanacno tabadnubien unësmanc quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. ³⁴ Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tanties nianendac. ³⁵ Adembidi, chido daëdshun macueso Nuquin Papa

yacno yuednuen abi tantiaquid bedquin abi tantiesa nianoaindac. ³⁶ Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

³⁷ Aden chuisho bēdamboen tantienquiocquin abēd icquidon: —¿Mitsimbo budpec, icbo? —capanëdash.

Adoaiquen: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abēd icquido caic.

18

Cadonequidquo chido chiaid

¹ Adashic, Ebēd icquido chieshenquo yec Nuquin Papa chiec onquian-onquianquidquo ma icpanu quec aido tantiamenu quec Esus nadpanëdash; ² —Shubu dadpen yacno icsambocquid cuidte chuiquid icposh. Aidi Nuquin Papan chiaidbēda utsibo tantiesa icposh. ³ Adnubien uano tabadquid niante chido icposh. Aidi icsambocquid cuidte chuiquid yacno nidshun: ‘Ēbi icsamboen naquid ma cuidnu chuiquiota,’ quequin chuiposh. Aden chiaiqui padenquiocsho isash choded-chodedquin adomboenuidi chuided-chuidedposh.

⁴ “Aden chuidoniaqui abi icsambocquin naquid cuidte chienquiochoedēmbi chido ēnēdenquo yec ⁵ choded-chodedquin adomboembidi chuioasho tantishun: ‘Nuquin Papabēda mates tantiesa nebi, quequimbi niante ēnēdenquo yec chodednesho isun uimabudmane qeshun abi icsamboen naquid cuidte chuiquiono,’ qeshun cuidte chuiquidēn chuiquioposh.

⁶ Aden chiashic Esus: —Choded-chodedquin chidon chuioasho tantias: “Mibi icsamboen naquid cuidte chuinu,” queposh icsambocquid cuidte chuiquid. ⁷ ¿Adomboembidi ambi cuēnaidon, Ēbi chieshēnquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nēbimbobida cuidpeba? ⁸ Abitedi padenquioctsiash. Ūtsi nēbimbobi cuidenquiocquin choshon cuidendac. Badedquo cuidenquiocsho isash choquin ¿tedectsisumbimbi ēbi tantiaquin caimbudnequido istuidpendac? —quepanëdash Esus.

Padiseyobo abentsēc icnuc ancanquidēn utsin na bedtequid bedmianiaid chiaid

⁹ Adashic, bēdamboquid nebi, quiash utsitedi icsambo iquec, quequido tantiamenuen adquidēn tantiaid icsa chuiquin Esusēn nadopanëdash: ¹⁰ —Nuquin Papa tabadte shubu uashunaid yacno Nuquin Papa chiec onquenuc nidnequid daëd icposh. Abentsēc padiseyobo icnubi ancanquidēn utsin na bedmianiaid utsi icposh. ¹¹ Nuquin Papa tabadte shubu uashunaid yacno abi daēdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bēdamboquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidēn utsin na bedtequid bedmianiaid-padquidpenquo nebi, Papa. ¹² Adembidi, chonoadtemaid ushē yambi chonoadtemaid ushē utsi choabincnuc daēdec ushquin mibi tantiaquin buna mēmundenembi. Adembidi, uno bedanquin dies yacno cuēsaquin con na tambanshun 9ted dayun uaquin abentsēc mibi menedenembi, Papa, quequin padiseyobon chuiposh.

¹³ “Aden padiseyobon uanoshon chuinubien ancanquidēn utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquo yec abi onquec: ‘Icsambocquin nabanquid nebique. Ēbi tantiaquin pauc, Papa,’ queposh —quepanëdash Esus.

¹⁴ Aden chiashic: —Chuinu. Tantia. Ancanquidēn utsin na bedtequid bedmianiaid Nuquin Papan bēdamboen isaidquo icnubien padiseyobo ambi icsamboen isaidquo icposh. Icsaisa yachimboec, Bēdamboquid nebi, quequid yuecshun Nuquin Papan aidēn icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bēdamboen naid Nuquin Papan ismequin chuioaindac —quepanëdash Esus.

Bacuēbo Esus yacno bē-bēaid (*Mat 19.13-14; Mad 10.13-16*)

¹⁵ Adshumbic, aton bacuēbo Esus mishmenuequin utsin-utsinquien bē-bēsho isun: —Bacuēbo bē-bēenda. Esusēn nabanaid utsi iqueque. Nidanec nid —capanëdash Esusbēd icquidon.

¹⁶ Aden chuisho tantias Esus nadpanëdash: —Bacuēbo nidmenquiocquin con dayunquo cho-chome. Chiac, Abimbo caic, quequin tantiaquidquo bacuēbo nec. ¹⁷ Adomboembidi, Nuquin Papa yacno tabadte iquec, quequin chiac bacuēbon badedquo tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

*Nëbi caniquid chuiquidën chiaid**(Mat 19.16-30; Mad 10.17-31)*

¹⁸ Adshumbic, nëbi chuiquid caniquidën: —Nuquin Papa yacno nidnuequin çatotsimbi nape? Bëdamboen tantiaquidquio icquin ëbi chui. Tantiyanu —capanëdash Esus chuiquin.

¹⁹ Adoaquien: —çMitsipaden tantiec bëdambocquid nec, quepe mibi? Nuquin Pa-pauidtsëqui bëdambocquid nec. ²⁰ Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin naba-banta,” quequin chiampid mimbi tantiapec —capanëdash Esusën nëbi chuiquid caniquid chuiquin.

²¹ Adoaquien: —Canidotsëcquimbi aden nadeniondambi —quepanëdash nëbi caniquid.

²² Aden chuisho tantiaash: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

²³ Aden Esusën chuisho tantiaash aton na dadpen tantiec unësquio yanshun Esusën chiacpaden natiapimbo icpanëdash. ²⁴ Adsho isun: —Aton na dadpen tantiaquin Nuquin Papa badedquio tantiatipimbo adquidën iquec. Nuquin Papa tantienquio yec abi yacno puduedtiapimbocquid iquendac. ²⁵ Adquiecbidi shëcuë pistsëcquid puduedte nidaidën capuquid dapan badedquio tantiatipimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatipimbo icoaic. Aden aid tantiatipimbocquid ambibi tantiacpadequi puduedte bunec —quepanëdash Esus.

²⁶ Aden chuisho tantiaash iccuededquido nadpanëdash: —çTsutsi Nuquin Papa yacno puduedquid icpec? —quepanëdash Esus caic.

²⁷ Adoaquien: —Matses ambibi tantiacpade puduedtiapimbo noc Nuquin Papambien abi yacno yuedanquid matses tantiamendac —quepanëdash Esus.

²⁸ Adoaquien Petedo: —Mibëd icnu, quequin ëbëd icquidbëdta con natedi nianondambi, icbo —quepanëdash Esus caic.

²⁹ Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho ³⁰ ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac —quepanëdash Esus Petedo chiec.

*Ëbi unës uaindac, quequin Esusën chiaid**(Mat 20.17-19; Mad 10.32-34)*

³¹ Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac. ³² Anoshon bedshun buanshun isadaidbon isadaidpemo ëbi menendac. Aden meniac bedshun ëbi mamënshumbededquimbi, icsamboen chuibededquimbi, dacuishtu- abededquimbi, dacuesbededtsëcquien mëyanshun ëbi cuesten dectanquin unës uaindac. ³³ Adoaqui daëdec ushtanec uincuenendabi —quepanëdash Esus abëd icquido chiec.

³⁴ Aden abi unëste Esusën chuisho abëd icquidon bëdamboen tantienquio yec tabadpanëdash.

*Bëshuaid bëdamiaid**(Mat 20.29-34; Mad 10.46-52)*

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiaash: “Mitsana bedtequid bec cho,” quepanëdash bëshuaid. ³⁶ Adec tsadquimbi matses dadpen cuensho tantiaashun: —çAtotsi quec cuen-cuene? —capanëdash. ³⁷ Adoaquien choquid abentsëc: —Nasaded yacnoësh choquid Esus cuenec nec —quepanëdash.

³⁸ Adsho tantiaashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

³⁹ Adshobien: —Adec cuëdenquio yec tsad —capanëdash choquidon.

Adoaquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caopanëdash bëshuaidën.

⁴⁰ Adoac nidtuidshun Esusën: —Aidi bec cho —cac abi yacno bësho isun: ⁴¹ —çAtotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Ëbi bëucshune, Icbo —capanëdash.

⁴² Adoaquien: —Mimbi tantiacpadomboen padpidemboen is —cac ⁴³ badedquio isben-shun bëshuacboedën Esus tsibanquimbi Nuquin Papan naid chuibanquin isbanec onquec

nidpanëdash. Aid bédansho isun Esusbëd nidanequidotedishuntsen Nuquin Papan naid chuibededpanëdash.

19

Saqueyo, ancanquidën utsin na bedtequid bedmianiaid dapa

¹ Adec nidequi Edico caid yacno datambidanec Esus nidpanëdash. ² Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. ³ Adoaid icquimbi utsi, Esus cuenec, qesho tantias, ¿Mitsipadquidquo Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquio icpanëdash. ⁴ Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵ Adec tsadnubien aid podquedënquio choec nidtuidshun Saqueyo bushcuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac ⁶ Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bédambo iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tantia, Icho. Nëbi con na mais uaquin aton na nibëdquid menenun nabono. Adoshombic, con matses: “Con na mimbi ampioc,” qesho tantiasshun ëmbi ampiaidbëdta daëd daëdquiecnuc daëd uaquin menebanembi —quepanëdash Esus chiec.

⁹ Adoaquien: —Chian anëdënnequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec. ¹⁰ Icsambocquid Saqueyo icbocpadquid nibënquin istuidshun nësecanushe qeshun mënchicnuc chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹ Aden Esusën chuisho tantiasshun Edusaden yacno choash chuiquid dapa Esus yantsias, quequin utsibon icsamboen tantiaapanëdash. ¹² Aden tantianubi tantiaquidquo icquin utsi chiacimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuc chuiquid dapa yacno nidaid utsi yacno nidendabi. Anoshon chuiquid icmiac nëmbo choindabi,’ ¹³ qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bédamboen nabanquin daëd uata ma choshon dadpen bedoapanuna,’ quianec chuiquid ictiadquocquid abi chuiquid dapa yacno nidposh.

¹⁴ “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

¹⁵ “Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ¿tedtsi daëd uapashba? abibi qeshun ambi meneboedo chomesho.

¹⁶ “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icho,’ queposh.

¹⁷ “Adoaquien: ‘Ëmbi meneboed abentsëc bedshun bédamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanocquido chuiquid icta,’ caposh abi chuiquidën.

¹⁸ “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

¹⁹ “Adoaquien: ‘Mimbi daëd uaidtedquiobi shubu dadpen icquid 5ted uano-uanocquido chuiquid icta,’ caposh abi chuiquidën.

²⁰ “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icho. ²¹ Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quiash dacuëdec tsadteniobi,’ queposh.

²² “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? ²³ ¿Aden tantiaquin atotsiesshun ëmbi chiaid nanuequin ëmbi meneboed daëd uamequin utsi menenquio icco? Aden meniac daëd uashun bedtsenombi,’ queposh abi chuiquid.

²⁴ “Aden aton na daëd uaisa chuishumbic iccuededquido chuiquin: ‘Ëbi chieshënquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

²⁵ “Adoquien: ‘Aton na dadpen iqueque. Aid menenda, chuiquid,’ queposh iccuededquido.

²⁶ “Adoquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. ²⁷ Adembidi ëbi chieshënc abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

Chuiquid dapabimboec yec Edusaden yacno Esus choaid

(*Mat 21.1-11; Mad 11.1-11; Uan 12.12-19*)

²⁸ Aden chuibanashic Esus Edusaden yacmi nidequi anoentsëqui choash nidtuidpanëdash. ²⁹ Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: ³⁰ —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tècheicshun nëmbo bëta. ³¹ Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icho bunaid nec,” quequin chuita —quepanëdash Esus.

³² Adoac nidshun istuidtanquin ³³ cabayobitsecquidëmpi tënëshaid tècheicsho isash: —¿Atotsi canuen aid tècheique? —capanëdash icbon.

³⁴ Adoquien: —Con Icho bunaid nec —qeshun Esus yacno nimbanquin abi tënëshaidën buampanëdash Esusbëd icquidon.

³⁵ Aden bëshun, Chuiquid dapa Esus nepanui, quec onqeshun Esusbëd icquidon aton dashcute bëntsecquid chictanquin cabayobitsecquid capucshun Esus catsadumpanëdash.

³⁶ Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onqucuededpanëdash:

³⁸ —Nuquin Papan chomiaid ambi chuiquid dapa icmiaid ambi bëdambo icmiaidquiobidi nec. Nuquin Papa yacno abëdi bëdamboec tabadequi icaisatedi iquendac —quepanëdash iccuededquido comapenec cuëdcuededec.

³⁹ Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰ Adoquien: —Ëmbi naid chiec aidtedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

⁴¹ Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: ⁴² —Ëbi bëdambo icmequid Esus nec, quec nëbi ëbi tantiaquid mibi ictsiandac. Tantiesa icquin mibi chuiquid mimbi nibënacpadquid mimbi istuidtiapimbo iquendac. ⁴³ Yucash choquin uimanëmëquidon mibi cuentiapimbocnoc tsi-catebudcuenendac. ⁴⁴ Aden mibi tsi-catebudcuenshun min bacuëbobëdtabi naimbudquin mibi unës uashun nendac. Min shubutedi nibëdquienac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquio icnuc anocquido chiacbimboec adpanëdash.

Nuquin Papa tabadte shubu uashunaid yacnoshon cuemiaid

⁴⁵ Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash.

⁴⁶ Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aidtedi cuemec.

⁴⁷ Adoshombic, badiadquidën-badiadquidënquieq Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepaba? quequin caimbededpanëdash. ⁴⁸ Aden caimbededquimbi Esusën chiaid tantianu quec dadpen Esus datsidacsho isun ashunquio isadaidbon Esus cuesunemenuen bedtiapimbo icpanëdash.

20

*¿Tsundan chuibanta caid mibi ne?
(Mat 21.23-27; Mad 11.27-33)*

¹ Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash.

² Cho-choshon: —¿Tsundan chuibanta caid mibi neque? Tantaranu. Èbitedi chui — capanëdash.

³ Adoaquien: —Èmbia tantianu. Èbi chui. ⁴ ¿Nuquin Papan èmbi chiaid chuibanshun mentobanta caidta Uan icpondash? Padenquio mibi quenuc, ¿Matsesën nata caidta nepondash, quequina mimbi tantie? —quepanëdash Esus isadaidbo tsusiobo caic.

⁵ Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, èbitedi qesho tantiash Esus nadpendac. ¿Atotsieshun Uanën chuisho mibitedishun tantienquio icponda? ⁶ Matsesën nata caid Uan pado niondash, èbitedi qesho tantiashun iccuededquidon cuënoten nuquitedi se-sependac. Nuquin Papan chuimiãid, Uan icpondash, quequin iccuededquidon tantiec —quepanëdash isadaidbo tsusiobo.

⁷ Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

⁸ Adoaquien: —Mimbi chienquio yacpadembi èmbitsen èbi chuita caquid mibi chienquio icoaimbi —quepanëdash Esus.

*Neshcashunquidon icsambocquin naid
(Mat 21.33-44; Mad 12.1-11)*

⁹ Aden isadaidbo tsusiobo chuishumbic, Utsi chuinu, quiacimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi èbi neshcashunta caidtedi istuidash tied icbo nidposh. Nidaid utsin yuec tabadshumbic:

¹⁰ ‘Tiedën caniquid ènden bacuëpash. Èbi neshcashunquidën musucaid con na bedmeu,’ qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoaposh. ¹¹ Adoshombic, icbon aton tied yacno ambi namiaid utsi nidmeoaposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidentsen nidmeoaposh. ¹² Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³ ‘Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi èbi cudasaid con tied yacno nidmembali. Aidi con tied yacno chosho bédamboen ispec,’ quequin aton mado nidmeposh.

¹⁴ ‘Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. ¹⁵ Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiaichic Esus:

‘Min mado cuesuniosh,’ quequin utsin chiac ¿atotsi tied icbon napec? ¹⁶ Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquio icpashun —quepanëdash iccuededquido. ¹⁷ Adoaquien iccuededquido bëisequi Esus nadpanëdash: —¿Nuquin Papan dada uamiãidën naden chienquioda icpampic? Ai, aйдën chuipampid nad iquec: “Shubu uanuequidën isuidaид buintad utsin ambia nitsinaid icposh.” ¹⁸ Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiuidquid Nuquin Papan cuëshëdmiac compapen cuidte yacno tabadendac —quepanëdash Esus.

¹⁹ Aden Esusën chuisho tantiash: —Nuqui naid chiacimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

*Sesadën shocoshëmpi neque. Mene, quequin chiaid
(Mat 21.45-46; 22.15-22; Mad 12.12-17)*

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Amba ista caido, Bédambocquid nebi, quequin ismiacimboecquid icsho Esusën chuibanacno tsusiobon nidmepanëdash. Esus yacno nidshun èmbi ista caidon chuimiãic Esusën icsamboen chuitsiash. Aden chuisho isadaidpemo ancaquidën Esus

bedpashun, quequin tantiaquin nidmepanëdash. ²¹ Aden nidmiac choash Esus ista caid abentsëc: —Mimbi tantiaquequin chuibanaid bëdambo iquec, quequin tantiembi, Abitedi Nuquin Papan chiaid abimbo chuibanquid mibi nec. ²² Adquid mibi icquin ëbi chui. Tantianu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

²³ Aden chuisho tantiashun choboedën icsamboen tantiaid tantiaquin Esusën nadopanëdash: ²⁴ —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

²⁵ Adoquien: —Ancanquid Sesadën na nec —quepanëdash tsusiobon ista quequin chomiaid.

Adoquien: —Ancanquid, Bec cho, queshe meneta. Nuquin Papan naden nata cac adobanta —capanëdash Esusën. ²⁶ Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcededpanëdash.

Uincuen uaid chido bedesa nec, quequin chiaid
(Mat 22.23-33; Mad 12.18-27)

²⁷ Adashic, saduseyobo caido yec ²⁸ unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiad unësaidën bacuëbobimboecquid iquendac, quequin Moisesën dada uapampic. ²⁹ Aden Moisesën dada uaid icnuc dada 7ted iccuededpash. Aidedtada icnuc bëyuc tishaidën aton chido bedshun bacuë tishmiabi yec unëspash. ³⁰ Aton buchi unësan aidën chido bedash adecbidi bacuë tishmiabi yec unësoapash aton utsi. ³¹ Adembidi, bëyuc tishaid tsibanquidën—tsibanquidënkien chido abentsëqui bedto-bedtoec bacuë tishmiabi yec unësbunepash. ³² Yuecash chidotsen unësoapash. ³³ Adec chido abentsëcshun bënë dapden ichoedi uincuen uate ushë icnuc ¿mitsicquid chidon bënë icpeque? Èbi chui. Tantianu —quepanëdash saduseyobo Esus caic.

³⁴ Adoquien: —Nidaidënsnun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec. ³⁵ Uincuen uate ushë choan Nuquin Papan bëdamboen isaïdo abëdi tabadquïn chido bedenquo iquendac. Adembidi, aton champi menenquo aton papan iquendac. ³⁶ Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquo iquendac. Nuquin Papan uincuen uatequido aton bacuëbo nendac. ³⁷ Adembidi chuïnu. Tantia. Cuëtempi nëdënquiacbimboecquid isun Moisesën dada uapampid nec. Cuëte nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquën papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuipampic. ³⁸ Moisesën tsusedpabo ambi chuiboed ënden unësampidën nami chodquaidën papa cain Nuquin Papa cuëntiapimbo iquec. Aton nami chodquish abi tantiaquidquo icquin tantiec tsadquidën papa cain Nuquin Papa cuënec —quepanëdash Esus saduseyobo chiec.

³⁹ Aden Esusën chuisho tantiashun Nuquin Papan naden nata quequin chiaid tantiaquequid padiseyobo utsi-utsiec nadpanëdash: —Bëdamboen mimbi chuibanoc —quepanëdash Esus chiec. ⁴⁰ Aden Esusën chuisho tantiashun Esus chuimetiapimbo utsibo icpanëdash.

¿Tsuntsin mado Quidistu nepec? quiaid
(Mat 22.41-46; Mad 12.35-37)

⁴¹ Aden utsibon abi icsamboen chuimetiapimbo icsho isun Esusën nadopanëdash: —Èbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuïpec? ⁴² Dabidën ambibi Sadmo caid dada uaqin naden chuipampic:

“Icho utsi yec con mado mibi chiembique. Tantia, quequin chiec icho dapa nadpampic:

‘Èquë con dayun abiucquo cainec tsadec cho

⁴³ ma mibi chieshënkuidtedi mimbi namiaid ma icpanu,’”

quequin Nuquin Papan Esus chiaid Moisesën dada uapampid nec. ⁴⁴ Aden Dabid padon dada uaqin ¿mitsipadomboentsibi con icho cashumbi con mado ëbi caoapampic Dabidën? —quepanëdash Esus abi chieshënkuido caic.

Naden nata quequin chiaid tantiaquequidpadquid iquenda, quequin chiaid
(Mat 23.1-36; Mad 12.38-40; Duc 11.37-54)

⁴⁵ Aden chuishun iccuededquidon tantianubi abëd icquido Esusën nadopanëdash: ⁴⁶ — Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadeq dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Èbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibaite shubun puduedash, Tsusio dapabimboecsho ispashuni, quec tsusiobo tsadacno tsadteneq. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadteneq. Adquidpadquid iquenda. ⁴⁷ Aidon bëdamboen nabanacbimboen nianten natedi bedbanec. Aidombidi Nuquin Papa abimbo tantiacbimboec yuen chieq onquec. Aden bëdamboen nabanacbimboecquido Nuquin Papan comapenen cuidendac. Adoesa bëdiactsec cuidendac —quepanëdash Esus abëd icquido chieq.

21

Nianten piucquid shocoshëmpi meniaid (Mad 12.41-44)

¹ Adashic, Nuquin Papa tabadte shubu uashunaid yacno tabadtuidash tsadquin Esusën isbampanëdash. Ambi isaïdo Nuquin Papa tabadte shubu nacnemete cuidnu, quequin menequin aid shubun shocosh tabëcaidën aton na bedtequid utsin-utsinquin sandobedpanëdash. Aton na bedtequid dadpen icquidon dadpen sandobededsho isquimbi ² nianten aton na nibëdquidëmbi aton na bedtequid shocosh daëd ictsecquid sandosho ispanëdash. ³⁻⁴ Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niante isec. Utsibon aton na dadpen abi icnubi dadpen menesho, Daëdpacksec menequido nec, quequin Nuquin Papan aido isoac —quepanëdash Esus.

Abitedi naimbudte ushë choec quequin chuite (Mat 24.1-35, 42-44; Mad 13.1-37)

⁵ Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

⁶ Adoaquien: —Mimbi nëbi isaïd yuecash nidbëdquendac. Matses utsibon nëid shubutedi chieq-chieqbudendac —quepanëdash Esus.

⁷ Adoaquien: —¿Mitsipadën Nuquin Papa tabadte shubu uashunaid chieq-chieqquin tauapeq? ¿Aid ushë anoentsëqui yanuc mitsipadquid ismiante icpeque? Tantienu. Chui —quepanëdash utsibo.

⁸ Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaïd Quidistu nebique. Èbëd iquec cho,” queded-quededendac. Aden chuiquid tsibanenda. ⁹ Adecbidi: “Cuesnancuededec,” qesho tantiassh dacuëdenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepanëdash Esus.

¹⁰ Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. ¹¹ Adecbidi, nidaid utsi-utsiec yacno canchednuec ishucud-ishucudendac. Adecbidi, utsi-utsiec yacno bunquiqote iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucuehsh natiambo icsho mimbi isbededendac.

¹² “Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac ¹³ aidotsen tantiaquid yantsiassh qeshun ëbi chuibanta. ¹⁴ Aden buanaqui, ¿atotsimbi ancanquid cape? quequin tantiec tsadenda. ¹⁵ Nuquin Papan Mayanën tantiamicpadomboen mimbi chuibanendac. Adoaq, Icsambocquid mibi nec, quetiapimbo mibi chieshënquido iquendac. ¹⁶ Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiassh. Animbi aton mado adembidi adotsiassh. Utsi aton buchimbi adoatsiassh. Utsi aton chuchumbi adoatsiassh. Utsin abëdtan isedquidëmbi adoatsiassh. ¹⁷ Èbi tantiaquid chieshënquid dadpen iquendac. ¹⁸⁻¹⁹ Aden nabanquin mibi cuesunemenu, cac chieshenquio yec, Esus tantiaquid nebi, quequid icta. Adquid iquec unësash ënëdenquio yec Nuquin Papabëd mibi tabadendac.

²⁰ “Adecbidi shubu dadpen icquid Edusaden caid yacno cuesanquid dadpen chochoshon tsicabedsho isash, Edusaden yacno naimbudte ushë choec, quequin mimbi tantiendac. ²¹ Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquio cuempanuna. Adecbidi, dëuequido Edusaden yacno ma nidenquiocpanuna. ²² Aid ushë icnuc Nuquin Papan chiacpadomboen

cuidtequid iquendac. ²³ Aid ushë chonoc matses utsibon Edusaden yacno tsicategubadac pete naimbudnuc bacuë usunquidobëd bacuë chishmequido mëyadec natiacquendac. Edusaden yacnocquido abi tantiesabo icsho Nuquin Papan natiambocquin cuidte iquendac. ²⁴ Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicategubadac Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

²⁵ “Adec Nuquin Papa, Chën, quian badiadën ushë, inchëshën ushë uispa chedo aidtedi ambi nadatiambocquin naid ismiantequid iquendac. Aid ismiantec icsho isash, Uinsadpambo iquec, quec comapenec dacuëdec matsestedi tabadcuededendac. Acte nati-ambo chëuëdsho isash adquecbidi comapenec dacuëdec matsestedi tabadcuededoaindac. ²⁶ Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac. ²⁷ Adnubini Nuquin Papan chomiaid matsesaid ëbi daisuiddac bëchomauanquec ushë chënquiacbimboec uëshëmbo yec nadatiambocquin nabanquidquio abu ushun ëbi budsho matsestedishun isbededendac. ²⁸ Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdamocquin abuc isteneta —quepanëdash Esus.

²⁹ Aden chuishumbic ambi chuiboed ushë chote tantiamenuen nadopanëdash: ³⁰ —Cuëtempï bacuëacsho isash, Ènden suc secduquiac nëbi seta taëec, quequin matsesën tantiec. ³¹ Adembidi ëmbi chuiboed icsho isun, Nuquin Papabëd tabadte ushë choec, quequin mimbi tantiec. ³² Abimbo chiembique. Tanti. Èmbi chuibamboed naimbudabicnuc con tan matses isadaidbo naimëdbudenquio iquendac. ³³ Abubëdta naimbudtequid nidaid nendac. Èmbi chiaid abimbo iquendac.

³⁴⁻³⁵ “Adembidi chuinu. Tantiata. Nidaidën capuquidën, Nëbi ëbi sec, quequin tantienquio yec capusho badedquio siac cuentiapimbo iquec. Adembidi, Natiante ushë choec, quequin tantienquio yec chëshquin badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedi cuidte ushë choenda ictic? Ai, aid ushë choendac, quequin caimbudec bëdamboec tabadta. ³⁶ Ènenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ëbi icme, Papa. Adembidi natiambocquin cuidte ushë chonoshe queshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquio ëbi icmeta, Papa, quec onquedeneta —capanëdash Esusën.

³⁷ Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquiec macuësh Odibos caid yacno nidash tabadtenepanëdash. ³⁸ Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

22

Esus bedmenu, quequidquio Udas

(*Mat 26.1-5, 14-16; Mad 14.1-2, 10-11; Uan 11.45-53*)

¹ Adashic, nami uabicquid pete tantiate ushë, Pascuas caid, anoentsëqui yampanëdash. ² Aid ushë choabicnuc isadaidbo tsusiobobëd Nuquin Papan naden nata quequin chiaid ut-sibo tantiamequido iccuedetenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquio icpanëdash. ³ Adnubien Udas cashumbic Iscadiote caid Esusbëd icquid dapuduedshun Satanasën tantiamiac ⁴ Esus chieshëquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshëquid utsibo iquec quianec aido yacno Udas choash, Esus bedmete bunebi, quequin chuipanëdash. ⁵ Aden chiac isadaidbo tsusiobo bëdamo iquebi quetanquin: —Esus bedmiacsho mibi piucquid menenu —capanëdash Udas chuiquin. ⁶ Adoaquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshëquido, isadaidbo tsusiobo, Esus bedmeme, quequin isted-istedpanëdash Udasën.

Ènquin nidaidëshun Esusën pebanaid

(*Mat 26.17-29; Mad 14.12-25; Uan 13.21-30; 1Cod 11.23-26*)

⁷ Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe queshun obeca bacuëded cuesuneshun shubu shëcuë ècnoshcaid isun unës uainquiocquin Nuquin Papan uaido mayan bëdabon matanampid

tantiante ushë icpanëdash. ⁸ Aid ushë chonoc Uambëda Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

⁹ Adoquin: —¿Mitsishumbimbi aid nacnempe? —quepanëdash Uambëd Petedo.

¹⁰ Adoquin: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun ¹¹ shubun puduedabi naden shubu icho chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. ¹² Aden chiac abuc decatashon abuc quënëcquid mibi aidëmbi ismendac. Ashunquo penun nacnenta —capanëdash Esusën.

¹³ Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.

¹⁴ Adashic, inchëshën choash abëd icquidobëd pete sante cueste dayun uequi Esus: ¹⁵ —Ëbi mëyante yanabicnuc bëyuc tshaid cuesunianquidën cuesunianquiocquin matanampid tantiaquin pec mibëdi tabadtiaquio yanobi. ¹⁶ Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquo iquendambi. Matses icsaquid icsho cuidnushe queshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquo pendambi —quepanëdash Esus.

¹⁷ Adoshombic dëshote sananec Nuquin Papa chiec onqueshun actanquin abëd icquido menec: —Në, aniacse-aniactsen acban mibitedishun. ¹⁸ Tiedën caniquid ënë nidaidëshun padpiden aquenquo iquendambi. Nuquin Papa yacno choash tabadquidobëdtambi ashunquo aquendambi —quepanëdash Esus.

¹⁹ Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

²⁰ Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, queshun obecaded cuesunemenuen isadaidbon menedeniac. Aden cuesuniaiðen intac siquéc unëso isun, obeca cuesuneboed ëbi icsaquid icsho cuidnushe queshun cuidtequid nec, quiampicpaden abi chiec. Padnuen nëbi unës uashun siac aton intac siquéc matses icsaid bedshunash Esusded cuidadac, quequin tantiantequidquid nendac. ²¹ Ëbi chieshënquido ëbi bedmenuequin chuiquid pete sante dayun ëbëdi uec. ²² Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

²³ Aden Esusën chuisho tantiash abëd icquido: —¿Midacquidien capec? —quecuededpanëdash.

²⁴ Adashic: —Doseted nuqui iquéc. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash. ²⁵ Adec chushcanansho tantiash Esus nadpanëdash: —Isadaidpembro ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. ²⁶ Mibitedi adquid iquenda. Nadquidquid icta. Chuiquid nebi, quec tsyuec caniquidbimboecquid icta. Chuiquid iquid utsi namiacpaden nabanta. ²⁷ Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. ²⁸ Ëbi chieshënquido icnuc ëbi nianesa ²⁹ icsho con Pan ëbi chuiquid icmiacpadquid chuiquid mibitedi icmendambi. ³⁰ Aden chuiquid icmiac ëbëd icquid ëbëdtambi peshun aqec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëda ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

*Esus ëmbi isacmaid nec, quequin Petedon chiaid
(Mat 26.31-35; Mad 14.27-31; Uan 13.36-38)*

³¹ Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiaquidquid iquéc. Aden yuanuequin piacho macuesquin nainshun bitsi secacimbombo mëyantankin ëbëd icboedi mibi cuëshëdmetiadquid iquéc. ³² Aden mibi Satanasën yuatiaquidquid iquéc, quequin tantiaquin Nuquin Papa naden chiombi. Simon ëbëd icquidquid iqueque. Yuadnushe queshun Satanasën niac-niacmete chiaid Petedo tantienquidquid icmeta, Papa, quequin chiombi. Adec ëbëd icboedi cuëshëdtssembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

³³ Adoquien: —Mibi caic, Quënën nauednu, quenuc mibëdi naudedabi. Adecbidi mibi caic, Unës uanu, quenuc adecbidi mibëdi unës uadebi, Icho —quepanëdash Petedo Esus caic.

³⁴ Adoquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

Buanenda, queboedëmbi, Buanta, quequin chiaid

³⁵ Aden Petedo chuishumbic abëd icquidtedi chuiquin: —Mitsana bedtequid buanenquio yec shictoade buanenquio yec dashcute utsi buanenquio yec quec nidaneta, ëmbi cac nidash ðmibitedi bunecta tabado? —capanëdash Esusën.

Adoquien: —Padenquio —quepanëdash abëd icquido.

³⁶ Adoquien: —Ënden adquid buanenda, queboedi, Èbi nibëdnuc mitsana bedtequid shictoadebëdtabi buanta. Chështe bednu, qeshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. ³⁷ Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

³⁸ Adoquien Esusën chuiboed tantienquio yec abëd icquido: —Në, chështe daëd iqueque. Is, Icho —quepanëdash.

Aden abëd icquidon tantienquiocsho isash: —Ai, padi —quepanëdash Esus.

Macuësh Odibos caid yacnoshon Esusën Nuquin Papa chiaid

(Mat 26.36-46; Mad 14.32-42)

³⁹ Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash. ⁴⁰ Adec nidequi abi tabadteniacno choshon Esusën: —Chieshëmënkuidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. ⁴¹ Aden chiasic abiuïdtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: ⁴² —Mëyanquin mibi unës uanu, ëbi chieshënquidon casho tantiash buanenquio yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. ⁴³ Aden Esusën badedbadedquien chuishobi Nuquin Papan uaid mayan bëda choshon Esus chieshtomenquio icpanëdash. ⁴⁴ Aden uidën uaqi adec uëshquec Nuquin Papa chuiquiequi ichacbëd intacash nidaidën siquepanëdash.

⁴⁵ Aden Nuquin Papa chiasic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: ⁴⁶ —¿Atotsi quiash ushe? Nid-toshon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

Esus bedaid

(Mat 26.47-56; Mad 14.43-50; Uan 18.2-11)

⁴⁷ Adec Esus onquenubien Esusbëd ichoedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: ⁴⁸ —¿Èbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

⁴⁹ Aden Udasën nac Esus bednuesho isash Esusbëd icquido: —¿Cho-choquido nuquida cuesten cuespe? —quec ⁵⁰ onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹ Adosho isash: —Padi. Chën. Chën. Adoenda —quetanquin Esusën tsusio dapan yuan pabiate patiacno mishquin bédamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, qeshunda utsin-utsinquien chështe sananubi utsin-utsinquien cuate sananec cho-chopec? ⁵³ Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

Èmbi isacmaid nec, Petedo quiaid

(Mat 26.57-58, 69-75; Mad 14.53-54, 66-72; Uan 18.12-18, 25-27)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. ⁵⁵ Adec choec umanuc cuëte dëtsiadaoid cuëc utsibo tabadacno Petedo cuëte cuëc tsadpanëdash. ⁵⁶ Ambo Petedo tsadsho isash tsusion yuaid chido anoentsëqui choshon bédamboen isec: —Nëid bëboedbëd ichoedi nec —quepanëdash.

⁵⁷ Adoaquien: —Bëboed ëmbi isacmaidquio nec —quepanëdash Petedo.

⁵⁸ Adashic, yuepactscëshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquio iccobi —quepanëdash Petedo.

⁵⁹ Adashic yuec-yuepactscëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queoapanëdash.

⁶⁰ Adoaquien: —Mimbi chiaidbëd icquidpenquio nebi —quepanëdash Petedo. Aden chuinubien cachina bënë cuëdampanëdash. ⁶¹ Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash ⁶² unësquio yec amanuc nidash Petedo shubiiquioapanëdash.

Esus sondadon mamëshunaid
(*Mat 26.67-68; Mad 14.65*)

⁶³ Adshumbic Esus cuenushe queshun abi isquidon, sondadon, Esus mamëshumbededquin cuesbededpanëdash. ⁶⁴ Adoshombic, dashcute cuëshaidën bëpucshun cüestanquin Esus sondadon nadopanëdash: —Mibi tantiaquidquio icquin çmidaquidën mibi nëbi cueseque. Tantianu. Chui —capanëdash Esus chuiquin. ⁶⁵ Aden cuesbededquin Esus icsamboen chuipanëdash.

Isadaidbo tsusiobo yacno Esus buanaid
(*Mat 26.59-66; Mad 14.55-64; Uan 18.19-24*)

⁶⁶ Adshumbic badiadnubi isadaidbo tsusiobo iccuededacno Esus buanshun ⁶⁷ nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tantianu. Chui —quepanëdash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquio iquendac. ⁶⁸ Ademibidi, çMitsipadquidquio Nuquin Papan chomiaid neque? Tantianu. Èbi chui, cac ëcbedenquio mimbi iquendac. ⁶⁹ Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi —quepanëdash Esus isadaidbo tsusiobo tantiamequin chiec.

⁷⁰ Adoaquien: —çNuquin Papan madombobi nebi, quequina chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹ Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquicquin chuita, cainquio iqembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

23

Pidato yacno Esus buanaid
(*Mat 27.1-2, 11-14; Mad 15.1-5; Uan 18.28-38*)

¹ Aden ambibi chiec Esus muc nec, isadaidbo tsusio abentsëc quesho tantiash isadaidbo tsusiobotedi nidtoshon Esus bedshun Pidato yacno buampanëdash. ² Aden Pidato yacno Esus bëc choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³ Adoaquien Pidato: —çIsadaidbo chuiquid dapada ne? —quepanëdash Esus caic.

Adoaquien: —Mimbi chiaidquio abimbo iquec —quepanëdash Esus.

⁴ Adsho tantiash: —çAtotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵ Adoaquien: —Ambi tantiamiaidënquio Cadidia yacnocquido nëishmiac comapenec cuëdcededosh. Anoshon tantiameshumbic Edusaden yacno choshon adomboembidi tantiameoaposh —quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: —çNidaid Cadidia yacnoësh choquidta Esus nec? —quepanëdash Pidato.

⁷ Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, quesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nèbi bédambo iquebi, quequin èquèducshun tantiapanèdash. Nadatiambocquin nabanquidquo nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec ⁹ Esus chuimenu quec Edodes onquepanèdash. Adoagui Esusèn ècbedenquo icpanèdash. ¹⁰ Adnubien isadaidbo tsusiobo: —Esus icsambocquid nec — quepanèdash comapenec onquec Edodes chiec. ¹¹ Adoac Edodesbèd sondado Esus icsamboen chuiquin mamènshunbededshumbi chuiquid dapan dashcutebimboecquid abichobicquid Esus dasiunshun Pidato yacno buameoapanèdash. ¹² Mimbi tantiacpaden Esus cuidta, quequin Pidato chuita, quequin Edodesèn chuitanquin Pidato yacno Esus padpiden buamepanèdash. Adoac Edodesbèd Pidato bédambo yampanèdash.

Esus cuesten dectameta quiaid

(*Mat 27.15-26; Mad 15.6-15; Uan 18.39-19.16*)

¹³ Adashic, isadaidbo tsusiobobèda isadaidbo utsibo chomeshun ¹⁴ Esus ismetanquin Pidaton nadopanèdash: —Nèid dada bëash: “Cuèshèdmianquid nec,” quequin mimbi èbi chioc. Adoac aibdèdi onquiash, ¿Cuèshèdmianquidta nedic? quendabi. ¹⁵ Aden èmbi tantiacpadomboen tantiaquin Edodesèn èbi yacno chomeoaposh. Esus unès uainquioctiadquidi nec. ¹⁶ Aden tantiaquin mëyanshun aidi nidmenuna —quepanèdash isadaidbo tsusiobo caic.

¹⁷ Aden chiac naden isadaidbon tantiapanèdash. Setan-setanquien icsambocquid con matses quènèn nauedaid abentsèc ambi nidmiacpaden nèbi adquid utsi Pidaton nidmetsiash, quequin tantiec isadaidbo nadec cuèdcuededquin: ¹⁸ —Nèid Esus caid unès uatiadquidi nec. Mimbi quènèn nauednèdaid Badabas cuèmèdquid puduemeta — capanèdash comapenec cuèdcuededquin isadaidbon. ¹⁹ Ancanquid bunenquiocquin utsibo cuèdcuededmiondaid utsi cuesuniondaidbidi Badabas icsho quènèn nauedmepanèdash.

²⁰ Adec isadaidbo cuèdcuededsho tantiaash Esus nidmetiadquio iquec: —Esus cuidenquioctiadquidi nec —quepanèdash Pidato isadaidbo caic.

²¹ Adnubien: —Cuesten dectame —capanèdash isadaidbon yuec comapenec cuèdcuededquin.

²² Adec cuèdcuededsho tantiaash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantanu. Ma unès uainquioctiadquidi neyoc. Aden tantiaquin mëyanshun Esus nidmembi —quepanèdash Pidato.

²³ Adoaguien: —Cuesten dectame —quepanèdash cuèdcuededoac isadaidbo Pidato, Ai, camenuc.

²⁴ Adoac iccuededquidon chiacpaden namenuc ²⁵ Pidaton: —Utsi cuesuniondaid Badabas puduemeshun Esus cuesten dectameta —capanèdash Pidaton cuesten dectamènquido chuiquin.

Esus mëyanaid

(*Mat 27.32-44; Mad 15.21-32; Uan 19.17-27*)

²⁶ Pidaton, Esus cuesten dectameta, cac sondadon abi dectante cuate Esus buamequimbi Simon, Sidene yacnochun tishaid, chosho bèquedtuiddanquin Esus dectante cuate Simon buamiac Esus tsibambèpanèdash. ²⁷ Adec Esus nidsho isun matses dadpeshun shubiquin tsibanampanèdash. Adembidi abi tsibanquid chidobo icpanèdash. ²⁸ Adec chidobo abi tsibanec shubisho tantiaash bidadshun isec Esus: —Èbi tantiec shubienda, Edusaden yacnocquidon chidobo. Mibibi tantiadec min bacuèbobèda tantiec shubicuededta. ²⁹ Yuecash mëyantequid ushè choendac. Aid ushè chonoc bacuè tishtiapimbocquid caic utsibo nadendac: “Bacuèbo nibèdquid icquin min bacuèbo natiasho isenquo mimbi iquec. Adquid yec bédamboshè mibitedi iquec.” ³⁰ Mëyantequid ushè chonoc matses utsibon natiambocquin mëyanaiquin naden mimbi Nuquin Papa chiendac: “Natiambanquieque. Acte quiusudquid macuèsh dapa catashmetabi, Papa, mibi quendac. Adecbidi, Acte quiusudquid macuèsh masiametabi, Papa, utsi queoaindac.”

³¹ Èbi buansho isec shubiequi, Èbi mëyantequid ushè choec, quequin tantiesa mibi icpec. Nèdènquenquioctiadquidi achuèshquiocquid nèdèncasho isash: “¿Tanunquiocquid badedquio nèdènquenquo icpec,” quecta mibi icti? Adembidi: “Cuidenquioctiadquidi nec,” queboedèmbi èbi icsaisa unès uasho isash: “¿Èbitedi icsambocquid comapenec cuidenquo icpec,” queoapecta mibi ique? Ai, quequin tantiatad —quepanèdash Esus.

³² Adnubien Esusbèda icsambocquid dada daèd nidmequimbi ³³ macuèsh mapi canite caid yacno choshombi èquè daèd dectambudcuentanquin nènantanquo Esus dectampanèdash. ³⁴ Dectanac diadequi Esus Nuquin Papa caic: —Èbi unès uanuequidon tantienquiocquin unès uainquioctiadquidi cuesten dectanoshibique. Aidon icsamboen nambo

yacimboc bēpiscudta, Papa —quepanēdash. Adnubic Esusēn dashcute bednuequin sondadon dada uashun tēchun sandoshon cadotanequin dada uatempi puduemebanquin isquin Esusēn dashcute bedbampañdash.

³⁵ Adnubien matses dadpeshun isnubi Isadaidbo tsusiobo isec tabadquin mamēnshumbedec: —¿Utsi-utsien Nuquin Papa yacno yuedanquidta nec? Aidi matses mēnchitequid nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpañdash.

³⁶ Adembidi sondadon Mamēnshumbedequin paēmboquid mucambocquid sananquin Esus ismequimbi: ³⁷ —Isadaidbo chuiquid dapa iquec unēsenuio iquebi, quiash nēid bednush bud —capanēdash sondadon.

³⁸ Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpañdash: “Nēid, isadaidbo chuiquid dapa nec,” quequin dada uashun Esusēn mapino dectamepañdash.

³⁹ Adnubien, Esus icsamboen chiec icsamboquid Esusbēdta dectamboed abentsēc: —¿Nuquin Papan chomiaid, Quidistuda ne? Adquid icquin mimbi budmiac ēbi daēdi mibēd budebi —quepanēdash abēd diadquid.

⁴⁰ Adec Esusbēdta dectamboed abentsēc onquesho tantiash aibdēdta dectamboed utsi: —¿Aidi unēs uatequid yacpadquid mibi yec, Nuquin Papan ēbi cuidendac, quec dacuēdēnenquioda mimbi icpe? ⁴¹ Icsamboen nabanacsho cuidaid ēbi daēdi nec. Aidi bēdamboquin nabanquid icsho cuidenquioctiadquidi nec —quepanēdash.

⁴² Aden chiashic Esus caic: —Mibi yacno choash chuiquid dapa icquin ēbi bēdamboen tantiaquin nata —quepanēdash Esusbēdta dectamboed utsi.

⁴³ Adoaquien: —Abimbo chuinu. Tantiā. Nēid ushēmbi abuc ēbi bēdamboec tabadacno ēbēdi mibi iquendac —quepanēdash Esus abēdta dectamboed abentsēc chiec.

Esus unēsaid

(*Mat 27.45-56; Mad 15.33-41; Uan 19.28-30*)

⁴⁴ Adec onquenubi ushē cuembo yanuc bētinaimboc inchēshquio yashic ushē budtsan chēnquedoapanēdash. ⁴⁵ Inchēshquio icnubi Nuquin Papa tabadte shubu uashunaid yacno puduedtemaid quēnēn dashcute bitsipambocquid tsincabudquin dectanēdaid tembi daēdquio yec canchedbudcuempañdash. ⁴⁶ Adnubien unēsibudec comapenec cuēdec: —Mibi yacno ēbi yuedta, Papa —quiash Esus unēsbudpañdash.

⁴⁷ Adec Esus unēsō isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bēdamboquid niosh. Aidi unēsenuioctiadquidi unēs uaposh —quepanēdash. ⁴⁸ Ambo tabadquin isquid utsibo Esus unēsō isash unēsquio yec aton shubuno nidanepañdash. ⁴⁹ Aido nidnubien nidaid Cadidia yacnoēsh choshon chidobon Esus tsibanamboedon dadabēdtambi uano tabadquin isbededpañdash.

Esus nauedaid

(*Mat 27.57-61; Mad 15.42, 47; Uan 19.38-42*)

⁵⁰ Adnubic, ambobi dada, Ose cuēmēdquid, isadaidbo tsusio utsibobēd iccuededquid abentsēc bēdamboquid icpañdash. ⁵¹ Isadaidbo tsusio utsibo, Esus unēs uatiadquidi nec, quenubi, Padi. Unēs uainda, quepanēdash Ose. Aidi nidaid Udeya caid shubu dadpen icquid Adimateya caid yacnoshon tishaid icpañdash. Aidi Nuquin Papan chomiaid chuiquid dapa iste bunquin cainquidquio icpañdash. ⁵² Aidi Esus unēsō isash Esusēn dada nauedtiadquio yec Pidato yacno nidshun ambi tantiacpaden Osen chuipañdash. ⁵³ Aden chiaquien Pidaton: —Adotan —cac nidshun Esusēn dada imbudshun dashcute ushumbocquidēn dataneshun buanshumbic ambi macuēsh cuēnote shēcuē nacnenaid chucanquio Esus Osen badedquio nauedpañdash. ⁵⁴ Inchēshbudtsēqui seis yanuc chonoadtemaid ushē nec, qeshun Esusēn dada Osen nauedpañdash.

⁵⁵ Adnubien: Nauednu, quequin Osen buansho isun Cadidia yacnoēsh Esusbēd chobedon chidobon tsibanshun shēcuēn Esusēn dada Osen nauedsho aidon isbededpañdash. ⁵⁶ Aden isash aton shubuno nidaneshun noadte bēda Esusēn dada danoshcanu qeshun danoshquete chidobon nacnempañdash. Nacnenash inchēshbudtsēqui seis icnuc Nuquin Papan chiapadec chonoadtemaid ushē nec, quiash Esus nauedacno nidenquio yec tabadpañdash. Nuquin Papan chiapadec tabadpañdash.

24

Esus uincuenta

(*Mat 28.1-10; Mad 16.1-8; Uan 20.1-10*)

¹ Adashic, sabado inchēshbudtsēqui seis yanuc chonoadtemaid ushē naimēdan badiadnuc danoshcanun ambi nacnemboed buanec Esus nauedhocno isec chidobo nidpañdash.

² Ambo choshon Esus nauedshun bêtashaid cuënote shëcniacsho isashi ³ shëcuën puduedash aton Icho Esusën dada nibêdsho isec tabadpanêdash. ⁴ Adec tabadnubien dada daëd dashcute dasiuidachimboec dasiuidash chênquec chopanêdash. ⁵ Aid isash dacuëdcuededequi isenquio yec chidobo tabadpanêdash. Adsho isash dada daëd: —¿Atotsi canuen unêsacsho nauedac uincueniaid nibêne? ⁶ Nëmbo nauedboedi nibêdec. Aidi uincuenaccosh. ¿Aidi Cadidia yacno mibêdi tabadshun chuisho tantienquida icco? ⁷ Naden Esusën mibitedi chiondash: “Matesaid ëbi icsho bedshun icsamboequid ëbi menendac. Aden meniac cuesten dectanac daêdec ushtanec uincuenoaiabi,” quequin Esusën chiondash —quepanêdash dada daëd chidobo caic. ⁸ Aden chiac chidobon Esusën chiaid abi bëpiscudaïd padpiden tantia-panêdash.

⁹ Aden tantiaish Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbêdtabi ambi tantiaboed chidobon chuïbampanêdash. ¹⁰ Madia shubu dadpen icquid Mactada caïd yacnoshon tishaid yec Uana yec Madia utsi Umbêdtan Acobon tita yec chido utsibo yec quec choshon Esusën Èbi chuïbeneta caïdo chuïpanêdash. ¹¹ Aden chuïsho tantiaish: —Mimbi chiaïd tantiatipimbo iquebi —quecuededpanêdash iccuededquido. ¹² Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaïd dashcuteuidi uesho ispanêdash. Aden isanec nidequi: —¿Atodain nechitec? —quepanêdash Petedo tantienquio yec.

Emaus yacmi nidte
(Mad 16.12-13)

¹³ Adashic abi ushëmbi Edusaden yacnoësh utsibobêd iccuededboed dada daëd shubu daêdpactsëc icquid Emaus caïd yacno nidpanêdash. ¹⁴ Adec nidequi ambi Edusaden yacnoshon isboedbêdta ambi tantiaboed chiec onquepanêdash. ¹⁵ Aden chiec onquec nidshobi Esusën aid daëdi chinunash aidobêd nidpanêdash. ¹⁶ Aden abi chinuntuidsho isac utsibimboec Esus isadpanêdash.

¹⁷ Adec nidequi Esus: —¿Atotsi chuïbanec onquec nide? —quepanêdash. Adsho tantiaish unêsquio yec mamënenquio yec nidtuidpanêdash.

¹⁸ Adec nidtuidash Quêdeyopas cuëmêdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanêdash Esus caic.

¹⁹ Adoaquien: —¿Atotsi naid chiec ne? —quepanêdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaïd chuïmiaïd icquin ambi chuïbaniaïd ambi nabanaïdbidi Nuquin Papabêdtan mates dadpenshun bédamboen isaid icposh. ²⁰ Nuquin tsuio dapabobêdtan nuqui chuïquid utsibon Esus bedshun: “Unês uata,” quequin isadaïdpembo chuïquid meniac cuesten dectanquin unês uaposh. ²¹ Nëbi chuïquid dapa isadaïdpembo iquenquiopashun, quequin Esus isadaïdbo yec isadaïdbo chuïquid dapa ictsiash quequin ëbitedishun tantiapombi. Èmbi caboedi unês uaposh. Aidi unês uan daêdec ushobi. ²² Adec daêdec ushun dacuëdanquecnic chidobon naden chuïbededposh: “Esusën dada nauedbocno badiadnuc nidshun isac ²³ nibêdosh. Ambobi icnubi Nuquin Papan uaido mayan bédabo daëd icsho isac, ‘Mimbi nibënaïd nibêdec. Uincuenac,’ quiosh,” quequin chidobon chuïposh. ²⁴ Aden chidobon chuïsho tantienquio yec ëbêd icquido Esusën dada nauedbocno nidshun chidobon chuïbocpadembi unês uaobed nibêdsho isposh —quepanêdash ambi chinunaido Esus chiec.

²⁵ Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaïd chuïmiaïdon dada uampid bëdiactsëc tantiatsec tantiesabidi ma mibi neyoc. ²⁶ ¿Bédamboec tabadacno chuïquid dapa icnuec Esus mëyanaiaba iquendactiosh? —quepanêdash Esus. ²⁷ Aden chuïbanquin Moisesën dada uampidbêdtabi Nuquin Papan ambi yuecshun nanun chiaïd chuïmiaïdon dada uampid tantiamequin Esusën chuïbampanêdash.

²⁸ Aden chuïbanequi shubu daêdpactsëc icquid Emaus caïd yacno anoentsëqui choshon datanshobimboecnic Esus isun: ²⁹ —Inchësheque. Nëmbo ëbi yacno tabadec cho —abi daëdshun cac nidash aidobêd tabadpanêdash.

³⁰ Adashic, shubu nuntan pete sante dayun abëdi uequin pete bedshun Nuquin Papa chuïshun cuësh-cuëshun Esusën menebampanêdash. ³¹ Aden nasho isun badedi, Esus nec, quequin tantianubi Esus nibêdquio yampanêdash. ³² Adsho isash: —¿Podquedën choquin Nuquin Papan chiaïd dada uampid chuïsho tantiaish, Bédambo yanobi, quenquiodabi ëbi daëdi ictio? —quepanêdash Esus yuedquido.

³³ Aden chuitanequi Emaus yacno choboed daëd badedi Edusaden yacno nidoapanêdash. Edusaden yacno choash Esusbêd icquido 11tedbëdi utsibo iccuededacno puduedacsho isash: ³⁴ —Abimbo iquec. Nuquin Icho uincuepacosh. Uincuenanec choquin aidëmbi Simon ismetuidposh —quepanêdash iccuededquido. ³⁵ Aden iccuededquidon chuïsho

tantiashun Emaus yacnoësh choaboed daëdshun Esusën abi chinunshun chiaidbêdta ambi pete bedshun Esusën cuësh-cuëshbamboed chuipanêdash.

Abêd ichoedo yacno Esus chote

(*Mat 28.16-20; Mad 16.14-18; Uan 20.19-23*)

³⁶ Adec onquecuedednubi nēnantanquio choshon Esusën: —Nuquin Papan bēdamboen isaid yec dacuēdenquio yec tabad —capanêdash.

³⁷ Adec aid chosho isash: Podo bitsi nec, quec dacuēdequi abêd icquido tabadpanêdash.

³⁸ Adsho isashien Esus: —¿Atotsi quiash, ¿Esusida nepec? mibitedi quepe? ³⁹ Con mēdantebêdta con taë is. Èbibi nebique. ¿Mētoccaid taëbêd chiuë nibêdecta ye? Mishec cho. Èbi yacpadquid canitebêd nami icquid podobitsi nibêdec —quepanêdash Esus abêd icquido chiec.

⁴⁰ Aden chuitanquin abi bēchun shuin mētoccaid chiuë aton mēdantebêdta aton taë Esusën ismepanêdash. ⁴¹ Aden ismiac, Aidquiobi nec, quenquio yec abêd icquido mamēncuededquin isec bēdambo yanec, Adec uincuentequidshenda dectampaccosh, quequin tantiec tabadpanêdash. Adec tabadsho isun: —¿Ada pete iquec? —Esusën caquien ⁴² nuēcquid shēaid cuëshê menepanêdash. ⁴³ Aden meniac bedshun Esusën pepanêdash abêd icquidon isnubi.

⁴⁴ Aden piash: —Mibêd icquimbi naden chuipombi: “Nuquin Papan èbi chuiquin ambi naden nata quequin Moises dada uamiampidbêdta ambi yuecshun nanun chiaid dada uamiampid naimbudtenendac,” quequin chuibanombi —quepanêdash abêd icquido tantiamenuec. ⁴⁵ Aden chuishumbic abêd icquido tantiamequioquin: ⁴⁶ —Nuquin Papan dada uamiampid nad iquec: “Nuquin Papan chomiaid, Quidistu caid, matsesën mēyanquin unēs uaqui daêdec ushash uincuenendac. ⁴⁷ Aid tantiashun mibi icsaid mimbi ênsho isash, Icsaquid nec, quenquio yec mibi icsaid Nuquin Papa bēpiscudendac, quequin Edusaden yacnocquidoba èbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoinadac. ⁴⁸ Mēyanquin unēs uaqui èbi uincuenacsho mibitedishun ispoc. ⁴⁹ Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanêdash Esusën.

Esus abuc indote

(*Mad 16.19-20*)

⁵⁰ Adashic, bēyucanec nidequi Betania yacno anoentsēqui choash niduntidshun aton mēdante abuc sananquin ismec: —Nēidtedi bēdamboen ista, Papa —quepanêdash Esus.

⁵¹ Aden chiacsho abêd capucuenequido niamequin Esus aton Papan abuc indopanêdash.

⁵² Aden indosho isash, Èbitedishun icbo nec, quequin ismec shuebudash: —Bēdambo iquebi —quianec Edusaden yacno nidanepanêdash. ⁵³ Adec Edusaden yacno nidoash tabadec

Nuquin Papa tabadte shubu uashunaid yacno badiadquidēn-badiadquidēnquiec nittednidtedquin Nuquin Papan naid chuidenepanêdash.

Padi. Aidedtada uaoombi, Teyopido.

UANÈN DADA UAID

Nuquin Papa tantiamanquid chiaid

¹ Èndenquimboshè matses uabi yec abitedimbo uabi yequi Nuquin Papabèd Esus icpampic. Nuquin Papapadquidquibidi yec: —Nadquio Nuquin Papa iquec —quec tantiamanquidquo nec. ² Aidèmbi Nuquin Papabèd icquin ³ abitedimbo uapampic. Abubèdta nidaid uashun aidèn icquidte uapampic. Ambi uacmaid utsi nibèdec. ⁴ Aidquio Nuquin Papa yacno tabadmianquid nec. Nuquin Papapadquidquibidi yec: —Nadquio Nuquin Papa iquec —quequin paposhquiacbimboecnuc tantiamanquidbidi Esus nec. ⁵ Adembidi matses ambi icsamboen naid tantiamequid nec. Adquid icquin: —Con Pamboen bédamboshè icquidquo nendac. Aidèn chiaid niac-niaquec mibi icsamboec tabadec —quequin chuisho tantiatiapimbo icquin matsesèn Esus chieshèmpondash.

⁶ Aden Esusèn chuibeniyabi icnuc con shénision acten mentoanquidèmba Nuquin Papan chiapadomboen ambi chiaid chuibampondash. ⁷ —“Nuquin Papa yacnuèsh abi tantiamequidquo choendac,” quequin Uanèn chuibansho tantiashun ma dadpeshun ambi chuiboed tantianu —quequin Nuquin Papan con shénisio abi chuibanquid icmepanèdash. ⁸ Nuquin Papa yacnuèsh choacmaidèmbi con shénision: —Nuquin Papan chomiaid Esus nec —quequin chuibampondash. ⁹ Aden ambi chuiboedquio Nuquin Papa tantiamenuc matsespanèdash Esus.

¹⁰ Adash matsesbèd tabadsho ambi matses uaidombi tantienquio icquin chieshèmpondash. ¹¹ Aden con matses isadaidbon Esus tantienquio iccondash. —Isadaidbo con matses nec —Nuquin Papa quenèdacadquie: —Isadaidbo con matses nec —queoapondash Esus. Adsho ambi con matses caidonquibi dadpeshun Esus tantienquio icpondash. ¹² Utsibombien daèdpactsèshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanèdash. ¹³ —Con matsesuidien Nuquin Papan: “Con mado nec. Con champi nec,” capec —iquequidta adopanèdash? Padenquio. —Nuquin Papan mado nebi —quequin çambembi chuiquidta con mado capanèdash? Padenquio. Nuquin Papan Mayanèn tantiamiacpadomboen aton Madombo Esus tantiasho dada con mado caquin chido con champi capanèdash. Adembidi Esus tantiasho adoendac.

¹⁴ Adec Nuquin Papa tantiamequidquio Esus matsespanèdash. Nuquin Papan Mado abentsèqui yec bédamboshè icpondash. Èbèd tabadquín nadatiambo icquin nabanquín matses bédamboen nashumbampondash. Aden Nuquin Papambo tantiamepondash Esusèn. ¹⁵ Aid con shénision chuipondash. —Èmbi chuiboedquio nec. “Èbi icsaquid icnuc bédamboshè icquidquo choec,” èmbi caboedquio nec. “Èmbia Nuquin Papan chiaid chuibambon aidèntsen tsyuec choshon chuibanendac. Èbi bèyuc tishaidi tishabi icnubi aid ènden icpampic,” èmbi caboedquibi Esus nec —quepondash con shénisio.

¹⁶ Con shénision chiapadquidquio icquin abi tantiaquido Nuquin Papan bédamboen isaïdo icmeshun adenuidi Nuquin Papa nuqui bédamboen ismec. ¹⁷ Èndenquimboshè Nuquin Papan chiaid dada uaquin Moisesèn Nuquin Papan matses icsaïdo cuidte tantiamepampic. Padnuen Esuquidistun Nuquin Papan bédamboen iste tantiamequin: —Nadquio Nuquin Papa iquec —quequin matses bédamboen tantiamepondash. ¹⁸ Ambi isacmaidquio icsho matsesèn Nuquin Papa bédamboen tantiatiapimbo iquec. Padnuen aton Mado abentsècshunquio aton dayun tsadquidènquibi matsesun Nuquin Papa bédamboen tantiamepondash. Aidquio chuinu. Tantia.

Tsusiobon chuimiac Uan acten mentoanquidèn chiaid (Mat 3.11-12; Mad 1.7-8; Duc 3.15-17)

¹⁹ Con shénisio Nuquin Papa tantiamenquid acten mentobenequid niondash. Aden acten mentobesho isash Moisesèn chiampid namequido aid chuimenuc cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shénisio chuituidpondash. ²⁰ —çTsumtsin chiac nai? çMimbembida nai? “Bédamboshè icquidquio Nuquin Papan chomendac,” quequin nuquin tsusedpan çdada uapampidta ne? —catuidpondash. Adoquien: —Padenquio. Aidpenquio nebi —quepondash. ²¹ Adshobien: —çTsumintsi ne? ç“Naden naindambì,” quequin Nuquin Papan chiaid chuibanquidquio unèspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: çTsumintsimbo ne? “Moisespadquidquio choendac,” çcapampidta ne? —caquien: —Padenquio. Aidpenquio nebi —queoapondash con shénisio.

²² Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuimetan,” caboed chiec nidnu. Baded èbi chui —caquien: ²³ —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bédamboshè icquid chomiabi icnuc aid bèyuec utsiba choendac. Aidën shubu nibèdacno capucuenequin chuibanendac naden.

‘Chuiquid dapambo choegue. Podqued andèdbanshunta,’

quiachimboen chuiquin: ‘Nuquin Icho choegue. Icsaid ènash bédamboec tabadta,’

quequin chiendac bèyuc choshon,”

quequin chuipampid nebi —quepondash con shënisisio.

²⁴ Adnubien con tsusedpabon chiampid namequidon padiseyobo caidontsen aton chuigu-uid dapan chiacpadomboen con shënisisio chuituidpondash. ²⁵ —Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquo icquin acten mentobano?” mibi caimbi —caquien: ²⁶ —Nuquin Papan chiacpadomboen abi tantiabenguido acten mentobenec nebi. Èmbi aden bédamboen nanuc utsimbien bédamboenshè naindac. Aidi mibèdi tabadshobi ma mimi tantienquo icboc. ²⁷ Èmbia Nuquin Papan chiaid chuibanombi. Aidèntsen tsyuec choshon comapenen tantiaquin Nuquin Papan chiaidquo chuiquin Nuquin Papambo tantiamendac. “Aidi bédamboshè icquid icnuc èbi icsaquid icho ¿atotsieshun: ‘Aid choec,’ quequin chuiquidquo Nuquin Papan icmioshi?” quec tsadebi —quepondash con shënisisio padiseyobo chiec. ²⁸ Acte Odan caid uquè cuèmatiucùesh shubu dadpen icquid Betania caid yacnuèsh adpondash.

Abided cuidadtequid nendac, Esus caid

²⁹ Badiadshun padpiden con shënisision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquo obeca bacuèbimboecquid choegue. Aidi isadaidbon obeca bacuèded cuidquin unès uachimboec matses icsaid bedshunec abided cuidadec unèsendac. ³⁰ Èmbi chianeboedquo nec. “Èbi bèyuc tishaidi tishabi icnubi aidi ènden icpampic,” quiash: “Èbi bédapabi icnuc bédamboshè icquidquo choendac,” quepobi. ³¹ Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidèmbi èmbibi badedquo tantienquo iccombi. “Nuquin Papan chomiaid nec,” quequin tantienquo iccombi —quepondash con shënisisio.

Esus mentoaid

(Mat 3.16-17; Mad 1.9-11; Duc 3.21-22)

³² Adashic abi onquec: —Nuquin Papan naden ismiac tantiabemombi. Aton Mayan aton dada nibèdquieac dèbimbimboec budec: “Matsadtoendac,” quebocpadequi Esus matsadtoشو ispombi. ³³ Adsho isash: “Adquidshenda caposh Nuquin Papan: ‘Acten mentoanquid icta,’ èbi caboedèn. ‘Con Mayan dèbimbimboec budec matsadtoeboedèn abi tantiaquidobèd con Mayan tabadmendac,’ Nuquin Papan caboedshenda nepec,” quiobi Esus caic. Èmbembi tantienquo ictsenombi. ³⁴ Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquo Esus nec,” quequin mibi chiec nebi —quepondash con shënisisio.

Nèid dada uaquid Uan Esusbèd yanaid

³⁵ Adashic badiadash ambi acten mentobambocno con shënisisio nidoapondash. Aid tsibanequi nidoapondabi. ³⁶ Adec nidquin isquien Esus cuempec. Cuensho isashien con shënisisio: —Is. “Nuquin Papan namiaidquo obeca bacuèbimboecquid nec,” èmbi caboed cueneque —quepondash.

³⁷ Adsho tantiatanequini con shënisisiobèd iccondaid utsiheb Esus chinunec nidpondac. ³⁸ Nidquin chinunac bidiadquin istanequien: —¿Atotsi quec ne? —quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. — Chuiquidquo nec —quequin con onquetembi Dabi caondambi. ³⁹ Adoac: —En isec cho —cac abi ushacno isec nidondabi. Ushè abucquo icnuc puduedash yuec tabadec onquetianash inchèshstècnubi chondabi.

⁴⁰ Èbèdtan Esus chinunondaid Andedes niondash. Shubu dadpen icquid Betsaida caid yacnuèsh caniquid niondash. Aton buchi Petedo niondash. Petedobidi Simon capondash.

⁴¹ Adnubien Andedes aton buchi chiec nidpondash. Adec nidquin Petedo istuidash: — Nuquin tsusedpabon chuipampid Nuquin Papa yacnuèsh choquid Mesias caid istuidom-bique. En isec cho, buchi —capac caondash. Nuquin Papa yacnuèsh choquid Quidistu cashumbic con onqueten Mesias caic.

⁴² Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yachimboec mibi chieshtoenquo icquid yanendac,” quequin mibi nidaid moco cuènenandambi —quepondash Esus Petedo caic.

Con onqueten nidaid moco cain Sepas capondash Esusèn. Quidieco matsesèn onqueten Petedo capondash.

Esusèn Uedipebèdta Natanaid istuidaid

⁴³ Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash. ⁴⁴ Betsaida yacnuèsh caniquidbidi nepondash aid. ⁴⁵ Esusbèd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesèn chiampicpadomboen chuiquin nuquin tsusedpabo utsibon: “Bèdamboshè icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuèsh caniquid neque. Osen mado nec —quepac caondash. ⁴⁶ Adsho tantiaish: —¿Nasaded yacnuèsh ta dada bèdambo icquid chopatsiash? Auèshquio dada bèdambo icquid chotiapimbo iguendac —quepac caondash Natanaid. Adsho tantiaish: —En isquiec cho —quepac caondash Uedipe.

⁴⁷ Adoac choshobien Esusèn: —Is. Isadaidbombo neque. Muesambo nec —caquien ⁴⁸ Natanaidèn: —¿Mitsipaden èbi tantie? Mabi mimbi isacmaidquio nepayoc —capondash. Adoquien: —Uedipen bedtanabi icnubi mibi cuète icueda caid tayun tsadsho tantiombi —capondash Esusèn. ⁴⁹ Adsho tantiaishumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidèn: —Istiapimbo yacno chiosh —quequin tantiaishun. ⁵⁰ Adoquien Esusèn: —“Cuète icueda caid tayun tsadsho mibi tantiombi,” èbi qesho ¿tantiashta: “Nuquin Papan Madombobien nec,” badedquio que? Padpiden comapenen tantiaquin nabansho isun mimbi èbi tantiaquotsiandac. ⁵¹ Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bèdabo Nuquin Papa yacno dectonesho isash: “Aidbèd tabadte Nuquin Papan èbi tantiametiadquio iquec,” quequin tantiapampicpadomboen mimbi èbi tantiendac. “Matsesun Nuquin Papan Madon matses abèd tabadte tantiamec,” quequin mimbi èbi tantiendac —quepondash Esus abèd icquido chiec.

2

Esusèn ambembi actequid uaid

¹ Aden Natanaid chiashton nidaid Cadidia caid yacnobi Esus tabadpondash. Ambo tabadec daèdec ushtsambi shubu dadpen icquid Cana caid yacnocquidèn isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobèd Esusèn tita puduedpondash. ² Esutsen puduedpondash. ³ Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimèdoshe. Comapenen tantiaquid icquin mimbi tantiacpadomboen nata, mado —capondash. ⁴ Adoquien: —¿Atotsi quequin mimbi èbi chuipe, tita? Chiata. Con Pan tantiacpadènquio naimbique —quepondash Esus. ⁵ Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

⁶ Ambobi tèchu dapa 6tedi tabècaid icpondash. Mèpamèdtembo acte nua 120 ditedos cactembi anidboedi acte naimèdaid icpondash. ⁷ Adnubien Esusèn: —Nè tabadquidèn acte cushtoban —cac cubu-cubuctsècquio icnuc acte cushtobampondash yuabon. ⁸ Cushtobanacsho isun Esusèn: —Ueshun buanshun mibi ancaquid acmetan —cac acmetampondash.

⁹ Adoac acquin tanaquin actequid bèdamboshè icquid icpac caondash acte icboedi. —Nibèda damboedquio ¿mitsimbo bedpash? —quepac caondash yuabo ancaquid. Adsho tantiaishun yuabon: —Esusènquibien naccosh —quequin tantiapac caondash. Adnubien yuabo ancaquidèn chido bednuequid chuipondash: —Aidèn actequid bèpash —qeshun.

¹⁰ —Nuquin matsesèn actequid bèdambo icquidba isedanquido acmequid nendac. Adquid acmiac matses nua cubudacsho isash: “Actequid icsactsècquidtsen acmenu,” quequid yendac. Aden mimbi nambo. Bèdambo icquidquio ma mimbi nèbi acmianeyoc —quepondash yuabo ancaquid chido bednuequid chiec. Adnubien yuabon actequid bèdamboshè icquid abitedi acembampondash.

¹¹ Aden comapenen tantiaquid icquin ambembi actequid uaquin Esusèn tauamboen ismebempondash. —Nuquin Papa yacnuèsh choquid yec comapenen tantiaquidquio nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adosho isun: —Con matsesèn chiampid Nuquin Papan chomiaidien nec —quequin tantiabonondambi.

Esusèn chushcaquin cuemiaid

(Mat 21.12-13; Mad 11.15-18; Duc 19.45-46)

¹² Aden ambemi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abêd icquido yec ëbi yec quec Esusbêd nidaniondabi. Ambo daêd pactsec ushec tabadondash. ¹³ Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unês uainquio icquin Nuquin Papan matamiampid inchêsh tantiaquin obeca bacuê pec nêbi tabadeque. Isec nidnu. Nid —quianec nidanepondash. ¹⁴ Nidashic Nuquin Papa tabadte shubu uashunaid dapa daquênê uaidên puduedondash nuntanquio puduedabi. Puduedshun isquien matses dadpen nêish yua chedobêd tabadpec. Baca bënë yec obeca yec dëbimbimboecquid quênêmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabêcaid dayun tabadpondash. Aido nidaid utsi yacnuêsh choquido aton piucquid dadpen bedshun ampeshunquin daêd pactsec menequido niondash. ¹⁵ Adec tabadsho istanquimbien Esusên cueshcate badedquio nacnentanquin cuesquin niacumpondash umanuc abitedimbo. Aden umanuc niacuntanquin tabêcaidtsen bidiacbanquin piucquid siabudshumbampondash. ¹⁶ Adotanquimbic dëbimbimboecquid yuaquidotsen chushcapondash. —Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc —quequin chushcapondash.

¹⁷ Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquio nendac,” quequin Esusên nate chuiquin dada uapampic —quequin tantiondambi.

¹⁸ Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien ¹⁹ ismenquio icquin ompoacimboen Esusên chuipondash. Abibi cadequi: —Mimbi nêid shubu icsa uabocsho padpiden nacnenoaindambi bédambo icnu. Daêdec ushquin nacnenquin nainendambi —quepondash Esus. ²⁰ Adsho tantiaish Nuquin Papa tabadte shubu uashunaid dapa ca danec: —¿Badedquioda nacnempatsia? Nêid nacnenquin seta dadpenquioshê 46tedquiobi matamiac cadenec —quepondash con matses chuiquido.

²¹⁻²² Yuecquio ictaneshun Esusên aden chiaid tantiondambi. Unês uacsho chococac daêdec ushah Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daêdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

Dadpeshun Esus tantiauidaid

²³ Nuquin Papa tabadte shubu uashunaid daquênê uacnoshon cuemeshumbic Edusaden yacnoshontsen comapenen tantiaquin nabanquin Esusên ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —queshun Esus bêdiactsec tantiatsêcondash. ²⁴ Aden tantiatsêcsho ambemi tantiaish: —Ai, ëbi tantiaquidquio nec —quenquio icquin: —Ëbi bêdiactsec tantiatsec —quequin tantiapandash. ²⁵ Utsin chiambobi ambemi tantianêdash. Aden matses abitedishun otacquio tantiaid ambemi tantiaquidquio Esus niondash.

3

Esusên Nicodemo caid chiaid

¹ Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobêdtan aton matses namequid niondash. ² Inchêshên Esusbêd onquenuc chopondash. Choshombic aidêmbi: —“Nuquin Papan icmiacpadquid chuiquidquio mibi nec,” quequin tantiemi. Mimbi comapenen tantiaquin nabansho isun: “Nuquin Papan namiaidênuidtsêquien adotsiash,” mibi caombi —quepondash.

³ Adsho tantiashun: —Ai, adquid nebi —quenquio icquin Esusên ompoacimboen chuipondash naden. —Tantia. Mibi bédamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquio ictsiac ⁴ —quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo. ⁵ Adsho tantiashun Esusên: —Nuquin Papan Mayanên tantiamiac: “Nuquin Papa tantiaquin ëbi icsaid êntiadquio iquebi,” quiash bédamboec tabadquid Nuquin Papabêd tabadtequid nendac. Adquid chuca uaid cãimbi. Chuca uabi icquid Nuquin Papa yacno tabadtiapimbo iquendac. ⁶ Chidon tishaiduidtsêqui yec Nuquin Papabêd tabadtiapimbo iquendac. Nuquin Papan Mayanên chuca uaid Nuquin Papabêd tabadendac. ⁷ “Chuca uaiduidtsêqui Nuquin Papabêd tabadendac,” ëbi quesho tantiash: “¿Midapaden chie?” quepequien mibi iquec. ⁸ Tantia. Mibi chuinu. Cunquequid isadenquio icquid nec. Isadenquio icquimbi cuncac cuête ishucudsho isash: “Abi cunquec,”

mibi quepec. Adquibidi isadenquo Nuquin Papan Mayan iquec. Isadenquo icquimbi aidèn chuca uaid bédamboec tabadsho isun: “Nuquin Papan Mayanèn nac,” quequin mimi tantiatsiac. “Nèid utsitsen natsiash,” quequin mimi tantienquo icnubi Nuquin Papan tantiapadomboen aton Mayanèn utsitsen chuca uatsiandac —quepondash Esus.

⁹ Adsho tantiash: —¿Midapadec? —quepondash Nicodemo. ¹⁰ Adoquien: —¿Tantienquioda ique? Ma isadaidbo Nuquin Papan chiaid chuihanquid mibi neyoc. ¹¹ Ènden ushè utsin mibi chedo chiombi. Èmbi isondaidquo chuiquinc èmbi tantiondaidquo chuiquinc caombi. Adsho tantiash: “Tantiadenquo iquec,” ma mibi queboc. ¹² ¿Èmbi chuiboed tantiadenquo icnubi padpiden chuiquin èmbi Nuquin Papan abi yacnoshon naid chuishomenda tantiatsia? ¹³ Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Èmbien Nuquin Papa yacnuèsh chondaidènquo: “Nadquo iquec,” quequin Nuquin Papa tantiamendac. ¹⁴ ¿Atotsi canuen nuquin tsusedpa Moisesèn nisibimboecnuc shocosh nacnenaidec dectampampic? “Nuquin Papan chiacpadec ma aid isec nisin piaid bédanu,” quequin cuesten dectampampic. Adomboembidi matses cuidmenquo icnuec cuesten dectamèdendabi èbided cuidadec unèsec. ¹⁵ Èbi tantiaquido unèsascho cuidenquo icquin Nuquin Papa yacno èbèd tabadmenuec aendabi —quepondash Esus Nicodemo chiec.

Nuquin Papan matses abitedi tantiaquin naid

¹⁶ Aden Esusèn abided cuidadec unèste chuipondash. Nuquin Papan: —Ma adec abided cuidadec unèsnu —quequin Esus chomepanèdash. —Unèsquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsècquobi abided cuidpanèdash. —Èmbi adoaid con Mado tantiaquid unèsascho icsaido cuidacno nidmenquo icquin èbèdi tabadmendabi —quequin aton Madoded cuidpanèdash. ¹⁷ ¿Matses cuidnuenda Nuquin Papan Esus matsesmepanèdash? Padenquo. Matses cuidenquo icnuen napanèdash.

¹⁸ Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshèmec —qeshun. ¹⁹ Nuquin Papan matsesmiadèn Esusèn abi icsaid chuisho matses icsambo icquidon tantiatiapimbo iquec. Ambi icsamboen naid èntiapimbo icquin Esus tantiatiapimbo iquec. ²⁰ Adquidon: —Èbi icsaid Esusèn utsibo tantiamenushe. “Icsambo iquec,” èbi canushè —qeshun Esus chieshèmec. ²¹ Nuquin Papan chiacpadec tabadquidombien Esus chieshènenquo iquec. —Nuquin Papan namiacpadec tabadquid nebiqec. Ma Esusèn èmbi bédamboen naid chuibampanuna —quiash Esus tantiate bumpec.

Uan acten mentoanquidèn Esus chuoiaid

²² Adec Nicodemobèd onqueboshien Esus nidpondash. Edusaden yacnuèsh nidec aid nidaidèmbi Udeya caidèn capucueniondash. Abèd nidshobini Nuquin Papan chiaid Esusèn chuibampondash. Adec nidshun Nuquin Papa tantiabenquido acten mentobeniondambi. ²³ Adnubien adomboembidi con shènisionsen acten mentobeniac caondash. Enon caid yacnoshon Sadin caid anoentsèqui chunquen diadacnoshon matses dadpen acten mentoac caondash con shènision. ²⁴ Chieshèmènquidon quènèn nauedabi adoac caondash.

²⁵ Adnubien con shènisioibèd icquido con matses utsibèd: —Mimbi icsamboen chiec —quec chushcananac caondash. Con shènisioibèd icquido: —Uanèn Nuquin Papa tantiabenquido bédamboen acten mentobamposh —quesho tantiash: —Padenquo. Esusèmbien bédamboen acten mentobaniosh —quepac caondash. ²⁶ Adshubien con shènisioibèd icquidon: —Nuqui chuiquid chiec nidnu. Nid —quianec nidquin con shènisio chuituidpac caondash. —Acte Odan caid uquè cuèmatsiucshun ¿mitsicquid: “Nuquin Papan chomiaid nec,” mimi cadio? Aidèn mimi naid dèniacquin matses dadpenquo acten mentobeniac caosh. ¿Ada bèda ipcec? —caquien: ²⁷ —“Nuquin Papan chiacpadomboen Esusèn nash. Adomboembimbi naic,” qeshun Esus chieshèntiapimbo iquendabi. ²⁸ “Nuquin Papan chomiaidpenquien nec,” quequin mibi chiondambi. “Nuquin Papan chomiac bédamboshè icquid choendac,” quequin bèyuc choshon aid chiec nebi,” quiondabi mibi chiec. ²⁹ “Èmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidèn: “Min bènèbèd nidenda,” caquinda ictiosh? Padenquo. Bènèbèd nidmiasch bédambo yacbimboec Esusbèd nidanesho isash bédambo iquebi. ³⁰ Èmbibi Nuquin Papan chiacpadomboen Esus tantiamequin ènquin chuihan èmbi acten mentoaido daèdpactsèc yanendac. Èmbi chuiboedquo Esus tantiaquidoen dadpenquo yanendac. Aidquo bédamboshè iquec —quepac caondash con shènisio abèd icquido chiec.

Nuquin Papa yacnuèsh choquid chiaid

³¹ Adshumbic con shĕnision naden chuipac caondash. —Esusquo bĕdamboshĕ iquec. Nuquin Papa yacnuĕsh choquid abipadquid utsi nibĕdec. Padnueni matses yec: “Nuquin Papa isondambi. Nadquio iccondash” quequin chuitiapimbo iquebi. Esusĕmbien ³² ambi isondaibĕdta ambi tantiondaidquio chuipec. Aden chiaqui matses dadpen: “Abimbo caic,” quenquio icpec. ³³ Esus tantiaquidon: “Nuquin Papa muesambo nec. Ambi: ‘Bĕdamboshĕ icquid choendac,’ quequin dada uamepampidquio Esus nec,” capec. ³⁴ Nuquin Papan chomiaidquio icquin Nuquin Papan chiaidquio Esusĕn chuibanec. Nuquin Papan aton Mayan abĕd tabadmiaid icquin comapenen tantiaquin ismehanquin chuibanec. ³⁵ Ambi tantiaidquio icsho aton Papan abitedishun Icbombo icmiac. ³⁶ Adnuc: “Abitedishun Icbombo Esus nec,” quequin aton Mado tantiaquido unĕsacsho Nuquin Papan abĕdi tabadmendac padpidec unĕsenquio icnuc. Esus chieshĕnquidoen Nuquin Papa yacno isenquio yec icsaido cuidquiaicno nidendac —quequin con shĕnision chuipac caondash.

4

Acte uequid chido Esusĕn chiaid

¹ Esusbĕd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: —“Uan acten mentoanquidĕn naid dĕniacquin Esusĕn matses dadpenquio acten mentobanosh,” quiosh —qeshun Esus chieshĕnac caondash. ² Esusĕn nainquio icnuc ĕmbimbo nasho isun chiaqui aden Esus chieshĕnac caondash. ³ —Mibi adosh —cac: —Con nidaidĕn nidnu —quianec nidondash Esus. Aid nidaid Udeya caid yacnuĕsh nidec aton nidaid Cadidia caid yacno nidondash.

⁴ Aid podquedĕn nidequid nidaid utsi yacno Samadia caid yacno nidpondash. ⁵⁻⁶ Adec nidquin ushĕ cuembo icnuc shubu dadpen icquid Sicad caid yacno istuidpondash. Aid anoentsĕqui con tsusedpa Acobon tied uampid icpondash. Aid tied caic: —Ēbi unĕsan nĕid tied: “Con na nec,” cata, mado —quequin aton mado Ose chiampid tied niondash. Ambo aidĕn uĕdĕshcampid acte uete icpondash. Aid dayunquiobi: —Tiboquenu —quec Esus tsadtuidpondash. ⁷⁻⁸ Adec tsadtuidnubini: —Pete bedtanu —quianec shubuno nidanepondac. Esus abentsĕqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusĕn: —Acte beccho. Acnu, champi —caquien: ⁹ —“Acte beccho,” ĕcaquindabi ique? Ma isadaidbo mibi nepayoc. ĕIsadaidbo icquindabi: “Acte beccho,” cai? capac caondash acte uequid chidon. —Samadia yacnocquidbĕd onquesambo isadaidbo nec —quequin tantiec adac caondash.

¹⁰ Adshobien Esusĕn badedquio cuembo chienquio icquin chuipac caondash. —Nuquin Papan bĕdamboen isquin naidbĕdta ĕbi tantiaquin: “Acte beccho,” mimi ĕbi catsiac. Adsho actĕ bĕdambo icmianquid mibi acmetsiambi —quepac caondash Esus. ¹¹ Adoquien acte uequid chidon actembo ca danquin: —ĕMitsipaden acte ueshun ĕbi menetsia? Ma min tĕchu nibĕdpayoc. ĕMidapaden mimi uetiapimboen acte uquĕduquio iquec? ĕMitsimbo acte bĕdambo icmianquid ueshun ĕbi acmetsia? ¹² Nĕid acte nuquin tsusedpa Acobon uĕdĕshcapampid nec. Aton yuabobĕdtan aton bacuĕbon acpampid nec. Nuquin tsusedpa bĕdambo icquin nampid icnuc ĕmitsipadquidquio icquin nai? ĕBĕdamboshĕ icquid icquinda mimi acte bĕdamboshĕ icquid ĕbi acmepatsia? —capondash acte uequid chidon. ¹³ Adoquien: —Nĕid acash mibi bundoaic. ¹⁴ Ēmbi acmiac mibi bundoenquio ictsiac. Acte bĕdambo icmianquid acmiac ĕnĕdenquio yec tabadquid mibi yantsiac —quepac caondash Esus badedi cuembo chienquio yec. —Ēbi tantiaquidobĕd con Mayan tabadmiac bĕdambo yanec unĕsacsho ĕbĕdi tabadmendambi —quequin tantiec adac caondash.

¹⁵ Adsho tantiashun padpiden acte ca danquin: —Adquidquio ĕbi acme. Bundoenquio yec nĕmbo acte uec choenquio ictsiabique —caquien: ¹⁶ —Min bĕnĕ bedtan —capac caondash Esusĕn. —Nuquin Papan chomiaidquio yec comapenen tantiaquid mibi nec —camenuen adoac caondash. ¹⁷ —Min bĕnĕ bedtan —caquien acte uequid chido: —Con bĕnĕ nibĕdec —quepac caondash. Adshobien Esusĕn: —Abimbo mimi caic. Min bĕnĕ nibĕdec. ¹⁸ Dada mĕdante auc abentsĕctedquioibi min bĕnĕ icpadenec. Aidon mibi niambudnian nĕbi mibĕd icquid min bĕnĕpenquio nec. Abimbo mimi caic —quepac caondash Esus.

¹⁹ Adsho tantiash: —Isambobi comapenen tantiaquidien mibi nechitec. Mibi-padquidquio chiec: “Nuquin Papan chomiaidquio nendac,” quepec con matses. Adquid icquin en ĕbi chui. ĕMitsishunquiembi Nuquin Papa bĕdamboen tantiapĕ? ²⁰ Con matses: “Nĕmboen Nuquin Papa iquec. Nĕid macuĕsh dapanshunuidtsĕqui Nuquin Papa tantiac bĕdambo ictsiash,” quepec. Min matsesien: “Edusaden yacnoshonuidtsĕqui Nuquin Papa tantiac bĕdambo ictsiash,” quepec —quepac caondash acte uequid chido. ²¹ Adsho tantiashun Esusĕn: —Tantia. Mibi bĕdamboen chuinu. Nĕbi nĕid macuĕsh dapanshunuidtsĕqui Nuquin Papa tantienquio icquin Edusaden yacnoshonuidtsĕqui tantienquio icquin nidaid

utsi-utsiec yacnoshon ademĭidi Nuquin Papa tantiabedendac. ²² Min matsesĕn Nuquin Papan chiaid daĕdpactsĕc tantiatsĕcshun Nuquin Papa bĕdiactsĕc tantiatsec. Con matses isadaidbombien Nuquin Papan chiaid dadpen tantiashun: “Nuquin Papan chomiaid nuquin matses bĕdambo icmianquid nuquin matsesĕn tishendac,” quequin bĕdamboen tantiec. ²³ Nĕbien utsin-utsinquein muainquio icquin: “Con Icho nec,” quequin Nuquin Papa tantiendac. Ambi chiacpadec bĕdamboec tabadsho isash: “Adquid ĕbi tantiaquidquio nec,” quetsiash Nuquin Papa. ²⁴ “Nuquin Papa tantiaquid ictiadquio iquebi,” quequidĕn Nuquin Papan Mayanĕn tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

²⁵ Adsho tantiash chido: —“Nuquin Papan matses bĕdambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidĕmbi nuqui tantienquio yaidtedi tantiametsiash. Aidbimboecquidien mibi nechitec —caquien: ²⁶ —Mimbi chiaidquibini nec —quepac caondash Esus chido chiec.

Esus Samadia yacnocquido chiec tabadaid

²⁷ Adnubini pete bedtanec chopondac. Adshun isquien chidobĕd onquepec. Adsho isash: —ĶAtotsi chiec chidobĕd onquepec? —quepondabi utsibĕd otacquoio onquec. —ĶAtotsi chiec chidobĕd onquio? —cainquio iccondambi Esus. ²⁸ Adec ĕbi chonobi tĕchu nianec acte uec choquid chido nidpondash aton matses chiec shubuno nidec. ²⁹ —Isec cho. Ĕmbi isacmaid dadan ĕmbi naid abitedi chioshi. ĶNuquin Papa yacnuĕsh choquid Quidistu caidta nioshe? En isec cho —catuidac: ³⁰ —En isnu. Nid. Aidien nechitashe. Isnu —quianec matses dadpen cho-chopondash.

³¹ Aido choabi icnubi: —Nĕ pete, Icho —ĕmbi caquien: ³² —Padi. Mimbi tantienquio yaid con na utsi iquec —quepondash Esus petepenquio chiequi. ³³ Adsho tantiashini pete ca danec: —ĶUtsibonda pete bĕshumpash? —quecuededpondac ĕbitedi. ³⁴ Adsho tantiash Esus: —Ĕbi cuishoncamete utsi iquec. Ĕbi chomiondaid Nuquin Papan chiacpadomboen naic bĕdambo iquebi pete piacsimboec. Ambi chiaidtedi nainuec dayacquoio iquebi —quepondash. ³⁵ Adashic padpidec: —“Ushĕ daĕd-daĕdqueicnuc nidmeshun nadquid adosbiecquid ĕshĕacsho bedembi,” quepec nuquin matses. Adosbiecquid ĕshĕacpaden Ķyuecshunda nĕmbo icquidon ĕbi tantiabempec? Padenquio. “Nĕidon Esus tantiendac,” mimbi cacmaidobi cho-choeque. Is. ³⁶ Acte uequid chido ĕmbi chuiboedĕn chiac matses dadpen cho-choeque. Chuibanuna. Ĕbi tantiash Nuquin Papabĕd tabadtequid yanendac. Adsho isash nuqui cuishonquendac piucquid bedashbimboec. ³⁷ Tied icbon: “Con na peta,” cac ambi nidtsinacmaid matsesĕn bedec. ³⁸ Aden ambi nitsinacmaid bedacsimboen mimbi naic. Utsibomba Nuquin Papan chiaid chuibanĕdaido nĕmbo icquido mimbitsen chuibanec. Adoac nĕmbo icquidon Nuquin Papabĕda ĕbi tantiabenec. Cho-choeque. Is. En chuiban —capondash Esusĕn abĕd icquido chuiquin.

³⁹ Adnubien Esusĕd onqueboed chidon chuitanaido cho-chopondash. —“Comapenen tantiaquin ĕmbi naid abitedi chioshi,” quioshe. Nuquin Papa yacnuĕsh choquidien nechitashe. Isnu. Nid —quianec cho-chopac caondash. ⁴⁰ Cho-choquimbi badedi: —Ĕbi yacno ushquin chiec cho —quequin beduanac Samadia yacno tabadquin chuibampondash Esusĕn. Aid matses chiec ambo daĕdec ushpondash. ⁴¹ Aden Esusĕn chuisho tantiashien: —Nuquin Papa yacnuĕsh choquid Esus nec —quiampondash anocquido dadpen. ⁴² Adashic acte uequid chido chiec: —Mimbi chuishouidi tantiaboedĕmbi nĕmbi aidĕnquio chuisho bĕdamboen tantiaquioc. “Nuquin Papa matses bĕdamboen ismequid nec,” quequin tantiembi —quiampondash Samadia yacnocquido dadpen.

Chuiquid dapan mado Esusĕn bĕdamiaid

⁴³ Daĕdec ushanec Samadia yacnuĕsh Esus nidondash. Abi caniondacno nidaid Cadidia caid yacno nidpondash. ⁴⁴ —Ĕmbi chiacpaden abi caniondacnoshon Nuquin Papan chiaid chuibanquidĕn chuisho aton matsesĕn tantienquio iquec. Con nidaidĕn nidsho con matsesĕn abi chuiguid dapa icmetiapimbo icpebi —quianec aton nidaidĕn chopondash. ⁴⁵ Adsho isun: —Tantiesa nendac —Esusĕn caboedombi abi bĕdiactsĕc tantiatsĕccondash. —ĶChoecta icco? Nuquin Papan nuquin tsusedpabo unĕs uainquio icquin matamiampid inchĕsh tantianuec Ĕdusaden yacno nidshun mimbi nadatiambo icquin nabansho isondambi —quepondash abi bĕdiactsĕc tantiatsĕcquido Esus chiec.

⁴⁶ Adec aton nidaidĕn nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiguid dapa icpac caondash. Aidĕn mado unĕs-tiadtsĕcquio yampac caondash. ⁴⁷ Adashic: —Esus Udeya yacnuĕsh choac caoshe. Istanu —quianec chopac caondash unĕstiadtsĕcquio icquidĕn papa. Adec Esus yacno choshombien: —Con mado unĕstiadtsĕcquio iccoshe. Bĕdamec cho —caqui ⁴⁸ nidenquio yec abi datsidadquido chiec: —Ĕbimbo mimbi tantienquio iquec. Ĕmbi

bëdameteuidtsëqui mimbi tantiec. Ëmbi comapenen tantiaquin nabansho isunuidtsëqui: “Nuquin Papan chomiaidnen nechitec,” quequin mimbi tantiec—quepondash Esus.

⁴⁹ Adec onqeshobien abi niachidanquin padpiden: —Baded cho. Con mado unëstiadttsëcquio iccoshe —capondash. ⁵⁰ Adoaquien Esus: —Padi. Min mado unësenquio ye. Nidec nid —quesho tantiash: —Abimbo caic —quianec nidpondash. ⁵¹ Adec nidquimbi abi chuinec cho-chosho aton yuabo bëquedac caondash. Aden bëquedacqui yuan: —Min mado bëdanosh —quesho tantiashun: ⁵² —¿Mitsimbo ushë icnuc con mado bëdanosh? —cac: —Ënden ushë yaquëduidtsëcnubi da una yantsëcnubi bëdanosh —quepac caondash aton yuabo. ⁵³ Adsho tantiash: —Adënquioshendabi: “Min mado unësenquio ye. Nidec nid,” caposh Esusën —quepac caondash unëstsemboedën papa. Adshun: —Nuquin Papan chomiaidquio yec comapenen tantiaquin nabanquidquio Esus nec —quequin aton shubun icquidobëdtambi Esus tantiapac caondash. ⁵⁴ Adec Udeya yacnuësh choash Cadidia yacnobidi ambi uba chinaid actequid uaquin ismequin tauaondacnobidi tabadquin bëdamequintsen Esusën ismepondash.

5

Esusën dada icsatsaid bëdamiaid

¹ Yuecquio ictanec Esus: —Edusaden yacno cuëdënucc nuquin matses cho-choeque. Nuquitsen nidnu. Nid —quianec nidanepondash. ² Shubu dadpen icquid Edusaden caid dacuenadquin daquënë uaid puduede shëcuë dadpen icnuc abentsëc obeca puduede caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. ³ Acte nënantanquio icnuc dacuenadquiec shubumpi tabadquidën matses dadpen tabadpondash daicsaidouidquio. Bëshuaido yec capuenquio icquido yec canite tsasiaido yec quec tabadpondash. ⁴ —“Nuquin Papan abi yacnoshon uaid mayan bëdan tēcucascaid acten abia mentoadquid bëdanquid,” quedeneque. Tēcucascaic ma chobono —quiash cainec tabadpondash.

⁵ Adnubien Esusën ënden caniaidquio ambobi uesho istuidpondash. Ëndenquimboshë aton dada icsabadash seta dadpen 38tedquioi matamec capuenquio yec icsabudtsaidquio nepondash. ⁶ Adsho istuidshun: —Ëndenquio daicsabadaid nec —quequin tantiashun: —¿Bëdanteda bune? —catuidpondash Esusën. ⁷ Adoaquien: —Ai ¿mitsipadequini bëdampe? Ëbi bëdiacttsëcquio nidnuc utsiba badedquio mentoadteniosh. Ëbi buanquin mentoquid nibëdec —quepondash daicsatsaid. ⁸ Adshobien Esusën: —Min ushte nacnentanquin buanec nid —cac ⁹ badedquio aton dada bëdantanquin aton ushte buanec nidpondash. Aid ushë chonoadenquio icte ushë niondash.

¹⁰ Aden buanshobien con matses chuiquidon: —¿Chonoadenquio icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimbi niacpayoc —quequin chushcapac caondash. ¹¹ Adoaquien: —Ëbi bëdameboedën: “Buanec nid,” cac mambi naiyoc —quepac caondash Esusën bëdameboed. ¹² Adsho tantiashun: —¿Tsuntsin naosh? —caquien: ¹³ —Tsaudi. Ëmbi isacmaid ëmbi isquiambobi badedquio nidaccosh matses dadpen icnuc —quepac caondash bëdameboed.

¹⁴ Adshumbic Nuquin Papa tabadte shubu uashunaid daquënë uacno puduedshun ambi bëdameboed daicsacboed Esusën istuidpondash. Istuidshumbien: —Tantia. Mibi chuinu. Ëmbi bëdameboedquio mibi neque. Mimbi icsamboen naid ënash bëdambo icta. “Nuquin Papan cuidquiac bëdanenquio yec daicsabudquiochitomane,” quiash adta —capondash Esusën.

¹⁵ Adoaquien bëdameboed abi: “¿Tsuntsin naosh?” caboedo chiec nidpac caondash. Nidshumbic: —Ëbi bëdameboed Esus niosh —quequin chuituidpac caondash. ¹⁶ Aden chuisho tantiatanequien: —Chonoadenquio icte ushënuidi bëdamepac caosh. Icsambo iquec —quequin con matses chuiquidon Esus chieshëmpac caondash. ¹⁷ Adnubien: —Mibi adosh —quesho tantiashun abi chieshënuquido istuidshun Esusën naden chuipondash. —Mimbi Nuquin Papa caid con Pa ënenquio icquin matses nashunquidquio nec. Adecbidi ënenquio icquin matses nashunquidquio nebi. Chonoadenquio icte ushëmbidi con Pabëdtan adoquid nebi —quepondash Esus. ¹⁸ Adsho tantiatanequien: —“Chonoadenquio icte ushënaquid icsambo iquec,” nuqui caboedquio: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquio nebi,” quechitequien nioshe. Cuesunequimbien ictiad —quepac caondash con matses chuiquido.

Nuquin Papan Mado nebi, quiaid

¹⁹ Adec abi chieshënquido abi cuesunete bunshobien padpiden istuidshun chuipondash Esusën. —¿Ëmbimbo naidtambi nadio? Padenquio. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. ²⁰ Ëbi tantiaquin Con Pan ambi naidtedimbo ëbi tantiamec. Ambentsëqui nainquio iquec. Aidën tantiamiacpadomboen bëdiactsëc naquin nëid capuenquio icquid bëdamiombi. Adembidi ambi tantiamiacpadomboen naquin dacuëdampamboecnc naindambi ma isquionoeshun. ²¹ Con Papadquidquio yec unësaid uincuemquidquio nebi. Matses ëmbi tantiaidotedi ëbëdi tabadmenuen uincuemendambi. ²² ¿Ëbi tantiesabo cuidnuen ambiuidtsëqui chuiquidta con Pa nedic? Padenquio. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesabo icsho cuidnuna,” caindambi con Pa. ²³ Aidëmbi: “Ëbi tantiacpaden ma con Madotsen bëdamboen tantianu,” qeshun aden matses cuidte chuiquid icmiondashi. Ëbi adquid icmiondaid icsho ëbi tantiatipimbo icquidon ëbi chomiondaid Nuquin Papatsen tantienquio iquec. ²⁴ ¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësascho cuidenquio icquin ëbëdi tabadmendambi. Cuidtequid icboedi ëbi tantiasch ëbëdi tabadtequid yanendac —quepondash Esus.

²⁵ Adashic padpidec onquec: —Tantia. Mibi padpiden chuinu. Unësaidën tantienquio yacimboen ëbi tantienquio icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësascho uincuemeshun ëbëdi tabadmendambi. ²⁶ Con Pan icmiacpadequi unësaid uincuemequid nebi. Abibi unëstiapimbo icquid icquin unësaid uincuemquidquio con Pa nec. Ambi icmiacpadquiequi abi yacpadquidquio iquebi. ²⁷ Adec unëstiapimbo iccondaidi matsesash icsaisambo icsho Con Pan matses icsaïdo cuidquid icmiondashi. ²⁸ Ëbi adsho tantiaschun: “¿Abimbobida capeba? Muequien nechitec,” ëbi cainda. ¿Muectabi nedi? Padenquio. Con Pan tantiacpadënuquio ëmbi cuënac unësaidotedi uincuenendac. ²⁹ Adec uincuenascho ëbi tantiaquido ëbëdi tabadmequin ëbi tantiesabo icsaïdo cuidacno nidmendambi. ³⁰ Ëmbentsëqui nainquio iquembi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquio icquin Con Pa bëdambo icmenuen aidën chiacpadomboen naimbi —quepondash Esus abi chieshënquido chiec.

Utsintsen ëbi chiec, quequin Esusën chiaid

³¹ Adshumbic Esusën abi chieshënquido chuiopondash. —Nuquin matsesën naden chiec. “Abentsëschun chiaid icsambo iquec. Daëdshun chiaid abimbo iquec,” quequin chiec. Aden chiaid tantiec ëbiuidtsëqui: “Nuquin Papan Mado nebi,” qesho tantiaschun: “Abimbo mimbi caic,” mimbi ëbi catiapimbo iquec. ³² Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. ³³ Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquio. Esuvidi Nuquin Papa yacnuësh choquid nec,” quepadenec Uan pado. ³⁴⁻³⁵ Aden chieshtoenuquio icquin bëdamboen chuipadenec. Chuisho tantiatasch mibi bëdambo icuidtsëcondac. “Ëmbi Uan padon naid chuisho tantiaschun: ‘Abimbo mimbi caic,’ ëbi capashun. Ëbi adsho bëdamboen istsiambi,” quequin mimbi tantiondaid Uan caombi. Matses icquimbi Uanën ëbi bëdiactsëc tantiamequin chuipadenec. ¿Adquid matsesënuuidtsëquidabi abimbo chuipec? ³⁶ Con Pambien: “Con Mado neque. Matses ismenu,” qeshun comapenen tantiaquidquio icmepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” quietiadquidi mibi nec. ³⁷ Ëbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada isto? Padambo mimbi iquec. ³⁸ Adembidi ambi dada uamequin chiampidquio ma mimbi bëdamboen tantienquio yoc. Aid bëdamboen tantiaschumbien Nuquin Papan chomiondaid ëbitsen mimbi tantiasiac. ³⁹ Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabëd tabadtequid nebi,” mibi quepec. Ma ëbimbo chuiquin Nuquin Papan dada uamepampid neyoc. ⁴⁰ Aden dada uamepampid isbanquidombi mimbi ëbi tantienquio iquec. Ëbi tantiaschoembi mibi Nuquin Papa yacno ëbëd tabadmetsiandac. ⁴¹ “Ëbi adsho tantiaschun ma matsesën ëbi: ‘Bëdambo mibi iquec,’ canu,” ¿quectabi ique? Padenquio. Con Pan chiacpadomboen nanuembimbi aden chioc. ⁴² Ëbi tantienquio icsho isun: “Nuquin Papa tantiesabo nec,” quequin mibi tantiembi. ⁴³ Ëmbien Nuquin Papan chiacpadomboen naic. Aden nasho mimbi ëbi tantienquio iquec. Utsi: “Nuquin Papa yacnuësh choquid nebi,” quec muaquidien mimbi badedi tantiasiac. ⁴⁴ Mibibi tantiadec: “Mibi bëdambo iquec,” cananteuidi bunquin mimbi Nuquin Papa tantiatipimbo iquec.

Aden mimbi Nuquin Papa: “Mibi bédambo iquec,” cametiapimbo iquec—quepondash Esus abi chieshênquido chiec.

⁴⁵ Adashic padpidec: —¿Ëmbentsëquidambi: “Ëbi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidênquio Moisesëntsën: “Nëido icsambo iquec,” mibi caindac. ⁴⁶ Aidên chiampid bédamboen tantiaquimbien mimbi ëbi tantiatsiac. Aidên chiampidi mabi neyoc. ⁴⁷ Aden Moisesën chiampid tantienquio icquin ëmbi chuiboedtsen mimbi tantiatiapimbo iquec—quequin Esusën abi chieshênquido chuipondash: —Moisesën chiampid tantiaquidquïo nebi—quequido chuiquin.

6

Esusën pete uatanquin 5000tedi pemiaid
(*Mat 14.13-21; Mad 6.30-44; Duc 9.10-17*)

¹ Yuecquio ictaniasch Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabëdtoshon potiacpondash. Aid chiambidi matses utsibon Tibedias capondash. ²⁻³ Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin ëbi chedo chuipondash. Adnubien Esusën matses dadpen bédamesho isboedo Esus isnuec cho-chopondash. ⁴ Nuquin Papan isadaidbo unës uainquio icquin matamiampid inchësh tantianuec pec tabadte ushë nëbi yanuc niondash.

⁵ Aido cho-chosho istanequien Esus: —Uedipe, piucquid buanshun ¿mitsimbo pete bedtane nëido pemenun? —quepondash Uedipe chiec. ⁶ —¿Atoda queque? Tantianu—quiash adpondash Esus. —Pete bedabi icnuc ëmbibi pete uanu—quequin otacquio tantiequi adondash. ⁷ Adoquien Uedipe: —Ma aidtedquïo pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin pete bedshun: “Pemenu,” cac aidtedquïo pemiaidquïo ictsiash—quepondash Uedipe.

⁸ Adnubien Andedesën Petedon utsin: ⁹ —Ma në madompin panëmpi 5tedtsëc icpayoc, Icho. Nuëcquidëmpi daëdquiobi ictsec. Matses dadpenquio iquec. Aidtedtsëcquid pemetiapimbo iquec—caquien ¹⁰ Esusën: —Padi. Aidi bédambo iquec. Abitedi: “Nëmbo tabad,” caban—cac: —Nëmbo tabad—cabanac sebad-sebadpambo icquidên uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

¹¹ Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bédamboshë iquec. Mimbi uaid nëid pete bédambo iquec, Papa—quec onquetanquin: —Meneban—cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash. ¹² Aden ambi piactembi pebededacshobien Esusën: —Napi uaid secainda. Sandoshon dayun ua—cac ¹³ tsitsan dapan napiauid sandoshon dayun uapondambi tsitsan 12tedquiobi sandoaid icnuc.

¹⁴ Aden pemiaquien pemiaido: —Comapenen tantiaquin Esusën pete dadpenquio icmiac. Moisesën chuipampidshenda nepec. “Nuquin Papan bédamboshë icquid chome-ndac,” capampidshenda nepec. Aidien nuqui chuiquid dapa icmetiad—quepac caondash Esus tantiamenquio yec. ¹⁵ Adsho ambembi tantiashien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu—quianec abentsëqui cuempac caondash Esus macuësh dapa dectatoec nidec.

Esus acte bëntse choaid
(*Mat 14.22-27; Mad 6.45-52*)

¹⁶ Esus cuembon inchëshbudtsëqui chian budondabi ëbitedi. ¹⁷ —Capednaun yacno nidnu—quec cano antabëdtoshon potenubi inchëshpondash Esus acte bëntse chopanushta. ¹⁸ Adnubien cunquequid dapa cunquetuidpondash. Acte comapenec tēcuaquenuc ¹⁹ uncadenquïo yampondash. Ënapen nidabi nëbi 6 quidometedu cactiontsëqui nidshun isquien matsesbimboec acte bëntse chopec. Adsho istanec dacuëdquiondabi. ²⁰ Adshobini: —Ëbi neque. Dacuëdenda—capondash. ²¹ Adoac: —Esus nec—quetanquin badedi antsadtomiondambi. Aid antsadtometanquin badedquïo potepondambi. Nandoash ambobi ushondabi Capednaun yacno.

Pemiaidon Esus istuidoaid

²² Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmbi abëd icquidon potepaboc. Ma aidbëd nidenquio icpaboc. ¿Mitsimbo nidpash? —quepac caondash

pemiaido. ²³ Adnubien shubu dadpen icquid Tibedias caid yacnocquidon cano dadpen bè-bèpac caondash. Pete pemebocono anoentsèqui nando-nandosho isash: ²⁴ —Potequimbien Esusèn yashe. Nèid canobi antabèdtoshon potenuna —quetanec antabèdtoshon potiac-potiacpac caondash.

Potiac-potiacash Capednaun yacno pudundoshon ²⁵ Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquoio yec: ²⁶ —Tantia. Mibitedi chuinu. ¿Èmbi tantianucta chodio? Padenquoio. Èmbi pete uasho isash: “Nuquin Papan namiaidèn naoshe. Istano,” ¿quecta ictio? Peteuidtsèqui tantiaquin ma mimi èbi nibèneyoc. ²⁷ Peteuidtsèqui tantiaquin pete bednuen naquidquoio ma mibi neyoc. Aidquoio chodquetequid nendac. Chodquetiapimbo icquid tantiaquin bèdamboen nata. Aden nash èmbi icmiacpadquiec Nuquin Papabèd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi —quepondash Esus. ²⁸ Adsho tantiash: —“Nuquin Papan chiacpadomboen nata,” quepequin mibi iquec. Adomboen natiadquoio icquin ¿atotsimbi nape? —caquien: ²⁹ —Nuquin Papan chiacpadomboen natiadquoio icquin ambi chomiondaidquoio tantiata —quepondash Esus ambi pemiaido chiech.

³⁰ Adoaquien: —¿Mimbi aden chuishouididambi: “Adquid nec,” quequin tantiapè? ¿Atotsi utsi comapenen tantiaquin mimi èbi ismepatsia? ³¹ “Èndenquimboshè pete nibèdacnoshon Moisesèn con tsusedpabo nibèdbèdi sequiaid pete pemianepampic,” quequin dada uapampid isombique. Adquid nacnenquin èbi isme —quepondash pemiaido peteuidtsèqui tantiech. ³² Adoaquien Esus: —Nuquin tsusedpa Moisesèn nainquien icpampic. Con Pambien aden pemepampic. Nèbi ambi chomiondaid petebimboecquid utsien Nuquin Papan mibi tantiametiaquio iquec. ³³ Aid petebimboecquidèn matses bèdambo icmetsiash pete piacimboecnuc —quepondash Esus abibi cadequi.

³⁴ Adsho tantiash petembo ca danec: —Ènenquoio icquin adquid èbi pemeta —quepondash pemiaido ambi peboeuidtsèqui tantiech. ³⁵ Adshobien Esusèn: —“Èbiuidtsèqui petebimboecquid icquin matses bèdambo icmequid nebi,” caimbi. Èbi tantiaquid ènenquoio icquin bèdambo icmenambi petebèdi acte bundoenquoio yacimboecnuc. ³⁶ Èmbi chuibocpadomboen ma mimi èbi tantienquoio icboc. Èmbi comapenen tantiaquin nabansho isumbi ma mimi èbi tantienquoio icboc. ³⁷ Utsibombien èbi tantiendac. Nuquin Papan tantiamiaidtedishun èbi tantiasho bèdamboen isquin cacumenquoio iquendambi. ³⁸ ¿Èmbi tantiacpadomboen naquidtabi nedi? Padenquoio. Nuquin Papan chiacpadomboen nanuec mabi abi yacnuèsh chondac. ³⁹ Aden aidèn chiacpadomboen nanuen èbi tantiaquido unèsacsho uincuemeshun cuidenquoio icquin èbèdi tabadmendambi. Unèsaid abitedi uincuemete ushèn adoendambi. ⁴⁰ Nuquin Papa bunacpaden èbi tantiaquido uincuemeshun Nuquin Papa yacno èbi tabadacnombo tabadmendambi —quepondash Esus ambi pemeboedo chiech.

⁴¹ Adec: —Nuquin Papa yacnuèsh chondaid yec petebimboecquid nebi —quesho tantiashien con matses chuiquido: ⁴² —¿Adquidida nepec? Ma icsamboen chuiipayoc. ¿Nuquin Papa yacnuèsh choaidta nedic? ¿Nuqui isacmaidta nedic? Ma Esus cuèmedquid neyoc. Ma Osen mado neyoc. Anitsen tantiambi. Matsesèn tishaid Nuquin Papa yacnuèsh choquid ictiapimbo iquec —quecuededpondash.

⁴³ Adshobien Esusèn: —Shoshquetsècquin èbi icsamboen chienda. Abimboembi caoc. ⁴⁴ Èbi chomiondaidèn Nuquin Papan tantiamiabi yaido icquin mimi èbi tantiatiapimbo iquendac. Nuquin Papan tantiamiaid icquin mimi èbi tantiatsiac. Aden Nuquin Papan èbi tantiamiaido unèsacsho unèsaid uincuemete ushèn uincuemendambi. ⁴⁵ Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bèdamboen iste matses tantiamendac,” quequin chuiampic. Aden Nuquin Papan tantiamiaido èbi tantiaquido yantsiash. ⁴⁶ “Ambi tantiamiaidèn matsesèn Nuquin Papa ishash,” quenquoio iquebi. Èmbiuidtsèqui abèd icquin Nuquin Papa isondambi. Aden abèd icquin abi isondaidi matsesondabi —quepondash Esus: —Matsesi nec —abi caquido chiech.

⁴⁷ Adashic padpidec: —Abimbo caombi. Èbi tantiaquido Nuquin Papa yacnombo èbèdi tabadmendambi. ⁴⁸ Petebimboecquid icquin aden tabadmendambi. Adecbidò bèdamboec tabadmianquid nebi. ⁴⁹ Nuquin tsusedpabon pete utsi nibèdacnoshon mana caid pepampic. Aid pequidi tsusiobudash unèspampic unèstiapimbo icquid yanabi. ⁵⁰ Petebimboecquid utsien Nuquin Papa yacnuèsh chondaid nèmbobi iquec. Aid piash èmbi chiacpadquiec padpidec unèsenquoio yec Nuquin Papabèd tabadtequid yanendac. ⁵¹ Adquidquoio nebi. Con nami piash matses unèstiapimbo icquid yanendac. Adquidquoio matses icmenuec èbided cuidadquin con nami menendambi —quepondash Esus ompoachimboen chiech. —Èbi

tantiaquido nëbi bēdamboen tabadmeshun unēsacsho Nuquin Papa yacno ëbēdi tabadmen-dambi padpidec unēstiapimbo icnuc —quequin tantiec: —Petebimboecquid icsho ëbi piash matses unēstiapimbo icquid yanendac —quepondash Esus. —Ëbi tantiaquido cuidmen-quo icnuc ëbided cuidadec unēsēndabi —quequin tantiec: —Con nami menendambi —quepondash Esus.

⁵² Adec: —Con nami piash matses unēstiapimbo icquid yanendac —quesho tantiashien namimbo ca danec con matses chuiquido onquecuededpondash. Utsi-utsiec: —¿Mitsipaden Esusēn aton nami nuqui pemepatsiash? Aidquio tantiatiapimbo iquebi —quecuedednubi utsi-utsiec: —¿Atotsi chuitiadquio yec niosh? Chuisho tantianu —quecuededpondash.⁵³⁻⁵⁴ Adsho tantiashun Esusēn ambi chiacpadomboembidi chuiuoapondash. —Tantia. Mibi chuinu. Matses tantiaquidquio nebi. Aden tantiaquieç ëbided cuidadec unēsēndabi. Ëbi adec unēsō isun con nami pequinc con intac acquinc cash nidaidēnuēsh bēdamboec tabadquid yanash Nuquin Papabēd tabadtequid mibi yanendac. Adquid icsho unēsaido uincuemete ushēnquo uincuemendambi ëbēdi tabadmenuen. Ëmbi chiacpadomboen nainquio yash Nuquin Papabēd tabadtiapimbo mibi iquendac.⁵⁵ Ai, con nami petebimboecquid nec. Con intac actebimboecquid nec. ¿Petebēdi acte naimēdanda mibi bēdambo icpatsia? Adecbidi con intac chididiqieç con nami icsabudec ëbided cuidadec unēsaid tantienquo yec mibi bēdamboec tabadtiapimbo iquendac.⁵⁶ Aden ëmbi namibēda intac chuisho bēdamboen tantiashun ëmbi chiacpadomboen matsesēn natiadquio yanendac. Adsho isun aibēd tēshnanenquo icquin bēdamboec tabadquid icmendambi.⁵⁷ Nuquin Papa unēstiapimbo icquid yec matses uincuemequidquio nec. Aidēn chomiac ambi namiacpadomboenuidi naquin ëbi tantiec tabadquid unēsacsho uincuemequin unēstiapimbo icquid icmendambi.⁵⁸ Aden ëmbi naid tantiamenuec: “Nuquin Papa yacnuēsh chonaid petebimboecquid utsi iquec,” quioibi. Ëbi adquid icsho isash ëbi tantiaquid Nuquin Papabēd tabadtequid yantsi-ash. Nuquin tsusedpabon pepampidpadquidpenquo nebi. Adquid pequidi tsusiobudash unēsampic. Ëbi tantiaquidien padpidec unēstiapimbo icquid yanendac⁵⁹ —quepondash Esus Nuquin Papan chiaid chuibante shubunuēsh Capednaun yacnuēsh.

Abi tantiauidquidon Esus nianondaid

⁶⁰ Adec: —Con nami pequinc con intac acquinc cash mibi bēdambo ictsiac —Esus quesho tantiashien abēd icquido utsi-utsiec: —Aidēn chiacpadomboen natiapimbo iquebi. Icsamboen chieç —quepondash Esus tantiamenquo yec.⁶¹ Adec onquesho ambembi tantiash Esus onqueoapondash. —¿Ëmbi chuiboed tantiash chieshtotiadquioda ique? ⁶² Nuquin Papan matsesmiad yequi unēsash ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuēsh chonaidini nec.⁶³ Namimbo intacquobēda ca danequien mibi nec. ¿Namimbo pequinc intacquio acquinc cashta mibi bēdambo icpatsia? Padenquo. Nuquin Papan Mayanēn ëmbi chuiboedbēda ëbi tantiamequin matses bēdamboec tabadquid icmetsiash. Adoaid unēsash Nuquin Papa yacno ëbēdi tabadtsiash —quepondash Esus cuembo chieç.⁶⁴ Adashic padpidec: —Ëmbi aden bēdamboen chiaqui utsin-utsinquien mimbi ëbi tantienquo yanendac —quepondash abi tantiauidquido chieç. Aido tauamboec abēdi nidnuc: —Nēidēn ëbi tantienquo yanendac. Nēid utsin ëbi chieshēnquido ëbi bedmendac —quequin ambembi Esusēn tantiapanēdash.

⁶⁵ Adashic padpidec: —Ëbi tantiauidquido tantiaquin naden chiombi. “Nuquin Papan tantiamiabi yaidēn ëbi tantiatiapimbo iquendac. Nuquin Papan tantiamiaidēnquien ëbi tantiatsiash,” quequin chiombi —quepondash Esus.⁶⁶ Adsho tantiashun dadpenshun Esus nianondash.⁶⁷ Aden nianaquien Esusēn abēd icquido 12ted icquid chuipondash. —¿Mimbisendabi niampe? —caquien⁶⁸ Petedo: —Padenquo. ¿Tsudabēd incuendambi mibi nianuc? Mibipadquid utsi nibēdec. Mimbuidtsēquien: “Ëbi tantiaquid bēdamboen isquin unēsacsho uincuemeshun ëbēdi tabadmendambi,” quequin chuipoc.⁶⁹ “Abimboen caos,” quequin mibi tantiembi. “Nuquin Papa yacnuēsh chonēdaid yec bēdamboshē icquidquien nec,” caombi mibi. Mibi niantiapimbo iquebi —quepondash Petedo Esus caç.⁷⁰ Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ëmbi adondaib abentsēc Satanasēn namiaidquio yec icsamboshē iquendac —quepondash Esus.⁷¹ —Simon Iscadioten mado Udasēn ëbi chieshēnquido ëbi bedmendac —quequin ambembi tantiash adondash Esus.

7

Aton utsibon Esus tantienquo yaid

¹ Abi tantiauidquidon nianac Cadidia yacnoudi yuec Esus capucuenepondash. —Nidaid Udeya caid yacnocquido con matses chuiquidon ëbi cuesunetiadquio iquec —quiash Udeya yacno nidenquo icpondash.² Adnubien con matses abitedi: —Edusaden

yacnuësh cuëdëntanu —quiampondash. Adanec nidaid utsi Udeya caidën nidec 7tedec ushec cuëdënec matses dadpen nidacno Edusaden yacno nidanepondash. Cuëdënec Esus nidenquo icpondash. ³ Adec nidenquo icsho isumbien aton utsibon: —Edusaden yacno nidec nid. Mibëd ictiadquo icquid ano icnushe. Comapenen tantiaquin nabanquin aido ismec nid. ⁴ “Ma matses dadpenshun ëbi tantianu,” quequina matses daëdpactsëc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. ⁵ —Nuquin Papan chomenëdaidquo nec —quequin tantienquo icquimbi adopondash aton utsibon.

⁶ Adoquien Esus: —Matses dadpen nidnuc nidtiadquo yec mibia nidta. Abitedishun isnuc nëbi nidtiapimbo iquebique. ⁷ Mibien anocquidon chieshëntiapimbo ye. Mibia nidta. “Nuquin Papan chiaid niac-niaquec mibi icsaic,” ëmbi cac chieshënondashibique. ⁸ “Cuesunenushë,” quiaish nëbi nidtiapimbo iquebique. Mibia nidta. Nuquin Papan tantiacpadec nidendabi ⁹ —quiaish anobi Cadidia yacno Esus tabadpondash.

Esustsen Edusaden yacnuësh cuëdënec nidaid

¹⁰ Aden aton utsibo nidanemiash yuec-yuecpactsëc ictanec abitsen Esus nidpondash Edusaden yacnuësh cuëdënec nidec. Abitedi ismenquo yec tsyuec Esus nidpondash.

¹¹ Adnubien con matses cuëdëncuededacnoshon abi chieshëncquidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash.

¹²⁻¹³ Adsho tantiaash con matses Esus chieshëncquido dacuëdënec utsibo tantiamenquo yec sho-shoshquetsëcquiec onquepac caondash. Utsi-utsiec: —Esus bëdamboshë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chondaidini nec,” quec ma muequi neyoc —quec onquecuededpac caondash.

¹⁴ Adnubien con matses cuëdënec taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. ¹⁵ Adsho tantiaash: —¿Mitsipaden tantiaashun chuipen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. ¹⁶ Adsho tantiaash Esus: —Ëmbembi chienquo icquin ëbi chomiondaidën chiaidquo chiec nebi. ¹⁷ Nuquin Papan chiacpadomboen natiadquo icquidën bëdamboen tantiaash. Ëmbi Nuquin Papan chiaid chuisho tantiaash: “Nuquin Papan chiaidquo chiec nec,” quequin tantiaash. Ëmbembi chuisho tantiaash: “Ambembi chiaid nec. Nuquin Papan chiaidpenquien nec,” quequin tantiaash Nuquin Papa tantiaquidën. ¹⁸ Ambembi chuiquidën: “Mabi matsesën bëdambo canu,” quequinuidtsëqui chuibantsiaash. Adquidpenquien nec. Ëmbien: “Ëbi chomiondaidquo ma matsesën tantianu,” quequin ambi chiaidquo chiendac. ¹⁹ Mimbien adoengquo iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquo dada uapampic. Ëbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshëncquido chiec.

²⁰ —Mimbi ëbi: “Cuesunenu,” caoc —Esus qesho tantiaashumbien ano tabadquidon: —Podobitsi icsa dapuduedash mibi tantiaengquo yec onquepec. ¿Tsuntsin mibi cuesunepatsiaash? —capondash. ²¹ Adoquien Esus: —Nëidën ëbi cuesunetsiaash —quequin chienquo yec: —Chonoengquo icte ushën comapenen tantiaquin dada bëdamepondambi. Aden bëdamiacsho isash: “Adopenshenda naic. Chonoengquo icte ushën daicsatsaid bëdamequin Nuquin Papan chiaid niac-niacposh,” ma mibi quepondac. ²² ¿Ëmbentsëquidambi chonoengquo icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquo ictaneshun adembi Moisesëntsen adopampic. Nëbi adembi naic chonoengquo icte ushëmbi chonoaquimbi ma mimbi shui dëbid dëteshuneyoc. ²³ Aden Moisesën chiampid niaengquo icquin shui nacnenquin mimbi bëdamboen naic. Ëmbitsen daicsatsaid dada abichobi bëdamequin mambi bëdamboen naondac. ¿Atotsi quequin ëbi chushcai? ²⁴ Chonoengquo icte ushën dada bëdamequid icsho: “Icsambo mibi iquec,” mimbi ëbi capec. Aden ëbi bëdamboen tantienquo icquin mimbi icsambo chiec. Ëbi bëdamboen tantiaquoshon ëmbi nabod bëdamboen chui —quepondash Esus abi chieshëncquido chiec.

Esus bedshun cuesunetiad, cauidaid

²⁵ Adec Esus: —Chonoengquo icte ushën naondambi —qesho tantiaashien anocquido Edusaden yacnocquido nadec onquecuededpac caondash. —Nuqui chuiquidon: “Cuesunetiad,” caboedien nëid nechitec. ²⁶ En is. Abi chieshëncquidobëdi tabadquin chieque. Chuisho ma chuiquidon chushcainquo icboc. “Nuquin Papa yacnuësh choquid Quidistu

caid Esus nec,” quequin tantiashumbien nachitec —quetanequien ²⁷ aidobidi: —Nuquin Papa yacnuĕsh choquid ictiapimboen aid iquec. Abi caniacno tantiadenquo ictsias —quepondash ano tabadquido.

²⁸ Adsho tantiashun Esusĕn Nuquin Papa tabadte shubu uashunaid daquĕnĕ uacnoshon chuibanquin abitedi tantiamenuen naden chuipondash. —“Ĕmbi isondaaid nec. Aton nidaid Cadidia caid yacnuĕsh caniquid nec,” ĵquequindabi bĕdamboen tantiapadi? Ma mimbi padenquo yoc. Ĕbemi chondaidpenquo nebi. Ĕbi chomiondaid abi iquec. Ma mimbi aidquiobi tantienuo yoc. ²⁹ Ĕmbien aidquo tantiendac. Aidbĕd tabadondaaidquo nebi. Adsho aidĕn: “Nid,” cac chondaaid nebi —caquien ³⁰ —“Con pa Nuquin Papambo nec,” quechitequien nec —qeshun abi chieshĕnquidon: —Cuesunemenuembien bedtiad —quetanquin: —Bednu —caqui bedadenquo icpondash. —Nĕbi ma Esus unĕs uainquo icnu —Nuquin Papa quenuc bedmenquo icquin Esusĕn mĕtampanĕdash. ³¹ Esus cuesunetiadquo icnubien utsibon dadpeshun Esus tantiabempondash. —Nĕidpadquid utsi nibĕdtsiandac. Nuquin Papan chiaid chuiquin nuquin tsusedpabon dada uapampicpadomboen comapen tantaquin Esusĕn matses bĕdamebamposh. Nuquin Papa yacnuĕsh choaid Quidistu caid Esus nec —quequin dadpeshun Esus tantiabempondash.

Ĕbi istuidenquo iquendac, quequin chiaid

³² Aden Esus chiec sho-shoshquetsĕcquiec onqueshobien Esus chieshĕnquidon padiseyo caidon tantiapac caondash. Adshun abĕdtan chuiquid utsibo chuipac caondash. —Ĕmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abĕd icquido sondado chuiquin: —Baded bedtan —capac caondash. ³³ Adoac nidanequin tantiatuidaquien naded Esus onquepondash. —Yuec-yuecpactsec mibĕd icashic ĕbi chomiondaidbĕdtsen tabadoaic nidendabi. ³⁴ Ĕbi nibĕnquin ĕbi istuidenquo mimbi iquendac. Ĕbi nidacno mibi nidtiapimbo iquec —quepondash Esus.

³⁵ Adsho tantiash abi chieshĕnquido: —Nuqui istuidmenquo icnuec ĵmitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ĵanocquidoda chuiatsias? ³⁶ Tantiandenquo yec onquepec. ĵAtotsi quepec? “Ĕbi nibĕnquin mimbi ĕbi istuidenquo iquendac. Ĕbi nidacno mibi nidtiapimbo iquec,” quepequien iccosh. ĵAtotsi quepash niosh? —quepac caondash Esus chieshĕnquido.

Aton Mayan abi tantiaquidbĕd tabadmete chiaid

³⁷ Adnubien cuĕdĕnec ĕnĕdte ushĕnquiobi con matses abitedimbo cuĕdĕnuec chochopondash. Cho-choash tabadbudnubien nidtoash comapenec onquequin Esusĕn chuipondash. —Acte natia bunachimboec Nuquin Papa tantiate bunquin ĕbi bĕdamboen tantiata. ³⁸ Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ĕbi tantiaquidobĕd tabadmendambi. Adoac mibĕd tabadquin mibi bĕdamboen tabadmequin utsibotsen Nuquin Papa tantiate bumetsias —quepondash Esus. ³⁹ —Nuquin Papabĕdta ĕbi tantiamequidquo Nuquin Papan Mayan nec —quequin tantiec adondash. Adquid abi tantiaquidobĕd tabadmequin chomiabi aden chuipondash Esusĕn. Nuquin Papa yacno nidambien abi tantiaquidobĕd Nuquin Papan Mayan tabadcuenondash.

ĵNuquin Papan chomiaidta nepeba? Esus caid

⁴⁰ —Nuquin Papa tantiate bunquin ĕbi tantiata —Esus qesho tantiashien Esus chiec ano tabadquido onquecuededpac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesĕn chiampidien Esus nechitec —quenubien ⁴¹ utsi-utsiec: —Nuquin Papa yacnuĕsh choquid Quidistu caidien Esus nechitec —quenubien utsi-utsiec: —ĵCadidia yacnuĕshĕta Nuquin Papa yacnuĕsh choquid chopadic? ⁴² Padenquo. Nuquin Papan chiaidquo naden dada uapampic. “Nuquin Papan chomiaid nuquin tsusedpa Dabidĕn tsyuecquid nendac. Dabid caniampicnoshon shubu daĕdpacktsĕcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquo nec —quepac caondash. ⁴³ Adec dadpen: —Bĕdambo icquid nec —quenubi aidtedbidi: —Icsambo iquec —quepac caondash. ⁴⁴ Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

Isadaidbo chuiquid dapabon Esus chieshĕnaid

⁴⁵ Adnubien: —Esus bedtan —caboedo sondado bedabi Esus chieshĕnquido chiec chopac caondash. Chosho: —ĵAtotsi quias bedabi cho? —caquien: ⁴⁶ —Ma bĕdamboenshĕ chuiboc. “Adomboen chuibanquid utsi nibĕdec,” qeshun bedtiapimbo iccobi —quesho ⁴⁷ tantiashien: —Aid muasho tantiashun: “Abimbo caic,” ĵcainda icco? ⁴⁸ ĵAdambi Esus

muasho tantiadio? ¿Ada tsusiobon tantiadiosh? Padenquoio iccosh. ⁴⁹ Utsibombien tantiash. Adquidon ìmbi bédamboen tantiacpadomboen Nuquin Papan chiampid tantienquoio iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshènec.

⁵⁰ Adnubien inchëshèn puduedash Esusbéd onquiondaid Nicodemo caid abitsen chuiquid yec nadpac caondash. ⁵¹ —¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bédambo ictsiash. Chuimiabi cuidac icsambo ictsiash —quepac caondash Nicodemo abèdtan chuiquid utsibo chiec. ⁵² Adoaquien chuiquido: —Esus yacpade Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquoio iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic. ⁵³ —¿Chuimiabida cuidpec? —quetsècsho aden Nicodemo chushcanec abitedi nidaniac caondash aton shubuno ushec nidec.

8

Bènèpenquoio chudmequid cuènoten seshunetsenaid

¹ Nicodemo chushcabon Esus macuësh dapa Odibos caid yacno ushec nidondash. ² Adtanec choashic Nuquin Papa tabadte shubu uashunaid daquènè uaidèn puduedpondash. Puduedsho isash matses dadpen cho-choec abi datsidadsho Esusèn chuipondash.

³ Aden chuinubien con matses tsusiobon aton bènèpenquoio chudmesho istuidshun chido bèpondash. Moisesèn dada uampid chuibanquidobèdtan tsusedpabon chiampid namequido padiseyobon Esus yacno bëshun chido nènantanquoio nidsimpondash. ⁴ Adshumbien Esus chuipondash. —Aton bènèpenquoio chudmesho istuidshun nèid bèombo. ⁵ Nuquin Papan chiaid Moisesèn naden dada uapampic. “Aton bènèpenquoio chudmesho istuidshun cuènoten seshunequin unès uaquid,” quepampic. ¿Adembidida mimbi tantie? —quepondash chido bèquido. ⁶ —¿Atotsi Esus quepatsiash? Nuquin Papan chiampidquoio chienquoio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusèn ècbedenquoio icquin shuebudshun mèdanten nidaid dada uapondash. ⁷ Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbria cuènoten se —quetanec ⁸ padpidec shuebudshun mèdanten nidaid dada uaoapondash.

⁹ Adnubien: —Nuquin Papan chiaid niaquesambo icquin en mimbria cuènoten se —cac: —Nuquin Papan chiaid niaquesamboen nibèdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouditsèqui Esusbéd icnuc. ¹⁰ Adec nidanian Esusèn nidtoquin isquien nibèdec. Nidaniac. Abi bèboedo nidaniacsho istanquin: —¿Mitsimbo nidosh, champi? ¿Mibi cuènoten sequitida nibèdosh? —Esusèn cac: ¹¹ —Ai, nibèdosh —quesho tantiashien: —Èmbimbo mibi cuènoten senquoio iquembique. Mibi icsaid ènash bédamboec tabadec nid, champi —capondash Esusèn. Adoac chido nidondash.

Pabiate cuembo icnuc tantiamequid

¹² Yuec ictaniash Nuquin Papa tabadte shubu uashunaid daquènè uaidèn Esus padpidec puduedoapondash. Puduedshumbien abi chieshènquido tantiamequid padpiden chuioapondash. —Pabiate cuembo icnuc con Pan bédamboen iste matses tantiamequidquoio nebi. Èmbi tantiamiac èbi tantiaquido icsateuidi bunenquoio yanec bédamboec tabadte buncuenendac. Adec èbèd tabadtequid yanendac —quepondash Esus.

¹³ Adsho tantiash abi chieshènquido: —Mibentsèqui: “Adquid nebi,” quesho tantiatipimbo iquebi. Muequien mibi nechitec. Matses daèdshun chiac bédambo ictsiash —quepondash. ¹⁴ Adsho tantiash Esus: —Èbibi abimbo cadebi. “Con Pa yacnuësh chondash anobidi nidendabi,” quec muainquoio iquebi. “Aton papa yacnuësh choash anobidi Esus nidoaindac,” quequin ma mimbi èbi tantienquoio icboc. ¹⁵ Cadidia yacnuësh choquid matsesuidien mimbi èbi danec. Adquid danquin mimbi icsamboen chiec. Èmbien abimbo chiec. Abimbo chuiquid icquin: “Nèid icsambo iqueque. Cuidnuna. Nèid bédambo iqueque. Cuidenquoio icnuna,” quequin nèbi chienquoio iquembique. ¹⁶ Aden chuiquin abimbo chuitsiambi. Èmbentsèqui chienquoio icquin èbi chomiondaid Nuquin Papabèdtambi chuiquin abimboshè chuitsiambi. ¹⁷ Nuquin Papan chiaidquoio Moisesèn naden dada uapampic. “‘Icsaosh,’ quequin daèdshun chuisho tantiash: ‘Abimbo chiec,’ quequid yendac. Adecbidi: ‘Bédambo iquec,’ quequin daèdshumbidi chuisho tantiash: ‘Abimbo chiec,’ quequid yendac.

Abentsĕcshun chuishoen mua caquid yendac,” quequin Nuquin Papan chiaidquio Moisĕsĕn dada uampic. ¹⁸ Aden Moisesĕn dada uampid tantiashun ĕmbentsĕqui chienquio iquemi. Ēbi chomiondaid con Pabĕdtantsĕqui chiemi —quepondash Esus.

¹⁹ Adsho tantiashun abi chieshĕnquidon: —ĵMitsimbo papa icpec? —capondash. Adoquien: —Con Pa ĕbĕdta ma mimi tantienquio icboc. Ēbi tantiaquimbien mimi con Patsen tantiatsiac —quepondash Esus abi chieshĕnquido chiec. ²⁰ Abi chieshĕnquido on-quecuedec quĕnĕn tabadnubi aid quĕnĕ cachoĕtsĕqui Nuquin Papa tantiaquin piucquid menequin nauedte tabĕcacnoshon Esusĕn chuipondash. Adec Esus anoentsĕqui tabadsho abi chieshĕnquidon bedabi icpondash. Nuquin Papa: —Ma ĕmbi tantiacpadĕnquio matsesĕn unĕs uanu —quenuc Esus bedabi icpondash.

Utsibon Esus tantiauidaid

²¹ Adnubien Esusĕn abi chieshĕnquido padpiden chuioapondash. —Nidendabi. Ēbi nidan ĕbi nibĕnquin mimi ĕbi istuidenquio iquendac. Ambi chiaid niac-niacquido icsho Nuquin Papan bĕdamboen isambobi mibi unĕsendac. Adash ĕbi nidacno mibi nidtiapimbo iquendac —quequin chuipondash Esusĕn. ²² Adsho tantiash Esus chieshĕnquido: —ĵAbibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ĵAden chieĕta: “Ēbi nidacno mibi nidtiapimbo iquec,” quepec? —quepondash abi chieshĕnquido. ²³ Adsho tantiash Esus: —Mibi matses nec. Ēbien con Pa yacnuĕsh chondaidquio nec. ²⁴ “Adquid icsho ĕbi tantienquio icquid unĕsacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bĕdamboen isabi mibi unĕsendac,” mibi caombi —quepondash Esus.

²⁵ Adsho tantiash abi chieshĕnquido: —ĵMitsipadquid icquin ĕbi aden chie? —quepondash Esus caic. Adoquien: —Ēmbi chianeboedquiobi mabi neyoc —queoapondash Esus. ²⁶ Adashic padpidec: —Mimi naid dadpen chuiquin mibi cuidte chiendambi. Ēmbemi chienquio icquin ĕbi chomiondaid muesanquio chiaidquio chiendambi. Aidĕn chiaiduidi matses abitedi chiendambi —quenubien ²⁷ Esus chieshĕnquidon: —Abi chomiondaid Nuquin Papambo nec —quequin tantienquio icpondash. ²⁸ Aden tantienquio icsho isun Esusĕn padpiden chuioapondash. —Matsesmiaidquio icshobi ĕbi cuesten dectanshumbic mimi ĕbi tantiabenedac. “Ambi chiapadquidshenda nepadenec. Ambemi chiaid chienquio icquin aton Papan chiaidquio chuiquin aidĕn chiapadomboenshenda napadenec,” quequin ĕbimbo mimi tantierendac —quepondash Esus. ²⁹ Adashic padpidec: —Nĕbi ĕbi chomiondaid ĕbĕd iquec. Aid bĕdambo icmenuen ambi chiapadomboen nasho isun ĕbi nianenquio iquec —quepondash Esus.

³⁰ Adsho tantiashun: —Abimboen Esusĕn caic. Nuquin Papa yacnuĕsh choquidien nec —queshun Esus tantiauidtsĕccondash dadpeshun.

Satanasĕn yuabo nec, quequin Esusĕn chiaid

³¹ Adsho isumbien Esusĕn abi bĕdiactsĕc tantiauidtsĕcboedo chuipondash. —Ēbi tantiaquidĕn ĕmbi chiapadomboen natiadquio iquendac. ³² Nuquin Papabĕdta ĕbi aden tantiasho icsamianquidĕn yua icboedi aidĕn yuapenquio mibi icmetsiambi —quepondash Esus abi tantiauidtsĕcboedo chiec. ³³ Adec Esus: —Yua —quesho tantiashien: —Abadauan yampidĕn tsyuecquido yec utsin yuacmaido nebi. Tantienquio icquin mimi icsamboen chiec. ĵAtotsieshun: “Mibi yuapenquio icmetsiambi,” quequin ĕbi chio? —capondash abi tantiauidtsĕcboedon Esus chuiquin.

³⁴ Adoquien: —Tantia. Mibi abimbo chuinu. Uidĕn uacimboen icsambo icquidĕn ambemi ambi icsaid ĕntiapimbo iquec. Abemi bĕdambo ictiapimbo iquec. ³⁵ ĵMitsipadquid nuquin matsesĕn yuaid icpec? Aton madopen yec icsambo icsho icbon cuemequid. Aton madombo bĕdamboen isquid. ³⁶ Aden con Pan aton Madombo icsho ĕbi bĕdamboen isquin ĕbi tantiaquidotsen bĕdamboen isendac. Aden ĕbi tantiaquido bĕdamboen isquin bĕdamboen tabadte bumequin abi yacno ĕbĕd tabadtequido icmendac —quepondash Esus.

Satanasĕn madobimboecquido chiaid

³⁷ Adshumbic Esusĕn abi chieshĕnquido chuioapondash. —“Con tsusedpa Abadauan icpampic,” quequin mimi abimbo chioc. Adboedĕmbi ĕbi cuesunetiadquio mibi iquec. Ēmbi abimbo chuisho tantiate bunenquio icquin ĕbi cuesunetiadquio mibi icpec. ³⁸ “Con Pabĕd tabadquin isondambi,” quequin ĕmbi bĕdamboen chuisho tantienquio icquin min papabimboecquidĕn chiapadomboen mimi naindac —quepondash Esus abi chieshĕnquido chiec. ³⁹ —Min papabimboecquidĕn chiapadomboen mimi naindac —queshoben: —Con tsusedpa Abadauanĕn nacpadomboen mambi napaboc —capondash Esus chieshĕnquidon. Adoquien Esus: —Ma mimi adoenuio yoc. Abadauanĕn nacpadomboen naquin mimi bĕdamboen natsiac. ⁴⁰ Bĕdamboen natiapimbo icquin mimi ĕbi cuesunetiadquio iquec.

Nuquin Papan chiaidquo abimbo chuisho mimbi adotiadquo iquec. Nuquin Papan chiaid tantie ma Abadauan cuesuniantiapimbo icpampiyoc. ⁴¹ Min papabimboecquidèn namiacpadomboen naquidien mibi nec —capondash Esusèn abi chieshènquido chuiquin. Adoquien: —Mambi Nuquin Papauidsèqui tantieyoc. Utsi tantiatiapimbo icquin Nuquin Papauidsèqui con pa caimbi —quepondash Esus chieshènquido.

⁴² Adsho tantiahsien Esus: —Nuquin Papambo tantiaquimbien mimbi èbitsen tantiahsiac. Èmbi choenquo iccondabi. Nuquin Papan: “Matsesbèd tabadec nid,” caquini chondac. Adoaid icsho Nuquin Papa tantiaquidèn èbitsen tantiahsiac. ⁴³ ¿Mitsipadquid yec èmbi chiaid tantiahs: “Tantiadenquien icpec,” quepe mibi? Èmbi abimbo chuisho tantiate bunenquo yec pamumèdacbimboec mibi iquec. ⁴⁴ Min papabimboecquid Satanas nec. Aid bunacpade-nuidi mimbi natiadquo iquec. Èndenquimboshè Nuquin Papan tauamboen matses uanubi min papabimboecquid cuesunianquidquo nepampic. Aton padibi nec. Nuquin Papan chiapadomboen namenquo yec chieshènec muaquidquo nec. Aton padibi icquid yec matses muamequidquo nec. Aidèn madobimboecquin mimbi èbi tantiatiapimbo icpec. ⁴⁵ Èmbi Nuquin Papan chiaidquo abimbo chuisho mimbi tantiatiapimbo iquec. Icsambo icquidèn ambembi chuisho mimbi tantienquo yaquien bédambo ictsias. Mabi icsambo icquidpenquo neyoc. ⁴⁶ ¿Tsumsimbini: “Mibi icsaoc,” capatsias? Mabi adotiapimbo yoc. Icsaisambo nebi. Adquid icquin Nuquin Papan chiaid èmbi abimbo chuisho ¿atotsi quequin tantienquo mimbi icpe? ⁴⁷ Nuquin Papa tantianuequidèn Nuquin Papan chiaidquo chuisho tantiahsiac. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshènquido chushcaic.

Esus chieshènquido cuènoten siantiapambo yanaid

⁴⁸ —Nuquin Papa tantiesabombo ma mibi neyoc —Esus qesho tantiahsien abi chieshènquido: —Ma mibi podobitsi icsa dapudedash neyoc. Tantiadenquo yec mibi onquec. Samadia yacnoquidobimboec icsamboshè ma mibi iqueyoc —caquien ⁴⁹ Esus: —Mabi podobitsi icsa dapudedambo yoc. “Ma matsesèn con Pa tantianu,” quequin mambi abimbo chuiboc. Adshobi: “Nuquin Papan chiaidquo abimbo mimbi chiec,” catiadquidi mimbi èbi: “Muec nec,” capec. ⁵⁰ “Mabi: ‘Bédambo iquec,’ canu,” quenquo iccobi. Con Pambien: “Ma matsesèn con Mado: ‘Bédambo iquec,’ canu,” èbi caindac. “Bédambo iquec,” canesabotedi aidèmbi cuidendac. ⁵¹ Tantiata. Mibi bédamboen chuinu. Èmbi chiapadomboen naquidquo unèsenquo ictsias —quepondash Esus ompoacbimboen chiec. —Èbi tantiaquido unèsacsho uincuemeshun Nuquin Papa yacno èbèdi tabadmendambi padpidec unèstiapimbo icnuc —quequin tantiec adondash.

⁵² —Unèsenquo ictsias —qesho tantiahs Esus chieshènquido: —Ma mimbi tantia-denquo icnuc chuiyoc. Adsho: “Mayan icsa dapudedashien nec,” mibi caombi. “Èmbi chiapadomboen naquidquo unèsenquo ictsias,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bédamboen isaidombo abitedi unèspampic. ⁵³ ¿Aido Nuquin Papan namiapimbo icnuc Nuquin Papan namequiaidquida ne? ¿Mitsipadquid mibi nepe? Muequien mibi nechitec —quepondash.

⁵⁴ Adoquien Esus: —Èmbembi: “Mabi: ‘Bédambo iquec,’ canu,” quequin èmbi nac icsambo ictsias. Mimbi: “Aiduidtsèqui tantiembi,” caboedèmbini: “Nèid con Mado Esus bédambo iquec,” quequin èbi comapenen tantiaquin namec. ⁵⁵ “Tantiembi,” mimbi caboed Nuquin Papa ma mimbi tantienquo yoc. Èmbien Nuquin Papa tantiaquiec. “Aid tantienquo iquembi,” quec mibi yacpade muatsiabi. Mambi con Pa tantiaquin ambi chiapadomboen nayoc. ⁵⁶ Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuèsh choash bédambo icmianquidquo matsesbèdi tabadendac,” quequin tantiec cuishonquepadenec. Nuquin Papan tantiamiac èbi aden tantiapadenec —quepondash Esus. ⁵⁷ Adsho tantiahsun Esus chieshènquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanèn mibi tantiatiapimbo icpampic —caquien ⁵⁸ Esus: —Abimbo caimbique. Tantiata. Abadauan tishabi icnubi èndenquimboshè ictenebi. Nuquin Papapadquidquo nebi —quepondash Esus. ⁵⁹ Adsho tantiahs nèishtanequien: —¿Icsamboenda chuipec? ¿Nuquin Papada muauapebac? —quetanquin cuènote dapa bedtanequin: —Seshunenu —cac siadenquo yec ompodanec cuempodash Esus.

¹ Yuecquo ictaniash chonoadenquo icte ushĕn capucuenequin Esusĕn dada bĕshuaid istuidpondash. Anin bĕshuacshobi tishnĕdaid niondash. ²⁻³ Aid istuidshumbimbi: —En chui, Icho. Tantianu. *¿Atotsieshun Nuquin Papan bĕshu uapanĕdash? ¿Aton papabĕd ani icsasho isun Nuquin Papan cuidquin bĕshu uanĕdaida nepec? —caquien: —Padenquo. Utsi icsasho isun Nuquin Papan nambo icpanĕdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bĕshu uanĕdaida nepec? —caondambi. Adoaquien: —Padenquo. “Abibi icsaindac,” quequin tantiashun Nuquin Papan bĕshu uambo icpanĕdash. “Ma con Madon comapenen tanti-aquin ismenu,” quequin ambi tantiacpaden Nuquin Papan bĕshu uapanĕdash. Adoacsho anin tishnĕdaid nec. ⁴ Nĕbi ambi chiacpadomboen nanuna. “Nainabi inchĕshmane,” quiash comapenec chonoadnuna. Inchĕshĕn matses chonoadesa —quepondash Esus. —“Con Pan tantiaidtedi nainabi unĕsmane,” qeshun unĕsabi icquin con Pan chiaidtedi nainendambi —quequin tantiec: —“Nainabi inchĕshmane,” quiash comapenec chonoadnuna —quiondash Esus. ⁵ Adashic: —Matsesbĕd icquin Nuquin Papa bĕdamboen tantiamequidquo nebique. Nĕidtsen tantiamenu ⁶ —quetanquin nidaidĕn uicchun cuishtucatanquin nidaidbĕdta uicchun cabiuntsĕchun bĕshuaid bĕbitaccapondash.*

⁷ Adotanquimbic: —Acte tiquidimbo icquid Sidoe caidĕn bĕpamĕdec nid —cac nidash bĕpamĕdtanec bĕdamboen isec aton shubuno nidpac caondash. Aid acte con onqueten Sidoe quequin buanaid caic. ⁸ Aton shubuno nidshobi aton shubu anoentsĕcquidon bĕshuacboed istuidpac caondash. Adembidi utsibon: —Bĕshuaid nebique. Piucquid beccho —quedonetsec tsadtsĕchso isboedontsen istuidpac caondash. Istuidshun: —¿Nuqui isboedquiboda nepec? “Beccho,” *¿quedoneboedquiboda nepec? —cabedepac caondash. ⁹ Utsi-utsiec: —Ai, aidquobi nec —quenubi utsibo: —Padenquo. Aidbimboecquidien nec —qesho tantiash: —Aidi nebi —quepac caondash bĕshuacboed. ¹⁰ Adsho tantiashun: —¿Mitsipadec bĕdano? —caquien: ¹¹ —Esus caidĕn bĕdamioshi. Nidaidĕn uicchun cuishtucashun nidaidbĕdta uicchun cabiunshun bĕbitaccashun: “Acte tiquidimbo icquid Sidoe caidĕn bĕpamĕdec nid,” cac nidash bĕpamĕdec bĕdanobi. Nĕbi bĕdamboen isembi —quepac caondash bĕshuacboed. ¹² Adsho tantiashun: —Mibi bĕdamequid *¿mitsimbo iquec? —cac: —Tsaudi —quepac caondash bĕshuacboed.**

Bĕshuaid bĕdameboed chuimiaid

¹³ —Bĕdamioshi —qesho tantiashun: —¿Abimboda capec? Ma con chuiquidon chuimenu —quequin padiseyobo yacno bĕshuacboed buampac caondash. ¹⁴ Buanacshobien padiseyobon: —Chonoadenquo icte ushĕn nac caosh —quequin tantiaquin: ¹⁵ —¿Mitsipadec bĕdano? —caquien: —Esusĕn nidaidbĕdta uicchun cabiunshun bĕbitaccac bĕpamĕdec bĕdandshun nĕbi bĕdamboen isembi —quepac caondash bĕshuacboed.

¹⁶ —Bĕpamĕdec bĕdanobi —qesho tantiashien chuiquido onquecuedepac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquo ictsiash. Chonoadenquo icte ushĕn nĕid bĕdamequin ma Nuquin Papan chiaid niac-niacpacyoc —quenubien utsibo: —¿Nuquin Papa tantiesanda aden bĕdamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquo icquin ¹⁷ bĕshuacboed chuipac caondash. —Mibi bĕdamequid *¿tsutsi mimi cape? —caquien: —Nuquin Papan: “Yuecshun naden naindambi,” quequin chiaidquo chuiquidien nec,” caimbi —quetanec bĕshuacboed nidpac caondash.*

¹⁸ Aid nidnubien Esus chieshĕnquido: —Bĕshupenquien niash. Muequien niashe. Anibĕdta amĕ chuimenun chomenuna —quetanquin ¹⁹⁻²⁰ chomeshun bĕshuacboed cain: —¿Min madoda niosh? —capac caondash. Adoac: —Ai, con mado niosh —qeshobien: —¿Bĕshuacshobida tishonda? —capac caondash. Adoaquien: —Ai, bĕshuacshobi tishondaid nec —ani qeshobien: —Bĕshuaid *¿mitsipadec bĕdanosh? —capac caondash. ²¹ Adoaquien: —Tsaudi. Bĕdandsho isambo iccombi. ¿Tсандambien bĕdamechitash? Dada ĕnden caniaid neque. Aidi chuime —quepac caondash bĕshuacboedĕn tita amĕbĕdi. ²² —“Nuquin Papa yacnuĕsh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuĕdec: ²³ —Dada ĕnden caniaid neque. Aidi chuime —quepac caondash.*

²⁴ Adoac padpiden bĕshuacboed chomeopac caondash padiseyobon. Chomias: —“Nuquin Papan bĕdamioshi, Nuquin Papa bĕdambo iquec,” *¿quecta icco? Ma Esus Nuquin Papan chiaid niac-niacquid neyoc. Ma icsamboshĕ icquid neyoc —quepac caondash. ²⁵ Adsho tantiash bĕshuacboed: —Icsamboshĕ icquidien Esus nechitec. Aden tantienquo iquembi. Mabi bĕdameboc. Isenquo icboedĕmbi mambi nĕbi bĕdamboen iseyoc. Adenuidtsĕqui tantiembi —quepac caondash. ²⁶ Adsho tantiashun: —¿Mitsipaden mibi bĕdamiosh? —caquien: ²⁷ —Mambi mibi chuipaboc. Ma mimbimbobi tantienquo icbob.*

¿Atotsi quequin padpiden: “Ëbi chui,” cai? ¿Esus tantiatidquioda icti? —capac caondash bëshuacboedën.

²⁸ Adsho tantiash nëishtanquin chushcapac caondash. —Mibi Esus tantiaquidquo nec. Mibi icsambo iquec. Ëbien nuquin tsusedpa Moises tantiaquidquo nec. ²⁹ “Moisesien Nuquin Papan chuiquin namepampic,” quequin tantiemi. ¿Tsuntsin chiac mibi bédamequidën naphash? Ma mibi bédamequid ëmbi tantiacmaidquo neyoc —quepac caondash chuiquido. ³⁰ Adoaquien bëshuacboed: —¿Abida cai? “Dadpenquo tantiemi,” ma mibi quepaboc. Adboedi: “Ëmbi tantiacmaidquo nec,” ¿quecta ique? Mimbi tantiacmaidëmbini bédamiosh. Ma bédambo yoc. ³¹ Abi icsaid ënabi icquidën chianesho Nuquin Papan tantienquo ictsiash. Abi tantiaquin ambi chiapadomboen naquidën chianiac tantiashun Nuquin Papan nashuntsiash. ³² Anin bëshuacshobi tishaid bédamenquo ictenec. Adquid bédamequid nibëdpadene. ³³ Nuquin Papa tantienquo icquin Esusën ëbi bédamenquo ictsenosh. Nuquin Papa tantiaquimbini bédamiosh. Ma Esus bédambo icquid neyoc —quepac caondash bëshuacboed. ³⁴ Adsho tantiash nëishquioshon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquo icpac caondash.

Ambi bédameboed istuidoashun Esusën chiaid

³⁵ Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matesmaidquo caic: “Nuquin Papa yacnuësh choquid nec,” ¿quequinda mimbi tantiap? —capondash Esusën ambi bëshuaid bédameboed chuiquin. ³⁶ Adoaquien: —¿Tsutsi neque? Isnu —cac: ³⁷ —Ëbi nec. Mibi bédameboedi nebi —caquien: ³⁸ —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquo yec mibi bédamboshë iquec —quetanec ismenuec danëshën tinquebudpondash.

³⁹ Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatiapimbo icquin Nuquin Papa tantienquo iquec —quepondash Esus. ⁴⁰ Adsho tantiash nëishtanec: —¿Nuquin Papa tantiesabodabi nedi? —quepondash Padiseyobo. ⁴¹ Adsho tantiashien: —Nuquin Papa tantiesambo icsho ëmbi tantiamiac Nuquin Papabëda ëbi tantiasho Nuquin Papan mibi bédamboen istsiash. “Nuquin Papa tantiaquiemi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Esus abi chieshënquido chiec.

10

Obecabimboecquido chiaid

¹⁻² Adshumbic abi chieshënquido Esusën padpiden chuiopondash ompoacimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaquin napec? Obeca daquënë uaidën puduedte shëcuënquo obeca icho puduedquid. Daquënë uaid mayadec puduedquidien ampequid nendac. ³ Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icho tsibanquid obecan. ⁴ Adshobic icbon daquënë uaidën tabadquid abitedi niecumesun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuëne. Con icho nec,” quequin icho tsibanquid obecan. ⁵ Utsibon cuënaquien tsibanenquo yec dacuëdec cuenquid obeca. Icbouidsëqui tsibanquid obeca nec —Esus quesho tantiashien: ⁶ —Tantiadenquo yec mibi onquec —quepondash Esus chieshënquido.

⁷ Adsho tantiashun Esusën chuipondash. —Tantia. Mibi bédamboen chuinu. Obeca daquënë uaid puduedte shëcuëbimboecquid nebi. ⁸⁻¹⁰ Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bédamboen dayun uaquin bédamboec tabadquid icmendambi. Aido unësacsho uin-cuemesun Nuquin Papa yacno ëbëdi tabadmendambi. Adec ëbi bédambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid

tantiaquidon Nuquin Papa tantienquo iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienquo icquimbi ëmbi chiaiduidtsëqui tantierendac —quepondash Esus abi chieshënquido chieci.

Ëbi tantiaquido dayun uaimbi, quequin chiaid

¹¹ Adashic Esus padpidec onqueoapondash. —Obeca icbobimboecquid nebi. Icho cudasacimboc ëbi tantiaquido cudasnuec ëbided cuidadec unësendabi. ¹²⁻¹³ Utsiboen adenquo ictsiash. Piucquid bednuen obeca isquidbimboec iquec. ¿Mitsipadopaid obeca isquidën? Bëdi dapa chosho isun: “Con napenquo nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën icbonpenquo nianacimboc ma mimbi icsamboen napayoc. Nuquin Papa tantie tabunquido ma mimbi Nuquin Papambo tantiamenquo iqueyoc —quepondash Esus abi chieshënquido chieci.

¹⁴⁻¹⁵ Adashic abi onquec: —Ëmbien matses bëdamboen tantiamenquin ëbi tantiaquido dayun uaindac. Nuquin Papabëd ëbi tantiananacpadquieci ëbi tantiaquidobëdtsen tantiananquiebi. Aden ëbi tantiaquido tantie Nuquin Papa cuidmenquo icnuec ëbided cuidadec unësendabi. ¹⁶ ¿Nëid matses isadaidboudtsëqui tantiectabi adec unëspadi? Padenquo. Matses utsibontsen Nuquin Papan tantiamiaido icquin ëbi tantierendac. Aidobëdta nëid matses con matses caquin abitedi bëdamboen dayun uaindambi. ¹⁷ Con Pan tantiamiacpadec ëbided cuidadec unësendabi. Aden ambi chiacpadomboen ëmbi nasho con Pan ëbi tantiaquieci. Unëshash ëbemi uincuenendabi. ¹⁸ Matsesën ambembi ëbi unë uatiapimbo ictsiash. Ëmbi tantiacpadquiequi matsesën unës uadendabi. Adecbidi uincuentiadquoyec ëbemi uincuenendabi. Aden con Pan namiacpadomboen naindambi —quepondash Esus.

¹⁹ Adsho tantias con matses chuiquido nadec onquecuedepac caondash. ²⁰ Esus chieshënquido: —Podobitsi icsa dapuedash tantiadempambo yec onquepec. ¿Atotsi queequin aid tantie? Aidquo tantiatipimbo iquendabi —quenubien ²¹ utsi: —Podobitsi icsa dapuedashata ¿adec onquepatsiash? Bëdamboequien onquiosh. ¿Podobitsi icsa dapuedaidënda aden bëshuaid bëdamepatsiash? Bëdambo icquidëmbien adotsiash —quepac caondash.

¿Quidistu caidta ne? quequin chiaid

²² Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantieci cuëdëntanu,” quianec cho-chopondash. Ambo iquenuampamboec icpondash aton padibi. ²³ Iquenuampamboec incubien Esus Nuquin Papa tabadte shubu uashunaid daquënë uaidën puduedash shubunquo puduedabi quënë cachocqui capupondash. Aid quënë cachoc: “Sadomonën nacnenaid nec,” caondash. ²⁴ Ambo Esus capusho isashien con matses chuiquido Esus natia datsidadshun: —En sebadënquo chui. Tantienquo yec tsadtiapimbo iquebique. Mimbi cuembo chuisho tantiatadquio iquebi. ¿Nuquin Papan chomiaid Quidistu caidta ne? —capondash con matses chuiquidon. ²⁵ Adoaquien Esus: —Mambi mibi chuiapaboc. Ma mimbimbobi ëbi tantienquo icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi. ²⁶ Adosho isash mibi: “Ai, Nuquin Papa yacnuësh choquidien nec,” quetiadquidëmbi mimbi ëbi tantienquo iccoc. Nuquin Papan tantiamiabi yaido icquin mimbi ëbi tantiatipimbo iquec. ²⁷ Con Pan tantiamiaidien ëbi tantiaquid yanendac. Adshun obecan aton icbo tsibanacimboc ëmbi chiacpadomboen natiadquio yanendac. ²⁸ Aido unësacsho uincuemeshun Nuquin Papa yacno ëbëdi tabadmenambi padpidec unëstiapimbo icnuc. Unësabi icsho: “Con na nec,” qeshun bëdamboen dayun uaindambi. Ëmbi adoacsho bedshunacimboc icsambo icquidën yuaquin Nuquin Papan cuidtequido icmeoatiapimbo iquendac. ²⁹ Con Pantseen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënchictiapimbo iquendac. ³⁰ Aden ëbi bedshuntiapimbo icquin con Pantseen bedshuntiapimbo iquendac. Con Papadquidquio nebi —quepondash Esus.

Cuënoten seshunetiadpambo yanoaid

³¹ —Nuquin Papapadquidquio nebi —Esus qesho tantiash nëishtanquin cuënote dapa bedshun abi chieshënquidon Esus seshunetiadquio icoapondash. ³² Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? —quepondash Esus. ³³ Adoaquien: —¿Bëdamboen nabanshodambi: “Mibi seshunenu,” cadi? Padenquo. “Con Papadquidquio nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuisho tantiashumbimbi mibi seshunec —quepondash abi chieshënquido.

³⁴ Adshobien Esusën: —Nuquin Papan chiaidquio nuquin tsusedpan naden dada uampic. “Nuquin Papa nadec onquec: ‘Min matsesën ëmbi chiacpadomboen nasho:

Ëbipadquid nec, caombi,' queposh Nuquin Papa," quequin dada uapampic. ³⁵ Matses caic: "Ëbipadquid mibi nec," quequin Nuquin Papan chuipampid isun mimbi: "Nuquin Papan icsamboen chiac," quequin chiambo iquec. "Muesambo icquin Nuquin Papan icsamboen chuitiapimbo iquec," qeshun mimbi chushcambo iquec. Nuquin Papa adoambobi ¿èbida chushcai? ³⁶ Nuquin Papan namiacpadec abi yacnuësh chondaid nebi. Adquid yec: "Nuquin Papan Madombo nebi," quiobi. Ëbi adsho tantiashun ¿atotsi quequin èbi chushcai? ¿Nuquin Papadambi muauadio? Mambi abimbo caboc. ³⁷ Ëmbi chiaidquio tantiatiapimbo icquimbi èmbi naidquio tantiata. Ëmbi Nuquin Papan namiacpadomboen comapenen tantiaquin nabanenquio icsho isun mimbi èbi mua catsiac. ³⁸ Con Pan namiacpadomboen nasho isun: "Ai, ambi chuibocpadquidshenda nepec," èbi cata. Ëmbi chiaiduidtsèqui tantiatiapimbo icquin adota. Adshun: "Ai, Nuquin Papapadquidquiobidien Esus nec," quequin mimbi tantiabentsiac —quepondash Esus.

³⁹ Adsho tantiash padpidec nëishtanquin abi chieshènquidon: —Bedchitono —caqui bedadenquio icpondash. ⁴⁰ Adashic acte Odan caid potiash con shënison tauaquin matses acten mentodenecono Esus nidoapondash. Ambo èbi chedobèdi tabadpondash. ⁴¹ Adshumbic Esusèn comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nèid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusèn adobansho isun: "Nèid chuiquinshenda Uan padon abimbo capadenec," caimbi —cabededpondash anocquidon. ⁴² Adshumbic: —Nuquin Papa yacnuësh choquidien Esus nec —quequin Esus tantiabempondash.

11

Dasado caid unèsaid

¹ Udeya yacnuësh Esus cuembon Dasado Esusèn utsibimboecquid unèstiadsècquio yanac caondash. Shubu dadpen icquid Betania caid yacnocquid niondash. Aidbèd icquid aton chuchu daèd icpondash. Abentsèc Madta icnuc utsi Madia icpondash. ² Madian aton manèdaidèn ubchanquin Esus tanoshcabi icnuc adec aton utsi unèstiadsècquio yanac caondash. ³ Adnubien aton chuchun: —Esus chuitan —cac aton matsesèn Esus chuitudpondash. —Mimbi con utsi caidquio unèstiadsècquio yanoshe. En isec cho —catuidpondash. ⁴ Adoquien Esus: —Chíata. ¿Unèsash chodquequionoshida Dasado nepadiash? Padenquien iquec. "Ma matses: 'Nuquin Papa bédambo iquec. Ambi chomiondaid aton Madombotsen bédambo iquec,' quenu," qeshun naindambi —quepondash. ⁵ Adbosh Dasado aton chuchubèda tantiaquidquio yequi ⁶ badedquio nidenquio yec anobi daèdec ushpundash Esus.

⁷ Daèdec ushumbic Esusèn: —Nuqui icocno Udeya caidèn padpidec nidnu. Nid —capondashi. ⁸ Adoquimbi: —Ícbo, ma mibi anoshon cuènoten seshunetsempondac. ¿Anobidida nidtiad? ¿Ada: "Seshunequionoshe," cadec? —capondambi. ⁹⁻¹⁰ Adoquien cuembo chienquio icquimbi: —Badiadèn capuec tocoshquetanec uebudesá. Inchèshèmbien tocoshquetanec uebudquid —quequin Esusèn chuipondashi. —Nèbi èbi unès uatiapimbo iquec. Badiadèn nidacimboen con Pan tantiaitdedi nainabi icsho èbi unès uatiapimbo iquec. Inchèshèn uebudacimboen ambi tantiaitdedi nainshobini ambi tantiacpadènquiobi matsesèn èbi unès uaindac —quequin tantiec adondash Esus.

¹¹ Adshumbic Esusèn padpiden ompoacimboen chuioapondash. —Èmbi con utsi caid Dasado ushtoaccoshe. Isucumec nidnu. Nid —quesho ¹² tantiashini: —Ma ushnu. Ushash isucunquid —quepondac. ¹³ Esusèn Dasado unèsaid chuinubi Dasado ushe dantsècondambi. ¹⁴ Adnubien Esusèn sebadènquio chuipondash. —Dasado unèsaccosh. ¹⁵ "Bèdamec nidtiadquidi niobi" ¿quepectabi ique? Padenquio. Mibi caic: "Ma nèidon èbi bédamboen tantianu," qeshun Dasado unèsó istanambo iccombique. Nèbi mibi ismec nidnu. Nid ¹⁶ —caquien: —Ai, abèdquiobi unèsec nidnu. Nid —quiampondash Tomas anin abi ushèmbi daèdpambo tishaid. Adanec abitedi nidondash.

Unèsaid uincuemquidquio nebi, quiaid

¹⁷ Adashic unèsacno anoentsèqui Esus chopondash. Choshon: —Unèsacsho chococash daèd-daèdquiec ushobi —quetsècquiec onquecuededsho tantiatuidpondash. ¹⁸⁻¹⁹ Esus choabi icnuc con matses chuiquido Dasado unèsacnuësh sedenquened Edusaden yacnuësh cho-chopac caondash. Unèsaid nèbi ictsècnuc tedes quidometodos tiontsècquidèn badedquio cho-chopac caondash. Cho-choash unèsaidèn chuchubèd sedenquec tabadpac caondash. ²⁰ Adnubien: —Esus choec —quesho tantiash Madta bèquedec chopondash aton chibi Madia shubuno sedenquec tsadnubi. ²¹ Choequien Esus bèquedec: —Mibi icnuc con utsi unèsenquio ictsenosh, Icbo. Con utsi unèsosh. ²² Mimbi chiacpadomboen Nuquin

Papan nēbi natsiash —quepondash Madta: —¿Ada con utsi uincuemetsia? —quequin chuitiadquio yequi. ²³ Adoaquien Esusēn: —Min utsi uincuenendac —capondash. ²⁴ Adsho tantiash: —“Ai, yuecash unēsaido abitedimbo uincuemete ushēn con utsi uincuenendac,” quequin tantiemi —quepondash Madta. ²⁵ Adsho tantiashun Esusēn: —Ēbibi matses unēsaid uincuemēquidquio nebi. Ēmbi tantiapadēnquio uincuenendac. Aden ēbi tanti-aquido unēsacsho uincuemendambi. ²⁶ Ēmbi adoac Nuquin Papa yacno ēbēdi tabadendac padpidec unēstiapimbo yec. Ēmbi aden chuisho tantiash: “Ai, abimbo mimbi caindac,” ¿quequinda tantie? —capondash Esusēn. ²⁷ Adoaquien Madta: —Ai, adembi tantiemi. “Nuquin Papa yacnuēsh choquid Quidistu caidien mibi nec. Nuquin Papan Madombo mibi nec. Con tsusedpabon dada uaqun chuiampidquien nec,” mibi caombi —quetanec ²⁸ nidpondash aton chibi chiec. Nidshun: —Nēmbo cho, chibi. Chuinu —cac aton chibi choshoben: —Esus chosh. Mibi iste bunoshe. En isec cho, chibi —caquien ²⁹ Esus bēquednuec badedi choquin istuidpondash. ³⁰ Shubu dadpen yacnombo choabi icsho Madtan bēquedacnobi Esus tabadsho Madiantsen istuidpondash. ³¹ Adec Madia nidsho isun chococacnobi sedencaic nabe danquin abēd sedenquenequidon tsibanampac caondash. ³² Adnubien Madia Esus istuidtanec dayumbudec sedenquidpondash aton utsi tantie. Adec shubitanec ēnēdash: —Mibi unēsquio iccoc, Icbo. Bēdambo icquid mibi nec. Mibi icnuc con utsi unēsēnquio ictsenosh —quepondash Madia Esus caic.

³³ Adnubien Madia tsibanec cho-choec con matses chuquido sedenquetuidpondash. Madiabēd sedenqueuededsho istanec: —Ai, unēsquio icnuc nec —quiash Esus abitsen shubiantiadtsēcquio icpondash. ³⁴ Adec shubiantiadtsēcquio tsadacnuēshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien ³⁵ shubinidequi nidpondash Esus. ³⁶ Adec shubinidsho isumbien: —Ma Dasado unēsquio icnuc shubieyoc —cabampondash con matses chuquidon. ³⁷ Adnubien utsibo: —¿Atotsieshun bēshuaid bēdamiondaidēmbi Dasado unēsō bēdamenquio icposh? —quepondash.

Esusēn Dasado uincuemiaid

³⁸ Nidquimbi chococacno istuidequi Esus shubiantiadtsēcquio yanoapondash. Nidaid cuēnoteuidpambo icquid macuēsh tsimpiduc shēcuē uaidēn unēsaid nauedshun cuēnote dapan bētinacnuēshshubiantiadtsēcquio iccondash. ³⁹ Adashien Esus: —Cuēnote bidiacquin shēcuē shēcne —quepondash. Adsho tantiash unēsaidēn chuchu Madta: —Padi. Ēnden pisenashe. Chococash mabi daēd-daēdquieq ushboc —quepondash. ⁴⁰ Adoaquien Esus: —Dacuēdenda. Mambi mibi chuiboc. Mimbibi: “Nuquin Papan Madomboben mibi nec,” ēbi casho: “Ēmbi comapenen tantiaquin nabansho mimbi isendac,” mambi mibi capaboc. En na. Baded bēcune —cac ⁴¹ cuēnote shēcuē bētinaid shēcnequin bēcunepondash.

Adsho istanquimbien Esusēn abuc isquin Nuquin Papa chuipondash comapenec onquequin. —Papa, ēmbi nēbi chuisho mimbi tantie. Ēmbi chuibocpadomboen mimbi naindac. Mibi bēdambo iquec, Papa. ⁴² Ēmbi otacquo chianiaid mimbi tantioc. Ēbi datsidadaido tantiamenuen nēbi comapenec onquequin mibi chiemi. “Mibi chuitanquin ēmbi comapenen tantiaquin nabansho isun: ‘Nuquin Papan chomiaidien nec,’ quequin ma nēidon ēbi tantianu,” qeshun comapenec onquequin mibi chiemi, Papa. Padi, aiddtedtsēqui mibi chiombi, Papa —quepondash Esus. ⁴³ Adtanquimbien comapenen cuēnquin: —Dasado, puduenec cho —capondash. ⁴⁴ Adoaquien Dasado badedquio puduenanec chopondash abi dashcute dataniacchobi. Unēsacsho uesquin dashcuten datanetanquin dashcuten abi bēpucacchobi chopondash. Adec chosho istanquin: —Baded dashcute dachic. Ma nidnu —capondash Esusēn.

Nēbien Esus unēs uametiaid, quiaid

(*Mat 26.1-5; Mad 14.1-2; Duc 22.1-2*)

⁴⁵ Aden Esusēn ēnden unēsaidquobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash. ⁴⁶ Adnubien utsin Edusaden yacno nidshun Esus chieshēnquido padiseyobo chuituidpac caondash. —Esusēn unēsaid uincuemiosh —quepondash. ⁴⁷ Adsho tantiatanquimbien chuquid dapan abēdan chuquid utsibo cho-chomepac caondash padiseyobo yec tsusio dapabo yec quenuc. Aden cho-chomias tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. ⁴⁸ Aden Esusēn nabansho isun nuqui ēmiabi icsho nuquin matsesēn abitedishun abi chuquid dapa Esus icmetsiash. Adnubien nuqui yuaquido Doma yacnocquidon ambi chuquid icmiacmaidquio chuquid yansho isun nēishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? —quepac caondash chieshēmēnquido.

⁴⁹ Adnubien abëdtan chuiquido chuiquid dapambo aid setan icquin Caipas caidëntsen chuipac caondash. —¿Midapadotsëcquien mimbi chiendac? Tantiadentsëcquio icnuc ma mimbi chuiapaboc. ⁵⁰ Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuqin matses abitedi unës uainquio icnueshun Esusedd unës uame-nuna —quepac caondash chuiquid dapambo abëdtan chuiquido chieci. ⁵¹ Aden chuiquin ambembi chiambu Nuqin Papan oncamiac Nuqin Papan chiaidquio aden chuipac caon-dash. —Nëid setan abëdtan chuiquido chuiquid dapambo nec —queshun Nuqin Papan aden oncamiaqui Caipas onquepanëdash. —Matses cuidmenquio icnuec con Madoded ciudadec unësencad —queshun Nuqin Papan Caipas aden oncamepanëdash. ⁵² Aden Caipasën chuinëdaid tantiaquin ëmbitsen chuinu. Tantia. ¿Isadaidbouditsëqui cuidmenquio icnuecta Esus abided ciudadec unëstiondash? Padenquio. —Matses utsitsen abi tantiaquid yansho isun abëdi tabadmenuc Esusedd ciudadec unëspondash —quequin tantiembi. Nëbi Caipasën chuisho tantiahsun tsusiobon chiaid chuinu. ⁵³ Aden Caipasën Esus unës uamete chuisho tantiahsien Esus chieshënkuido: —Nëbimbobien Esus unës uametiad —quecuededpac caondash.

⁵⁴ —Tsusiobon mibi adosh —quesho tantiatanequien chieshëmënkuido ismenquio yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadaïn caid yacno nidpondash. Ambo tabadquin ëbi chedo Esusën chuibampondash. ⁵⁵ Epadaïn caid yacno tabadnubien Nuqin Papan con tsusedpabo unës uainquio icquin matamiampid inchësh tantieci cuëdënucc Edusaden yacno con matses nidanepac caondash. Cuëdënc taëabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuëdëntemaid,” quedenec —quianec nidanepac caondash. ⁵⁶⁻⁵⁷ Adshumbien Edu-saden yacnoshon Nuqin Papa tabadte shubu uashunaid daquënë uaidën puduedtanquin Esus iste bunquin nibëntuidpac caondash mishtemaid mishquidon. Nibëntuidshoben: —Nuqi chuiquido nadpac caosh. “Esus istuidshun ëbi chuita. Bedshun unës uamechitono,” quepac caosh —quesho tantiahsien: —¿Ada Esus chopeba? “Unës uamenushe,” quiash choenquien icchitec —quecuededpac caondash.

12

Madia Dasadon chuchun Esus tanoshcaid (Mat 26.6-13; Mad 14.3-9)

¹ Aden mishtemaid mishquidon abi nibënbien Edusaden anoentsëqui ambi Dasado uincuemiondacno Betania yacno Esus chopondash. Seistedec ushash Nuqin Papan matamiampid inchësh tantieci cuëdënc taënushi niondash. ² Ambo chosho isash: —Esus bëdambo iqueque. Pemenu —queshun: —Pec cho —cac puduedash tabadpondash nëidtedi. Nëidic Esus. Nëidic Dasado. Nëidic shubu icho. Nëidic Esusbëd icquid ëbi chedobi. Nëidic Dasadon chuchu daëd. Aidedi icpondash. Adec penuec tabadsho Madtan pete menebampondash. ³ Adnubien Madian: —Esus bëdamboshë iquec. Ismenu —quetanquin bëdamboshë nuadquidën Esus tanoshcapondash. Tanoshcatanquin aton manëdaidën taucpondash. Aden tanoshcaid shubu anuestsëcquieci comapenec nuadpondash. Pucquid dadpenquio menequin bedaid niondash. Sedunten cushtoaid bëdambo nuadquid nado caid niondash. ⁴ Adsho isun Esus bedmequidën Udasën Madia chushcapondash. ⁵ —Padi. Mimbi uesquieque. Utsi uain nata. Nëid danoshcate meneshun piucquid dadpenquio seta abentsëc matamec chonoadaidtedquiobien bedtiad. Adoshombien piucquid nibëdquido aid piucquid menetiad —capondash Udasën. ⁶ Adombien chuisho tantiahsun Udas bëdambo icquidquido danondambi. Esusbëd icquido ëbitidishun piucquid bedshun sauedten sauedshun dayun uaquidquiembi danondac. Pucquid bëdamboec dayun uashumënenquio yequi abibi ampeshumënashi adondash Udas. Aden ambi ampiaid tantiequi: —Pucquid nibëdquido menetiad —quequin muaquin Madia chushcapondash. ⁷ Adshoben Esusën: —Padi. Chushcainda. Ma nanu. Ma nuqin matsesën unësaid bëdambo nuadnuc danosh-capaid yoc. “Nëbi con Mado unësencad,” quequin Nuqin Papan tantiamiacpadomboen ëbi unës chococate tantiaquin Madian ëbi tanoshcaquin naic. ⁸ Pucquid nibëdquido dadpen iquec. Nibëdenquio iquendac. Èbien mibëd ichoedi nëbi nibëdquio yanendac. Èbi tantieci Madia bëdambo iquec —quepondash Esus Udas chieci aidi: —Abi chieshënkuido Esus bedmenu —quepanuda.

Dasadotsen cuesunetiadquio yaid

⁹ Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnuec cho-chopondash. ¹⁰⁻¹¹ Cho-choshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquio yec Nuqin

Papapadquidquibidien Esus nec. Nuquin Papan chomiaidien nec —quequin Esus tantiempondash. Esus tantiabenshumbic abi chuiquidon chiaid tantienquo yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabenosh,” quioshe. Dasadotsembien unës uatiad —quianac caondash chieshëmënquiec.

Chuiquid dapa ismiachimboen Esus ismiaid

(*Mat 21.1-11; Mad 11.1-11; Duc 19.28-40*)

¹² Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdënec cho-choboedon: —Esus choec —quesho tantiatanquin ¹³ niste podobieccquid bedbëtsenec Esus bëquedec cho-chopondash. Esus bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uiccaiqui:

“Mibi bédamboshë iqueque. Èbi bédamboen ista.

Nuquin Papan chomiaid yec mibi bédamboshë iquec.

Con matses isadaidbo chuiquid dapambo mibi nendac,”

quecuededpondash Esus caic. ¹⁴ Ambi podquedën choquin bedbëtsemboed cabayobitsecquidëmpi catsadtoanec Esus chosho isash adcuededpondash. Adec aid catsadte Nuquin Papan tantiamiacpadomboen con tsusedpan dada uaquin naden chuiampic. ¹⁵ “Edusaden yacnoquido chiec:

‘Dacuëndenda, Edusaden yacnoquido.

Is. Cabayobitsecquidëmpi catsadtoanec choabi icnuc Esusën Dasado uincumesho

isboedon: —Uincumesho isombi —quequin matses dadpen chuibenapanëdash. ¹⁸ Adsho tantianshun: —Unësaid uincumequid Nuquin Papan chomiaidien neque. Istanu —quianec Esus bëquedec cho-choshon aden niste podo uic-uiccaquin: “Bédambo iquec,” quequin nuquin matsesën Esus ismebededpondash —quequin tantiabenondambi.

¹⁷ Esus cabayobitsecquidëmpi catsadtoanec choabi icnuc Esusën Dasado uincumesho isboedon: —Uincumesho isombi —quequin matses dadpen chuibenapanëdash. ¹⁸ Adsho tantianshun: —Unësaid uincumequid Nuquin Papan chomiaidien neque. Istanu —quianec Esus bëquedec cho-choshon aden niste podo uic-uiccaquin ismepondash. ¹⁹ —Esus bédamboshë iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

Matses utsibo: Esus isnu, quiaid

²⁰ Edusaden yacno cuëdënec cho-choboedo matses utsibo isadaidpembotsen icpondash. ²¹ Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbëd icquid Uedipe chuituidpac caondash. —Esus istiadquio iquebi —quesho tantiashien: —Chiata. Chuitambono —quianec nidshun ²² Esusbëd icquid utsi Andedesba chuibëtsenec Andedesbëd choequi Uedipe Esus chiec chopondash. —Matses utsibon mibi istiadquio iquec —caquien ²³ aid matses utsibo isadaidpembo tantiamenuec Esus comapenec onquepondash. —Nuquin Papan matsesmiondaidquio icquin nëbimbobimbi ambi chiaidtedi nainendac. Èmbi adoacscho Nuquin Papan: “Mibi bédambo iquec,” èbi caindac —quepondash Esus abi unës uate chiequi. ²⁴ Adshumbien ompoacchimboen chuipondash. —Tantia. Mibi chuinu. ¿Mitsipadquio pete ëshë chococaid icpec? Chococac canias bacuëec bédambo icpaid yoc. Chococabi bédambo ictiapimbo iquec. Adoacchimboen chococabi yac matses bédambo icmetiapimbo iquendabi. Unësascho chococac matses bédambo icmequid nendabi —quepondash Esus. ²⁵ Adashic padpidec: —Ambi naiduidi naquin èmbi chiaid niacquido Nuquin Papan cuidtequido nendac. Ambi naiduidi nainquio icquin èmbi chiapadomboen naquido èbëdi tabadtequido yanendac. ²⁶ Adquid èmbi chiapadomboen natiadquio yec èbi yacpadec chieshtoenuio ictsiash. Adquidquio unësash uincuenash èbëdi tabadsho Nuquin Papan: “Nëid con Mado tantiaquid bédambo iquec,” capendac —quepondash Esus.

Esusën abi unës uate chiaid

²⁷ Adashic abi unës uate tantiec Esus nadpondash. —Unësquioshë yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiapadomboen nanuec chondac. Aden nanuec nebi —quepondash Esus. ²⁸ Adtanequien Nuquin Papa chiec: —Nuqui tantiacpadomboen nëbi nainembi, Papa. Èmbi aden nainacscho: “Nuquin Papa bédambo iquec,” matses cameta, Papa —quenubien abucuëshquio Nuquin Papa comapenec onquepondash. —Ai, èmbi namiaid mibi icsho: “Nuquin Papan namiaid nec. Nuquin Papa bédambo iquec,” matses camepombi. Nèbi padpiden adomeoaindami —quepondash Nuquin Papa.

²⁹ Abucüësh onquesho bédamboen tantiabi yec utsibo: —Abu cuédtoec nec —quenubien utsibo: —Nuquin Papan abi yacnoshon uaid mayan bédan Esus chuipash —quecuededpondash. ³⁰ Adsho tantiash Esus: —¿Ëbi tantiamenuecta onquediash? Padenquo. Mibi tantiamenuequien niosh. Aden tantiashun ëmbi bédamboen chuisho tantiata. ³¹ Nuquin Papa chieshëñquid Satanasën yuaido matses dadpenquioshë iquec. Nëbi Nuquin Papan tantiacpadomboen aido utsi-utsien Satanas bedshunendambi: “Chën. Con na neque,” quequin. ³² Ëbi abuc dectanac aden matses ëbi tantiavid icmendambi —quepondash Esus. ³³ —Ëbi cuesten dectanquin unës uaindac —quequin tantiec: —Ëbi abuc dectanendac —quepondash Esus.

³⁴ Adsho tantiash abi datsidadquido: —“Ëbi dectanendac,” quiosh. “Unësebi,” quepequin iccosh —quiashien Esus chiec: —“Nuquin Papa yacnuësh choquid Quidistu caid unësesambo nendac,” quequin Nuquin Papan chiaid nuquin matsesën chuinubi: “Unësebi,” ¿quecta icco? “Unësebi,” quequid Nuquin Papa yacnuësh choquid ictiapimbo mibi iquec. “Nuquin Papan matsesmiad nebi,” quequid ¿tsutsi mibi nepe? —quepondash Esus datsidadquido. ³⁵ Adoquien Esusën: —Nadquid nebi —quenquo icquin ompoacimboben naden chuipondash. —Mibi bédamboen tantiamequid nëbi isadenquo iquendac. Aid nibëdnuc bédamboen mimbi tantienquo iquendac. Nidabi aidën chuisho bédamboen tantiata. ³⁶ Nuquin Papan bédamboen iste tantiamequid tantiata. Adsho bédambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

Isadaidbon Esus tantienquo yaid

³⁷ Ëmbi dadpen chuiquin dada uabanacpadomboembi Esusën comapenen tantiaquin dadpen nabansho isun con matses isadaidbon Esus tantiatiadquidi Esus tantienquo icpondash. ³⁸ Aden Esus tantienquo icte con tsusedpa Isayasën Nuquin Papan tantiamiacpadomboen chuiquin dada uapampic.

“Nuquin Papa yacnuësh choash nadec onquendac.

‘Mimbi chiaidquid chuibansho tantiashun: Muequien mibi nec, ëbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuësh choquidien nec, quetiadquidi adenquo iquendac, Papa,’ quependac,” quequin Esusën chuite Isayasën dada uapampic.

³⁹ Nuquin Papan pamumëdacimboecnuc icmiac con matsesën Esus tantienquo icpondash. Aden chuiquin Isayasën padpiden dada uapampic.

⁴⁰ “Isadaidbon ëbi tantiatiapimbo icsho isun

‘Ma adembi tantienquo icpanuna,’ caimbi.

Ma adequi pabiate shëcuë nibëdacimboec icchitono.

Ëbi tantiasho abi icsaid bëpiscudquin bédamboen ismane,”

quequin Nuquin Papan ambi con matses caido nëishëñshun chushcaid Isayasën dada uapampic. ⁴¹ Nuquin Papambo Esusbëd uinsadpambo yec tabadsho isondaaid icquin Isayasën aden Esus tantienquo icte chuipampic.

⁴² Con matses dadpenshun Esus tantienquo icnubi con matses chuiquidon abentsëcshun abentsëcshunquien Esus tantiauidpac caondash. Adboedi: —“Nuquin Papan chiaid chuibante shubun puduedenda,” canushe —quiash dacuëdquin: —Esus tantiaquid nebi —quequin chuitiadquidi utsibo chienquo icpac caondash. ⁴³ —Ma con matsesëmbi ëbi bédamboen isnu —quequiditseqüi tantiaquin aton matses chuitiapimbo icpac caondash. —Ma Nuquin Papan ëbi bédamboen isnu. Aton Mado tantiaquid nebique —quetiadquidi adenquo yac caondash.

Cuidenquo icte chiec nebi, quiaid

⁴⁴ Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. —¿Ëbi tantianequidën ëbiuidtsëquida tantiapadic? Padenquo. Ëbi tantiaquidën ëbi chomiondaitsen tantiatsiash. ⁴⁵ Adembidi con Papadquibidi ëbi icsho isun: “Ai, adquibidien Nuquin Papa iquec,” quequin tantiatsiash. ⁴⁶ Nuquin Papan matses bédamboen iste tantiamenuec matsesbëd tabadec chondabi. Adec matsesash: “Ëbi tantiaquido ma Nuquin Papan bédamboen isquin bédamboen tabadmenu,” quish nebi. ⁴⁷ “Ëmbi aden chuisho tantiatiapimbo icquido nëbi cuidnu,” ¿quectabi icti? Padenquo. Nëbi Nuquin Papan bédamboen isquin cuidenquo icte chuinuequini nec. ⁴⁸ Nuquin Papan cuidte ushëmbien ëbi tantiesabon: “Nuquin Papan chiaidshenda chuipadene. Aid tantienquo yec icsabudquiopobi,” quequin ambibi tantiendac. Adsho Nuquin Papan cuidendac. ⁴⁹ ¿Ëmbembi chuiquindambi nadi? Padenquo. Ëbi chomiondaid

con Pan chiaidquio chiequini nec. ⁵⁰“Ēbi tantiaquid ĕbĕdi tabadendac padpidec unĕsenquio yec,” qushun Nuquin Papan chiaiduidtsĕqui chiequini nec —quepondash Esus.

13

Esusĕn abĕd icquido tapanaid

¹⁻² Esusĕn comapenen tantiaquin nabanaid chuiquin aidtedi chiombi. Nĕbi abi tanti-aquido tantiaquiec abided cuidadec unĕsaid chuiquin unĕsash abi uincuenaidtsen chuinu. Tantia. Nuquin Papan con tsusedpabo unĕs uainquio icquin matamiampid inchĕsh tantiaquin pec tabadte ushĕ nĕbi yanuc inchĕshĕn Esusbĕd pec bĕdamboec tabadondabi. Padnuen Udas Simon Iscadioten mado Satanasĕn tantiamiacpadomboen Esus bedmete tantiec tsadpanĕdash. Adnubien Esus: —Nĕbi con Pa yacno nidebi nĕido nianec. ³ Con Pabĕd tabadec ambi tantiapadec abĕdi abitedishun Icbombo iccondaidi nĕbi anobidi nidoash adquiobidi icoaindabi. Adquid icquin nĕido bĕdamboec tantianante ismenu —quequin tantiaquin ⁴ yuan nachimboen nadopondash. Uequin peboedi nidtotanec dashcute bĕntse icquid dachiquidtanec daucudte tsibidiquepondash. ⁵ Tsibidiquetanquin pada-padaid dapan acte cushtotanquin abĕd icquido tapambampondash. Daucudten tauchanquin tapambanondash.

⁶ Aden tapambanquimbi: —Mibitsen tapanu —cac Petedon: —¿Icbonda yua tapampaid? Ēbi tapanenda, Icho. Padi —capondash. ⁷ Adoaquien Esusĕn: —Ēmbi nasho nĕbi mimbi tantienquio iquec. Yuecshun mimbi tantiendac. En tapanu —caquien: ⁸ —Padi. Mibi bĕdamboshĕ icquid nec. Ēbien icsaquid nec. Yua namiacximboen mibi tapametiapimbo iquebique. Padi —caoapondash Petedon. Adoaquien: —Ēmbi tapanabi yac con yuambo mibi ictiapimbo ictsiac —capondash Esusĕn. ⁹ Adsho tantiaashun Petedon: —En na, Icho. Tapantanquimbi mapinobĕdtabi ĕbi mĕpanta —caquien: ¹⁰ —Padi. Nesboed mibi nec. Taĕnouidtsĕqui bĕchishachso tapanembi. Ēmbi bĕchish ucac mibi bĕdambo iquec. Abentsĕc icsambo iquec —quepondash Esus. —Bĕchish ucacximboen ĕmbi nasho Nuquin Papan mibi bĕdamboen isendac icsaid ucudacximboecnuc —quequin tantiec: —Ēmbi bĕchish ucac mibi bĕdambo iquec —quepondash Esus. ¹¹ —Udasĕn ĕbi unĕs uamenuen bedmendac —quequin tantiec: —Abentsĕc icsambo iquec —quepondash Esus.

¹² Aden tapambanash dasiuidash samĕdquin abĕd icquido Esusĕn chuipon-dash. —Ēmbi naboed ¿ada tantie? Tantia. Mibi chuinu. ¹³ “Ēbi chuiquidquio mibi nec,” mimbi ĕbi capec. Adembidi: “Con Icho mibi nec,” mimbi ĕbi capec. Bĕdamboen mimbi chiec. Adquid nebique. ¹⁴ Ēmbi nabocpadomboen mimbitsen nata. “Ēbĕd icquid tantiaquioquin tapanquin nashunu,” qushun naombique. Adecbidi nashunanta. Naden tantiaashun nata. “Esus tantiaquido tantiaquiembi. Con buchibimboecnuc nashunu,” quiaish nashunanta. ¹⁵ Ēmbi nabocpadomboen namenuen adombique. Mimbitsen nata. ¹⁶ En chuinu. Tantia. ¿Icbon chiacta chieshpadic? ¿“Nid,” cacta nidenquio icpadic? Icbon chiacpadomboen yuan naquid yendac. Adomboen tantiaquin ĕmbi chiacpadomboen nata. ¹⁷ Ēmbi aden chuisho tantiaashun ĕmbi chiacpadomboen naic mibi bĕdambo iquendac —quepondash Esus.

¹⁸ Adashic padpidec: —Mibitedi caic: “Bĕdambo iquec,” quetiapimbo iquendabi. Tauamboen: “Nuquibi icnu. Cho,” ĕmbi caondaido con yuabotedi tantiembi. Abentsĕc icsambo iquec. “Aid con yuapenquio nec,” quequin ĕmbi tantiaidi nec. Nuquin Papan tantiamiac aidĕn icsamboen nate chuiquin nuquin tsusedpan dada uapampic naden. “Ēbĕdtan pianebodĕmbi ĕbi unĕs uamenuen bedmendac,” quequin dada uapampic. ¹⁹ “‘Abi unĕs uametebi chioishi. Nuquin Papapadquidquio bi icquimbien naosh,’ quequin ma tantianu,” qushun mibi chiombi. ²⁰ Mibipadquidĕn nate mibi chuinu. Tantia. Mibipadquidĕn ĕbi chuibansho tantiaash: “Ai, abimbo caic,” qushun utsibon ĕbi tantiaatsiash. Adembidi ĕbi tantiaashun ĕbi chomiondaid Nuquin Papatsen tantiaatsiash —quepondash Esus.

Abi bedmequid Esusĕn chiaid

(*Mat 26.20-25; Mad 14.17-21; Duc 22.21-23*)

²¹ Adshumbien abi bedmequid Udas tantiac unĕsqiuo icnuc Esusĕn chuipondash. —Tantia. Mibitedi chuinu. Ēbĕd icquidĕmbi ĕbi chieshĕnquido ĕbi bedmendac —quesho ²² tantiaash abĕd icquidobĕd bĕisanec: —¿Tsutsi capec? Nĕidien cachitec —quecuedpondabi otacquo tantiec.

²³ Ēbi tantiaquidquio yec con cachotsĕqui Esus uepondash. ²⁴ Adec Esusĕn dayuntsĕqui ueshobini: —“¿Tsutsi cai?” ca —capondash Petedon mĕdquin onquenquio icquin. ²⁵ Adoaquimbi cachoc isquin: —¿Tsutsi cai, Icho? —capondac. ²⁶ Adoaquien Esus: —En istac. Pete cuĕshĕn ĕnĕ puntanquin menequin mibi ismenu —quetanquin pete cuĕshĕn ĕnĕ puntanquin Udas Simon Iscadioten mado menepondash. ²⁷ Adoac penubi Satanasquio

Udas dapuduedquiopanèdash ambi tantiaidquo namenuc. Adshobien Esusèn: —Mimbi tantiacpadomboen baded nèbimbobi naic nid, Udas —capondash.

²⁸ Adsho tantiashini èbitedi: —Tantiadenquo yec onquepec. *¿Atotsi quiash: “Baded naic nid,” quepec? —quepondac.* ²⁹ Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibèdquido piucquid menetan,” quepequien iccosh —quecuededpondash. ³⁰ Pete cuèshèmpi pesho: —Nèbimbobi baded naic nid —caquien Udas nidpondash. Inchèshèmbi nidpondash Esus bedmenuen chiec nidec.

Tantiananquiota, quequin chiaid

³¹ Abi bedmenuen chiec Udas nidbombien Esus: —Nuquin Papan matsesmiaidquo icquin ambi tantiaidtedi nèbimbobimbi nainendac. Èmbi nainsho isash con Pa bèdambo iquendac. ³² Èbitsen bèdambo icmenuen con Pan compapenen tantiaquin ismendac. *¿Yuecshun quectabi icti? Nèbimbobimbi caindac —quepondash Esus.* Abi unès uatebèda abi unèsash uincuenash Nuquin Papa yacno nidte chiec adpondash. ³³ Adashic èbi chedo padpiden chiec: —Nèbimbobi nidebique. Chuiquid dapabo èmbi chiondacpadomboen mibi chuoanu. Tania, mado. Èbi nidacsho mimbi èbi istuidenquo iquendac. Èbi nidacno mibi nidtiapimbo iquendac. ³⁴ Aden tantiaquin Nuquin Papan chiaid utsi mibi chuinu. Èbi nidan èmbi chiacpadomboen nata. Èmbi mibi tantiaquiacpadquiec tantiananquiota. ³⁵ Èbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash —quepondash Esus.

Petedo: Èmbi isacmaid nec, quete chiaid

(Mat 26.31-35; Mad 14.27-31; Duc 22.31-34)

³⁶ Adec —Nidebi —quesho tantiashun Petedon: —*¿Mitsimbo nide, Icho? —capondash.* Adoquien Esus: —Nèbi mibi nidtiapimbo yacno nidebi. Yuecash ambo mibitsen nidendac —quepondash Esus. ³⁷ Adsho tantiash Petedo: —*¿Atotsi quetiadquo yec: “Nèbi èbèdi nidtiapimbo mibi iquec,” quepo mibi? Mibèd nidec dacuèdenquo ictsiabi. Mibi chieshènquidon: “Unès uanu,” mibi casho tantiash: “Èbien natiad,” quetsiandabi —quepondash Petedo.*

³⁸ Adsho tantiashien Esus: —“Èbien natiad,” *¿quecta icpatsia? Padenquo mibi ictsiac.* Cachina bènè cuèdanabi icnuc mibi chieshtouidendac. “Èmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bènè cuèdanabi icnuc mibi adendac —quepondash Esus. Adsho tantiashini Esusbèd icquido èbitedi dacuèdcuededpondac.

14

Nuquin Papabèd tabadmendambi, quiaid

¹ Èbitedi dacuèdcuededsho isashien Esus: —Dacuèdenda. “Èbi dayun uaquid nec,” quequin mimbi Nuquin Papa tantiacpadomboen èbitsen tantiaquiota. ² Mimbi tantiacpadquo Nuquin Papan shubu iquec. Quènè dadpenquioshè iquec. Tsucustiapimbo iquec. Adpenquo icsho mibi aden chienquo ictsiambi. Adquid tantiaquin: “Èbi tantiaquido èbèdi tabadmendambi,” quequin chiombi. ³ “Adquid iquec,” quiash èbia nidshun con Pa chiendambi. “Èbi tantiaquido neque. Nuquibèdi tabadmenuna,” quequin chiendambi. Adashic èbi yacno mibi buanuec choaindabi. ⁴ Èbi nidan èbi nidacno nidte mimbi tantiec —quepondash Esus.

⁵ Adsho tantiashun Tomasèntsen: —*¿Mitsimbo nide, Icho? Tantiambo iccombi. Podqued tantienquo iquembique. Èbi chui —caquien* ⁶ Esus: —Nuquin Papa yacno nidte tantiamequidquo nebi. Nuquin Papan chiaiduidtsèqui chiec muesambo nebi. Adquid icquin èbi tantiaquid Nuquin Papabèd tabadmendambi. Èbi tantiesan Nuquin Papa tantiatiapimbo ictsiash. Èbi tantiaquidènuidtsèqui Nuquin Papa tantiatsiash. ⁷ Èbi caic: “Nuquin Papan Mado nec,” quequin mimbi Nuquin Papatsen tantiendac. Nèbi abipadquid èbi icsho isun Nuquin Papambo isacbimboen mimbi tantiendac —quepondash Esus.

⁸ Adshobien Uedipentsen: —Nuquin Papa èbi isme, Icho. Nuquin Papa iste bunebique. Aid isash bèdambo ictsiabi —caquien ⁹ aidtsen Esusèn: —*¿Tantienquioda ique, Uedipe? Yuec mibèdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquibidini nec. Èbi adquid icsho isun: “ ‘Adquidquibidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa èbi isme,” cai? ¹⁰ “Nuquin Papapadquidquo nebi,” èbi quesho tantiash: “Ai, abimbo caic,” ¿quenquioda icco? Èmbembi chienquo iccombi. Con Pan chiaidquo chiequini nec. Adembidi èmbembi nabanenquo iccombi. Èbèd tèshnanenquo*

icquin con Pan namiaquimbi naoc. Ëmbembi nainquoio iccombi. ¹¹ “Con Papadquidquo nebi,” ëbi qesho tantiashun: “Ai, abimbo caic,” cata. Ëmbi chiaid tantiatiapimbo icquin ëmbi comapenen tantiaquin dadpen nabamboedquoio tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantiata. ¹² Tantia. Mibi chuinu. Ëmbi nacpadomboen ëbi tantiaquidontsen comapenen tantiaquin nabandac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanën namiac mibipadquidën ëbi chuibanac dadpeshun ëbi tantiabenendac. ¹³ Ëmbi chiapadomboen naquidën: “Ëbi nashuntu, Icho,” qesho tantiashun ambi chiapadomboen nashunendambi. “Nuquin Papa bëdamboshë iquec,” camenuen ¹⁴ ëbi tantiaquidën chiapadomboen nashunendambi —quepondash Esus abëd icquido chiec.

Nuquin Papan Mayan tabadte chiaid

¹⁵ Adashic abëd icquido padpiden chiec Esus: —Ëbi abimbo tantiaquidën ëmbi chiapadomboen natiadquo iquendac. ¹⁶ Adotiadquo icsho isun con Pabëd icquin con Pa chiendambi naden. “Nuqui tantiaquido bëdamboen tantiamenuen nuquin Mayan aidobëd tabadmenuna, Papa,” ëmbi cac Nuquin Papan con Mayan mibëdi tabadmendac. ¹⁷ Adoac mibi nianenquoio yec mibëdi tëshnanenquoio iquendac. Mibëd icquin ëbi chuiquin mibi abimbo tantiamendac. Aid isadenquoio icsho ëbi tantiesabon aid tantiatiapimbo iquec. Mimbien aid tantiec. Con Pan ëbëd icmiaidquoio nec. Ambi namiaid ëbi icsho aid tantiashumbimboen mimbiantiec. Ëbi nidan choash mibëdi tëshnanenquoio yec tabadendac con Mayan. ¹⁸ ¿Shiadimpi mëyadacbitsec icnudambi mibi niampe? Padenquoio. Nuquin Papan Mayan con Mayambi nec. Mibëd aid icnuc ëbëd yacimbocoequi con Mayan tantiadendac. ¹⁹ Nëbi ëbi nidacsho ëbi tantiesabon ëbi isenquoio icnuc mimbiantiec ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. ²⁰ Ëbi uincuenaid ushëmbi mimbiantiec tantiadendac. “Esusën Nuquin Papa tantiaquic aibëd tëshnanenquoio icquin aidën chiapadomboenuid naindac. Adecbidi Esusbëd tantiananquic aibëd tëshnanenquoio icquin aidën chiapadomboen natiadquoio yec tabadebi,” quequin mimbiantiec. ²¹ Ëmbi chiapadomboen naquid ëbi tantiaquidquoio nec. Ëbi tantiaquidquoio mibi icsho con Pabëdtan mibi tantiaquiquin: “Adquoio aton Papabëd Esus iquec,” camequin mibi bëdamboen tantiamendambi —quepondash Esus.

²² Adsho tantiashun Udas utsin abi bedmequidënpenuenquoio: —“Nuquin Papa yacnuësh choash con matses chuiquidquoio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ¿atotsieshun ëbiuidtsëqui tantiamen, Icho? —caquien ²³ Esus padpidec: —Ëbi tantiaquidquidtsëqui naden tantiamendambi. Ëbi tantiaquid ëmbi chiapadomboen naquid nec. Aden nasho con Pabëdtan tantiaquiquin aibëdi con Mayan tabadmendambi. Adoac con Mayanën tantiamiac ëbëd iquec con Pabëd iquec quiacbimboec tantiadendac. ²⁴ Ëbi tantienquoio icquidoen ëmbi chiaid niac-niacquido nendac. ¿Ëmbiuidtsëqui chiaidta adquidën niac-niacpidec? Mambi Nuquin Papan chiaidquoio chuiboc. Aidën chiaidquoio adquidën niac-niacquec —quepondash Esus abëd icquido chiec.

²⁵ Adashic padpidec Esus onquiondash. —Mibi bëdiactsëc tantiamequin mibëd icquin con Pan chiaid chuibanombi. ²⁶ Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaitedimbo mibi bëdamboen tantiamendac. ²⁷ Con Pa yacno nidshun con Mayan mibëdi tabadmequin dacuëdenquoio icquid mibi icmendambi. Adoac dacuëdenquoio yec bëdamboec tabadta. Ëbi tantiesabo dacuëdacbimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquoio yec bëdamboec tabadta. ²⁸ “Nëbimbobini con Pa yacno nidendac. Adtanequic choaindabi,” quepobi mibi chiec. Ëbi adsho tantiash ëbi tantiaquidombo cuishonquetsiash. “Esus abi namequid aton Papabëd tabadec nidec,” quiash ëbi tantiec cuishonquetsiash. ²⁹ Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiapadec ëbi adsho isun ma nëidon: ‘Esusën abimboshenda capondash. Ambi chiondapadquid Nuquin Papan Madombo nec,’ quequin tantianu,” quiash adobi. ³⁰ Nëbi ënquimbi chuinu. Ëbi tantiesabon icho Satanash ëbi unës uamenuc choec. Ambembi aidën ëbi unës uame-tiapimbo iquec. ³¹ Con Pan tantiacpadequini unësendac. Ëbi adec unësö isash: “‘Nuquin Papa tantiaquin ambi chiapadomboen naic abided cuidadec Esus unësac,’ quequin ma matses abitedishun tantianu,” quiash adebi. Nëbimbobimbi naique. Nidec nidnu. Nid —quepondash Esus.

15

Shancuinbiecquid uba caid chiaid

¹ —Nidec nidnu. Nid —quetanquimbi padpiden chuipondashi ompoacimboen chuiquin. —¿Mitsipadquio shancuinbiecquid uba caid icpec? Mapictséc ictsequi cuidi-cuidipambo yanquid. Adquidic shancuin bacuëbimboec didiquequid. Uba dadan aton cuidi canimequin bédambo icmequid. Adomboembidi èbi tantiaquido bédambo icmendambi. Nuquin Papan uba icbobbimboecquid nec. ² Uba aton icbon cuidi utsiuc bacuësa icsho pateshunepaid yoc. Adoacimboen èbi tantiauidtsëcboedon ambi icsamboen naid èntiapimbo icsho con Pan ambi icsaido cuidacno nënendac. Uba icbombidi bédamboen bacuëmenuen dadpen cuidi icquid cuidi dadpen pateshun siaquid. Adomboembidi èbi tantiaquido bédamboshë icmenuen Nuquin Papan aidon icsamboen naid èmetsiash. ³ Èmbi chiapadomboen naic mibi bédambo iquec. Aden èbi tantiasho Nuquin Papan mibi bédamboen isec. ⁴ Èbi adembidi tantiaquin èmbi chiapadomboen nata. Adsho isash mibi bédamboen tabadmec mibéd iquendabi. Uba cuidi padquëdaid bacuëtiapimbo iquendac. ⁵ Adecbidi èbèdi tëshnanash matses bédambo ictiapimbo iqueque. Èbèd tëshnanenquio yec bédamboec tabadta. Bédamboec tabadquin mimbi utsibo èbi tantiametsiac. ⁶ Uba icbon cuidi utsiuc bacuësa icsho pateshun tsindoshon nédëncapaid yoc. Adoacimboen èbi tantiesabo unësacsho Nuquin Papan ambi icsaido cuidacno nësecaindac —quepondash Esus.

⁷ Adshumbic Esusën padpiden chuipondash. —Èbi tantiaquin èmbi chiapadomboen naquidën: “Èbi nashunta, Papa,” cac ambi chiapadomboen Nuquin Papan nashuntsiash. ⁸ Nuquin Papan adoshonac: “Nuquin Papa bédambo iquec,” mimbi catsiac. Adembidi utsibotsen: “Nuquin Papa bédambo iquec,” camenuen bédamboec tabadquin èbi tantiameta. Mimbi adosho: “Ai, èbi tantiaquidquio nec,” caindambi. ⁹ Con Pan èbi tantiaquiapadomboembi mibi tantiaquiembì. Adoaid icquin èbitsen tantiaquioquin èmbi chiapadomboen nata. ¹⁰ Abi tantiaquioquin ambi chiapadomboen nashobini con Pan tantiaquiec. Adembidi èbi tantiaquidën èmbi chiapadomboen nasho èmbitsen aid tantiaquiendambi. ¹¹ “Èbi cuishonquiapadquiecbidi ma èbi tantiaquiec cuishonquequiono,” qeshun aden mibi chiemi —quepondash Esus abèd icquido chiec.

Tantiananta, quequin Esusën chiaid

¹² Adashic abèd icquido padpiden chiec Esus: —Èmbi mibi tantiaquiapadquiec tantiananta. ¹³ Nadquiec caimbi. “Min utsi cuesnu,” cashunac: “Èbien natiad,” quiachimboec tantiananta. Aden mibi tantiec èbided cuidadec unësendabi. ¹⁴ Èmbi chiapadomboen nasho mibi con utsi caimbi. ¹⁵ Èmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bèda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. ¹⁶ “Esusbèd iquec nidnu,” ¿quequinda mimbembi tantiadionda? Èmbien mibi: “Nuquibi icnu. Cho,” caondac. “Utsibo tantiamequin ma nëidon èbi chuibenenu. Adoac utsibotsen èbèd tabadtequid yanendac,” qeshun mibi cho caondambi. Aden èmbi chiapadomboen naquidën Nuquin Papa chuiquin: “Min Mado Esus tantiaquid èbi icsho èmbi chiapadomboen èbi nashunta, Papa,” mimbi cac mimbi chiapadomboen Nuquin Papan mibi nashuntsiash. ¹⁷ Èbi adsho tantiashe èmbi chiapadquiec tantiananta —quepondash Esus.

Esus tantiaquido chieshënte chiaid

¹⁸ Adashic padpidec Esus onquepondash. —Èbi tantienquio icquidon chieshënac: “Aden Esusba chieshënondash,” quequin tantia. ¹⁹ Èbi tantiesabo icsho èbi chieshënquidon mibi bédamboen istsiandac. Adquid iccondaidi èmbi: “Cho,” cac èbi tantiaquid mibi yanondac. Adec èbi tantiaquid icsho mibitsen chieshënoaindac. ²⁰ “Yuan icbon chiapadomboen napaid yoc,” quequin èmbi ¿chuiboedta tantie? Aden èmbi chiapadomboen nasho èbi chieshënquidon mibitsen chieshënoaindac. Adembidi èmbi chiaid tantiatiapimbo icquidën mimbi chiaidtsen tantiatiapimbo icoaindac. Padnuen èmbi chiaid tantiaquidën mimbi chiaidtsen tantiendac. ²¹ Èbi chieshënquidombi èbi chomiondaidquio tantiaquin èbi chieshënenquio ictsiash. Ma èbi chomiondaid Nuquin Papa tantienquio icquin aidon èbi chieshëmpayoc. Adomboembidi èbi tantiaquidotsen chieshënoaindac. ²²⁻²³ ¿Èbi chieshënquidon èbiuidtsëquida chieshëmpadic? Ma èbi chieshënquin Nuquin Papat-sen chieshëneyoc. Adquid icsamboshë iquec. Nuquin Papa yacnuësh choshon ambi chiaid èmbi chiabi icnuc èbi chieshënquido èbi chieshënec icsainquio ictsenash. Nuquin Papa yacnuësh choshon mambi Nuquin Papan chiaidquio chuibamboc. Adnuc Nuquin Papan èbi chieshënquido: “Mibi icsamboshë iquec,” caindac. ²⁴ Adembidi Nuquin Papa yacnuësh

choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshë nec mibi icsambo iquec,” cainquo ictsenosh. Utsibon nabanacmaidquo comapenen tantiaquin mambi nabamboc. Adosho isash ëbi chieshënquido: “Icsapenquo iquebi,” quetiapimbo iquendac. Ëmbi nabansho isun ëbi chieshënquin con Patsen chieshë nec. ²⁵ “Aden matsesën ambembi ëbi chieshëmpec,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënquidon isbanaidi nec — quepondash Esus.

²⁶ Adashic padpidec: — Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. ²⁷ Adoac mimbitsen ëbi chuibanendac. “Yuec aidbëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshënquidon mibitsen chieshënendac. Adoac dacuëndenda.

16

¹ “Chieshtonoshe,” qeshun mibi aden chiombi. Mibitsen chieshë nac dacuëndenda. Mibëd con Mayan tabadmembique. ² Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh adendac. Adomboembidi mibi chieshënquin utsi-utsien cuesun secash: “Nuquin Papa tantiaquidquo icquin Esus tantiaquido cuesun secaombi,” quepondac. ³ Aden Nuquin Papa ëbëdta tantienquo icquidon ëbi tantiaquidotsen chieshënendac. ⁴ Mibi chieshë nac: “ ‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi mibi chiembi. “Ëbi icnuc ëbi tantiaquido cuesun secadenquo iquec. Ëbi nidambien aido cuesun secabenendac,” quequin tantiaquin ënden aden mibi chienquo iccondambi. “Nëbi nidebi,” qeshun nëbi mibi chiembi — quepondash Esus.

Nuquin Papan Mayan chote chiaid

⁵ Adashic: — Nëbi ëbi chomiondaidbëd tabadec nidendabi — quepondash Esus. Adsho tantiasch padequimbo tabadpondabi. Adec ëbi padequimbo tabadsho isash Esus padpidec onquepondash. — “¿Mitsimbo nide?” ¿quenquioda ique? ⁶ Ai, ëmbi chuiboed tantiac nësquo icnuc mimbi ëbi chienquo icchitec. ⁷ Ëbi nibëdnuc mibi bëdambo iquendac. Ëbi nidenquo icnuc con Mayan mibi bëdamboen tantiamenuc choenquo ictsiash. Nidshumbimbi mibëdi tabadmenuen chomendac. ⁸ Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. ⁹ Aden Nuquin Papan Mayanën tantiamiac: “Esus tantienquo yec icsambo icchitebi,” quendac matses. ¹⁰ Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiashoeni Nuquin Papan bëdamboen istsiash,” quendac matses. Ëbi isadenquo yec con Pa yacno nidan con Mayanën tantiamiac matses adendac. ¹¹ Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquo icquidobëdta Nuquin Papan cuidendac,” quendac matses. Con Mayanën tantiamiac adec matses onquendac — quepondash Esus.

¹² Adashic abëd icquido chiec Esus: — Mibi dadpenquo chuitiadquo icquimbi nëbi dadpen chienquo iquembi. Nëbi ëmbi chuisho mimbi tantiatiapimbo iquec. ¹³ Nuquin Papan Mayan choshombien mibi abimbo chuiquin ëbi tantiamendac. Ambembi chienquo icquin Nuquin Papan chiaiduidi chiendac. “Nadquo iquendac. Adecbidi nadquid choendac,” quequin mibi dadpen tantiamendac. ¹⁴ Adembidi ëmbi naidbëdta ëmbi chiaidtedi tantiamequin: “Esus bëdamboshë iquec,” camendac. ¹⁵ ¿Ëbiuidtsëqui tantiamenuenda con Mayanën adopec? Padenquo. Ëmbembi chiaid mambi chiambo yoc. Nuquin Papan chicapadomboenuidi naquin ambi chiaiduidtsëquimbi chuibanendac. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quioibi — quepondash Esus abëd icquido chiec.

Abi nidte Esusën chiaid

¹⁶ Adashic padpidec: — Nëbi isadenquo yanebi. Adashic yuecpactsëc yash isadcuenendabi — quepondash Esus. — Nëbi nësash uincuenash padpidec isadebi — quequin tantiec adondash. ¹⁷ Adsho tantiashini ëbitedi: — ¿Atotsi quepec? Tantiadenquo yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquo yec: “Nëbi isadenquo ictanec yuecpactsëc yash isadcuenendabi,” queposh? ¹⁸ ¿Atotsi quepec nec? — quepondabi Esusbëd icquidobëd onquec. Esus tantiamenquo yec sho-shoshquetsëcquiec onquepondabi. ¹⁹ Adsho ambembi tantiasch: — Ëbëd icquidon ëbi chuitiadquo iquec — qeshun Esusën: — “¿Atotsi chuitiadquo yec nio?” quequin ëbi

chuite mibi buneque. ²⁰ Tantia. Mibi Chuinu. Ĕbi unĕso isash mibi sedenquenubi ĕbi tantienquo icquido cuishonquendac. Adec sedenqueboedobi mibitsen cuishonquianendac. ²¹ ĴMitsipadquio bacuĕ tishĕc chido icpec? Bacuĕ cuididiquenuc natiamboshĕ ichoedi bacuĕ tishash cuishonquepaid yoc. ²² Adecbidi nĕbimbobi ĕbi unĕso isash mibi natiaquien-dac. Adboedi yuepactĕĕschun ĕbi padpiden isash mibi cuishonquendac ĕnĕdenquo yec. ²³ Adnubini con Pa yacno nidendac. Ĕbi adnuc mibi bĕdambo iquendac. Ĕbi nidan: “Ĕbi nashunta,” ĕbi catiapimbo icquimbi Nuquin Papa mimi chianendac. Ĕbi tantiaquidĕn: “Min Mado Esus tantiaquiembique. Ĕbi nashunta, Papa,” cac ĕbi tantiaquin con Pan mibi nashunendac. ²⁴ Aden mimi Nuquin Papa chianenquo iccoc. Nĕbi adomboen chianeta. “Min Mado Esus tantiaquid icsho ĕbi nashunta, Papa,” quequin chianeta. Mimi adoac mimi chiacpadomboen mibi nashunquin Nuquin Papan mibi cuishoncamendac —quepondash Esus abĕd icquido chieĕ.

Esusĕn abĕd icquido ĕnquimbi chiaid

²⁵ Adashic abĕd icquido padpiden chieĕ: —Ompoachimboen dadpen chuibanomi. Yuepactĕĕschun: “Con Pa nadquio iqueĕ,” quequin mibi sebadĕnquo chiendambi —quepondash Esus. —Uincuenshun aden chiendambi —quequin tantieĕ adondash Esus. ²⁶ Adashic padpideĕ: —Con Pa yacno ĕbi nidan mimi: “Min Mado Esus tantiaquid nebique. Ĕbi nashunta, Papa,” quequin Nuquin Papa mimbibi chianendac. “Ĕmbiuidtsĕqui: ‘Ĕbi tantiaquid nashunta, Papa,’ cac ĕbiuidtsĕqui tantiaquin Nuquin Papan mibi nashuntsi-ash,” Ĵquectabi ique? Padenquo. ²⁷ Mibitsen tantiaquin Nuquin Papan mimi chianiac mibi nashunendac. “Nuquin Papa yacnuĕsh choquid Esus nec,” quequin ĕbi tantiaquid mibi icsho con Pan mibitsen tantiaquiquin mibi nashunendac. ²⁸ Matsĕsbĕdi tabadec Nuquin Papa yacnuĕsh chondash nĕbi con Pa yacnobidi nidendabi —quepondash Esus.

²⁹ Adsho tantiahini ĕbitedi: —Adquidshenda mibi nepec. Ma nĕbi mimi sebadĕnquo chieyoc. ³⁰ Mibi: “Nĕbi isadenquo yanĕbi,” quioc. Adashic: “Yuepactĕĕc yash adcuĕ-nendabi,” mibi qĕsho tantish mibi tantiamenquo yec sho-shoshquetsĕcquieĕ: “ĴAtotsi quepec?” quecuedepobi. Mibi chuimetiadquio iccobi. Ĕmbi chiambobi ma mimbibi tanti-apaboc. Comapenen tantiaquidquio icquin ma mimi abitedimbo tantiapayoc. Aden tantiaquid yec Nuquin Papa yacnuĕsh choquid mibi nec —quepondabi ĕbitedi. ³¹ Adsho tantia-sh Esus: —Ai, nĕbi mimi ĕbi tantiaquieĕ. ³² Aden ĕbi tantiaquidquobi ĕbi chiešĕnquin bedsho isanec mibi niquendac ĕbi nianec. Mimi niamĕnubi con Pan ĕbi nianenquo iquendac. ³³ “Ĕbi nidan Nuquin Papan Mayan mibĕd tabadendac. Ĕbi tantiaquid Con Pan tantiaquieĕ,” quequin dadpen chuibanombi. “Ĕbi tantieĕ dacuĕdenquo yec ma tabadnu,” qĕshun mibi aden chuibanombi. Ĕmbi chiaid tantiašun chiešĕmĕnquido dacuĕĕnĕnda. Satanasĕn: “Icsamenu,” cac icšainquo iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuĕdenda —quepondash Esus abĕd icquido chieĕ.

17

Esusĕn Nuquin Papa chiaid

¹ —Dacuĕdenda —qĕshumbic ĕbi tantiamenuen abuc isquin Esusĕn Nuquin Papa chuipondash. —Nuqui tantiaĕtedi ĕbi naimeta, Papa. Ĕbi naimetanquin comapenen tantiaquin ĕbi bĕdambo icmeta. Aden mimi bĕdambo icmiac mibitsen bĕdambo icmendambi, Papa. ² Ĕndenquimboshĕ mimi ĕbi chiondac naden chuiquin. “Nuqui matsĕs uaidon abitedishun Icho mibi nec, Mado,” quequin mimi ĕbi chiondac. Mimi adondaid icquin mimi tantiaĕtedi matsĕs nuquibĕd tabadtequido icmendambi, Papa. ³ Matsĕsĕn nadosho adoendambi. “Abipadquid utsi nibĕdnuc Nuquin Papa iqueĕ. Ambi chomiondaidquio Esus nec,” quequin tantiašho nuquibĕd tabadtequido icmendambi, Papa. ⁴ Mimi chiacpadom-boen naquin nĕbimbobimbi nainec. Ĕmbi adoacsho isash matsĕs: “Ambi chomiaid tantiašho Nuquin Papan nuqui bĕdamboen isec. Nuquin Papa bĕdamboshĕ iqueĕ,” quependac, Papa. ⁵ Nuqui tantiaĕtedi ĕmbi nainacsho mibi yacno nidmeshun mibĕdi ĕbi tabadmeoata nuqui matsĕs uabi tabadtenecpadembi. “Nuquibi abitedimbo namenuna,” ĕbi cata, Papa —quepondash Esus Nuquin Papa chieĕ.

Esusĕn abĕd icquido Nuquin Papa chiaid

⁶ Adshumbic Esusĕn abĕd icquido ĕbitedi chuiquin aton Papa chuioapondash. —Mimi tantiaĕtedi mimi ĕbi tantiaquid icmiacsho mimi bĕdamboen iste chuibanombi. Aden mimi chiaidquio chiac: “Ai, adotiadquio iquebi,” quiošh, Papa. ⁷ Adembidi aidon: “Nuquin Papan namiaidquio nec. Ambembi nainquo iqueĕ,” quequin ĕbi tantiaposh. ⁸ Mimi chiaid ĕmbi chuisho tantiašun mimi comapenen tantiaquin nabamiaid nasho

isun: “Ma Nuquin Papan chomiaidquo nepayoc,” caposhi ëbëd icquidon, Papa. ⁹ Èbi tantienquo icquido mibi chienquo iquembi, Papa. Èbi tantiaquidoidtsëqui mibi chiec nebi. Mibi tantiaquido icsho mimbi tantiamiac ëbitsen tantiec aidon. ¹⁰ Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Icbo mibi canu. Mimbi chiapadec bëdamboec tabadtiaquido iquebi,” quequin bëdambo icmioshi, Papa. ¹¹ Mibi bëdamboeshë iqueque. Èbi mibi yacno nidan ëbi tantiaquido dayun uata, Papa. Èbi chieshëquidon chieshtomenushe. Nëido bëdamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantiananquiapadquiec ma ëbi tantiaquido tantiananu. Nëido bëdamboen dayun uata, Papa. ¹² Aidobëd icquin mimbi chiaidquo bëdamboen chuibanquin chieshtomiambo iccombi. Aden bëdamboen dayun uaqin ëbi tantiaquido cudasënuquin Satanas yuamiambo iccombi. Udas abentsëquien Satanasën yuatsaccosh. Mimbi chiaid matsesën dada uapampicpadomboen ëbi bedmenuen Satanasën Udas yuaccosh. Adoac ëbi bedmequid yanash mimbi cuidtequid iquendac.

¹³ Nëbi mibi yacno nidendabi, Papa. “Èbi nidan dacuëdec ëbi tantiaquido chieshtonoshe,” qeshun mibi otacquo chienquo iquembi. “Èmbi abi dayun uate chuisho tantiashe ëbi yapadec ma cuishonquenu,” quequin mibi otacquo chienquo iquembi, Papa. ¹⁴ Mimbi chiaidquo nëido chuibanombi. Adoac ëbi tantiaquido yansho ëbi chieshëquidon nëidotsen chieshëmpec. Èbi yapadec mimbi chiaid niac-niacte bunenquo icshobidi nëido chieshëquiec, Papa. ¹⁵ Aden tantiashe: “Èbi tantienquo icquidobëdi ëbi tantiaquido tabadmenda,” ¿quectabi ique? Padenquo. “Èbi tantiaquido chieshtomenda,” caimbi, Papa. Satanasën yuanushe. Bëdamboen dayun uaqin chieshtomenda, Papa. ¹⁶ Èbi tantiesabo tabadapadec tabadenquo icquin ëmbi nabocpadomboen natiadquo iqueque. ¹⁷ Mimbi chiaidquo pausunquoquin bëdamboen tabadme, Papa. ¹⁸ Mimbi ëbi: “Matses chiec nid,” caondacpadomboen aido: “Èbi chuibeneta,” caindambi. Adoac nëidon ëbi chuibenendac, Papa. ¹⁹ Nëido tantiaquiec nëbimbobini mimbi chiapadec ëbided cuidadec unësendac. “Adomboembidi ëbi tantiaquidon ma Nuquin Papan chiapadomboen nanu,” quiashe ëbi tantiaquido min yuabombo icmenuec adebi, Papa —quepondash Esus aton Papa chiec.

Esusën abi tantiaquid utsibo Nuquin Papa chiaid

²⁰ Adashic padpiden Nuquin Papa chiec Esus: —Èbëd icquido mibi chuishumbic nëbi aidobëda ëbi tantiaquid utsibotsen mibi chuinu, Papa. Èmbi chiaidbëda ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquo yanendac. Èbi tantiaquidotedi tantiaquin mibi chiec nebi, Papa. ²¹ Nuqui tëshnanenquo yapadequi nuquibëd tëshnanenquo icquid icmeta, Papa. Nuqui tantiananquiapadec ëbi tantiaquidotedi shubu abentsëquën tabadacimboecnuc tantianameta, Papa. Adsho isash nuqui tantienquo icquido nadtsiash. “Esus tantiec bëdambo iquec. Aden Nuquin Papanuidtsëqui bëdambo icmetsiash. Nuquin Papan chomiaidquien Esus nechitec,” quetsiash. ²² “Mibëd ëbi tantiananquiapadquiec ma ëbi tantiaquido tantiananquiono. Ma chieshënanenquo icnu,” quequin mimbi ëbi namiacpadomboen ëbi tantiaquido namiombi, Papa. ²³ Nuqui tëshnanenquo yapadec aidobëd tëshnanenquo iquendabi. “Chieshënanenquo yec tantiananquiec ma bëdamboec tabadnu,” quec aidobëd tëshnanenquo iquendabi, Papa. Adec ëbi tantiaquido bëdamboec tantianansho isun matsesën naden tantiatsiash. “Ambi chiapadquid Nuquin Papan chomenëdaid icquin Esusën abi tantiaquido aden bëdamboen tabadmec. Ambi chomenëdaid aton Mado tantiaquiapadomboen Nuquin Papan aid tantiaquido tantiaquiec,” quequin matsesën tantiatsiash, Papa. ²⁴ Mimbi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Èmbi tantiaidquo mibi neque. Nuquibi nanuna, Mado,’ cac nuqui bëdamboeshë yec tabadtenecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi. ²⁵ Icsaisambo mibi icsho icsambo icquidon mibi tantiatipimbo icnubimbi mibi tantiaquiec. Mibi yacnuësh choquid icshobini ëbëd icquidon: “Ai, Nuquin Papa yacnuësh choquidien nec,” quequin tantiaposh, Papa. ²⁶ Aden tantiamenuen yuec ëbëd icquidobëd tabadquin mimbi naid chuibanombi. Èbi nidan ëmbi chomiaidën con Mayanën adembidi ëbëd icquido tantiamendac. “Mimbi ëbi tantiaquiapadomboen ma nuqui daëdi tantiaquiash ma tantiananquiono,” qeshun con Mayan aidobëd tabadmendambi. Adoac ëbëd icacimboec con Mayan tantiadendac, Papa —quepondash Esus Nuquin Papa chiec.

¹ Aden Nuquin Papa yuen chianec Esus nidpondash. Ĕbi chedobĕd nidquin acte Sedon caid potiash tiedno cuĕte odibos caid nitsinacno ĕbitedi chiec tabadtenebocnombo chopondash. ² Ambo tabadnubien Udas: —Ĕbi abĕd tabadtenebocno tiednoen nidchitash —quianec Esus bedmenuec ³ chopondash. Aden chieshĕmĕnquido chuiquid dapabo chuitanshun matses dadpen bĕpondash nĕidtedi. Nĕidic con matses chuiquid dapabobĕdtan padiseyobon namiaido sondado chedo. Nĕidic con matses yuaquido Doma yacnocquido sondado dadpen. Nĕidic aid sondado chuiquid. Aidedi Udasĕn bĕpondash. Tabotĕbĕdta cueste sanambĕdedtsĕcquieic cho-chopondash. Utsibombic chĕshte.

⁴ Adec cho-chosho isash bĕquĕdbanec nidquin: —Ĕbi unĕs uamec —quequin tantiaquin Esusĕn: —ĭAtotsi quec ne? ĭTsutsi nibĕne? —cac ⁵ —Nasaded yacnuĕsh caniquid Esus bednuec nebi —quepondash sondado chuiquid. Adshun isac aibĕd Esus bedmequid Udas icpondash.

⁶ Adshobien Esusĕn: —Nĕ iquebi —capondash. Nuquin Papapadquidquibi icquin adoac dacuĕdec: —Aucbidi cuenu —quec uebudcuĕdedpondash bednuequidotedi. ⁷ Adshobien padpĕden Esusĕn: —ĭTsutsi nibĕne? —cac: —Nasaded yacnuĕsh caniquid Esus bednuec nebi —queoĕsh tantiaishun: ⁸ —“Nĕ iquebi,” caombi. Ĕbiuidtsĕqui bedta. Ĕbĕd icquido bedenda —capondash Esusĕn. ⁹ —“Mimbi ĕbi tantiaquid icmiaido Satanas chieshtomiambo iccombi, Papa,” quequin ĕmbi Nuquin Papa chuibocpadomboen nĕido chieshtometiapimbo iquebi —quequin tantiec: —Nĕid bedenda —quepondash Esus.

¹⁰ Adnubien Petĕdon abi tsidiadaid chĕshte chictanquin chuiquid dapan yua abiuquio pateshunepondash. Aid yua Madco niondash. ¹¹ Adosho isashien Esus: —Padi. Chĕn. Min chĕshte naued. Nuquin Papan chiacpadece paĕmbo icnuc unĕsendabi —quepondash Esus.

Anasĕn shubuno Esus buanaid

(Mat 26.57-58; Mad 14.53-54; Duc 22.54)

¹² Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash. ¹³⁻¹⁴ Aden cataneshun buanquin con matses chuiquid dapambo Caipas caidĕn cucun shubunoba buanondash. Aid setambi chuiquid dapambo Caipas iccondash. Esus chieshĕnec: —Nuquin matsestedi unĕs uamenquio icnuen Esused unĕs uamenuna —queboĕd Caipas niondash. Aton cucu chuiquid dapabidi niondash. Aidi Anas niondash. Anasĕn shubunoba Esus buampondash. Ashunquio Caipas ismenuen buampondash.

Pĕdon: Ĕmbi isacmaid Esus nec, quequin chiaid

(Mat 26.69-70; Mad 14.66-68; Duc 22.55-57)

¹⁵ Esus buansho isun Petĕdobĕdtan chinunondambi. Chinuntuidash nidequi Caipasĕn shubuno choash daquĕnĕ uaidĕn puduednuesho tantiaishun shĕcuĕ isquid chidon puduedmiondashi. Ambi isondaid icsho aden puduedmiondashi. ¹⁶ Ĕbi puduedmequin Petĕdo ambi isacmaid icsho puduedmenquio icpondash. Adsho istanquin: —Ĕbĕd icquid neque. Shĕcneshun. Ma puduednu —capondambi. ¹⁷ Adoac puduedmeshun shĕcuĕ isquid chidon: —ĭNĕ bedboĕd Esusbĕd icquidta mibi ne? —capondash Petĕdo chuiquin. Adoquien Petĕdo dacuĕdec: —Padenquio —quepondash muequi. ¹⁸ Adnubien iquendoshon daquĕnĕ uacnoshon cuĕte dĕtsiadoshon sondado chedobĕd anocquido yuabo cuĕte cuĕec tabadpondash. Adsho isashien Petĕdotsen cuĕte cuĕnuec nidpondash ĕbi shubunquio puduednuc.

Caipasĕn Esus chuimiaid

(Mat 26.59-66; Mad 14.55-64; Duc 22.66-71)

¹⁹ Adec ĕbi puduednubien Caipasĕn Esus chuimepondash. —Mibĕd icquid ĭtedtsi iquec? ĭĔbĕd icquido dĕniaquecna icpec? Mibĕd icquido ĭmitsipaden chuibano? —capondash. ²⁰ Adoquien Esusĕn chuipondash. —ĭOmposquindambi chuibandio? Nuquin Papa tabadte shubu uashunaid daquĕnĕ uaidĕn puduedshun mambi chuibandeneboc. Nuquin Papan chiaid chuibante shubun-shubunquieic puduedcuenequin mambi chuibeneboc. Omposquin chiambo iccombi. ²¹ Mimbi: “Icsamboen naosh,” caid ĕbiuidtsĕqui chuimenda. Ĕbĕd icboedotsen chuime. Ĕmbi chiaid abitedi tantiaishun aidombi mibi chuitsiashe. Aidotsen chuime —quepondash Esus.

²² Adsho tantiaishun: —ĭChuiquid dapada adopaid? —quetanquin sondado chuiquidĕn mĕdanten bĕcuespondash Esus. ²³ Adoquien: —ĭIcsamboendambi chuidio? ĭAtotsimbi icsa uaoque? En chui. Mambi abimbo chuiboc. ĭAbimbo chuiquidta cuespaid? —quepondash Esus. ²⁴ Adondash Esus Anasĕn abi cataniachhobi Caipasĕn shubuno bĕac.

Pĕdon: Ĕmbi isacmaid Esus nec, quequin chuioaid

(Mat 26.71-75; Mad 14.69-72; Duc 22.58-62)

²⁵ Adnubien Petedo abi cuĕte cuĕec tsadsho abĕdtan cuĕte cuĕec tabadquidon: — Esusbĕd icquidien mibi nechitec —capondash. Adoquien Petedo: —Padenquio. Mabi aibĕd icambo yoc —quepac caondash. ²⁶ Adshobien chuiquid dapan yua utsin Petedon pateshuneboedĕn matsesĕn: —Esus bedacnobimbi mibi ischitoc —caquien ²⁷ padpidec: —Padenquio. Mabi ano nidambo yoc. Ĕmbi isacmaidquio ma Esus neyoc —quenubien Esusĕn chuibodquio cachina bĕnĕ cuĕdampac caondash.

Pidato caidĕn shubuno Esus buanaid
(*Mat 27.1-2; Mad 15.1-5; Duc 23.1-5*)

²⁸ Adnubien Caipas aton chuiquid utsibobĕd: —Nuquin matses yuaquido ancaquid Pidato caid ismenuembien Esus buantiad. Aid Esus unĕs uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchĕsh tantiec con matsesbĕd pec tabadtiapimbo icchitomane —quiash Pidaton shubun puduedenquio icpondash. ²⁹ Adnubien Pidaton aton shubunuĕsh puduantanquin Esus bĕquido chuipondash. —ĔAtotsi quequin nĕid bĕo? ĔIcsamboen naquidta nepec? —caquien ³⁰ —ĔBĕdambo icquidtambi mibi ismenuen bĕdio? Con matses chuiquid dapa ictiadquio icquin icsamboen naoshe. Cuidquiota —quepondash chieshĕnquido. ³¹ Adoquien Pidaton: —Mimbi cuidta. Min matsesĕn: “Icsamboshĕ icquid naden cuidquid yendac,” cacpadomboen nata —caquien: —Padi. Ĕmbi cuidquin unĕs uacsho isash min matses chieshtonoshe. Min matsesĕn: “Con matsesĕnuidtsĕqui unĕs uaquin cuidaquien bĕdambo ictsiash,” qeshun ĕbitedi chieshĕnushe —quepondash Esus chieshĕnquido Pidatombo Esus unĕs uametiadquio yec. ³² Ĕnden abi chieshĕnquidon bedabi icnuc: —Ĕbi cuesten decantanquin unĕs uaindac —quequin Esusĕn chiacpadomboen namenued adpondash.

³³ Adnubien aton shubun puduedtanquin Pidaton Esus chuimeoapondash. —Cho. Chuinu. ĔMin matses isadaidbo chuiquid dapada ne? —caquien ³⁴ Esusĕn: —ĔMitsipadquid chuiquid cai? ĔUtsibon tantiacpadquidta cai? ĔMibipadquidta cai? —capondash.

³⁵ Adoquien Pidaton: —ĔIsadaidbodabi nedi? Padenquio. Ĕmbi tantiacpadquid caimbi. ĔAtotsieshun min matses chuiquid dapabon mibi bĕosh? ĔAtotsi icsa uasho naosh? —caquien ³⁶ Esusĕn Pidaton bĕyuc chuibod tantiaquin: —Mibipadquid chuiquid dapapenquio nebi. Nidaidĕn con yua sondado nibĕdec. Nidaidĕnuĕsh mibipadquid icquin con yuabo ĕbi bedquido cuesun siametsenombi. Aden ĕbi bedenquio ictsenosh. Mibipadquidpenquio nebi. Abuchshun chuiquid dapambo nebi —quepondash Esus.

³⁷ Adsho tantiaashun Pidaton: —Chuiquid dapambo nebi Ĕquecta igue? —caquien: —Ai, adquid nebi. Chuiquid dapambo icnuec matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ĕbi tantiatiansiandac —quepondash Esus.

³⁸ Adsho tantiaash Pidato: —ĔTsuntsin matses uaquid quequin abimbo chuiatsiash? —quetanec puduenshun Esus chieshĕnquido chuiopondash. —ĔIcsambo icquidta Esus nedic? Ma icsapenquio icquid neyoc. ³⁹ Nĕid cuidtiapimbo icquin chuinu. Nuquin Papan matamiampid inchĕsh tantiate ushĕn min matses quĕnĕn nauedaid abentsĕc cuemedendonambi. Adembidi abentsĕc cuemembi. ĔMitsicquidimbi cueme? ĔNĕid mibi chuiquid dapa Esustambi cuemepe? —caquien: ⁴⁰ —Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshĕnquido Esus unĕs uamete bunquiec.

19

Esus cueshcaid
(*Mat 27.27-31; Mad 15.16-20*)

¹ —Badabasquio cuemeta —qesho tantiatanquin Pidaton: —Nĕ Esus cueshcanuen buan —capondash. Adoquien buanshun sondadon canite cuĕshĕ dĕdectanquin nacnĕnaid cueshcanten Esus comapenen cueshcapac caondash. ² Cueshcatanquin pinchucpinchucpambo icquid mauete nacnĕnaid Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin: ³ —Adec dasiuidquid chuiquid dapambo nec —quequin sondadon Esus mamĕnshumpac caondash. Aden mamĕnshunquimbi: —Isadaidbo matses chuiquid dapambo Esus neque. Is —quetanquin mĕdanten bĕcuesbanepac caondash. Adotanquin Pidato yacnobidi buanoapac caondash.

Esus unĕs ua, quiaid
(*Mat 27.15-26; Mad 15.6-15; Duc 23.13-25*)

⁴ Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquio iquec. Icsambo icquid icsho: “Unès uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique — quepondash Pidato. Adnubien ⁵ Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduenshobien Pidaton: —Is. Mimbi bëboed choeque —cac ⁶ chosho istanequien: —Cuesten dectanquin unès uata. Cuesten dectanquin unès uata —quecuededpondash Esus chieshënquido comapenec cuèdec. Adoquien Pidaton: —Mimbi cuesten dectanquin unès uatan. Ëmbimbo adotiapimbo iquebi. Icsapenquio icquid icsho Esus unès uatiapimbo iquebi —capondash Pidaton.

⁷ Adoquien Esus chieshënquidon: —Con matsesën: “Nuquin Papa muauaquid unès uaquid yendac,” cacpadomboen natiadquio iquebi. Esusën: “Nuquin Papan Madombo nebi,” quequin Nuquin Papa muauaashe. Unès uaquimbien ictiad —quepondash. ⁸ —“Nuquin Papan Madombo nebi,” quiosh —quesho tantiashien Pidato dacuèdquiec yampac caondash. ⁹ Adash aton shubun Esusbëdi puduedoashun Pidaton Esus chuiuoapondash. —¿Tsutsimbo ne? ¿Mitsiuëshquio chonda? —caqui Esusën ëcbedenquio icpondash.

¹⁰ Aden ëcbedenquio yac nëishashien Pidato: —¿Chuitiapimboda ique? ¿Tantienquioda ique? Ëmbi: “Cueme,” cac mibi cuemetsiash. Ëmbi: “Cuesten dectanquin unès ua,” cac mibi adotsiashe. En chui —caquien Esus: ¹¹ —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi ëbi cuesten dectanquin unès uametiapimbo ictsiac. Ëbi cuesten dectanquin unès uamenuec mibi icsambo icnuc ëbi bëboedo chuiquid dapabo icsamboshë iquec —quepondash Esus.

¹² Adsho tantiashien Pidato: —Esus unès uatiapimbo icchitebi. Cuemetiadquio iquebi —quetanquin padpiden Esus chieshënquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Ëbentsëqui chuiquid dapambo nebi,” quiac caosh. Aid dëniaguec Esus chuiquid dapa icte bunquiec. Esus cuemequin mibi chuiquid dapambo mimbi nëishmeque. Esus cuesten dectanquin unès ua —quecuededpondash. ¹³ Adsho tantiashun Esus puduemeoatanec cuènote nacenaid abuc tsadunaidën cuidte chuinuec tsadten tsadtopondash Pidato. Aid cuènote nacenaid con onqueten Cabata capondash. ¹⁴ Nuquin Papan matamiampid inchësh tantiate ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. ¹⁵ Adoquien: —Cuesten dectanquin unès ua. Nëbimbobi buanshun cuesten dectanquin unès ua —quecuededpondash Esus chieshënquido. Adoquien: —¿Mibi chuiquid dapadambi cuesten dectanquin unès uape? —Pidaton caquien Esus chieshënquido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unès ua —quecuededpondash Esus chieshënquido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

¹⁶ Adoquien Esus chieshënquidon chiacpadomboen: —Esus cuesten dectanquin unès uatan —capondash Pidaton aton sondado chuiquin.

Cuesten dectanquin Esus unès uaid

(*Mat 27.32-56; Mad 15.21-41; Duc 23.26-49*)

¹⁷ Adoac buanquin: —Nëidën dectanu —queshun sondadon cueste daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash. ¹⁸ Ambo nidshun aton dashcute dachictanquin bëchun shuin mëtoacaquinc tatoccaquinc catanquin cueste daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uquë diadbudcuenc diadnuc Esusquio nënantanquio dectampondash.

¹⁹⁻²⁰ Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cueste pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —queshun Pidaton adopac caondash. Aden dada uashun dectanaid isashien Esus chieshënquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onqueten-onquetenquien dada uaid matses dadpen-shun isushe —quiash ²¹ Pidato chiec nidpac caondash. —Icsamboen chuiquin ma mimbi dada uapacbo. ¿Con matses chuiquid dapada Esus nedic? Adquidpenquio nec. Utsi uain dada uata. “ ‘Isadaidbo matses chuiquid dapa nebi,’ quequid Esus nec,” quequin cueste

cuëshê utsin dada uata —caquien²²—Padi. Mambi ëmbi tantiaboedquoio dada uaboc. Utsi uain dada uaoatiapimbo iquebi —quepac caondash Pidato.

²³ Adnubien Esus dectanquido sondado daëd-daëdquieic icpondash. Esusën dashcute 5ted icsho sondadon bedbanquin abentse-abentsen bedbededpondash abentsêc abi icnuc. Aid abucshun bedanquin abichobi daëdcaid tuscabi icquid niondash. ²⁴ Adquid icsho isun: —Canchenquo icquin çtsundanquo bedeeque? Isnuna —qeshun abi cuëmëdquidtedi dada uabanshun têchun sandoshon cadotanequin dada uaidëmpi abia puduemaiad isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “‘Abentse-abentsen con dashcute bedosh. Con dashcute utsi bednu, quequin dada uaidëmpi abia puduemaiad isnuen naosh,’ quependac,” quequin dada uapampic.

²⁵ Adnubien Esus dectanaid cuate tayun nêidtedi icpondash. Nêidic Esusën tita. Nêidic Esusën tita utsi. Nêidic Madia Codopasën chido. Nêidic Madia utsi Mactada yacnuësh choquid. Aidtedi chido icpondash. ²⁶ Nê chido tabadnuc ambobi uquêçtsêc tabadondabi. Adec ambi tantiaidquo ëbi icsho isun Esusën aniba chuipondash. —Nêid con mado cata, tita. Ma mibi bédamboen dayun uanu —capondash Esusën. ²⁷ Adshumbic ëbitsen chuiquin: —Con ta tita cata. Adshun bédamboen ëbi dayun uashunta —cac con shubunobi buanondambi bédamboen Esus dayun uashunuen.

²⁸ Adboshien unêsquionoshi Esus: —Con Pan chiacpadomboen nainembi. Matses tantiec ëbided cuidadec unêsëbi —quequin tantiec con tsusedpan dada uaquin chuiampicpadec: —Acte bundobi —quepondash Esus. ²⁹ Adsho tantiashun matsun acte mucambo icquid anidquid shapu-shapupactsêcquidên punshun cuate dëdectanshun abuc sananquin êccuêscadonetsêcquin chishmepondash. ³⁰ Adoac acte mucambo icquid chishtanequin: —Con Pan chiacpadomboen nainquiombi —quepondash. Adtanequi tédquëdbudpondash Esus unêsëqui.

Esus uinte masiaid

³¹ Adnubien Esus chieshênquido: —Badiadash Nuquin Papan matamiampid inchêsh tantiate ushê iquec. Chonoadenquoio icte ushê nec. Aidên cuesten dectanquin unês uaid chococac icsambo ictsiashe. Nêbimbobi chococamenu —qeshun Pidato chuitampac caondash. —Baded nidte podquênquin unês uame. Inchêsheque —cac ³² Pidaton aden chiac sondadon nidte podquênanondash. Esusbêdta dectanaid êquë diadquidba nidte podquênshumbic utsiuc diadquidtsen. ³³ Adotanquin isquien Esus ênden unêsac. Adshobien nidte podquênquio icpondash.

³⁴ Adotanquimbic: —Unêsabi icnushe —qeshun: —Unês uaquio bono —quetanquin sondadon cudan podo ansequin Esus uinte masepondash. Adoac nua intac chididiquiondash actebëdi. ³⁵ —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nêid dada uaquin. ³⁶ Nuquin Papan tantiamiac con tsusedpan: “Canite podquênquio iquendac,” quequin dada uapampicpadomboen canite podquênquio icpondash Esus. ³⁷ Adembi podo ansete dada uapampic. “Ambi podo anseboed isec tabadendac,” quequin dada uapampic.

Esus unêsacsho chococaid

(Mat 27.57-61; Mad 15.42-47; Duc 23.50-56)

³⁸ Adnubien shubu dadpen icquid Adimateya yacnocquid Ose chopondash. Esus tanti-aquid aid niondash. Esus chieshênquido dacuëdênquin: —Esus tantiaquid nebi —quequin utsibo chienquo icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash. ³⁹ Aibdëdi Nicodemo inchêshên Esusbêd onquiondaid nidpac caondash. Bédambo nuadquid mida adoebêdta cabiunaid unêsaid dabiunte bëac caondash. Nuamboshê. Yuëmbo icnuc 35 quidostembi icnuc bëac caondash. ⁴⁰ Adshumbien Osebêdambi Esus nua dabiunquin uesquin datanic caondash dashcuten. Adshumbic padpiden dabiunoquin. Adshumbic padpiden dataneoquin. Adshumbic padpiden dabiunoquin. Adshumbic dataneoquin. Chococanun con matsesên adoquid. ⁴¹⁻⁴² Adashic: —Badiadash Nuquin Papan matamiampid inchêsh tantiate ushên unêsaid chococac icsambo ictsiashe. Badedquoio chococanu —qeshun tied nêbi ictsêcquidên Esus buampac caondash. Buanshumbic cuënote dapa shêcuë uaid chucan matses chococabi icquidên Esus nauedpac caondash. Shêcuën nauedtanquin bêtimpac caondash cuënote dapambidi.

20

Esus uincuenaid

(Mat 28.1-10; Mad 16.1-8; Duc 24.1-12)

¹ Esus chococan daĕdec ushash badiadnuc dominco caid ushĕn ĕnden inchĕshquio icnobi Mactada yacnocquid Madia chedo Esus chococacnuĕsh sedenquec nidpac caondash. Nidshun isquien shĕcuĕ bĕtinaid cuĕnote dapa bĕcunepamboen shĕcniac. ² Cuĕnote dapa bĕcunepamboen shĕcniacsho istanec titinguanec choquin chuituidpondashi. —Esus padoen buanchitaccosh. ³ Mitsimbo buampash? —quepondash Madia Petedobĕtta ĕbi chuituidec.

³ Adoquini: —Istanu —guanec ⁴ titinguanec chococacno Petedobĕti nidpondac. Petedo nianec ĕbia nidpondabi. ⁵ Adshumbimbi puduedenquio icquin shĕcuĕ anshuebudshun anispondac. Adshun isquien dashcute dataniaiduidtsĕqui uec. ⁶ Aden ĕmbi anisnubien Petedo choequi badedi shĕcuĕn puduedpondash. Aidĕntsen dashcute dataniaiduidtsĕqui istuidondash. Esus nibĕdondash. ⁷ Nĕ dataniaid uenubi udictsĕc dashcutempi bĕpucaid bĕdamboen shĕbunaid uiondash. ⁸ Aid puduedsho istanec tsyuec puduedshun ĕmbitsen isondambi. Adash: —Uincuenac. Nuquin Papan Madombobi nec —quepondabi Petedobĕdtsĕqui onquec. ⁹ —Nuquin Papan tantiamiac con tsusedpabon aden Esus uincuent chuiquin dada uapampic —quequin tantienquio icboedi adondabi. ¹⁰ Aden istanec ĕbi ushboconbidi chiec choapondabi.

Esusĕn Madia Mactada yacnocquid ismiaid
(*Mad 16.9-11*)

¹¹ Adnubien ĕbi chuiamboed Madia chococacnobidi isec nidoapac caondash. Nidash shĕcuĕ cuĕmano tsadec sedenquetuidpac caondash. Adec shĕcuĕ cuĕmano tsadec sedenquetanec shĕcuĕ anshuebudshun isaquien ¹² Nuquin Papan abi yacnoshon uaido mayan bĕda daĕd ushumbo icquid dasiuidquid Esus uebocno tabadpec. Esus nibĕdec. Mapi icbocno abentsĕc tsadnuc utsi taĕ icbocno tsadpac caondash. ¹³ Adshumbic aidĕn: —¹⁴ Atotsi quia sh sedenque, champi? —caquien: —Con Icho pado ¹⁵ midambo buanac? Istiadquio iquebi. ¹⁶ Mitsimbo buampashba? Unĕshquio iquec —quetanec ¹⁷ auchbidi nidnuec bidia dshun isquien Esusquio icpec. Utsi dansho ¹⁸ Esusĕntsen: —¹⁹ Atotsi quia sh sedenque, champi? ²⁰ Tsutsi nibĕne? —caquien Madian tied neshcaquid danquin: —²¹ Con Icho padoda buano? ²² Mitsimbo buano? Ēbi isme. Shĕcuĕ utsin chococanun buanu —capac caondash Madian Esusquobi chuiquimbi.

¹⁶ Abi adoshobien Esusĕn: —Ēbi nebi, Madia —cac bĕisquotanequien: —Esus nec. Ēbi chuiquidquo nec —quetanquin con onqueten cuĕnquin: —Dabi —capac caondash. Adotanquimbien Esus dayumbudpac caondash unĕshquio icsho. ¹⁷ Aden abi dayumbudshobien Esusĕn: —Ēbi dayunenda. Padpidec nidenquio icte danquin ĕbi dayunenda. Ēmbi chuibocpadecon con Pa yacno nidabi yuec-yuecpactsec tabadtanec nidebique. Ēbĕd icboedo ĕmbi con utsi bo caboedo ĕmbi chuiboedquio chuitan. “Nuquin Papa yacno nidendabi, quiosh,” catan —quepac caondash Esus. ¹⁸ Adoquien ĕbi chiec Madia chopondash. —Nuquin Icho Esus isombi. Uincuenaccosh. Ambi chuiboed chuinu. Tanta —quequin Esusĕn abi chiaidquio chuituidpondashi Madian Mactada yacnocquidĕn.

Uincuenshun Esusĕn abĕd icquido ismiaid
(*Mat 28.16-20; Mad 16.14-18; Duc 24.36-49*)

¹⁹ Madian aden chuituidboed inchĕshbudtsĕqui shubun tabadpondabi Esusbĕd icboedobĕdi. Esus chieshĕnquido dacuĕdĕnquin umanucuĕsh utsi puduedtiapimbo icnuc bĕdamboen bĕtashash tabadnubien shĕcuĕnuĕsh puduedenquio icboedi nuntanquobi Esus isadcuempondash. Adtanequien: —Dacuĕdenda —quepondash. ²⁰ Adtanquin abi bĕchun shuin mĕtoccacid abi podo ansiadbĕtta ismiaquini cuishonquiampondac: —Nuquin Icho uincuenac —quia sh. ²¹ Adec cuishonquesho isashien ambi chuibocpadecbidi: —Dacuĕdenda —quetanec: —Tantia. Mibi chuĕnu. Con Pan: “Matses chiec nid,” ĕbi caondacpadomboembidi: “Ēbi chuibeneta,” mibi caimbi —quepondash Esus. ²² Adtanquin ĕbi chedo dabushcabampondash. Dabushcabanashic: —Nuquin Papan Mayan mibĕd tabadendac. ²³ Mibĕd icquin Nuquin Papan tantiaidquio tantiamequin Nuquin Papan Mayanĕn mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nĕid bĕdamboen isec,” quequin mimbi chiacpadomboen Nuquin Papan bĕdamboen istsiash. Utsien: “Nuquin Papan chiaid niaquec icsauidequi icsho nĕid Nuquin Papan bĕdamboen istiapimbo iquec,” quequin mimbi chiacpadomboembidi Nuquin Papan bĕdamboen istiapimbo ictsiash —quepondash Esus ĕbi chedo chiec. Adtanequi isadenquio yanoaondash.

Esusĕn Tomas ismiaid

²⁴ Adec Esus isadenquio yanoanubien Esusbĕd icboed utsi Tomas abi ushĕmbi anin daĕd tishaid chopondash. ²⁵ Choshobi: —Esus isombi —cac: —²⁶ Aidquibida nepash? Utsien nechitash. Bĕchun shuin mĕtoccacid shĕcuĕ isun aid shĕcuĕ mĕdanten bĕmishquinc

podo ansiaid bëmishquinc caquioshombimbi: “Ai, nuquin Icho uincuenac,” quequin tantiasiac. Padambobi: “Con Icbobien niash,” quetiapimbo iquebi —quepondash Tomas. ²⁶ Tomas adbon 7tedec ushash shubu nuntambidi tabadoapondabi. Tomas chedobëdi tabadondabi. Puduedtiapimbo icnuc padpiden bêtashoash tabadnubien shëcuë shëcniabi Esus isadcuenoapondash. Adashic: —Dacuëdenda —queoapondash. ²⁷ Adtanequien: —Is con mëdante, Tomas. Shëcuë bëmishec cho. Nê podo ansiaid iqueque. Aidsen bëmishec cho. Adshun: “Uincuenabien icchitash,” queboedëmbi: “Uincuenaccosh,” quequin tantiaata —caquien ²⁸ mishenquio yec badedi: —Tso. Con Icombo ma mibi neyoc. Nuquin Papapadquidquibidi ma mibi neyoc —quepondash Tomas. ²⁹ Adsho tantiasien Esus: —Ëbi isun: “Nuquin Papapadquidquibidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquibidien nec,” quequin ëbi tantiasio Nuquin Papan bëdambo icmendac —quepondash Esus Tomas chiec. Adtanec isadenquio yanoapondash.

³⁰ Comapenen tantiaquidquio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. ³¹ Padi, aitedi chiombi. —“Nuquin Papan chomiaidquio yec Nuquin Papan Madombobien Esus nec,” quequin aid tantiasio ma Nuquin Papa yacno abëd tabadtequido icpanu —quequin aitedi dada uaombi.

21

Chian cuëmanuësh Esus isadoaid

¹ Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. ² Esus uincuenash daëdec isadan con nidaid Cadidia caid yacno nidanepondabi. Nidaniasn nêidtedi tabadpondabi. Nêidic Petedo. Nêidic Tomas anin abi ushëmbi daëd tishaid ëmbi caboed. Nêidic Ana yacnocquid Natanaid. Nêidic ëbëdta tishaidquio. Nêidic ëbi. Nêidic Esusbëd icboed utsi daëd. Aitedi icpondabi. ³ Adnubien Petedo: —Ëmbi bedtenecpaden nêshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdoanec nënantan nidpondabi. Adshun nêshaid dapa nêneshun yuecshun cadoshon isac nibëdec. Adshumbic padpiden nêneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

⁴ Badiadquionobi acte cuëman masi dapan Esus nidsho istuidpondambi. Utsiembidampondac. ⁵ Adshobini Esusën cuëmpondash. —Con utsibo çtedtsi bedo? —cac: —Padambo. Nibëdosh —capondambi. ⁶ Adsho tantiasun: —Mimbi nêniauc nênenquio icquin cano utsiuc nêshaid nêne. Adoac nuëcquid bedadec —cac ambi chiauc nêshaid nênetanquin: —Indono —cac nêshaid indotiapimbo yuëmboshë icpondash. Nuëcquid dadpen bedac.

⁷ Adsho isumbimbi: —Ma Esus neyoc, Petedo. Nuquin Icho nec —capondac. Adoquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nêpudunash Petedo tan-tanidec nidpondash Esus isnuec. ⁸ Ëbien utsibobëd canombi tsyuec nidondac nêshaid shoyombanec. Cuëma anoentsëqui nuëcquid bedash 100 metedos cactionsëc nidondabi. ⁹ Tsyuec choash pudundoshon isquien pambëdi nuëcquid cuëten shëadtsec. ¹⁰ Adnubien Esusën: —Mimbi bedboed daëdpacktsëc beccho. Penu —cac ¹¹ Petedo: —Ai, bedtanu —quianec nidash cano anidtosshon nêshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nuanuac tsadquido icpondash. Nêshaid tsëdtsiadttsëcquio icnuc indombani.

¹²⁻¹³ Adshumbic ambi: —Pec cho —cac cho-choash tabadsho pamba menebantanquin nuëcquidtsen Esusën menebampondashi. Adoac: —çTutsi ne? —quenquio icquin: —Esus nec. Comapenen tantiaquin nuëcquid nuqui bedmiosh —quequin tantiondambi ëbitedishun. ¹⁴ Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

Esusën Petedo chiaid

¹⁵ Aden chian dapa cuëmashun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nêidon ëbi bëdiacttsëc tantianuc çada ëbi tantiaquie? —caquien: —Ai, mibi tantiembi. Aden ëmbi tantiaid mimbi tantiec —quepondash Petedo. Adsho tantias: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uachimboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash. ¹⁶ Adshumbic padpiden: —çAda ëbi tantiaquie, Petedo? —cac: —Ai, mambi mibi tantieyoc —quesho tantiasien padpidec: —Ëbi tantiaquin con obecabimboecquido ëbi dayun uashunta —queoapondash Esus. ¹⁷ Aden daëden chuishumbic padpiden Esusën:

—¿Ada ëbi tantiaquie, Petedo? —cac shubiantiadtsëcquio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi —quiash shubiantiadtsëcquio yanondash. Adashic: —Mibi con Icho nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc —quepondash Petedo. Adsho tantiash Esus padpidec: —Ëbi tantiaquin con obecabimboecquido ëbi dayun uashunta —queoapondash Esus.

¹⁸ Adashic Petedobidi chuioaic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudtsacshoen tsiumeshun utsibon ëquë mëdimbudcuentsëcshun mibi nidte bunacmanombo mibi buanendac —quepondash Esus. ¹⁹ —Aden mimbitsen Nuquin Papan chiacpadomboenuidi nabansho ëbi chieshënnquidon mibi unës uaindac —quequin tantie adpondash Esus. Adashic: —Ënenquo icquin ëbi tantia —quetanquimbic: —Cho. Nidnu —cac ëbitedi puduanec nidondabi.

²⁰ Tsyuec nidshobini Petedon bidiaquin ispondash. Adshumbic: —Nëid Esusën tantiaidquio nec. Esus bedmiad inchëshën Esus aton cachochtsëqui uesho aidën: “¿Tsutsi cao, Icho?” capondash. ²¹ ¿Mitsipadec aid unëspatsiash? —queshun: —Ma nëid. ¿Mitsipadec unëspec? —capondash Petedon ëbi unëste Esus chuimequin. ²² Adoaquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquo icnu,” ëbi quiacpadec unësenquo ictsiash. Adecbidi: “Ëbi choabi icnuc ma unëspanu,” ëbi quiacpadec unëstsiash. “Nadec unësendac,” quequin mibi chienquo iquembique. Ënenquo icquin ëbi tantia —quepondash Esus. ²³ Adec: —Unësenquo ictsiash —Esus qesho tantiash ëbi caic: —Esusën tantiaidquio yec Uan unësenquo iquendac —quecuededpondash Esus tantiaquido. ¿Adenda Esusën chuidiondash? Ma padenquo iccondac. —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquo icnu,” ëbi quiacpadequien unësenquo ictsiash. “Adecbidi ëbi choabi icnuc ma unësnu,” ëbi quiacpadec unëstsiash —quequien iccondash.

²⁴ Aden Esusën nabanondaid ënquin chiombi. Ëmbi isondaaidquio chuiquin abimbo chuiquin aitedi dada uaombi. ²⁵ Esusën naidtedimbo chuiquin dada uambo iccombi. Ëmbi tantiaitedi naombi. Ambi naidtedimbo ambi chuibanaittedimbo chuiquin dada uaquin dada uate dadpenquioshë naimbudnetsiambi. Padi. Aitedi dada uaombi.

ESUS CHUIBENEQUIDON NAID

Esus aton Papan abuc indote

¹⁻² Ducas nebi. Mibi Esus tantiamenu, quequin ênden dada uaondambi, Teyopido. Esusên tauain ismebanaid bedanquin abi abuc indoaid dênainquin dada uaondambi. Abuc nidnun Esusên êbi chuibeneta quequin abêd icquido chuipanêdash aton Mayanên tantianubi. ³ Cuesten dectanac unêsash uincuenshun: “Uincuenobique. Is,” quequin Esusên utsi-utsien ismebampanêdash ma abimbo iquec quequin tantiaquin êbi chuibenepanueshun. Ushê abentsêc nidmequin utsi choaid abi choaqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusên chuided-chuidedpanêdash. ⁴ Aden ismequimbi Edusaden caid yacnoshon ambi êbi chuibeneta caidobêdan pec tabadquimbi Esusên nadopanêdash: —Edusaden yacno tabadquin êmbi chianeboed, con Mayan, Nuquin Papan mibi menetequid caimbudta. ⁵ Acten mentoanquid Uan pado icpondash. Padnuen êmbi chianeboed Nuquin Papan aton Mayan mibitedi menendac —quepanêdash Esus.

⁶ Adshumbic, padpidec Esusbêd icquin abêd icquidon: —Yuen matses utsibon namiaido nuquin matses nec. ¿Nêbimbobida mibi nuquin matses chuiquid dapa icpeque? Tantanu. Chui —capanêdash Esus chuiquin. ⁷ Adoaquien: —Nuquin matses chuiquid icmete ushê choaid tantiesa mibi nec. Nuquin Papanuidtsêqui tantiapadên adquid iquendac —quepanêdash Esus abêd icquido chiec. ⁸ Aden chuishumbic: —Aton Mayan Nuquin Papan meniac aidênquo tantiamequin pausunac êbi chuibenequidquio mibi iquendac. Edusaden caid yacnoshomba mimbi êbi chuibanendac. Adshumbic, nidaid Udeya caid yacnoshontsen êbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi êbi chuibanendac —quepanêdash Esus abêd icquido chiec.

⁹ Aden chuibanquin Esusên nabanquin nainanec macuêsh yacno choacsho aton Papan Esus abuc indopanêdash abêd icquidobêdan abi tantiaquid utsibon isbedednubi. Aden isec tabadnubi abu ushun Esus bêtimpanêdash.

¹⁰ Adec Esusbêd chobedo isec tabadnubien dashcute ushumbocquid dasiuidquid daêd choash tabadec: ¹¹ —Nidaid Cadidia caid yacnoêsh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanêdash ushumbocquid dasiuidquid abuc isbededquido chiec.

Matias Esus chuibeneta quequin iccuededquidon chiaid

¹² Aden Esus abuc indosho isash abêd macuêsh Odibos caid yacno chobedo Edusaden caid yacno nidoapanêdash. Chonoadtemaid ushê nec, quec aidtontsêqui capunêdash. Aido Edusaden yacno choash abuc quênê yacno abi tabadbocno dectatoash tabadoapanêdash.

¹³ Aid quênê nuntan Esusên êbi chuibeneta caido nêidted icpanêdash: nêidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Apepon mado Acobo cuêmêdquid, utsibic isadaidpembro namequin chuiquid bunesa, Simon cuêmêdquid, utsibic Acobo utsin mado Udas cuêmêdquid. Aidedi Esusên êbi chuibeneta caido aid quênê nuntan tabadnubi ¹⁴ utsibo Esusên tita yec Esus tantiaquid chido utsibotedi yec Esusên utsibo yec quec ambobidi iccuededquin Nuquin Papa chiec abentsêc onquiacbimboec onquecuededpanêdash.

¹⁵ Adashic Esus tantiaquid 120ted iccuedednubi nênantanquo nidtoshon Esusên êbi chuibeneta caid abentsêcshun Petedon naden chuipanêdash: ¹⁶⁻¹⁷ —Udas pado chuibanu. Tantiata. Esusbêd icquin piucquid dayun uaquid icquimbi Esus chieshênquido Udasên Esus bedmepondash. ¹⁸ Aden Esus bedmeshun ambi piucquid bedboed menequin aton tiedêmpi bedashic aid tied nantanuêsh têtaniadash pobidîsquish paêdec aton pucu tishidpac caondash. ¹⁹ Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuêmbededpondash. ²⁰ Adembidi êdenquimboshê Udas pado tishabicnuc chuiquin Nuquin Papan Mayanên tantiamiacpadomboen tsusedpa Dabid caidên Udas cuidte tantiec cuêdênte Sadmo caid naden dada uapampic:

“Ma adequi aton shubu mosadpanuna ma aibidi aton matses nibêdquid shubu icpanuna.” Aden Udas pado cuidte chuiquin cuêdênte Sadmo caid utsitsen naden Dabid Padon dada uaoapampic:

“Aidên icsain nacpaden tanenquiocquin ma utsin bêdamboen napanuna,” quequin Dabid padon dada uapampic —quepanêdash Petedo. ²¹ Aden chiashic abi onquec: —Udas pado nibêdnuc Esus chuibeneta quequin abentsêc nuquitedishun chuinuna. Nêid quênê nuntan nuquibêd capuquido dada dadpen iquec. Nuqui Esus chuibeneta caid

nadquid ictiad. Chuinu. Tantia. ²² Esus Uan padon acten mentosho isash niamēdenquio yec Esusbēd capucueneshun Esus indosho isquidquio icsho, Esus chuibeneta, quequin nuqui chuitiad. Adoac Esusēn ēbi chuibeneta caidobēdtan Esus uincuemiaid chuibantiad —quepanēdash Petedo iccuededquido chiec.

²³ Aden Petedon chuibanac daēd istuidash Petedobēd iccuededquido, Petedon chuibocpadquid nēid daēd iquec, quequin chuipanēdash aidon. Ambī istuidaid abentsēc Ose cashun Badshabas cashumbic Ustus, quequin cuēnaid nepanēdash. Utsibic, Matias cuēmēdquid icpanēdash. Nēid daēd Petedon chuibocpadquid nec, quesho tantiashun: —Nēnantanquio tabadec cho —cac abi daēdi choash tabadsho isash ²⁴ Nuquin Papa chiec nadecc iccuedquido onquepanēdash: —Nēnantanquio chomeboed nēid daēd iqueque. Is, Papa. ¿Mitsicquidimbi Esus chuibeneta, cape? Ēbitedi tantiname, Papa. ²⁵ Udas pado tauitidpambo chian anēdēnquiacno nidboedēn nauidaid namenu, quequin mimbi bēdamboen isaid abentsēc ēbi isme. Papa. Aden mimbi ismiac ma aidēntsen Esus chuibenepanuna —quepanēdash Nuquin Papa chiec. ²⁶ Aden chuitanquimbic aid daēd abi cuēmēdquid abentse-abentsen dada utatempin dada uashumbic tēchun sandoshon cadotaniac dada utatempin abia puduenaid istanquin, Matias cuēmēdquid nec, quequin isbededboshic, Esusēn ēbi chuibeneta caido onseted icboedi nēbi Matiasbēd doseted yanosh, quequin chuibededpanēdash nuntan iccuededquidtedishumbi.

2

Aton Mayan Esus tantiaquidtedi menebanaid

¹ Adashic isadaidbon ambi aton tiedēn caniquid abia ēshēaid bedaid tantiaid ushē chotsēcnubi Esus tantiaquidtedi shubunuēshi iccuededoapanēdash. ² Ambo iccuededquimbi badedquio shubu nuntan cunquequid dapa choec natiambo cunquiacbimboecsho abitedishun isbededpanēdash. ³ Aden aid isbedednubi cuēte dētsisidacsimboecquid budec mais-maisec Nuquin Papan Mayan matsadtocuededpanēdash abi isquidtedi. ⁴ Nuquin Papan ma aidobēd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanēdash ambi matsadtomiaidotedi.

⁵ Aden Nuquin Papan aton Mayan menenubien isadaidbo utsibo Edusaden yacno chochoash dadpen tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoēsh Edusaden yacno cho-chopanēdash. ⁶ Ambo chochoash tabadnubi Nuquin Papan aton Mayan meniaid-meniaidquiec nēmbobi choquidon onqueten-onquetenquiec onquesho tantiash nēbi cho-choboedo utsi-utsiec: ⁷ —¡Padtec! Dacuēdanquipoaic. Ēbipadquiecshenda onquepec. ¿Onquequidotedi nidaid Cadidia yacnocquidoda nepec? ⁸ ¿Mitsipaden con onquete bedash onquecuededpec nec? ⁹ Ēbitedi nidaid utsi-utsiec yacnoēsh cho-choquido nebi. Padtia yacnoēsh choquido; utsibic, Media yacnoēsh choquido; utsibic, Edan yacnoēsh choquido; utsibic, Mesopotamia yacnoēsh choquido; utsibic, Udeya yacnoēsh choquido; utsibic, Capadosia yacnoēsh choquido; utsibic, Ponto yacnoēsh choquido; utsibic, Asia yacnoēsh choquido; ¹⁰⁻¹¹ utsibic, Pidiquia yacnoēsh choquido; utsibic, Pampidia yacnoēsh choquido; utsibic, Equipito yacnoēsh choquido; utsibic, Dibia Sidene uidictēcūēsh choquido; utsibic, shubu dadpen icquid Doma caid yacnoēsh choquido; utsibic, acte nēnantan nidaid nacdēdquid Quideta caid yacnoēsh choquido; utsibic, Adabia caid yacnoēsh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ēbitedi nebi. Ēbibimboec onquequidtedishun Nuquin Papan naid chuibansho tantiambi. ¹² ¿Mitsipaden tantiaquin oncamiaquien adec onquepec? —quepanēdash Edusaden yacno cho-choquid.

¹³ Adnubien: —¿Bēdamboec onquepequida onquec? Paēmboquid cubudquin acshun tantienquiocquido nepanui —queoapanēdash utsibo.

Iccuededquido Petedon chuibanaid

¹⁴ Adec onquesho tantiashun Esusēn ēbi chuibeneta caido cho-choquin Petedon nido-tonshon tantiamenu quequin naden cho-choboedo comapenec onquequin chuipanēdash: —Mimbi icsamboen tantiaid chiembique. Tantiata. ¹⁵ Ushē abuctotsēcnubi ēbitedishun paēmboquid acamboccombi. ¹⁶ Utsin-utsinquec onqueten onquesho mimbi tantiaid Nuquin Papan ēndenquimboshē chiampicpadec onquec nebi. Tsusedpa Oedēmbi Nuquin Papan ma matsesbēd tabadnueshun aton Mayan menenun chiaid naden aidēn dada uampic:

¹⁷ Nēid nidaid naimbudnubi

Con Mayan matses utsi-utsien menendambi.

Aidon madobobēdtan aidon champibontsen ěmbi yuecquio icshun nanun chiaid chuibanendac.

Adembidi caniabontsen ushquin ěmbi chiacpaden isendac.

Adembidi tsusiobontsen ushquin ěmbi chiacpaden isendac.

¹⁸ Aden con Mayan meniac ambi tantiacpadomboembidi ěmbi chuiquin namiaidon dadan chidobēdtan

ěmbi yuecquio icshun nanun chiaidquiobidi chuibanoaindac.

¹⁹ Adembidi, con Mayanēn tantiamiac ěmbi yuecquio icshun nanun chiaid matsesēn chuibanubien abucuēsh uinsadpamboctequid icnubi

nidaidēnshun ismete intacimbocctequidbēdtabi nēdēnquetequid cuēte pushudquidbimbocctequid abembi pushudquidbēdta adquidtedi mibi ismendambi.

²⁰ Adquid icnubi badiadēn ushē chēnquenquiocnoc

inchēshacimbocctequid inchēshēn ushē piu-piupambo yec intacimbocesho mimbi isbedendac.

Ěmbi ismiaidtedi icambi matses cuidte ushē choendac.

²¹ Ismequimbi con Icbombo nec ěbi caquidquio mēnchiqendambi,ʹ

quequin Nuquin Papan chuimiapaden Oedēn dada uapampic.

²² “Adembidi Nuquin Papan chomiaid chiembique. Tantiata, isadaidbo. Nasaded caid yacnoēsh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac. ²³ Aidi Nuquin Papan tantiampicpaden Esus bedshun mimbi isadaidpembo chuiquid menequin, Unēs uata, cac cuesten dectanquin Esus unēs uapanēdash. ²⁴ Aden mimbi nac unēsacsho icsaisa chococacno yuec ictiapimbo iquec, qeshun Nuquin Papan Esus uincuemepanēdash. ²⁵ Adembidi ěndenquimboshē tsusedpa

Dabid padon Esus chuibanquin naden dada uapampic:

‘Con Icbo abuc nidac bēyucanquid ěbēd tsadacimbocesho isec nebi.

Aidi con dayun tsadquid icsho isquin natiaic cametequid dacuēdēnenquio iquendambi.

²⁶⁻²⁷ Aid unēsash uincuenta tantiec ěbitsen uincuenendabi, Papa, quec cuēdēnec bēdambo iquebi.

²⁸ Nuquin Papa yacno tabadacpadec nidaidēn tabadquin ismiac

mibi yacno nidash mibēdi tabadec bēdambohē iquebi mimbi camiaid iquendabi,ʹ

quequin Esus tantiaquin Dabid padon dada uapampic.

²⁹ “Adomboen tantiaquin dada uash Dabid unēsacsho chococapampid nēbi shēcuē iquec. ³⁰ Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshē yash mibi ěndenquimbo unēsampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. ³¹ Aden Nuquin Papan nanun chiaid tantiaquin Esus uincuenta isacimboben dada uaqin, Nuquin Papan Chomiaid unēsacsho chococaqui aton nami chodquenquio yec uincuenendac, quequin chuipampic Dabid padon. ³² Ai, Dabid padon chiampicpadembi Nuquin Papan Esus uincuemepanēdash. Aid uincuemiacsho isondaic icquin mibitedi chuibanec nebi. ³³ Aid uincuenash Nuquin Papan dayunquio tabadendac nēbi. Ambo choacsho matses tantiaquin Nuquin Papan Mayan ma aiddēd tabadneshun matses mimbi meneta, aton Papan capaden abi tantiaquidtedi menebanquiac onquete utsin-utsinquec onquesho nēbi mibitedishun tantiec. ³⁴ Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

‘Nuquin Papa Icbo Dapa icquin abipadquid icbo cain: Nēbi ěbēdi tsadec cho.

³⁵ Mibi chieshēnquido dēniacquidquio mibi icmenun nabono. Chiata,ʹ

quequin Nuquin Papan nanun chiaid Dabid padon dada uapampic.

³⁶ “Aden tantiaquin Dabid padon chuipampid Esus mimbi cuesten dectanquin unēs uaid uincuemequin matses icsaid bedshunash abided cuidadquid Nuquin Papan icmepondash. Adoac ěmbi chiaid abimbo iqueque. Esus tantiaquidquio iccta, isadaidbo —quepanēdash

Petedo.

³⁷ Aden Petedon chuisho tantiaish iccuededquido abi icsaid tantiec unēsquio yec: —

Esus tantianuequin ¿atotsi nuqui nape? —quepanēdash utsi-utsiec Petedobēdta Esusēn ěbi chuibeneta caid utsibo chiech.

³⁸ Adoquien Petedo: —Mibi icsaid ěnshun, Esus con Icbombo nec, quequin abimbo tantiaquin acten mentometa ma ěbi icsaid Nuquin Papa bēpiscudnu queshun. Adoacsho aton Mayan mibi menendac. ³⁹ Adembidi tantiaisho isun min tsyuecquidtsen menendac. Adembidi nidaidtedi yacnocquidēn tantiaisho isun aton Mayan meneoaindac ambi chiampicpaden —quepanēdash Petedo Esus isquidquio.

⁴⁰ Aden chuibanecqui: —Mimbi icsamboen tantiaid ěnta. Aden ěnash Esus tantiaquidquio iccta —quequin chuibudquin Petedon ěmpañēdash.

⁴¹ Aden chuisho tantiash, Tantiaquiemi, quepanēdash utsi-utiec. Aid ushēmbi dadpen-quioshē tedes midted Esus tantiaquid yampanēdash. Adquid icsho isun acten mentobampanēdash.

Esus tantiaquido iccuededaid

⁴² Adashic, Esus tantiemi, queboedo tantiabenabi iquec Esusēn ēbi chuibeneta caidon Esus chuibansho tantiec tabadequi Nuquin Papa chiec onquedenepanēdash. ⁴³ Adec tabadcuededsho isash: —¡Padtembo! Dacuēdampambo iquec —quec utsibo tabadpanēdash. Adnubien Esusēn ēbi chuibeneta caidon nadatiambocquin nabampanēdash. ⁴⁴ Adnubien Nuquin Papan aton Mayan meniaidtedi tabadcuenequi, Con na nec, quenquicoquin aton na cudasenquicopanēdash. ⁴⁵ Aton na menequin piucquid bedshun utsin na nibēdsho isun menepanēdash. ⁴⁶ Adecbidi badiadquidēn-badiadquidēnquiec Nuquin Papa tabadte shubu uashunaid yacno nidash iccuededpanēdash. Adecbidi shubu utsi-utiec yacno nidash iccuededquin Esus unēsaid tantiaquin panēmpi cuēsh-cuēshun peded-pededpanēdash. Adembidi bundoshon pebededoapanēdash. Adobanequi ēbi icsaid bedshunash Esus cuidadaid tantiec bēdambo iquebi, quec ⁴⁷ Nuquin Papan naid chiec cuēdēncuededpanēdash. Adec tabadsho isash, Bēdamboquido nec, quec utsibotsen Esus tantiaquid yanash abi tantiaquid utsitedibēd iccuededpanēdash.

3

Caputiapimbo icquid bēdamiaid

¹ Adnubien abi nidteniapadēn ushē budec 3 yanuc Petedo Uambēd Nuquin Papa tabadte shubu uashunaid yacno Nuquin Papa chiec nidpanēdash. ² Ambo nidnubien caputiapimbocquid aid shubu shēcuē Bēdaidquio caid yacno utsibon buampanēdash. Anin tishacchobi yec caputiapimbocquid icpanēdash. Aidi badiadquidēn-badiadquidēnquien buandenequin aid shēcuē cuēmano nanded-nandedac uequimbi cho-chosho isun: —¿Adabi piucquid menetsia? —cabampanēdash. ³ Ambo Petedobēd Uan chosho isquin: —¿Adabi piucquid menetsia? —capanēdash caputiapimbocquidēn uequin.

⁴ Adoquien Uambēd nidtuidash nidquin Petedon: —Ēbi daēdi is —capanēdash caputiapimbocquid bēisquin. ⁵ Adoquien, Ēbi menepashun, quequin abi daēdi isobien, ⁶ Petedon: —Piucquid con na nibēdec. Ēmbi tantiaidēn ēbi tantiamebocpaden naimbique. Nasaded yacno iccondaidēn Esusēn bēdamiacpader bēdanash nidtoash nidec nid —capanēdash. ⁷ Aden chuiquin caputiapimbocquidēn mēdante abiucquo bedtanquin Petedon nidtomiac bad-edquid nidtopanēdash caputiapimbochoedi. ⁸ Bēdambo yec nidtoash capupanēdash. Adec bēdanash Petedobēd Uan chedobēd capuashic Nuquin Papa tabadte shubu uashunaid puduedash, Nuquin Papan bēdamioshi, quec pudundotan-pudundotanec: —Cuishon —quepanēdash. ⁹ Adec capusho isquidon nadobededpanēdash: ¹⁰ —Nuquin Papa tabadte shubu uashunaid shēcuē, Bēdaidquio caid yacno uetsequi, Piucquid ēbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanēdash.

¹¹ Adec capuequi Petedobēda Uan mēdinec Sadomonēn tacpan quēnē uabicquid yacno puduednubien iccuededquid tsibanash anotsen tantiadempambo yec tabadoapanēdash.

¹² Adec tabadsho isun Petedon naden chuibampanēdash: —¿Atotsi quiash padtec quequin ēbi daēdi comapenen bēise? ¿Ēbi daēdshun nacta nēid capupadic? ¿Ēbi bēdamboquid icquindambi nadio? Padenquio. Nuquin tsusedpabon Papa caidēn bēdamiaid nec. ¹³ Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidēmbi ambi nidaidēn chomiaid Esus nēbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nēid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac. ¹⁴ Icsaisa nec, quequin utsin isnubi Esus bunenquicoquin icsaquid cuidenquicoquin nidme, quequin mimbī chuipondac. ¹⁵ Abia uincuentequid mibi chuiquid dapa mimbī unēs uacshobien Nuquin Papan aidi uincuempondash. Aid uincuenacsho ēbitedishun isondambi. ¹⁶ Esusēn ēbi bēdamepec, quequin tantiash nēid taē icsachodēn Esus tantiash capusho mibitedishun isec.

¹⁷ “Utsibo, Nuquin Papan chomiaid nec, quequin tantienquicoquin mibi chuiquidobēdan mimbī Esus unēs uamiondac. ¹⁸ Ēmbi matses chuiquid dapa icmenu caid matsesēn mēyanaid iquendac, quequin ambi chuimiaidtedi Nuquin Papan dada uamiampicpaden mimbī naondac. ¹⁹ Nēbi mimbī icsamboen tantiaid ēnquin Nuquin Papa tantia ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; ²⁰ adecbidi ma ambi chuiquid dapa icmiaid Esus mibi bedmenuen

chomepanuna. ²¹ Nuquin Papan abitedi icsaisa icmete ushë choabicnuc ambi chiampic-padequi nëbi Esus abuc aton Papabëd tabadec. ²² Adembidi chuiquin Moisesën dada uampid nad iqueque. Tantiata:

‘Chuiquid Dapa ëbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bëdamboen nabanta.

²³ Ambì chiaid tantiesà Nuquin Papan nësecaindac, quequin Moisesën dada uampic.

²⁴ ‘Adomboembidi Samuedën chuibampampic. Adomboembidi Nuquin Papan chuimi-aid utsibon chuibanoampic. ²⁵ Nuquin Papan chuimiaidon tsyuecquido mibitedi nec. Tsusedpa Abadauanën tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuoaid mibitedi nec. Naden Abadauan Nuquin Papan chuipampic:

‘Mibi ëndenquimbo unësampin aton matseshëdta matses utsi-utsien min tsyuecquidën bëdambo icmendac.’ ²⁶ Nuquin Papan Abadauan chiampicpadec aton tsyuecquid choacsho mimbi unës uapondac. Aidi Nuquin Papan uincuemiac ma isadaidbomba abi icsaid ënsho ma ambi bëdambo icmiaid icpanuna —quepanëdash Petedobëd Uan.

4

Ambi naid Petedobëdta Uan isadaidbo tsusiobon chuibamiaid

¹ Aden Petedobëdta Uanën chuibanubien isadaidbo tsusiobo cho-chopanëdash. Utsi-utsiec Nuquin Papa tabadte shubu uashunaid yacno cho-choquid bëdamboen tabadmequidquid icnubi utsi-utsiec saduseyobo icpanëdash. ² Esus unës uacsho Nuquin Papan uincuemiacpadembi matsessten unësacsho uincuemioaindac, quequin Esus chuibenequidon chuibanubi choapanëdash aid. ³ Choshon Petedo Uambëdta bedash: —Inchësheque. Badiadshun nëidën chiaid tantianush nidnu. Nid —quianec puduanquimbi Petedobëdta Uan quënen nauedmepanëdash isadaidbo tsusiobon. ⁴ Aid daëdi bedabicnuc Petedobëdta Uanën chuibansho tantiaquid Esus tantiaquid dada dadpen sinco midted yampanëdash.

⁵ Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoësh iccuededpanëdash. ⁶ Nèidtedi icpanëdash: ancanquid dapa daëd Anasbëdi Caipas icpanëdash. Nèidic aton shubun icquido abipadquido: nëidic Uan, utsibic Adecandedo, aitedi cho-choash iccuededpanëdash. ⁷ Iccuededshumbic Petedobëdta Uan bëmeshun nënantanquio nidtomeshun: —¿Ttsutsi chuiquin caputiapimbocquid bëdamio? —capanëdash tsusiobon.

⁸ Adoaquien Petedo Nuquin Papan Mayanën comapenen tantiamiac nadpanëdash: ⁹ —Caputiapimbocquid tantiaquin bëdamiaid isec ¿mitsipaden nao, quecta mibitedi tabadpe? Ancanquidbëdtabi chuiquid utsibo isadaidbo utsibo mibitedi chiembique. Tantiata. ¹⁰ Caputiapimbocquid Esuquidistu Nasaded yacno iccondaidën bëdamiaid niosh. Mimbi unës uacsho Nuquin Papan uincuemiaidën nac nëid caputiapimbocboedi nëbi nidtoash capusho mimbi isec. ¹¹ Aid bëdamequid mimbi tantienquid yaid Nuquin Papa yacno yuedanquid nec. ¹² Nuquin Papa yacno yuedanquid utsi nibëdec. Nuquin Papa yacno tabadte bunec aid tantiaquid icta —quepanëdash Petedobëd Uan.

¹³ Adec Petedobëd Uan dacuëdenquio yec comapenec onquesho tantiash tsusiobo: —Aid daëdi tsusiopenquid iquequi adecbidi Nuquin Papan chiampid tantiabenabicquid iquequi Esusbëd icquid aid daëd icquin ¿mitsipadomboen caputiapimbocquid bëdamepashba? —quec tantiadempambo yec tsusiobo tabadpanëdash. ¹⁴ Aden ambi bëdameboed aibbëdi icsho isash, Icsamboen mimbi naoc, quetiapimbo tsusiobo tabadpanëdash. ¹⁵ Adshun Petedo Uambëdta nidmiash, Tantiyan, quec onquecuededec tsusiobo: ¹⁶ —¿Mitsipadomboen aid daëd nuqui napeba? Nadatiambocquin nasho Edusaden yacnocquidtedishun isbededpash. Ad icnuc, Caputiapimbocquid bëdanambo iquec, ëbitedi quetiapimbo iquebi. ¹⁷ Dadpenshun tantianushe queshun, Esus padpiden chuibanoainda, quequin aid daëdi chuinuna —quecuededpanëdash tsusiobo. ¹⁸ Adshun Petedobëdta Uan chomeoashun: —Padpiden Esus chuibanoainda. Aidën chiaid chuiquin tantiamenda —capanëdash tsusiobon.

¹⁹ Adoaquien: —¿Mitsicquidën chiaid ëmbi natequid icpec? ¿Nuquin Papan chiaid niacquindambi mimbi chiapaden nadi? ²⁰ Nuqui isboed nuqui tantiaboedbidi chuitequidquid iquendac —quepanëdash Petedo.

²¹⁻²² Adoaquien: —Ëmbi chiapaden nainquiocsho isun mibi daëdi mëyantsiambique. Baded nid cueschitomane —capanëdash tsusiobon. Abi tishaid seta 40ted icquid caputiapimbocsho bëdamepanëdash. Aid Nuquin Papan bëdamiacsho isash utsibo cuëdëncuededpanëdash. Adsho tantiash Petedobëdta Uan mëyantiadquicboedi adotiapimbo yec tabadpanëdash tsusiobo.

Isadaidbo tsusiobon chiaid Esus tantiaquidon chuoaid Nuquin Papa chiaid

²³ Tsusiobon nidmiac nidash iccuededbcnombo choash puuedshun tsusiobon chuibod Petedobédtan Uanén chuoapanédash. ²⁴ Adoac abentséc onquiacimboen naden Nuquin Papa chuipanédash: —Con Icbombo mibi nec. Abubédta nidaid acte chedo uashun aidénquo icquidtedimbo mimi uabampampic. ²⁵ Adembidi éndenquimboshé mimi tantiacpaden min Mayanén tantiamiac mimi chuimiaid, Dabid padon naden dada uapampic: “¿Atotsieshumbini ébi dēniactiapimbo icquidombi isadaidpembo comapenec nēishash ébi dēniacte buncuededpec? Adquiecbidi ¿Atotsi quiash émbi chomiaid icsamboen nanushbimboec isadaidbo onqueuidoapec?”

²⁶ Ancanquidobéd chuiquid utsibo émbi chomiaid aton Icbobi mëyanuec iccuededec.”

²⁷ Ai, mimi Dabid pado dada uamiampicpadembi émbi Edusaden yacno isadaidpembo ancaquid daéd Edodesbéd Ponso Pidato icnubi isadaidbo chedo iccuededquin mimi Chomiaid icsaisa Esus icsa uanuec onquecuededpondash. ²⁸ Mimi tantiampicpadembi unés uapondash, Papa. ²⁹ Adquidén Petedobédta Uan chushcacho mimi tantioc. Cuesambocquid ébitedi icmequin mimi chiaid ébi chuibame, Papa. ³⁰ Icsaisan Esusén bédamiacpaden nadatiambocquin naban, Icho —quepanédash Esus tantiaquido Nuquin Papa caic.

³¹ Adoac abi iccuededacno ishucdpanédash. Adec ishucdnuc ambocquid Nuquin Papan Mayanén comapenen pausunac dacuédenuiocquin Nuquin Papan chiaid chuibampanédash.

Abentséc yacimboec tabadaid

³² Aden chuibanequi abentséc onquiacimboec tabadec Esus tantiaquido, Con na nec, quenquo yec, Nuquin Papan na nec, quec tabadcueneapanédash. ³³ Adequi tabadcuenequimbi dacuédenuiocquin, Esuquidistu uincuenacsho isombi, quequin chuibeneapanédash. Adec Esus tantiaquido tabadsho utsibon bédamboen isbededquin aidén chuibansho bédamboen tantiapanédash. ³⁴⁻³⁵ Adembidi nidaid icho utsin-utsinquien aton nidaid menequin piucquid bedshun Esus chuibenequido meneapanédash. Adembidi, shubu icho utsin-utsinquien aton shubu menequin piucquid bedshun meneoapanédash. Aden meniac aton na nibédquid icsho isun Esus chuibenequidon menebanac bunenquo tabadpanédash. ³⁶ Adecbidi ambo acte nēnantanquo nidaid nacnédquid shubu uaidēnshun Chipide caid yacnoshon tishad Edusaden yacno choash Ose tabadpanédash. Aidi, Bédamboen mimi naoque. Adobanta, quedenesho Bednabe cuēmpañédash. ³⁷ Aidémbi aton nidaid menequin piucquid ambi bedaidtedimbo Esus chuibenequido meneoapanédash.

5*Ananiasbéd aton chido Sapida muaid*

¹ Adnubien dada utsi Ananias cuémédquid aton chido Sapidabédtan aton nidaid menequin piucquid bedpanédash. ² Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniachimboen meneapanédash Ananiasén. ³ Adnubien, Piucquid abitedi meniachimboen Ananiasén mua uaposh, quequin Nuquin Papan Mayanén tantiamiac naden Petedon Ananias chuipanédash: —Satanasén tantiamiaid icquin ¿mitsipaden tantiaquin Nuquin Papan Mayanén isnubi mua uaquin ébi menio? ⁴ ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidedi mitsana niosh. ¿Mitsipaden tantiaquin piucquid abitedi meniachimboen meniano? Aden bēquin abimbo chienquiocquin Nuquin Papambobi mimi mua uaboc ⁵ —Petedo qesho tantianec Ananias unésequi uebudpanédash. Adsho isash Esus tantiaquidtedi dacuédpanédash. ⁶ Unésacsho isun dashcute cuēshēn dataneshun buanshun caniabon chococatampanédash.

⁷ Béné chococambic ushē abuctoan unésboedén chido aton bēné unésaid tantienquo yec choapanédash. ⁸ Choasho isumbien: —¿Ada min nidaid menequin nēidtedi piucquid bedo? —Petedo qesho tantianshien:

—Ai, aitedi bedombi —quepanédash Sapida.

⁹ Adoquien Petedo: —¿Nuquin Papan Mayanén ébi muasho tantiapec, quequin tantienquiocquina min bēnébédambi min piucquid abitedi meniachimboen meniano? Nēbi min bēné chococaboedon mibitsen buanendac —Petedo quenubic ¹⁰ Petedon tayumbi uebudec Sapida unésapanédash. Aidtsen unésacsho buanshun aton bēnébédtabi chococatampanédash. ¹¹ Adoac aid daédi unésaid tantias Esus tantiesatedi Esus tantiaquidobéd comapenec dacuédcededpanédash.

Bē-bēaidtedi bédanaid

¹² Adashic Sadomonén tacpan caid yacnoēsh Esus tantiaquido iccuedednubi Esus chuibenequidon nadatiambocquin nabampanédash. ¹³ Adomboen nabansho isash Esus

tantiesabo dacuëdec tacpan yacno chotiapimbo yequi: —Esus tantiaquido bédamboshë iquec —quecuededpanëdash. ¹⁴ Adec tabadequi utsi-utsiec dadpen dadabëdi chido Esus tantiaquido yampanëdash. ¹⁵ Adec Esus tantiaquid yanshun, Daicsaido Petedon bédamepec, quequin tantiaquin daicsaido bē-bēshun Petedo capuacno nambededpanëdash. ¹⁶ Adembidi dēuequidon Edusaden yacno daicsaid bē-bēnubi mayan icsan mëyanaido bē-bēoapanëdash. Aden bē-bēaidtedi bédampanëdash.

Esus chuibenequido tsusiobon quënëna nauedmiaid

¹⁷ Adnubien isadaidbo ancaquidbëd tsusio dapa utsibo saduseyobo caid isec otacquo tabadboedi matses dadpen Esus chuibenequido yacno cho-chosho isash nëishcuededpanëdash. ¹⁸ Adec nëishcuededshun Esus chuibenequido bedmeshun quënëna nauedmepanëdash. ¹⁹ Aid inchëshëmbi Nuquin Papan uaid mayan bēda choshon quënë shëcuë bētashaid bécadoquin abitedi puduemec: ²⁰ —Mibi puduemiombi que. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanota —quepanëdash Nuquin Papan uaid mayan bēda.

²¹ Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanotaic tabadoapanëdash aidtedi. Chuibanubien isadaidbo tsusio dapan abëd icquidobëdtambi tsusio utsibotedi cho-chomeshun: —Esus chuibanquido bedtan —cac ²² quënëna nauedaid puduenushe quequin isquido chuiquid isquiden isquien Esus chuibenequido nibëdec. ²³ Adsho isash choaquin: —Quënë shëcuë bédamboen bētashquin quënëna nauedaid puduenushe quequin isquido shëcuë cuëmano capusho isombi. Shëcuë bécadoash puduedshun isaquien ënden puduen-puduenac —quepanëdash quënëna nauedaid puduenushe quequin isquido chuiquid. ²⁴ Aden chuisho tantiaish isadaidbo tsusiobo: —¿Atodain nechítec? —quepanëdash Nuquin Papa tabadte shubu uashunaid isquido chuiquid chiec. ²⁵ Adnubien dada utsi choshon: —Mimbi quënëna nauedboedon Nuquin Papa tabadte shubu uashunaid yacnoshon chuibanooasho tantiombi. ¿Ada tantio? —capanëdash. ²⁶ Adoquin quënëna nauedaid puduenushe quequin isquido chuiquid capitan caidën ambi namiaidobëdtan tantiec nidshun bedtanquin bēoapanëdash. Matsesën cuënoten ëbi senushe qeshun mëyanenquiocquin Esus chuibenequido bēoapanëdash.

²⁷ Aden bëquin Nuquin Papa tabadte shubu uashunaid nuntan tsusiobo iccuedadacno yuedpanëdash. Bësho isash tsusio dapambo: ²⁸ —Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamebanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo. ²⁹ Adsho Esus chuibenequido utsibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi. ³⁰ Mimbi cuen dectanquin unës uaondaïd Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec. ³¹ Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna. ³² Esuquidistun nabansho isbempondambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiameoaic —quepanëdash Petedo.

³³ Aden Petedon chuisho tantiaish tsusiobo: —Icsambo iquec —quiash Esus chuibenequido cuesunete bupmanëdash. ³⁴ Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bédamboen isaid, Camadied cuëmëdquidën: —Chiata. Bëboedtedi buantan —cac ³⁵ buanambic: —Icsamboen nanushe qeshun bédamboen tantiaquiota. Aido cuesunete mibi buneque. Cuesunenushë chiat. ³⁶ Èdenquio utsi Teyudas cuëmëdquid icpondash. Aidi tsusio dapa icnequin chuisho tantiaish dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash. ³⁷ Adashien matses tambanta caid ushëmbi utsi Udas cuëmëdquid Cadidia yacno icnëdaïdbëd matses dadpen capupanëdash. Udashen cuesuniac abëd icnëdaïdtedi padpidec choenquio yec adecbidi udimbo nidanepanëdash. ³⁸ Adec umanuc buamboedo chuiquid nibëdanaque. Aidbëd icboedo mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnu badedquio ënëndac. ³⁹ Aido Nuquin Papan namiac chuisho mimbi ëmetiapimbo icquendac. Nuquin Papa chieshënushe qeshun aido nidmeta.

⁴⁰ Aden Camadiedën chiac: —Adonona —qeshun: —Buamboedo bēoata —cac bëacsho cueshcanten cuesmepanëdash. Aden cuestanquin: —Esus chuibanotaicsho yec nidtan —qeshun puduemepanëdash. ⁴¹ Puduemiac Esus mëyanaid tantiec nidequi abi chuibanasho mëyanaid yec bédambo iquebi, quec tabadpanëdash. ⁴² Adshumbic badiadquidën badiadquidënkien Nuquin Papa tabadte shubu uashunaid yacnoshon matses bëyucanquin

chuiquid, Nuquin Papan bédamboen isaidquo Esus nec, quequin chuibampanédash aidon. Shubu utsi-utsiec yacno nidshun adomboembidi chuibenepanédash.

6

Niante chidobo pete menebanquid icta caid

¹ Adashic badiadquidén-badiadquidénquie Esuquidistu tantiaquid dadpen-dadpenquiecanubí isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanédash. ² Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin èntiapimbo iquebique. ³ Niantebo meneta canuen nadquidquo istuidshun chuita. Nuquin Papan aton Mayan meniac tantiamiac bédamboec tabadsho mimbi bédamboen isaidquo istuidta. Adquid 7ted istuidshun, Niante chidobo pete menebanquid icta, cata. ⁴ Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanédash Esus chuibenequido.

⁵ Adoaquien: —Mimbi bédamboen chioc —quepanédash Esuquidistu tantiaquid utsibo. Aidén chuibocpadembi aidtedi istuidpanédash. Nèidic, Nuquin Papan Mayanén pausunaid, ambi chiacpadamboen Nuquin Papan naindac, quequin tantiaquidquo Este-ban cuémédquid; utsibic, Uedipe; utsibic, Pèdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuémédquid. ⁶ Aidtedi istuidshun Esuquidistu tantiaquid utsibon aido bédamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nèidted bédamboen nameta, Papa, quequin Esus chuibenequidon chuipanédash.

⁷ Adashic Edusaden yacnoshon Esus chuibenequidon Nuquin Papan chiaid chuiban-chuibansho tantias utsi-utsiec Esuquidistu tantiaquid dadpen yampanédash. Adecbidi isadaidbo tsusiobo dadpen bédamboen tantias Esuquidistu tantiaquido yampanédash.

Esteban bedaid

⁸ Adnubien Nuquin Papan Mayan meniaidénquo. ambi comapenen tantiamiaidénquo, Estebanén nadatiambocquin ismepampanédash. ⁹ Aden nadatiambocquin ismenuc bédamboen tantienquo yec utsibo comapenec onquecuededpanédash. Nèidic, Sidene yacnoèsh choquido; utsibic, Adecandedia caid yacnoèsh choquido; utsibic, Sidisia caid yacnoèsh choquido; utsibic, nidaid Asia caid yacnoèsh choquido aidtedi Edusaden yacno cho-choash tabadec Estebambéd comapenec onquepanédash. ¹⁰ Comapenec onquequin Esteban Nuquin Papan aton Mayan meniaid icsho aidén comapenen tantiamiac onquesho dèniaquec utsibo onquetiapimbo icpanédash. ¹¹ Onquequin dèniactiapimbo icquin utsibo naden aidon chuipanédash: —Tsuosiobo naden chiec nidtan: Estebanén nuquin tsusedpa Moises caidén dada uampidbèdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanédash. ¹² Aden chiac tsusiobobéd Moisesén dada uapampid paquiacquidobéd isadaidbo utsibotedi nèishcuededshun Esteban bedshun tsusiobo iccuededacno buanquin yuedshun ismepanédash. ¹³ Ambo abi dèniactiapimboquidon Esteban muaquin chuita caboedon naden chuibededpanédash: —Nèid dada Nuquin Papa tabadte shubu uashunaidbèdta Nuquin Papan Moises dada uamepampid ènenquiocquin muaquin chuibanec. ¹⁴ Naden Estebanén chioshe. Tantia: Nasaded yacno iccondaidén, Esuquidistu caidén Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidén dada uampid naden nata quequin chiaid natiapimboctequid nec, quequin Estebanén chuibanosh, quequin muaquin chuipanédash Esteban dèniactiapimboquidon chomiaidon. ¹⁵ Aden Estebanén chiaid muaquin chuiquin naimbudquimbi tsusiobobédambi comapenen Esteban bèsiquin Estebanén bètantiatie ushèbimboec ushumbo yec chènquesho isbededpanédash.

7

Estebanén chuibanaid

¹ Adec Estebanén bètantiatie ushèbimboec chènquesho isec tsusio dapambo Esteban chuiquin: —¿Abimboda mimbi naid chuiposh? ² —caquien yuecquido onquequin Estebanén naden chuipanédash: —Chiembique. Tantiaquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uèshèmbo yec dasiuidteniaid matsesén isternaid bèchomaanquieq icquid Abadauan ismepampic. ³ Aden ismec nadec onquepampic: “Min utsitedi nianec nidaid utsi yacno mibi èmbi ismenu caid yacno nidta.” ⁴ Adsho tantias Candeyabon nidaid yacnoèsh nidashic

nidaid Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic. ⁵ Aden chomeshun Nuquin Papan naden Abadauan chuipampic: “Nëid nidaidën mibi capuacno mitsanapenquio nec. Yuceshun mibi menenun nanuna. Mimi tishmiambocboedi min chidon tishaid abentsëc min madombo nëid nidaid menendambi. ⁶ Nëid nidaid bedabi yec mimi tishmiaidën tishmiad caidaido mates utsibon nidaidën tabadendac. Ambo tabadshobi anocquidën aido yuashun seta dadpen 400ted matamequin mëyanendac. ⁷ Adoacsho aidotsen cuidquin mëyanoaindambi,” quepampic Nuquin Papa. Adashic abi Nuquin Papa onquec: “Min madon tishmiad caidaido abi mëyanacnoësh nidashic nëid macuësh yacno choshon ëmbi chiapadomboen nabanendac.” ⁸ Aden chuishumbic, Nidaid menenun nanuna, quequin Nuquin Papan naden Abadauan chuoapampic: “Dada bacuëbëdta dada caniaidtedi shui dëbid dëtemeta. Adobansho isun, Èmbi chiaid bédamboen naquidquo aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanën ambia dëtemeshun dadedi aidëmbidi shui dëbid dëtemeoapampic. Adoshombic yuecquo icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic adembidi Isaquën aton mado tishacsho Acobo cuënquin aidtedecbidi ushun Isaquënsen Acobon shui dëbid dëtemeoapampic. Adoshombic, canishun Acobon tishmi-aido 12ted icpampic. Abentse-abentsen tishmeshun aidtedecbidi ushun aton madon shui dëbid dëtemeoapampic. Adoquien yuecash Acobon madotedi tsusiobudnepampic — quepanëdash Esteban isadaidbo tantiamenu quequin chiec.

⁹ Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquo icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid Ose meneoapampic. ¹⁰ Adoac, Yuanu, qeshun natiamiaid Ose icsho isun Nuquin Papan aid dayun uaqin dacuëdenquo icmequin comapen tantiaquidquo bédamboen chuiquidquo Ose Nuquin Papan icmepampic. Adquidquo icsho isun Equipito yacnocquido ancaquidën Padaon caidën Equipito yacnocquido chuiquidquo Ose icmepampic.

¹¹ “Yuecash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquiec yampampic. ¹² Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiambique. Bedtan,’ cac Osen utsibo aton papan chiapadec pete bedec nidanepampic. ¹³ Adanec Acobon madotedi aton utsibo Equipito yacno choacsho isun, Min utsi nëbi, quequin chienquicpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nëbi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquicboedëmbi Padaonën tantiabempampic. ¹⁴ Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. ¹⁵ Adashic, Equipito yacno yuec tabadashi tsusio budashi Acobo unëspampic. Auëshquibidi nuquin tsusedpabo Acobon madotedi adecbidi unësoapampic. Unëscasho Equipito yacno chococapampic. ¹⁶ Adashic, yuecquo yash Equipito yacnoësh nidquin unësaidon tishmiad caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

¹⁷ Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuipampid ushë chote anoentsëc yanuc nuquin tsusedpabo dadpen yanec caidpampic. ¹⁸ Dadpen caidsho isun Equipito yacnocquido ancaquid utsin Ose pado tantienquo icpampic. ¹⁹ Aidëmbi mua uaqin chuiquin natiamiaid nuquin tsusedpabon dada bacuë tishacsho bedtemaid nec, quequin nemepampic. ²⁰ Adnubien dada bacuë Moises tishacsho Nuquin Papan, Aid bédaidquo iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquicquin aton mado Moises anin ompopampic. ²¹ Ompoqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. ²² Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito

yacnocquidon naidtedi naquin aidèn chiaidtedi Moisesèn tantiabenquiopampic.

²³ “Adashic, Equipito yacnocquidobèd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesèn istuidpampic. ²⁴ Istuidnubi Equipito yacnocquid dada abentsècshun isadaidbo dada abentsèc mèyanquin cuesunesho isun Equipito yacnocquid cuidnuequin Moisesèn cuesuneopampic. ²⁵ Èmbi adoshu isun, Equipito yacnoèsh nuqui bēyucanquin buanquid Moises nendac, quequin con matsesèn tantiapatsiash, abibi quetsècqueic nidnubi aton matsesèn tantienquo icpampic. ²⁶ Badiadash aton matses yacno padpidec nidquin aton matses daèd cuesnansho istuidshun, Èmenu, abibi quec choquimbi: ‘¿Atotsi quec min matseshèd cuesnane?’ Moisesèn catuidpampic. ²⁷ Adoquien Moises cuèscatanec: ‘¿Èmbi nasho cuidquin èbi chuiquid tsuntsin mibi icmioshe? Chui. Tiantianu,’ quetanequi: ²⁸ ‘¿Equipito yacnocquid mimbi cuesunebocpadenda èbitsin cuesune?’ quepampic cuesunquid Moises caic. ²⁹ Aden chuisho tantiashien, Equipito yacnocquido ancaquidèn tantianushe quianec dacuèdec Equipito yacnoèsh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuè daèd tishmepampic Moisesèn.

³⁰ “Adashic, seta dadpen 40tedbidi matamec nidaid Madian caidèn tabadec cuètempiuidquo yacno matses nibèdqueic yacno macuèsh dapa Sinai caid anoentsèqui Moises chopampic. Ambobi tabadquimbi cuètempi nēdēnquiacbimboecquid nēnantanquo Nuquin Icbon Chomiaid tabadsho Moisesèn ispampic. ³¹ Aid istanequien tantiadempamboctequid nepanushe. Isbono, quianec anoentsèqui Moises chosho Nuquin Icbon naden chuipampic: ³² ‘Min tsusedpa Abadauanèn Papa cain cuènaid nebi; min tsusedpa utsin Isaquèn Papa cain cuènaidbidi nebi; min tsusedpa utsin Acobon Papa cain cuènaidbidi nebi,’ quesho tantiash dacuèdec uèdèdec istiapimbo yec Moises nidtuidpampic. ³³ Nidtuisho isec Nuquin Icho Moises chiec nadpampic: ‘Nēmbo èbi icsapenquo icquid icnuc caputemaid nidaid iqueque. Min tapucudte chichshun tantiata. ³⁴ Min matses èbi cudasaido Equipito yacnocquidon mèyanac uèshquec shubiquisho tantiashun aido Equipito yacnoshon buanta mibi canec chobi. Nēbi Equipito yacno mibi nidmeoaimbi,’ quepampic Nuquin Icho Moises chiec.

³⁵ “Aden cuètempi nēdēnquiacbimboecquid nēnantanquo icboedèn Nuquin Papan Chomiaidèn isadaidbo bēyucanquin buanquid icta cac: ‘¿Èmbi naid icsho cuidquin èbi chuiquid tsuntsin mibi icmioshe? Chui. Tiantianu,’ abi caondaido bēyucanquin buanquid Moises icpampic. ³⁶ Adquid Nuquin Papan icmiac Equipito yacnoshon aton matses bēyucanquin buanquin Moisesèn nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeopampic. Adoshombic, matses nibèdqueic yacno seta dadpen 40tedbidi matamec abi tabadcueniachoshontsen nadatiambocquin nabanquin isadaidbo Moisesèn ismeopampic. ³⁷ Aidēmbi naden chuipampic: ‘Yuecquo icshun èbipadquid mimbi tishmiaidèn tishmiaidon caidaid Nuquin Papan chuiquidquo icmendac,’ quequin Moisesèn chuipampic. ³⁸ Isadaidbo bēyucanquin chuiquid Moises matses nibèdacno isadaidbobèd macuèsh dapa Sinai caid yacno choash Nuquin Papan chomiaidobèd Moises tabadpampic. Ashunquo Nuquin Papan abèdi tabadte tantiamenuequin cuènote pada-padamocquidèn ambi naden nata quequin dada uaid Moises menepampic. ³⁹ Aden aid dada uaid bedshun bēyucanquin chuisho tantiesha yanec nuquin tsusedpabo Moises bunenquo yec Equipito yacno nidoate bumpampic. ⁴⁰ Adashic, Moises macuèsh yacno yuecquo tabadnubi Moisesèn utsimbo Adon cuèmedquid aton matses utsibon naden chuibededpampic: ‘¿Moises nuqui Equipito yacnoshon bēyucanquin bēboed mitsi nidpash nec? Nibèdpequien iquec. ¿Atotsi quec nidpash? Nuquin Papan uacpadquiocnoc nacentia. Nacnenash bēyucanquin chuiquid aid iquendac,’ tsusedpabon cac ⁴¹ bacan bacuèbimbocnuc Adonèn nacnempampic. Ambi nacnenaid tantiaquin isadaidbon nidaidèn capuquid yua cuesuneshun cuèdēnēmbodedpampic. ⁴² Adquid cuèdēnēnsho tantiash isadaidbobèd ictiapimbo iquec Nuquin Papa, Padi. Adenda, quenquo icpampic. Adquid Nuquin Papan èndenquimbo tantiaquin naden chuipampic: ‘Adomboen mimbi nacnenaid tantiec tabad.’ Adembidi Nuquin Papan yuecquo icshun nanun chiaid isadaidbo chuiquin naden dada uamepampic:

‘¿Matses utsi nibèdquo yacnoshon seta dadpen 40ted matamequin èbi tantiaquinaid nidaidèn capuquid yua cuesuneshun pambid tauidenio? Padenquo.

⁴³ Èmbi uaid badiadèn ushè, èbitedishun bēyucamembi, queshun aidpadquid nacnenshun Modoc cuènquin aton shubumpi nuntan namposh.

Aidbèdtabi uspa dapatsen èbitedishun bēyucamembi, queshun aidpadquidbidi nacnenshun Dempan cuènec danèshèn sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caid nidaid yacno mibi nidmenquo icquin nidaid utsi, Babidonia caid udi mibitedi nidmeoaindambi.’

Aden ambi chiaid niacquido isadaidbo tantienquo icquidobi Nuquin Papan chuipampic —quepanëdash Esteban isadaidbo chiec.

⁴⁴ Aden chiec yuec onquebudec: —Matses utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpademi isadaidbon Nuquin Papa tabadte shubu uashumpampic. ⁴⁵ Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquo shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. ⁴⁶ Aidi Nuquin Papan bëdamboen isaidquo aid nidaidën tabadquin Nuquin Papa tabadte buantiapimbocquid shubu uashuntiadquicoquin shubu uate bë-bëmepampic. ⁴⁷ Aid shubu uabi Dabid unësambi ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. ⁴⁸ Aden matsesën shubu uaidën Nuquin Papa tabadenquo iquec. Adembidi Nuquin Papan chuimianaidën naden chuipampic:

⁴⁹ “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic? ¿Nidaidënuidi tsadpectabi tiboquendac?

⁵⁰ ¿Tauaquiouimbi abitedi uambodambi ictionda?”

quequin Nuquin Papan chuimianidën dada uapampic —quequin chiashic Esteban abi onquec: ⁵¹ —Pacuënëdacbimboen Nuquin Papan chiaid tantiash icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpademi mibitedishun chieshënoaic. ⁵² ¿Nuquin Papan ambi yuecquo icshun naden nanuna quequin chiaid ambi chuimiantedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac. ⁵³ Nuquin Papan chiaid ambi uaidon mayan bëdabon meniaqui Nuquin Papa chieshënquido mibi nec —quepanëdash Esteban isadaidbo chuiquin ënec.

Esteban se-siaid

⁵⁴ Adec Esteban onquesho tantiashun nëishënshun Esteban iccuededquidon chushcapanëdash. ⁵⁵ Adoaquien Nuquin Papan Mayan meniaidquo icquin Estebanën abuc isquin Nuquin Papa uëshëmbo yec matsesën istiapimbo bëchomaoanquiec ictequid abichobi dasiuidteniaid chënquenubi Nuquin Papabëd tancandaëdquiec Esuquidistu nitudidsho ispanëdash. ⁵⁶ Aden isequi: —Abuc shëcuë uaid shëcniaye. Is. Umbo Esuquidistu, matsesondaid, Nuquin Papabëd tancandaëdquiec tsadsho isembi —quepanëdash Esteban.

⁵⁷ Adsho tantiash tsusiobo comapenec sidquianec pamumëdanec titinguequin Esteban bedshun ⁵⁸ cuënoten se-senuen shubu nibëdacno udi buampanëdash. Aden Esteban buanshun aton dashcute Saudo cuëmëdquidën taëno sampanëdash Esteban se-senuequidon.

⁵⁹ Sanshun se-siaquic Estebanën Esuquidistu cuënquin naden chuipanëdash: —Ëbi yued, Icbo —quiashic, ⁶⁰ danëshën sebudash comapenec nadec onquec: —Ëbi se-sequido icsaid cuidenquo yec bëpiscudta, Icbo —quepanëdash. Adec onquetanec Esteban unëspanëdash.

8

Saudon Esus tantiaquido mëyanaid

¹ Esteban se-senu caquien, Ai, adota, quiash isec uano Saudo tsadpanëdash. Esteban se-siaid ushëmbi Edusaden yacnoshon Saudon Esus tantiaquid utsi-utsien comapenen mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash. ² Adnubien Nuquin Papan chiacpadomboen naquin Esteban chococaic comapenec sedenquec shubipanëdash. ³ Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmepanëdash.

Samadia yacnoshon Esus chuibanaid

⁴ Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepanëdash. ⁵ Adembidi niente chidobo aton na nibëdsho menequid, Uedipe cuëmëdquid nidaid Samadia caid yacno choshon adembidi Esus chuibanoapanëdash. ⁶ Aidën nadatiambocquin nabanquin Esus chuibanasho ambocquido

iccuededquin bēdamboen tantianpanēdash. ⁷ Aidēmbi nadatiambocquin nabanac mayan icsa dadpuuedaid icboedi mayan icsa sidquianec cuempanēdash. Adecbidi canite icsaidbēda caputiapimboquid dadpen bēdampanēdash. ⁸ Adsho isash Samadia yacnocquido, Bēdambo iquebi, quec tabadpanēdash.

⁹ Adnubien Samadia yacno ēnden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuēmēdquidēn nabampanēdash. ¹⁰ Adosho isash: “jEee! Abimboshenda caposh. Nēid dada Nuquin Papan ambi nadatiambocquin nabante tantiamiaid nec,” quequin anocquidobēdtan abi chuiquidon comapen-nen tantianpanēdash. ¹¹ Aden yuen Simonēn ismiac, Isnuequid dadpen badiadquidēn-badiadquidēnqueic abi yacno choash iccuededpanēdash. ¹² Adnubien, Nuquin Papa yacno puduedmianquid Esus nec, quequin Uedipen chuibanasho tantiaquid yampanēdash dadabēdi chido chedo. Adsho aidtedi acten mentomepanēdash. ¹³ Simontsen: —Esus tantiaquid nebi —quesho acten mentoauqui Simon Uedipebēd capuquimbi Uedipen nadatiambocquin nabansho isun, Adopenshenda nabanec, quequin ispanēdash Simonēn.

¹⁴ Adashic yuecash Samadia yacnocquido Edusaden yacno nidash nadpanēdash: —Nuquin Papan chiaid Samadia yacnocquidon tantiabededec. Aden chuisho Esus chuibenequidon tantiaishun Uambēda Petedo Edusaden caid yacnoēsh nidaid Samadia caid yacnoshon nidmepanēdash. ¹⁵⁻¹⁶ Adec aid daēd nidaneshun: —Esus tantiaquid acten mentoaidouidi nēidtedi nec —anocquido quesho tantiaishun: —Nēidtedi min Mayan mene, Papa —quec onquequin ¹⁷ Petedobēdtan Uanēn mēdanten Esus tantiaquido mamishbampānēdash. Aden mamishbanubi aidtedi Nuquin Papan aton Mayan menepanēdash.

¹⁸ Aden Petedon nasho isash Simon: —Ma adquieci mēquiadnueshun mibi piucquid menenu. ¹⁹ Mimbi mases mamishacpadembi ēmbi mamishaidtedi ma Nuquin Papan Mayan meniaid icpanuna —quepanēdash.

²⁰ Adoaquien Petedo: —jPiucquid menecta mibi mēquiadpe? Adoquin mimbi tantianuc tauantiadpambo chian anēdēnquiacno ma mibēdi min piucquid icpanu. ²¹ Mimbi Nuquin Papan chiaid icsamboen tantiaquin ēmbi nacpadomboen natiapimbo mibi iquendac. ²² Mimbi icsamboen tantiaid ēnta. Aden icsaid ēnsho isash Nuquin Papa mibi icsaid bēpiscudendac. ²³ Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

²⁴ Adoaquien: —Ēbi tauantiadpambo chian anēdēnquequid nēnenushe quiash mibi Uambēd Nuquin Papa chiec bēdamboec onquebudneta —quepanēdash Simon.

²⁵ Adec Samadia yacno tabadquin Petedobēdtan Uanēn: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuiopanēdash aidēmbidi.

Uedipe Etiopia caid yacnocquidbēd icaid

²⁶ Adehombic, Samadia yacno Uedipe icsho Nuquin Papan uaid mayan bēdan nadopanēdash: —Nēuēshquio puduanec nidec Edusaden datambidanec acte dapa yacno shubu dadpen icquid Casa caid yacmi mases nibēdacno podquedēn nidash nidtuidtanec chotan.

²⁷ Adoac nidtoanec nidquimbi Nuquin Papan uaidēn mayan bēdan chuibocno choquin Etiopia caid yacnoēsh choquid Uedipen bēqueduidpanēdash. Ancanquid chido Candase cuēmēdquid aton na dayun uashunquid aid dada nepanēdash. Aidi Edusaden yacno nidash tabadquin Nuquin Papa chianec ²⁸ padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanēdash. ²⁹ Adnubien Nuquin Papan Mayanēn: —Nidaid cano chinunta —cac ³⁰ Uedipen titinquequin chinumpanēdash.

Aden Etiopia yacnoēsh choquid dada uaid isec onquesho isash: —jIsbanec onquequina tantiaquie? —quepanēdash Uedipe.

³¹ Adoaquien: —Tantiamequid nibēdnuc jmitsipadentsimbi tantiape? Ēbēdi antsadtoc cho —cac Uedipe abēdi antsadtapanēdash.

³² Aidbēdi antsadtoshon Etiopia yacnoēsh choquid Nuquin Papan dada uamiampid isec onquesho Uedipen naden tantianpanēdash:

“Obeca cuesunenuen nimbambocpadomboembidi mētaneshun nimbanoaposh Nuquin Papan chomiaid unēs uanuequin.

Adecbidi obeca bacuē abi datasnuequid icnuc cuēdenquio yacpadec abi unēs uanuequid icnuc cuēdenquio icoaposh Nuquin Papan Chomiaid.

³³ Aidi Icsaisa icsho mēyansho isec, Icsambocquidta neque. Isnu, quenquiocposh aton mases.

Aidi chido inesa yec ambi tishmiaid nibēdnuc jTsuntsin ambi naid chuipadic?”

³⁴ Aiddtedtsëqui abi isec onqueboed Uedipe ismeshun Etiopia yacnoësh choquidën: — Èbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibaneeque? Èbi chui. Tiantianu —capanëdash Etiopia yacnoësh choquidën Uedipe chuiquin.

³⁵ Adoaquien, Matsestedi icsaid bedshunash abided cuidadec Esus unësaid Nuquin Papa yacno puuedmianquid nec, quequin dada uapampidën chiech, quequin Etiopia yacnoësh choquid tantiamenuen chuibanpanëdash Uedipen.

³⁶ Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

³⁷ Adoaquien Uedipe: —Esus tantiaquidquo nebi, qesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —queshun Etiopia yacnoësh choquidën: ³⁸—Nidtuid —cac nidaid cano nidmequidën cabayo nidtuidmian acte budshun Etiopia yacnoësh choquid Uedipen mentopanëdash. ³⁹ Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquo yequi, Esus tantiec bëdambo iquebi, quec Etiopia yacno nidoapanëdash.

⁴⁰ Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

9

Saudon tantiate paucaid

¹ Adnubien Edusaden yacnoësh Esus tantiaquid utsi-utsiec nidanenubien Saudu Edusaden yacno tabadpanëdash. Ambo tabadec chushquec Esus tantiaquidtedi cuesunemeti-adquo yec isadaidbo chuiquid dapabo yacno Saudu choash ²shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun èbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquidu chuipanëdash Saudon.

³ Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudu dëcatepanëdash. ⁴ Aden dëcatiac Saudu paëdash uesho isun nadece abucuësh onquec: —Saudu, ¿atotsieshun èbi tantiaquido mimbi mëyampeba? Èbitsen mëyantiadpambocquin mimbi aido mëyanec —quepanëdash.

⁵ Adoaquien: —Icho, ¿Ttsusi mibi ne?

⁶ Adoaquien: —Mimbi mëyanaid Esus nebi. Èmbi chiaid chieshë nec mibi tabadeque. Nidtoash Damasco yacno nidtan. Anoshon èmbi nata cacpadomboen anocquid mibi chuimembique. Nidtan.

⁷ Adec abucuësh onqenubi Saudobëd cho-choquido nidtuidshun tantiequi onquequid isenquo yec tabadtuidpanëdash. ⁸ Onquec ènëdan nidtoash Saudu istiadquio iquequi bëshupanëdash. Adsho isun mëdianquin Damasco yacno buampanëdash. ⁹ Adequi Damasco yacno choash 3tedec ushec isenquo yec buna mëmunquiec Saudu tsadpanëdash.

¹⁰ Adashic, Saudu puueddash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tandia—caquien:

—¿Atoda? Nëbi uebi, Icho —quepanëdash Ananias.

¹¹ Adoaquien: —Nidtoash podqued cuembocquid caid yacno nidtan. Ambo choash Udasën shubun puuedshun shubu dadpen icquid Tadso caid yacnoshon tishaid Saudu cuëmëdquid Nuquin Papa chiech onquec tsadsho mimbi istuidendac. ¹² Adec aid ushacimboc tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanëdash Esusën.

¹³ Adoaquien: —Con matses dadpeshun Saudon naid icsa chuibanasho tantiombi, Icho. Aidëmbi Edusaden yacnoshon mibi tantiaquido mëyamepac caoshe. ¹⁴ Aiddidi Edusaden yacnocquido chuiquid dapanquo dada uaid sananquin nëmbotsen mibi tantiaquido bedmeshun tanemenuc aidi chopac caosh —quepanëdash Ananias Esus chiech.

¹⁵ Adoaquien: —Aidi èbi chuibeneta caidquio icmeshun èmbi bëdamboen isaid neque. Aid dacuëdënenquo yec nidshun istanta. Aidën isadaidbo abi chuiquidobëdta isadaidpëmbo abi chuiquidobëdtabidi èbi chuiben-chuibenece capuendac. ¹⁶ Èbi chuibenesho mibi mëyantequid iquendac, quequin Saudu tantiamembi —quepanëdash Esus.

¹⁷ Adsho tantianec Ananias nidash Udasën shubun puuedshun Saudu mamishec: —Con utsi, mibi podquedën chosho chuiquidën Nuquin Ichonquo, Esusën mibi padpiden

ismenuen Nuquin Papan Mayan mibi menenuembidi chomiaid nebi —quepanēdash Ananias Saudo chiech.

¹⁸ Aden Ananiasēn chuinubi nuēcquid bitsibimboecquid ēshēnuēsh paēdnubi bēshuacboedēmbi, Saudon, bēdamboen ispanēdash. Aden isec capusho isun acten mentopanēdash. ¹⁹ Adecbidi Saudo penquio yec padishacboedi piash padpidec uidēncuenoapanēdash.

Damasco yacnoshon Saudon Esus chiaid

²⁰ Adeccuidēncuenash Saudo Esus tantiaquidobēd tabadpanēdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipanēdash Saudon. ²¹ Aden chuisho tantiaish tantiadempambo yec tabadec: —¿Edusaden yacnoshon Esus tantiaquido mēyameboedida nec? ¿Adecbidi nēmo choshon tanemeshun isadaidbo Edusaden yacnocquido chuquid dapabo yacno buamenuc choabida ictic? —quepanēdash Damasco yacnocquido.

²² Aden anocquidon tantianubi Nuquin Papan Mayanēn oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon compenen chuided-chuidedpanēdash.

Isadaidbo Esus tantiesa abi cuesunete bunsho isash Saudo cuenaid

²³ Adembididi yuec ushquin Saudon ēnenquioquin chuibansho tantiaish, Icsamboen chiech, quiash isadaidbo utsibo yec abi cuesunete bunsho isun tantiaquidēn chuisho Saudon tantianpanēdash. ²⁴ Adnubien Saudo cuesunenuen shubu dadpen icquid abichobi tsicatequin daquēnē uaidēn shēcuē cuēmanoshon abi chieshēnquidon caimpanēdash Saudo puduensho bednu quequin. ²⁵ Aden cainsho isun Saudo cuesunenushe qeshun chiac inchēshēmbi onquenquioquin tsitsan dapan Saudo antsaduntanquin tsicatiaid quēnē cachoc Saudo budmepanēdash.

²⁶ Budanec Saudo Edusaden yacno nidoash Esus tantiaquidobēd tabadnuesho isash, Saudon mua uaqin ēbi bednushe quiash dacuēdcuededpanēdash aido. ²⁷ Adnubien, Saudobēd Esus tantiaquid utsitedi yacno choshon Bednaben yuedpanēdash. Aden yuedshun: —Saudon Damasco yacno nidquin Nuquin Icbo ispac caosh. Nuquin Icbo Saudobēd onquepac caosh. Adanec Damasco yacno choshon dacuēdenquioquin Esus chuibampac caosh, quequin Saudon naid Bednaben chuibampanēdash. ²⁸ Aden Bednaben chuibanac Esus tantiaquido Saudo dacuēdenquioquinobidi aidobēdi capuquin Saudon anoshombidi Esus chuibanapanēdash. ²⁹ Ambo capuquin isadaidbo quidiecon onqueten onquequido istuidshun Saudon adembididi Esus chuibanacsho tantiaishun aid cuesunenuquin aidontsen cainoapanēdash. ³⁰ Aden Saudo cuesunenuen, cainec qesho tantiaishun Sadeseya caid yacnoshon Esus tantiaquidon Saudo buanshun abi tishondacno Tadso caid yacno Saudouidsēqui nidmepanēdash.

³¹ Adashic Saudo nidmian cuesunenushe quenquio yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuēdenquio yec tabadpanēdash. Adeccuidēncuenash, Nuquin Papan chiaid tantiabenu, qesho Nuquin Papan Mayanēn adomboembidi tantiamiac bēdamboec tabadpanēdash. Adeccuidēncuenash, Nuquin Papan chiaid tantiabenu, qesho Nuquin Papan Mayanēn adomboembidi tantiamiac bēdamboec tabadpanēdash. Adeccuidēncuenash, Nuquin Papan chiaid tantiabenu, qesho Nuquin Papan Mayanēn adomboembidi tantiamiac bēdamboec tabadpanēdash. Adeccuidēncuenash, Nuquin Papan chiaid tantiabenu, qesho Nuquin Papan Mayanēn adomboembidi tantiamiac bēdamboec tabadpanēdash.

Petedon Ananias Dodcastsēn bēdamiaid

³² Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanēdash. ³³ Ambo choshon dada, Eneyas cuēmēdquid, seta dadpen 8ted matamec canite tsasiaid Petedon istuidshun: ³⁴ —Esusēn mibi bēdamiaque. Nidtoшон min uete buanun nacnenta, Eneyas —Petedon cac Eneyas badedquio nidtoash capupanēdash. ³⁵ Eneyas capusho isash Dida yacnocquidobēdi nidaid Sadon caid yacnocquido Esus tantiaquid yampanēdash.

³⁶ Adnubien Dida uidtsēc shubu dadpen icquid Ope caid yacnocquid, Esus tantiaquid utsi, chido, Tabita cuēnshumbi quidiecon onqueten Dodcas cain cuēnaid tabadpanēdash. Aidi bēdamboecquid icquin badiadquidēn-badiadquidēnquien pete nibēdquido mēdenepanēdash. Adembididi aton na nibēdquido Dodcasēn mēdenepanēdash. ³⁷ Aidi Petedo Dida yacno icnubi icsabudec unēso isun abēd icquidon dapanshun shubu abuc quēnē icquidēn nampanēdash. ³⁸ Aden nanshun, Petedo Dida yacno tabadec, qesho tantiaishun aid chomenuequin dada daēd Petedo tabadacno nidmiac aid daēdi Petedo tabadacno choshon Dodcas unēsboed chuishun: —Nidtuidentquio yec badedquio ēbēdi cho —cac ³⁹ abēdi badedquio Ope yacno Petedo nidpanēdash. Adeccuidēncuenash, Nuquin Papan chiaid tantiabenu, qesho Nuquin Papan Mayanēn adomboembidi tantiamiac bēdamboec tabadpanēdash. Adeccuidēncuenash, Nuquin Papan chiaid tantiabenu, qesho Nuquin Papan Mayanēn adomboembidi tantiamiac bēdamboec tabadpanēdash. Adeccuidēncuenash, Nuquin Papan chiaid tantiabenu, qesho Nuquin Papan Mayanēn adomboembidi tantiamiac bēdamboec tabadpanēdash.

⁴⁰ Adosho isun abitedi puduemiash danëshën sebudash Nuquin Papa chiec onquetanec nidtoshon unëshoed isquin: —Nidto, Dodcas —Petedon cac uincuenequi Petedo isec Dodcas badedi uëtsëdtopanëdash. ⁴¹ Uëtsëdtopanëdash isun mëdinquin nidtomeshun niantebobëdta Esus tantiaquid utsibo cuënquin cho-chomeshun uincuenboed ismepanëdash. ⁴² Aden Dodcas ismeho isash aton shubuno nidanequin Dodcas uincuenaid chiac Ope yacnoquido dadpen Esus tantiaquid yampanëdash. ⁴³ Adnubien Petedo Ope yacnoquid nidaidën capuquid bitsi uashun chodcashion nacnenquid Simombëd yuec Petedo tabadpanëdash.

10

Petedo Codnedion chomiaid

¹ Adnubien shubu dadpen icquid Sesadeya caid yacno Codnedio cuëmëdquid isadaid-pembo nidaid Itadia caid yacnoësh Sesadeya caid yacno choash tabadpanëdash. Aidi sondado dadpen 100tedi chuiquid icpanëdash. ² Aidi aton shubun icquidobëdi Nuquin Papa tantiaquid icquin isadaidbo aton na nibëdquid icsho isun menebanquid icpanëdash. Adecbidi Nuquin Papa chiec onquianedenepanëdash. ³ Adquid yec ushë budtsambi tedes yanuc Nuquin Papa chiec onquequimbi ushacimboecquin Nuquin Papan uaid mayan bëda Codnedion ispanëdash. Nuquin Papan uaid mayan bëda choshon: —Codnedio —capanëdash.

⁴ Adsho tantiaash dacuëdquin comapenen isec: —¿Atotsibi name, Icho? —quepanëdash Codnedio.

Adoquien: —Abi chiec mibi onquedenesho Nuquin Papan tantiec. Adembidi aton na nibëdquid tantiaquin menedenequid mibi icsho Nuquin Papan bëdamboen isaid mibi neque. Chuinu. Tantiata. ⁵ Nëbi Simon cuënshumbic Petedo cuënoaid ma bednu mimi namiaido Ope yacno nidmetan. ⁶ Simon utsi nidaidën capuquid bitsi uashun chodcashion nacnenquidbëd tabadec. Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

⁷ Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun ⁸ Nuquin Papan uaid mayan bëdan chuibocpaden Petedo bedmenuen ambi namiaido Codnedion nidmepanëdash.

Petedon ushacimboec tsadquin isaid

⁹ Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onqueneuc shubu macano pada-padapambocquid yacno decatopanëdash. ¹⁰ Adec dectatoash shubu icbon codocanubi Petedo bundoec ushacimboec tsadquimbic ¹¹ abu posonianec abi yacmi dabidiete dapabiecquid bucun dënëshbudcuenaid budsho Petedon ispanëdash. ¹² Aidënquio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash. ¹³ Adnubien: —Nidtoshon cuesuneshun pe, Petedo —capanëdash abucuësh onquequin.

¹⁴ Adoquien: —¿Abida cai? Èmbi petemaid tauishun mibi shëdmetemaidquio antabëdquid nec. Adquid piamboccombi, Icho —quepanëdash Petedo.

¹⁵ Adoquien padpidec abucuësh onquec: —Nuquin Papan bëdambo icmiaid icsambo iquec cainda —quepanëdash. ¹⁶ Adotanguimbic antabëdquid abuc buanshun adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquo buanshun puduedmeoapanëdash.

¹⁷ Adosho isash Petedo ambi isboed tantiec tsadnubi Codnedion chomiaido Simonën shubu istuidash shëcuë cuëmano choec nidtuidpanëdash. ¹⁸ Choec nidtuidash: —¿Nëmboda Simon Petedo tabadec? —quetuidpanëdash.

¹⁹ Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibëc. ²⁰ Èmbi chomiaido neque. Budash cacuidenquo yec aidobëdi nidtan —capanëdash.

²¹ Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

²² Adoquien: —Codnedio cuëmëdquidën chomiaid nebi. Aidi sondado dadpen chuiquid bëdamboquidquio nec. Adquid icquin Nuquin Papan chiacpaden nabansho isun isadaidbon bëdamboen isaidquio nec. Aidi Nuquin Papan chomiaid mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioaposh —quepanëdash Codnedion chomiaido Petedo chiec.

²³ Adoquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnoquid utsin-utsinquin tsibanampanëdash. ²⁴ Adec nidane Sesadeya caid yacno chopanëdash. Adnubien, Nëid ushëmbien chochitec, quequin tantiaashun Codnedion

aton shubun icquido abi isedquid chedo Petedon chuibansho tantiamenuen aton shubu nuntan iccuededmeapanēdash. ²⁵ Aden iccuededmiac tabadnubi utsibobēd choec Petedo chedo puduedsho isash, Mibi bēdamboquid icnubi adesa nebi, quequin Petedo ismec danēshēn sebudec shuebudash Petedo bēisenquio yec Codnedio uepanēdash.

²⁶ Adec uesho isash Petedo: —Mibipadquid nebique. Nid tota —quepanēdash Codnedio caic.

²⁷ Adtanec Codnediobēd onquetanec quēnē utsin puduedshun isadaidpembo dadpen Petedon istuidpanēdash. ²⁸ Aden aido isec: —Isadaidbo nebi. Adquid yec isadaidpembobēd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ēmbi bēdamboen isaid icsambo iquec cainda, quequin ismequin ēbi tantiamiac ²⁹ mimbi ēbi bedmiaido choacsho isash, Mibēd capuesa nebi, quenquio yec chobi. Adecbidi nēmbō choash isadaidpembon shubu nec. Nēmbō puduedtiapimbo iquebi, quenquio yec puduedobi. Nēbi Tantianu. Chui. ¿Atotsieshun ēbi chomio? —quepanēdash Petedo Codnedio chiec.

³⁰ Adoaquien Codnedio: —Abentsēc choec ushanec ushē budec tedes yanubi Nuquin Papa tantiec buna mēmūnec con shubu nuntanuēsh Nuquin Papa chiec onquec tsadobi. Adnubien dashcute shocosh bed-bedquiacbimboec dasiuidquid ēbi yacmi Nuquin Papan budmiac onquec: ³¹ “Codnedio, mibi Nuquin Papa chiec onquesho Nuquin Papan tantiec. Adembidi aton na nibēdquido mimbi menebansho aidēmbi bēpiscudenquio icquin tantiec. ³² Nuquin Papa bēdamboen tantianuen Simon cashumbic Petedo caid Ope yacnocquidbēd tabadquid ma chono qeshun mimbi namiaido nidmeta. Aidi Simon cuēmēdquid utsi nidaidēn capuquid bitsi uashun chodcashun nacnenquidbēd tabadec. Aidēn shubu acte cuēmambi iquec,” quec Nuquin Papan uaid mayan bēda onqueposh. ³³ Aden chiac: “Petedo bedtan,” quequin ēmbi namiaido nidmiombi. Adoac bēdamboquid yec cacuidanenuio yec badedquio mibi choc. Adec mibi choacsho isash bēdambo iquebi. Nuquin Papan nuqui isnubi ambi mibi tantiamiapaden chuibansho tantiec tabadnuna —quepanēdash Codnedio Petedo chiec.

Codnedion shubu nuntanshun Petedon chuibanaid

³⁴ Aden Codnedion chuiban cac Petedon naden chuipanēdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nēbi abimbo tantiambi. ³⁵ Nuquin Papan chiaid tantiashun matses utsin-utsinquien chieshēnenquiocquin bēdamboen nabansho isun, Aidedi Nuquin Papan abi yacno yuedendac, quequin tantiambi. ³⁶ Ēdenquimboshē Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsēqui matsestedi chuiquid icnubi utsibēd bēdamboec tabadendac. ³⁷ Nidaid Cadidia yacnoshon Uan padon chuibanquin acten mentoaquien Esuquidistun ambi naid tuapondash. Mibitedishun aid tantiondac. ³⁸ Ma abēd tabadnueshun Nuquin Papan aton Mayan meniac nadatiambocquin Esuquidistun nabanpondash. Adquid icquin Esuquidistu shubu dadpen icquid Nasaded yacnoshon tishaid yec capuquin bēdamboen nabanquin abi chieshēnquidēn Satanas caidēn mēyanaido Esuquidistun bēdamebampondash. Adosho mibitedishun isbampondac. ³⁹ Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten decantan isadaidbon unēs uaqui ⁴⁰ uincuenash, Uincuenobi, quequin Esuquidistun ismebempodashi. ⁴¹ Aidi uincuenashun matsestedi ismenquiocquin aidbēdtan peshun acquidotedictsēqui Esuquidistun ismepondashi. ⁴² Abēdi icshobi, Ēbi chuibanquin matses icsaid cuidte chuibante ushē choec quequin chui, cac nebi. ⁴³ Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ēnsho isash abi icsaid Nuquin Papa bēpiscudendac. Esuquidistu chuiquin aden dada uapampic —quepanēdash Petedo Codnedion shubun iccuededquido tantiaequin chiec.

Isadaidpembo Nuquin Papan aton Mayan meniaid

⁴⁴ Aden Petedon chuibanshobi abitedi tantiaquid icsho isun Nuquin Papan ma abēd tabadnueshun aton Mayan menapanēdash. ⁴⁵⁻⁴⁶ Aden meniac isadaidpembo nēbi Esuquidistu tantiaquido yanshun abi onquiaicmaidēnquio utsin onqueten onquequin Nuquin Papa chiec cuēdēmpañēdash. Adsho tantiash Petedobēd cho-choboedo isadaidbo aton tsusedpabon nacpaden shui dēbid dētemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac —quepanēdash isadaidbo Petedobēd cho-choboedo.

⁴⁷ Adoquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? ⁴⁸ Aid, acten mentometa —capanēdash Petedon.

Aden acten mentoquai: —Nuquibi tabadnuna —cac Petedobēd cho-choboedo acten mentoaidobēd daēdpactsēc ushec tabadpanēdash.

11

Isadaidbo Petedon ambi naid chiaid

¹ Adnubien utsibo Sesadeya caid yacnoēsh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bēdamboen tantiaish Esuquidistu tantiaquido yanosh, quequin chuipanēdash. Anoshon chuibētsenec Edusaden yacnotsen choshon adomboembidi chuioapanēdash. ² Aden chuisho anocquidon Esuquidistu tantiaquid utsibon tantiaish tsusedpabon chiacpadamboen shui dēbid dētemequido yec Petedo nēmo choacsho isun, Aidi ambi nabanaid chuimenu, quequin cainpanēdash. Aden cainubic Petedo choacsho isash ³ comapenec onquecuededec: —Isadaidpembon shui dēbid dētemesabo icnuc aton shubun puduedtemiaidquido nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tantianu —quepanēdash Edusaden yacno tabadquido.

⁴ Adoquien Petedon nadopanēdash: —Aidobēd ēbi tabadboed chuibanu. Tantiata. ⁵ Ope yacnoēsh Nuquin Papa chiec onquequin ushacmbuoen naden ispombi. Abuc posonianec ēbi yacmi dabidiete dapabiecquid dēnēshbudcuenauid budposh. ⁶ Aidēnquido nidaidēn capuquid tacbidēn capuquidbēd podochoquid chedo antabēdsho ispombi. Aidēn antabēdquid nuqui petequidbēd nuqui petemaid icposh. ⁷ Adquid icsho isnubi: ‘Nidtoшон cuesuneshun pe,’ caposhi. ⁸ Adsho tantiaishun: ‘Aidtedi ēmbi petemaid tauiquin mibi shēdmetemaidquido nec. Adquid pesambo nebi, Icho,’ capombi. ⁹ Adoquien abucūesh padpidec onquequin: ‘Nuquin Papan bēdambo icmiaid icsambo iquec cainda,’ caposhi. ¹⁰ Adomboembidi abentsēc chotsēcnuc tabēcaido abuc buanshun padpiden budmeshun adembidi chuishun buanshun abitedi abuc puduedmeoaposh. ¹¹ Abuc buanoabombic dada abentsēc chotsec Sesadeya caid yacnoēsh choquido shubu shēcuē cuēmano nidtuidash nidpac caosh. ¹² Aidtedi icnubi Nuquin Papan Mayan: ‘Aidobēdi cacuidenquido yec nidtan,’ qesho tantiaish aidobēdi nidpobi. Aidobēd Ope yacnocquido dada 6ted Esuquidistu tantiaquido puduanec nidec Codnedion shubun ēbēdi puduedposh. ¹³ Puduedacsho isash Codnedio: ‘Nuquin Papan chomiaidēn ambi uaid mayan bēdan naden chuiposhi: Simon cuēnshumbic Petedo caid Ope yacno tabadeque. Aid bedmenuen mimbi namiaido nidmeta. ¹⁴ Aidēmbi mibēd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bēdan chuiposhi,’ quequin Codnedion chuioaposhi.

¹⁵ “Adoac Esuquidistu chiombi. Aden chuinubi aton Mayan ēbitedi Nuquin Papan meniacadembi aidotsen meneoaposh. ¹⁶ Aden meniasho isun Nuquin Icho Esuquidistun chiondaid ēmbembi tantiatsēcquiec tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icho Esuquidistun. ¹⁷ ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanēdash Petedo shui dēbid dētemequid utsibo chiec.

¹⁸ Aden Petedon nainquin chuibanac tantiadempambo yec tabadec isadaidbo shui dēbid dētemequido: —Isadaidpembon abi icsaid ēnsho isun Nuquin Papan aidotsen abēd icquid icmeoapac —quepanēdash Nuquin Papan naid chiec.

Antioquiya yacnoshomba Esus tantiaquido iccuededaid

¹⁹ Esteban cuēnoten seshuniash: “Esuquidistu tantiaquido cuesunenu,” qesho tantiaish ēbitsen cuesunenusho quianec Edusaden caid yacnoēsh Esuquidistu tantiaquid utsi-utsiec nidanapanēdash. Nidequi nidaid Penisia caid yacno choash utsi-utiec tabadnubi utsi-utsiec acte nēnantanquio nidaid nacnēdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibanpanēdash. ²⁰ Adshumbic, utsibo Chipide caid yacnoēsh Antioquiya yacno cho-choquidobēdtan nidaid Sidene yacnoēsh Antioquiya yacno cho-choquidon isadaidpembon Esuquidistu tantiamenuen chuibanpanēdash. ²¹ Aden chuibanu, qesho Nuquin Papan bēdamboen tantiamiac aidon chuibanaid tantiaishun isadaidpembon: Ēbi icsaid ēnu, quequin ēnash Esuquidistu tantiaquid dadpen yampanēdash.

²² Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanédash. ²³ Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bédambo icmiaid icsho isash: —Cuishon. Bédambo iquec. Adembi tantiaquin chieshenquiocquin Esuquidistu tantia —quepanédash Bednabe. ²⁴ Bednabe bédambocquid icsho Nuquin Papan aton Mayan meniac Esuquidistu bédamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanédash.

²⁵ Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon ²⁶ Saudo istuidash Antioquiya yacno aidbēdi Bednabe choapanédash. Ambo choash seta abentsēc matamec anocquid Esuquidistu tantiaquidobēd iccuededquin Esuquidistu chuibanquin aid daēdshun tantiamepanédash. Aden chuibanachuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuēmpanédash.

²⁷ Bednabebēd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquio icshun nanun chiaid chuiquido cho-chopanédash. ²⁸ Chochoshon abentsēqui Accabo cuēmēdquid Nuquin Papan Mayanēn oncamiac: —Yuec-yuecpectsēc yash nidaidtedi yacnocquidon pete nibēdendac —quepanédash. Aden chimbic shubu dadpenquioshē icquid Doma yacnocquido ancaquid Quēdaudio cuēmēdquid icnubi pete nibēdquiec yampanédash. ²⁹ Adnubic, Udeya yacnocquidon pete nibēdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanédash. ³⁰ Esuquidistu tantiaquido Edusaden yacnocquido chuiquido nēid piucquid menetanta ma pete bunquido menenueshun, quequin ambi dayun uaidtedi Bednabebēdta Saudo menequin Edusaden yacno buamepanédash Antioquiya yacno tabadquin Esus tantiaquidon.

12

Acobo cuesuniaidbēdta Petedo quēnēn nauedaid Nuquin Papan puduemiaid

¹ Adnubien Edusaden caid yacno tabadquid domanobo ancaquid Edodes cuēmēdquidēmbi Esuquidistu tantiec iccuededquido utsi-utsien comapenen mēyanuequin bedmeshun quēnēn nauedmepanédash. ² Aido quēnēn nauedmeshun Esuquidistun ēbi chuibeneta caid abēd capucuneboed Acobo cuēmēdquid chēshten cuesunemepanédash. Acobon utsimbo Esuquidistun ēbi chuibeneta caid abēd capucuneboed utsi Uan nepanédash. ³ Adoac, Acobo cuesuniosh, qesho tantiash isadaidbo utsibo, Esuquidistu tantiesabo: —Bédamboen Edodesēn naosh —quepanédash aido. Adec onqesho tantiash Edodes: Isadaidbon pan bidisquesa tantiaid ushē choec, quequin Esuquidistun ēbi chuibeneta caid utsi, Petedo cuēmēdquid, bedmeshun quēnēn nauedmepanédash. ⁴ Aden quēnēn nauedmeshun Petedo cuenushe qeshun sondado 4ted quēnē nuntan tabadmeshun pan nami uambocquid petequid tantiaid ushētēdi naimēdambi ambi naid icsa Petedo chuimenuquin Edodesēn cāimpanédash. Adnubien quēnē nuntanshun Petedobēdta mētaniaid sondado daēd uenubi utsi daēdshun shēcuē ēctabēdquin Petedo isec tabadpanédash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtēcnubi badiadnuc ishoedo choapanédash. Adechidi ishoed utsibo inchēshtëmbi padpiden isec choapanédash. ⁵ Adnubien Esuquidistu tantiaquido iccuededash Nuquin Papa Petedo quēnēn nauedaid chiec yuec onquepanédash.

⁶ Adshumbic, Badiadshun Petedo bēmēmbi, quequin Edodesēn tantianubi aid inchēshtëmbi Petedo bucn mētaniacchobi ushnubi ⁷ Nuquin Icbon chomiaid, ambi uaid mayan bēda, nibēdquiocboedi Petedon dayun choan quēnē nuntan comapenec chēnquepanédash. Aidēn Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mētaniaid mēchiquidpanédash. ⁸ Adtanquimbien Nuquin Papan uaid mayan bēdan: —Chinēshēdtanec tapucudta —cac Petedo chinēshēdtanec tapucudpanédash.

Adsho isash: —Min dashcute bēntsecquid dasiuidshun ēbi tsiban —quianec nidsho ⁹ Nuquin Papan uaid mayan bēda nidsho isacimbocquid abimbo tantienquiocquin Petedon tsibanampanédash. ¹⁰ Adec nidquimbi sondado abēdta mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenenubi shocosh shēcuē abembi shēcniaidpanédash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampanédash. ¹¹ Abēd icboed nibēdnubien Petedo padpiden

tantiaquiec: —Edodesbéd isadaidbo, Esuquidistu tantiesabo, ëbi cuesunete bunsho isun Nuquin Papan ëbi puduemenuen ambi uaid mayan bêda chomiosh. Abimbo iccosh —quianec Petedo nidpanêdash. ¹² Adec nidequi Nuquin Papan abi puduemeboed tantiequi Uan cashumbic Madcos caidên titan shubu yacno Petedo chopanêdash. Aidên tita Madia cuëmêdquid icpanêdash. Ambobi Esuquidistu tantiaquid dadpen iccuedec Nuquin Papa chiec onquepanêdash. ¹³ Adnubien choshon Petedon shêcuê tosh-toshcacho tantiaash chido yua Doda cuëmêdquid isnuec nidtopanêdash. ¹⁴ Aid shubu shêcuê yacno choshon Petedon cuênsho tantiaash bêdamboshê iquequi shêcnenquo yec aubidi titinquec: —Petedo shêcuê yacno choash nidec —quequin iccuededquido chuituidpanêdash.

¹⁵ Adsho Nuquin Papa chiec iccuededquidon abimbo tantienquiocquin: —Muequi mibi nec. Aidida isplash neba —quepanêdash iccuededquido.

Adoquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bêda ischitashien nec —quepanêdash tantiesa.

¹⁶ Adnubi padpiden Petedon tosh-toshcacho shêcnequin isash: —¡Tso! Abimbo caic —quecuededpanêdash.

¹⁷ Adnubien mêdante uic-uiccaic Petedo: —Onquenquo yec tabadquin tantiaata. Ëbi nashunquin Nuquin Ibon naboed chuibanu —quepanêdash Petedo abi quênên nauedacnoshon Nuquin Papan puduemiaid chuibanec. Aden chias: —Ëbi puduemiaid Esuquidistun utsi, Acobobêda Esus tantiaquid utsibo chuitanta —quianec puduenanec utsi yacno Petedo nidpanêdash.

¹⁸ Adashic, badiadnubi quênê nuntan Petedobêd icboed sondadotedi: —¿Mitsimbo nuquibêda mêtaneboed icpec? Nibêdeque. Is —quec acuêbpanêdash.

Adashic, Petedo nibêdec, quequin sondadon chiac ¹⁹ Edodesên: —Nibêntan —cac nidshun sondadon istuidenquiocsho isun quênê nuntanshun Petedo isquido ambi quênên tabadquin nabamboed chuimeshumbi aidotedi Edodesên cuesunemepanêdash.

Edodes unêsaid

Adashic, Edodes nidaid Udeya caid yacno abi tabadacnoësh puduanec shubu dadpen icquid Sesadeya caid yacno choash tabadpanêdash. ²⁰ Sesadeya caid yacno anoentsêcbidi shubu dadpen icquid Tido caid icnubi aid yacnoësh anoentsêqui shubu dadpen icquid utsi Sidon caid icpanêdash. Tido caid yacnocquidbêd Sidon caid yacnocquido Edodesbêd chushcananquido icboedi padenquo yanec tabadpanêdash. Adec chushcananenquo yec tabadquin, Sesadeya yacno Edodes choash tabadosh, qesho tantiaash Edodesên yua Bêdasto cuëmêdquidbêd onquenuc cho-chopanêdash. Cho-choshon, Ëmbi pete nibêdsho isun Edodesên menioshi. Nêbi aid chushcainquo iquemi, quiosh, quequin cho-choquidon chuituidpanêdash. Aden chiac adomboembidi Bêdaston Edodes chuioapanêdash. ²¹ Aden adomboembidi Bêdaston chuioasho tantianshun Edodesên: —Ëmbi chiacpadên cho-choata, quiosh Edodes, quequin chuita —cac cho-choquido Bêdaston chuioapanêdash. Aden chiac Edodes onqesho tantianec ambi chiacstedec ushash dashcute nac-nacquiocquid dasiuidash abembi onquenuc tsadten abuc tsadtoash onquec taêpanêdash. ²² Aid onqesho tantiaash: —Nidaidênshun tishaid onquiaidpenquo nec. Abuc tabadquid nuquin papa caidien Edodes nechitec —quec iccuededquido comapenec cuêdcuededpanêdash. ²³ Aden chuisho tantiaash, Mimbi Nuquin Papa caidpenquo nebique. Aidi abia yampid abentsêcquiobi iqueque. Aiduidi tantiaata, quequin chuitiadquidêmbi chienquo icsho tantianshun Nuquin Papan chomiaidên ambi uaid mayan bêdan daicsa uac chichan dadpen yanec Edodes badedi unêspanêdash.

²⁴ Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanêdash.

²⁵ Adnubic Antioquiya yacnocquidon Esuquidistu tantiaquidon aton piucquid ambi menenuen dayun uaid Bednabebêda Saudo meniac buanec Edusaden yacno choshon anocquido Esuquidistu tantiaquido menetanashic auêshquo puduanec Antioquiya yacno nidoapanêdash. Aidobêdi Uan cashumbic Madcos caid nidpanêdash.

13

Saudobêdtabi Bednabe nidmiaid

¹ Adashic, Esuquidistu tantiaquid utsi-utsiec Nuquin Papan yuecquo icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanêdash. Nêdic, Bednabe; utsibic, Simon, Dada Chêshê caid; utsibic, Sidene yacnoësh choquid, Dusio cuëmêdquid; utsibic, Cadidia yacnoësh choquid, tsusio dapa, Edodesên shubun icquid icboedi, Manain cuëmêdquid; utsibic, Saudo cuëmêdquid.

² Aidtedishun Esuquidistuidi tantianuen buna mëmunsho Nuquin Papan Mayanën: — Saudobëdtan Bednaben aid daëdshun ëmbi chuibocpaden ma napanuna —capanëdash. ³ Adoquien, buna mëmunquin nainash Nuquin Papa chiec onqueshun abëd icquid utsibon mëdanten Saudo Bednabëdëta mamishquin nadopanëdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanëdash abëd icquidon.

Chipide yacnoshon Esuquidistu chuibanaid

⁴⁻⁵ Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunec. Aidtedi nidanec acte cuëman shubu dadpen icquid Sedusia caid yacno choash cano antabëdëtoanec acte nënantanquio nidaid nactnëdquid Chipide caid yacno nidtampanëdash. Chipide yacno choash nidequi shubu dadpen icquid Sadamina caid yacno choapanëdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabëdëdtan chuibampanëdash. ⁶ Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabodobëd icquidon. Satanasën tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquo nebi, quequin muaquin chuipanëdash Badesusën. ⁷ Aidi Pabos yacnocquido tsusion shubun tabadpanëdash. Anocquido tsusio cobednadod caid Sedquio Paudu cuëmëdquid icpanëdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobëdëta Bednabe chomeshun tsusion yuedpanëdash. ⁸ Yuedac Pabado Esuquidistu chuibampanëdash. Saudo quequin isadaidbon cuënubi Pabado quequin isadaidpembon cuëmpanëdash. Aden Pabado Esuquidistu chuibanasho tantiec tsusio tsadsho isun Badesusën tantiamenquiocnuen utsi uain chuoapanëdash. Ambì ompoaid ismianesa Badesus icsho Edimus cuëmpanëdash. ⁹ Aden utsi uain chuisho tantiasshun Nuquin Papan Mayanën tantiamiac Edimus bëisequi Pabado: ¹⁰ —Satanasën bacuë yec bëdamboen naidbëdëta bëdamboen chiaid tantiesä mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaquin muaquin mimbi adenuidi chuibanecque. Tantia. ¹¹ Nëbi con Icbon mibi mëyanquin bëshu uaindac. Ushë chënqesho mimbi yuen isenquio iquendac —quepanëdash Pabado Edimus chiec.

Aden chuibon Edimusën ëshë cuen-cuempambo yec inchëshbudacbimboec yanash: — ¿Tsuntsimbini mëdinshun buampeba? —quequin nibëdacno mishquin uëmbampanëdash. ¹² Aden Edimus bëshu uacsho isec: —Nuquin Icbon chiaid abimbo iquec —quiash tsusio Sedquio Paudu cuëmëdquid Esuquidistu tantiaquid yampanëdash.

Nidaid utsi, Pisidia caidën shubu dadpen icquid Antioquiya caid utsi yacno Bednabe Pabodobëdi choash tabadoaid

¹³ Adashic, Chipide yacnoësh puduanec nidaid Pampidia caid yacno Pabodobëd icquido canon potepanëdash. Aden potiasht nidaid Pampidia caid yacno choash Pabodobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabodobëd Bednabe pudundoanec nidquin shubu dadpen icquid Pedque caid ¹⁴ isbidanec nidaid Pisidia caid yacno shubu dadpen icquid Antioquiya yacno chopanëdash. ¹⁵ Ambobi tabadequi chonoadtemaid ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanashumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquido ada mibi icpe? cata —tsusion cac ambi namiaid nidshun tsusion chiacpaden Pabodobëdëta Bednabe chuituidpanëdash.

¹⁶ Adoquien abi tsadacnoëshi nidtoashi Pabado: —Nuquin Papan naid mibi chiem-bique. Tantiaquiota. ¹⁷ Nidaid Equipito caid yacno nuquin tsusedpabon tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmiaidën tishmiaid caidaido Equipito yacnoshon buanubi ¹⁸ tsusedpabon Nuquin Papan chiaid chieshëmpampic. Adoquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquid buampampic. ¹⁹ Aden buanquin nidaid Canan caid yacno buanshun anocquido isadaidpembu istuidmeshun matses utsibo utsi-utsiectsëcquiec 7tedi icquido naimbudmeshun aidon nidaidtedi nuquin tsusedpabo menebampampic. ²⁰ Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmédquid tsusedpabo chuiquid icmepampic. ²¹ Aidi isadaidbo chuiquid icnubic, Matses utsibo ancaquidpadquid bunebi, quequin tantiashun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmédquid, isadaidbo ancaquid icmepampic. ²² Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmédquid tsusedpabo ancaquid icmeoapampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bédamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanédash Pabado aton matses Antioquiya yacnocquido tantiamenuen chiec.

²³ Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanédash. ²⁴ Aidën nadatiambocquin nabanquidquin ambi nabanaid taubicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanédash. ²⁵ Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmioshi, caindambi,’ quepanédash Uan acten mentoanquid —quepanédash Pabado.

²⁶ Aden Uan padon chiacpaden chuibanashic: —Abadauanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanédash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanédash. ²⁷ Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobéd aton tsusio dapabo, Icsambocquid neque. Unës ua, quequin chuiapanédash. Aden chuiquin utsibéd iccuededte ushën-ushënquien abi isec onquiaid Nuquin Papan dada uamiampicpadembi aidon napanédash. ²⁸ Esuquidistu icsaid nibédquidquio caiqui, Icsambocquid neque. Aid unës uatiadquidi mibi nec, quepanédash Isadaidbo Pidato caic. ²⁹ Adoquien Nuquin Papan dada uamiampicpaden nabanambien Esuquidistu cuستن dectanquin unës uacsho chicshun, Ëbi unësacsho nëidën ëbi nauedec, quequin ambi shëcuë uain nacnenaid chucanquio Osen Esus nauedpanédash. ³⁰ Adoacsho Nuquin Papan Esuquidistu uincuemiác ³¹ capusho Cadidia yacnoësh Edusaden yacno abéd capucuenoedon aidi isbempanédash. Aden isun aidombi Esuquidistu chuibededec. Adembidi aid isboedobédambi abimbo chuibanquidquio nebi —quepanédash Pabado.

³² Aden chiashic: —Abi chiembique. Tantia. Nuquin Papan chometequid ambi chuiampid tsusedpabon isenquiocnobi ³³ Nuquin Papan uincuemiácsho nuqui isondaid aidi nec. Aidi chuiquin Nuquin Papan dada uamiampid nad iqueque. Tantia. Chuinu. ‘Con madombo mibi nec.

Nëbi ëmbi uincuemiaqui ëmbi chiactedi mimbi naimbudoc.

Adosho isun ëbipadquiocnoc chuiquid dapa mibi icmembali.’

Aden ëndenquimboshë aton mado tantiaquin Nuquin Papan chiampic. ³⁴ Adecbidi ambi uincuemetequid Esuquidistun nami chodquesa icpanédash. Aid chuiquin dada uamiampid nad iqueque. Tantiata. Chuinu.

‘Dabid chiampicpadembi mibi icsaisa icsho ëmbi bédamboen isaid mibi nec, mado,’ quequin Nuquin Papan dada uamepampic. ³⁵ Ambi dada uamiampid utsi nad iquec:

‘Icsaisa icsho aton nami chodquesa icmenuna,’ quequin Nuquin Papan chiampic.

³⁶ ‘¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unësacsho isun aton mëdimbon nami chodquiacono Dabid chococ aidën namitsen chodquepampic. ³⁷ Nuquin Papan uincuemetequidën namien chodquesa icpanédash. ³⁸ Aidi icsainquiocquid yec ëbitedi icsaid bedshunash abided cuidadpanédash. ³⁹ Adoac abi tantiaquidquiosen icsaisabidi Nuquin Papan isec. Nuquin Papan naden nata quequin dada uamiampidtedi matsesën natiapimbo iquec. Aden ambi chiacpaden natiapimbo yec, Nuquin Papan bédamboen isaid nebi, quetiapimbo icboedëmbi, Matses icsaquid icsho cuidnushe quiaish abided cuidadec Esus unëspanédash, quequin tantiaisho, Esuspadquid icsaisa Nuquin Papan nuqui isec. ⁴⁰ Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

⁴¹ ‘Ëmbi ëndenquimboshë dada uamiampicpadembi adquid chomembi.

Ëmbi chomiaid isquidon chiac mimbi tantienquio icpec.

Adquid yec, Tantiadempambo iquec, quec mamēnshumēnquid ēbēdi tabadtiapimbo iquen-dac.

Adquid icmane qeshun tantiaquiota'

—quepanēdash Pabado iccuededquido chiec.

⁴² Aden chuibudashic Pabado Nuquin Papan chiaid chuibante shubu yacnoēsh abēd choboedobēd puduanec nidsho isash: —¿Iccuededte badiad utsi chonoc iccuededquin chuinuēcta mibi choape? —quepanēdash iccuededquid utsibo Pabado chiec. ⁴³ Aden chianec Pabado bēd Bednabe nidsho isun isadaidbo utsin-utsinquiebēdtan isadaidpembo isadaidbopadquid icnuequid utsin-utsinquien tsibanampanēdash. Aden abi tsibanansho isash: —Nuquin Papan bēdamboen isaid yec bēdamboec tabadta —quepanēdash Pabado Bednabebēd.

⁴⁴ Adashic, chonoadtemaid ushē icnuc Nuquin Papan chiaid tantianuec Antioquiya yacnocquid dadpen iccuededoapanēdash. ⁴⁵ Dadpen iccuededsho isash isadaidbo tsusiobo: Ēmbi chuibanansho tantianuec aidtedi choenquo iccosh, quequin tantiec nēishpanēdash. Adec nēishash: —Mimbi Nuquin Papan chiaid icsamboen chuibanec —quepanēdash Pabado caic.

⁴⁶ Adoaquien, dacuēdenquo yec Pabado bēd Bednabe: —Mibitedi con matses icsho, Nuquin Papan dada uamiampid chuibanu, queboedēmbi tantiesa icsho isun mibi chuibanenquo iquemi. Mibi tantiesa yec Nuquin Papabēd tabadte bunesabidi icnuc isadaidpembo Esuquidistu chuibanendambi. ⁴⁷ Nuquin Icbon naden tantiamioshibique. Tantia. Chuinu.

“Isadaidpembo ēmbi chiaid chuibanquid mibi icmēmbi

ma nidaidtedi yacno ēbi tantiaquido ēbi yacno puduedquid ma icpanuna,”

quequin chioši —quepanēdash Pabado abi chieshēnquido isadaidbo Nuquin Papan dada uamiampicpaden chiec.

⁴⁸ Adsho tantiash isadaidpembo: —¡Padtec! Nuquin Papan chiaid bēdambohē iquec —quecuededpanēdash. Adoaquien, Nuquin Papan ēbēdi mibi tabadmendambi, quequin chiaid ambi tantiamiactedi Esuquidistu tantiaquid yampanēdash.

⁴⁹ Adec Esuquidistu tantiaquid yanash auēshquo dadpen nidequi nidaid dēuequid utsi-utsiec yacno choash tabadquin aidontsen Esuquidistu chuibanoapanēdash. ⁵⁰ Adosho tantiash, Pabado icsambocquid nec, quequin isadaidbo tsusiobon Antioquiya yacnocquidon chidobobēdta anocquido chuiquid dapa nēishmeshun Pabado bēdta Bednabe mēyantanguin ashunquo nidmepanēdash. ⁵¹ Aden nidta cac puduanec nidtuidash, Esuquidistu ēmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanēdash. ⁵² Pabado bēd Bednabe Antioquiya yacnoēsh nidan Antioquiya yacnocquid Esuquidistu tantiaquido: —Bēdambo iquebi —quecuededpanēdash. Adembidi aidtedi aton Mayan Nuquin Papan menepanēdash.

14

Iconio yacno

¹ Adashic, Pabado bēd icquido Iconio yacno choash tabadpanēdash. Ambo tabadec Nuquin Papan chiaid chuibante shubu yacno nidash puduedpanēdash. Ambo puduedshun Esuquidistu chuibanac isadaidbobēd isadaidpembo dadpen Esuquidistu tantiaquid yampanēdash. ² Aido Esuquidistu tantiaquid yanubi isadaidbo utsibo Pabado chuibanaid tantiatipimbo icquin Esuquidistu tantiaquido yuaquin chuiquin isadaidpembo utsibo nēishmepanēdash. ³ Aido nēishmiambi Iconio yacno yec tabadquin Pabado Bednabebēdtan dacuēdenquiocquin Esuquidistu chuibanpanēdash. Aden chuibanansho isun Nuquin Papan ambi nadatiambocquin tantiadempamboctequid ismequid Pabado bēdta Bednabe icmepanēdash. ⁴ Aden icmiac aid daēdshun nadatiambocquin nasho isash, Isadaidbo tsusiobon chuibocpadec Pabado bēd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanēdash. ⁵ Aden chuishumbic, Pabado bēdta Bednabe cuestanquin cuēnoten se-senuequin Esus tantiesabo isadaidpembon aton tsusio dapabobēdtan cainubi adembidi isadaidbon aton tsusio dapabobēdtan cainoapanēdash. ⁶⁻⁷ Aden caimbededosh, quequin tantiaquidēn chiac cuenec nidequi nidaid Dicaonia caid yacno Pabado bēd Bednabe choash shubu dadpen icquid Disteda caid yacno choash tabadquin Pabado bēdtan Bednaben Esuquidistu chuibanpanēdash. Adtanec auēshquo puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibanpanēdash. Adtanec auēshquo puduanec nidshun dēuequiec shubu dadpen icquid utsi-utsiec yacnocquidotsen chuibanpanēdash.

Disteda yacno

⁸ Disteda yacno tabadnubien anocquid taicsaidi anin tishaid caputiapimbo icpanēdash. ⁹ Aidi Pabado Esuquidistu chuibansho tantiec, Esuquidistun ēbi bēdamēpatsiash, quec otacquo tsadpanēdash. Aden caputiapimbocquidēn tantiacpadomboen Nuquin Papan Pabadotsen tantiamiac ¹⁰ caputiapimbocquid comapenen bēisquin: —Nidto —Pabado cac badedi nidtoash taicsaid bēdanash capupanēdash.

¹¹ Aden taicsaid bēdamiac capusho isash anocquido aton onqueten cuēdcuededquin: —Disteda yacnocquidon tantiaid matsesbimboec yanash abucuēsh budoshe. Nēid daēdi isec cho —capanēdash. ¹² Adtanequi Bednabe otacquo tsadquid icsho isash ambi tantiaid abentsēc Upited icnuc Upited cain Bednabe cuēnquimbi Pabado chuiquidquo icsho isun ambi tantiaid utsi Medcudio icnuc Medcudio cain Pabado cuēmpanēdash Disteda yacnocquidon. ¹³ Aden cuēnsho tantiaishun baca bēnē daēd bēec: Mibi daēdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacenaid Upited caid dayun uaquido baca cuesunenu, quepanēdash.

¹⁴ Aden baca cuesunenuen bēsho isun abi dasiuidaid aton dashcute bēntsecquid shoyonquin cancheuidashic iccuededquidon nēnantanquo nidash Pabado bēd Bednabe comapenec nadpanēdash: ¹⁵ —Ēbi daēdi mibipadquid matsesquo nebi. Mimbi tantiacmaid nebique. Baca cuesunenda. Chiaid bēda mibitedi naden chuinuec chobi. Nuquin Papa caid abentsēcquiobi iquec. Aidēmbi abubēda nidaid uashubic aidēnquicquidēdi uabanampidquo neque. Aiduidtsēqui tantiaquin ambi uaidbimboecnuc matsesēn nacenaid tantiesa icta. ¹⁶ Ēndenquimbo Nuquin Papan, Adoenda, cainquiocnoc matsesēn ambi tantiacpaden nabampampic. ¹⁷ Aden, Adoenda, cainquiocquimbi, Abitedishun icbo icquin bēdambocquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc caquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabado bēd Bednabe Disteda yacnocquido chiec. ¹⁸ Aden chuido-chuidoqui baca cuesunenquo icpanēdash Disteda yacnocquidon.

¹⁹ Adnubien Antioquiya caid yacnocquidobēd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid yacnocquido nēishcuededpanēdash. Adece nēishcuededshun Pabado cuēnoten se-siash, Unēsosh, qeshun nimbanquin buanshun shubu nibēdacno Pabado netampanēdash. ²⁰ Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobēd Disteda yacno choec shubun puduedpanēdash. Badiadash puduanec shubu dadpen icquid Dedbe caid yacno Pabado bēd Bednabe nidoapanēdash.

Nidaid Sidia caid shubu dadpen icquid Antioquiya yacno choaid

²¹ Adece Dedbe yacno choash tabadquimbi Pabado bēd Bednaben chuibanec Esuquidistu tantiaquid dadpen yampanēdash. Auēshquo puduanec nidoaic padpidec Disteda caid yacno choash tabadquin, Dadpen tantiamequiono, quequin chuibanpanēdash. ²²⁻²⁴ Aden chuibanshumbic: —Natiagianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nēbi dayacquo yec tabad —capanēdash Pabado. Adotanquin ambia Esus tantiaquid utsi-utsien Pabado bēd Bednaben: —Bēdamboec tabadquin ismequin Esuquidistu tantiaquid utsibo chuiban —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmūnquin chiec onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboen dayun uata, Papa, quequin chianec Pabado bēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanapanēdash. Adecbidi Antioquiya yacno choashun adomboembidi chuibanapanēdash. Antioquiya yacnoēsh puduanec nidec nidaid Pisia caid datambētsenec nidaid Pampidia caid yacno choash nidec ²⁵ shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. ²⁶ Auēshquo cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. ²⁷ Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaidēdi Pabado bēd Bednaben chuibanpanēdash. Isadaidpemo dadpen Esuquidistu tantiaquid yamposh, quequin chuipanēdash. ²⁸ Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

15

Edusaden yacnocquido iccuededec tantianu quiaid

¹ Pabado bēd Bednabe Antioquiya yacno choabincubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin

Papan naden nata quequin chiaid Moises dada uamiampicpaden shui dëbid dëtemesa abi yacno Esuquidistun yuedtemaid nendac, quequin chuipanëdash. ² Adnubic Pabadobëd Bednabe Antioquiya yacno choash tabadquin aidon chiaid tantiash: —Nuquin Papan aden chiambo iqueque. Aden chienda —quepanëdash.

Adsho comapenec cuëdquin chushcapanëdash. Adsho tantiashun abi chuiquidon, Edusaden yacno nidshun chushcanamboed chuitanta, quequin Pabadobëdta Bednabe chuishumbic Esuquidistu tantiaquid utsibo chuioaquin aido nidmepanëdash. ³ Adoac Antioquiya yacnoësh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanëdash. Adsho tantiash: —Aid tantiec bëdambo iquebi —quepanëdash anocquid Esuquidistu tantiaquido. Adtanec auëshquo nidequi nidaid Samadia caid yacno choash tabadquin adomboembidi chiac adquiecbidi, Bëdambo iquebi, quepanëdash anocquido. ⁴ Auëshquo puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobëdta Bednaben chuibanopanëdash. ⁵ Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dëbid dëtemetiaquidi nec. Nuquin Papan naden nata quequin Moises dada uamiampid nabantiadquid neoaic —quepanëdash.

⁶ Adoquien Esuquidistu ambia tantiaquido tsusiobobëd Esuquidistun ëbi chuibeneta caido: Tantiabono, quiash onquecuededpanëdash. ⁷ Adec yuec onquecuededash nidtoash Petedo nader onquepanëdash: —Chuinu. Tantiata. Ënden Nuquin Papan naden chuipondashi: “Isadaidpembo Esuquidistu tantiaquid icmete bunëbique. Aidotsen chuibanta,” quequin chuipondashi. Aden ëmbi chuioasho mibitedishun tantiondac. ⁸ Ëmbi isadaidpembo Esuquidistu chiac abi tantiaquid aido yampondash. Matsesën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniaclepembidi isadaidpembo meneopondash. ⁹ Utsibo nec, quenquiocquin aidotsen tantiamequin paucoapondash. ¹⁰ Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? ¹¹ Padenquo icnuna. Matsestedi icsaquid icsho cuidnushe quiash abided cuidadac, quequin tantiaquiec unësash abëdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanëdash Petedo.

¹² Aden Petedon chuiquin ënambic Pabadotsen Nuquin Papan tantiamiac ambi natiambocquin naquin isadaidpembo ismebanaid chuipanëdash. Adembidi Bednaben chuioapanëdash. ¹³ Aid daëdshun chuibanquin nainan Esusën utsi Acobo, Esus tantiaquido tsusio dapa, nadpanëdash: —Ëmbitsen chuinu. Tantiata. ¹⁴ Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibëdta aton matses icmiac. ¹⁵ Adomboembidi Nuquin Papan chuimiaiëdn dada uampid nad iqueque. Tantia. Chuinu: ¹⁶ “Isadaidbobëd yuec tabadenquicoboedi padpidec choash aïdobëd icoaindabi.

Dabid padon tsyuecquido isadenquicoboedi isadcuenendac

¹⁷ ma aton Icho matsestedishun istuidpanuna;

ma adembidi isadaidpembon ëmbi cuënaïdon aïdbidi istuidpanuna,

¹⁸ quec Nuquin Icho ambi ënden tantiampicpadomboen chiaid nec”

—quiashic abi Acobo onquec: ¹⁹ —Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquo ictiad. ²⁰ Nëiduidtsëqui dada uaqin isadaidpembo chuibanuna nuquibi: Nuquin Papan uaidbimboecnuc nacenaid tantiaquin pete sanaïd penda; adembidi, min chiduidtsëqui chudta; adembidi, min bënëuidtsëqui chudmeta; adembidi, Nëish tëtaniaïd intacchobi codocaid penda, quequin isadaidpembo chuibanuna. ²¹ Adec Moisesën dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuïnuna —quepanëdash Acobo iccuededquido chiec.

²² Adashic Esuquidistu tantiaquido iccuededec onquec ënëdshun ëmbi dada uaid Antioquiya yacno buanuec Edusaden yacnocquid daëd nidta, quequin Pabadobëdta Bednabe nidmepanëdash. Abentsëc Udas cashumbic Badsabas cuënaïd; utsibic, Sidas cuëmëdquid. Aid daëdi Nuquin Papan chiaid comapenen tantiaquidquo icpanëdash. ²³ Isadaidpembo chuiquin Edusaden yacnoshon Esuquidistu tantiaquidon naden dada uapanëdash:

“Esuquidistun ëbi chuibeneta caïdobëdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobëdta nidaïd Sidia yacno tabadquido, nidaïd utsi Sidisia yacno tabadquido chedo mibitedi chuiquin dada uaombique. Isec onqueta. ²⁴ Èbëd icquido

nëüşhquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. ²⁵ Aden chuisho tantiaşhun nëmbocquidobëd iccuededec onquequin abentsëcshun tantiacbimboen dada uaombi. Aidi nëmbocquid daëdi Pabado Bednabebëdta buantan, quequin chiembi. ²⁶ Unësmanc, quenquo yec capucuenequin Esuquidistu chuibanquido Pabado bëd Bednabe nec. ²⁷ Adquid aid daëd icsho isun aid chedobëdta Udas Sidas chedo mibi yacno nidmembi. Adoac ëmbi dada uacpaden ma mibitedi chuiopanuna abimbo iquec camenuen. ²⁸ Nuquin Papan Mayanën ëbitedi tantiamiacpaden isadaidbon naden nata quequin chiacpaden nata mibi caisa nebi. ²⁹ Nëidtedtsëqui ëbitedishun nata caid nec: Nuquin Papan uaidbimboecnuc nacenaid tantiaquin utsibon abi yacnoshon sanaid penda; adembidi, min chiduidtsëqui chudta; adembidi, min bënëuidtsëqui chudmeta; adembidi, mimbi nëish cuesuniad intacchobi codocashun penda. Adoac ëmbi chiacpaden nabanec mibi bëdambo icpec. Padi aiddtedtsëqui chiembi.”

³⁰ Aden dada uaquin nainshun ambi nidtan caboed meniac Antioquiya yacno nidoapanëdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menapanëdash. ³¹ Aden meniac isbanash: —Mimbi bëboed dada uaid isash bëdambo iquebi —quepanëdash isadaidpembo Antioquiya yacnocquido.

³² Adnubic Udasën Nuquin Papan chiaid chuibanquid Esuquidistu tantiaquido Antioquiya yacno tabadquido bëdamboen tantiamapanëdash. Adomboembidi chuibanquin Sidasën tantiamapanëdash. ³³ Aden dadpen ushqin chuibanşhun: —Edusaden yacno nidoaibi —caquien:

—Ai, mibi nidsho isash unëşquio icquimbi mibi chomequido yacno nidtan, mibi caimbi —quepanëdash Esuquidistu tantiaquido Antioquiya yacno tabadquido. ³⁴ Adec aido Edusaden yacno nidnubien ³⁵ Pabado Bednabe chedobëdta Antioquiya yacno tabadquin Esuquidistu tantiaquid utsibo Nuquin Papan chiaid bëdamboen tantiamenuen chuibanapanëdash.

Pabado bëd Bednabe cuëshëdaid

³⁶ Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuqui mibi nidnu. Nid —quepanëdash.

³⁷ Adoquien: —Ma Madcosbidi nidoanu. Chuita —quepanëdash Bednabe.

³⁸ Adoquien: —Chieshec aidi cuëshëdondashe. Padi. Nuqui daëdtsëqui nidnu. Nid —quepanëdash Pabado.

³⁹ Adoquien Bednabe aden tantienquo yec Pabado bëd comapanec onquiash Madcosbëd cano antabëdtoanec Chipide yacno nidoapanëdash. ⁴⁰ Adnubien Pabado Sidas abëd Edusaden yacnoësh choboed caic: —Nuqui mibi nidnuna —quepanëdash.

Adec aid daëd nidnuesho isash anocquid Esuquidistu tantiaquido: —Ma Nuquin Papan mibi daëd bëdamboen nidmequin ma mibi bëdamboen namepanuna —cac Pabado bëd Sidas nidpanëdash. ⁴¹ Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bëdamboen tantiamenuen chuibanapanëdash. Aden chuibeneshumbic nidaid Sidisia yacno choshon Esuquidistu tantiaquido shubu utsinshubu utsinquec iccuededacno boec puduedcuenequin Pabado chuibanapanëdash.

16

Pabado bëd Timoteyo nidaid

¹ Adec nidec shubu dadpen icquid Dedbe caid yacno choash tabadquin adomboembidi chuibanooş nidequi shubu dadpen icquid Disteda caid yacno Pabado bëd Sidas choapanëdash. Ambo Esuquidistu tantiaquid Timoteyo cuëmëdqid tabadpanëdash. Aidën tita isadaidbo Esuquidistu tantiaquid icnubi aidën papa isadaidpembo quidieco matses icpanëdash. ² Timoteyo bëdamboecquid nec, quequin Disteda yacnocquidon Pabado chuipanëdash. Adomboembidi shubu dadpen icquid Iconio yacnocquidon chuiopanëdash. ³ Aden dadpenşhun chuisho tantiaşhun buante bumpanëdash Pabado. Adec, Timoteyo buanu, qeshun ëbi capucueniacno isadaidbo dadpen iqueque. Aidon Timoteyo isash, Aidën papa quidieco matses icnuc aton madobidi isadaidpembo nec, aido quenushe qeshun Pabado Timoteyon shui dëbid dëtemapanëdash. ⁴ Aden nashic nidec Esuquidistu tantiaquid utsibo yacno-yacno boec choash puduedshun Esuquidistu tantiaquido Edusaden yacnocquidon dada uaquin chiaid Pabado chuipanapanëdash. ⁵ Adembidi Nuquin Papan chiaid chiac ënden Esuquidistu tantiaquidon tantiabenuicnobi utsi dadpen Esus tantiaquid yanoapanëdash.

Uşhqin Masedonia yacnocquid Pabado isaid

⁶ Adanec nidaid Sidisia caid yacnoësh nidsho Nuquin Papan Mayanën: —Nidaid Asia caid yacno Esuquidistu chuibanuec nidenda —cac Pabado bëd icquido nidaid Pidiqia

caidtsen datambidanec nidaid Cadasia caidbidi datambidanec ⁷ nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiameoapanēdash. ⁸ Adoac nidaid Misia datambidanec shubu dadpen icquid Todoas caid yacno ēbi tabadacnobi chopondash. ⁹ Ambo choash tabadec inchēshnuc ushqin nidaid Masedonia caid yacnocquido Pabadon ispondash. Adec ushqin isquin nidaid Masedonia yacnocquido: —Ēbitedi Esuquidistu chuibanec cho —quec onquesho Pabadon tantiafondash. ¹⁰ Aden tantias: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ēbitsen Pabadobēd nidpondabi.

Didia cuēmēdquid Esuquidistu tantiaquid yanaid

¹¹ Adanec Todoas yacnoēsh puduanec cano antabēdtoanec cuebi nidequi acte nēnantanquo nidaid nacnēdquid Samotodasia caid yacno choash Pabadobēd icquido tabadtuidpondash. Badiadash auēshquo puduanec cano antabēdtoanec nidquimbi potebidanec nidaid Masedonia caid yacno ēbitedi chopondabi. Aid nidaidēn acte cuēmambi shubu dadpen icquid Niapodis caid yacno pudundoanec ¹² nidequi shubu dadpenquo icquid Pidipos caid yacno domanobo dadpenquioshē tabadacno yuec ushec tabadpondash.

¹³ Pidipos yacno tabadashic isadaidbo iccuededte badiadēn Nuquin Papa chiec ut-sibo onquedeniacno istuidnuec puduanec shubu nibēdacno nidequi acte utsi cuēmambi choapondash. Ambo choshon iccuedequido chidobo istuidshun Esuquidistu Pabadon chuibanpondash. ¹⁴ Pabadon chuibanacno chido Didia cuēmēdquid shubu dadpen icquid Tiatida caid yacnoēsh choquid icpondash. Aidēn piucquid bednuec dashcute cuēshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. ¹⁵ Aidbēd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabadobēd icquido tabadpondash.

Pabadobēdta Sidas quēnēn nauedaid

¹⁶ Adashic padpidec Nuquin Papa chiec onquedeniacno Pabadobēd icquido nidoasho chido yuaidēn bēqueduidpondash. Aidēn mayan icsan tantiamiacpaden yuecash nad iquendac, quequin chuisho piucquid dadpen aid chido matesēn meniac aid chidon ambi bedaidtedi abi yuaquid meneoapanēdash. ¹⁷ Pabadobēd icquido bēqueduidshun tsibambēc choec aid chido: —Nēid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nēid dadatedi nec —quec ¹⁸ badiadquidēn-badiadquidēnquiec comapenec cuēdpondash.

Adec cuēdtonesho tantiate bunenquo yec amibidi bidiadquin mayan icsa dapuduedaid chido chuiquin comapenec Pabadon: —Esuquidistun nadatiambocquin naidēnquo dapuduenta —cac badedquio mayan icsa dapuduempondash. ¹⁹ Aden dapudueniac chido bēdanacsho isun abi yuaquidon: —Nēbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimboquin nuqui meneotiapimbo iquec, quequin tantiash nēishun Pabadobēdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bēshun utsibon sambanaid anoentsēqui abi chuiquido icsho isun chido yuaquidon Pabadobēdta Sidas ambo buampondash. ²⁰⁻²¹ Aden abi chuiquid tsadacno bēash: —Nēid dada daēd isadaidbo nec. Nēmo choshon abi chuiquidon naden nata quequin chiaid chuibanec. Ēbitedi domanobo icquin ambi chiaid ēbitēdishun natemaid icnuc matsestedi chushquecuedosh —quepondash chido yuaquido abi chuiquido chiec. ²² Aden chuisho tantiaquidon chiac dadpen cho-choash iccuededquin Pabado bēquidon chiacpadomboen aidontsen chuioac abi chuiquido: —Bēboedon dashcute chicshun cueshcaten cuesta —cac sondadon cue-spondash. ²³ Aden comapenec cuesmeshun buameshun quēnēn nauedmeshun ambi quēnēn nauedaid ista caid chuiquin Pidipos yacnocquido chuiquidon: —Puduenanec cuenushe queshun nēid daēdi bēdamboen isquiota —capondash. ²⁴ Adsho tantiasshun ambi ista caidēn Pabadobēdta Sidas nēnantanquo quēnēn nauedquin tsadunshun cueste shēcū uaidēn tausunash puduantanquin quēnē bēdamboen bētashpanēdash.

²⁵ Aden bētashash aton shubu dayunquiocquidēn puduedambic inchēshpotsembo Pabadobēd Sidas Nuquin Papa chiec onquepanēdash. Adecbidi Nuquin Papan naid chiec cuēdēmpanēdash. Adec cuēdēnsho utsibon tantianubi ²⁶ comapenec nidaid ishcutnubi mētaniaidtedi mēchiquidpanēdash. ²⁷ Adnubien ista caid isec tsadboedi ushtanec isucunquin

isac shëcuë bêtashaid ênden shëcniac. Adsho isash ista caid: —Quënën nauedaido puduen-puduepacnuî —quetanec: —Chuiquid dapabon ëbi cuesunemetsiash —qeshun siadnuequin chështe abi tsiusudaïd chicsho ²⁸ istanquin Pabadon: —Quënën nauedaidtedi nêmbô iquebique. Seshuniadenda —quequin comapenen cuëmpañêdash.

²⁹ Adoaquien, seshuniadtsemboedën: —Tabote bec cho —cac ambi namiaidën tabote bedtanquin meniãc tabote bedshun sananec badedi quënën puduedash dacuëdec uëdëquec Pabadobêd Sidas tabadacno choash danêshên sebudec shuebudpañêdash. Mibi daëdi bédambocquid icnubi adquidpenquoio nebi, quequin tantiaquin ismepañêdash. ³⁰ Adsho isun Pabadon nidtomiaqui seshuniadtsemboed bëyucanec nidquin aton shubun Pabadobêdta Sidas yuedash: —¿Nuquin Icho yacno puduednush mitsipadequibi ëbi icsaid cuidadpeque? Chui. Tantianu —quepañêdash seshuniadtsemboed.

³¹ Adoaquien Pabado: —Mibibi cuidadtiapimbo iquec. Mibêdta min shubun icquido icsaquid icsho cuidnushe quiaish abided cuidadec unêsash Esuquidistu aton Papa yacno puduedash abi tantiaquido yuedquid neque. Mibi icsaid ênash, Esuquidistu con Icho nec, quequin abimbo tantiata ³² —qeshumbic seshuniadtsemboedbêd icquido Esus tantiamenuen Nuquin Ichon chiaïd Pabadon chuipanêdash.

³³ Adoaqui Pabadobêdta Sidas cuesaid chiuë acten bëpanshunquin nainacsho aton shubun icquido Esuquidistu tantiaquido yansho isun aïtedi Pabadobêdan Sidasên acten mentobampanêdash. ³⁴ Aden mentobanaqui aton shubun yuedshun pemepañêdash. Adashic, Nuquin Papan chiaïd abimbo tantiaquid yec ambi bédambo icmiaïdo seshuniadtsemboedbêd icquido icpañêdash.

³⁵ Adashic, badiadash Pidipos yacnocquido chuiquidon: —Nauedaid shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caid adomboembidi chuioapanêdash. ³⁶ Aden chiac ista caidën: —Quënën nauedboed daëd pudueme, quequin chuiquid dapabon chiosh, quequin aïdon chomiaïdên chioshibique. Dacuëdenquoio yec nid —capanêdash Pabadobêdta Sidas chuiquin.

³⁷ Adoaquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquoio caimbi. Ëbi daëdi puduemenuec ma chuiquid dapabo abibi chopanuna —quepañêdash.

³⁸ Aden chiac puduenanec nidequi abi chuiquido yacno choshon, Mimbi quënën nauedmeboed daëd domanobo nec, quequin chuïsho tantiaish chuiquid dapabo comapenec dacuëdcuededpañêdash. ³⁹ Adec dacuëdec nidequi nauedaid shubuno choash: —Domanobo nec, quequin tantienquiocquin mibi quënën nauedmiombi —qeshun puduemetanec: —Pidipos yacnoêsh nïdtañ —capanêdash Pabadobêdta Sidas chuiquin. ⁴⁰ Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bédamboen tabadmenuequin Pabadon chuïbampañêdash. Aïdo chuïbidanec Pabadobêd icquido nidoapanêdash.

17

Tesadonica caid yacnocquido isadaïdbo nêishcuededaid

¹ Pidipos yacnoêsh puduanec nidequi Pabadobêd icquido shubu dadpen icquid Ampipodis caid datambidanec shubu dadpen icquid Apodonia caïdtsen datambidanec shubu dadpen icquid Tesadonica caid yacno choash, Nuquin Papan chiaïd chuïbante shubu iquec, qesho tantiaish Tesadonica caid yacno Pabadobêd icquido tabadpañêdash. ²⁻³ Ambo tabadec isadaïdbo iccuededte badiadên abi nidteniãcpadec Nuquin Papan chiaïd chuïbante shubu yacno choshon Pabadon Esus tantiamenuen Nuquin Papan ênden chiãmpid chuïbampañêdash. Nuqui icsaid bedshunash abided cuidadec Esuquidistu unêsaid ambi uincuemetequid Nuquin Papan Chomiaïdquoio nec. Aïdi nuqui Quidistu caid noeac, quequin chuïpañêdash Pabadon. Sabado 3ted matamequin adomboen chuïbampañêdash. ⁴ Aden chuïbanaqui Esus tantiaquid utsi-utiec yampañêdash. Nêidic, isadaïdbo utsi-utiec; utsi-utiec, Nuquin Papa tantiaquido quidieco matses dadpen; utsi-utiec, anocquido chuiquid dapabon chïdo utsi-utiec aïdo Esus tantiaquid yampañêdash.

⁵ Aden Pabadon chuïbanac Esus tantiaquid dadpen yansho isash isadaïdbo utsibo nêishun utsibon piucquid bednuequin aton na sambanshun ismiãcno nidshun tantiesabo, icsambocquid dadpen, iccuededmeshun aïdosen nêishmiãc natia chushquecuededpañêdash. Adec chushquec nidequi Pabadobêdta Sidas bednuec Ason cuëmedquidên shubuno puduedec nidpañêdash. ⁶ Ambo choshon Pabadobêd Sidas nibêdsho isun Esuquidistu tantiaquido Asembêd icquido bedshun abi chuiquid dapabo yacno Pabado chieshênquidon buanec abi chuiquid dapabo yacno choash: —Nïdaïd utsi-utiec yacno capucuenequin chuitemaïd chuïbanquido nêmbô ⁷ choacsho Asonên aïd daëd yuedaccosh.

Nuqui ancaquid Sesadën chiaid niacquin ancanquid utsi Esus cuëmëdquid iquec, quequin chuibanec —quepanëdash Pabado chïeshënquido abi chuiquido chïec.

⁸ Aden, Ancanquid utsi iquec, quequin Pabadobëdtan Sidasën chïec, qesho tantïash chuiquid dapabo iccuededquidobëd comapenec chushquecuededpanëdash. ⁹ Adtanec abi chuiquid Asombëd icquido caic: —Nëbi, ¿Atotsi tantiaquin Pabadobëdta Sidas yuedo? quequin mibi chuimetiapimbo iquemi. Yuecshun mibi chomeshun chuimemi. Ëmbi chuimiabi Tesadonica yacnoësh nidenda. Ëmbi chïacpaden nanuequin piucquid ëbi mene —capanëdash Tesadonica yacnocquido chuiquid dapabon Asombëd icquido chuiquin. Adoquien piucquid meniäc bedshun: —Min shubuno nidtan —cac nidanepanëdash Asombëd icquido.

Bedeya yacnotsen tabadaid

¹⁰ Adshumbic bednuse qeshun aid inchëshëmbi Tesadonica yacnocquido Esuquidistu tantiaquidon Pabadobëdta Sidas shubu dadpen icquid Bedeya caid yacno nidmepanëdash. Aden nidmiäc Bedeya yacno choash tabadec Nuquin Papan chiaid chuibante shubu yacno Pabado nidpanëdash. ¹¹ Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ënden dada uamiampid Pabodon chuibanoasho tantïashun bëdambocquid icquin, Abimbobida chuibanoshe. Isbono, quequin Nuquin Papan chiampid isban-isbampanëdash Bedeya yacnocquidon. ¹² Aden isbanec, Abimbo caic, quiash Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adecbidi isadaidpembo chuiquid dapabo quidiäco matses utsi-utsiec aton chïdo chedobëd Esuquidistu tantiaquid yampanëdash.

¹³ Adnubien, Bedeya yacnoshontsen Pabodon chuibanec, qesho tantïash Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiäc comapenec chushquecuededpanëdash. ¹⁴ Adsho tantïashun Esuquidistu tantiaquidon Bedeya yacnocquidon acte dapa cuëmmano Pabado nidmepanëdash. Adnubi Sidasbëd Timoteyo nidenquio yec Bedeya yacno tabadnubien ¹⁵ Bedeya caid yacnoshon utsibon bëyucanquin Pabado buampanëdash. Aden buanec nidequï shubu dadpen icquid Atenas caid yacno chopanëdash. Ambo choash abia bëyucanquido: —Ëbi chobocnobidi Bedeya yacno nidoaibi —qesho tantïashun Pabodon:

—Mibi yacno choash, Badedquio Atenas yacno chota, quïosh Pabado, quequin Sidasbëdta Timoteyo chuita —capanëdash. Aden Pabodon chiaquien Bedeya yacnocquido abi yacno nidoapanëdash.

Atenas yacnotsen Pabado tabadaid

¹⁶ Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, qeshun cainec capuquimbi Atenas yacnocquidon nacnenaïd isbampanëdash. Aidon Nuquin Papan uaidbimboecnuc nacnenaïd dadpen tabëcaïd papa cain cuënnaïd ambi tantiaïdo icsho isash, Nuquin Papa Abentsëcquiobi iquec, quequin tantïesa Atenas yacnocquido nec, quequin tantïec Pabado unësquïo yampanëdash. ¹⁷ Adec unësquïo yec Nuquin Papan chiaïd chuibante shubu yacno nidshun Esuquidistu tantiamenuen Nuquin Papan chiampid Pabodon chuibampanëdash. Adembidi anocquidon piucquid bednuen aton na sambanshun ismiäcno nidshun adomboembidi Pabodon chuibanoapanëdash. Isadaidbobëd onquequin Esuquidistu Pabodon chuipanëdash. Adembidi isadaidpembobëd onquequin Esuquidistu chuïoapanëdash. ¹⁸ Anoshon chuibanho tantïash epicudeyo cuëmëdquidën chuinëdäcpaden tantiaquido Pabadobëd onquepanëdash. Adembidi tantïash estoico cuëmëdquidën chuinëdäcpaden tantiaquido Pabadobëd onquepanëdash. Aïdo Pabadobëd onquequin Pabodon Esus chuïsho tantienquïo yec: —¿Atodain comapenec onquequin nëïd dadan chuïpash? —quepanëdash. Adnubien utsi: —Matses utsibon papa cain cuënnaïd chuibanec nepanui —quepanëdash. Pabodon Esuquidistu unësash uincuennaïd chuïsho tantïash adpanëdash. ¹⁹⁻²⁰ Adec onqueshumbic, Utsin tantiaïd tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaïd ëmbi tantïacmaïd nec. ¿Midapadquidquïo mimbi chuïbaneque? Tantianu. Chuiban —quepanëdash abi bëquïdo caic. ²¹ Abi bëquïdo Adeyopaco caid yacno nidash Atenas yacnocquido dadpen utsi-utsiec yacnoësh cho-choquïdo badiadquidën-badiadquidënquïec utsin-utsinquin ambi tantïacpaden chuïbansho tantianuec iccuededpanëdash.

²² Aden mimbi tantïacpaden chuïbanta caquien nënantanquïo nidtoshon naden Pabodon chuïbampanëdash: —Chuïbanu. Tantïata. Mimbi papa cain cuënnaïd mimbi tantïaïd iquec, quequin tantïembi. ²³ Capucuenequin mimbi tantïaïdbimboecnuc nacnenaïd dadpen isombi. Mimbi papa cain cuënnaïd dadpen tabëcaïd icnubi mimbi cuënnaïd abentsëc iccosh. Aïd mimbi cuënnaïd icnuc abïbimboecnuc nacnenaïd nibëdosh. Aton

shubumpiuidtsëqui iccosh. Mimbî cuënacmaid mimbî tantiacmaid mibi chuibanu. Tantiata.

²⁴ “Ëmbî Nuquin Papa cain cuënaid nidaidbëdtabi abu uashumbic aidënquiocquidtedi uaquidquio nec. Abitedi uaquidquio yec abitedishun icbombo aidi nec. Aidi tabadmenuequin matsesën shubu uashunaidën tabadesa nec. ²⁵ Aidi abitedishun Ibo icnuc abitedi aton na nec. Adquid icsho, Con na mibi menenu, matsesën aid catiapimbo iquec. Aidën tantiacpadec ëbitedi nëmbobi tabadebi. Aidën tantiacpadec ëbitedi tiboquebi. Aidën tantiacpaden ëbitedishun bedbanoaimbi. ²⁶ Aidëmbî bëyuc dada uampidën tsyuecquido ëbitedi nec. Aid bëyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taënuec ue yanendac. Adecbidi, inchështanec badiadoaic. Adecbidi, ushë nidash choaic. ²⁷ Aidëmbî naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ζTsuntsin nabanaid nepesh? qeshun ëbi tantiaquin Ibo ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. ²⁸ Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid na iqueque. Tanti. Chuinu: Nuquin Papan bacuëbo ëbitedi nebi, quequin min mëdimbon chuipanëdash.

²⁹ “Nuquin Papan bacuëbo ëbitedi iquec tiboquequid icquin matsesën nacnenaid tiboquesa papa cain cuënenquioctiadquidi matses nec. ³⁰ Ënden matsesën ambi nacnenaid aden cuësho tantias Nuquin Papa, Chën. Adoenda, quenquicoeboedi nëbi, Mimbî icsamboen tantiaid ënta, quequin chiec. ³¹ Matsesën naid chuibante ushë chonoc matses icsaidbëdta ambi bëdamboen naid chuibanquin Nuquin Papan chomeshun matses icmiaidën cuiddanendac. Ambi abipadquid matses icmiaid, Nuquin Papan matsesën naid chuibanquid icmenu caid unësacsho isun ambi chiampicpaden nanuequin Nuquin Papan uincuemepondash —quepanëdash Pabado Adeyopaco yacno iccuededquido Esus tantiamenuec.

³² Adec aidi unësacsho Nuquin Papan uincuemepondash, quequin Pabodon chuisho tantias utsi-utsiec mamëنشumëubi utsi-utsiec: —Aidën chuiboed padpiden tantianuna —quepanëdash. ³³ Adoquien, Pabado Adeyopaco caid yacnoësh nidpanëdash. ³⁴ Adec nidshun yuec ushqin chuisho tantianu quec Pabodobëd iccuededquin utsin-utsinquin padpiden-padpidemboen tantiabedpanëdash. Aden Pabodon chuibanac utsi-utsiec Esuquidistu tantiaquid yampanëdash: Nëdic, Dionisio cuëmëdquid Adeyopaco caid yacno iccuededquido chuiquid nepanëdash. Utsibic, chido Damadis cuëmëdquid adecbidi Esuquidistu tantiaquid yampanëdash. Aidobëd utsi-utsiec Esus tantiaquid yampanëdash.

18

Codinto yacno Pabado tabadai

¹ Adec Atenas caid yacno tabadash auëshquio puduanec nidec shubu dadpen icquid Codinto caid yacno Pabado chopanëdash. ² Ambo isadaidbo Aquida cuëmëdquid nidaid Ponto caid yacnoshon tishaid Pabodon istuidpanëdash. Isadaidbotedi nidaid Itadia yacnoësh nidtan, ancanquidën cac aton chido Pidisida cuëmëdquidbëd Codinto yacno choash Aquida icpanëdash. ³ Nidaidën capuquid yua bitsi shubumpi nacnenquid abipadquid Aquidabëd aton chido icsho isun aidobëd tabadquin Pabodon shubumpi nacnempanëdash. ⁴ Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabodon chuibanpanëdash.

⁵ Ambo tabadnubi Sidasbëd Timoteyo nidaid Masedonia yacnoësh choambic shubumpi nacnenquiocquin isadaidbo Esuquidistu tantiamenuen Pabodon chuibanpanëdash. ⁶ Adsho, Aid tantiaipi, quequin isadaidbon Esuquidistu icsamboen chuisho tantiash abi daëd dasiuidaid bëntsecquid chicshun ishcunec Pabado: —Esuquidistu mibitedi chiombi. Aid tantiesa yec unësash Nuquin Papa yacno puduedenquio mibitedi iquendac. Adquid Nuquin Papan cuidquin nësecatequid nendac. Nëbi padpiden mibi chienquio iquemi. Isadaidpembon tantiatias, quequin aido chuibanembi —quepanëdash Pabado isadaidbo tantiesa chiec.

⁷ Aden chiashic Nuquin Papan chiaid chuibante shubu yacnoësh puduanec aid dayuntsëqui shubu icquidën Pabado puduedpanëdash. Aid shubu icbo Usto cuëmëdquid Nuquin Papa tantiaquid icpanëdash. ⁸ Uston shubunoshon Esuquidistu Pabodon chuibanac Quidispo cuëmëdquid Esuquidistu tantiaquid yampanëdash. Aidi Nuquin Papan chiaid chuibante shubun iccuededquido chuiquid dapa icpanëdash. Aidbëd aton shubun icquidtedi Esuquidistu tantiaquid yampanëdash. Adecbidi Codinto yacnocquid dadpen Esuquidistu tantiaquid yampanëdash. Adsho adquidtedi acten mentobampanëdash.

⁹⁻¹⁰ Adashic, yuecash inchëshën Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ëmbi chiac dacuëdenquiocquin comapenen chuideneta. Mibi dayun uaquidquio nebi. Aden dayun uasho ëbi tantiesabon mibi natiametiapimbo iquendac —quepanëdash Pabado caic. ¹¹ Aden chiac Codinto caid yacno seta abentsëc matamiash ushë 6ted nidmec tabadquin Nuquin Papan chiaid Pabodon chuidonepanëdash.

¹² Adnubien nidaid Acaya caid yacnocquidon chushcaid chuisho tantiashun matses icsambocsho cuidte chuiquid Cadion cuëmëdquid icnubi isadaidbon Pabado bedshun abi chushcaid Cadion chuinen buampanëdash. ¹³ Ambo bëquin puduedmiash: —Ancanquidën chiaid niacquid matsesën tantiatemaid nëid dadan chiosh —quepanëdash Pabado chieshënquido Cadion caic.

¹⁴ Adoquien Pabado onquetsenubi Cadiomba onquedopanëdash: —Tantiata, isadaidbo. Mibi chuinu. Nëidën icsamboen nabanaid mibitedishun ëbi chuisho tantiatsiambi. ¹⁵ Aden chienquio yec, Nëidi mibi onquiaidbëdta min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaid chuiquidquio nëid dada nec, mibi queoapen. Aden mimbi chuisho tantiashun, Èbi chienda caimbi. Domanobo chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta. ¹⁶ Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën namiaidon puduemepanëdash. ¹⁷ Adoac puduenshumbic Nuquin Papan chiaid chuibante shubun iccuededquido chuiquid utsi Sostenes cuëmëdquid bedshun isadaidbon comapenen cuespanëdash. Adosho isun chiac Cadion, Icsamboen naic, quenquio yec otacquio tsadpanëdash.

¹⁸ Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanëdash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanëdash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manëdaid Pabodon matasmepanëdash. ¹⁹ Ambo ushë abentsëc nidmec tabadash cano antabëdtoanec acte dapa potiaish Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantiashun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanëdash Pabodon. ²⁰ Aden chuibansho tantiashun: —Adomboembidi chuibanuec žada ëbëd yuec tabadtsia? —iccuededquidon caquien: —Nëbi padenquio iquebi. ²¹ Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquio puduanec nidequi cano antabëdtopanëdash Pabado.

²² Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanëdash. ²³ Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auëshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bëdamboen tantiamenuen chuibanapanëdash Pabodon.

²⁴ Adnubien isadaidbo Apodos cuëmëdquid shubu dadpen icquid Adecandedia caid yacnoësh Epeso yacno chopanëdash. Aidi dadpen tantiaquid yec Nuquin Papan chiampid tantiaquid nepanëdash. ²⁵ Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanëdash. ²⁶ Aidi Nuquin Papan chiaid chuibante shubu yacno nidshun dacuëdenquiocquin ambi tantiaid chuibampanëdash. Aden chuisho tantiash, Èbi yacno isec cho, qeshun Aquidan aton shubu yacno buanshun Esuquidistu choaid ambi nadatiambocquin naidbëdtabi abi unësash uincuenaid chuibampanëdash Aquidabëdtan aton chidon Apodos tantiamequin.

²⁷ Aden Esuquidistu bëdamboen tantiash Epeso yacno yuec tabadquin Esuquidistu Apodosën chuibampanëdash. Adec yuec tabadquin chuibanashic, Nidaid Acaya caid yacno nidnu, quepanëdash. Adec nidnuesho tantiashun, naden dada uashun Apodos menepanëdash Epeso yacnocquidon: Nëid dada uaid sananquid Apodos cuëmëdquid Esuquidistu tantiaquid nec. Èmbi isaid neque. Yuedta, quequin dada uashun, Apodos Epeso yacnocquidon menepanëdash ma nidaid Acaya caid yacnocquido Esuquidistu tantiaquido Apodosën menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bëdamboen tantiamenuen chuibampanëdash. ²⁸ Aden chuibanquimbic isadaidbo Esuquidistu tantiesabo icsho isun abëd onquequin,

Esuquidistu Nuquin Papan Chomiaid nec, quequin Nuquin Papan chiampid Apodosën chuibampanëdash.

19

Epeso yacno Pabado abëd icquido tabadaid

¹ Codinto yacno Apodos icnubi Pabado nidaid Pidiquia caid yacnoësh puduanec podquedën choec macuësh dapa dectatocuëtsenec shubu dadpen icquid Epeso caid yacno choapanëdash. Ambo choshon Esuquidistu tantiaquido istuidshun: ²—¿Esuquidistu tantiaquido icshoda Nuquin Papan aton Mayan mibitedi menepanëdash? —capanëdash Pabado.

Adoaquien: —Nuquin Papan Mayan iquec, quequin tantiamboccombi —quepanëdash Epeso yacnocquido.

³ Adoaquien Pabado: —¿Atotsi canuen mibi acten mentobampanëdash? —quepanëdash.

Adoaquien: —Uan padon chiaid tantiaquid icsho acten mentondashi —quepanëdash Epeso yacnocquido Pabado chiech.

⁴ Adoaquien: —Mibi icsaid ënta, qeshun abimbo tantiaquidtedi acten mentobanquin, Èbi tsibanec choquid Esus tantiaquid icta, quequin Uan padon chuipanëdash —quepanëdash Pabado Epeso yacnocquido chiech. ⁵ Aden chiac, Esuquidistu tantiaquid nebi, quequin Epeso yacnocquidon chuïsho tantiaquid padpiden acten mentomepanëdash. ⁶⁻⁷ Aden aitedi acten mentoacsho mëdanten Pabado mamishbanac aid doseted Nuquin Papan aton Mayan menepanëdash. Aden meniac abi onquiacmaidënquo onquec Nuquin Papa chiech cuëdëmpañëdash Epeso yacnocquido.

⁸ Adashic Nuquin Papan chiaid chuibante shubun puduedshun Pabado Nuquin Pababëd tabadaid chuibampanëdash. Cuemo tantiamenuequin ushë choaid 3ted nidmequin badiadquidën-badiadquidënquien dacuëdenquioquin Nuquin Papan chiaid Pabado chuibampanëdash. ⁹ Aden chuïsho tantiaquid pamumëdacbimboec tabadquin, Tantiatiapibi, quequin utsin-utsinquin chieshëmënquioquin Esuquidistu icsamboen chuipanëdash. Aden chiac Esuquidistu tantiaquidobëd Pabado, Nidnu, quianec Nuquin Papan chiaid chuibante shubu yacnoësh puduanec nidec Tidano cuëmëdquidën chuibante shubu yacno choshon adomboembidi tantiamenuen matsesbëd onquequin Nuquin Papan chiaid chuibampanëdash. ¹⁰ Seta daëd matamequin adomboembi chuibampanëdash Pabado. Aden chuibansho tantiaquid nidaneshun chiac nidaid Asia caid yacnocquidon tantiaquid. Adoaic isadaidbobëd isadaidpembo Esus tantiaquido yampanëdash. ¹¹ Epeso yacno Pabado tabadsho Nuquin Papan nadatiambocquid icmiacsho ¹² Pabado dada cuëscashun dashcute cuëshë buanshun daicsaid mishbanac bëdampanëdash. Adembidi Pabado dada cuëscabanaidën nënquid mishac bëdampanëdash. Adembidi pashuaidtsen pamishac bëdanoapanëdash. Adembidi mishac mayan icsa dapuduempanëdash.

¹³ Adnubien mayan icsa dapuduemenuen Pabado chiacpaden tanquin isadaidbo utsibon: —Esus Pabado chuiboedënquio dapuduen —capanëdash. ¹⁴ Pabado tanuequido isadaidbo chuïquid Esqueba cuëmëdquidën mado 7ted icpanëdash. ¹⁵ Aden chiaquien mayan icsa: —Esus iquec, quequin ëmbi tantiaid aidi nec. Pabado iquec, quequin ëmbi tantiaidbidi aidi nec. ¿Mibitedi tsutsi neque? Tantanu. Chui ¹⁶—qeshun nebudquin dashcute ched-chedcapamboen mayan icsan cuesactaniaqui shubu nuntanuësh puduenanec cuempanëdash Esqueban mado. ¹⁷ Adec cuensho isquidon chiac Epeso yacnocquid isadaidbobëd isadaidpembo dacuëduedpanëdash. Adec dacuëdquin, Dacuëdampambo iquec. Esuquidistu bëdambocquid nec, quequin tantiaquidbëdpanëdash. ¹⁸ Esuquidistu tantiesia ichoedi Esuquidistu tantiaquid yanec dacuëdenquio yec Esuquidistu tantiaquido iccuededacno nidshun abi icsaid chuibampanëdash. ¹⁹ Adquid dadpeshun icsamenuen ambi ompoquin naid ismenquiochoedombi, Nëbi adquid ictiapibi, quequin cuëta dëtsiadotanquin ambi ompoquin tantiamiaid dada uatetedi tantianuen bedash utsitsen icsabudnushe qeshun abitedi tauipanëdash. Aden tauiboed menequin piucquid dadpen bedtsiandac, quepanëdash. ²⁰ Aden abi icsaid dada uate tauisho isquidon chuibanac Esuquidistu tantiaquid dadpen yampanëdash.

²¹ Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquio iquebi —quepanëdash Pabado. ²² Aden chiash Asia caid yacno abi tabadquin Masedonia caid yacno abia Timoteyobëdta Edasto nidmeapanëdash Pabado.

²³ Aid daëdi nidan Epeso yacno tabadquin Esuquidistu Pabadon chuibanaquien tantiesabo nëishpanëdash. ²⁴ Adquid Demetedio cuëmëdquid Diana caidbimboecnuc nacnemequid icpanëdash. Aidëmbi ambi nacnemaiad menequin piucquid dadpen bedbampañëdash. ²⁵ Aden Esuquidistu tantianu quesa icquin ambi Dianabimboecnuc nacentata caidobëdta abipadquid Diana nacnemequid utsibo iccuededmeshun Demetediönadopanëdash: —Nuqui tantiaid Dianabimboecnuc nacneshun menequin piucquid dadpen nuqui bedbanec. ²⁶ Aden nanubi nidaid utsi yacnoësh Pabado cuëmëdquid nëmbo choshon utsi comapenen chuibanac Epeso yacnocquid dadpembëdta nidaid Asia caid yacnocquid dadpeshun tantiec. Dianabimboecnuc nacnenaïd tiboquesa iquec. Adquid matsesën tantiaid abimbo ictiapimbo iquec, quequin Pabadon chiec. ²⁷ Aden chiac matses dadpeshun tantiaid Dianabimboecnuc nacnenquido icsambo iquec, quetsiash ëbitedi caic. Adecbidi, Dianabimboecnuc nacnenaïdbëd abi tabadte shubu uashunaid icsambo iquec, queoapec. Adecbidi Dianabimboecnuc nacnenaïd tiboquesa icsho matsesën tantienquio ictiadquid nec, queoapec Pabado. Aden chiac nidaïd Asia yacnocquidon dadpeshun Diana tantiaïboedombi padenquio yampec. Aidëmbi tantienquio yanshun aidbimboecnuc nuqui nacnenaïd bedenquio iquendac —quepanëdash Demetedio.

²⁸ Aden chiac ambi chomeboedtedi, Piucquid ëbi menequin ëmbi nacnenaïd matsesën padpiden bedenquio ictsiash, quec nëishash: —Epeso yacnocquidon tantiaid Diana bëdambo iquec —quec comapenec cuëdcuededpanëdash. ²⁹ Adec comapenec cuëdcuededsho tantiaid Epeso yacnocquid utsibo aidobëd cuëdcuededpanëdash. Adec cuëdcuededquin nidaïd Masedonia caïd yacnoësh Pabado bëd choboed Cayobëdta Adistadico bedshun iccuededte shubu yacno cuëdcuededquidon buampañëdash. ³⁰ Aden aid daëd bedshun buansho isquidën chiac Pabado, Iccuededte shubu yacno nidnu, qesho tantiaishun: —Padi. Ambo nidaïd —capanëdash Esuquidistu tantiaquidon. ³¹ Adembidi, anocquido chuiquid utsinsutnquien Pabado chuioapanëdash.

³² Adnubien cuëdcuededquidon Cayobëdta Adistadico bedshun buansho isash matses dadpen, ¿Atotsieshun aid daëdi bëo? quequin tantienquio yec tabadpanëdash. ³³ Adnubien, Nuqui tantiacpadomben chuitan, quequin isadaïdbon Adecandedo cuëmëdquid nënantanquio tsicunepañëdash. Aden tsicunequien nidtoash: —Tantia. Chuinu —quequin ³⁴ daëdpactsëc chiec onqesho tantiaid onqueboedi ënëdash tabadnubi: —Isadaïdbo aid nec —qesho tantiaid: —Epeso yacnocquidon Diana cain ambi tantiaïdbimboecnuc nacnenaïd bëdambo iquec —quec baded-badedquiec cuëdcuededpanëdash.

³⁵ Adec cuëdcuededshobien Epeso yacnocquidon naden nata quequin chiaïd dada uaquidën ënëdmenuequin nadopanëdash: —Epeso yacnocquidon tantiaïd. Chuinu. Diana caïdbimboecnuc abucuësh paëdaïdbimboecnuc nacnenaïd nuqui comapenen tantiaïdbëdta abi tabadte isquido nuqui nec. Adquid Epeso yacnocquido nec, quequin nidaïd utsi yacnocquidon tantiec. ³⁶ Aden utsibon tantiec, quequin tantiaïquin icsamboen nainda. ³⁷ Dada daëd mimi nëmbo bëboed Diana caïdën shubun puduedamboccosh. Adembidi ampliambo iccosh. Adecbidi, Diana caïd chiec icsamboec onquenquioccosh. ³⁸ Adenquio icnuc Demetediobëd icquido abi chushquiaïd chuïnuec Epeso yacnocquidon naden nata quequin chiaïd tantiaquid yacno nidshun ³⁹ mimi tantiacpaden chuita cuëdcuededenquiocquin. ⁴⁰ Comapenec cuëdcuededec qesho tantiaid ancanquid dapan Epeso yacnocquido bëdamboen tabadmeta caïd yacno nidshun chiac, Ancanquid dapan chiacpadec Epeso yacnocquido tabadenquio iqueque. Cuëdcuededquido chome, nuqui catsiash. Aden chomiac ¿atotsi nuqui chuïpe? ⁴¹ Aidën nuqui chomenushe quiaish min shubuno nidaneta —capanëdash Epeso yacnocquidon naden nata quequin chiaïd dada uaquidën. Aden chiac Demetediobëd iccuededquido nidanepañëdash.

20

Masedonia yacnocquido isbidanec nidequi Quedesia yacnocquido isbidanec nidaïd

¹ Natia cuëdcuededboedo nidanian Esuquidistu tantiaquido chomiash Pabado: —Nidaïd Masedonia caïd yacno nidaïbique. Bëdamboec tabadta —quianec Epeso yacnoësh puduanuc abëdi nidondabi. ² Auëshquio puduanec nidquin nidaïd Asia caïd yacnocquid utsisien chuïbidanec nidaïd Quedesia caïd yacno choapondash Pabado. ³ Ambo choash ushë abentsëc chotsëcnuc nidmec tabadash: —Nidaïd Sidia caïd yacno nidnu —quepondash. Adsho tantiaishun: —Ambo nidaïcsho mibi cuesunuequin isadaïdbon cainec —cac nidaïd Masedonia caïd yacno Pabado nidaïdpondash. ⁴ Nidaïd Masedonia caïd yacno choash Pabado tabadnubien abëd capuquido bëyucanec nidaïd Asia caïd yacno nidpondash. Abëd capuquido nëïdted icpondash. Nëïdic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caïd

yacnoësh choquid, Cayo cuëmédquid; utsibobi, nidaid Asia yacnoësh choquido: nëidic, Timoteyo cuëmédquid, utsibic Tiquico cuëmédquid, utsibic Tedopimo cuëmédquid. Aidedi icpondash. ⁵ Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. ⁶ Aidedi nidan pan nami uainquioctequid pete ushëtedi tantiec tabadanec Pabado béd cano antabédtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabado béd icquido tabadoapondash.

Eyutico unēsacsho uincuemiaid

⁷ Todoas caid yacno tabadequi dominco ushën Esuquidistu tantiaquidobéd iccuéd-edquin Pabado béd icquidon Esuquidistu unēs uate tantiaquin pan cuësh-cuëshun pebededpondash. Aden piashic Pabado, Badiadash nidebi, quia sh yuec onquepondash inchëshpotsambo yantsécquiec. ⁸ Aid onquiayacno shubu abentséquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chênquepondash. ⁹ Pabado onquenubi nëbi caniaid, Eyutico cuëmédquid, iste shëcuë yacno tsadec ush-casmash ushtotanec abuc uësh paédpondash. Adec paédsho isash bud-budshun unēsacsho isbedednubien ¹⁰ Pabadosen budquin dayumbudec: —Unēsboedi abi tiboquianeque. Shubicuededenda —quepondash. ¹¹ Aden chia sh abuc quënë yacno padpidec dectatoashun abitedishun pebededpondash. Aden piash tabadec Pabado utsibéd onquecuededpondash badiadbudtsécquiec. Adec badiadbudbon Pabado béd icquido shubu nuntanuësh puduem-puduenubien ¹² paédboed aton shubuno utsibobéd nidpondash bédambo yec.

Todoas yacnoësh puduanec Mideto yacno chote

¹³ Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abéd capuquid utsibobéd puduanec nidequi cano antabédtoanec Ason yacno nidoapondabi. ¹⁴ Adec nidequi Ason yacno choshon istuidac Pabado ëbëdi cano antabédtoanquin potiash shubu dadpen icquid Mitidene caid yacno choapondash. ¹⁵ Auëshquio puduanec nidec badiadash acte nënantan nidaid nacdédquid Quio caid datambidanec nidash badiadash acte nënantan nidaid nacdédquid utsi Samos caid datambidanec shubu dadpen icquid Mideto caid yacno choapondash. ¹⁶ Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë nësmequiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

Epeso yacnocquido tsusiobo Pabadon chuibanaid

¹⁷ Adashic Mideto caid yacno tabadtuidshun Epeso yacnocquido Esuquidistu tanti-aquido tsusiobo Pabadon chomepondash. ¹⁸ Aden chomeshun naden aido chuipondash: —Chiembique. Tantiata. Ëbi ënden nidaid Asia caid yacno choash mibéd yuec tabadquin nabanaid mibitedishun istenepondac. ¹⁹ Isadaidbo utsibon Esuquidistu tantiesa icquin cuesunete bunquin mëyanpondashi. Aden mëyanaiqui Nuquin Icbon ëbi chuibeneta cacad-paden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. ²⁰ Esuquidistu mibitedi bédamboen tantiamenuen mates dadpen iccuédadacnoshon chuibanondambi. Adembidi shubu utsin-utsinquec pudued-cuenequin chuibanondambi. ²¹ Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëda isadaidpembo chuibanondambi.

²² “Aden chuibanshobi Nuquin Icbon Mayanën: Edusaden yacno nidta, quequin chuioa-poshi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. ²³ Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iguendac. Adecbidi mibi nauedte quënë iguendac, quequin chioshi. ²⁴ Aden Nuquin Papan Mayanën chuisho tantia shi, Ëbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacad-paden naimbudquin utsi-utsiec yacno nidshun Esuquidistu abimbo tantiaquid Nuquin Papabéd tabadte iguec, quequin chuibanembi.

²⁵ “Nëshunquio Nuquin Papan chiaid ëmbi chuibansho mibitedishun tantiabonaidon nëuëshquio ëbi nidacsho mimbi isoainquio iguendac. ²⁶ Ëmbi nëshunquio Esuquidistu mibitedi chuibanac, Esuquidistu chiambo iccoshi, quetiapimbo mibitedi iguendac. ²⁷ Tantienquioctsiash, quenquiocquin Nuquin Papan tantiacpaden chuibanombi. ²⁸ Aden chuibanash nëbi nidebi. Ëbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bédamboen isban icsamboen nabanec tabadnushe qeshun. Nuquin

Papan Mayanën aido isbanquin chuiquid mibi icnioshe. Adota. Aido Nuquin Papa yacno tabadmenuec Esuquidistu unëspanëdash. ²⁹ Èbi nidan abimbo chiacbimboen chuiquid Esuquidistu tantiaquido chuiquid icnuec choendac. ³⁰ Adembidi mibëdi iccuededquin utsin-utsinquin Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquo icnuequin adoendac. ³¹ Adquid Esuquidistu tantiecc iccuedquido cuëshëdmequid neque. Ista. Adquid iquendac, quequin mibëdi tabadquin ènenquocquin chuibanondambi. Adquid choec, quequin mibitedi chiecc shubiondabi.

³² “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac. ³³ Mibëd tabadec, Min piucquid bec cho, quesa niondabi. Adechbidi, Min dashcute bec cho, quesa niondabi. ³⁴ Èmbibi shubumpi nacnenshun menequin piucquid bedshun con na bedondambi. Adembidi nacnenshun bedshun èbëd capuquido menebanondambi. ³⁵ Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icho Esuquidistu nidaidën tabadec nadpanëdash: ‘Utsin natiapimbocsho menequid Nuquin Papan bëdambo iquebi camiaid nendac. Nabanenquo yec bedshumënquidquo icsho Nuquin Papan bëdambo iquebi camenquo iquendac,’ —quequin Esuquidistun chiacpaden Epeso yacnocquido tsusiobo chuipondash Pabadon.

³⁶ Aden chiashic Pabado Nuquin Papa chuinuec utsibobëd danëshën sebudcuededash onquecuededpondash. ³⁷ Aden Nuquin Papa chiecc onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. ³⁸ Èbi padpiden mimbi isoainquo iquendac, Pabado qesho tantiash shubicuededpondash. Adecc shubiquin dayumbudash unësquio yec Epeso yacnocquido tsusiobo Pabodobëd cano yacno nidanepondash.

21

Edusaden yacno Pabado nidoaid

¹ Epeso yacnocquido tsusiobo acte cuëmano tabadnubi cano antabëdtoanec Pabodobëd capuquido nidquimbi cuebi potiash acte nënantan nidaid nacnëdquid Cos caid yacno choapondash. Badiadnuc auëshquo puduanec nidec acte nënantan nidaid nacnëdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. ² Ambo choashic nidaid Penisia caid yacno cano dapa utsin nidnuequid istuidash antabëdtoanec Pabodobëd capuquido nidoapondash. ³ Adecc nidquimbi acte nënantan nidaid nacnëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. ⁴ Aden buan-buanubi Esuquidistu tantiaquido yacno nidanec puduedash 7tedec ushec Pabodobëd capuquido tabadpondash. Ambo tabadnubi, Edusaden yacno Pabado cuesunuequid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash. ⁵ Aden chiaqui cano icbo nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabodobëd acte cuëmano choash Nuquin Papa chiecc onquecuededpondash. ⁶ Adecc Nuquin Papa chiecc onqueshun, Nidec nid, cac Pabodobëd icquido cano antabëdtoanec Tido yacnoësh acte cuëmano choboedo aton shubuno nidaneopondash.

⁷ Adecc cano antabëdtoanec auëshquo nidec shubu dadpen icquid Todemaida yacno choash Pabodobëd capuquido tabadtuidpondash. ⁸ Adecc anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibëd Uedipe icpondash. ⁹ Aidën champibo 4tedi aton bënënen bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰ Adecc Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash. ¹¹ Adecc choshon Pabodon tsiute bedash tataniadash mëtaniadash Accabo nadpondash: —Nuquin Papan Mayanën naden èbi chioshe. Tantiata. Chuinu. Èmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembo menendac —quepondash Accabo Pabado chiecc.

¹² Aden Accabon chuisho tantiash shubiquin Pabodobëd choboedon Uedipen shubun icquidobëd tan, Edusaden yacno nidenda, quequin Pabado chuioapondash. ¹³ Adoaquien: —¿Atotsi canuen shubiquin èbi icsambo icme? Edusaden yacno nidshun Nuquin Icho Esuquidistu chuibansho èbi taneshun unës uatsiash, quequin tantiaquin abi Esuquidistu

chuiabanuna —quepondash Pabado. ¹⁴ Adoquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, qesho tantiashun: —Ma Nuquin Icho bunacpadec nidpanuna —capondash.

¹⁵ Aden chiaشح Sesadeya yacnoësh puduanec Edusaden yacno Pabadobêd capuquido nidoapondash. ¹⁶ Adec nidsho isash Sesadeya yacnocquid Esuquidistu tantiaquid utsi-utsiec Pabadobêd nidquín Menason cuêmêdqidên shubu yacno buanac puduedpondash. Aid shubu icho Chipide yacnoësh choash Edusaden yacno tabadquid Esuquidistu tantiabênquidbidi nepondash.

Pabado Acobo isaid

¹⁷ Adec Edusaden yacno choacsho Esuquidistu tantiaquidon Pabadobêd capuquidtedi Pabadobêdtabi yuedpondash. ¹⁸ Aden yuedac tabadash badiadash Acobo isec nidoapondash. Acobobêd Esuquidistu tantiaquido tsusiobotedi icpondash. ¹⁹ Adec nidec ambo puduedshun, Mibi isec chobi, quequin, Êmbi Esuquidistu chuiabanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabado chuipondash.

²⁰ Aden chuiabanac Nuquin Papan naid bêdambo iquec, quíash Pabado caic nadpondash: —Nêmo Esuquidistu tantiaquid isadaidbo dadpen iquec. Aido Nuquin Papan Moíses dada uamiampid, Naden nata, quequin chiaid tantiaquido nec. ²¹ Adquidombo icquin, Min bacuêbon shui dêbid dêtemenda, quequin isadaidpembo Pabado chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. ²² Aden chiec tabadquín mibi nêmo choaid tantiash mibi cuesunete buntsiash. Mibi cuesunete bumenuo icmenuequin ¿Atotsi nuqui napeba? ²³ Naden nac bêdambo ictsiashe. Tántia. Chuinu, Pabado. Nêmo êbêd icquido Nuquin Papauidi tantiec tabadnuequid daêd-daêdqúec iquec. ²⁴ Nuquin Papan êbi bêdamboen dayun uadenesho ismenu, quíash nidaid Quedesia yacnoësh, Êbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnenuequid piucquid menembi,” quepondac. Nêbimbobi Edusaden yacno mibi choaac. Nêid dadatedibêd Nuquin Papa tabadte shubu uashunaid yacno nidshun mimbi ênden chiondacted piucquid meniác, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquío Pabado nec, quequin tantiatiasish. ²⁵ Êmbi isadaidpembo Esuquidistu tantiaquid utsibo dada uáquin naden chuiáoombi: “Nuquin Papan, Naden nata, quequin chiaid dada uamiampid nêidtedictsêqui mimbi natequid nendac. Nêidic, Nuquin Papan uaidbimboecnac nacnenaíd tantiaquidon pete sanaid penda; adembidi, min chidouidtsêqui chudta; adembidi chidon min bènêuidi chudmeta; adembidi, nêish cuesaid intacchobi codocaid penda.” Aden dada uabanquin isadaidpembo chiombi —quepondash Acobo Pabado chiec.

²⁶ Aden chiaquien badiadash Nuquin Papa tabadte shubu uashunaid yacno dada 4tedbêd choash Pabado, Nêidnt dadabêdtambi êmbi Nuquin Papan chiacsted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

Pabado bedaid

²⁷ Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoësh choquidon isadaidbon ispondash. Aden isash Pabado bedmete bunec, Isadaidbo utsibo nêishmenu, quec: ²⁸ —Isadaidbotedishun tantiatia. Nêidêmbi Nuquin Papa tabadte shubu uashunaidên puduedtemaid isadaidpembo yuedquin nêid shubu bêda icsa uameboed neque. Bednu. Uidên uaic cho —quequin abimbo chiacbimboec onquecuededpondash. ²⁹ Epeso yacnoësh choquid isadaidpembo Têdopimo Pabadobêd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰ Aden chiac, Icsambocquid bednu, quianec títinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shêcuê bêtashpondash. ³¹ Aden Pabado buanec, Cuesunenu, quec cuêdcuededsho tantiashun chuitanac ³² abi chuiquidbêd sondado cho-chosho isun Pabado cuesbededquin isadaidbon êmpondash.

³³ Adec choshon sondado chuiquidên bedtan cac Pabado bedshun shocosh bucin mêtanemepondash. Aden mêtanemíash: —¿Tsutsi nêid nepec? ¿Atotsi icsamboen naosh? —quepondash sondado chuiquid. ³⁴ Adoquien iccuededquid utsi-utsitsêcquien chiec onquecuedednubi utsi-utsitsêcquien utsi uain chiec cuêdcuededpondash. Adec dadpen

cuëdcuededsho: —Tantiatiapibi ye. Quënën nauedmenu. Buanec nid —quepondash sondado chuiquid sondado chiec. ³⁵ Aden Pabado buanec nidec nauedte shubun dectatonobi cuëdcuededquidon tsucuscuededsëcquien Pabado bednuesho isun Pabado abuc cadoanquin sondadon buampondash. ³⁶ Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

Ambi nabanaid iccuededquido Pabodon chiaid

³⁷ Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiec.

Adoaquien: —¿Quidieco matsesën onqueten onquequidta mibi ne? ³⁸ Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, qeshun mibi bedombi. ³⁹ Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰ Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquo tabad, quequin ismequin Pabodon mëdante uic-uiccapondash. Aden nasho isash isadaidbo otacquo tantiec tabadsho isash: —Ebedeyon, nuquin onqueten mibi chuinu —quec nadece Pabado onquedopondash:

22

1 —Ëmbi naid mibitedi chiembique. Isadaidbo tsusiobobëdta isadaidbo utsibon tantiata.

² Adec aton onqueten Pabado onquesho tantiash isadaidbo otacquo tantiec tabadpondash.

³ Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquo tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. ⁴ Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quënën nauedmeshun unës uamepondambi. ⁵ Ëmbi adobanquin naonaid tsusio dapededishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

⁶ “Adash, ushë abuctoan Damasco caid anoentsëqui choshobi abucueësh shocosh tabote dapa bed-bedquiacimboec chënquequin dëcatepondashi. ⁷ Adec chënquequin dëcatiac nidaidën paëdshun nadece abucueësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tantienu,’ capondashi.

⁸ “Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaid mimbi mëyanaid Esus nebi,’ capondashi.

⁹ “Adnubic ëbëd icquidon shocosh bed-bedquiacimboec chënquesho isequi con Icbon chuisho tantienquo yec tabadpondash.

¹⁰ “Aden dëcatiac uequin ëmbentsëqui tantiec: ‘¿Atotsimbi nape, Icho?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. ¹¹ Adoaquini nidtoquin shocosh bed-bedquiacimboec chënquequidën bëshuacsho isun ëbëd icquidon mëdananquin Damasco yacno buampondashi.

¹² “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquo icsho isadaidbo utsibon bëdamboen isaidquo icpondash. ¹³ Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

¹⁴ “Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuisho mimbi tantierendac. ¹⁵ Aden aid isquin tantiashun utsi-utsien dadpen mimbi isaidbëdta mimbi tantiaid mimbi chuibenendac,’ quequin ¹⁶ chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacimboen utsiibo ismenuen acten mentometa,’ capondashi Ananiasën.

¹⁷ “Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacimboec tsadpondabi. ¹⁸ Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho

tantienquiocquid yec nēmbocquido mibi cuesunete buntsiashe. Edusaden yacnoēsh bad-edquio nidan, quequin Nuquin Icbon chuipondashi.

¹⁹ “Adoquimbi: ‘Aidon isnubi mibi tantiaquid dadpen bedmeshun quēnēn nauedmiondambi. Adembidi, aidon isoanubi mibi tantiaquid utsi-utsien comapenen mēyamiondambi. ²⁰ Adembidi, mibi chuibanquid Esteban cuēmēdquid utsibon cuēnoten se-sequin unēs uanubi se-sequidon dashcute chichshun sanacno tsadquimbi, Unēs uata, capondambi. Isadaidbo tsusiobon ambobidi icquin ēbi onquesho tantiapondash. ¿Adondacshobi cuesunependabi iquec?’ quepondabi Nuquin Icho chiec.

²¹ “Adoquini Nuquin Icbon: ‘Isadaidpemo yacno mibi nidmembique. Nidan,’ capondash —quepondash Pabado ambi nabanaid iccuededquido chiec.

Pabado cuestsenaid

²² Pabado ambi nabanaid chuibansho tantiec iccuededquido otacquo tabadboed, Isadaidpemo, quec Pabado onquesho tantiash: —Tantiatiapibi. Adec onquequid isadaidbo utsibēd tabadenquio ictiadquidi nec. Aid unēs uata —quec cuēdcuededpondash iccuededquido.

²³ Adec cuēdcuededec aton dashcute bēntsecquid canchepamboec dachiquidshun nidaid putu bedtanquin abuc secapondash Pabado chuiboed tantiatemaid nec, quequin ismequin. ²⁴ Adnubien, Cuesunenushe shubu nuntan buanta, quequin sondado chuiquidēn chiac Pabado nuntan sondadon buanacsho isash, ¿Atotsi nasho isash isadaidbo nēid cuesunete bumpeba? Ambi naid icsa chuimenuen comapenen paēmboconoc cuesta, quequin sondado chuiquidēn chuipondash. ²⁵ Adoquien cueste nidtsinacno Pabado buanshun cuestebēdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidēnshun tishaid icsho ēmbi naid chuimiabida ēbi cuese? —quepondash Pabado sondado chuiquid chiec.

²⁶ Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bēboed: “Domanobon nidaidēnshun tishaid nebi,” quiosh —quepondash sondado chuiquid comandante chiec.

²⁷ Adoquien Pabado yacno nidshun comandanten: —¿Domanobon nidaidēnshun tishaidta mibi nepe? —capondash Pabado chuiquin.

Adoquien: —Ai, domanobon nidaidēnshun tishaidquio nebi —quepondash Pabado.

²⁸ Adoquien: —Domanobon nidaidēnshun tishaidpenquio ēbi icsho, ¿ada adquid ēbi icmetsia? quequin piucquid meniondambi —quepondash comandante Pabado chiec.

Adoquien: —Con tan tishaid yec domanobo nebi —quepondash Pabado comandante chiec.

²⁹ Aden Pabado chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucun mētanemechitombi, quequin tantiec comandante dacuēdpondash.

Isadaidbo tsusiobo iccuededacno Pabado buanaid

³⁰ Adshumbic, badiadshun ambi mētanemeboed chimeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nēid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nēnantanquio Pabado nidtomepondash.

23

¹ Aden nidtomiaquien isadaidbo tsuiouidi comapenen isec: —Utsibo, ēmbi naid chuibanu. Tantiata. Nuquin Papan isnubi ambi naden nata quequin chiaid nabanquidquio icteniobi —quepondash Pabado.

² Aden chuisho tantiashun: —Muaquin chieque. Ēccues —Isadaidbo tsusio dapan Ananiasēn cac Pabado dayunquio icquidēn Pabado ēccuespondash.

³ Aden ēccuesaquien Pabado: —Mibi icsaid nibēdacbimboec mibibi tsadsho Nuquin Papan mibi ēccuesmendac. Nuquin Papan naden nata quequin chiaid tantiembi, quequimbi ēbi ēccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

⁴ Aden Pabado chuisho tantiash aton dayunquiocquidquio: —¿Aden Nuquin Papan isadaidbo tsusio dapa icta caid chiash dacuēdenquioda iquec? —quepondash.

⁵ Adoquien: —Ēmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquio icsho ēmbi chuibocpaden chienquio ictsenombi. Mimbi abimbo chioc. Ēmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶ Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ēbibi padiseyobon tishmiaid nebi. Adquid yec, Unēsash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ēbi mimbi chiec —quepondash Pabado iccuededquido caic. ⁷ Aden Pabado chiaquien saduseyobo, Uincuenta nibēdendac, quequin ėmbi tantiacpaden Pabado tantienquid iquec, quec comapenec onquecuedednubi padiseyobo, Uincuenta iquendac, quequin ėmbi tantiacpaden Pabado tantiec, quec comapenec onquecuededpondash. ⁸ Unēsash uincuentequid nibēdec, quec saduseyobo. Adecbidi, Nuquin Papan uaid mayan bēdabēd ambi uaid utsi mayan nibēdec, queoaic saduseyobo. Padiseyobo, Uincuentequid iquec, quec. Adecbidi Nuquin Papan uaid mayan bēda, ambi uaid utsi mayambidi iquec, queoaic.

⁹ Aden ambi tantiacpaden chuibanec comapenec onquec saduseyobobēd padiseyobo natiambo cuēdcuededpondash. Adec onquec cuēdcuedednubi padiseyobo, Nēid dada bēdambocquid nec. ĶMayanēn chioshi, qeshodambi muec nec capadi? Adecbidi, ĶNuquin Papan uaid mayan bēdan chioshi, qeshodambi muec nec caoapadi? Padenquo iquēmbi. Pabado chuiboed abimbo iquec, quepondash padiseyobo saduseyobo caic. ¹⁰ Adec comapenec onquec natiambo chushcanansho tantiashun comandanten: —Podon shoyonquin canite dēchicnushē qeshun mēnchicshun shubu nuntan bēoata —cac sondadon Pabado mēnchicpondash.

¹¹ Aden mēnchicshun shubu nuntan sondadon yuedaquien Pabado ushash badiadash padpidec inchēshēn Pabado ushnuhi Nuquin Icho chopondash: —Mimbi Edusaden yacnoshon ēbi chuibanacpaden shubu dadpen icquid Doma caid yacnoshontsen mibi chuibamembique. Dacuēdenquo yec dayacquo icta —capondash Nuquin Icho Pabado chuiquin.

Pabado cuesunenu quequin ompoquin cainaid

¹²⁻¹³ Adec Pabado bēd Nuquin Icho onquebombien badiadash isadaidbo 40ted Pabado cuesuniabi icquin buna mēmumēmbi, quequin abimbo chiēmbi, quepondash. ¹⁴ Aden nanu quiaish isadaidbo tsusiobo yacno nidash: —Pabado cuesuniabi icquin buna mēmumēmbi, quequin muenquiocquin chuibanombi. ¹⁵ Ēbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabado naid bēdamboen tantianuna. ĶAda padpiden isadaidbo tsusiobo iccuededte shubuno bēmeoatsia? quequin chuitan Pabado bēmeoatsiashe. Aden Pabado sondadon bēsho Pabado cuesunenu —quepondash Pabado cuesunenuquido isadaidbo tsusiobo caic.

¹⁶ Aden aidon chuishobien Pabado piaquēn tantiashun Pabado yacno nidshun chuioapondash aton piaquēn.

¹⁷ Adoquien Pabado sondado 100ted chuiquid cho, cata cac nidshun aton piaquēn chiac Pabado yacno sondado chuiquid chopondash. Adec chosho isun: —Nēid con piac nec. Aidi comandante chuite buneque. Aid yacno buanta —Pabado cac ¹⁸ buampondash.

Aden Pabado piac comandante yacno buanash sondado 100ted chuiquid: —Quēnēn nauedboed Pabado cuēmēdquidēn ēbi chomeshun: “Con piac comandante chuite buneque. Aid yacno buanta,” cac bēombi —quepondash sondado 100ted chuiquid comandante chiec.

¹⁹ Aden chiaquien Pabado piac mēdinanquin udictsēc buanash comandante: —ĶAtotsi ēbi chuinuec cho? —quepondash comandante.

²⁰ Adoquien Pabado piac: —Badiadshun isadaidbon ambi namiaid mibi yacno chomec. Aden chomiac nēmbō choshon naden chiec: “ĶAda isadaidbo tsusiobo iccuededte shubuno Pabado mimbi bēoapatsia? Aidēn naid chuibansho bēdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. ²¹ Isadaidbon muaquin chiendac. Con cu Pabado buamenuen mibi aden chiendac. Comandanten Pabado bēmetsiashe, quequin tantiaquin Pabado con cu cuesunenuquin caineque. Nidmenda. Con cu cuesunenuquid: “Pabado cuesuniabi icquin buna mēmumēmbi,” quiosh. Con cu cuesunenuen nēbimbobi podqued cuēmanshun ompodshon cainec —quepondash Pabado piac comandante chiec.

²² Adoquien comandanten: —Isadaidbon chiaid mimbi chuiboed utsi chienquo yec nidec nid —capondash Pabado piac chuiquin. ²³ Aden Pabado piac nidmeshun sondado 100ted icquido chuiquid daēd chomiashe comandante nadpondash: —Ēnden inchēshan Sesadeya yacno ma mibēdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuioata. Adomboembidi shocosh siantēn senuequin sananquid 200ted icquido chuiquin mitsana nacnenta, quequin chuioata. ²⁴ Adembidi Pabado bēd icquido cobednadod Pediques yacno buanun cabayo nacnenta —capondash comandanten sondado 100ted chuiquid daēd chuiquin.

²⁵ Aden chuishumbic naden comandanten dada uapondash Pediques cobednadod caid chuiquin: ²⁶ “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta. ²⁷ Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantianshun sondado dadpembëd choquin mënichiccombi. ²⁸ Aden mënichicshumbic, ¿Atotsieshun Pabado cuesunete bumpoc? quequin tantianuen isadaidbo tsusiobo iccuededacno Pabado buamiombi. ²⁹ Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabodon chuisho tantianshun quënën nauedenquioctiadquidi nauedmepondash, quequin tantianshumbi quënën nauedmeopombi. ³⁰ Aden Pabado quënën nauedmeoashumbic, Podqued cuëmashun Pabado cuesunenuequin isadaidbon cainec, qesho tantianshun badedquio mibi yacno buamiombi. Adembidi, Pabado icsambocquid nec, quequin aid cuesunuequido mibi yacno nidmëmbi. Adoac ma ambibi Pabodon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: — Pabado bëdta nëid cobednadod Pediques menenuen buanta — capondash comandanten.

³¹ Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash. ³² Ambo choash badiadshun sondado cabayo catsadquidonuidquio Pabado buanec nidnubi sondado utsitedi auchidi nidaneoapondash. ³³ Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaid bëdta Pabado Pediques menepondash cabayo catsadquidon. ³⁴ Aden meniaquin dada uaid isbanash: —¿Mitsicquid nidaidën icquid mibi ne? — capondash Pediquesën Pabado chuimenuen.

Adoquien Pabado: —Nidaid Sidisia caid yacnoshon tishaid nebi — quepondash.

³⁵ Adoquien: —Mibi icsambocquid nec, quequin chuiguido isadaidbo choacsho mimi nabanaid chuimëmbi — quepondash Pediques Pabado chiec. Aden chiec onqeshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuenushe ista — capondash sondado chuiquin.

24

Pediquesën tantianubi Pabodon ambi naid chiaid

¹ Adashic, Stedec ushah isadaidbo tsusio dapa Ananiasbëd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tëdudo cuëmëdquid bëquin. ² Aido chosho isun Pediquesën Pabado chomicasho isun isadaidbo tsusiobon tantiacpaden chuinuequidën Tëdudon naden Pediques chuipondash: —Mibi chuinu. Tantia. Chuiquid bëdambocquid icquin mimi bëdamboen nabanac isadaidbo bëdamboec tabadec. ³ Mimi aden nabansho isun, Bëdambocquid mibi nec, quequin mibi chiëmbi. ⁴ Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

⁵ “Nëid mimi bëmeboed Pabado caidbëd ictiapimbo iquebi. Nëid Nasaded yacno iccondaid tantiaquido tsusio nec. Aidëmbi nidaidtedi yacno nidshun ambi tantiaid chuibanquin isadaidbo comapenen chushcamequin cuëdcededmiac cuëshëd-cuëshëdposh. ⁶ Aidëmbi Nuquin Papa tabadte shubu uashunaidën puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadëmbi cuidte bumpobi. ⁷ Aden cuidnu quenubien comandante Disias cuëmëdquid choshon Pabado mënichicanquin buamposh. ⁸ Pabodon ambi naid chuisho mimbibi tantianshun, Isadaidbo tsusiobon abimbo chiosh. Icsambocquid nec, quequin mimi chuioapatsiac — quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

⁹ Aden Tëdudon chuiquin nainan isadaidbotedi, Ai, Tëdudon chiacpadec iccosh, quequin chuibededpondash.

¹⁰ Adsho tantianshun, Onqueta, quequin mëdante uiccaquin Pediquesën ismiac Pabado nadec onquepondash: —Chuiquid dapan tantiata. Ëmbitsen chuinu. Dadpen seta matamequin con matses isadaidbo abi chushquiaid tantianshun mimi bëdamboen tantiacpaden namedenic. Adquid mibi nec, quequin tantiaquin, Ëmbi naid chuibanec bëdambo iquebi, quec dacuëdenquio yec onquebique. Tantiata. ¹¹ Edusaden yacno choash ambobi 12tedec ushobi. Ëbi anoshon ishoedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. ¹² Ambo puduedash utsibëd chushcananenquio yec tabadsho istuidash,

Icsambocquid nec, queposh. Adembidi chuibanquin utsibo nëishmequin chushcamenquo iccombi. Pabado icsambocquid nec, quequido Pabadon chiaid abimbo iquec, quetiadquidi nec. ¹³ Ĕmbi naid Tedtudon chuiboed, Abimbo iquec, quetiapimbo iquec tsusiobo. ¹⁴ Nēiduidtsēqui abimbo iqueque. Chuinu. Tantia. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquo nebi. ¹⁵ Adembidi, matses unēsacsho Nuquin Papan uincueniac abi tantiaquid abēdi tabadnubi abi tantiesa chian anēdēnquequid nēsecaindac, quequin tantiemi isadaidbo tsusiobon tantiapademi. ¹⁶ Aden tantiaquin Nuquin Papan, Bēdamboen mimbi naoc, capashuni, quequin bēdamboen nabanec tabadec nebi. Adembidi, matstedishun, Bēdamboen mimbi naoc, capashuni, quequin adomboembidi bēdamboen nabanec tabadec nebi.

¹⁷ “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiaish piucquid menueuc choapobi. Adembidi, Nuquin Papan bēdamboen dayun uabenioshi, quequin piucquid menueuc choapobi. ¹⁸ Aden menueuc abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. ¹⁹ Ĕbi capusho istuidquido isadaidbo nidaid Asia caid yacnoēsh choquido niosh. Aido, Pabado icsamboec tabadsho isombi, quepac caosh. Ambi chiaid abimbo icnuc nēshuntsen adomboembidi chuitiadquidi nec. ²⁰ Adembidi isadaidbo tsusiobon: ‘Padiseyobo yec bēdamboquid nec,’ quequin ēbi anoshon chiapadembidi nēshuntsen adomboembidi chuiotiadquidi nechitec. ²¹ Anoshon nēiduidtsēqui chiec comapenec cuēdobi: ‘Unēsash uincuentequid iquec,’ quequin chuisho tantiaishun, Icsambocquid nec, quequin isadaidbo tsusiobon ēbi mibi chiec caimbi — quepondash Pabado Pediques chiec.

²² Aden Pabadon chuisho tantiaish Pediques tantiauidquid iquec: —Nēbi mimbi aidtedquo chuibansho tantiemi. Comandante Disias nēmo choan mibi padpiden chuimembi —quepondash Pediques Pabado chiec. ²³ Aden chuishumbic naden Pediquesēn sondado chuipondash: —Shubuno Pabado buanshun puduednushē qeshun ista. Abi menuequid abi isuequid chedo chosho isun yuedta —quepondash Pediques ambi Pabado ista caid chiec.

²⁴ Adashic, daēdpactsēc ushash Pediquesbēd aton chido, Dusidia cuēmēdquid chopondash. Aton chido isadaidbo icpondash. Adec aton chidobēdi choshon abi yacno Pediquesēn bēmiacsho ambi tantiaid Esuquidistu Pabadon chuibanac Pediquesēn tantiauidpondash. ²⁵ Aden chuibanquin Pediques Pabadon nadopondash: Utsin abi utsibēd chushcananaid chuibanacsho Nuquin Papan chiapaden aidō nametiaid, quequin chuipondash. Adembidi, Icsamane quequin Nuquin Papan chiapadenuidi nabanta, quequin Pediques chuiopondash Pabadon. Adembidi, Esuquidistu tantienquo icsho chian anēdēnquequid Nuquin Papan nēsecanushe quequin Esuquidistu tantia, quequin Pabadon chuiopondash. Aden Pabadon chuisho tantiaish: —Padi. Ĕmbi naid nibēdsho isun padpiden chuimenuen mibi bēmeoaimbique. Nēbi nidec nid —cac Pabado nidpondash. ²⁶ Adshumbic, adembidi abi yacno Pabado Pediquesēn bēmeded-bēmededpondash. Nidtiadquido icquin piucquid Pabadon ēbi menetsiaish, quequin tantiaquin Pabado bēmiaish aidbēd Pediques onquepondash.

²⁷ Adashic, seta daēd matamiash Podsio Pesto cuēmēdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesēn Pabado shubu nuntan niampondash naden tantiaquin: Pabado shubun nauedshun Ĕmbi niansho isash, Bēdamboquid nec, quequin isadaidbon ēbi cain chuibededpec, quequin Pediquesēn Pabado shubun nauedshun niampondash.

25

Pabadon ambi naid Peston chuimiai

¹ Pesto cobednadod yanash Sesadeya yacno choash 3tedec ushanec Edusaden yacno nidpondash. ² Adec Pesto Edusaden yacno choash tabadsho isadaidbo tsusiobo, Pabado chushcaquido: ³ —Ĕbitedi bēdambo icmenuequin Pabado Edusaden yacno ada bēmeoatsia? —quepondash Pesto chiec. Pabado bēsho cuesunenuequidon cainshun cuesunepc, quequin tantiaquin isadaidbo tsusiobon aden Pesto chuipondash.

⁴ Aden chuisho tantiaish Pesto: —Sesadeya yacnoshon nauedaid Pabado iquec. Ambo nidebi. ⁵ Pabadon icsamboen naosh, quec utsi-utsiec ēbēdi nidshun anoshon Pabadon naid icsa ēbi chuita —quepondash isadaidbo tsusiobo caic.

⁶ Adashic, 10tedec ushash Edusaden yacnoēsh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bēmepondash isadaidbo tabadnubi. ⁷ Aden bēmiacsho isash Pabado dēcatec

isadaidbo Edusaden yacnoësh chobedo Pabadon naid chiec abimbo chiacbimboec onquecuededpondash.

⁸Aden isadaidbon chiaquien: —Ëmbimbo isadaidbon naden nata quequin chiaid niacam-boccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobêd puduedambocobi. Adembidi, empedadod Doma yacno tabadquid, Sesad cuëmêdquidên chiaid niacam-boccombi —quepondash Pabado.

⁹Adoquien: —¿Edusaden yacno nuac anoshon adomboembidida isadaidbo tsusiobo chuiotsia? —quepondash Pesto Pabado chiec. ¿Edusaden yacno Pabado ada bêmeoatsia? quequin isadaidbon chiacpaden nanuec Pesto adpondash. ¹⁰Adoquien Pabado: —Domanobo ancaquidên empedadod caidên, Sesad cuëmêdquidên, Mibi yacnoquido bédamboen tabadmequid icta, caid icquin mimimbo chushcananquid bédamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimbi tantiec. ¹¹Icsambocquidquio iquec Pabado unês uame, quesho tantiash, Adoanenda, quenquiocsiabi. Isadaidbon abimbo chiacbimboen chuisho tantiash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ëmbi naid chuite bunebi, quequin dada uaindami —quepondash Pabado Pesto chiec.

¹²Aden Pabadon chuisho tantiash Pesto udictsêc nidash abipadquidbêd onquiash choash: —Sesad ëmbi naid chuite bunebi, mibi quesho aid yacno mibi buamenuna —quepondash Pesto Pabado chiec.

¿Atotsimbi Pabado napatsia? quequin Peston Aquidipa caid

¹³Adashic daêdpacksêc ushash ancanquid utsi Aquidipa cuëmêdquidbêd aton chuchu Bedenise cuëmêdquid Pesto isedec chopondash. Sesadeya yacnoquido cobednadod Pesto yanosh, quequin chiac aid isec chopondash. ¹⁴Adec isedec choash dadpen ushec tabadsho isash Pabado chiec Pesto nadpondash: —Pediquesên quênên nauedmiaid Pabado cuëmêdquid chuinu. Tantiata. Aidi abi iquec shubu nuntan. ¹⁵Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unês uata, quequin isadaidbo tsusiobo chuiposhi.

¹⁶“Adoquien, Mibi abêdi chushquiaid Pabadontsen chiambocon unês uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. ¹⁷Aden chiac nêmbô choshon abi chushquiaid aidon chuisho tantiec tsadnuen Pabado bêmioimbi. ¹⁸Aden Pabado bêmiascho ëmbi tantiacpaden abi chushcaquidon Pabadon naid chienquiocposh. ¹⁹Ëmbi tantiaidpenquio Esuquidistu unêsash uincuenaid Pabadon tantiaid icsambo iquec, quequin chuiposhi isadaidbo tsusiobon. ²⁰Aden ambi tantiaidquio bédamboen tantienquio yec nadpobi Pabado caic. Min matsesên naden nata quequin chiaid tantienquio iquembique. Edusaden yacno buamiac mimbi naid anoshon chiac bédambo ictsiash, quequin chiombi. ²¹Adoquien: ‘Empedadod, Sesad yacno nidshun ëmbi naid chuitiadquio iquebi,’ queposh Pabado. Aden chiac quênê yacnoshon aid puduedmetiapimbo iccobi. Nêmbobi Pabado quênên tabadec —quepondash Pesto Pabado chiec Aquidipa tantiamenuequin.

²²Adoquien Aquidipa: —Ëbi aidên chuibansho tantiate bunebi —quepondash.

Adoquien Pesto: —Badiadshun aidêmbi chuisho mimbi tantienac —quepondash.

Aquidipa ambi naid Pabadon chiaid

²³Aden Peston chiaquien badiadash bédaidquio dasiuidash Aquidipabêd aton chuchu choash iccuedte quênên puduedash sôdado chuiquido chuiquid utsibobêd aid daêdi tabadpondash. Aido tabadsho isun Peston Pabado bêmepondash. ²⁴Bêmiascho Pabado nênantanquio nidtonobi Pesto nadpondash: —Ancanquid Aquidipan mibêd iccuededquidon ëmbi bêmeboed mibitedishun isec. Aidi chuinu. Tantiata. Isadaidbon, Nêid dada icsambocquid neque. Unês uame, quequin chioshi. Ëbi Edusaden yacno choacsho isun adoposh. Adomboembidi nêshun Sesadeya yacnoshontsen aidombidi chuioposhi. ²⁵Aden chuisho tantiashun nêid ambi naid chuimeopombi. Aden Pabadon chiaidtsen tantiashun, Nêid unês uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabadon chuiposhi. Adoac Doma yacno aidi buamenuna. ²⁶Aden buamenuen ¿atotsimbi dada uaquin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbi cac dada uatsiambi. ²⁷Ambi icsamboen naid nibêdnuc Doma yacno buametiapimbo iquebi —quepondash Pesto ancanquid Aquidipabêd iccuededquido chiec.

26

¹ Aden Peston chiaquien: —Mibibi onquequin mimbi naid chui. Tantianu —quepondash Aquidipa Pabado caic.

² Adoquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bédambo iquebi. ³ Isadaidbon naden nata quequin chiaidbêdta abi onquiaid mimbi tantiec. Aden tantiaquid mibi icscho ëmbi nabanaid ëmbi chuibansho tantiata. Chuinu.

⁴ “Ëbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi. ⁵ Ëbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. ⁶ Unësash uincuenta iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ëbi icscho isash, Icsambocquid nec, quec isadaidbo. ⁷ Nuquin tsusedpa Acobo isadaidcaidën madobon tsyuecquidon, Unësacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. ⁸ Nuquin Papan nadatiambocquin uincuemete chiaid mimbi tantienquo icpe.

⁹ “Ënden ëmbitsen tantiauidquin shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unës uamembi, qeshun adobampondambi. ¹⁰ Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bédambocquid icscho bedshun quënën nauedmepondambi. Unës uanu, qesho tantiash, Ai, unës uatiadquo iqueque. Adota, quepondabi. ¹¹ Nuquin Papan chiaid chuibante shubu utsi-utsiec yacno nidted-nidtedondabi aido mëyamenuc. Esus, Nuquin Papan madopenquo nec, aido camenuc mëyamepondambi. Adembidi nidaid utsi yacnoshonsen adquid istuidshun mëyameopondambi.

¹² “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. ¹³ Adec nidquimbi ushë cuembo yanec ushë comapenec chënquequidën ëbêd icquidobêdta ëbi dëcatesho isondambi. Abimbo iquec, quequin mibi chuinu. Ancanquid dapan tantiata. ¹⁴ Aidën dëcatiac ëbitedi nidaidën uebudcuededondabi. Adec uequimbi con matsesën onqueten ebedeyon onqueten abucuehsh onquesho naden tantiondambi: Saudo, çatotsieshun ëbi tantiaquido mimbi mëyampe? Ëbitsen mëyantiadpambocquin mimbi aido mëyanec, quec onquequin chiondashi.

¹⁵ “Adoquimbi: ‘çTutsi mibi ne, Icbo?’ caondac.

“Adoquien, Mimi mëyanai Esus nebi. ¹⁶ Ëmbi namiaid mibi icmenuc chobi. Esus isombi, quequin çëbi chuibeneta caid nëbi mibi yanec? Ëbi chuibenequin mimbi isaïd bêdta ëmbi yuecshun ismetequid chuibeneta. ¹⁷ Aden ëbi chuisho mibi cuesunete bunquid isadaidbôbêd Isadaidpembo icscho mibi mënchiquendambi. Adquid chuibanta, quequin mibi nidmembi. ¹⁸ Aden chuibanac utsin-utsinquien pashuacimbocœdëmbi tantiendac. Icsambocquid nebi, quequin tantienquochoedi, Icsaobique. Ëbi pauc, Papa, quependac adquid. Mayan icsan yua icboedi Nuquin Papan bacuë iquendac. Adquid yanash abi icsaid paucac Nuquin Papan bédambo icmiaid ëbi tantiaquid utsibêd iquendac, quequin Esusën chuipondashi.

¹⁹ “Aid abucuehsh onquesho tantiashun chieshenquiocquin chuibeniombi caimbi, mibi chuiquin Aquidipa. ²⁰ Damasco yacnoshomba chuibanondambi. Anoshomba chuiban-shumbic Edusaden yacnoshonsen chuibanoaondambi. Anoshon chuiban-shumbic nidaid Udeya caid shubu utsi-utsiec yacnoshonsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiacpaden nabanta, quequin chiombi. ²¹ Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. ²² Padnuen ëbi dayun uaquid Nuquin Papa icquin isadaidbon cuesunenushe qeshun cudasëmposhi. Adoac naid ushëquo mibêdtabi mimbi namiaido mibi chuibanec nebi, ancankquid Aquidipa. Moisesën, Nadquoio iquendac, quequin dada uampicpaden chuiquid nebi. Nuquin Papan chuimiaid utsibon, Nadquoio iquendac, quequin chiampicpaden chuiquidbidi nebi. Aidon chuipampid nadquoio iqueque. Tanta. ²³ Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbêdi tabadendac, quequin aton matsesbêdta isadaidpembo Quidistun chiendac, quequin chiampicpadec chopanêdash —quepondash Pabado iccuededquido chiec.

²⁴ Adec Pabado onquesho tantiash: —Min tantiate icsabudash mibi onquec. Mimi tantiaid dadpen iquec tantienquo yec onquechitequien mibi nec —quepondash Pesto Pabado caic.

²⁵ Adoaquien Pabadon: —Bëdamboen tantiec onquebi. Ęm̄bi chiaid abimbo iquec, caimbi mibi ancaquid Pesto. ²⁶ Ancanquid Aquidipan Ęm̄bi chuibamboed abimbo iquec quequin tantiec. Aden aidĕn tantiasho dacuĕdenquiocquin aid chiembi. Ęm̄bi chuibamboed ompoenquiocquin isquidon chuisho aidĕm̄bi tantiapondash. ²⁷ Nuquin Papan ambi naden nanun chiaid dada uamiampidon chiaid chuisho mimbi tantiec —capondash Pabadon Aquidipa chuiquin.

²⁸ Adoaquien Aquidipa: —¿Mimbi chuiboedtedtsĕqui tantiashtabi Esuquidistu tantiaquid yampe? —quepondash Aquidipa Pabado chiec.

²⁹ Adoaquien Pabado: —Esuquidistu tantiaquid ĕbipadquid mibĕd iccuededquidtedibi Nuquin Papan icmepashun. Nĕid ushĕnquo daĕdpactsĕc chiombi. Aidtedtsĕqui chiac tantiatiapimbocho isun yuen chuibantsiambi ma Esuquidistu tantiaquid mibitedi yaneshun. Padnuen ma mĕtaniaid ĕbipadquid ma mibitedi iquenquiocpanuna —quepondash Pabado.

³⁰ Aden Pabadon chuibanaquien ancanquid Aquidipa nidtopondash. Nidtocho isash Pestobĕd Bedenise iccuededquid utsibo chedo nidtochedudpondash. ³¹ Adec nidtochedudash puduenash onquecuedec: —Chuibamboed icamboen nainquioccho. Adoenquiocsho unĕs uainquioctiad. Adembidi ĕnden quĕnĕn nauedenquiocpatecnĕdan —quepondash ancanquid.

³² Aden chiash: —Empedadod chuite bunebi Pabado quiambocsho quĕnĕn nauedacnoshon aidi mimbi nidmetsenosh —quepondash Aquidipa Pesto chiec.

27

Doma yacno Pabado buanaid

¹ Adashic, Nĕbi mĕtaniaido nidaid Itadia caid yacno buanac bĕdambo iqueque. Pabadobĕda mĕtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuĕmĕdquid icpondash. Domanobo ancaquid tantiec aid cuĕmĕdacpadec Aucustobo nebi quec sondado 100tedbĕdi abi chuiquid abibi cuĕmĕdpondash. ² Aden buanta cac Pabadobĕda utsibo bedshun acte cuĕmano buanshun cano dapa Adadamitio cain cuĕnaid istuidpondash. Aid cano dapa istuidashien, Icbo, nidaid Asia caid cuĕman shubu dadpen icquid utsi-utsiec yacno nidtuidebi, quequin chuisho tantias Pabadobĕd antabĕdtopondabi. Adec antabĕdtocho isash puduampondash. Pabadobĕd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoĕsh choquid icpondash.

³ Adec cano antabĕdtoanec nidquin shubu dadpen icquid Sidon caid yacno buampondash. Ambo choash, Mitsana nibĕdeque. Mibi yuedquid yacno nid. Aidon mibi menetsiash, quequin Pabado bĕdamboen tantiaquin sondado chuiquidĕn, Udion, chuipondash.

⁴ Adshombic Sidon caid yacnoĕsh puduanec nidquin potesho cunquequidĕn bĕquedtuicac ushĕ choacmi cuenadtanquin acte nĕnantan nidaid nactnĕdquid Chipide caid datampondash. ⁵ Adembi nidaid Sidisia caid ĕquĕ datanash nidaid Pampidia caid ĕquĕtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. ⁶ Ambo choshombic sondado chuiquidĕn cano utsin nidnuequin nibĕnquin istuidpondash. Nidaid Equipito caid yacno shubu dadpen icquid Adecandedia caid yacnoĕsh choboedi nidaid Itadia caid yacno buanu caid istuidpondash. Aden aid istuidshun Pabadobĕd icquido aid canontsen antabĕdtomepondash. ⁷ Adec Mida yacnoĕsh puduanash nidquin potec dadpen ushacsho cunquequidĕn cano bĕquedtuicac. Aden bĕquedac bĕdiactĕc nidquimbi shubu dadpen icquid Nido caid ĕquĕbitsen datamidanec acte nĕnantan nidaid nactnĕdquid Quideta caid yacno buanoapondash. Uquĕ cuĕma utsiuc Sadmon caid icpondash. ⁸ Ushĕ choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udicsĕc shubu dadpen icquid Dasia caid iccondash.

⁹ Cunquequidĕn bĕquedac yuenquio potiactanetsĕcquien buampondash. Comapenec cunquequidĕn nuqui bĕquedendac, quequin tantiaquin Pabadon nadopondash: ¹⁰ — Chuinu. Tantiata. Nĕuĕshquo puduanquin potesho cunquequid dapan bĕquedshun cano chic-chictsiash. Acten mentoadmane quequin potenquio iquembi, quequin chuita — capondash Pabadon sondado chuiquid chuiquin. ¹¹ Aden Pabadon chiaqui sondado chuiquidĕn niacbidanquin cano icbobĕd^{tan} cano nidmequidĕn nidnu quequin chiaid tantiapondash. ¹² Cunquequid dapa cunquenubi Buenos Puedtos yacno tabadec iquen uanquid dapanquio nuqui iquenendac, quias shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

Acte dapa potesho cunquequid dapanquio cano bĕquedte

¹³ Nuqui iquenendac, quequin tantiaquin bēdiactšēc cunqesho isun abi bunac-paden nanuequin cano uidēn uate shocosh yuēmbocquid indoash puduanquin Quideta cuēma anoentsēqui buampondash. ¹⁴ Adec nidequi udictšēc yanshobi ushē cho-choaid ēquēctšēcshun Quideta caid nidaid mananucūēsh cunquequid dapa choquin bēquedtuiddquin ¹⁵ icbon cano nidmetiapimbocnobi cano buampondash. ¹⁶ Aden cunquequidēn buanaqui acte nēnantan nidaid nacdēquid utsimpi Quēdauda caid ēquēbictšēc cuenadquimbi canompi cano dapan nēshun buanaid buanushe qeshun anandopondash. ¹⁷ Aden canompi anandoshon cano dapa canchednushe qeshun uidēn uaquin datanebanshumbic cano buante dashcute abi dectante cuestebēdtabi imbudshun dashcute chicacsho cunquequidēn cano comapenen buampondash. ¹⁸ Aden cano cunquequid dapan buanubi badiadnuc acte natiambo tēccoasquesho isun ambi ansandoshon bēboed acte nēsiapondash. ¹⁹ Adshumbic 3tedec ushun bucu dēnēshun cano dashcute indotetedi nēsiaopondash. ²⁰ Aden nēsecanec nidquimbi inchēshēn ushēbēdta uispa abu chēshēn bētinacsho isenquio iccondambi. Adem-bidi badiadēn ushē isenquio iccondambi. Dadpen ushquin aitedi isenquiocondambi. Aited isenquiocnobi acte comapenen tēccoascapondash. Ad icsho isash, Bēnudchitequien nuqui iquec, abitedimbo quecuededpondash.

²¹ Adequi nuqui iquec, qeshun buna mēmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoēsh puduanenda caombi. Adsho tantiaboshi tantienquio yec mibi puduampoc. Ēmbi chiapaden nabanuc mimbi ansandoaitedi abi ictsiandac. Adecbidi, Unēsebi, quenquio nuqui ictsiandac. ²² Padnuen acte tēccoasquenubi nuquitedi unēsenquio iqueque. Dacuēdenquio yec dayacquio icta. Canouidi canched-canchedendac. ²³ Nuquin Papan namiaidquio nebi. Adquid icsho inchēshēn ambi uaidēn mayan bēdan ambi chomiaidēn naden chioishi: ²⁴ “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibēd icquidtedi acte yacnoshon mēnchiquembique. Dacuēdenquio yec tabad,” caposhi Nuquin Papan uaid mayan bēdan. ²⁵ Aden aidēn chiac dayacquio icta. Nuquin Papa ambi chiapaden nabanquid nec, quequin tantiembi. ²⁶ Adembidi, acte tēccoasquequidēn nuqui acte nēnantan nidaid nacdēquid cuēmano buanshun cano cancheshunendac, quequin tantiombi —quepondash Pabado canon antabēdtoaido chiec.

Cano canched-canchedaid

²⁷ Adashic, Buenos Puedtos caid yacnoēsh ēnden nidboshi 14tedec ushec acte Adidia caid yacnoshon cunquequidēn buampondash. Aden acte tēccoasquequin buanubi inchēshpotsembo yanuc, Cuēma anoentsēquien nuqui choendac, quequin cano nidmequidon tantiapondash. ²⁸ Aden tantiaquin, ¿Tionda iqueque? Tanu, qeshun yuēmbocquid shocosh bucu dēdectanshun pumbudquin tampondash. Aden tanshun, Aidiompenuquio iquec, quequin chuipondash. ²⁹ Nidaid cuēnote dapa cunquequidēn buanquin cano semenushe qeshun cano uidēn uate dapa yuēmbocquid tsitsumi tsidectanshun acte nēnequin uidēn uash ma badiadbono quiaish tabadpondash. ³⁰ Adec tabadnubi cano nidmequido cuenueshun dēbiate yacnoshontsen cano uidēn uate yuēmbocquid dēdectanuequin abimbo chiacbimboen canompi anandoboed nēnetsempondash. Cano dapa mentoadtsiash, qeshun cuenequin adopondash. ³¹ Adec auid nidsenubien Pabado: —Cuenequido canompin nidnuc cano dapan nidquido nuqui mentoadendac —quepondash sondado chuiquid caic. ³² Aden Pabaton chiaquien abi dectante bucutedi sēnac canompi nēpaēdpondash cuenequido nidtiapimbo yec.

³³ Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsēcquin mimbi piambococ. ³⁴ Mibi mentoadenquio iqueque. Min manēdaid abentsēc paēdenquio iqueque. Penquiochoedi unēschitomane quenquiocquin peta —quepondash Pabado. ³⁵ Aden chuishumbic utsitedi ismequin pan bedshun Nuquin Papa chuishun pan cuēshun Pabaton pepondash. ³⁶ Aden Pabaton pesho isun, Nuquitsen penuna, qeshun abitedishun peshumbic, Cuēmano nidec, quequin ambi sandoid utsitedi tiedēn caniquid ēshē acte nēsiapondash, Cano yuēmbo iquec, qeshun.

³⁹ Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsho isun ambo cano nidmenueshun ⁴⁰ uidēn uaid tebanac acte nēpaēdpondash. Adem-bidi, cano dēbidiadmete bucutedi seccudoashun cano dēbiateno buanquin dashcute shoyontanquimbi cadoapondash, Cunquequidēn acte daēd nac-cuēscananacno buampashuni, quequin. ⁴¹ Aden cano nidmenubi cano dēbiaten masi setu-idec dēchiquidiapimbo yec cano dapa dētocquepondash. Adec dēchiadash acte tēccoasquequidēn cano dapa canche-canchequin tauapondash.

⁴² Adsho isash sondado, Mëtaniaidtedi cuentsiashe. Cuesunenu, quesho ⁴³ tantiash Pabado cuesunenushe qeshun: —jChën! —capondash sondado chuiquidën. Aden chuishumbic, Acten tantanec mëquiadquido tantanec nidanenubi ⁴⁴ tantantiapimboquido cano cuësh-cuëshëdaid bedbanash noadec tantanquido tsibanec nidta, quequin chuipondash sondado chuiquidën canon antabëdtoquido chuiquin. Aden ambi chiapadquiec nidanec mentoadenquio yec abitedi nidaid yacno choash dectatocuededpondash abitedi.

28

Madta caid yacno Pabadobëd icquido choaid

¹ Adec nidaid yacno choash dectatoneshun, Nëid acte nënantan nidaid nactnëdquid Madta caid nec, quesho tantiabedepondash. ² Ambo tabadquidon abitedi bëdamboen yuedpondash. Iquen uampamboec ue sequenubi Madta caid yacno chosho isun cuëte dëtsiadoshon, Cuëec cho, quequin chuipondash. ³ Adnubic Pabadontsen cuëte tanunquiocquid bedtanquin tsindoquin masandopondash. Aden masandoaid nëdënquiacnoësh puduenquin nisin Pabado mëpepondash. ⁴ Aden mëpiash ëchiquidenquio yec mëdiadsho isashien anocquido: —Nisin piad cuesunianquid nepanui. Mentoadenquio yec actenuësh dectatoacsho nisin piac unëshchitequien iquéc. Abi icsaid cuidtequidien nechitec.

⁵ Adec onquecuedednubien Pabado comapenen uicac nisi cuëte dëtsiadaidën nëpaëdpondash. Adnubien Pabado abi bëdambo icpondash. ⁶ Aden Pabado uicac nisi paëdsho isun Pabado mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenquiocsho isash, Nisin mëpeboed utsibon papa cain cuënaid nepanui, quecuededpondash Madta caid yacnoquido.

⁷ Madta caid yacnoquido tsusio dapan shubu anoentsëqui icpondash. Tsusio dapa Pudio cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuic ushquin ëbitedi bëdambo icmepondash. ⁸ Adnubien Pudion papa chumbo yec pienec aton madon shubu nuntan uepondash. Adec Pudion papa uec quesho tantiash Pabado aid isec nidshun ashunquibi Nuquin Papa chuishumbic Pudion papa damishquin bëdamepondash Pabado. ⁹ Pudion papa bëdanacsho isash Madta caid yacnoquido nënquidbëd daicsaid chedo cho-chopondash. Èbitsen bëdametsiashe, quish cho-chosho aidotsen bëdamepondash Pabado. ¹⁰ Adosho isun canon choquido bëdamboen tabadmepondash anocquidon. Nidnuesho tantiashun menebampondash mitsana nibëdec quequin.

Doma yacno Pabado choash tabadaid

¹¹ Adashic ushë 3ted nidmiashe Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quish tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano ichon papa cain cuënaid daëd ambi tantiaidbimboecnuic cano dëdectanquin nacnenaid icpondash. Ambi papa cain cuënaid abentsëc Castod icnuc utsi Podus icpondash. Adembidi aton cano cuëmpondash ichon. ¹² Aidën puduanec nidequi acte nënantan nidaid nactnëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. ¹³ Ambo tabadash puduanquin aid acte nënantan nidaid nactnëdquid cuëma anoentsëqui potequi nidaid Itadia caid cuëmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cinquequidën buanec badiad utsin shubu dadpen icquid Puteyodi caid yacno chopondash. ¹⁴ Ambo choshon Pabadobëd icquidon Esuquidistu tantiaquidobi abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquio icquid Doma caid yacno chopondash Pabadobëd icquido. ¹⁵ Podqued Apio caidën choec, quequin chuituidac Esuquidistu tantiaquid Doma yacnoquid utsi-utsiëc Pabado bëquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsëc chotsec quequin cuënaid yacnoquido Pabado bëquedoaic nidaneapondash. Aido cho-chosho isashien, Èbi dayacquo icmenuen nëidtedi mimi chomioc, Papa, quec dayacquo iquebi, quiampondash Pabado. ¹⁶ Adec aido bëquedec choash auchbidi nidec Pabadobëd Doma yacno choapondash. Doma yacno choacshobien Pabado quënën nauedenquiocquin shubun tabadmepondash sondado abentsëcshun abëd tabadquin isnubi.

Doma yacnoshon Pabado Esuquidistu chuibante

¹⁷ Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiachsho isun Pabado nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin

chiaid niacambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. ¹⁸ Aden meniac domanobo chuiquidën, Mimbi naid chuiban, cac chuibanondambi. Aden chuibansho tantiash, Unës uainquioctiadquidi mimbi naic, quepondash domanobo chuiquid ëbi caic. ¹⁹ Aden domanobo chuiquidën tantianubi nuquin matses tsusiobon, Unës uatiad, quequin chiac, Empedadod, Sesad yacno nidshun ëmbi naid chuite bunebi, quequin chuipondambi, Con matses icsambo iquec, quenquiocquin. ²⁰ Ëmbi chuiboed mibi chuinuequin mibitedi chomiombi. Unësash uincuenta nec, quequin tantiaquin nuquin matsesën cainacpaden cainquid icsho mêtaniaid nebi —quepondash Pabado isadaidbo tsusiobo chieci.

²¹ Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. ²² Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

²³ Aden Pabado tantiaid tantianuec, Nëidted ushash padpidec choaindabi, quianec nidanepondash tsusiobo. Adec nidaniash ambi chiacdedec ushash Pabado tabadacno choapondash isadaidbo tsusiobobëd utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe quiash abided cuidadec Esuquidistu unëspanëdash. Aid tantiaquid yec Nuquin Papabëd tabadendac, quequin Pabado chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbëdtabi Nuquin Papan naden nanun chiaid ambi utsibo dada uamiampid chuibampondash Pabado. Ambi dada uamiampidën chiaid Nuquin Papan madombo Esuquidistu nec, quequin badiadnubi chuiquin tauashun inchëshbudtsëqui chuiquin ëmpondash Pabado. ²⁴ Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. ²⁵ Aden abentsëc tantiachimboen tantiatiapimbo yec comapenec onquesho tantiashien Pabado nadpondash. —Nuquin Papan Mayanën Isayas dada uamequin nuquin tsusedpabo naden chuipampic:

²⁶ “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac;

Adembidi Ëmbi nadatiambocquin nabanaid isted-istedquimbi abimbo isenquo iquendac.

²⁷ Bëdamboen tantiaboedobi nëbi min matses pamumëdacbimboec tabadec; pashuacimboen tantiec tabadoaic; ushacimboebidi tabadoaic.

Adec tabadenquiocquin ëmbi nabansho mimbi istsiac. Adembidi ëmbi chiaid mimbi tantiatsiac. Aden tantiashun mibi icsaid mimbi ëntsiac.

Adquiduidi ëmbi bëdambo icmiaid nendac.”

²⁸ Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash Pabado ²⁹ Nuquin Papan dada uamiampicpaden chuiquin isadaidbo Doma yacnocquido tantiamenuec. Aden chuisho tantiash isadaidbo nidanepondash.

³⁰ Adembidi seta daëd matamec tabadquin Pabado Esuquidistu chuibampondash. Aton shubun tabadquin abi isedec choquidtedi Pabado yuedpondash. ³¹ Utsi, Chën, quenquiocnobi dacuëdenquiocquin, Nuquin Papabëd tabadte iquec, quequin huibampondash. Adembidi Esuquidistu tantiamenuen chuibampondash Pabado.

Padi. Esuquidistun, Ëbi chuibeneta, caidon naid chuibanquin aidtedi dada uaombi, Teyopido.

DOMA YACNOCQUIDON ISTE

Tauamboen chiaid

¹ Esuquidistun yuambo Pabado nebi. Aidën: —Ëbi chuibeneta —caidquio nebi. Adem-bidi Nuquin Papantsen: —Con Mado chuibeneta —caidquio nebi. ² Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. ³ Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. ⁴ Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuempac caondash. Aidquiobi Nuquin Icho Esuquidistu nec. ⁵ Aidën: —Pabadon chuibeniac isadaidpembon matses utsibontsen ma ëbi tantiaquin ëmbi chiacpadombon nanu —quequin ambi naid chuibenequidquio Esusën icmepondashi. ⁶ Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. ⁷ Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

Doma yacnocquido iste Pabado bunaid

⁸ Tanta. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbí nac aido bëdambo iquec, Papa —quequin Nuquin Papa chianembi. ⁹ Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabadon abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenuc. ¹⁰ Nadembidi Nuquin Papa chianembi. —Doma yacnocquido istantiaquidquio iquebi. Mimbí nidmiac nëbi nidtsiabi, Papa —quequin chianembi. ¹¹ Aden mibi istantiaquidquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadombon chieshtoenquio icquin Esus tantiaquionona —quequin mibi chuibantsiambi. ¹² —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

¹³ Tanta, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —qeshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpeshun Esus tantiabnacpadombon ma Doma yacnocquidon utsibontsen Esus tantianu —quiash mibi yacno nidtiadquio iquebi. ¹⁴ Esuquidistun chiacpadombon ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenuc. Adem-bidi dada uaquidobëdtabi dada uainquio icquidotsen chuibenenuc —quiash nebi. ¹⁵ Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

¹⁶ Esusën naid chuibenec bëdambo iquebi naden tantias. —Nuquin Papan tantiacpadec matses cuidmenquio icnuec Esus abided cuidadec unësac caondash. Aid tantiasho Nuquin Papan matses cuidenquio iquec. Abia chiaidon isadaidbon Esus tantiasho cuidenquio icquin isadaidpembon matses utsibontsen Esus tantiasho Nuquin Papan cuidenquio iquendac —quiash Esusën naid chuibenec bëdambo iquebi. ¹⁷ Esusën naid chuisho tantiasho nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bëdamboen isbenec ambi chiaid niac-niacacmaidbimboecnuc —quequin nuqui tantiapec. Adem-bidi chuiquin Nuquin Papan isadaidbo tsusedpa dada uamepampic. “Nuquin Papa ambi chiacpadombon naquidquio nec,’ quequin abi tantiec tabadquid Nuquin Papan bëdamboen isec,” quequin dada uamepampic.

Matses utsibo icsamboec tabadaid

¹⁸ —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpeshun Nuquin Papan cuidte tantiatiapimbo iquec. ¹⁹ Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquio matses icpec. —Adquidshenda Nuquin Papa nepc —matses camenuen Nuquin Papan abitedi uapampic. ²⁰ Nidaid uaquinc cuëte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nëid uaquidien nadquio icchitec. Nibëdantiapimbo icquidien nechitec. Abipadquid utsi nibëdnuc comapenen tantiaquin nabanquidquio yec abitedishun Ichoen nechitec —quetiadquidi adenquio matses iquec. Adquid Nuquin Papan cuidendac.

²¹ *Ambi uaid isash: —Nëid uaquid bédambo iquec. Aidëmbien ëbi nashunchitec —quetiadquidi pamumëdabimboecquin Nuquin Papa tantiatiapimbo matses iquec.* ²² —*Dadpen bédamboen tantiembi —quequimbi tantienquo matsesën iquec.* ²³ *Aden unëstiapimbo icquid Nuquin Papambo tantiatiapimbo icquimbi unësquid-uidquo tantiaquin aidbimboecnuc nacenshun papa quequin chianec. Utsibon matsesbimboecnuc nacenshun: —Ëbi bédamboen ista, papa —quequin ambi nacenaid chiec. Utsibombic aben icquid nidaidën capuquidbimboecnuc nacenshun ademvidi chiec. Utsibombic uicchun podochuquidbimboecnuc nacenshun ademvidi chiec. Utsibombic aben icquid tachidën siuidquidbimboecnuc nacenshun ademvidi ambi nacenaid chiec. Ènden adquo matses yampicpadomboemvidi nëbi adomboemvidi matsesën naic.*

²⁴ *Adsho isash Nuquin Papa: —Ma bédamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnëdambic nëbi abi bunacpadeq icsamboec tabadec utsin chido chudteuidi bunquieq dada. Adevidi aton bënëpenquo chudmeteuidi bunquieq chido.* ²⁵ —*Abitedi uaquidquo Nuquin Papa nec —quequin abimbo tantiatiadquidombi Nuquin Papan uaidobi utsiutsien chuiquin papa cabededpec. —Nuquin Papambobien bédamboshë iquec —quequin ënenquo icquin chuitiadquidi aidon padenquo icpec.*

²⁶ *Adsho isash: —Ma abi bunacpadeq icsamboec tabadpanu —quiampampic Nuquin Papa. Adnëdambic nëbi icsabudquieq dada bunenquo yequi chido daëdi dachudnanec.* ²⁷ *Adevidi chido bunenquo yequi dada daëdi chichudnante natia bunquiopec. Aden ambi chiaid niac-niaquec icsamboec tabadsho Nuquin Papan cuidendac.*

²⁸ *Adec abi tantie bunenquo icsho isash: —Ma bédamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnëdambic nëbi pabiate shëcuë nibëdabimboecquin Nuquin Papan chiaid niac-niaquec icsamboec tabadpec bédambo ictiadquidobi.* ²⁹ *Nadquido icsamboec tabadquido nec. Nëdic aton chidopenquo chudquido. Nëdic aton bënëpenquo chudmequido. Nëdic icsamboshë icquido. Nëdic aton na dadpen bedteuidi bunquido. Nëdic chieshquido. Nëdic matses utsibimboc ictë bunec chieshëmënuquido. Nëdic cuesunianquido. Nëdic chieshëmënuquido. Nëdic muaquido. Nëdic icsa uate bunquido. Nëdic utsibo icsaiduidi chuiquido.* ³⁰ *Nëdic ambenquidobi chuishunquin chieshënquin muauaquido. Nëdic Nuquin Papan chieshënquido. Nëdic mamënshumënuquido. Nëdic utsibo nashunenquo icquin aton nauidi naquido. Nëdic: —Ëbiuidtsëqui bédambo iquebi —quequido. Nëdic: —¿Icsaquin atotsimbi utsi nape? —quec icsate bunquido. Nëdic anibëdtan amën chiaid niac-niacquido.* ³¹ *Nëdic piushbimboecquin Nuquin Papan chiaid tantienquo icquido. Nëdic aton matses tantienquo icquido. Nëdic nëishash baded nëish bédanenquo icquido. Nëdic utsibo bédamboen istiapimbo icquido. Adquidtedi Nuquin Papan chiaid niac-niacquieq icsamboec tabadquid nendac.* ³² —*Abi icsaid ëntiapimbo icquido Nuquin Papan cuidquin chian anëdënquiacno nësecaindac —quequin tantiequi ënëdenquo yec icsaded-icsadedquieq. Utsibotsen icsasho isash cuishonquec. —Bédambo iquec. Èbipadquidquo nec —quepec.*

2

Matsesën naid Nuquin Papan abimbo chuite

¹ *Aden icsamboec tabadaid ëmbi chuisho tantias: —Adquid icsamboshë iquec —¿quecta ique? —Aden naic aic icsa —queboedi mibitsen adevidi icsapeq. —Icsaquidpenquo nëbi —quec mibi muaic.* ² *Nuquin Papambien matsesën naidtedi tantiaquid icquin: —Nëido icsambo iqueque. Icsano nidmenu —quequin abimbo chiendac.* ³ —*Matses utsibo icsambo iquec —queboedombi mimbtsen Nuquin Papan chiaid niac-niacpec. Adash: —Nuquin Papan nuqi cuidenquo iquec —¿quecta ique? Mibitsen Nuquin Papan cuidendac.* ⁴ *Ambi uaido matses abitedi icsambo icsho isash unësquio icquin matses bédamboen iste bunquin icsaidobi Nuquin Papan baded cuidenquo iquec. —“Icsaboedi nëbi Nuquin Papan chiacpadeq bédamboec tabadtiadquid iquebi,” quequin ma matsesën ëbi tantianu —qeshun Nuquin Papan matses baded cuidenquo iquec. Abi icsaid ënenquo icsho isun cuidendac. ¿Adsho tantiashta mibi nadpe? —Mua. Nuquin Papan ëbi chuitiapimbo iquec. Ambi chiaid niaquesambo nebi —¿quecta ique? Adec onquec mibi muapec.*

⁵ —*Nuquin Papan chiaid niacboedëmbi ënta —caqui: —Padi. Èmbi naiduidi naic bédambo iquebi —quequin ënenquo icquin Nuquin Papan chiaid niac-niacbudec icsamboecuidi mibi tabadec. Aden mimi Nuquin Papa cuidmendac. Nuquin Papan matsesën naidtedi chuite ushëmbi mimi icsamboen naidtedi chuishun Nuquin Papan mibi cuidendac.* ⁶ *Matsesën naidtedi tantiaquin matses cuidendac. Bédambo icquido abëdi tabadmequin icsaido icsano nidmendac Nuquin Papan.* ⁷ *Abi tantiec bédambo icquido: —“Mibi bédambo iquec,” mabi Nuquin Papan canu —quiash abëd tabadte bunec Nuquin Papan chiacpadeq*

bëdamboec tabadec nec. Aido unësacsho Nuquin Papan abëdi tabadmendac padpidec unëstiapimbo icnuc. ⁸Icsaquidoen Nuquin Papan chiaid chiaqui tantiata bunenquo icquin aton nauidi naic icsamboecuidi tabadsho Nuquin Papan comapenen cuidendac. ⁹Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiaimpidi icsasho cuidquin matses utsibotsen icsasho Nuquin Papan cuidendac. ¹⁰Abi tantiec bëdamboec tabadquido unësacsho abi yacno tabadmeshun: —Nëid bëdamboec tabadquid niondash —quequin utsibo tantimequin Nuquin Papan bëdambo icmendac. Ambia Nuquin Papan chiaid tantiondaido Isadaidbo abi tantiaquid icsho abëdi tabadmequimbi matses utsibotsen abi tantiaquid icsho Nuquin Papan abëdi tabadmendac. ¹¹Icsamboec tabadquido icsano nidmequin bëdamboec tabadquido abëdi tabadmendac. —Isadaidbouditsëqui bëdamboen isembi —quenquo icquin adoendac.

¹²Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidën chiaid niac-niaquec icsamboec tabadsho adembidi cuidendac. ¹³Ambi: —Naden nata —quequin chiaid tantiashumbic adomboen naisa bëdamboen istiapimbo icquin ambi chiacpadec tabadquid Nuquin Papan bëdamboen istsiash. ¹⁴¿Ada Nuquin Papan chiaid tantiacmaidon matses utsibon bëdamboec tabadte tantienquo iccuededpec? Ma bëdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bëdamboen naic Nuquin Papan chiaid tantiaashumbimboen. ¹⁵Adec bëdamboec tabadec: —Bëdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. ¹⁶—Adec matses abitedi bëdamboec tabadte tantiequi adquec tabadenquo iquec —queshun Nuquin Papan chiacpadën Esuquidistun matses cuidendac. Matsesën otacquo tantiaidbëdta matsesën ompoquin naidtedi ambembi tantiaashun Esusën matses cuidendac. Esus chuibanquin aden aidën cuidte chiombi.

Isadaidbon Nuquin Papan chiaid niac-niacaid

¹⁷Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidën tsyuecquid icsho Nuquin Papan ëbi bëdamboen isec. Utsibon Nuquin Papa tantienquo icnubi Nuquin Pamambo con matsesbëdtambi bëdamboen tantiembi. Bëdambo iquebi —mibi quepec. Adboedi mibi icsaic. ¹⁸Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bëdamboec tabadsho isash: —Aido bëdamboec tabadec —queboedi mibi bëdamboec tabadenquo icpec. ¹⁹Adecbidi: —Nuquin Papan chiaid tantiacmaido Nuquin Papan chiaidquid chuibanquid nebi. Paposhquiaicbimboecnu tantiaquidquid nebi —mibi quepec. Adboedi aidën chiaid niaquec mibi icsaic. ²⁰—Chuisho tantiabi icquido nëbi tantiabentsëcquidobëdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquid chuibanquid nebi —mibi quepec. ²¹Adec: —Nuquin Papan chiaid niac-niaquenda —queboedëmbi aidën chiaid mimbi niac-niaquec. —Ampenda —queboedëmbi mimbitsen ampepec. ²²—Utsin chido chudenda —queboedëmbi utsin chido mimbitsen chudpec. Papa quequin matsesbimboecnu matses utsibon nacnenaïd isash: —Nuquin Papa tantienquo yec nëid nacnenquid icsambo iquec —queboedëmbi aidën nacnenaïd tantiate shubun puduedshun mimbi ampepec. ²³—Nuquin Papan ambi chiaid con tsusedpa Moises dada uamepampid bedshun con matses isadaidbonuidtsëqui Nuquin Papa tantiec —queboedëmbi ambi chiaid niac-niaquec mibi icsamboec tabadec. ²⁴Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caïdsembien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bëdamboen tantienquo iquec.

Nuquin Papa tantiaquidquid icte chiaid

²⁵—Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuëbo shui dëbid dëteshun secaic. Adonëdaïd ambi chiaid niac-niaquenquo yec bëdamboec tabadsho Nuquin Papan bëdamboen istsiash. Isadaidbo utsibon ambi chiaid niac-niacsho Nuquin Papan bëdamboen istiapimbo iquec ambi con matses cacmaïdobimboecnu. ²⁶Nuquin Papan con matses cainquo icpampido matses utsibon ambi chiacpadec bëdamboec tabadsho Nuquin Papan bëdamboen istsiash ambi: —Con matses nec —caïdobimboecnu. ²⁷Adec matses utsibo Nuquin Papan chiacpadec bëdamboec tabadsho isash isadaidbo nadec chiadpec. —Matses utsibo bëdamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. ²⁸¿Shui dëbid dëteshun

secaquido isadaidbotedi Nuquin Papa tantiaquidomboda nedic? Padenquio. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquio. ²⁹ ¿Ambi Moises dada uamepampiduidi èmbimbo nanuequid Nuquin Papa tantiaquidquioda nedic? Padenquio. Nuquin Papa tantiaquidquien aton Mayanèn tantiamiacpadec bédamboec tabadec. Adquid: —Mibi bédambo iquec. Con matses mibi canu —capec Nuquin Papan matsesèn adoenuo icnubi.

3

Nuquin Papan isadaidbo tantiec, quequin chiaid

¹ Aden: —Abi tantiec bédamboec tabadquid Nuquin Papan con matses catsiash —quequin èmbi chuisho tantia: —¿Isadaidbo yecta icsambo icpec? —¿iquecta ique? —Padenquio iquec —caimbi. —¿Ada aido ambi con matses caido Nuquin Papan nashunac? —¿iquecta ique? ² Ai, aido nashunquiac. —Èmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. ³ Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquio icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquio icpatsiash? ⁴ Padenquio. Ma ambi chiacpadomboen naquidquido Nuquin Papa neyoc. Muesambo nec. Matses abitedimbo muaquidquido icnuc Nuquin Papan abimbo chuiquidquido nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquido nec.

‘Nèid bédambo iquec. Nèid icsambo iquec, quequin Nuquin Papan abimbo chuibanendac, quequin ma matsesèn tantianu,’ quequin

Nuquin Papan: ‘Mibi icsaoc,’ quequin èbi chuibod chiombi,”

quequin dada uapampic.

⁵ Èbi adsho bédamboen tantiata. Icsamboen tantienda. —Nuquin Papan chiaid niacniaquec èbi icsasho isash: “Adquidpenquo Nuquin Papa nec. Icsaisambo nec,” quetsiash con matses. Adec icsaquimbi èmbi con matses Nuquin Papa bédambo icte tantiameshobi Nuquin Papan èbi cuidac icsambo ictsiash —quequin icsamboen tantienda. ⁶ Matsesèn naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bédambo iquec. Mibi cuidenquo iquembi —quetiapimbo Nuquin Papa iquec. Muesambo nec. ⁷ Nadembidi icsamboen tantienda. —Èbi muaquidquido icnubi: “Adquidpenquo Nuquin Papa nec. Bédamboshè iquec. Muesambo nec,” quetsiash con matses. Adec muaquimbi Nuquin Papa muainquio icte con matses tantiametsiambi. Aden èmbi abi tantiameshobi Nuquin Papan èbi cuidac icsambo ictsiash —quequin icsamboen tantienda. ⁸ Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquio. —Pabado chedo: “‘Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Èbi muauaquido Nuquin Papan cuidchitoshon.

Matses abitedi icsaquido nec, quiaid

⁹ Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquio. Nuquin Papan chiaid niaquesamboen nibèdec. Matses utsibo con matses isadaidbòd abembi bédamboec tabadtiapimbo iquec. Abitedimbo icsamboec tabadquido nec. Aden mibi chiombi. ¹⁰ Aden chuiquin Nuquin Papan dada uamepampic naden.

“Nuquin Papan chiaid niaquesambo nibèdec.

Abitedimbo icsaquido nec.

¹¹ Nuquin Papa tantiaquin ambi chiacpadomboenuidi naquidquido nibèdec.

Nuquin Papa tantiate bunquidquido nibèdec.

¹² Bènudshun podqued tantienquo yacimboen Nuquin Papa tantienquo icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibèdec.

Abitedimbo icsapec.

¹³ Nadquio iquec. Nèid icsamboec chuishumènquido. Unèsaid ènden chococacno shèdec: ‘Pisenac,’ quequin tantiacimboen adquido onquesho tantia: ‘Icsambo icquido nec,’ quequin matsesèn tantiec.

Nèidic muaquido.

Nèidic nisin pequin icsa uacimboen icsa uate bunec icsamboec onquequido.

¹⁴ Nēidic nēishash chieshēmēnec: ‘Unēschitoshon,’ quequin icsamboenuidi chuiquido.

¹⁵ Nēidic intac mēyamec badedquo cuesunianquido.

¹⁶ Nēidic abēd icquido natiamec chieshēmēnquido.

¹⁷ Adquidtedi cuesnante bunec bēdamboec tabadtiapimbo iquec.

¹⁸ ‘Nuquin Papan cuidnushe,’ quenquo icquid Nuquin Papa tantiesabo nec,” quequin dada uamepampic.

¹⁹ Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: —Icsaquidpenquo nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibēdtabi isadaidbotsen chiac: —Abimbo chiec —quiash dacuēdec ēcbedanenquo tabadendac matses abitedi. ²⁰ Aden ambi chiaid niaquesambo nibēdnuc: —Ambi chiaid niaquesa icsho Nuquin Papan nuqui bēdamboen isec —quequin nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

Nuquin Papa matses bēdamboen ismete chiaid

²¹ Aden ambi chiactedi natiapimbo yec matses icsasho isun Nuquin Papan abi matses bēdamboen ismete chuiquin isadaidbo tsusedpa Moisesbēdta tsusedpabo utsibo dada uamepampic ēndenquimbo. Aden ambi dada uamepampicpadomboen nēbi Nuquin Papan abi matses bēdamboen ismequid matsesmepac caondash. ²² Adoac Nuquin Papa abi tantiaquido bēdamboen ismenuec Esuquidistu abided cuidadec unēsapac caondash. Nēbi aidquo tantiaho Nuquin Papan matses bēdamboen isec. Isadaidbobēdtambi matses utsibontsen Esus tantiasho adoendac. ²³ Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibēdec. ²⁴ Adquid bēdamboen istiapimbo icquin matses bēdamboen iste bunquin aton Mado Esuquidistu abided unēs uamequien Nuquin Papan cuidpac caondash. Nēbi abided cuidadaid Esus tantiasho nuqui bēdamboen isec icsaisabimboecnuc. ²⁵ —Icsaido cuidquid icquimbi nuqui cuidenquo icnuen Nuquin Papan nac —nuqui camenuen Nuquin Papan nuqui icsaid bedshumequien Esused unēs uamequien cuidpac caondash. Esus tishabi icnuc Nuquin Papan abi tantiaquido cuidenquo icpampic: —Yuecshun con Madoded cuidendambi —quequin tantiaquin. ²⁶ Nēbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bēdamboen isquin cuidenquo iquendac.

²⁷ Ēmbi aden chuisho tantiash: —Ambi chiacpadomboenuidi nasho Nuquin Papan bēdamboen isebi —quequin mimbi abimbo chuitiapimbo iquec. Matsesēn Nuquin Papan chiacpadomboenuidi natiapimbo icsho bēdamboen istiapimbo icboedi nēbi Esus tantiasho Nuquin Papan nuqui bēdamboen isec. ²⁸ Aden matsesēn ambembi naquin Nuquin Papa bēdamboen ismetiapimbo iquec. Padnuen utsin: —Matsesash ēbi icsaid bedshunec abided cuidadaid tantiasho Nuquin Papan ēbi bēdamboen isec —quequin Esus tantiasho Nuquin Papan bēdamboen isec. ²⁹ Ĵsadaidboudida Nuquin Papan bēdamboen ispatsiash? Padenquo. Matses utsibo isadaidpembobi Nuquin Papan bēdamboen istsiash. ³⁰ Matses abitedi uaquid icquin ambi chiacpadomboen isadaidbon Esus tantiasho Nuquin Papan bēdamboen isec. Adembidi matses utsibon Esus tantiasho Nuquin Papan bēdamboen isec. ³¹ Adoaido: —Nuquin Papan chiaid niac-niaquec icsamboec tabadnuna —Ĵquecta icpec? Padenquo. Esus tantiaquido icquin Nuquin Papan chiacpadomboen natiadquo nuqui yanec.

4

Nuquin Papan Abadauan bēdamboen isaid

¹ Tantia. Aden Nuquin Papan bēdamboen iste chuiquin isadaidbo tsusedpa Abadauan caid ēnden icpampidtsen mibi chuinu. ĴAtotsieshun Nuquin Papan Abadauan bēdamboen isbempampic? ² Bēdamboecuidi tabadsho Nuquin Papan bēdamboen isaid yec Abadauan: —Bēdamboecuidi tabadquin Nuquin Papa bēdamboen ismembī —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembi —quenquo icpampic Nuquin Papa. ³ Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuipampic. ⁴ Matsesien adenquo iquec. —Ambi chiacpadomboen nasho icbon yua bēdamboen isquid —nuqui quepec. ⁵ Nuquin Papambien nadotsiash. Matses icsaboedi: —Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan

bédamboen isbentsiash icsaisabimboecnuc. ⁶ Adembidi Nuquin Papan tantiamiac ambi bédamboen iste chuiquin con tsusedpa Dabidén dada uapampic naden.

⁷ “ ‘Ambi chiaid niac-niacboedëmbi: Bédambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ëbi bédamboen isec ëbi icsaid bëpiscudacimbioen. Icsaisabimboecnuc ëbi bédamboen isquin ëbi cuidenquo iquendac,’ quish matses bédambo yec cuishonquec.

⁸ ‘Abi tantiaquid icsho isash ëbi icsaid bëpiscudash:

Ëmbi chiaid mimbi niac-niacoque. Mibi cuidnu, Nuquin Papan ëbi cainquo iquendac,’ quish matses bédambo iquec,”

quequin Dabidén chuipampic ëndenquimbo.

⁹ ¿Shui dëbid dëteshun secaido isadaidboudida Nuquin Papan bédamboen ispec? Padenquo. Matses utsibotsen bédamboen istsiash. Tantia. Ëmbi chuiboedbidi chuiuanu. Abi tantiaquid icsho Nuquin Papan Abadauan bédamboen isbempampic ambi chiaid niac-niacacmaidbimboecnuc. ¹⁰ ¿Ambi chiacpadomboen shui dëbid dëteshun secacshoda Nuquin Papan Abadauan bédamboen isbempampic? Padenquo. Shui dëbid dëteshun secabi icsho Nuquin Papan Abadauan bédamboen isbempampic. ¹¹ Bédamboen isbenshumbic: —Abadauan, ëmbi chiacpadomboen nabenta. “Nuquin Papan bédamboen isaido nebi. Aid bëshunchitomane,” qeshun min matstedi shui dëbid dëteshun secabanta —capampic Nuquin Papan. Adoac Abadauanën nabempampic. Aden shui dëbid dëtiammaid icquin Abadauanën Nuquin Papa tantiacpadomboen nëbi shui dëbid dëtiammaidon Esus tantiasho Nuquin Papan bédamboen isendac ambi chiaid niac-niacacmaidbimboecnuc. ¹² Abadauanën tsyuecquido isadaidbo Abadauambimboecquido Nuquin Papa tantiaquido abi iquec. —Shui dëbid dëtemenëdaid icsho Nuquin Papan bédamboen isebi —quenquo icquin Nuquin Papabëda Esus tantiasho isadaidbo Nuquin Papan bédamboen isaido abi iquec.

Nuquin Papan Abadauan chiaid

¹³ Ëndenquimboshë Nuquin Papan Abadauan naden chuipampic. —Abadauan, mibi nibëdanan yuecshun min tsyuecquid abentsëcshun utsibo bédambo icmendac. Nidaid utsi-utsiec yacno tabadquido adoendac —quepampic Nuquin Papa. —Min tsyuecquid abentsëqui tantiasho matses bédamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuidi Abadauanën nashoda Nuquin Papan aden chuipampic? Padenquo. Nuquin Papan chiac: —Ai, abimbo caic —qeshoen Abadauan bédamboen isbenshun Nuquin Papan adopampic. ¹⁴ ¿Nëbi: —Moisesën chiaid niaquesa icsho Nuquin Papan bédamboen isebi —quec muaquidoda Nuquin Papan bédamboen ispadic? Padenquo. Adec muaquidobi bédamboen isquin ambi Abadauan chiaid niactsiash. Adotiapimbo icquin ambi chiacpadomboen Abadauanën tsyuecquid tantiaquiden bédamboen isec. ¹⁵ —Moisesën chiaid niaquesambo nebi —queboedombi aidën chiaid niac-niacsho isun Nuquin Papan cuidendac. Ambi chiaid niaquesambo nibëdec. Nuquin Papan: —Bédamboec tabadta —quequin chiaid nibëdnuc ambi aden chiaid matsesën niactiapimbo ictsiash. Ambi: —Bédamboec tabadta —quequin chiaid abi iquec. Aid niaquesambo nibëdec.

¹⁶ Nuquin Papan naden Abadauan chuipampic. —Abadauan, ëmbi chuisho tantiash: “Mimbi abimbo caic,” qesho mibi bédamboen isquin min tsyuecquido bédambo icmendambi —quequin chuipampic. Nëbi ambi chuipampicpadomboen naquin Esus tantiaquido Nuquin Papan bédamboen isec. Nuquin Papan ambi chiaid dada uamepampidën Moisesën tsyuecquido isadaidbon Esus tantiasho Nuquin Papan bédamboen isec. Abadauanën Nuquin Papa tantiacpadomboen matses utsibontsen Esus tantiasho adembidi bédamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. ¹⁷ Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unësan yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: —Abimbo mimbi caic —quequin Nuquin Papa Abadauanën tantiapampic. —Comapenen tantiaquin unësaid uincuequidquido icquin ambi chiacpadomboen ëbi bacuë tishmendac —quequin Abadauanën Nuquin Papa tantiapampic. Nëbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

¹⁸ Nuquin Papan: —Min tsyuecquido dadpenquo iquendac —cac: —¿Mitsipadoac aitedi con tsyuecquido icpec? Ma con bacuëbo nibëdpayoc. Tsusiombo icquin bacuë tishmetiapimbo iquebi —queuidboedi Abadauan nadpampic. —Ai, abimbo mimbi caic

—quepampic aton mado nibëdnubi. Adshun tsusioctšëcquio icquimbi aton mado tishmepampic. Nëbi aton tsyuecquido dadpenquio iquec Nuquin Papan chiampicpadequi. ¹⁹—Con seta dadpenquio 100tedi icnuc tsusiobudtsëcshun ëmbimbo bacuë tishmetiapimbo iquebi. Con chido ëndenquio machobudtsëccondaid icquin bacuë usundotiapiçtsëcquio iquec —quequin tantiequi: —Nuquin Papan abimboen caosh —quepampic. ²⁰⁻²¹—Nuquin Papa mue nec —quenquio yec: —Nadatiambo icquid icquin ambi chiacpadomboen Nuquin Papan naic —queshun Nuquin Papa tantiatsëcboedëmbi aid tantiaquiopampic. Adshun: —Mibi bëdamboshë iquec, Papa —quequin Nuquin Papa chuipampic. ²² Adsho tantiashun Nuquin Papan bëdamboen isbempampic icsaisabimboecnuc.

²³ Aden Nuquin Papan ambi Abadauan bëdamboen isaid isadaidbo tsusedpa dada uamepampic. ¿Abadauanën naiduidi tantiamenuenda aden dada uamepampic? ²⁴ Padenquio. Nuquitsen Nuquin Papan ambi bëdamboen iste tantiamenuen aden dada uamepampic. Nuquin Icbo Esusbëdta abi uincumequid Nuquin Papa tantiasho nuquitsen bëdamboen isec. ²⁵ Nuquin Papan tantiacpdec nuqui cuidmenquio icnuec nuqui icsaid bedshunec abided cuidadec Esus unëspanëdash. Aden Nuquin Papa abi tantiaquido bëdamboen ismenuec unësash uincuempanëdash Esus.

5

Esus tantiaquido Nuquin Papan bëdamboen isaid

¹ Aden Esus tantiasho Nuquin Papan bëdamboen isaïdo yec abi cuidte dacuëdënenquio yec abëdi nuqui bëdamboec tantiananec. ² Ëmbi chuibocpaden abi tantiaquido nuqui cuidmenquio icnuec abided unësquin Esusën Nuquin Papa nuqui bëdamboen ismepic. Adoac nuqui nadpec. —Nuqui bëdamboen isquin unësacsho nuqui abipadquid icsaisa icmequin Nuquin Papan abëdi nuqui tabadmendac —quec nuqui cuishonquec. ³ Nadeçtsen nuqui cuishonquec. —Esus tantiaquid icsho utsibon chieshënaqui Esus tantiatsëcboedi chieshtoenquio icquin Esus tantiaquidquio yanëbi —queçtsen nuqui cuishonquec. ⁴ Aden chieshtoenquio icquin Esus tantiasho Nuquin Papan nuqui bëdambo capec. Adoac: —Esus tantiaquid icsho Nuquin Papan ëbi bëdambo icmec. Unësacsho abi yacno ëbi tabadmendac ambi chiacpadomboen —quepec nuqui. ⁵ Adec: —Abi yacno ëbi tabadmendac —quequin Esus tantiaquid ¿ada Nuquin Papan cacumepec? Padenquio. Aton Mayan nuquibëd icmiac paposhquiabcimboen nuqui naden tantiec. —Nuquin Papan ëbi bëdamboen tantiaquin abi yacno ëbi puduedmendac —quequin nuqui tantiec.

⁶ Aden matses tantiaquic Nuquin Papan tantiacpdec Esus nadpanëdash. Matses abitedi abembi bëdamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquio icnuec abided cuidadec Esus unësapanëdash. ⁷ ¿Ada adquid matses icpadic? Padenquio. ¿Cuesanquidën matses bëdambo icquid caic: —Cuesnu —quesho tantiashunda dadpeshun: —Aid cuesenda. Èbiquien cuesta —capatsiash? Padenquio. Bëdamboshë icquid cuesmenquio icnuen: —Nëid cuesenda. Èbiquien cuesta —cachitembien icçsiash abentsëcshun. Icsambo icquid icshoen aden chienquio icçsiash. ⁸ Padnuen matses abitedi icsamboecuidi tabadnuc nuqui cuidmenquio icnuec Esuquidistu abided cuidadec unësapanëdash. —Nuquin Papan ëbi tantiaquic —matses camenuen Nuquin Papan aden Esus namepanëdash.

⁹ Nëbi abided cuidadaidquio Esus tantiasho Nuquin Papan nuqui bëdamboen isec icsaisabimboecnuc. Aden bëdamboen isquin Nuquin Papan nuqui cuidtiapimbo iquendac. ¹⁰ Matsesën abi chieshësho isun aïdo cuidte bunenquio icquin Nuquin Papan aton Madoded cuidpanëdash. Aden aton Madoded cuidash nëish bëdamsun Nuquin Papan aton Mado tantiaquid bëdamboen isec. Nëbi Nuquin Papan uincuemënëdaïd icquin Esusën nuqui bëdamboen tabadmec. ¹¹ Adembidi aïdën tantiamiacpadomboen nuqui: —Èbi cuidenquio icnuen aton Madoded cuidquid bëdamboshë iquec —quequin Nuquin Papa tantiec nuqui cuishonquec.

Adanën naidbëdta Esusën naid chiaïd

¹² Nuqui bëdamboen ismequid Esus tishabi icnuc abia matses uaidën Adanëmba Nuquin Papan chiaïd niac-niaquec icsasho cuidquin aidba Nuquin Papan unësquid icmepampic. Adembidi Adanën tsyuecquido matses abitedi Adan icsacpadeçbidi icsate tantiaquimbi Nuquin Papan unësquidoidquio matses icmepampic. ¹³ Nuquin Papan: —Adec icsaïnda —quequin ambi chiaïd Moises dada uamiabi icnubi matses abitedi icsapampic. —Èmbi Moises chuimiãid mimbi niac-niaquec —Nuquin Papa quetiapimbo icnubi matses icsapampic. ¹⁴ Nuquin Papan chuiboedquiobi niaquec Adamba icsasho Nuquin Papan cuidac unësec taëpampic. Adan unësambic aïdën nacpadomboen nabi icsa utsi naiqui matses abitedi icsasho adembidi unësquidoidquio Nuquin Papan icmepampic. —Naden nata —quequin

Moises dada uamequin Nuquin Papan chiabi icnubi aidën chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquo Esuquidistu nec.

¹⁵ Matses abentsëcshun Adanëmba Nuquin Papan chiaid niacsho cuidquin aidba unësquid icmeshun aton tsyuecquido matses unësquidouidquo Nuquin Papan icmepampic. Adechidi Nuquin Papa matses bédamboen ismequid abentsëc iquec. Esusuidtsëqui abi tantiaquidotedi cuidmenquo icnuec abided ciudadec unëspac caondash. Nëbi aid tantiaasho Nuquin Papan nuqui bédamboen isec. ¹⁶ Adanën nacbimboen Nuquin Papa matses bédamboen ismequidën nambo. Adan abentsëqui icsaquin Nuquin Papa cuidmiac abi unëspadquiec matses abitedi unësquidombo yanac. Nuquin Papa bédamboen ismequidëmbien matses icsaid bedshunec abided ciudadquin Nuquin Papa abi tantiaquidotedi bédamboen ismec icsaisabimboecnuc. ¹⁷ Ambi chuiboedi niacquin Adanën Nuquin Papa cuidmiash unësquid yanacpadece matses unësquidouidquo iquec. Esuquidistunuidtsëqui nac Nuquin Papan matses bédamboen isendac. Nëbi aid tantiaho Nuquin Papan nuqui bédamboen isquin bédamboec tabadquid icmendac. Adec bédamboec tabadec unëssh Esusbëdtan Nuquin Papan namiacno bédamboshë yacombo nuqui tabadendac.

¹⁸ Adec matses abentsëqui icsasho aidbëda aton tsyuecquido matses abitedimbo cuidquin Nuquin Papan unësquidouidquo icmepampic. Padnuen Nuquin Papan chiacpadece abentsëqui abided ciudadaidën Nuquin Papa abi tantiaquido bédamboen ismequin Nuquin Papa yacno tabadmendac. ¹⁹ Nuquin Papan chiaid niac-niaquec Adan icsaic taëambic aton tsyuecquido abitedimbo icsaquadouidquo yanac. Padnuen Nuquin Papan chiaid niaquesambo icquin Esusën Nuquin Papa nuqui bédamboen ismec. ²⁰ ¿Matses bédamboen isnuenda Nuquin Papan ambi: —Bédamboec tabadta —quequin chiaid Moises dada uamepampic? Padenquo. Matses abi icsaid tantiamenuen ambi chiaid Moises dada uamepampic. Aden chiaid chuisho tantiaho: —Icsaobi —quequin tantiaquin abided ciudadaid tantiaho Nuquin Papan matses bédamboen isec. ²¹ Taëc matses icsasho cuidac unësquidouidquo yanac. Adsho isun matses bédamboen isnuen Nuquin Papan ambi chiaid niaquesambo Esusede cuidac. Nëbi Nuquin Icho Esuquidistu tantiaho Nuquin Papan nuqui bédamboen isec icsaisabimboecnuc. Nuqui unëssh abëdi tabadmendac padpidec unëstiapimbo icnuc.

6

Esus tantiaquid bédamboec tabadquid, quiaid

¹ Nuquin Papan bédamboen iste ëmbi chuisho tantiaho naden tantienda. —Icsaido cuidmenquo icnuec abided Esus ciudadec unëspanëdash. Aid tantiaho Nuquin Papan bédamboen isquin nuqui cuidtiapimbo iqueque. Aden bédamboen isaqui icsaquinona —quequin tantienda. ² Esus tantiaquido adesambo nec. Esus tantieci icsateuidi nuqui bunenquo yanec. ³ ¿Tantienquioda ique? Naden chuiquin mimbi acten mentomiac. —Ëbi cuidmenquo icnuec abided ciudadec unësaid Esus tantiaquid nebiqne. Ambi chiacpadece tabadtiadquid iquebique. Utsibo ismenu —quequin mimbi acten mentomiac. Adec Esus unësaid tantiequi icsaboedobi icsate bunenquo nuqui yanec. ⁴ Aden Esus abided ciudadec unësaid tantiaho Nuquin Papan utsiacimbocnuc nuqui icmec. Esus unësshocomapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacimbocnuc nuqui icmec. Adoac icsateuidi bumboedobi adte bunenquo yanec Nuquin Papan chiacpadequi nuqui bédamboec tabadcuenece.

⁵ Adec abided ciudadec unësaid tantieci icsate bunenquo yanquid yec Esus uincuemiacimboen comapenen tantiaquin Nuquin Papan utsiacimbocnuc icmiaidtsen nuqui nec. ⁶⁻⁷ Esus tantiabi yec icsaquido icboedi matses icsaid bedshunec Esus unësaid tantieci nuqui icsate bunenquo yanec. Mëtaniaid abibi mënchiquidtiapimbo yachimboec matses abembi icsaic ënëdtiapimbo iquec. Adboedi Esus tantieci nuqui icsate bunenquo yanec.

⁸ Adec Esus unësaid tantieci icsainquo yanec nuqui nadpec. —Nuquin Papan uincuemaidën Esusën nuqui bédamboen tabadmec. Unëssh Nuquin Papa yacno abëdi nuqui tabadmendac —nuqui quepec. ⁹ Nuquin Papan uincuemiac Esus padpidec unëstiapimbo iquendac. Aton dada unësquid icboedi unëstiapimbo icquid yanac. ¹⁰ Matses icsaido cuidmenquo icnuec abided abentsequi ciudadec Esus unëssh caondash padpidec unësenquo yec. Adsho uincuemiac Nuquin Papan chiacpadomboen nabanec aidbëd tëshnanenquo yec tabadec.

¹¹ Ëbi adsho tantiaho nadta. —Ëbi cuidmenquo icnuec abided ciudadec unëssh uincuemiac Esus ëbëdi iquec. Aid tantieci icsainquo yanebi. Ambi nacpadece tabadtiadquid iquebi —queta. ¹² Icsamboec tabadenquo icnuna. Nuqui icsate bunaid nainquo icnuna. ¹³ —Icsaquinona —quesho tantiaho: —Padi —quenuna. Unësshimboen Nuquin Papa

tantiengquo ictenedëmbi uincuenacimboben Nuquin Papa nuqui tantiabenondaque. Ambi chiacpadec bédamboequien tabadtia. ¹⁴ —Nuquin Papan ambi: “Bédamboec tabadta,” quequin chiaid Moises dada uamiactedi naquin ëmbimbo Nuquin Papa bédamboen ismembi —quenquo icquin Esus tantiasho Nuquin Papan nuqui bédamboen isec. Ambi bédamboen isaïdo yec nuqui icsate bunengquo nuqui yaneque. Bédamboec tabadnuna.

¿Tsuinsin yuabo Esus tantiaquido icpec? quequin chiaid

¹⁵ —Aden Nuquin Papan nuqui bédamboen isec —quequin ëmbi chuisho tantiashun naden icsamboen tantienda. —Nëbi abided cuidadaid Esus tantiasho ëbi bédamboen isec. Èbi cuidtiapimbo iqueque. Ambi chiaid niac-niaquec icsabudquionona —quequin tantienda. Esus tantiaquid adesambo nec. ¹⁶ ¿Tantienquioda ique? Icbon chiacpadomboen yuan naquid. Icsamequidën tantiacpadomboen icsamboen naquid aton yua nendac. Aidën yua icquin icsaid ëntiapimbo yec unësash icsano nidendac. Nuquin Papan yuain ambi chiacpadec bédamboec tabadcuendac. ¹⁷ Mibi adec tabadsho isun: —Esus chuibanac icsaid ëntiapimbo icboedi Esus tantiabenash Doma yacnocquido bédamboec tabadcuenac. Aden namec mibi bédambo iquec, Papa —quequin Nuquin Papa chiombi. ¹⁸ Satanasën yua icquin mimimbo mibi icsaid ëntiapimbo icsho Nuquin Papan nac ambi chiacpadquiec mibi bédamboec tabadcuenac.

¹⁹ —Mates icquin: “Nuquin Papan chiaid tantiadenquo iquec,” canushe —quequin bédamboen tantiamenuen mimbi tantiaid yuan naid mibi chiombi. Satanasën yua yec icsateuïdi bunquiec mibi icsaded-icsadedondac. Adec icsamboshë iccondaidi nëbi Nuquin Papan chiacpadequien bédamboec tabadtia. ²⁰ Satanasën yua yec icsaquiec Nuquin Papan chiacpadec bédamboec tabadtiaimbo mibi iccondac. ²¹ ¿Ada bédamboec tabadonda? Ma mibi chieshëmënquiec tabadteneuoc. —Èbi chieshëmënquiec tabadondaid tantiashun: “Mibi icsambo iquec,” ëbi canushe —queshun mimbi naondaid ma mimbi chienquo iccondac. Icsaid ënabi yec unësash icsano mibi nidtsenac. Adechidi icsaid ënenquo icquido unësash icsano nidendac. ²² Nëbi nuqui Esus tantiasho Nuquin Papan aton yuabo nuqui icmiac. Adoac icsaid ëntiapimbo icboedi nëbi nuqui bédamboec tabadcuenec. Adquid unësascho Nuquin Papan abëdi tabadmendac. ²³ Icsaido cuidquon Nuquin Papan icsano nidmendac. Abided cuidadec unësaid Esuquidistu Nuquin Icho tantiasho Nuquin Papan nuqui bédamboen isquin unësascho abëdi tabadmendac.

7

Bédamboec tabadte chuïnuen chido bënëchoquid Pabadon chiaid

¹ Con utsibobimboequido mibi neque. Tantia. Padiiden mibi chuïnu. Naden chiaid mimbi tantianëdac. —Nuquin Papan dada uamiac Moisesën chiampicpadomboen matesën naquid. Unësun aidën chiaid natiapimbo iquec —quequin mimbi tantianëdac. ² Nuquin Papan chiacpadomboen inaidën aton bënë nianesa. Dada utsi chudmesa chidon. Bënë unësambien nianta dada utsin bedadquid. ³ Bënë unësabi icnubi aton bënë nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bënë unësambien dada utsin bedadquid chido. Aden bedacsho Nuquin Papan: —Mibi cuidnu —cainquo ictsiash.

⁴ Adechidi ambi chiaid niac-niacsho Nuquin Papan cuidtsenaido nuqui iccondac. Adondaidi abided cuidadec unësaid Esus tantiasho Nuquin Papan: —Mibi cuidnu —nuqui cainquo iquendac. Aden Nuquin Papan uincumenëdaïdën Esusën aton yua nuqui icmequin bédamboec tabadquid icmenuen nuqui icsaid bedshumpanëdash. ⁵ Esus tantiabi yec nuqui bunacpadequidi nuqui icsapadenec. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenec. Adquid yec unësascho icsano nidmequin Nuquin Papan nuqui cuidtsenëdash. ⁶ Esus tantiabi yec nuqui nadondac. —Moisesën chiacpadec bédamboec tabadsho Nuquin Papan nuqui bédamboen istsiash. Ambi chiaid niac-niacsho nuqui cuidendac —quiondaïdi nëbi Esus tantiec nuqui adenquo iquec. Nëbi Nuquin Papan Mayanën tantiamiacpadec nuqui bédamboec tabadec.

Icsaquid nebi, quequin Pabadon chiaid

⁷ —Nuquin Papan ambi chiaid Moises dada uamepampid icsambo iquec —¿quectabi ique? Icsapengquo iquec. Nuquin Papan ambi chiaid Moises dada uamiad isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibëdec,’ quec chieshëmënenda,” quequin Nuquin Papan Moises dada uamiad isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiembi ictsenchitondac. ⁸ Utsin na isash: —Adquid con na nibëdec —quiash chieshëmëntsëcboedi Nuquin Papan: —Adenda —quequin chiaid tantiashi icsaquid yec utsin na comapenec

bunquiec chieshēmēnquiondabi. Nuquin Papan chiaid nibēdnuc: —Adec icsachitobi — quequin tantienquo icctsenondambi. ⁹ Nuquin Papan chiaid tantiabi yec Nuquin Papan cuidte dacuēdēnenquo yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. ¹⁰ Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenguo iccobi. Icsachitobi. Adquid Nuquin Papan cuidendac —nuqui quianondac. ¹¹ —Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantias: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. ¹² Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

¹³ ¿Nuquin Papan chiaid isbanashta matses Nuquin Papan cuidtequido yanactic? Padenquo. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —qeshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Ēbien cuidchitec —nuqui quianondac. ¹⁴ Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidiapiambo yacbimboen icsaquido icquin Nuquin Papan chiacpadomboen natiapimbo nuqui iquec. ¹⁵ —Nuquin Papan chiacpadomboen nanu —queboedombi natiapimbo nuqui iquec. Adecbidi: —Utsibo icsapadec icsainquo iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. ¹⁶ —Nuquin Papan chiaid bēdamboen icchitec. Aidēn chiaid niacte bunenquo iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. ¹⁷ Bēdamboecuidi tabadtiadquidini icsaquid yec ēbemi icsadenechitec. ¹⁸ —Bēdamboec tabadnu —queboedi icsaquid yec ēbemi bēdamboec tabadtiapimbo iquebi. Icsaquidini nec. ¹⁹ —Bēdambo icte bunebi —queboedi ēbemi bēdamboec tabadtiapimbo iquebi. —Icsate bunenquo iquebi —queboedi ēbenquiobi icsaded-icsadedebi. ²⁰ Icsate bunenquo icboedi icsaquid yec ēbemi bēdamboec tabadtiapimbo iquebi.

²¹ —Adquid nebi. Nuquin Papan chiacpadec bēdamboec tabadtiadquidi badedquo icsaded-icsadedebi —quequin tantiembi. ²² —Nuquin Papan chiaid bēdambo iqueque. Ambi chiacpadec ēbemi bēdamboec tabadnu —queboedi ²³ icsaquid yec ēbemi bēdamboec tabadtiapimbo iquebi. Mētaniaid abembi mēnchiquidiapiambo yacbimboen ēmbi naid ēntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec. ²⁴⁻²⁵ Adquid yec shubitiadquido icchitebi. Icsaquid yec: —¿Mitsipadequini bēdamboec tabadpeba? —queboedi: —Abi tantiasho Esuquidistumbini bēdamboen tabadmec —quianondabi. Adshun Nuquin Papa naden chiembi. —Ēbi bēdamboen tabadmequid Esus mimbi ēbi tantiamiac. Mibi bēdambo iquec, Papa —quequin Nuquin Papa chiembi.

8

Nuquin Papan Mayanēn namiaid

¹ Aden matses bēdamboen tabadmequid Esuquidistu tantiasho: —Mibi icsambo iqueque. Cuidnu —cainquo iquendac Nuquin Papan. ² Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiasho Nuquin Papan aton Mayan meniac aidēn tantiamiacpadec nuqui bēdamboec tabadandac. ³ —Moisesēn chiacpadec bēdamboec tabadec unēsash Nuquin Papa yacno tabadebi —queboedi icsaquido yec abembi bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unēsapanēdash. ⁴ —Abided cuidadaid con Mado Esus tantiasho bēdamboen isquin con Mayan matses menendambi. Adoac aidēn tantiamiac ēmbi Moises chuimiampicpadec bēdamboec tabadendac. Matses abi icsate bunacpadec icsainquo yec bēdamboec tabadendac —qeshun Nuquin Papan Esused cuidpac caondash.

⁵ Adec Nuquin Papan Mayanēn tantiamiaid Esus tantiaquid Nuquin Papan tantiacpadec bēdamboec tabadte bunec. Padnuen icsaquid: —Ēbi bunaid nanu —quequin ambibi tantiacpadec icsaic. ⁶ Aden abi bunaidquido naic icsamboec tabadquid Nuquin Papan cuidendac. Padnuen Nuquin Papan Mayanēn tantiamiacpadec tabadquid Nuquin Papan cuidte dacuēdēnenquo yec bēdambo yec unēsash Nuquin Papa yacno tabadendac. ⁷ —Icsate bunquidēn ēbi chieshēnec. Ambi naiduidtsēqui naquin ēmbi chiacpadomboen natiapimbo

iquec —queshun Nuquin Papan cuidendac. ⁸ Adquido chuiquin: —Mibi bēdambo iquec —catiapimbo Nuquin Papa iquec.

⁹ Esus tantiaquidien adesa nec. Esus tantiasho Nuquin Papan aton Mayan nuqui meniac aidēn tantiamiacpadec nuqui bēdamboec tabadendac. Nuquin Papan aton Mayan meniacmaid Esus tantiesha nec. Nuquin Papan Mayan Esusēn Mayambidi nec. ¹⁰ Abided cuidadaid Esus tantiasho bēdamboen isquin Nuquin Papan aton Mayan meniaid yec abēd tabadtequido nuqui nec. Icsaquido yec matses abitedi unēsquidombo icnubi Esus tantiaquid unēsacsho Nuquin Papan abēdi tabadmendac. ¹¹ Esus uincuemequidēn Nuquin Papan ambi aton Mayan meniaido unēsacsho nuqui uincuemequin nuquin dada utsi uaindac. Aton Mayan nuquibēd tabadsho isun nuqui aduencac.

¹² ¿Ēbi adsho tantiashta Esus tantiaquid abi bunacpadequi icsapec? Padenquio. Bēdamboec tabadte bunec. ¹³ Utsiboen abi bunacpadeq icsamboecuidi tabadec unēsacsho cuidquin Nuquin Papan icsano nidmendac. Nuquin Papan Mayanēn tantiamiacpadec tabadquin nuqui icsaid nuqui ēnec. Adash unēsash Nuquin Papa yacno nuqui tabadendac.

¹⁴ Aden aton Mayanēn bēdamboec tabadmiaido Nuquin Papan: —Con mado nec. Con champi nec —capendac. ¹⁵ ¿Icbo icsambo icquidēn yua dacuēdmiacbimboenda Nuquin Papan Mayanēn nuqui dacuēdmeq? Padenquio. Nuqui bēdambo icmec. Aidēn tantiamiacpadom-boen Nuquin Papauidsēqui papa nuqui capec. ¹⁶ Aden Nuquin Papan Mayanēn: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. ¹⁷ —Con mado nec. Con champi nec —queshun nēbi Nuquin Papan nuqui bēdamboen isquin unēsacsho abēdi tabadmequin nuqui bēdamboshē icmendac. Utsibon chieshēnac chieshtoenuqio yec unēsacsho Nuquin Papan abēdi tabadmequin Esus bēdamboshē icmiac. Adembidi Esus tantiaquid icsho utsibon chieshēnaqui chieshtoenuqio icquin Esus tantiequi unēsacsho Nuquin Papan abēdi tabadmequin nuqui bēdamboshē icmendac. Nuquin Papa yacnombo Esuquidistun natedi nuquin na nendac.

Nuquin Papan bēdamboshē icmete chiaid

¹⁸ Adec Nuquin Papa yacno nuqui bēdamboshē icte tantiaquin nuqui nidaidēn natiac tabadaiduidi ma nuqui tantiatiapimbo iqueyoc. ¹⁹ Aden Nuquin Papan nuqui bēdamboshē icmete tantiec ambi uaid utsitedi nidaidēn icquidtedi aben icquidtedi: —Nēbimbobi bēdambo icmepashuni —queded-quededec tabadec. ²⁰ Abia matses uaid Adan icsasho cuidquin ambi uaid nidaidēn icquidtedi Nuquin Papan unēsquiduidquio icmepampic aidon: —Padi —catiapimbo icnuc. ²¹ —Yuecshun ěmbi Esus tantiaquido uincuemequin aton dada utsi uacpadēn ěmbi uaido utsi nidaidēn icquidtedi chodquete icboedi utsi uain bēdamboshē icmendambi —quequin tantiaquimbi unēsquiduidquio icmepampic. Aden Nuquin Papan chiaid tantiaquin ambi uaidon nidaidēn icquidtedishun aton dada abi bēdambo icmete tantiaquin cainec tabadec. ²² Unēstiapimbo icte bunec unēsquid yec: —¿Tedectsicshun Nuquin Papan nuqui utsi uapeba? Nēbimbobi Nuquin Papan utsi uapashuni —queded-quededec Nuquin Papan uaidtedi. Bacuē tishquid bacuē paēmbo icnuc: —Badedquio tishmepashuni —quiacsimboec adpec. ²³ Nuquin Papan meniaidēn aton Mayanēn tantiamiacpaden nuquitsen naden chiec. —Con dada utsi uaquin unēstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unēstiapimbo icquid icmendac —queded-quededquin nuquin dada utsi uate tantiaquin nuqui cainec. ²⁴⁻²⁵ —Esus tantiaquido unēsacsho Nuquin Papan nuquin dada utsi uaindac —quequin tantiaquin nuqui Esus tantiabonondac. Nuquin dada utsi uabi icnubi: —Nēbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquio iquendac.

²⁶ —Aden aton dada utsi uate tantiaquin yuen cainec chieshtonoshe —queshun Nuquin Papan Mayanēn nuquibēd icquin bēdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquio icsho isun Nuquin Papan Mayanēn abi chiec. Unēsquio icnuc onquenquio icquin chiec: —Mimbi tantiacpadomboen aid matses bēdambo icmeta, Papa —quequin Nuquin Papan Mayanēn nuqui comapoben chuided-chuidedec. ²⁷ Aden Nuquin Papan: —Ma Esus tantiaquido bēdambo icnu —quequin tantiaidbidi aton Mayanēn onquenquio icquin chuisho Nuquin Papan tantiec. Otacquio tantiaidtedi tantiaquid icquin Nuquin Papan aden aton Mayanēn chiaid tantiec.

Nuquin Papan nuqui bēdambo icmiaid

²⁸ Aden tantiashun nuqui naden tantiec. Ambi tantiamiacpadomboen abi tantiaquido bēdambo icmete bunquin Nuquin Papan bēdamboen nashunec. Unēsquio yec tabadsho aden naic. Natiambo icsho ademibidi naic. Cuishonquesho ademibidi naic. ²⁹ Endenquimboshē

nidaid uabi yequi Nuquin Papa nadpampic. —Ēmbi tantiatedi ebēda con Mado tantiaquid icmequin Esuspadquo icnuc bēdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquo icnuc bēdambo icmenuen Nuquin Papan naic. ³⁰ Ēndenquimboshē nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquo icnuc abided cuidadaid Esus tantiasho Nuquin Papan nuqui bēdamboen isec isaisabimboecnuc. Nuqui bēdamboen isquin nuqui bēdamboen tabadmec. Unēsacsho nuqui unēstiapimbo icquid icmeshun abēdi tabadmendac.

³¹ ĴEmbi aden chiaidtedi tantiashta Esus tantiaquido dacuēdpec? —Nuqui cudasquin Nuquin Papan nuqui bēdambo icmendac. Ēbi chieshēnquidēn: “Cuid,” cac Nuquin Papan ēbi cuidenquo ictsiash —quec nuqui dacuēdenquo iquec. ³² Nuquin Papan nuqui tantiaquie. Aton Madombo cudasenquo icquimbi nuqui cuidenquo icnuen aton Madoded cuidquin unēs uamepanēdash. Adshumbic Esus tantiasho ēnenquo icquin bēdamboen isquin nēbi bēdambo icmequin unēsacsho abēdi tabadmequin nuqui bēdamboē icmendac. ³³ ĴNuquin Papan nuqui bēdamboen isquidēmbida nuqui cuidpec? Padenquo. ĴUtsibo nuqui caic: —Icsambo iquec —queshobida Nuquin Papan nuqui cuidpec? Padenquo. ³⁴ ĴEsusēmbida nuqui cuidpec? Abi tantiaquido cuidmenquo icnuc abided cuidadec Esus unēsac caondash. Unēsacsho Nuquin Papan uincuemiac Nuquin Papa yacnoshon aidēmbi abi tantiaquido chianec. —Ēbi tantiaquido bēdamboen isquin cuidenda, Papa —quequin Nuquin Papa chianec tabadec. ĴAdquidēnquibida nuqui ic sano nidmequin cuidpec? Padenquo. ³⁵ Nuqui bēdamboen isquin ēnenquo icquin Esusēn nuqui tantiaquie. ĴShubisho isunda Esusēn nuqui tantienquo icpec? Padenquo. ĴDacuēdshoda Esusēn nuqui tantienquo icpec? Padenquo. Adembidi nuqui tantiaquie. Utsibon chieshēnsho bēdamboen isquinc pete natia bunsho bēdamboen isquinc nuquin dashcute nibēdsho bēdamboen isquinc nuqui Esusēn caindac. —Ēbi acshunendac —quesho bēdamboen isquinc chieshēmēnquidon: —Cuesunenu —casha bēdamboen isquinc nuqui caindac Esusēn ēnenquo icquin. ³⁶ Aden utsibon Esus tantiaquido chieshēnte chuiquin Nuquin Papan dada uamepampic naden. “Mibi tantiasho ēbi: ‘Cuesunenu,’ caded-cadedec uīmanēmēnquidon. Aben icquidbimboecnuc: ‘Cuesunenu,’ caded-cadedebi, Papa,” quequin Nuquin Papan chiaid dada uapampic Esus tishabi icnuc.

³⁷ Aden utsibon nuqui chieshēnsho Esuquidistun nuqui bēdamboen tantiaquie. Shubisho abi nuqui tantiamec. Adoac Esus tantiatsec shubiquimbi chieshtoenquo icquin nuqui Esus tantiaquie yanendac. ³⁸⁻³⁹ Nuquin Papantsen ēnenquo icquin nuqui tantiaquie. Nuquin Icho Esus tantiasho Nuquin Papan nuqui bēdamboen isec. Unēsacsho nuqui bēdamboen tantiashtash. Unēsabi icsho nuqui bēdamboen isec. ĴNuquin Papan abi yacnoshon uaid mayan bēdan: —Aid tantienda —cashoda nuqui Nuquin Papan tantienquo yampatsiash? Padenquo. Adembidi nuqui tantiaquotsiash. ĴPodobitsi icsabon icho Satanasēn: —Aid tantienda —cacta Nuquin Papan nuqui chieshēmpatsiash? Padenquo. Adembidi nuqui tantiaquotsiash. Nēbi nuqui bēdamboen tantiec. Yuecshun adembidi nuqui bēdamboen tantiadec. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquotsiash. Abuc nidacsho Nuquin Papan nuqui bēdamboen tantiashtash. Nidaid uquēducquo nidacsho adembidi nuqui bēdamboen tantiashtash. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bēdamboen tantiashtash ēnenquo icquin.

9

Pabaton aton matses isadaidbo chiaid

¹⁻² Aden con matses isadaidbo tantiaquid Nuquin Papa nec. —Aden abi tantiaquidi con matsesēn bēdamboen tantienquo iquec —quiash shubitiadquo iquebi. Muainquo iquebi. Esus tantiaquid icsho Nuquin Papan Mayanēn tantiamiaid icquin abimbo chiembique. Tantiata. ³ Con matses isadaidbo tantiec unēsquo yec tsadebi. Nuquin Papan: —Min matses abitedi cuidenquo icnuc mibiuidtsēqui Esusbēd tabadmenquo icquin icsano nidmequin cuidnu —capatecnēdani. Adoac: —Ai, con matses cuidenquo icnucn ēbided cuid —quetsenondabi. ⁴ Con matses tsusedpa Acobo caid Nuquin Papan Isadaid caidēn tsyuecquidotedi isadaidbo tantiaquin Nuquin Papan nadpampic. —Con matses mibi caimbique. Mibēdi tabadebique. Mibi ismenu —quequin con matses tabadacno abu ushu bēchamuanquiequid chomequin ismepampic. Adashic nadpampic. —Ēmbi chiacpadeb bēdamboec tabadsho mibi bēdamboen isquin bēdambo icmendambi. Mibi nianenquo iquen-dambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquo ictequid chuiquin: —Mibi bēdambo icmendambi —quequin Nuquin

Papan con matses chuiampic êndenquimboshê. ⁵ Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquiobi yec abitedishun Icho yec matsesac caondashe. Esus chuiquin: —Nuquin Papa padquiobi yec mibi bédamboshê iquec —canuna ênenquo icquin.

⁶ Êmbi chiacpaden Esus tantienquo icsho Nuquin Papan con matses dadpen bédamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiacpadomboen nainquo icquin con matses bédamboen istiapimbo iquec —¿quectabi ique? Padenquo. Nuquin Papan abimbo chuiampic. Isadaidbo dadpenshun Nuquin Papa bédamboen tantienquo iquec. Ambi tantiactedishun abi tantiasho ambi chiacpadomboen Nuquin Papan bédamboen isec. ⁷ Êndenquimboshê con tsusedpa Abadauanên mêdaidtedi adembidi Nuquin Papan bédamboen isambo. Abadauanên mado abentsêqui Isac caic: —Aidên tsyuecquido êmbi mibi cuênacpadomboen con matses caindambi —quequin Nuquin Papan chuiampic. ⁸ ¿Abadauanên bacuêbotedishun tsyuecquidotedida Nuquin Papan con matses caido nepec? Padenquo. Ambi chiacpadomboen Isaquên tsyuecquido Nuquin Papan con matses caido nec. ⁹ Naden Nuquin Papan Isac tishte chuiampic. “Êmbi tantiacpadên choashun êmbi namiac Sadan min chidon dada bacuê tishendac,” quepampic Nuquin Papa Abadauan chiech.

¹⁰ Aden ambi: —Adoendambi —quequin chiacpadomboen naquidquo Nuquin Papa nec. Aden Nuquin Papan Isaquên bacuê abi ushêmbi daêd tishte chuiampic. Adnubien con tsusedpa Isaquên aton chido Debeca caid bedshun chudquin dada bacuê daêd usundomepampic Nuquin Papan chiacpadomboen. ¹¹⁻¹² Aid dada bacuê daêd tishabi icshobi Nuquin Papan ani naden chuiampic. “Êmbi tantiacpadquid min madon utsimpi bÿyucquidimbocquid nendac,” quepampic. Aid daêd tishabi bédamboec tabadtiaimbo icnubi: —Tishacsho êmbi tantiacpadembi tsyuec tishtsaidêmpi abentsêqui bédamboen isendambi —quequin tantiech adpampic Nuquin Papa. ¹³ Adembidi Isaquên mado chuiquin Nuquin Papan ambi chiaid dada uamepampic. “‘Acobouidtsêqui tantiaquioquin aton buchimpi Esau bêdiatsêc tantiatendambi,’ quepampic Nuquin Papa,” quequin dada uamepampic.

¹⁴ ¿Êmbi aden chuisho tantiashtash: —Nuquin Papa icsambo iquec —quecta mibi ique? Ma Nuquin Papa icsapenquo icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bédamboen isec. ¹⁵ Aden Nuquin Papan con tsusedpa Moises chuiampic.

“Embi tantiactedi matses bédamboen isendambi. Aidtedi cuidenquo iquendambi,”

quequin chuiampic. ¹⁶ ¿—Êmbembi nasho Nuquin Papan bédamboen istiashtash —quec matses bunacpadenda Nuquin Papan matses bédamboen ispec? Padenquo. Ambi tantiactedishun abi tantiashtash Nuquin Papan bédamboen isendac. ¹⁷ Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuiampic. “‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquo nec, ma êbi canu,’ quequin mibi chuiquid dapa icmiondambi. Mibi icsasho pacuênêdadbimboecnuc mibi icmembî,” quequin Nuquin Papan padaon chiaid Moisesên dada uapampic. ¹⁸ Aden ambi tantiacpadomboen utsitsien icsaido pacuênêdadbimboecnuc icmequin abi tantiamenquo iquec. Adembidi utsitsien bédamboen isquin abi tantiamen.

¹⁹ ¿Êbi adsho tantiashtash mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesên nainquo icpadic? —¿quecta ique? ²⁰ ¿Matses icquinda mimbî Nuquin Papa chushcapatsia? ¿Ambi uaido icquimbida nuqui nadope? —¿Atotsieshun êbipadquid matses uao, Papa? —¿capenda nuqui ique? ²¹ ¿Ada abi nacnenquid matsun chushcapadic? Padenquo. Matsu nacnenquidên ambi tantiacpadomboen nacnenendac. —Nêid nidaid têshê têchu bédambo icquid acte uetequid nacnenu. Nêid nidaid têshê matsumpi icsactsêcquid opa acmete nacnenu —quequin matsu nacnenquid. Aden ambi tantiacpadomboen nidaid têshun nacnenquid.

²² Adembidi nuqui uaquid Nuquin Papan ambi tantiacpadomboen naindac. —Abitedishun Icombo yec comapenen tantiaquidquo nebi. Adquid icquin icsaido cuidquid nebi. Ismenu —queboedêmbi ambi cuidtequido baded cuidenquo iquec. Ambi êndenquimboshê tantiacpadomboen aido icsano nidmendac. ²³ —Ma êmbi bédamboen isaidon naden tantianu. “‘Icsaisambo icquin matses bédamboen iste bunquin Nuquin Papan icsaido badedi cuidenquo iquec,” quequin ma tantianu —queshun icsaido badedi cuidenquo iquec. Ambi êndenquimboshê tantiacpadomboen ambi bédamboen isaido abêdi tabadmendac.

²⁴ Aden ambi tantiacpadomboen Esus tantiasho Nuquin Papan nuqui bédamboen isec. Isadaidbon abi tantiasho bédamboen isquinc isadaidpembo matses utsibon abi tantiasho bédamboen isquinc nuqui caindac. ²⁵ Ambi matses utsibotsen aden bédamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi.

Adembidi ëmbi bédamboen tantiacmaidobi matses utsibo bédamboen isbenendambi,”

quequin Nuquin Papan chiaid dada uashun ²⁶ nadentsen dada uapampic.

“Matses utsibo ambi con matses cacmaidobi ambi tantiacpadën aido abentse-abentsen Nuquin Papan bédamboen isendac.

Bédamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bédamboen iste chuiquin dada uapampic.

²⁷ Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasën naden dada uapampic. “Masitedi dadpenquio caidnëdaido isadaidbo daëdpactsëcshun abi tantiasho bédamboen isquin aidtedtsëqui Nuquin Papan cuidenquio iquendac. ²⁸ Ambi chiacpadomboen ambi tantiacpadën matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasën dada uapampic. ²⁹ Nuquin Papan chiaid padpiden dada uquin isadaidbo cuidte Isayasën chuiampic naden.

“Shubu dadpen icquid Sodoma caid yacnocquidobëda shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibëdquieic iquendac.

Adembidi con matses Nuquin Papan uesquin cuidtsempanëdash.

Abitedishun Icho icquin con matses nibëdquiecnuc cuidtsempanëdash. Dadpen cuidquin daëdpactsëc cuidabi icpanëdash,”

quequin dada uapampic Isayasën.

Isadaidbo bédamboen istiapimbo icte chiaid

³⁰ Aden Isadaidbo dadpenshun abi tantienquio icsho Nuquin Papan bédamboen istiapimbo iquec. Padnuen matses utsibo: —Mabi Nuquin Papan bédamboen isnu. Ambi chiacpadec bédamboec tabadnu —quesabobi: —Ëbi cuidmenquio icnuec isadaid bidedac unësaid Esus bédamboshë iquec —quesho Nuquin Papan bédamboen isec icsaisabimboecnuc. ³¹ Isadaidboen: —Moisesën chiampiduidi ëmbemi nasho Nuquin Papan bédamboen isebi —queboedombi nainquio icsho Nuquin Papan bédamboen istiapimbo iquec. ³² ¿Atotsieshun Nuquin Papan isadaidbo bédamboen istiapimbo icpec? —Ambi chiacpadomboenuidi ëmbemi naquin Nuquin Papa bédamboen ismembu —queboedombi adotiapiimbo icquin Nuquin Papa bédamboen ismequidquio Esus chieshë nec. Adsho Nuquin Papan bédamboen istiapimbo iquec. ³³ Esus tishabi icnuc isadaidbon Esus chieshënte chuiquin Nuquin Papan con tsusedpa naden dada uamepampic.

“Buintad bédambo icquid istuidash: ‘Nëidquio shubu uanun nitsinembu,’ quiacbimboen

Edusaden yacno ëbi bédamboen ismequidquio isadaidbobëd tabadmendambi.

Adec tabadsho anocquidon chieshënenadac.

Aid chieshënnid nadquio iquendac. ‘Cuëte mabud iquec,’ quequin tantienquio yec nidec tocoshquetanec uebudacimboec

ëbi bédamboen ismequid tantienquio yec unësash icsano nidendac.

Aid tantiaquido: ‘Nëid tantiasho Nuquin Papan abi yacno nuqui tabadmendac,’ quequin unësacsho ëbi yacno tabadmendambi,”

quequin Nuquin Papan ambi chiaid dada uamepampic.

10

¹ Con matses isadaidbo tantiac unësquio icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bédamboen ista, Papa —quequin Nuquin Papa chianiombi. ² Esus tantiabi ëmbi chuidenecpadomboen chiec: —Nuquin Papan chiacpadomboenuidi naquin Nuquin Papa bédamboen ismembu —quetsëcboedombi con matsesën Nuquin Papa bédamboen ismete tantienquio iquec. ³ —Abided cuidadaid Esus tantiasho Nuquin Papan bédamboen isebi —quetiadquidi icsamboen tantiec. —Nuquin Papan: “Bédamboec tabadta,” quequin chiaid Moisesën dada uactedu naquin Nuquin Papa bédamboen ismembu —quequin icsamboen tantiaquin Nuquin Papan tantiacpadomboen nainquio icquin Esus tantienquio iquec. ⁴ Esusuidtsëqui Nuquin Papan: —Bédamboec tabadta —quequin chiaid Moisesën dada uactedu naquidquio nec. Adec icsaisa yec matses icsaid bedshunuec abided cuidadec unësac caondash. Nëbi Esus tantiasho Nuquin Papan matses bédamboen isec icsaisabimboecnuc.

⁵ Nuquin Papan chiaid dada uaquin Moisesën chuiampic naden. “Ambi chiacpadomboenuidi naquid Nuquin Papan bédamboen isquin abédi tabadmetsiash,” quequin Nuquin Papan chiaid Moisesën dada uapampic. ⁶ Aden ambi chiacpadomboenuidi natiadquidombi natiapimbo icsho Nuquin Papan matses bédamboen istiapimbo icpanédash. Nēbi abided cuidadaid Esus tantiasho nuqui bédamboen isec. Adoac Esus tantiaquido nadenquio iquec. —Nuquin Papa yacno nidshun ¿tsuntsin Nuquin Papa nuqui bédamboen ismepatsiashba? —quenquio nuqui iquec. —Esusquio Nuquin Papa bédamboen ismequidquio nec —quequin nuqui tantiec. ⁷ Aden tantiec: —¿Tsuntsin Nuquin Papa bédamboen ismequidquio uincuemepatsiashba? —quenquio nuqui iquec. —Abided cuidadec unēsacsho Esus uincuemiatic caondash —quequintsen nuqui tantiec. ⁸ Aid tantiasho Nuquin Papan nuqui bédamboen isec. Ambi bédamboen iste chuiquin Nuquin Papan naden dada uamepampic. “Nuquin Papan chiaid chuiho tantiash: ‘Abimbo chiec. Aid tantiambi,’ qesho Nuquin Papan matses bédamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bédamboen isec. Aden nuqui bédamboen ismequid Esus chuibenequid nebi. ⁹ —Nuquin Papan uincuemiaid Esus abitedishun Icho neque. Con Icho Esus canu —quequin chuiho Nuquin Papan nuqui bédamboen isquin cuidenquio iquendac. ¹⁰ —Ēbi cuidmenquio icnuec abided cuidadaid Esus tantiambi —quequin otacquo tantiaquidēn: —Esus tantiaquid nebi —quequin utsibo abimbo chuiho bédamboen isquin Nuquin Papan cuidenquio iquendac.

¹¹ Ambi chiaid Nuquin Papan dada uamiapaden: “Aid tantiec: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi.”

¹² Isadaidbo yec matses utsibo yec quequido Esus tantiaquidtedi adoendac. Aden abitedishun Icho icquin abi tantiaquidtedi Esusën bédambo icmendac. ¹³ Aden Esusën nate chuiquin con tsusedpan Nuquin Papan chiaid dada uapampic. “‘Abitedishun Icbombo icsho mibi tantiaquid nebiq. Ēbi bédamboen ista, Icho,’ qesho bédamboen isquin cuidenquio iquendac,” quequin dada uapampic.

¹⁴ ¿Mitsipaden matsesën Esus tantiabempec? ¿Esusën naid chiabi yacta matsesën tantiapec? Padenquio. Esusën naidquio chuibanauquin tantierendac. ¿Esusën naid chuiho tantiash: —Mua —quequidta Esus tantiaquid nepadic? Padenquio. —Abimbo caic —qeshun: —Min Mado Esus tantiembique. Ēbi bédamboen ista, Papa —quequidien Esus tantiaquid nec. ¹⁵ ¿Mitsipadoaidēn Esusën naid chuibampec? ¿—Chuita —cacmaidēnda chuibampec? Padenquio. Nuquin Papan: —Con Mado chuibeneta —caidien Esusën naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bédamboen iste chuibanquid chosho isash: ‘Bédambo iquec,’ quec matses cuishonquendac,” quequin dada uamepampic.

Isadaidbo dadpenshun Esus tantienquio yaid

¹⁶ Adquidēn Esusën naid chuibanac isadaidbo dadpenshun Esus tantienquio iquec. Daédpactscshun tantiec. Abi tishabi icnuc aden abi tantiesabo Esusën chuite Nuquin Papan con tsusedpa Isayas caid dada uamepampic naden. “Mimbi chiaidquio ěmibi chuibancho ¿tsuntsin tantiapec, Papa? Daédpactscshun: ‘Abimbo mimi chiec. Mibi tantiaquin mimbi chiacpadomboen naimbi,’ ěbi caindac, Papa,” quequin Esusën aton Papa chuite Isayasën dada uapampic. ¹⁷ Aden Esusën naid chuibancho tantiashun: —Abimbo caic —qeshun utsibon Esus tantiec.

¹⁸ ¿Esusën naid chuiho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidēn naid chuibanquidēn chuibanendac.” Aden chuibancho ma con matsesën tantiaboc. ¹⁹ Aden Nuquin Papan chiaid chuiho tantiash: —Tantiadenquio yec onquec —¿quepecta icnédash con matses? Padenquio. Tantiashi abi bédamboen tantiate bunenquio icsho isun matses utsibo bédamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidbouidi ěmibi bédamboen iste mimbi danubi ěmibi con matses cacmaidobi matses utsibo bédamboen isbenendambi.

Ěmibi matses utsibo bédamboen iso isash: ‘¿Atotsieshun Nuquin Papan matses utsibo bédamboen ispec?

Icsambo iquec,’ quec mibi chushquendac.

Matses utsibobi ěbi tantiabi icquido ěbi tantiamendambi.

Aido bédamboen isquin mibi nēishēmendambi,”

quequin Nuquin Papan Moises dada uamepampic. ²⁰ Adembidi dacuēdenquio icquin Isayasën Nuquin Papan matses utsibo bédamboen iste dada uapampic.

“‘Nuquin Papa tantiatadquio iquebi,’ quenquio icquidombi ěbi tantiabenosh.

‘¿Mitsipadembimbi Nuquin Papa bēdamboen ismepeba?’ quesabobi ěmbi bēdamboen iste tantiamiombi,”

quequin Isayasēn Nuquin Papan chiaid dada uapampic. ²¹ Isadaidbotsen chuiquin Nuquin Papan chiaidquiobidi Isayasēn naden dada uapampic. “ ‘Mibi tantiac unēsquio iqueque. ěbi bēdamboen tantiata,’ cadeniaqui: ‘Padi, mibi tantiatipimbo iquebi,’ quequin ěnenquio icquin ěmbi chiaid mimbi niac-niacpec,” quequin Nuquin Papan chiaid Isayasēn dada uapampic.

11

Ambi chiactedi isadaidbo Nuquin Papan bēdamboen isaia

¹ ¿Ambi chiaid niac-niacsho isadaidbotedida Nuquin Papan chieshēmpic? —Con matses catiapimbo iquebi —¿quecta iquec? Padenquio. Isadaidbombo nebi. Ěndenquimboshē con tsusedpa Abadauan campidēn baban tishmiaid Benaminēn tsyuecquidon tsyuecquid yec isadaidbombo nebi. Adquid icsho Nuquin Papan chieshēnenquio iquebi. ² Ěndenquimboshē nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshēnenquio iquec. ¿Ediasēn chiampid tantienquioda ique? Aton matses isadaidbo nēishēnshun Nuquin Papa naden chuiampic. ³ “Mimbi con matses caidotedi icsamboshē icquec, Papa. Mimbi chiaid chuibanguidobi cuesun secac. Papa quequin mibi menequin ismete cuēnote nacnenaid uesquin chic-chicpac, Papa. Icsamboshē iquec. Ěbiuidtsēqui bēdambo iquec. Mimbi chiaid chuibansho tantishun ěbi cuesunetiadquio iquec, Papa,” quequin Ediasēn Nuquin Papa chuiampic. ⁴ Adoac ¿mitsipadomboen Nuquin Papan chuiampic? “Ěbi tantiaquido abi iquec. Ěmbi namiacpadomboen isadaidbo dadpenshun 7000tedishun ěbi tantiec. Ěbi tantiesabon papa quequin nacnenaid Bad caid tantienquio icquin ěbi tantiec,” quequin Nuquin Papan Edias chuiampic. ⁵ Adembidi nēbi con matses isadaidbon ambi tantiactedishun Esus tantiasho Nuquin Papan bēdamboen isec. ⁶ ¿Ambembida con matsesēn Nuquin Papa bēdamboen ismepec? Padenquio. —Ěmbi chiacpadomboenuidi nasho matses bēdamboen isembi —¿quecta icpec Nuquin Papa? Padenquio. Aden naquid nibēdsho bēdamboen istiapimbo icboedēmbi ambi tantiactedishun icsaboedon Esus tantiasho Nuquin Papan bēdamboen isendac.

⁷ Isadaidbon ambi tantiactedishun Esus tantiasho Nuquin Papan bēdamboen isec. Isadaidbo utsiboen bēdamboen istiapimbo iquec. Aido: —Nuquin Papa bēdamboen ismete bunquin ambi chiacpadomboenuidi ěmbimbo nanu —queboedombi nainquio icsho Nuquin Papan bēdamboen istiapimbo iquec. Abi bēdamboen ismequidquio Esus chieshēnsho Nuquin Papan pacuēnēdacbimboecnuc isadaidbo icmepanēdash. ⁸ Aden ambi isadaidbo pacuēnēdacbimboecnuc icmete chuiquin Nuquin Papan dada uamepampic naden. “Nuquin Papan pacuēnēdacbimboecnuc icmiac Nuquin Papan chiaid chiaqui tantiatipimbo iquec,”

quequin dada uamepampic. ⁹ Adembidi ambi isadaidbo pacuēnēdacbimboecnuc icmete chuiquin Nuquin Papan con tsusedpa Dabid naden dada uamepampic ěndenquimboshē.

“ ‘Ěbi bunaiduidi naic ěbibi bēdambo iquebi,’ quequidēmbi Nuquin Papa bēdamboen tantienquio iquec.

Adsho Nuquin Papan cuidpashun.

Cuidadnushi abimbo chiaid danec: ‘Ěmbembi naic bēdambo iquebi,’ quendac.

Adec abi tantienquio yec icsasho Nuquin Papan cuidpashun.

¹⁰ Pacuēnēdacbimboecnuc icmequin Nuquin Papan abimbo tantiamenquio icpashun.

Natiamequin shubimepashun,”

quequin Nuquin Papan chiaid Dabidēn dada uapampic.

Nuquin Papan matses utsibo bēdamboen isbenaid

¹¹ ¿Aden pacuēnēdacbimboecnuc icmiac Esus tantiatipimbo icsho isadaidbo padpiden bēdamboen tantiametiapimboda Nuquin Papa icpec? Ambi tantiacpadomboen bēdamboen tantiamendac. Nēbi isadaidbo dadpen bēdamboen istiapimbo icquimbi matses bēdamboen iste bunquin Nuquin Papan matses utsibo Esus tantiamequin bēdamboen isbenec. —Ěmbi adosho isash isadaidbotsen ma nadnu. “Nuquin Papa bēdamboen ismete bunquiebique. Ěmbitsen Esus tantianu,” ma quenu —qeshun Nuquin Papan aden matses utsibo ambi bēdamboen iste tantiamiac. ¹² Ambi chomiaid Esus tantienquio icsho isadaidbo dadpen bēdamboen istiapimbo icquimbi matses utsibon Esus tantiasho ambi con matses caido

isadaidbobimboecnuc Nuquin Papan bédamboen isbenec. Ambi tantiacpadèn ambi tantiamiacpadomboen isadaidbo dadpeshun Esus tantiabensho Nuquin Papan bédamboen isendac. Adshumbic matses utsibobèdta isadaidbo Nuquin Papan bédamboshè icmendac.

¹³ Tántia, matses utsibo. Mibitsen chuinu. Nuquin Papan icmiacpadomboen matses utsibo Esusèn naid chuibenequidquio nebi. Èmbi chuibeneboed con matses isadaidbo chuibanombi naden. —Esusèn naid èmbi chuibeniac matses utsibon Esus tantiabensho. Adsho Nuquin Papan aido bédamboen isbenosh —quequin con matses chiombi. ¹⁴ — Aden Nuquin Papan matses utsibo bédamboen isaid èmbi chuisho tantiasht Nuquin Papa bédamboen ismete bunquin Esus tantiatsiash. Adsho Nuquin Papan bédamboen istisash —qeshun con matses aden chiombi. ¹⁵ Aden isadaidbon Esus chieshèsho isun Nuquin Papan matses utsibo Esus tantiamequin bédamboen isbenac. Ambi tantiacpadèmbi isadaidbontsen Esus tantiasht Nuquin Papan bédamboen isbenendac. Isadaidbontsen Esus tantiabedesho isumbic Nuquin Papan matses unèsaidotedi uincuemendac. ¹⁶ Con tsusedpa Abadauan abi tantiaquidquio icsho Nuquin Papan bédamboen isquin: —Con matses mibi caimbi. Adembidi min tsyuecquidotsen èmbi chiactedi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuète caniacsho: —Tapunuidtsèqui con na nec. Dada con napenquio nec —¿capenda icbon iquec? Padenquio. —Abichobi con na nec —caquid. Adembidi Nuquin Papan isadaidbotedi con matses caic. Caniec taèquid cuète tapumbimboecquid abia con matses caid Abadauan nec. Cuète cuidibimboecquido Nuquin Papan con matses caidobidi Abadauanèn tsyuecquido isadaidbo nec.

¹⁷ Aden ambi con matses caidombi ambi chomiaid chieshèsho cuète cuidi utsi pobinun pateshuniachimboen Nuquin Papan isadaidbo dadpen bédamboen istiapimbo iquec. Matses utsibo Esus tantiamequin cuète dada utsi pobiacimboen aton matses icmequin èbipadquid isadaidbo ambia Esus tantiaquidobèdta Nuquin Papan mibi bédamboen isec. ¹⁸ Adoac icsamboec onquenda. —Isadaidbo dadpen bédamboen isenquio icquin Nuquin Papan èbien bédamboen isec. Isadaidbo icsambo iquec. Èbien bédambo iquec —quequin icsamboen chienda. Aden icsamboen chuitiadquio icquimbi nèid chiaidtsen tantia. Cuète tapunabi icnuc dada yec podo yec quec cuète ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibèdtsempampic. Isadaidbo nibèdnuc isadaidbon chidon Esus tishenquio ictsempañèdash. Èmbi aden chiac isadaidbo chiec icsamboec onquenda.

¹⁹ ¿Èbi adsho tantiashta mibi nadpe? —Ambi con matses caido chieshèmèsho isun cuète cuidi pateshuniachimboen nèbi isadaidbo dadpen Nuquin Papan bédamboen isenquio iquec. Èbipadquid matses utsiboen bédamboen isbenac —¿queceta iquec? ²⁰ Abimbo mimbi caic. ¿Atotsieshun Nuquin Papan isadaidbo bédamboen istiapimbo icpec? Ambi chomiaid Esus tantienquio icsho Nuquin Papan aido bédamboen istiapimbo iquec. Padnuen Esus tantiasht mibi bédamboen isec. Adoac: —Èbi bédambo icnubi isadaidbo icsambo iquec —quenda. —Esus tantienquio icsho isadaidbo cuidacpadomboen èbitsen Nuquin Papan cuidpanundac —quequin Nuquin Papa Esusbèdta tantiaquiota. ²¹ Ambi con matses caidon Esus tantienquio icsho Nuquin Papan bédamboen istiapimbo iquec. Adembidi matses utsibon Esus tantienquio icsho Nuquin Papan mibi bédamboen istiapimbo iquec. Esus tantiaquiota.

²² Aden Esus tantiasht nadecon onqueta. —Esus tantiasht bédamboen isquid yec Esus tantienquio icsho isun cuidquid Nuquin Papa nec —cata. Esus tantienquio icsho cuète cuidi pateshuniachimboen cuidquin isadaidbo bédamboen isenquio iquec. —Esus tantienquio yansho adembidi èbitsen cuidpanundac —qeshun chieshtoenquio icquin Esus tantianuna. ²³ —Padi, aid tantiatiapimbo iquebi —queboedombi isadaidbon Esus tantiabensho abèdi tabadmenuen Nuquin Papan bédamboen isendac. Ambi cuète cuidi pateshuneboedi abibidi pobioachimboen padpiden bédamboen isendac. ²⁴ Min matses abitedi Nuquin Papa tantiesabo icnèdash. Nèbien cuète icsan cuidi pateshuniaid pobiacimboen Esus tantiamequin Nuquin Papan mibi bédamboen isec. Adoac Esusbèdta Nuquin Papa mimbi bèdiactsec tantiatsec. Con matses isadaidbo tsusedpabo Nuquin Papa tantiaquido dadpenquio icpampic. Nuquin Papan tantiamiac Esus chote chuiquin ènden dada uapampic. Ambi tantiacpadèn ambi cuète bèda cuidi peteshuniaid abibidi pobioachimboembi Esus tantiamequin Nuquin Papan con matses isadaidbo bédamboen isendac. Adoac cuèshèd-uidboedombi Nuquin Papabèdta Esus bédamboen tantiaquiendac.

Ambi chiacpadèn Nuquin Papan isadaidbotsen bédamboen isoaid

²⁵ Tántia. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuèhèdacbimboecnuc

icmiac con matses dadpen tantiante bunenquo iquec. Daëdpectsëcshun Esus tantiec. Nuquin Papan tantiactedishun matses utsibo dadpenshumba Esus tantiambic²⁶ paposhquiachimboen con matses isadaidbo dadpenshun Esus tantiendac. Aden tantiasho Nuquin Papan con matses bëdamboen isendac. Aden ambi isadaidbo bëdamboen iste chuiquin Nuquin Papan naden dada uamepampic. “Icsambo icquidobi cuidmenquo icnuec Nuquin Papa yacnuësh choquid isadaidbon chidon tishaid iquendac.

Aidëmbi isadaidbo Nuquin Papa tantiaquid padpiden icmendac.

²⁷ ‘Aden ëmbi chiacpadomboen ëmbi chomiaid tantiasho abi icsaid bëpiscudquin isadaidbo bëdamboen isendambi,’ quependac Nuquin Papa,” quequin ambi chiaid Nuquin Papan dada uamepampic.

²⁸ Nëbi Esus chieshënsho isadaidbo bëdamboen istiapimbo icquin Nuquin Papan matses utsibo mibi Esus tantiamiac. Ambi nëbi bëdamboen istiapimbo yaido isadaidbo unësquo icnu Nuquin Papan tantiaquic. —Ëmbi aton tsusedpabo chiampicpaden aido con matses caimbi —qeshun adoec. ²⁹ Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. ³⁰ Min matsesën isadaidpembon Nuquin Papa tantienquo yachimboen nëbi isadaidbon Nuquin Papa tantimequid Esus tantienquo iquec. Aden Esus tantiatiapimbo icsho isun Nuquin Papan Esus tantiamequin matses utsibo bëdamboen isbenac. ³¹ Con matsesëmbien abided cuidadaid Esus chieshënquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bëdamboen isendac. ³² Aden matses abitedishun ambi chiaid niac-niacsho isun: —Abitedimbo icsaquic —quequin matses bëdamboen istiapimbo icboedëmbi nëbi Esus tantiasho Nuquin Papan bëdamboen isendac isadaidbo yec matses utsibo abitedi yec quenuc.

³³ Aden Nuquin Papan bëdamboen iste chuisho tantiash nadnuna. Nuquin Papa bëdamboshë iquec. Abipadquid utsi nibëdec. Matsesën naidtedi tantiaquidquo nec. Abitedimbo tantiaquid icquin ambi natiapimbo ictequid nibëdnuc bëdamboen naquidquo nec. ¿Ada adquid icsho Nuquin Papan naidtedi matsesën tantiapadic? Padenquo. Ambi naidtedi matsesën tantienquo iquec. ³⁴ “¿Nuquin Papan otacquo tantiaidtedida matsesën tantiapadic? Padenquo. ¿Mimbi tantienquo iquec. Ëmbi chiacpadomboen nata,’ quequinda matsesën Nuquin Papa chuipadic? Padenquo. Ambi tantiacpadomboembien Nuquin Papan naindac.” ³⁵ “¿Ada matsesën Nuquin Papa menepadic? Padenquo. ‘Në. Con na bedquin mitsana ëbi cuidquin mene, Papa’ ¿quequinda Nuquin Papa chuipadic? Padenquo. Matsesën: ‘Con na nec,’ caidtedi Nuquin Papan na nendac.” ³⁶ Abitedimbo uaquidquo yec abitedishun Icbombo Nuquin Papa nec. —Uesadec nibëdanushe —quequin abitedimbo isquidquo nec. Aton na abitedi nec. Adec abitedishun Icbombo icsho: —Nuquin Papa bëdamboshë iquec —canuna ënenquo icquin.

12

Esus con Icho cain ambi chiacpadomboen naid

¹ Con utsibobimboecquido mibi neque. Tantia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bëdamboen isequic. Nuquin Papa bëdamboen tantiatiaquid icquin nadonona. —Ëbi bunaid nainquo yec mibi bëdambo icmenuec mimbi chiacpadec bëdamboec tabadtiadquo iquebique. Min yuambo ëbi icme, Papa —quequin Nuquin Papa chuinuna. ² Esus tantiesabon nacpadomboen nainquo icquin Nuquin Papan Mayanën pausunacpadomboen Esus tantiaquin nuqui icsate bunaid ënuna. Aden nuqui icsate bunaid ënquin Nuquin Papa bunacpadec bëdamboec tabadquin nuqui tantiendac. Aden naic nuqui bëdambo iquendac.

³ Tantia. Nuquin Papan tantiamiacpadomboen mibi chuinu. Nadenda. —Ëbiuidtsëqui bëdambo iquebi. Utsibo abitedi icsambo iquec —quenda. Nuquin Papan Mayanën tantiamiacpadec mibibi datatiadec: —Adquid nebi —quequin abimbo chuita. ⁴ Nuquin Papan Mayanën tantiamiacpadomboen naquid Esus tantiaquidën. Adquid yec ¿ada Esus tantiaquido abitedi chuiquid dapa yampatsiash? Padenquo. ¿Mitsipadquo min dada icpec? ¿Abichobida bedantequid icpec? Padenquo. Mëdanteuidtsëquien bedantequid iquec. ¿Abichobida istequid icpec? Padenquo. Èshëuidtsëquien istequid iquec. ¿Abichobida shëdtequid icpec? Padenquo. Dëbiatuidtsëquien shëdtequid iquec. ⁵ Min dada yachimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bëdamboec tantiananquin nashunanquido yanec. ⁶—Ma utsibo nashunu —qeshun Nuquin Papan Mayanën namiaid nec Esus tantiaquido. ¿Atotsi naquid Nuquin Papan Mayanën mibi icmiac? Nuquin Papan ambi

tantiaidquo oncamiaid iquendac. Adquid icquin Nuquin Papan Mayanën tantiamiaiduidi chuibanta. ⁷ Utsibic: —Utsibo nashunquid icta —caid iquendac. Adquid icquin bédamboen nashumbanta. Utsibic Nuquin Papan: —Ëmbi chiaid bédamboen tantiaishun chuibanta —caid iquendac. Adquid icquin Nuquin Papan chiaid tantiatsécquido bédamboen tantiameta. ⁸ Utsibic: —Chieshtoenquio icquin Esus tantiec bédamboec tabadnuna —quequin bédamboec tabadquid ismequid iquendac. Adquid Nuquin Papan icmiaid icquin Esus tantiaquido bédamboec tabadte tantiameta. Utsibic aton na nibédquido aton na menequid Nuquin Papan icmiaid iquendac. Adquid icquin cudasenquio icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusën namicapadomboen Esus tantiaquido bédamboen nameta chieshenquio icquin. Utsibic dada icsaido yec isedanquido yec aton shubu nibédquido yec aton pete nibédquido yec macho yec tsusioctsec yec qesho bédamboen nashunquid iquendac. Adquid icquin Esusën chiapadomboen chieshtoenquio icquin nashumbanta.

Esus tantiaquidon nadoquid, quiaid

⁹ —Mibi tantiac unésquio iquec —quequin utsibo chuiquin abimbo chuinuna. Muainquio icquin utsibo tantiaquionona. Chieshëmënenquio yec bédamboec tabadnuna. Utsibon: —Icsanuna —caqui: —Padi —quiash icsainquio yec bédamboec tabadnuna. ¹⁰ —Ëbédtan Esus tantiaquido con utsibobimboecquido nec —quiash bédamboec tantiananuna. —Nëid con buchibimboecquid bédambo iquec. Aidën chuisho bédamboen tantianuna —canuna nuquibédtan Esus tantiaquido chuiquin. ¹¹ Nuquin Papan chiapadomboen naic chieshtoenda. Nuquin Papan Mayanën tantiamiapadec Esus tantiec chieshtoenquio yec bédamboec tabadnuna. ¹² —Unésacsho abi yacno Nuquin Papan ëbi tabadmendac —quec cuishonquenuna. Esus tantiaquido icscho utsibon chieshënaqui chieshtoenquio icquin Esus tantianuna. ¿Atotsi natiamiante utsi ipec? Adquid tantiec shubiquimbi chieshtoenquio icquin Esus tantianuna. Baded-badedquien Nuquin Papa chian-chianuna. ¹³ Nuquibédtan Esus tantiaquido aton na nibédsho isun nuquin nabi menenuna. Isedanquido bédamboen isnuna. Pemequinc nuquin shubun ushmequinc canuna. ¹⁴ Esus tantiaquido yec nuqui chieshënidobëdi chieshënanenquio icnuna. Chieshënanenquio icquin Nuquin Papa naden chuinuna. —Ëbi chieshënidobëdi bédamboen tantiameta. Chiesh bédameta, Papa —quequin Nuquin Papa chuinuna. ¹⁵ Utsi bédambo yec cuishonqesho isash aidbëdi cuishonquenuna. Utsi unésquio icnuc shubisho isash aidbëdi shubinuna. ¹⁶ Cuesnanenquio yec chieshëmënenquio yec bédamboec tabadnuna. —Con nauidsëqui naimbi —quenquio icquin utsibobédtan bédamboen nanuna. —Ëbiuidtsëqui bédambo iquebi. Ëmbi tantiapadomboenuidi naimbi. Utsibon chiaid natiapimbo iquebi —quenquio yec bédamboec tabadnuna. —Chuiquid dapabëduidsëqui onquequid nebi —quenquio yec matses abitedibëd onquec bédamboec tabadnuna.

¹⁷ Chieshënaqui cuidnanenda. —Ma utsibo: “Bédamboec tabadquido nec,” quenu —quiash bédamboecuidi tabadnuna. ¹⁸ Uimanëmënenquido icsasho isun aid chuiquin: —Bédamboequien tabadtiad —canuna. Adquidobëd chieshënanenda. ¹⁹ Ëmbi tantiaido mibi neque. Tanta. Chuinu. Nuqui chieshënidobëdi cuidnanenquio icnuna Nuquin Papan naden chiaid tantiaish. “Matses cuidnanac icsambo iquec. Ëbentsëcquibini icsaido cuidquid nec,” quequin Nuquin Papan chiaid dada uapampic. ²⁰ Nuqui chieshënidobëdi cuidnanenquio icquin bédamboen isnuna. “Pete bunsho pemequinc acte bunsho acmequinc canuna. Nuqui chieshënidobëdi: ‘Bédambo icquidi chieshëne icsachitobi,’ quiaish ma nëish bédanu,” quiaish ²¹ adec cuidnanenquio icquin nuqui chieshënidobëdi bédamboen isnuna.

13

Chuiquid dapan chiapadomboen Esus tantiaquidën naquid

¹ Aton matses chuiquid dapan chiapadomboen Esus tantiaquidën naquid. Adembidi aton nidaid pais caidën tabadquidotedi chuiquid dapabon chiapadomboen naquid. —Nuquin Papan adquid chuiquid dapa icmiabi yac nibédtsiash. Nuquin Papan chuiquid dapa icmiaidien aido nec —qeshun aidon chiapadomboen naquid Esus tantiaquidën. ² Nuquin Papan chuiquid dapa icmiaidën chiaid niacquid Nuquin Papan chiaiddidi niacquid nec. Aden ambi chiaid niacacsho chuiquidon cuidquid. ³ Bédamboec tabadquidon chuiquid dapan cuidte dacuëdëntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bédamboec tabadta. Adsho isun: —Mibi bédamboec tabadec —catsiash chuiquid dapabon. ⁴ —Ma matses bédamboec tabadnu —quequin Nuquin Papan chuiquid dapa icmiaidën mibi bédamboen tabadmetiadquio iquec. Nuquin Papan icmiac icsambo icquido cuidquid nec. Adquid

icnuc: —Icsasho chuiquid dapan ëbi cuidpanundac —quias icsaquid dacuëdendac. ⁵ Ëbi adsho tantiashun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquo iquebi —qeshun adonona.

⁶ Bëdamboen tabadmenuen Nuquin Papan chuiquid dapa icmaidon: —Ëmbi chiacpadomboen nata —cac naquid Esus tantiaquidën. ⁷ Aden chuiquid dapan chiacpadomboen nanuna. Aid bëdamboen isnuna. Aidën: —Nata —cac nanuna chieshenquo icquin.

Utsibo tantiaquionona, quiaid

⁸ —Ëmbi nashumbocpadomboen ëbi cuidquin nashunenquo iquec —camenda. Abi nashunquidobëd cuidnanquid Esus tantiaquid. Esus tantiaquidbidi bëdamboec tantiananquid. Adec bëdamboec tantiananquin Nuquin Papan Moises chiampicpadomboen nuqui bëdamboen natsiac. ⁹ “Ambi naiduidtsëqui nainquo yec abibi datantiadacimboc ma matses bëdamboec isnanu,” quequin Nuquin Papan Moises naden dada uamepampic. “Min chidopenquo chudenda. Adembidi min bënëpenquo chudmenda chidon. Cuesunenda. Ampenda. Utsin na isash: ‘Adquid con na nibëdosh,’ quec chieshëmë nec tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquo icquin nuqibi datantiadacimboc utsibotsen tantiaquionona. ¹⁰ Utsibo bëdamboen isquin aid icsa uatiapimbo nuqui ictsiac. Aden utsibo bëdamboen tantiasho Nuquin Papan: —Aden naic ëmbi Moises chiacpadec bëdamboec tabadec —caindac.

¹¹ —Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushachimboen nainquo ichoedi nëbi ushash isucunachimboec dayacquio yec chieshunenquo icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: ¹² —Nëbien Esus chochitec —quedonetsëcquiec bëdamboec tabadnuna. —Satanasën yuanushe —qeshun Esus tantiaquin nuqui icsaid ënshun bëdamboen nanuna. ¹³ Icsainquo yec: —Bëdambo iquebique. Ma isnu —quiash bëdamboec tabadnuna. Tantiadenuen actequid paëmo icquid aquenquo icquinc utsin chido chudenquo icquinc utsin nënë chudmenquo icquinc chido utsi mëismenquo icquinc canuna. Adecbidi utsin na isash: —Con na adquid nibëdec —quiash chieshëmë nec tabadenquo icquinc chiesha. Adembidi utsin mibi bunaid nasho isash: —Aden ëbi namenquo icpec —quec chieshëmënenquo icnuna. Icsainquo yec bëdamboec tabadnuna. ¹⁴ —Icsate bunchitebi. ¿Mitsipaden nainquini icsape? —quenquo yec Esus tantiaquiec abi tabadacpadquiec bëdamboec tabadnuna. Nuqui icsate bunaid ënquionona.

14

Esus tantiaquido utsibo bëdamboen isaïd

¹ Nuquibëdtan Esus tantiatsëcquidon nuqui nacpadomboen nainquo icsho bëdamboen isnuna. Ambi chaidquo chuiquin Esus tantiaquidon natetedi Nuquin Papan uesquin chiabi iquec. —Naden nac bëdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chiec nuquibëdtan Esus tantiatsëcquido: —Ëmbi natemaid nec —qeshobi: —Icsamboen chiec —cainquo icnuna. ² Esus tantiaquidquo: —Pete abitedi pambidbëdta pesho Nuquin Papan nëishënenquo iquec —quenubien Esus tantiatsëcquid: —Padi. Pambid pesho isun Nuquin Papan nëishënushe. Esus tantiaquidën nitsinaid pequid. Pambid isuidquid —quepec. ³ Pambid pequidobëdtan pambid isuidquidombi Esus tantiasho Nuquin Papan aid daëdi bëdamboen isec. Padnuen pambidbëdta pete utsi abitedi pequidën pambid isuidquid mamënshunac icsambo ictsiash. Adembidi pambid isuidquidën: —Pambid pequid icsambo iquec —cac icsambo ictsiash. ⁴ ¿Icbopenquioda: —Yua icsambo iquec —capadic? Icbombien adoquid. Adembidi: —Mibi bëdambo iquec —caquid icbon. Nuquibëdtan Esus tantiaquid Nuquin Icbon yua icsho: —Ëmbi nacpadomboen nainquo yec mibi icsambo iquec —cainquo icnuna. —Nëid icsambo iquec. Nëid bëdambo iquec —quequin Nuquin Icho Esusën ambentsëqui abi tantiaquido chiendac. Aidën namiacpadomboen abi tantiaquidon bëdamboen naindac.

⁵ Esus tantiaquido utsi-utsiec: —Aid badiadquidënuidtsëqui Esus tantiec cuëdënac bëdambo ictsiash —quenubien utsibo: —Badiadquidën badiadquidënquiec Nuquin Papa Esusbëdta tantiec cuëdënebi —quecuededpec. Adquid daëd icsho Nuquin Papan nëishënenquo iquec. Esus tantiaquid ambi tantiacpadënquioibi cuëdënac bëdambo ictsiash. ⁶ Aden Esus tantiaquin nac bëdambo ictsiash. Adembidi Esus tantiaquin: —Mimbi pete uaid bëdambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bëdambo iqueque. Aid penu —qeshun utsi pequimbi pambid isuidquid iquendac.

⁷ ¿Esus tantiaquid ambi naid-uidi naquidta nedic? Padenquo. ¿Ambi tantiacpadën unësquidta nedic? Padenquo. ⁸ Nuquin Icho Esusën chiacpadomboen natiadquo yec nuqui tabadec. Ambi tantiacpadën nuqui unësendac. Unësabi yec tabadec Esusën yuambo icboedi unësash adecbidi aton yuambo nuqui iquendac. ⁹ Adec Nuquin Icho icnuec abided cuidadec unësash Esus uincuempanëdash. Unësabi yec nuqui tabadnuc Nuquin Icbombo icboedi nuqui unësan adecbidi Nuquin Icbombo iquendac.

¹⁰ —Adquid Nuquin Icho iquec —quesho ¿tantiashunda nuquibëdtan Esus tantiaquid mamënshuntiad? Padenquo. ¿Nuquin Papan chiacmaid chiec: —Ëmbi nacpadomboenuidi nainquo yec icsambo iquec —quequinda chushcatiad? Padenquo. Nuquin Icho Esusbëdtan Nuquin Papanuidtsëqui matsesën naidtedi chiendac. —Nëid bëdambo iquec. Utsi icsambo iquec —quequin chiendac matses abitedishun tantianubi. ¹¹ Adote chuiquin Nuquin Papan ambi chiaid naden dada uamepampic.

“Tantia. Abimbo caimbi que.

Naden matses abitedishun ëbi chiendac.

‘Abitedishun Icbombo mibi nec.

Bëdamboshë icquidquo mibi nec.

Abitedishun naid tantiaquid icquin mimbiuidtsëqui: Nëid icsambo iquec. Nëidien bëdambo iquec, quequin abimbo chiendac,’ quequin matses abitedishun ëbi chiendac,” quequin Nuquin Papan dada uamepampic. ¹² Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

Utsibo icsamenquo icnuna, quiaid

¹³ Ëbi adsho tantiashun Nuquin Papan: —Adoenda —quequin chiacmaid nuqui tantiaid chienquo icnuna. —Ëmbimbo natemaid naic aido icsambo iquec —nuquibëdtan Esus tantiaquido cainquo icnuna. Adenquo icquin nadonona. —Ëmbi ambi natemaid nasho isash chieshtoshon Esus tantienuquo yanushe. Ambi natemaid naquin ismenquo iquemi —queshun Esus tantiaquidtedi bëdamboen isnuna. ¹⁴ Nuquin Icho Esuquidistu tantiaquidquo icquin ëmbien naden tantiec. —Nëbi Nuquin Papan: “Petemaid nec,” caid nibëdec —quequin tantiembi. Ëbi adnubi utsibo: —Petemaidquo nec. Aid pec icsamane. Aid petiapimbo iquebi —queshumbi adquid pec: —Icsachitobi —quetsiash. ¹⁵ Adsho tantiashun aido bëdamboen tantiaquin ambi petemaid nuqui pemequo ictsiaic. Ambi petemaid pemequin mimbi aido tantienquo iquec. —Ëmbi petemaid piash icsachitobi —quequin Esus tantienquo yanushe. Ambi petemaid pemenda. —Nëid petemaid nec —quequido aidotsen tantiaquin cuidmenquo icnuec abided cuidadec Esus unësaque. Aido tantiata. ¹⁶ —Nuquin Papan chiaid niaquenquo icquin Esus tantiaquido utsibon: “Aden naic icsatsiash,” caid naimbi. Ëmbi tantiacpadomboen naimbi —queshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ëmbi natemaid naitque —camenda. ¹⁷ ¿—Nadquid petemaid nec. Nadquid actemaid nec —quequin petebëdta acteuidi tantiecta Nuquin Papan chiacpadec Esus tantiaquido bëdamboec tabadpatsiash? Padenquo. Aton Mayan nuquibëdi tabadmiac chieshëmënenquo yec cuishonquec Esus tantiaquido bëdamboec tabadendac. ¹⁸ Adec Esuquidistun chiacpadec tabadsho isun Nuquin Papan: —Bëdambo iquec —caindac. Matsesëntsen: —Aido bëdambo iquec —caindac.

¹⁹ Ëmbi chiacpadec chieshëmënenquo yec bëdamboec isnanuna. —Esus tantiec chieshtoenquo yec bëdamboec tabadnuna —quec chuinanuna. ²⁰ —Nuquin Papan bëdamboen isaidon Nuquin Papa Esusbëdta tantienquo yanushe —queshun utsibon petemaid pequin aido chieshtomenda. Nuquin Papan: —Matsesën petemaid nec —caid nëbi nibëdnubi Esus tantiatsëcquidën petemaid pequin aid chieshtomec mibi icsatsiac. ²¹ —Ëbëdtan Esus tantiaquido icsamemane —queshun ambi petemaid pambid penquo icquinc ambi actemaid acte paëmbo icquid aquenquo icquinc ambi natemaid utsi nainquo icquinc cac bëdambo ictsias. ²² Nuquin Papan: —Matsesën natemaid nec —cacmaid tantiaquin: —Ëmbimbo petequid nec. Ëmbimbo actequid nec. Ëmbimbo natequid nec. Aden nasho Nuquin Papan ëbi cuidenquo iquec —quequin mimbi tantiaid caic: —Natemaid nec —quequido naden chienda. —Ëmbi nacpadomboen nainquo yec mibi icsambo iquec —cainda. Adembidi aidon: —Ëmbi natemaid nec —caboed naquin ismenda. Chieshtonoshe. ²³ Adquid ambi: —Aid pesho Nuquin Papan nëishënchitembini ictsias —caboed piash —Icsachitobi —quetsiash. Adsho Nuquin Papantsen: —Ai, adec icsaic —catsias. —Aden naic icsachitequini ictsiaic —nuqui caidtedi naic nuqui icsatsiac.

15

Nuqui bunaiduidi nainquio icnuna, quiaid

¹ Esus tantiaquidēnquio Esus tantiatsēcquid chieshēnenquio icquid. —Natemaide nec —quequin Nuquin Papan chiabi icnubi Esus tantiatsēcquid: —Esus tantiaquin ěmbimbo natemaide nec —quesho tantiashun ambi natemaide naquin ismequin chieshtomenda. Aid tantiaquin ambi natemaide nainquio icquin nuqui bunaiduidi nainquio icnuna. ² —Esus tantiatsēcboedēmbi ma Esus bēdamboen tantiabenquiono —quequin nuquibēdtan Esus tantiatsēcquidēn natemaide nainquio icnuna. —Aden naic mibi bēdambo iquec —camenuen ambi natemaide nainquio icnuna. ³ Esuquidistun ambi naiduidi nainquio icquin Nuquin Papan chiacpadomboenuidi naic abi chieshēnquido yacnobi chopanēdash. Esus tishabi icnuc Esusēn chuite chuiquin Nuquin Papan con tsusedpa naden dada uamepampic. “Mibi chieshēnacpadomboen chieshēnquin ěbi icsamboen chuishunec, Papa,” quequin Esusēn abi chuite Nuquin Papan dada uamepampic. ⁴ Aden con matses isadaidbobēdta matses utsibo abitedi bēdamboen tantiamenuen Nuquin Papan ambi chiaid dada uamedenepampic. —Nēid isban-isbanquin ěbēdta Esus ěnenquio icquin tantiec ma matses bēdamboec tabadnu. Adec bēdamboec tabadec: “Unēsash Esusbēdi Nuquin Papa yacno tabadenabi,” ma matses quenu —queshun ambi chiaid dada uamepampic. ⁵ Aden matses chieshtoenuio icnuc bēdamboen tabadmequid Nuquin Papa mibi chianembi. —Chieshtoenuio icquin Esus tantiaquid icmequin dayacquo yacimboecnuc matses bēdamboen tabadmequid mibi nec, Papa. Adquid icquin Doma yacnocquidon Esus tantiasho bēdamboec isanquid icmeta, Papa. ⁶ Mimbī adoac: “Nuquin Papa chuinuna,” cac aidon abitedishun: “Ai, adonona,” quesahun mibi naden chuitsiash, Papa. “Con Icho Esuquidistun Papa mibi nec. Mibi bēdambošē iquec,” quequin mibi chuitsiash, Papa —quequin Nuquin Papa mibi chianembi.

Nuquin Papan matses utsibo Esus tantiamiaid

⁷ Tantia. Padpiden mibi chuinu. —Nuquin Papa bēdambo iquec —nuqui camenuen Esuquidistun nuqui bēdamboen isequē. Bēdamboec isnanuna. Isadaidbo yec isadaidpembo yec quec bēdamboec isnanuna. ⁸ Esuquidistu matses abitedi bēdambo icmenuēc matsesbēd tabadpanēdash. Esus chote chuiquin Nuquin Papan dada uamepampicpadece isadaidbobēdi tabadquin Esusēn aido nashumpanēdash. —Nuquin Papan abimbo chuiquampic —quequin tantiamenuen adopanēdash. ⁹ —“Icsaboedombi Esus tantiasho Nuquin Papan bēdamboen isquin cuidenquio iquec. Nuquin Papa bēdambo iquec,” ma isadaidpembo matses utsibo quenu —quecbidi Esus matsespanēdash. Aidēn abi chuite chuiquin Nuquin Papan naden dada uamepampic. “Isadaidpembo matses utsibobēdtan mibi naden chiendambi. ‘Nuquin Papa bēdambo iquec,’ caindambi mibi. Adecbidi mibi bēdamboen tantiec cuēdēnendabi,” quequin Esusēn abi chuite Nuquin Papan dada uamepampic. ¹⁰ Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic. “Matses utsibo isadaidpembo mibi chuinu. Nuquin Papan con matses caidobēdi cuishonqueta. ‘Nuquin Papa bēdambo iquec,’ quec cuishonqueta,” quequin Nuquin Papan chiaid dada uapampic. ¹¹ Nuquin Papan chiaidbidi con tsusedpan padpiden naden dada uapampic. “Isadaidpembo matses utsi abitedi mibi chuinu. ‘Nuquin Papa bēdambo iquec,’ cata. ‘Nuquin Papa bēdambo iquec,’ quec cuēdēncuededec tabadta,” quequin dada uapampic. ¹² Adembidi isadaidpembon matses utsibon Nuquin Papabēdta Esus tantiabente chuiquin Nuquin Papan con tsusedpa Isayas naden dada uamepampic. “Dabidēn papa Isai caid ěnden unēsampidēn tsyuecquid yuecash iquendac. Nidaid utsi-utsiec yacno tabadquidotedi chuiquid dapa icquin bēdamboen namendac. Aid caic: ‘Nēidēn nuqui cuidmenquio iquendac,’ quependac isadaidpembo matses utsibo,” quequin dada uapampic.

¹³ Aden chiampid mibi nec. Nuquin Papa Esusbēdta tantiaquido icsho mibi Nuquin Papa chianembi. —Mibēdi matses tabadmequidquio mibi neque. Mibi tantiamequin Doma yacnocquido cuishoncameta, Papa. Adembidi dacuēdenquio icnuc bēdambo icmeta. Aden min Mayan aidobēdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

Matses utsibo Esus chuibanquid nebi, quiaid

¹⁴ Con utsibo mibi caimbuque. Tantia. Mibi chuinu. —Nuquin Papan Mayanën tantiamiacpadec bédamboec isnanec bédamboec tabadtiadquio icquidien nec. Aidën tantiamiacpadomboen Nuquin Papan chiaid bédamboen tantiec: “Nuquin Papan chiacpadec bédamboec tabadnuna,” quec chuinanquidien nec —quequin mibi tantiombi. ¹⁵ Aden tantias: —Nëishënushe —quenquo icquin: —Bédamboec tabadta —quequin chuinquid nëid dada uaimbi. Nuquin Papan: —Esus chuibeneta —caid icquin mimbi ënden tantiaidbidi Esusën naidquio bédamboen mibi tantiamenuen dada uaimbi. ¹⁶ Nuquin Papan icmiacpadquid Esusën naid chuibeneguidquio nebi. Adquid icquin isadaidpembo matses utsibo Esus tantiaquido Nuquin Papan bédamboen iste chuibeniombi. Adoac matses utsibon Esus tantiabensho isun aton Mayanën bédamboen tabadmesho: —Bédambo iquec —caindac Nuquin Papan.

¹⁷ Aden: —Esuquidistu bédamboshë iquec —quequin matses utsibo dadpen Esusën naid chuibeniombi. ¹⁸⁻¹⁹ Esuquidistun ëbi namiaiduidtsëqui mibi chiec nendabi. Aidëmbi namiac matses utsibo Esusbëdtan Nuquin Papan naid chuibenequimbi Nuquin Papan Mayanën tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpeshun Nuquin Papan chiacpadomboen natiadquio yanosh. Shubu dadpen icquid Edusaden yacnuësh ënapen nidash nidaid utsi Ididico caid yacno nidshun chuibeniombi. Ambo nidtanec choabi Edusaden yacnobidi. ²⁰ Esusën naid chiacmanouidquio Esusën naid chuibenetiadquio iquebi. Utsibon Esusën naid chuibanacno nidtiapimbo iquebi. Esusën naid chuisho tantiacmaido Esus chuite bunquiebi. ²¹ Aden nate chuiquin Nuquin Papan con tsusedpa naden dada uamepampic. “Nuquin Papan chomiaidën naid chuisho tantiacmaidon tantiabenendac. Adshun paposhquiacimboen bédamboen tantiendac,” quequin dada uamepampic. ²² —Aden Esusën naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusën naid tantias —quiash mibi yacno nidabi iccobi. Nëbi mibi yacno nidtiadquio iquebi.

Mibi yacno nidtiadquio iquebi, quiaid

²³ —Nëbi Ididico yacno Esusën naid uesquin chuibeniac —quiash mibi yacnotsen nidtiadquio iquebi. Ëdenquimbo taëec mibi yacno nidte bunondaidi seta dadpen matamiashic adi nëbi mibi iste bunquiebi. ²⁴ Nidaid utsi Espania caid yacno nidquimbi mibi isbidanendambi. Doma yacno nidash mibëdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibëdi nidendac —ëbi caindac mimbi. Aden tantiec mibi yacno isbidantiadquio iquebi. ²⁵ Nëbini Edusaden yacnoba nidendac. Anocquido Esus tantiaquido utsibon meniaid menenuc nidendabi. ²⁶ —Edusaden yacnocquido Esus tantiaquido utsi-utsiec aton piucquid nibëdeque. Nuquin nabi ma buanshunu. Menenuna —queshun Esus tantiaquido icquin Acaya yacnocquidobëdtambi Masedonia yacnocquidon: —Con na buanshun meneta —caposhi. ²⁷ Aden ambi tantiacpaden nasho: —Bédambo iquec —caombi. Edusaden yacnoshon Esusën chiac isadaidbomba Esus tantiapanëdash. Adshumbic aidon chuibeniac matses utsibontsen Esus tantiapanëdash. Aden abi nashunquin chuiquido Edusaden yacnocquido caic: —“Piucquid nibëdec,” quiac caoshe. Menenuna —quesho: —Bédambo iquec —caombi. ²⁸ Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibëdquido menebanash nidaid utsi Espania yacno nidquimbi mibi isbidanendambi. ²⁹ Mibëdi tabadquin ëmbi Esus tantiamequin chuisho Esusën nuqui bédambo icmendac.

³⁰ Ëmbi tantiaidombo mibi neque. Tantia. Chuinu. Nuquin Icbo Esuquidistun aton Mayambëdtan tantiamiacpadec nuqui bédamboec tantiananec. Ëbi tantiaquin Nuquin Papa chianeta. —Ënenquo icquin Esus tantiamequin mimbi chiacpadomboen Pabado name, Papa. ³¹ Udeya yacno nidsho Esus chieshënkidon Pabado cuesnushe. Bedmeta, Papa. Piucquid buanacsho Edusaden yacnocquido Esus tantiaquido bédamboen bedmeta, Papa. “Matses utsibon isadaidpembon meniaid bedtemaid nec,” quequin bedenquo icnushe. Bédamboen bedmeta, Papa —quequin Nuquin Papa chianeta. ³² Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bédamboec tabadendac Esus tantiamenanec. ³³ Aden mibi tantiaquin: —Nuqui dacuëdenquo icnuc bédambo icmequid Nuquin Papa mibëd icpashun —caimbi.

¹ Nuquibédtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bédamboen ista. Shubu dadpen icquid Senquedeya caid yacnoshon utsibo bédamboen nashunquidquio nioshe. ² Pebe bédamboen ista. Utsibobédta èbitsen bédamboen nashunoshe. —Nuquibédtan Esus tantiaquid nec —queshun bédamboen isquin aidèn: —Èbi nashunta —caccpadomboen aid nashunta.

³ Aquida caidbédta aton chido Pidisida caid chuiquin: —Mibi caic: “Unèsquio iquec,” quiosh Pabado —cata. Aidon èbédtan Esusèn naid chuibeniondash. ⁴ Aden Esusèn naid chuibenesho: —Cueschitomane. Aden chienda —Esus chieshènquidon caqui aidon adembidi èbédtan Esusèn naid chuibeniondash. Adsho isun: —Mimbi bédamboen naoc —caondambi. Adembidi aidon chiondaidon isadaidpembon chiondash. ⁵ Aquidan shubuno Esus tantiec cuèdènec cho-choquidotsen chuita. —Mibi caic: “Unèsquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabenonaid èmbi tantiaidquio Epeneto caidtsen adembidi chuita. ⁶ Nèidtedi chuiquin: —“Mibi unèsquio iquec,” quiosh Pabado —cabanta. Nèidic Madia caid mibi nashunquidquio. ⁷ Nèidic con matses isadaidbo Andedonico caid. Nèidic con matses Unias caid. Aidon èbédambi Esusèn naid chuibenesho chieshèmènquidon bedshun quènèn nauedondash. Aidombien ambia Esus tantiabempac caondash èmbi padabi icnubi. Adsho aidoba Esusèn: —Èbi chuibeneta —cac chieshtoenquio icquin Esus chuibenequido nec.

⁸ Nèidteditsen chuiquin: —“Mibi unèsquio iquec,” quiosh —cata. Nèidic Esus tantiaquid utsi Ampidias caid èmbi tantiaidquio. ⁹ Nèidic Esusèn naid chuiquid utsi Udbano caid. Nèidic èmbi tantiaidquio utsi Estaquis caid. ¹⁰ Nèidic Apedes caidtsen. Utsibon chieshènaqui chieshtoenquio icquin Esus tantiaquidquio nec. Nèidic Adistobudo caidèn shubun icquidotedi. Aidedti: —Mibi caic: “Unèsquio iquec,” quiosh Pabado —cabanta. ¹¹ Nèidotsen adembidi chuita. Nèidic con matses utsi Edodion caid. Nèidic Nadsiso caidèn shubun icquido Esus tantiaquidtedi. ¹² Nèidic chido Tidipena chedo Tidiposa caidbèdi. Aido Esus tantiec dayacquio icquin ambi chiacpadomboen nabanquido nec. Nèidic chido utsi Pedsida caid con chu icbobimboecquidquio. Aidtsen Esus tantiec dayacquio icquin ambi chiacpadomboen naquidquio nec. ¹³ Nèidic Dupo caid Nuquin Papan Esus tantiamiaidquio. Nèidic aton tita con tabimboecquidquio. ¹⁴ Nèidic Asinquidito caid. Nèidic Pedeconte caid. Nèidic Edmes caid. Nèidic Patédobas caid. Nèidic Edmas caid. Nèidic abèd icquido Esus tantiaquido. ¹⁵ Nèidic Pidodoco caid aton chido Udiabèdi. Nèidic Nedeyo caid aton chuchubèdi. Nèidic Odimpas caid. Nèidic abèd icquido Esus tantiaquido. Aidedti chuiquin: —Mibi caic: “Unèsquio iquec,” quiosh Pabado —cabanta.

¹⁶ Esus tantiaquido yec bédamboec isnanta. —Mibi tantiambi —cananta. Nèmbo icquido Esus tantiaquidtedi mibi caic: —Unèsquio iquec —quiosh. ¹⁷ Èmbi tantiaido mibi neque. Tantia. Mibi chuinu. ¿Ada mibédtan Esus tantiaquido chieshèmequin cuèshèdmequido icpec? ¿Ada Nuquin Papan chiaid mimbi tantiaid chienquido yec mibi icamenuec muaquido icpec? Adquidobèd onquec tabadenda. ¹⁸ Nuquin Icho Esuquidistun chiacpadomboen nainquio icquin ambi petequid-uidtsèqui aidon chieque. Aidon: —Mibi bédambo iqueque. Èmbi chiaid tantiata —quequin ambi chiacpadomboen namequin Esus tantiatsècquid icsamec. ¹⁹ —Doma yacnocquido abi tantiec Esusèn chiacpadeb bédamboec tabadosh —quequin mimbi naid chuibenesho dadpeshun tantiac caosh. Adsho tantias bédambo iquebi. Adecbidi Nuquin Papan chiaid tantiec bédamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbèdi icsainquio icta. ²⁰ Nuqui bédamboen tabadmequid Nuquin Papa nec. Aidèmbi matses icsamequidquio Satanas chedo comapenen cuidendac. Nèbi Satanasèn mibi icsametiadquio icsho tantiasun: —Satanas yuamenquio icnuen Nuquin Icho Esusèn abibi tantiamequiopashun —mibi caimbi.

²¹ Nèmbo icquidtedishun mibi tantiec. Mibi caic: —Unèsquio iquec —quiosh Timoteyo èbédtan Esusèn naid chuibenequidquio. Adembidi con matsesèn chiosh. Dusio caid yec Ason caid yec Sosipated caid yec quec adosh.

²² Pabadon —Naden na —cac nèid dada uaquidquio Tesio caid nebi. Esus tantiaquid icquin èmbitsen mibi tantiambi. Padi. Aidedtsèqui èmbimbo tantiaquin chuishun Pabadon chiaidbidi dada uaoaimbi.

²³ Nèidteditsen mibi caic: —Unèsquio iquec —quiosh. Nèidic Cayo caid. Aidèn shubun ushobi. Adnuc Esus tantiaquido iccuedednuec aton shubun pudued-puduedosh. Nèidic Edasto caid. Aid nèmbocquidon bedtequid bedbeneshun dayun uaquid nec. Nèidic nuquin utsibimboecquid Cuadto caid. Aideddishun mibi aden tantiosh. ²⁴ Doma yacnocquido mibi tantiaquin: —Nuquin Icho Esuquidistun bédamboen isquin mibi bédamboen tabad-mepashun —caimbi.

²⁵—Nuquin Papa bēdambo iquec —canuna. Esuquidistu chuibanquin ėmbi: —Aid tantiasho Nuquin Papan mibi bēdambo icmendac —quequin chiacpadomboen Esus tantiamequin Nuquin Papan mibi bēdamboen tabadmetiadquo iquec. Ĕndenquimboshē Esus tishabi icnuc matsesēn Esus chote bēdamboen tantiambo icpampic. ²⁶ Adnubien Nuquin Papan unēsesambo icquin con tsusedpabo utsi-utsien Esus chote chuiquin dada uamepampic. Nēbi: —Esusēn naid chuisho tantiaquin ma nidaid utsi-utsiec yacno tabadquidon Esusēn chiacpadomboen nanu —qeshun Nuquin Papan Esusēn naid chuibenequido icmiac. ²⁷ Aden namec Nuquin Papa bēdambo iquec. Abipadquid utsi nibēdec. Ambi natiapimbo ictequid nibēdec. Abitedimbo tantiaquid nec. Nuqui cuidmenquo icnuec abided cuidadaid Esuquidistu tantiasho Nuquin Papan nuqui bēdamboen iseque. —Nuquin Papa bēdambo iquec —canuna ėnenquo icquin. Padi. Aidedi chuiquin dada uaombi.

CODINTO YACNOCQUIDON ISTE 1

Pabadon Codinto yacnocquidon iste dada uaid

¹ Pabado nebi. Nuquin Papa bunacpadomboen Esuquidistun ëbi chuibenecquid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec. ² Aïdbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quïash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³ Matses icsaquid icsho cuidnushe quïash abided cuidadec Esuquidistu unëspanëdash, quequin abimbo tantïasho isun Nuquin Papan bëdamboen isaidquïo nuqui nec. Adquïdo yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidedaid

⁴ Mibi tantiaquin Nuquin Papa naden chuided-chuidedemi. Matses icsaquid icsho cuidnushe quïash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdamboquidbimboecnuç mimbï isec, quec bëdambo iquebi, Papa, quequin chuided-chuidedemi. ⁵ Aden Nuquin Papan bëdamboen isaido icquin ambi bëdamboen tantiamiaïdobidi mibitedi nec. Matses icsaquid icsho cuidnushe quïash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuïbanoaic.

⁶ Esuquidistu tantiesabo iccondaidi ëmbi Esuquidistun naid chuibanac tantiaquid mibitedi yanondac. Adquïdo yanash bëdamboec tabadquin ismequïdo mibitedi nec. ⁷ Adquïdo yec Esuquidistu choate caimbudec Nuquin Papan abi bëdamboec tabadaï tantiamiaï bicoshi quetiapimbo mibitedi iquec. ⁸ Aden abi bëdamboec tabadaï tantiamequin Nuquin Papan mibitedi chïeshenquïo icmec ma Esuquidistupadquid icnu quequin mimbï caimbudacpadquïo icpanuna aid padpïdec choanuc. ⁹ Adquid mibitedi icmequin ambi Esuquidistubëd icquïdo icta caido ambi cuëmbanaido Nuquin Papan mibitedi icmiac. Adoshon mibi badedquïo Esuquidistupadquid yanenquïocsho isun chïeshëbi, quesa Nuquin Papa icquin abi mibitedi bëdamboquid icmebanec.

Esuquidistu tantiaquid cuëshëdacimboec chushcananquido

¹⁰ Adembidi chuïnu. Tantiata. Esuquidistu tantiaquid nebi quec Nuquin Papan bëdambo icmiaïd ënacimboec tabadenda. Adec tabadec Esuquidistu tantiaquid utsitedi tantiananec ma cuëshëdacimboec chushcananësa yampanuna. ¹¹ Esuquidistu tantiaquido Codinto yacnocquido chushcananec quec. Chïdo, Quëdoen shubunöesh choquïdo nëmbo ëbi isec choshon aden chïec. ¹² Mibi onquiaïd chuïnu. Tantiata. Pabadon tantiamiaïd nebi, quec chushquiachimboec utsi-utsiec tabadnubien; Apodosën tantiamiaïd nebi, quec chushquiachimboec utsi-utsiec tabadnubien; Esuquidistun tantiamiaïd nebi, quec chushquiachimboec utsi-utsiec tabadec.

¹³ ¿Esuquidistu tantiaquido cuëshëdmenuenda ëbïpadquïdon chuïbandiondash? Padenquïo. Naden chuïnu. Tantiata. ¿Matses icsaquid icsho cuidnushe quïash ëbïda cuidadec unëspanëda? Padenquïo. Adembïdï ¿Esuquidistu tantiaquid nebi quequin ëbi mimbï chuïshodambi mibitedi acten mentobandionda? Padenquïo. ¹⁴ Esuquidistu tantiaquid icsho Quidispobëdta Cayo aid daëdtsëqui naondambi quec tantiec tsadebi. ¹⁵ Utsi padenquïo iccondambi ma Pabadon ëbi acten mentondacsho aid tantiaquid nebi, quetiapimbo ma mibitedi icpanuna. ¹⁶ Ai, Estepanasën shubun icquïdobidi acten mentondambi. ¿Utsïdambi acten mentoponda? Padenquïo iccondambi. ¹⁷ Èbi tantiaquido acten mentoban, Esuquidistun cainquïo yaqui Matses icsaïd bedshunec abided cuidadec Esuquidistu cuesten dectanac unëspanëdash quequin chuïbeneta, Nuquin Papan cac aden chuïbenec nebi. Èmbïbi tantiaïd chïenquïocquin ma matses icsaquid icsho cuidnushe quïash abided cuidadec Esuquidistu cuesten dectanac unëspanëdash quequin ma utsibontsen tantïapanu queshun chuïbenec nebi.

Esuquidistu abitedi tantiaquidquïo nadatiambocquin nabanquidquïobidi

¹⁸ Nuquin Papabëd icquïdo icmenuç matses icsaquid icsho cuidnushe quïash abided cuidadec Esuquidistu unëspanëdash quequin chïac, ¿Adpecta iquec? quequin tantïesa yec Nuquin Papa yacno puduedtiapimbo iquec. Adec adquïdo onquenubi nuquien Nuquin

Papa yacno puduedtequido yec Nuquin Papan nadatiambocquin nac matses icsaquid icsho cuidnushe quiash abided cuidadec Esuquidistu unëspanëdash quequin tantiec. ¹⁹ Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ëmendambi.

Adquidon tantiatipimbo yacpadembi natiamequin nabanendambi,”

quequin Nuquin Papan dada uamiampid aidëmbi nëbi naid nec.

²⁰ Esuquidistu tantiesa ambibi tantiaidtedi naimëdan ðmitsimbo adquido tabadpec? ðNidaid abubëd aidën icquidtedimbo mitsipadquidquio icpec? quequin isbanquin, Nadquio icpec, quequin comapenen adquidën tantiec. Aden tantiashic ambi tantiaid Nuquin Papan ëmiac ðmitsimbo adquido tabadpec? ðMidaquidën bëdamboen tantieque? Adquidën tantiaid tantianu, quec onquecuededquid ðmitsimbo tabadpec Nuquin Papan aidon tantiaid ëmiac? Adquidon dadpen tantiaquimbi matses icsaquid icsho cuidnushe quiash abided cuidadec Esuquidistu unëspanëdash, quequin utsin-utsinquien tantiauidec. ðAdsho isun Nuquin Papan abi yacnoda puduedmepadic? Padenquio iquec. ²¹ Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuisho ambibi dadpen tantiaquidon tantiauidec. Èmbi tantiaidpenquio tantiatipibi quequin tantiatipimbo iquec. Adquido tantiatipimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac. ²² Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesëmbien, Èbi ënden tantiec papuduedaid daëd uanu queboedëmbi Nuquin Papan chiaid tantiauidoaic. ²³ Adec tabadnubi matses icsaquid icsho cuidnushe quiash abided cuidadec Esuquidistu cuesten dectanac unëspanëdash, quequin ëbi yacpadquidon chuibanoc. Adoaquien, Nuquin Papan chomiaid nec, quequin isadaidbon cuesten dectanenquioctsenëdash, quequin tantienquio yec tabadec. Isadaidpembo, Esuquidistu mimbi chui-boed ëmbi tantiacpadpenquio iquec. Adoac mimbi Esus chuibanaid ëmbi ënden tantiaidbëda daëd uatiapimbo iquebi quec tabadec. ²⁴ Adquidon tantiaidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuesten dectanac unëspanëdash. Aidi matses icsaquid icsho cuidnushe quiash abided cuidequid icmequin Nuquin Papan nadatiambocquin naid nendac, quequin nuqui tantiec. ²⁵ Abitedi tantiaquidquio icquin ambi abentsëc tantiaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

²⁶ Utsibo, ðmitsipadquidquio mibi icponda? Nadquid mibi icpondaque. Chuinu. Tantia. Daëdpactsëc tantiaidsëcquido mibi icpondac. Namequidpenquio mibi icpondac. Chuiquid dapan bacuëpenquio mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanodash. ²⁷ Ai, daëdpactsëc tantiaidsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaid nebi quequin tantiec natiaic ma shubiquiopanuna. ²⁸ Adembidi utsibon tantiauidtsaido Nuquin Papan cuëmbanaido neoaic. Adecbidi, ðAda matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc ²⁹ ëmbi comapenen tantiaquin nabansho Nuquin Papan cuënoshi quequin matsesën chuitiapimbo iquec. ³⁰ Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bëdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unësaid isun Nuquin Papan cuidiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoindac. ³¹ Aden nuqui tantiaquin Nuquin Papan dada uamiampicpaden, Èbibi bëdambo ictiapimbocquid icsho mimbi bëdambo icmiaid nebi, Icho, quequin ëmbi naid chienquiocquin Esusën naidquio chuibanuna nuquitedi.

2

¹ Adembidi chuinu. Tantia. Mibi yacno nidshun dadpen tantiambi quenquiocquin daëdpactsëqui cuembo chuibanondambi. ² Esuquidistubëdta abi cuesten dectanaid chuinu quequin aiduidi mibitedi chuibanondambi. ³ Codinto yacnocquido dacuëdampambo iquec quequin uëdëequimbi mibi chuibanondambi. ⁴ Èmbibi dadpen tantiacpadomboen chuibanenquioccombi. Nuquin Papan Mayanën tantiamiacpadomboen ëmbi chuibanubi aidëmbi

nadatiambocquin mibitedi tantiamiondash ⁵ ma Pabadon tantiamiacpadomboen tantiamioshi, quetiapimbo mibitedi icpanuna.

Nuquin Papan Mayanën tantiamiaid

⁶ Nuquin Papan tantiamiac comapenen tantiaquin ëbi yacpadquidon chuibanooic. Aden chuibeniac Nuquin Papan chiaid tantiabeneç papuduedquidon bëdamboen tantieç. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanosambo nuqui nec. Adembidi matses chuiquid dapabon comapenen tantiacpaden chuibanosambo ëbi yacpadquido nec. Matsesën dadpen tantiaid uesadendac. ⁷ Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. ⁸ Ushë uabi tabadquin matses bëdambo icmequid com mado nendac, quequin Nuquin Papan tantiapampic. ⁹ Esuquidistu nuqui bëdambo icmetequid Nuquin Papan chomiachso adquid nec quequin chuiquid dapabon tantienquiocpanëdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanengui ictsenëdash. ¹⁰ Aidpadquid chuiquin Nuquin Papan ëndenquimboshë dada uamiampid nad iqueç:

“Nuquin Papan abi tantiaquido ambi cuëmbanaido abi yacno tabadmenun nacenaid bëda tantiesan istiapimbo iqueç.

Adecbidi Nuquin Papa yacno nadquio ictsiash, quetiapimbo matses iqueç.”

¹¹ Adnubien Nuquin Papan Mayanën Nuquin Papan abi yacnoshon bëdamboeç tabadte nacenaid iqueç quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquieç tabadaid nuqui tantiameoic. ¹² Matsesën ambi tantiacpaden chiabi yac utsin tantienquio iqueç. Adembidi Nuquin Papan ambi tantiacpaden chiambocnoc matsesën tantiatiapimbo iqueç. Abipadquid aton Mayanënuidquio tantieç. ¹³ Con mayan ëbipadquidquio menenu quetiapimbo matses iqueç. Nuquin Papambien abipadquid aton Mayan nuqui menec ma aidënquio abi yacno bëdamboeç tabadaid nuqui tantiamepanuna. ¹⁴ Aden aidënquio tantiamiac adomboembidi ëbi yacpadquidon chuibanooic. Embibi tantiacpadpenquiocquin Nuquin Papan Mayanën tantiamiacpadomboen chuibanembi. Adomboembidi ëbi yacpadquidon chuibanooic. Aden Nuquin Papan chiaid chuibanac Nuquin Papan aton Mayan meniaidon tantiaquieç. ¹⁵ Nuquin Papan abipadquid meniacmaidon aidën chiaid tantiatiapimbo iqueç. Aden Nuquin Papan Mayanën chiaid tantiatiapimbo icquin Nuquin Papan matses bëdambo icmenu qeshun Esuquidistu chomiach matses icsaquid icsho cuidnushe quiash abided cuidadec cuesten dectanac unëspanëdash quequin aidon tantiatiapimbo icoic. Embi tantiacpadomboen Nuquin Papan chienquio iqueç, quendac Nuquin Papan abipadquid meniacmaid. ¹⁶ Nuquin Papan Mayanën tantiamiaidombien naden utsibo tabadaid tantieç. Matses bëdamboeç tabadsho isun, Nuquin Papan Mayanën tantiamiacpadec tabadquidquio nec, quequin nuqui tantieç. Adembidi utsi icsamboeç tabadsho isun, Nuquin Papan Mayanën tantiamiacmaid nec, quequin nuqui tantieç. Nuquin Papan Mayanën Nuquin Papan chiaid tantiamiacmaidon nuqui naic tabadaid isash Nuquin Papan chiacpadquieç tabadquid nec quetiapimbo iqueç adquid. Adecbidi Nuquin Papan chiacpadpenquio yec tabadquid nec quetiapimbo Nuquin Papan Mayanën tantiamiacmaido iqueç. ¹⁷ Nuquin Papan chuimiampid nad iqueç:

“Nuquin Papa Abia Yampid yec abitedi tantiaquidquio nec.

¿Adquid Nuquin Papa icsho abi chuiquin

ismequid mitsicquid icpec? Adquid nibëdec.”

Nuquin Papan tantiacpadomboen aton Mayanën tantiamiaido icquin Esuquidistun tantiacpadomboen nuqui tantiabaneç.

3

¿Esuquidistu tantiaquid utsi icsambo iqueç, quecta iqueç?

¹ Adembidi chuinu. Adembi tantiaata. Mibi yacno tabadquin Nuquin Papan chiaid tantiabeneçquid mibitedi icsho daëdpactsëc chuibanondambi. Codinto yacnocquido bacuë uidënabi yacnimboeçquido nec qeshun Nuquin Papan chiaid daëdpactsëc mibitedi chuibanondambi. ² ¿Nëbi tishaidënda pambid pepec? Padenquio. Mibitedi adquid-bimboeçsho tantienquio icnushe qeshun Nuquin Papan chiaid daëdpactsëc chuibanondambi. Enden iccondacpadquioibi mibitedi adquibidi icoapeç. ³ Esuquidistu tantiesia yec tabadonacpadeç mibi tabadoic. ¿Esuquidistu tantiaquid utsi icsambo iqueç, quecta iqueç? Nuquin Papan Mayanën tantiamiacmaidpadquid yec nëishec chushcananeç mibi. ⁴ Pabadon tantiamiaid nebi, queç utsi-utsieç chushquenubien; Apodosën tantiamiaid nebi, queç chushqueoic utsi. Adeç chushqueç Nuquin Papan Mayanën tantiamiaibi yacnimboeçquido mibitedi nec.

⁵ ¿Mitsipadosho mimbi ëbi isponda? Ademibidi, ¿Mitsipadosho mimbi Apodos isoaponda? ¿Ëmbembidambi mibi chuibamponda? ¿Ambembida Apodosëntsen chuibampanëdash? Padenquio. Tantia. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash. ⁶ Tiedën caniquid ëshë siabi yac dëyuctiapimbo yac bimboecquid icquin Codinto yacnocquido Nuquin Papan chiaid dadpen tantiatiapimbo iquec, qeshun matses icsaquid icsho cuidnushë quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodotsen mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yac bimboecquido Codinto yacnocquido icnushë qeshun Apodosën chuibanoapanëdash. ⁷ Tied nitsinshun taneshcain tiedën caniquid canimesa icho nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. ⁸ Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Ademibidi con tied taneshcaic cho cac nashunoaic. Ademibidi abi neshcashunquid cuidoaic. ⁹ Nuquin Papan chiacpaden Esuquidistu chuibenequid Apodos nendac. Ademibidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tied bimboecquid mibitedi nec. Nuquin Papan shububimboecquidbidi mibitedi nec.

¹⁰ Nuquin Papa tabadte shubu uashunun buintad teshun abia tabëcac bimboen Esuquidistuba chuibanondambi ma matsesën tantianueshun. Buintad tabëcac bimboen Esuquidistu ëmbi chuibanan utsibon adomboembidi aiddibi chuibeneoaic. Bëdamboen chuibeneneuequin ¿Nuquin Papan tantiacpadomboendambi chuibaneque? Tiantianu, qeshun Nuquin Papan chiaid isted-istedtiad ambi chuibeneta caidon. ¹¹ Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu qeshun buintad tabëcac bimboen Esuquidistu ëmbi chuibanan adquid nec, quequin utsi chuibantiapimbo utsibon iquec. ¹² Buintad tabëcaid tabadac bimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. ¹³ Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. ¹⁴ Aden nëdëncadoquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taidacmaid nidac bimboec abi nidendac. Adsho isun abi bëdamboen chuibanquido Nuquin Papan menetequid nendac. ¹⁵ Adomboembidi utsibon abipenquio icnuc chuibanac Esuquidistu tantiatiapimboecquido taidaid bescashun secac bimboen secatequid nendac. Adnubi abipenquio icnuc chuibanquido taidit senac bimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaïdo nendac.

¹⁶ Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? ¹⁷ Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmëbanaidobidi nec. Esuquidistu tantiaquido Nuquin Papa tabadtequid nec caindac.

¹⁸ Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuc Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. ¹⁹ Esuquidistu tantiesan tantiacpadquiec tsadquidën ëbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icho unësendac.” ²⁰ Adecbidi: “Adquidën tantiaidbidi ënëdtequid nec,” quequin Nuquin Papan tantiec. ²¹ Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. ²² Aidën bacuëbo icquin mibitedishun con utsi ëbi caic. Ademibidi Apodotsen mimbi adoaic. Ademibidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aiteddishun icho Nuquin Papa nec. Adecbidi aton bacuë mibitedi icnuc aitedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aitedi mitsanabidi nec. ²³ Mibitedishun icho Esuquidistu nec. Esuquidistun icho, Edoen, aton Papa nec.

Esuquidistu chuishunquido

¹ Icho Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiata. Ènden Abia Yampidèn Nuquin Papan Esuquidistu chuibeneta, quenquiocpamidèmbi nèbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiata. ² Nuquin Papan, Esuquidistu chuibeneta, cacpadomboen niaquenquiocquin èbipadquidon chuibenetiad. ³ Nuquin Icbon, Èbi chuibeneta, caid èbi icnuc ¿Pabodon bédamboenda chupec? quequin tantianuna, ¿mimbi cactabi dacuèdpe? Padenquo. Adembidi, Nuquin Papan chiacpadomboen chiombi, quetiapimbo iquebi. ⁴ Ambi chiacpaden niaquenquo iccombi, quetiapimboconobi abitedi isquidquo abitedi tantiaquidquo Nuquin Icho icquin èbi chuibanec bédamboec tabadsho isun aidèn chiendac. Adembidi èbi chuibanec icsamboec tabadsho isun chiendac. ⁵ Icsamboen natsiash, quec tsadenda. Nuquin Icho choashun icsamboquid cuidendac, quequin cainta. Aidèmbi choashun matses icsamboen ismec tabadaid abi ompoec tabadaidbèdta chuibanshun cuidendac. Adembidi, matsesèn èquèducshun tantiaid chuibanquin cuidendac. Adembidi, utsibo bédamboec tabadaid chuibanquin chuiòaindac, Bédamboen mimbi naoc, quequin.

⁶ Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibèdec, quesa ma icpanuna. Adecbidi, Apodospadquid utsi nibèdec, quesa ma utsibotsen icpanuna. Nuquin Icbopadquid utsi nibèdec, quequin tantiec tabad. Adecbidi, Codinto yacnocquidopadquid utsi nibèdec, quenda. ⁷ ¿Mitsicquidèn adquid mibi icmèbampashba? ¿Abembida mibi adquid icpeba? Nuquin Icbon tantiamiac nabanash, ¿atotsi quiash, èmbi tantiacpaden naombi, quepe mibi?

⁸ Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nèbi mibitedishun tantiauidpec. ¿Adpecta Nuquin Papan bédambo icmiaido tabadpadic? Nuquin Papa yacno ènden puduedacimboc yash chuiquid dapa nebi, quiacimboc mibitedi tabadpec mibi Esuquidistu chuibanquidtedi adec tabadiapimbo icnubi. Mibitedibèd èbi yacpadquido èbi chedo ènden chuiquid dapa yacpadquido icmiondac, Cuishon, quetsiabi. ⁹ Adecbidi, Bédambo iquebi, quec mibi tabadnubi naden tantiec tsadebique. Tantiata. Chuinu. Èmbi chuibeneta caido unèsequè. Is, Nuquin Papa quiacimbocnuc ambi abi yacnoshon uaido mayan bédabobèdttan matstedishun isbededacimbocquid nebi, quequin èmbi tantiec tsadebi aden isbededec aid tabadenquionobi. ¹⁰ Esuquidistu chuibenequidon chuibansho tantiauidash, Pabiate icsachitashien nec, quequin mamènshumbededashic Codinto yacnocquidon ambibi tantiaquin chuibansho tantiaquidquo nec, quepec Esus tantiesabo. Adecbidi, utsibo dacuèdampambo iquec, quiaish uèdèequin Esuquidistu chuibenequidon Nuquin Papan chiaid chuibanubi cuesambo yacimboc mibitedishun chuibanpec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. ¹¹ Esuquidistu chuibenequid yequi pistèc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactècquid dasiuidquid nebi. Adquiechbidi Esuquidistu chuibenequid utsibo iquec. Utsin mèyanded-mèyandedaid nebi. Quenenash iquenquo icquin capucuenquin Esuquidistu chuibenec nebi. ¹² Con pete bednequin shubumpi nacenquidquo iquec chonoadsho isquin utsibon mamènshunaid nebi. Aden mamènshunubi chonoadebi. Adecbidi Pabado icsambocquid nec, quequin chiaqui aid cuidenquiocquin bédamboen ista, Papa, quequin aido chiembi. Utsin mèyanaqui dayacquo yec cacuidanesa nebi. Adquidbidi Esuquidistu chuibenequid utsibo nec. ¹³ Adembidi, utsin èbi mua uaqin chiaqui cuidnanenquiocquin bédamboen chiembi. Adembidi èmbi Esuquidistu chuibenaiqui icsactècquid nec, quequin ambi secanu caidbimbocnuc èbi ispec. ¹⁴ Adecbidi, Bédambo iquebi, quec mibitedi tabadnubi mèyamboc tsadebi. Adec èbi tabadaid èmbi chiac Codinto yacnocquido unèsquio yampec, quenquiocquin èbi tabadaid mibitedi tantiamenuen dada uaombi. Pabodon chiaid abimbo iqueque. Bédamboec tabadnuna mibi camenuen dada uaombi, con bacuèbo. Mibi tantiac unèsquio iquec. ¹⁵ Mibi chuibanquid utsi dadpen nèbi icnubi Esuquidistu èmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid èbia yanshun Esuquidistu chuibanac mibitedi Esuquidistu tantiaquido yampondac. Èmbi chuibanacpaden chiaid tantiaquido con bacuèbo èmbi caidtedi nec. Adquid mibitedi icnuc papa nebique. ¹⁶ Èmbi nacpadomboen naic tabadta quequin mibitedi chiembi. ¹⁷ Mibi èmbi nacpadquiech tabadte tantiamenuequin Timoteyo mibi yacno nidmembi. Aidi èmbi chuibanac Esuquidistu tantiaquid icpondash. Adquid iccondacsho èmbi con mado caid aid nec. Aidi Esuquidistu tantiaquidquo icquin utsi-utsiec yacnoshon èmbi chuibeniacpadomboen chuibanuquin Timoteyon mibi padpiden tantiamendac. Esuquidistu tan-

tiaquid utsibo iccuededacnoshon chuibanacpadomboen ismequin chuibanquid aidbidi nec.

¹⁸ Mibi utsi-utsiec Pabado choainquio iquec quequin abimbo tantiacbimboen chuibanec. ¹⁹ Aden adquidon chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. ²⁰ Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. ²¹ ¿Mibi yacno puduedshun atotsimbi adquid napeque? Chui. ¿Cuesnu quiacimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

5

Esuquidistu tantiaquid ambi chudtemaid chudquid cacumeta caid

¹ Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. ² Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquio icquimbi aidi cacumepatecnëdan. ³ Mibëd ictiapimbo yequi mibëd yacimbocquequin dada uaquin icsaquid cacumetiadquidi mibi nenëdac quequin chuibanombi. ⁴ Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin ⁵ icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

⁶ Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisacimboc mibitedi adquibidi ictsiac. ⁷ Ënden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ëbi cuidmenquiocnoec abided cuidaced Esuquidistu unëspanëdash, quiash aid icsaisa yacpadquiec tabadta. ⁸ Aden ambi naid tantiec icsaondacpadpenquo yec ma tabadpanuna. Aidquio tantiembi, quec abimbo tantiadonec ma tabadtenepanuna.

⁹ Ambi chudtemaid chudquidbëd iccuededenda, quequin ënden dada uaondambi. ¹⁰ Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaid tantiaquid Esuquidistu tantiesa dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquo yec mibi tabadendac. ¹¹ Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaid tantiaquin ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamëshumënuquin ënesabëd iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adecbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adembidi aidobëdtan penda.

¹² ¿Esuquidistu tantiesa abi icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquiocsho isun Nuquin Papan chiaid comapenen tantiaquin mibi icsaid ënta, quequin chui. ¹³ Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

6

Ëbi chushcananaid tantiashun mimbi tantiacpaden chui caid

¹ Esuquidistu tantiaquid daëd nëishash chushcananec, queoac. Adquid chuinu. Tandia. Nëishash chushcananash Esuquidistu tantiesa yacno nidshun, Ëbi chushquiaid chuisho tantiashun ¿midapaden mimbi chieque? Ëbi chui, quequin mimbi chuipec. ¿Atotsi quiash Esuquidistu tantiaquid yacno nidiadquidi Esuquidistu tantiesa yacno nidshun mimbi adquid chui, cape? ² Yuecshun, ¿Midapaden mimbi Esuquidistu tantiesan naid chieque? Tantanu. Chui, abi tantiaquido Nuquin Papan caquien ¿nuqui chiacpaden aido Nuquin

Papan cuidendac, quequin tantienquioda mimbi icpe? Yuecshun tantiesan naid chiembi, qeshun ¿Atotsieshun Esuquidistu tantiaquidbéd chushcananash tantiesa yacno nidshun mimbi chuibampe? ³ Yuecshun, ¿Èmbi uaido mayanèn naid midapaden mimbi chieque? Tantaranu. Chui, Nuquin Papan caquien ¿nuqui chiapaden aido cuidendac, quequin tantienquioda mimbi icpe? ⁴ Adquidon naid èmbi chiapadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daéd nèishash chushcanansho tantiashun, Esuquidistu tantiesa yacno nidshun, Èbi chushquiaid chiacsho mimbi tantiacpaden èbi chui, mimbi capec? ⁵ ¿Esuquidistu tantiaquid utsibo nibédpecta ictic? ¿Esuquidistu tantiaquidèn icsamboen chuinushe queshunda Esuquidistu tantiesa yacno nidshun, Èbi chushquiaid chiacsho mimbi tantiacpaden chui, mimbi capec? ¿Bédamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? ⁶ Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibéd chushcananaid mimbi chieque. Adenda.

⁷ Èbi chushcananaid èbi daédshun chiacsho tantiashun mimbi tantiacpaden chui. Tantaranu, quequid mibéd icnuc Nuquin Papan bédambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiaish nèishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiaish nèishash chushcanampe? ⁸ Cuidnante bunec mibi adpec. Naden natiad. Èbéd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiaquid Nuquin Papan chiaid chuiban.

⁹ ¿Icsadenequin ènesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ènesa Nuquin Papa yacno yuedtemaid nendac. Adembidi, Nuquin Papan uaidimboecnuc nacenaid tantiaquin ènesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bènèpen chudmequin ènesa, adecbidi dada daéd chichudnanquin ènesa, adecbidi chido daéd dachudnanquin ènesa Nuquin Papa yacno yuedtemaido nendac. ¹⁰ Adembidi, ampequin ènesa Nuquin Papa yacno yuedtemaid nendac. Adembidi, muaquin utsin na bedquin ènesa, adembidi, ambi tantiacpadpenquiocquidèn chuisho mamènshunquin ènesa, adembidi, cuesunianquin ampequin ènesa. Adquido Nuquin Papan ambi abucshun nacenaidèn tabadtemaido nendac. ¹¹ Ènden mibi adquo iccondaiddi nèbi utsi-utsiec padenquo icsho isash Nuquin Papa mibi cuidenquo yec mibi icsaid bèpiscudac. Adembidi, Nuquin Papan mibitedi bédambo icmehanuequin abipadquid aton Mayan mibitedi meniac. Aidi meneshun Esuquidistu icsapenquiocquid isacpaden Nuquin Papan mibitedi isoaic.

Èmbi chudtemaid chudmane queshun adquid isuidteneta quiaid

¹² Èmbi natemaid naden nata caid nibèdec queshun naic bédambocquid ictiapimbo iquebi, quiaish padenquo yec tsadebi. Aden nabanquin èntiapimbo icmane quiaish padenquo iquec tsadebi. ¹³ Matsesèn chebudaidd pucu yacno budash dada bédambo icmianquid nec. Yuecash matsesèn dada chodquetequid nendac. Padnuen, èbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbéd Nuquin Papa iquec. Ad icnuc mimbi chudtemaid chudquid icta, quenquo Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anèdènquequid nèsecatequid nendac. ¹⁴ Nadatiambocquin Esuquidistu Nuquin Icho Nuquin Papan uincuemepanédash. Aidèmbi nuquitsen abi tantiaquid icsho uincuemendac. ¹⁵ ¿Abi tantiaquid icquin, Esuquidistubéd daédash tabadquid nebi, quequin tantienquioda mimbi icpe? Ai, aiddèdi daédtequid nuqui nec. ¿Adquidbéd daédashtabi icsaquidbéd daèdoape? Padenquo iquebi. ¹⁶ ¿Dadpen chudmequid chudash daèdacimboecquid nec, quequin mibitedishun tantienquioda icpe? Aid daèdi dada abentsèc yacimboecquid nec, quequin Nuquin Papan dada uamiampid nec. ¹⁷ Nuquin Icbobéd daèdaiidien Icbon tantiacpadquiec tabadquid nec.

¹⁸ Èmbi inacmaid chudmane queshun chido utsi isuidteneta. Padenquo yec icsaquidbéd daèdquid mibi iquendac. Ambi chudtemaid chudquid aton namibéd èquèducuèsh daèdaid nec. Nami unamanucèsh icsaid namibéd daèdtiapimbo iquec. ¹⁹ Nuquin Papan Mayan tabadtequid Esuquidistu tantiaquido nec. ¿Nuquin Papan èbéd tabadmiad abipadquid nec, quequin tantienquioda mibitedishun icpe? Èbibi nuquin icbo nec, quetiapimbo matses iquec. Adecbidi, Con icbo nibèdec. Èmbi tantiacpaden naimbi, quetiapimbo mibi iquec. ²⁰ Nuquin Icho cuesten dectanac matses icsaquid icsho cuidnushe quiaish abided cuidadec unèsquid Nuquin Papan icmiac abi tantiaquid yec aidèn na mibitedi nec. Adoaidi ambi chiacpaden ismec bédamboec tabadteneta.

7

Dada chidobēdi daēdaid

¹ Nēbi mimbi dada uabed isombi. Aid isun ěmbi tantiacpaden chiembique. Tantiata. Chido inquid dadatedida ictiad quequin mimbi tantiapec. Padnuen, Chido bendenquio iquembi, qesho chido inta cainda caimbi mibi. ² Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiaish chido abentsēc inquid dada ictiad. Adecbidi dada abentsēcshun inaid chido ictiad. ³ Con chido ěmbi inaid nec, quequin aiduidi chudquid icta. Adecbidi con bēnē ěbi inquid nec, quequin aiduidi chudmequid chido nec. ⁴ Chidon dada daēdash aton bēnēn dadabidi nec. Adecbidi dadan dada chidon dadabidi nec. ⁵ Aid daēdi daēdabi yacimboec, Padi, quenda. Adboedi, Nuquin Papa chuinuec nēidtedi ushquin padenquio nuqui iquec, qeshun ěnta. Aidtedec ushquin padenquiocshon, ěmbi yuen ěntiapimboesho isun Satanasēn icsamenushe qeshun padpiden nata. ⁶ ěnta quenquio iquebi. Nēidtedi ushquin padenquio iquembi quiaish mibi daēdi aidtedecuidi ushec ěnēnta caimbi. ⁷ Padnuen, chido inesa ěbi yacpadec dadatedi icpashun. Dada utsi-utsiec Nuquin Papan icmiacpaden chido inquid icnubi utsi-utsiec chido inesa iquec.

⁸ Chido inesa ěbi tabadacpadec dada utsitedi tabadec bēdambo ictsiash. Adecbidi dadan inaidpen bēdambo ictsiash chido. Dada bēnua adecbidi bēdambo ictsiash. ⁹ Adquid icquin isuidtiapimbo yec comapenec chudte bunquin chido inta. Adecbidi chido bēnua dada isuidtiapimbo iquec dadan inaid icta.

¹⁰ Daēdash niamēnenda. ěmbibi chienquiocquin Nuquin Icbon aden chuineđacpadembi chiembique. Tantia. ¹¹ Min bēnē nianash utsin inaid iquenda. Dadan inaid icnu quec mimbi niamboedēn inaid icoata. Adembidi chido inquid min chido bunenquiocquin abi icsaid dada uashun ismequin nidmenda.

¹² Nēbi Nuquin Icbon naden chuiban cainquiocnobi ěmbia Esuquidistu tantiaquid icquin Esuquidistu tantiaquid utsibo ěmbi chuibocpadembi mibitedi chuiioambique. Tantia. Dada aton chidobēdi Esuquidistu tantiesa icboedi aton bēnē Esuquidistu tantiaquid yanuc aton chido padenquio yec, Con bēnē nianu, quenquio ictsiash. Adquid icsho isash. Con chido icsambocquid nec, quenquio yec abēdi tabadquid bēnē. ¹³ Adecbidi chido utsi aton bēnēbēd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantiaish, Con bēnē icsambocquid nec, quenquio yec bēnē nianec nidesa chido. ¹⁴ Esuquidistu tantiabi yec daēdacpadec aton chido Esuquidistu tantiaquid yanash aidbēd abentsēc yacimboec tabadec bēnē. Adec bēdamboec tabadsho isun Nuquin Papan chido bēdamboen tabadmequin bēnētsen bēdambo icmebampec. Chido Esuquidistu tantiaquid icquin aton bēnē padenquiocnobi aton bacuēbo tantiec, Icsambocquidēn bacuēbo nec, utsibo quenushē quiaish bēnēbēd abentsēc yacimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuēbo tantiec aton chido Esuquidistu tantiesabēd tabadquid dada. Adec abentsēc yacimboec tabadsho isun, Bēdamboquidēn bacuēbo nec, quequin utsibon ispec.

¹⁵ Utsimbic ambi bedboedēn aton chidon Esuquidistu tantiaho isun aton chido nidta catsiash. Adoaquien, Mibēd tabadte bunebique. ěbi nidmenda, quetsiash chido bēnē caic. Adoaqui, Nidec nid, cac cacuidenquio yec nidquid chido. Chido utsibic aton bēnē Esuquidistu tantiaquid yansho isash, Mibi nianu, quetsiash. Adoaquien, Mibi unēsquio iquec, quetsiash bēnē. ¹⁶ Adnubien dadan nidta caid aton chido Esuquidistu tantiaquid yec bēdamboquid icsho isash Esuquidistu tantiaquidtsen yantsiash bēnē. ¿Adquid yantsiash, quequin tantienquioda mimbi icpe? Adecbidi, chidon nianu caid aton bēnē bēdamboquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

¹⁷ Mibi Esuquidistu tantiaquid yanash Nuquin Papan tantiacpadec tabadnu quiaish adequi tabadta. Adomboembidi Esuquidistu tantiec iccuededquid utsibo chuibanombi. ¹⁸ Esuquidistu tantiesa shui dēbid dēteshunaid yec Esuquidistu tantiaquid yanash ěbi shui dēbid dēteshunacmaidimboecnuc nacnemeny quenquio yec tabadta. Adecbidi, Esuquidistu tantiesa shui dēbid dēteshunacmaid yec Esuquidistu tantiaquid yanash shui dēbid dētemeny quenda. ¹⁹ Shui dēbid dēteshunaidta nec, quenquio yec Nuquin Papa tsadec. Adecbidi, Shui dēbid dēteshunacmaidta nec, quenquio yec Nuquin Papa tsadec. Adquid nec quenquio yec, ěmbi chiacpadomboen nadenequidta nec, quec Nuquin Papa tantiec tsadec. ²⁰⁻²¹ Adec Nuquin Papa tantiec tsadnuc yua Esuquidistu tantiaquid yanash yuapen icnu quenquio yec tabad. Adecbidi, utsin yuapenquio yec utsin yua icnu quenquio yec tabadoa. ²² Yua Esuquidistu tantiesa icboedi Esuquidistu tantiaquid yansho isun, Yua nec, cainquio icquin Nuquin Icbon cuēnendac. Adembidi, utsin yuapenquio Esuquidistu tantiesa icboedi Esuquidistu tantiaquid yanash Nuquin Icbon namiaidquio nendac. ²³ Matses icsaquid

icsho cuidnushē quiaish abided ciudadec unēsquid Esuquidistu Nuquin Papan icmiac aid tantiaquid iquec, Con icbo nec, quiaish utsin yuaid iquenda. ²⁴ Adembidi chuinu. Tantiata. Nuquin Papan mibi cuēnuc matses yec Esuquidistu tantiaquid yanash, Ēbēd tabadquid con Icho nec, quec matses yec bēdamboec tabadta.

²⁵ Chido inesa bēdta dadan inacmaid chuita quequin mimbi dada uaid isun aidotsen chiemi. Aido tantiaquin naden chuita Nuquin Icbon cainquo yaqui Nuquin Icbon ēbi chuibeneta caid icquin naden mibitēdi chiembique. Tantiata. ²⁶ Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. ²⁷ Chido inquid yec chido inesa icnu quenda. Adecbidi, chido inesa yec chido inu quenda. ²⁸ Chido inesa icboedi chido inquid yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobēdta con bacuēbo bēdambo icmepeba? quec chido inquid tabadec. Chido inesain aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiemi ma natiamianquec quenquo yec ma mibi tabadnueshun.

²⁹ Ēmbi chuiboed mibi bēdamboen tantiamembique. Tantiata. Nidaidēn yuec tabadnu, quetiapimbo nuqui iquec. Nuquin Papa chieshēntē ušē chonoc abi tantiaquid dadpen mēyansho isash Esuquidistu chote anoentsēqui yaneque. Abi yacno utsibo puduedtiapimbo icnushē queshun min chido icnubi Nuquin Papa bunacpadomboen nabanec tabadta. ³⁰ Adecbidi, unēsquio yec shubiquimbi Nuquin Papa bunacpadomboen nabanec tabadta. Adecbidi, bēdambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquo yec Nuquin Papa bunacpadomboen nabanec tabadta. ³¹ Yuecshun ēmbi nidaidēnshun bedaid Nuquin Papan ēmendac, quequin tantiaquin ambi chiapadomboen nabanec tabadta.

³² Natiatequid nibēdpashun, qeshumbic natiamiantequid iquendac, quequin tantiemi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu queshun aden nabanec tabadpec. ³³ Chido inquidien, Nuquin Papan tantiacpadenuidi nanu quiaish, ¿mitsipadentsimbi con chidobēdta con bacuēbo bēdambo iquebi camepeba? quec tabadec. ³⁴ Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bēnēn bēdamboen istsiashi, quec tabadec. ³⁵ Aden mibi chuibanquimbi chido inesa chido bednu qesho, Chēn, caisa nebi. Nuquin Papan chiapadomboen nabamboedēmbi utsi uain tantianushē queshun ēmbi tantiaid chuibanec nebi. Nuquin Papan tantiacpadomboen bēdamboen tabadmenuequin aden tantiaquin chuibanec nebi.

³⁶ Adembidi, Min champi bednu queboed chudte bunec mēmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuē tishatiapimbo yantsiash, quiaish, Con champi inec cho, quiaish icsatiapimbo adquid icoaic. ³⁷ Adecbidi, min champi inu queboedi, Bedenquo iquemi, qesho tantiaquin menenda. Aden bedmenquo yec mibi bēdambo icpec. ³⁸ Con champi bedec cho, queshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

³⁹ Dadan inaid icquin min bēnē nianenda. Min bēnē unēsan utsin inaid icnu quiaish adta. Esuquidistu tantiesan inaid iquenda. ⁴⁰ Bēnua utsin inacmaid icnu quiaish bēdamboshē iquec aid. Ēmbi tantiacpaden ēmbi chuiboed Nuquin Papan Mayanēn tantiamiacpaden chiaid nec.

8

Nuquin Papan uaidbimboecnuc nacnenaid tantiaquin pambid dasanaid

¹ Nēbi Nuquin Papan uaidbimboecnuc nacnenaid tantiaquin pambid dasanaid chuinn naden chiembique. Tantiata. ¿Matsēsēn nacnenaidta nuqui tantiaid ictic? Padenquo. Aden tantiaquin ēmbi tantiacpadpenquo icquid utsibo nec quequin mamēnshumpec. Aden tantiaquin mamēnshunquin utsi tantienquo iquec. Utsien, Naden nabanquindambi utsibo bēdamboen tabadmepeba, quequin tantiaquidquo nec. ² Ēmbibi tantiemi quequid tantiababictēcquid nec. ³ Nuquin Papa tantiaquidien Nuquin Papan tantiaidquo nendac.

⁴ Aden chuishun ¿Nuquin Papan uaidbimboecnuc matsēsēn nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsēsēn nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibēdquiec. ⁵ Nidaidēn samēdquid papa cain utsin cuēnaid dadpen iquec. Adembidi abuc samēdquid Papa cain utsin cuēnaid

dadpen iquec. ⁶ Papa cain nuquin cuënaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icho cain cuënaidquio Esuquidistu nec. Aidëmbi aton Papabëdtan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuëmbanaido yec ambi tantiaido nuqui nec.

⁷ Adembidi aid abentsëqui nuqui tantiaidquio icnubi Nuquin Papan uaidbimboecnuc matsesën nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden peboedëmbi Esuquidistu tantiaquid yanshun nacnenaid tantiaquin pambid dasanaid ëmbi pesho isun, Icsaosh, Nuquin Papan canushe, qeshun adquid petiapimbo yanebi. ⁸ Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesën nacnenaid tantiaquin pambid dasanaid penquiocsho isash, Aid bëdambocquid nec, quenquio Nuquin Papa iquec. Adecbidi, nacnenaid tantiaquidën dasanaid pesho isash, Aid bëdambocquid nec, quenquio icoaic Nuquin Papa.

⁹ Padnuen Nuquin Papan uaidbimboecnuc matsesën nacnenaid tantiaquin pambid dasanaid ëmbi bedshun pesho isash, Esuquidistu comapenen tantiaquidën tantiaid nacnenaid nec, Esuquidistu tantiabenabictsëcquid quenushe qeshun padenquio iquembi. ¹⁰ Aid pesho isash, Nacnenaid papa cain cuënaid nepec, qeshun, Aid tantiaquin ëmbitsen pambid dasanaid penu, quetsiash Esuquidistu tantiabenabictsëcquid. ¹¹ Padnuen ëmbi piaid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabenabictsëcquidën Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidën dasanaid ëbi icsainquio ictequid nec quequin pequin Esuquidistu tantiabenabictsëcquido mimbi icsameyoc. Mimbi icsamiaido tantiec Esuquidistu unëspaneëdash. ¹² Ad icnuc Esuquidistu tantiabenabictsëcquid mimbi icsameyoc Nuquin Icbon chiacpadomboen niacquid mibi neyoc. ¹³ Padnuen Esuquidistu tantiaquid utsibon icsamboen tantiaquin penushe qeshun padpiden penquio iquembi ma icsainquio icpanu qeshun.

9

Esuquidistu tantiaquidon natequid

¹ Esuquidistu chuiবেনeta cacmaid Pabado nec quequidotsen chuinu. Tantia. ¿Matsesën nata caidtabi nedi? Padenquio. Esuquidistun ëbi chuiবেনeta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuibanac mibitedi abi tantiaquido yanenquioda ictionda? ² Ai, ëmbi Esuquidistu chuibanac Esuquidistu tantiaquid mibitedi yanonda. Utsi-utsiec yacnocquid ëmbi chuibanacmaid icnubi, Ëmbi chuibanaido mibitedi nec, quequin tantiembi. Ëmbi chuibanac Esuquidistu tantiaquid mibitedi yanshun, Esuquidistun ëbi chuiবেনeta caidquio nebi, quequin Pabadoen chiaid abimbo iquec, quequin bëdamboen tantiaquidquio mibi nepec tantesa uainquiocquin.

³ Aden ëmbi Esuquidistu chuibanac abi tantiaquid mibitedi icquimbi utsin-utsinquien ëbi icsamboen chiec. Naden ëbi chieque. Tantia. Pabadoen Bednabebëdtan chuibanasho pemenuciotiad, quequin chiec. Aden chiec onquequid ëmbibi tantiaquin naden aido chiembique. Tantia. ⁴ ¿Esuquidistu chuibanec bundoenquiodabi icpe? ⁵ Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chido buanubi Petedon aton chido buansho isash bëdambo iquec quiashic Esuquidistu chuibanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ëbëd capuequi aton chido buante bunenquioda Bednabe icpadic? ⁶ Adembidi, ¿Mibi pemembique. Penuequin nabanenda, capenda Esuquidistu chuibenequid utsibo mimbi iquec? Bednabebëdta ëbi chiec, ¿Penun daëdshun shubumpi nacentiand, quepecta mibi iquec?

⁷ Ad yenquio utsibo iqueque. Tantia. Chuinu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icho abi nashunquid aton tiedën caniquid pemesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. ⁸ ¿Aden chuiquin ëmbibi tantiaidtabi chuipo? Padenquio. Nuquin Papan Moises dada uamiampid ëmbi chiaid nec. ⁹ Nad iqueque. Tantia. Chuinu: “Min tiedën caniquid ëshë chicnueshun min baca tsuc-tsucmequin dëpuquenda ma penu,” quequin Nuquin Papan chiaidquio nec. ¿Bacanuidi ma penu quequin Nuquin Papan chiaidta nepadic? Padenquio. ¹⁰ Matsesbëdtambi ma penu quequin Nuquin Papan chiaidquio nec. Adembidi ambi piaid tantiaquin nabanquido icho nec. Penuequin tiedën caniquid icbon taneshcaic. Adembidi, penuequin ëshëacsho bedquid icho nec. ¹¹ Adembidi, ¿Nuquin Papan chiaid mibi paquiacquid yec pete bec cho quenquiotiadquidtabi nedi? ¹² Mibi chuibanquid utsibo menebanquimbi ëbia mibi

chuiquidquo icsho menetiadquidi menianenquo mibi icpoc. Aden ëbi menenquo yaqui ëmbi chiaid tantienquo icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi. ¹³ Nuquin Papa tabadte shubu uashunaid yacnoshon nashunquidën ashunquo peshun aquec. Adembidi ashunquid nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbic icpe? ¹⁴ Adomboembidi Esuquidistu chuibansho abi tantiaquidon yuedec, quequin Nuquin Papan chiaid nec.

¹⁵ Èbi yuedtiadquidi nec, quequin tantiequi ¿adabi pemenu yuedpec? quesa nebi. Adembidi, Èmbi dada uaid buamiascho isun ëbi yuedtsiash, quequin dada uainquo iccombi. Bunquiec unësbudec mibi caic, Bec cho, quenquo iquendabi. ¹⁶ Èbibi Esuquidistu chuibenenu quenquiocobi. Abi ëbi chuibeneta cac Esuquidistu chuibenec nebi. Abi chiesa yanash unësqüo ictsiabi. ¹⁷ Èmbibi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquo nebi. ¹⁸ Esuquidistu chuidenesho isash, ¿atotsi Pabodon bedpash, quepecta mibi ique? Naden Esuquidistu chuibenec nebiqec. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bëdambo iquebi.

¹⁹ Bec cho, quesa yec utsin yuacmaid nebi. Adquid yequi utsibo chuinec nidanec shubu utsin puduedcuenequin aidon namiaidbimboecquin aibdëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna. ²⁰ Adecbidi, isadaidbo Esuquidistu chuibanec aibdëd tabadquin mimbic natemaid ëmbi natemaidpenquo nec, quenquiocquin ambi natemaid nainquo iquembi. Adquiec tabadquin ëmbi chuibanac ma isadaidbotsen Esuquidistu tantiaquido yampanuna. ²¹ Adecbidi, isadaidpembu chuibanec aido tabadacpadec abëdi tabadquin Esuquidistun chiacpadec niaquenquo yec tabadec nebi. Èmbi adoac isadaidpembotsen ma Esuquidistu tantiaquido yampanuna. ²² Adecbidi, Esuquidistu tantiabnabictscëquido chuibanuec ëmbi tantiabnabi iccondacpaden bëyuc tauain chiaidquo tantiamenuen chuibanec nebi. Èmbi adoac ma aidotsen Esuquidistu tantiabnquidquo yampanuna. Adequi tabadquin Esuquidistu chuibanec nebi. Èmbi adoac utsibo ma Esuquidistu tantiaquidquo yampanuna. ²³ Adec tabadequi ma ëmbi Esuquidistu chuibeniach Esuquidistu tantiaquido yanash Nuquin Papa yacno nuquitedi tabadendac.

²⁴ Titinguecuededquido icnuc bëyuc abia titinguec choquid iquendac. Adquid icsho isun, Mibi badedquo titinguoc, quequin titingueta quequidën titinguec abia choquid menendac. Adembidi, Nuquin Papan menete bëda iquec. Aid bednu, qeshun Icbon chiacpadomboen nabanta, caimbi mibi. ²⁵ Badedquo titinguenuequid bedte bunaid chodquetequid icnuc, Aid bednu, qeshun abi bëdiactscëc titingamete pete icsa actequid icsabëda isuidec titinguenuequid iquec. Nuquien chodquetemaid bednequin icsaid isuidec. ²⁶ Utsien, Bednu, quenquo yec titinguec. Adembidi, Bednu, bednu yec utsibëd mëdanten senanu quequin nibëdacnoshombi mëdanten seded-sededec. Aden tantiaquin naisa nebi. ²⁷ Utsibon ma tantianu qeshun Esuquidistu chuibeniash unëscascho Nuquin Papan menete bëda bedtiapimbo icmane quiash icsaid mëmunec tsadebi.

10

Isadaidbon chieshampicpadec tabadenda quiaid

¹⁻² Abi yacno abi tantiesa chosho puduedmenquo icchitoshë quiash Nuquin Papan chiaid chieshënenquo yec bëdamboec tabad, quequin tantiamenuen, Nadeq nuquin tsusedpabo tabadpampic, quequin chiembique. Tantiata. Equipito yacnoshon ambi mëchicaidobëd Moises puduanec Nuquin Papan bëyucamiaiabu ushu tédion nidanequin tsusedpabon Acte Piu potepampic. ³ Adec nidaniash yuecash aitedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. ⁴ Adembidi acte bundoacsho isun cuënote cuesquin acte chomiaid acash, Èbi bëdambo icmequin Nuquin Papan ambi yuecshun chometequid Quidistubëdan nadatiambocquin naid nec, quequin tsusedpabon utsin-utsinquien tantiabnampic. ⁵ Aden tantiabnubien abëd icquid utsibon padenquo icpampic. Aden tantiesa Nuquin Papan nidaid Canan caid menenu caid yacno niduidequi unësbudnepampic adquitedi.

⁶ Tsusedpabo chieshampicpadquid icnushe qeshun Nuquin Papan aido chuiquin dada uamepampic. ⁷ Ad icnuc tsusedpabon Nuquin Papan uaidbimboecnuc nacneshun papa cain tantiapicpaden tantienda. Naden Nuquin Papan aido chuipampic. Bacabimboecnuc ambibi nacnenaid tantiaquin peshun acash baidacuededpampicpaden tantiaquin nainda. ⁸ Adembidi, tsusedpa utsibon ambi chudtemaid chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic.

⁹ Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin nebededac unèsbudnepampic. ¹⁰ Adecbidi, Equipito yacnoshon mēnchicaido abi mēnchicquid chieshec nadpampic. Equipito yacno iquec bēdambo iccondaidi nēmbō choash bunec capuebi. Anobidi tabadec nidebi, queded-quededsho ambi abi yacnoshon uaid mayan bēdambo Nuquin Papan budmiaidēn aittedi cuesunepampic.

¹¹ Abi tsibanquido tantiamuequin tsusedpabo tabadnēdaid icsa Nuquin Papan chuiquin dada uamepampid ěmbi chuiboed nec. ¹² Tsusedpabo Nuquin Papa chieshēnec icsapampicpadec icsamane quequin mibi tabadte tantiata. ¹³ Ēnden tsusedpabo chieshēmete icpampid abi iquec. Adaid natiatequid icnuc chieshēnushe qeshun Nuquin Papan mibi tantiaquin uidēn uac mibi icsainquio yec chieshtoenquio yec dayacquio iquendac.

Nuquin Icho Esuquidistu unēsaid tantiaquin acshumbic mayan icsa tantiaquin mimbi actiapimbo iquec quaiid

¹⁴ Nuquin Papan chiaid niacmane quiash, Nuquin Papan uaidbimboecnuc matsesēn nacnenaid tantianu, quenda. Dacuēdec cuenac bimboec aid nanacno nidenda. ¹⁵ Tantiabenquid icsho mibi chiec nebi. Pabardon chiaid abimbo iquec quequin tantiec aid nanacno nidenquio yec Esuquidistu chuibansho tantiec iccuededteneta. ¹⁶ ¿Iccuededquin sicaid acnun Nuquin Papa chiec onqeshun acted-actedquin matses icsaquid icsho cuidnushe quiash abided cuidadec Esuquidistun intac chididiquaiid tantien icquinda nuqui acti? ¿Adembidi, pete cuēsh-cuēshun Nuquin Papa chiec onqeshun aton dada mēyanaid tantien icquinda nuqui pedi? ¹⁷ Esuquidistubēd abentsēc yachimboecquido nebi, quequin tantiaquin pete cuēsh-cuēshun meniac abentsēcshun piachimboen abi tantiec iccuedquidon pebededec.

¹⁸ Aden nuqui pebededachimboen isadaidbo icsaid cuidnuen nidaidēn capuquid-ded cuesuniaid pambid tauiquin Nuquin Papan shēdtequid pambid bedshun cuesunequidbēdtan nidaidēn capuquid icbon pepanēdash. ¹⁹ Aden ěmbi chiac ¿atotsi Pabado ěbi tantiamete bumpec, quepecta mibi ique? Mibi naden tantiamembique. Tantia. ¿Nuquin Papan uaidbimboecnuc matsesēn nacnenaid tibopecta iquec? Padenquio. ²⁰ Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesēn nacnenaid yacnoshon pambid dasanec. Aden aid pambid penu, qeshun mayan icsabēd yachimboecquid nebi, quequin pec. Adquidbēdtan penda. ²¹ Nuquin Icho Esuquidistu unēsaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unēsaid tantiaquin pete peshun mayan icsa tantiaquin pambid petiapimbo iquec. ²² ¿Aid tantiaquin acshun pequin Nuquin Papa nēishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

Ēmbi natemaid naden nata caid nibēdec, quiash nanueboedi Esuquidistu tantiaquid utsi icsamemane quiash nainquiocte chiaid

²³ Nēid mishtemaid nec. Nēid petemaid nec. Nēid actemaid nec, quequin ěmbi chuitequid nibēdec, quiash Esuquidistu tantiaquid utsi icsamemane quiash nainquio yec tsadebi. Matsesēn ambi nacnenaid tantiaquin pambid dasanaid ěmbi tantiacmaid nec, quiash pambid dasanaid petiadquio iquequi Esuquidistu tantiaabenabictsēcquidēn, Nēid nacnenaid nuquin papa caid nec, quequin penushe quiash penquio yec tsadebi. ²⁴ Utsi tantienquocquin nacnenaid pambid dasanaid piash bēdambo iquebi, quenda. Naden natiad. Matsesēn nacnenaid pambid dasanaid ěmbi pesho isun utsibon icsamboen tantiatsiash, quequin penda.

²⁵ Aton na sambededacno nidshun pambid bednuequin, ¿Nuquin Papan uaidbimboecnuc matsesēn nacnenaid pambid dasanaid bedaidta nec? quenquicquin bedta. ²⁶ Abu nidaidbēdta uashun aidēnquio icquidtedi Nuquin Papan uampidquio nec. Aidedimbo aton na nec. Nacnenaid yacnoshon pambid sambededaid aton na nec. Aidēn bacuēbo iquec aid pambid pequido mibi nec. ²⁷ Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesēn nacnenaid tantiaquin pambid dasanaid bedaidta nec, quenda. ²⁸ Adnubien mibi puduedacno isedquid utsi Esuquidistu tantiaabenabictsēcquid tsadquin, Matsesēn nacnenaid papa cain cuēnaid tantiaquin dasanaid nēid pambid nec, cac aid pambid penda. ²⁹ Ēmbi papa cain cuēnaid nec, quequin utsin tantianushe qeshun aid pambid penda. Matsesēn nacnenaid con pa nec, quequin cuēnaid tantiesa icquin ¿atotsieshumbimbi matsesēn nacnenaid tantiaquin pambid dasanaid penquio iqueque? Chuinu. Tantia. ³⁰ Nuquin Papa ěmbi tantiaidquio icnuc penun aidi chuisho isash ¿atotsieshun matsesēn nacnenaid papa cain tantiaquin pepec utsibo quepec? ³¹ Edoen utsibo tantiamenuen bēdamboen nabanec tabadteneta. ³² Aden naic, Esuquidistu tantiaquid isadaidbo isadaidpembobēdta Esuquidistu bēdamboen tantiabemequiono, quec bēdamboec tabadta. ³³ Naden naic ěmbi bēdambo iquebi, quenda. Naden ěmbi nabanuc ěbēdi

utsi bédambo ictsiash, quequin tantiata ma Nuquin Papa yacno puduedtequid utsibo yanu qeshun.

11

¹ Ambia tantiaquidēn Esuquidistun icmiacpadquieq tabadec nebi. Adecbidi ěmbi chuiquin ismiacpadquieq tabadteneta mibitedi.

Nuquin Papa tantiaquid iccuededquin naid

² Mimbia tantianēdaidquio mibi nec, quequin mimbi chiaid tantiaquin nabanec nebi, quequin mimbi dada uashun bēmiaid isash bédambo iquebi. Adembidi, Esuquidistu tantiabēndaiddon chuibanaid mimbi chiacpadomboen tabadec, quequin mimbi dada uaid bēmiaidon chuibanasho tantiash bédambo iquebi.

³ Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. ⁴ Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauet tabadquin, Ěbi chuiquidpenquio Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. ⁵ Chidoen, Ěbi chuiquid Esus nec, quequin ismec mapucudash tsadec. Adec mapucudenquio yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquio ictiad. ⁶ Ěbi chuiquid nibēdec, quiacbimboec tabadsho matasmetiad. Matasmiash ma mapucudpanu chido. ⁷ Nuquin Papa aton madobēd onquec: Nuquimbimboecnucn matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ěbi chuiquid Abia Yampid nec, quequin ismenuet aid chieq onquec mauete mauesa dada nec. ⁸⁻⁹ Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic. ¹⁰ Adquid icmiac dada ěbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bédabo abi chuiquid chieshēnenquio yec Icbon chiacpadquieq tabadec. ¹¹ Nēid chido nec. Nēid utsi dada nec, quenubi nashunanquid abi daēdi nec. ¹² Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. ¹³ ¿Nuquin Papa chuinuec ěbi chuiquid nibēdeque. Matasadnu quiash chido bédamboda icpadic? ¹⁴ Chido isadacpadec isadnu quec icsambo dada ictsiash. ¹⁵ Chido isadacpadec dada icsho isash, Chido nec, quetsiash. Dada isadacpadec chido isadenquio iquec. ¹⁶ Ěmbi chuibōed tantiash, Icsamboen chiosh, quetsiash. Adquid naden chuinu. Tantia. ¿Ěmbentsēquidambi aden chie? Padenquio. Ěbipadquiocquin chuibenequidon adomboembidi chuibanec. Adembidi Esuquidistu tantieq iccuededquid utsibon tantiabedec.

Nuquin Icho unēsash uincuenaid tantiaded-tantiadedta quiaid

¹⁷ Adecbidi, Mimbi naidtedi bédambo iquec, quetiapimbo iquebi. Adquid chuinu. Tantiata. Esuquidistu tantiabenuid utsibo icmenu, quenquio yec mibi iccuededec. ¹⁸ Abentsēc yacimbōec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi. ¹⁹ Nēidtedi ěmbi bédamboen isaiddo nec. Utsitedi ěmbi icsamboen isaiddo nec, quiash cuēshēdabimboec mibi tabadcuededec. ¿Adec tabadshoda Nuquin Papan mibi bédamboen ispec? Padenquio. ²⁰ Adec tabadquin Esuquidistu unēste tantienquocquin utsin-utsinquien peshun acted-actedec. ²¹ Utsibo cainenquocquin abia choquidon nua pebededec. Adoac utsibo choash bunec tabadnubi abia choquido paēmbocquid nua acash tantienquio yec tabadec. ²² ¿Min nuntan pete nibēdpecta iquec? Mitsana iquec. Adec mitsana min shubuno icnuq ¿Esuquidistu unēste tantieq utsibobēd iccuedednu, quenquiocquinda mibia choshon pebededta? ¿Natiavianquieq pete nibēdchitec pete nibēdquid camenuenda mimbia pebedede? Aden pebededquido ¿atotsimbi chuipe? ¿Bédamboen mimbi nabanec quepectabi iquec? Padenquio. Aden naquin Esuquidistu unēsaid tantienquocquin mimbi pec.

²³ Nuquin Icbon chiacpadomboen mibitedi chuibanondambique. Tantiata. Chuinu. Nēid inchēshēmbi ěbi chieshēnquido ēbēd icquidēn ěbi bedmendac, quequin Esuquidistun abi unēste tantiaquin nadopanēdash. Pete bedshun ²⁴ Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe quiash ēbided cuidadec unēste tantiaquin pebededta,” quepanēdash Esuquidistu. ²⁵ Aden chuishumbic aid pebededsho isun pete utsi pebededquin nainshun adembidi dēshote bedshun sananquin naden Esuquidistun chuipanēdash: “Esuquidistu unēsquin ěbi chian anēdēnquiacno nēsecatequid icsho mēnchictequid Esuquidistu iquec, quequin tantiaquin sicaid abcededta. Sicaid acquin ěbi mēnchictequid iquec quequin tantiaquin acban.”

²⁶ Aden Esuquidistun ismenêdacpadomboen pete cuêshêmpi pebededshumbic sicaid acbededta. Nuquin Icho unêsaid tantiadéd-tantiadedquin aid padpidec choabicnuc adobanta. ²⁷ Abi unêste tantienquiocquin pete cuêshun peshun acquin Esuquidistun chiaid niacquid nec. ²⁸ ¿Pete cuêshêmpi penun Esuquidistubêd tabadacpadquiectabi tabadpe? quequin mibi utsibêd tabadte tantiata. ²⁹ Esuquidistu unêsaid tantienquiocquin peshun acquid Nuquin Papan cuidendac. ³⁰ Aden adquidon peshun acac utsi-utsiec padishec; utsi-utiec daicsambo yanec; utsi dadpen ênden unêsac. ³¹ ¿Adabi Nuquin Papan chiaid niaquenquio yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unêsaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquio iquendac. ³² Adesa icsho Nuquin Papan natiaic camiaid mibi iquendac. Abi tantiesabêdta chian anêdênquequid nêsecadenquio mibi icmenuen Nuquin Papan mibi natiaic camec ma êmbi chiapadomboen nabamenuequin. ³³ Adembidi Esuquidistu unêsaid tantianuec iccuedequin utsibo choabi iquec quequin aido cainta. ³⁴ Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unêsaid tantianuequin naden nata quequin chiombi. Mibi yacno nidash puduedshun êmbi chuiboed daêd uain chiendambi.

12

Nuquin Papan Mayanên tantiamiaid

¹ Nuquin Papan Mayanên tantiametequid chuinu. Tantiata. ² Ênden mibitedi Esuquidistu tantiesa yec Nuquin Papan uaidbimboecnuc ambi nacnenaaid matsesên ismec, Nêid papa cain cuênaid nec, qesho tantiaquido mibitedi iccondac. ³ Adquid iccondaidi Esuquidistu tantiaquid mibi yanacsho naden chiembique. Tantiata. Nuquin Papan Mayanên tantiamiaido: Esus Nuquin Icbopenquio, Nuquin Papan Chomicmaid nec, quetiapimbo adquido iquec. Adecbidi, Nuquin Papan Mayanên tantiamiacmaido: Esuquidistu con Icho nec, quetiapimbo icoaic.

⁴ Nuquin Papan Mayanên, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsêcquiobi tantiamianquid Nuquin Papan Mayan nec. ⁵ Adecbidi, utsi nashunquido Esuquidistu tantiaquido icnubi utsi nashunquidon Icho abentsêcquiobi Esuquidistu nec. ⁶ Adecbidi, nadatiambocquin nabanquid utsi-utsiec icnubi Nadatiambocquin namianequid abentsêcquiobi Nuquin Papa iquec.

⁷ Esuquidistu tantiaquid utsibêd tantiananquin namenu, quequin aton Mayan Nuquin Papan nuqui menec. ⁸ Nuquin Papan Mayanên tantiamiac ambia comapenen tantiaquidquio icquin chuibanquid utsi-utsiec iquec. Nuquin Papan Mayanên tantiamiac ambi tantiaid chuibanquid utsi-utsiec iquec. ⁹ Nuquin Papan Mayanên tantiamiacpaden êmbi chiapadomboen Nuquin Papan naic, quequin tantiaquid utsi-utsiec iquec. Nuquin Papan Mayanên tantiamiac bêdamequid utsi-utsiec iquec. ¹⁰ Nuquin Papan Mayanên tantiamiac nadatiambocquin nabanquid utsi-utsiec iquec. Nuquin Papan Mayanên tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanên tantiamiac matses bêdamboec tabadsho isash, Nuquin Papan Mayanên tantiamiaid nec, quequin tantiaquidquio utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanên tantiamiac nidaidên icquid onquiacmaidên onquequid utsi-utsiec iquec. Adembidi Nuquin Papan Mayanên tantiamiac nidaidên icquid onquiacmaidên onquesho tantiaquidên tantienquiocsho isun aidon onqueten chuibanquid utsi-utsiec iquec. ¹¹ Aden Nuquin Papan Mayanên tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanên aden tantiamec.

Dada abentsêc yacpadquiec Esuquidistu tantiaquidtedi iquec

¹² Uidênaid dadpen icnubi matsesên dada abentsêc iquec. Adquiobidi Esuquidistu tantiaquid dadpen icnubi ambi tantiaid abentsêcquiobi Esuquidistu iquec. ¹³ Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

¹⁴ Matsesên dada abentsêqui icnubi uidênaid dadpen iquec. ¹⁵ ¿Mêdantepadquidpenquio yec matsesên dada uidênacmaidta taê icpec? Padenquio. Dada uidênaid taê iquec. ¹⁶ Adecbidi, ¿êshêpadquidpenquio yec matsesên dada dêccuêsquiacmaidta dêbiate icpec? Padenquio. Dêbiate dêccuêsquequid iquec. ¹⁷ Matsesên dada êshêuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shêdpatsiash? ¹⁸ Nuquin Papan tantiampicpadquiequi matsesên dada uidênaid nec. ¹⁹ Dêccuêsquequid abentsêc icnuc dada

nec quetiapimbo iquec. ²⁰ Uidënaid dadpembëd dëccuësquequid dadpen icnuc matsesën nami abentsëqui iquec.

²¹ Matsesën dada ad icnuc, ¿Médante bédambo icnubi ëshë padenquo iquec, quepecta mibi ique? Padenquo. ²² ¿Isadesa uidënaid uquëducquid nibëdnuc matsesën dada bédamboda icpat-siash? ²³ Uidënaid uquëducquid ismenquiocquin ompoaidquio utsi nec. ²⁴ Nami isaidquio ompodesa nec. Nuquin Papan tantiampicpadquequid ompoaid nibëdnuc matses cuëdenquo yec unësec. ²⁵ Ad icnuc, Icsambo icmianeque. Tësnu, quetiapimbo icho iquec. Ompoaid ompodesa aidbëdi iquec bédambo yec nashunanquid aitedi nec. ²⁶ Abentsëc paëmbo iquec matsesën dada bédambo iquenquo iquec. Adquidtedi bédambo iquec matsesën dada abichobi paëpenquo iquec. Adecbidi, Esuquidistu tantiaquido abentsëc yac bimboec iquec abentsëc icsacsho isash abitedi unësqüio iquec. Abentsëc, Bédambo iquebi, quenuc aidbëd abitedi bédambo iquec.

²⁷ Adquidtedi matsesën dada abentsëc yapadquiec Esuquidistu tantiaquidtedi aidën dada abentsëc yac bimboecquid nuqui nec. Abi tabadtequid iquec. ²⁸ Abi tabadtequid nadquid iqueque. Chuinu. Tántia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun nadec tabad quequin chuibanquin ismequid utsi iquec. Nadatiambocquin nabanquid utsi iquec. Bédamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiamaidën onquequid utsi iquec. Adquidtedi nuqui iquec abentsëc yac bimboec nuqui tabadec. ²⁹ ¿Esuquidistu tantiaquidtedida ambi ëbi chuibeneta caid icpadic? Padenquo. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquo. ¿Esuquidistu tantiaquidtedida, Nadec tabad, quequin ismequid icpadic? Padenquo. ³⁰ Adecbidi, ¿Esuquidistu tantiaquidtedida bédamequid icpadic? Padenquo. ¿Esuquidistu tantiaquidtedida abi onquiamaidën onquequid icpadic? Padenquo. ¿Utsi onquiamaidën onqesho tantiaquidën tantienquiocsho isun aidon onqueten onquequin chuibanquidtedida icpadic? Padenquo. ³¹ Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuen quëm bi abia chuibambocpadquid icte bunquiota.

Utsi tantiaquidquio

Ëmbi chuiboedtedi Esuquidistu tantiaquido Nuquin Papan Mayanën tantiamete bédambo iquec. Padnuen ambi tantiamequin bédamboshë icmetequid iqueque. Aid tantiauidquidba chuiboshombic aid tantiaquidquio chuinu. Tántiata.

13

¹ Matses utsi-utsiecquid onquiapadquiec anquiadquid, adecbidi Nuquin Papan abi yacnoshon uaid, mayan bëda onquiapadquiec onquequid icquimbi utsi tantiesa icquin chuibansho abipenquo chuisho utsibon tantiendac. ² Utsibic, Nuquin Papan Mayanën tantiamiac chuibanquid adembiti Nuquin Papan chienquo icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papa nadatiambocquin naquidquid nec, quequin tantiaquin, Mananuc macuësh dapa icboedi acte nantan nënitsinoa, Papa, cac-padomboen nënitsinoac nidquid isquid icquimbi utsi tantiesa icsho, Bédambocquid mibi nec, Nuquin Papan catiapimbo iquec. ³ Utsibic, aton na nibëdsho menedquidquid niosh. Adem-bidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icsho, Bédamboen mimbi naoc, Nuquin Papan catiapimbo iquec. ⁴ Padnuen Nuquin Papan Mayanën bédamboshë ictequid tantiamiaid nadquio iqueque. Chuinu. Tántia. Utsi tantiaquidquio utsi tantiamequionuec chushcanesa nec. Utsi tantiaquidquio nashundenequid nec. Utsi tantiaquidquio utsin na isash adquidquio con na bëpashun quesa nec. Utsi tantiaquidquio dëniacanquidquio yec dëniacanquidquio nebi abibi quesa nec. Utsi tantiaquidquio ëbentsëqui tantiaquidquio nebi quiac bimboen nabanesa nec. ⁵ Utsi tantiaquidquio utsi icsamboen tantiaquin nabanesa nec. Utsi tantiaquidquio, Ëmbentsëqui tantiapadomboenuidi utsidedishun nabantiad, quesa nec. Utsi tantiaquidquio badedquidquio nëshesa nec. Utsi tantiaquidquio abi icsamboen nasho cuidesa nec. ⁶ Utsi tantiaquidquio utsi icsambocsho isash, Unësqüio iquebi, quec tsadquid nec. Adecbidi, utsi bédambocsho isash, Bédambo iquebi quec tsadquid neoaic. ⁷ Utsi tantiaquidquio utsi icsaid chienquo yec tabadquid nec. Utsi tantiaquidquio ambi nanaid nibëdsho isash ampiash badedquid quenquo yec ¿mitsimboembi nampoba? quec onquequid nec. Utsi tantiaquidënquo utsi icsadenesho isun, Tantiamiac Nuquin Papan chiacpadomboen natsiash, quequin chuibanendac. Aden chuishun bédamboen nasho isnuen cainquid nec. Mëyanahui chieshenquo yec dayacquo yec tabadtenequid utsi tantiaquidquio nec.

⁸ Utsi bédamboen tantiaid ènèdtiapimboctequid nec. Nuquin Papan chiaid chuibantsaidien ènèdendac. Adecbidi, matses onquaidtedi ènèdendac. Adecbidi Nuquin Papan ambi uaidtedi èmiac matsesèn isquin tantiaid ènèdoaic. ⁹ Nabanaidtedi tantiabenabictsècquidquid nuqui nec. Adecbidi Nuquin Papan chiampidtedi tantiabenabictsècquidquid nuqui neoaic. ¹⁰ Nidaidèn tabadquin aidtedi tantiabenabictsècquidquid nuqui icboedi Nuquin Papa yacno puduedash abitedi tantiaidquidquid nuqui iquendac. ¹¹ Bacuè yec bacuèmpin onquiacpadec onquepadenebi. Adembidi, bacuèmpin tantiabenabi yacpaden tantiapadenembi. Adquid icquin caniaidèn tantiapadpenquiocquin tantiapadenembi. Adquid icboedi caniaish bacuèmpin tantiapadpenquiocquin tantiabenondambi. ¹² Nèbi isnanten bèisadquin Nuquin Papabimboecquid nuqui isec. Yuecshun abi yacno puduedshun aidquioibi Edoen Nuquin Papa nuqui bèistuidendac. Nèbi Nuquin Papa isenquiocquimbi ambi chiaid tantiatsembi. Ambi tantiapaden yuecshun bèisquin nuqui tantiabenendac aid.

¹³ Nidaid ènèdnuc nèidtedi ènèdtemaid iueque. Chuinu. Tantia. Ambi chiacpaden nabanquidquid Nuquin Papa nec, quequin tantiaid ènèdtemaid nec. Adecbidi Nuquin Papa yacnoèsh abipadquid bédamboecquidquid iquendabi, quequin cainquin tantiaid ènèdtemaidquid nendac. Adecbidi, utsi tantiaid ènèdtemaidquid neoaindac. Aidtedi ènèdtemaid icnuc nidaidèn tabadquin, Utsi tantiembi, quequin ismiac utsi dadpen Esuquidistu tantiaquid yanash mibèdi Nuquin Papa yacno tabadendac. Adquid bédamboshècquid nec.

14

Mimbi chiaid chuibanquid èbi icme, Papa, quaid

¹ Utsi tantiaquid icta. Nuquin Papan Mayanèn adquid icmiosi, quequin ambi tantiamete utsi bunquiebique. Adec bunsho mimbi chiaid comapenen bédamboen chuibanquid èbi icme, Papa, quequin chuiban. ² Aden tantiamiac tantiamenu qeshun tantianuequidèn onqueten chuiban. Aton onqueten onquenuiocsho aidon tantienquid iueque. Padnuen onquaidtedimbo Nuquin Papan tantieque. Aden nidaidèn icquid onquiacmaidènquid Nuquin Papan Mayanèn tantiamiacpadec onquequin Nuquin Papa chiec onqueta. ³ Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bédamboec tabadnu qeshun chuibanec. ⁴ Nuquin Papan Mayanèn tantiamiac nidaidèn icquid onquiacmaidèn onquequin onquequiduidtsèqui tantiabenquid yanec. Padnuen Nuquin Papan chiaid Nuquin Papan Mayanèn tantiamiac Esuquidistu tantiaquid ma Nuquin Papan chiaid tantiabenu qeshun chuibanec. ⁵ Nuquin Papan Mayanèn tantiamiac nidaidèn icquid onquiacmaidèn Esuquidistu tantiaquidtedi onquepashun. Aden chuishumbic adec onquenuiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidèn icquid onquiacmaidèn chuibanac tantianuequidèn tantienquid iquendac. Aden tantienquiocsho isun abi daèdi onquaid tantiaquin chuibanquid nibèdnuc nidaidèn icquid onquiacmaidèn chuibanenda caimbi.

⁶ Adembidi chuinu. Utsibon tantia. ¿Mibi yacno choash puduedshun nidaidèn icquid onquiacpadec onquenuiocquin èmbi chuibansho tantienquid yec, Bédambo iquebi, quecta mibi tabadpe? Padenquid. Nuquin Papan chiaid dada uamiampid min onqueten èmbi chuibansho mimbi tantiabampec. Min onqueten chuibanenquid yec èbibi onquiacbimboecsho mimbi tantienquid ictsiandac. ⁷ Shoncatempi abibi shoncadtiapimbo iueque. Adembidi, aid shoncaisen shoncasho tantiatipimbo utsin iueque. Adembidi aid cuèdèmesan tentencate cuèdèmesho tantiaish, Adomboen cuèdèmenquid iccosh, quec. ⁸ Adembidi, utsibo yacno ma cuesnanu qeshun chomenuequin sondadon tantiabocpadpenquiocnoc shoncac choenquid iueque. ⁹ Adecbidi, utsi onquiacmaidèn onquequin chuisho ¿mitsipaden tantiapatsiaish? Utsibon tantienquid iueque. Aden chuibanec nibèdacno onquiacbimboec onquepec. ¹⁰ Onquete utsi-utsiec dadpen iueque. Aton onqueten onquequin chuibansho matsesèn tantiec. ¹¹ Utsin onqueten chiac tantiatipimbo yec, Onquequin chuibanquid con matsespenquid nec, quequin tantiec. ¹² Ad icnuc, Nuquin Papan Mayanèn èbi tantiamepc, qeshun, Esuquidistu tantiaquid ma tantiabenquid yampanu qeshun mimbi chiaid chuibanquidquid èbi icme, Papa, quequin Nuquin Papa chuifa.

¹³ Nidaidèn icquid onquiacmaidèn onquequid nebi, quequin tantiec. Adec onquequin chuibanquin iccuedquid onquetenquid èmbi chuiboed chuoiaquid icme, Papa, ma tantiapanu, quequin Nuquin Papa chuifa. ¹⁴ Nuquin Papa chiec èbi onquiacmaidèn onquesho utsibon tantienquid iquendac. ¹⁵ Aden abi onquiacmaidèn onquequin utsibon tantienquid icsho ¿mitsipadentsimbi tantiamepe? Naden naimbi. Iccuedquid onquiacmaidèn onquequin Nuquin Papa chuishumbic tantiamenun iccuedquid onqueten onquequin chuibanoanuna. Adecbidi, iccuedquid onquiacmaidèn Nuquin Papan naid

chiec cuëdënashic tantiamenuc iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanoatiapimbo icquin abi onquiacmaidën onquequin chuibanenquio iquembi. Adecbidi abi onquiacmaidën cuëdënenquio iquebi. ¹⁶ Iccuededquido onquiacmaidën onquequin Nuquin Papa chuibanuc ζmitsipadec, Ai, abimbo iquec, quepec aido? Aton onqueten onquequin Nuquin Papa chuibanasho tantiash, Mibi bédambo iquec, Papa, quequin chiendac. ¹⁷ Abi onquiacmaidën onquequin Nuquin Papan naboed chuibanac Esuquidistu tantiadonequidquio mibéd iccuededquido yantiapimbo iquec.

¹⁸ Èbibi utsin-utsinquec onqueten onquequidquio icnubi mibitedi adesa nec. Padnueni adec onquec bédambo iquec, Papa, quequin chuided-chuidedembi. ¹⁹ Padnuen chuinuic Esuquidistu tantiaquido iccuededacno puduedash ma tantianu quiash aton onquete daédpactsëc tantiash anquiadquid icquin aidtedictsëqui chiendambi aido onquiacmaidën onquenquiocquimbi.

²⁰ Adembidi chuinu. Utsibon tantia. Bacuëbo tantiabeniabictsëcquid yacpadquiec icsaid tantiesa icta. Ènden caniaidën tantiabenshun ismiacpaden bédamboec tabadquin ismeta.

²¹ Nuquin Papan chiampid nad iqueque. Tantia: “Èmbi chuiban cac aton matsesën chuibanac tantia bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin èmbi chiacpadomboen nate bunenquio icoaposh,” quequin Nuquin Papan dada uamiampid nec.

²² Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenguid Esuquidistu tantiaquid icmetiapimbo iquec. Padnuen adec onquequin chuibanasho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. ²³ Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuedesho tantiash, Aidon tantiate icsabudpash, quepec. ²⁴ Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibanasho tantiash, Icsaobi. ²⁵ Nëbi èbi bédambo icmequid Esuquidistu tantiate bunebi, qeshun abi icsaid ambi chienquiochoed Nuquin Papa chiashic, Nëmbo iccuededquidobéd mibi iquec, Papa, quequin chuibanamec Esuquidistu tantiaquid yanshun.

Abentsëcshun-abentsëcshunquien chuiban, quequin chiaid

²⁶ Adembidi chuinu. Adembi tantia. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënquio onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsiash. ²⁷ Aided, Chuinu, qesho ζmitsicquid chuita nuqui cape? qeshun naden chiac bédambo ictsiash. Chuinu. Tantia. Mibi onquiacmaidën onquequin chuinuequid daéd icnuc bédambo ictsiash. Abentsëc chotsëcnuc adecbidi bédambo ictsiash. Aided icquin abentsëcshun-abentsëcshunquien onquequin chuiban, cata. Aden abentsëcshun onquequin chuisho abi onquiaid tantiaquidën iccuededquidon onqueten chuibanta, cata. ²⁸ Padnuen abi onquiaid tantiaquin chuibanuequid nibédnuc, Tsadquin Nuquin Papauidi otacquiocquin chuita, cata.

²⁹ Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daéd icnuc bédambo ictsiash. Abentsëc chotsëcnuc adecbidi bédambo ictsiash. Aided icquin abentsëcshun chuibanubi, ζNuquin Papan Mayanën tantiamiacpadomboenda chuibanecque? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon.

³⁰ Abentsëcshun chuibanubi Nuquin Papan Mayanën tantiamiac utsi: Èmbitsen chuibanu, qesho tantiashun ma aidën chuibanu quiash ambia chuibanquid ènéd. ³¹ Adquidën iccuededquidtedi tantiamenucquin abentsëcshun-abentsëcshunquien chuibanta. Aden chuibanasho tantiash ma chieshenquio yec bédambo icpanu. ³² Nuquin Papan Mayanën tantiamiaid utsibéd bédamboec tabadquid nec. ³³ Nuquin Papan tantiamiacpadequi utsi onquenubi onquenquio utsibo tabadec. Onquenu, utsi quenuc, Ai, onqueta, qeshun onquenquiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

³⁴ Esuquidistu tantiaquido iccuededacno otacquio tabadquid chido. Chuibanacnoësh onquenu, quenda chido. Nuquin Papan chiacpadecec èbi chuiquid dada nec, quec chido.

³⁵ Anoshon chiaid tantienquio yec tsadquin cainec shubuno nidash, Tantienuquio iccombique. Nuqui tantiaboed èbi chui, qesho tantiashun chiec aton bënën. Tantienuquiocquin cainenquio iquec chido icsambo iquec. ³⁶ ζMimbia Nuquin Papan chiaid chuibanquidoda ne? Padenquio. ζChuibanac Esuquidistu tantiaquido mibitedictsëquida yanondac?

Padenquio. ³⁷ Nuquin Papan chiaid chuibanquidquio nebi, mibi quenuc, Nuquin Papan tantiamiacpaden Pabadon chuibanquin dada uaid nec, mibitedi quepec. ³⁸ Aden mimi tantianubi, Pabadon dada uaosh, quenquio utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

³⁹ Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidën onquequin chuinessho, Ai, cata. ⁴⁰ Adecbidi, Nuquin Papan Mayanën tantiamiac chuibanuequid dadpen icnuc utsibo bëdamboen tantiamenuquin abentsëcshun-abentsëcshunquien chuibanta.

15

Esuquidistu uincuenaid

¹ Adembidi chiembique. Tantia. Matses icsaquid icsho cuidnushe quiash abided ciudadec Esuquidistu unësaid ëmbi chuibansho tantias, Ai, abimbo iquec. Aid tantiembi, mibi quiampondac. Aden tantiadonec chieshenquio yec mibitedi tabadec. ² Aid tantiabenu, qesho Nuquin Papan mibitedi bëdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bëdambo icmebanacmaid nec. Adecbidi, ambi yuednu cacmaidquio adquid nec.

³ Utsin ëbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icsho cuidnushe quiash abided ciudadec Esuquidistu unëspanëdash. ⁴ Unësascho shëcuë nacnenaidën nauedshun bëtashacsho daëdec ushtanquin ambi chiampicpaden Nuquin Papan uincuen uapanëdash. ⁵ Aden uincuemiac choquin, Uincuenobi, quequin Petedo Esuquidistun ismepanëdash. Adshumbic adem-bidi abëd 12ted icquido ismeoapanëdash. ⁶ Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanëdash. Aid uincuenacsho isquido dadpen abi tabadnubi utsi-utsiec padenquio iquec. ⁷ Aden aitedi ismeshumbic aton utsi Santiacotsen Esuquidistun ismeoapanëdash. Adshumbic, ambi ëbi chuibeneta caidtedi ismeoapanëdash. ⁸ Aden aido ismequin nainshun yuecshun ëbitsen ismeoapondashi. Icsactsëcquiocquid nec, quenquiocquin ismebenondashi tsyuecquio. ⁹ Abi tantiaquid mëyanquin cuesunemequidquio icboedi abi tantiaquid yanacsho Esuquidistun, Èbi chuibeneta, cainquioctiadquidëmbi adquid icta caid nebi. ¹⁰ Esuquidistu tantiaquid yansho isun ëbi chieshaid cuidenquio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenuioc-nobi. ¿Embentsëquidambi chuibenedio? Aton Mayan Nuquin Papan meniac aibëd icquin chuibeniombi. ¹¹ Adembidi, ëbi yacpadquidon Esuquidistu chuibanac utsitsen abi tantiaquido yampondash.

Matses unësash uincuenaid

¹² Adec Esuquidistu unësash uincuenondash, quequin chuinubi ¿mitsipaden tantiec uincuenta nibëdec quec utsi-utsiec onquepec? ¹³ Uincuenta nibëdnuc Esuquidistu uincuenenquio ictsempanëdash. ¹⁴ Esuquidistu uincuentequid icmiambocnoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. ¹⁵ Nuquin Papan naid chuibanquidtedi muaquidquio icoatsiandac. Aden tantienquiocquin ëbi yacpadquidon chuibanendac. Unësash uincuentequid nibëdnuc ëbitedishun Nuquin Papan Esuquidistu uincuen uapanëdash quequin chiaid abipenquio ictsiandac. Unësash uincuenta nibëdnuc Nuquin Papan uincuemiaid nibëdtsiandac. ¹⁶ Unësash uincuenta nibëdnuc Esuquidistu uincuentiapimbo ictsempanëdash. ¹⁷ Aid uincuenambo icnuc matses icsaquid icsho cuidnushe quiash abided ciudadquid Esuquidistu nec, cainquio mimi ictsiandac. Matses icsaquid icsho cuidnushe quiash ciudadquid nibëdtsiandac. ¹⁸ Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempanëdash. ¹⁹ Nidaidënuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquio ictsiandac.

²⁰ Embi chuiboedtedi adtiapimbo iquec. Esuquidistu Nuquin Papan uincuen uapanëdash, quequin chiaid abimbo iquendac caimbi. Nuquin Papan ambi abia uincuemiaid abi yacno puduedmequin ambi uincuemetequid dadpen iquendac, quequin chiaid abimbo iquec. ²¹ Unëstequid bëyuc dada yanampicpadec matsestedi adecbidi iquec. Adecbidi, unësash uincuentequid Esuquidistu yanacpadec abi tantiaquidtedi adquiobidi iquendac. ²² Bëyuc dada Adan caidën tsyuecquidtedi adecbidi unëstequido nec. Esuquidistun bëdambo icmiaid uincuentequido neoaic. ²³ Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. ²⁴ Aden bedoanquin abi tantiaquidtedi bëyucanec choquin Nuquin Papa

Edoen caid ismequin, Nēidtedi min shubu abentsēquēn tabadquido nec, quequin chiendac abi chieshēnquidtedi chēn quetiapimboconoc. Aido ambi nebudacimboecquido iquendac. ²⁵ Abi chieshēnquido utsitedibēd chuiquid icquin abi chieshēntiapimboecquid aido Esuquidistun icmebanendac. ²⁶ Adoshombic ēnquimbi unēstequid nibēdquidquido Esuquidistun icmeoaindac. ²⁷ Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquo aton Papa iquec. ²⁸ Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsēcquibi nendac.

²⁹ Unēsash uincuentequid nibēdnuc, ḡatotsieshun, Ēnden unēsaid uincuenendac, quequin tantiembi quequin utsibon acten ambibi mentomepec? ³⁰ Adecbidi unēsash uincuentequid nibēdnuc ēbi unēs uate utsibo comapenec buncuededsho isun ḡatotsieshun, Uincuentequid iquec, quequin ēbi yacpadquidon chuibampec? ³¹ Unēsash uincuentequid iquec, quequin tantiembi. Aden tantiaquin Esuquidistu, Nuquin Icho, ēmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unēsmane quenquocquin Esuquidistu unēsash uincuentequid iquec, quequin chuibenec nebi. Aden badiadquidēnbadiadquidēnquien chuibanubi ēbi unēs uate utsibo bunec. ³² Uincuentequid nibēdnuc, ḡatotsi quenuequini Epeso yacnoshon, Uincuentequid iquec, quequin chuibansho mēyanaqui chieshenquo yec dayacquo tsadpe? quetsiabi. Adecbidi uincuentequid nibēdnuc: “Unēsash nibēdquieci iquebi, quequin nua peshun aquembi,” quetsiabi. ³³ Aden tantiaquin iquembi. Adembidi tantienda. “Uincuentequid nibēdec quequidbēd capuenda aidēn tantiacpadec icmane quish.” ³⁴ Adquidpadquid icquin mimbi icsamboen tantiaid ēnquin Nuquin Papan chaidquido tantiata. Esuquidistu tantiec mibēd iccuededquid utsi-utsiec, Nuquin Papa nadatiambocquin uincuemianquidquido nec, quequin tantiesa nec. ḡAdquid mibēdi icnuc Nuquin Papan bēdambo icmiaido mibitedida icpe? Padenquo.

Uincuemequin dada chuca meniaid

³⁵ ḡMitsipadec unēsaid uincuempec? utsi quepec. Adecbidi, ḡmitsipadquid uincuentequidēn dada icpec? utsi queopec. ³⁶ Adquidēn icsamboen tantieque. Chuinu. Tantia. Mimbi tiedēn chococaid tauibēd ēshē chococatequid napi dēyuctequidpadpenquo iquec. ³⁷ Mimbi tiedēn chococaid utsi-utsiec iquec. Adecbidi mimbi tiedēn siaid utsi-utsiec iquec. Mimbi chococaid mimbi siaidbidi dēyuctequid utsi-utsiec iquec. ³⁸ Nuquin Papan tantiampicpadec aton dada yanec. ³⁹ Abipadquidpenquo ambi uaidtedi iquec. Abipadquidquido matstedi iquec. Abipadquidquido nidaidēn capuquidtedi iquec. Abipadquidquido podochoquidtedi icoaic. Abipadquidquido acten icquidtedi icoaic. ⁴⁰ Abuc tabēcaid icnubi nidaidēn icquid iquec. Abuc tabēcaid abipadquid chēnquesho isec nidaidēn icquid tabadec. ⁴¹ Badiadēn ushē comapenquieci chēnquenubi inchēshēn ushē dauebudquido chēnquec. Aid daēdi nua isadnubi uispa pistēc isadoaic. Uispa utsi-utsiec iquec. Abi bedquec chēnquetequid utsi-utsiecibidi iquec.

⁴² Aidtedi ēnēdendac. Adecbidi tishac matses unēsacsho chococac nami chodquec. Adec nami chodquian Nuquin Papan tantiacpadec uincuentequidēn dada chuca chodquesa nendac. ⁴³ Tishac icsaquid matses iquec. Adsho uincuemequin ambi icsaisa icmiaid nendac. Nidaidēnshun tishac chonoadec uimabudquid matses nec. Yucash unēsacsho uincuemiac uimabudenquiocquin nabanendac. ⁴⁴ Nidaidēnshun tishac daicsambo yanash unēsacsho uincuemequin dada chuca icmetequid nendac. Nidaidēnshun tishac matsesēn tantiacpadquid icboedi Nuquin Papan uincuemiac aidēn tantiacpadquid iquendac.

Nidaidēnshun tishac matsesēn tantiacpadquid icboedi abuc buanac anocquidēn tantiacpadquid iquendac. ⁴⁵ Adembidi Nuquin Papan chuiquin dada uamiampid nad iquec: “Bēyuc matses Adan caid nacenshun Nuquin Papan bushcac taēec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. ⁴⁶ Nuquin Papan matsesēn tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. ⁴⁷ Bēyuc matses uanu, qeshun nidaid putu bedshun nacenaid nepampic. Bēyuc matses Adan caidēn tsyuecquid Nuquin Papan abi yacnoshon budmiaid nepanēdash. ⁴⁸ Nidaid putu bedshun bēyuc matses nacenshun nidaidēn tabadquid icmepampic. Adquiecbidi abipadquid matstedi yanec. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. ⁴⁹ Adecbidi bēyuc matses isadacimboecquid nidaidēn tabadquidtedi nec. Nuquin Papan abucshun chomiaid isadacimboecquid abēd icquido iquendac.

⁵⁰ Adembidi chuinu. Tantiata. Matsesēn dada nami intacchoquid chodquetequid icnuc Nuquin Papan shubu abentsēquēn tabadtiapimbo adquid iquec. Chodquequid chodquetemaid ictiapimbo iquec.

⁵¹ Nuquin Papan chienquocpampid chuinu. Tantia. Abi tantiaquid unēsabicquidbēdta ēnden abi tantiaquid tsusedpabo dada chuca Nuquin Papan menendac. ⁵² Ambi nami-aidēn abucshun shoncanubi ēshē badedquio bēbedquiacbimboecnuc badedquio unēsamesambo Nuquin Papan abi tantiaquido icmendac. ⁵³ Chodquetequid icboedi chodquesa yanendac. Unēstequid icboedi unēsesa yanendac. ⁵⁴ “Adquid icmiac unēstequid nibēdquidendac.

⁵⁵ Ad icnuc ŷmitsishunquio unēstequid istuidpec? Adembidi, ŷmitsishunquio unēsmetequid istuidpec?”

⁵⁶ Icsaquid unēstequid nec. Nuquin Papan nadomboen nata quequin chiaid niacquid icash unēstequid matses yanac. ⁵⁷ Adquid nuqui icsho isun Nuquin Papan Nuquin Icho Esuquidistu chomeshun nuqui cuidenquiocquin aidi icsaia cuidquin nuqui bēdambo icmebanec. Adoac abi yacnoēsh icsaia unēsamesambo nuqui iquendac. Aden Nuquin Papan naindac, quequin, Bēdamboquid mibi nec, Papa, quequin nuqui chuided-chuidedendac.

⁵⁸ Adembidi chuinu. Tantiata. Adenuidi tantiaquin utsi uaquin utsin chuisho tantienquio yec tabad. Adec tabadquin Nuquin Papan chiacpadomboen naban Esuquidistupadquid Nuquin Papan ēbi icmendac, quequin tantiaquin.

16

Utsibo menenun piucquid bedbanaid

¹ Nuquin Papan bēdambo icmebanaid utsibo menenun mimbi piucquid bedbanaid chuiquin dada uaimbique. Isec onqueuededta. Nidaid Cadasia caid yacnocquido Esuquidistu tantiaquido ēmbi chuibanacpadomboen mimbitsen nabanta. Naden Cadasia yacnocquido chiombi. ² Abentsēchshun-abentsēchshunquien mimbi bedaid musucbudcuenshun dominco ushēn mimbi musucacted dayun uata. Aton na daēdpactsēc icquidēn daēdpactsēc dayun uanubi mitsana dadpen icquidēn dadpen dayun uata. Aden musucbudcuenshun mimbi dayun uaid icnuc ēbi choacsho isash, ŷTedsimbi menepeba? quenquio mibitedi iquendac. ³ Ēbi choshombic utsibo bēdamboen tantiaquin piucquid dayun uaidtedi mimbi menenun buantan caido isun, Ēmbi isaïdo neque. Yuedta, quequin dada uashun aido menembi ma buanueshun. Aden ēmbi meniac buanquin utsibo ismetuidpec. ⁴ Adecbidi ambo nidtiadquio iquebi, ēbi quenuc mimbi menenun buantan caido ēbēdi nidendac.

Utsi-utsien chuibanaid

⁵ Nidaid Masedonia caid yacno Esuquidistu tantiec iccuededquid utsi-utsiec yacno isedbēquimbi mibi isbētsenembi. ⁶ Aden isedbēequi mibi isedash tabadebi. Iquenoanquid chonobi mibēd tabadtsiabi. ŷAid ēnēdan nidnu, qesho, adabi utsi yacno mimbi nidmepatsia? ⁷ Nēbi mibēdi yuec tabadtiapimbo iquebi, quiash mibi yacno nidenquio iquebi. Yuecash mibēdi yuec tabadnuec mibi yacno nidebi. Nuquin Papa bunuc adendabi. ⁸ Nēbi padenquio iquebi. Epeso yacnocquidobēd iquebi. Nuquin Papan abipadquid aton Mayan matses meniaid ushē tantiate choan nēuēshquio nidebi. ⁹ Nēmo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantianpanueshun. Aden chuibanasho tantiauidash utsibo ēbi chieshēnquido nēmo iquec.

¹⁰ Mibi yacno ēbi nidenquio icnubi Timoteyo mibi yacno nideque. Aid bēdamboen ista. Pabado yacpadquiocquid Nuquin Papan namiaidquibidi Timoteyo nec, quec chieshesa icta. ¹¹ Nuquin Papan namiaidquibidi Timoteyo icsho, Ēbēd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unēsquio iquebi, quequin nidme ma ēbi yacno choanu. Utsibobēd Timoteyo choaic quequin cainec tsadebi.

¹² Nēbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobēdta istanta, quequin Apodos comapenen chiombi. Adoac, Nēbi Codinto yacno nidte bunenquio iquebi, quiash aid. Yuecash Codinto yacno nidec bēdambo ictsiash, quiash yuecash aidi mibi yacno nidendac.

¹³ Icsamane quequin chieshenquiocquin Nuquin Papan chiaid tantiadoneta. Esuquidistu tantienquido yanta. Adecbidi, natiatequid icnuc chieshtoenquio yec dayacquo yec tabadteneta. ¹⁴ Adec tabadquin utsi bēdamboen tantiaquin nabanta.

¹⁵ Adembidi chuinu. Tantia. Nidaid Acaya caid yacno Estepanasēn shubun icquido abia Esuquidistu tantiaquido icpondash. Adquid yanshun, Esuquidistu tantiaquid ut-sibo nashumbanquido nuquibi iquendac, qeshun adobanec. ¹⁶ Aidon namiaïdo icta. Adembidi, comapenen nashumbanquidtedishun namiaïdo icta. ¹⁷ Codinto yacno Esuquidistu tantiec iccuededquidtedi ēbēdi ictiapimbocnobi mibi yacnoēsh nēidtedi chosh. Estepanas yec Podtunato yec Acaico yec quec choash puduedsho isash bēdambo iquebi. ¹⁸ Mibitedi chuibanquin aidon unēsquiocquidi bēdambo icmïoshi. Mibi yacno padpidec nidash puduedshun chuibanquin adembidi mibitedi bēdambo icmendac aidon. Aido mibi

yacno choacsho isun, Pabado chuibanquin mimbi bēdambo icmiacpaden nabanec tabadta, quequin chuiban.

Esuquidistu tantiaquidon mibitedi tantiaquin chuibanaid

¹⁹ Codinto yacnocquid mibitedi tantiec tabadebi, quequin dada uaquin chuita, nidaid Asia caid yacno Esuquidistu tantiec iccuededquidon cac chiemi. Adembidi, Aquidan aton chido Pidisdabēdta chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. ²⁰ Aden utsibon chiaid chuishumbic, Esuquidistu tantiaquid utsibotedibēd bēdamboec tabadta, caimbi.

²¹ Ēmbi chuibanac ēmbi chiaid utsin dada uashumboed nec. Nēshun bedanquin dēnainquin dada uaimbique. Tanta.

²² Nuquin Icbo tantiesa nēbimbobi ma Nuquin Papan comapenen cuidquin ma nēsiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

²³ Ēbi icsaquid icsho cuidenquiocquin Nuquin Icbo Esuquidistuded Nuquin Papan cuidpanēdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

²⁴ Esuquidistun shubun icquido nuquibi icsho ēmbi bēdamboen isaiddo mibitedi nec. Padi aidded dada uaombique. Isec onquecuededta.

CODINTO YACNOCQUIDON ISTE 2

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

² Matses icsaquid icsho cuidnushe quiash abided cuidadec Esuquidistu uněspanědash, quequin tantiaquioso isun Nuquin Papan bědamboen isaidquo nuqui nec. Adquido yec utsiboběd ma bědamboec tabadpanuna.

Bědambo icmianquidquo Nuquin Papa

³ Nuquin Papa nad iqueque. Tantia. Chuinu. Ĕbi uněsquo icsho isash bědambo icmianquidquo Nuquin Papa nec. Adquid icsho, Mibi bědambo iquec, quequin aidquo chuidonenuna. ⁴ Natiamiaid icsho tantiaquin chieshtomenquiocquin aiděmbi nuqui dayacquo icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. ⁵ Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquo icmiacpadomboen Esuquidistu tantiaquid utsi tantiaquin chieshtomenquiocquin dayacquo nuqui icmendac. ⁶ Adembidi ěbipadquidobědan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquo icmec, quec tabadta. ⁷ Utsin měyanaid icquimbi Esuquidistu tantesa uainquo iquec, quequin mibi tantiec tsadebi. Ĕbi měyanacpaden mibi měnyansho isun Nuquin Papan bědambo icmiaid mibi iquendac.

⁸ Nidaid Asia caid yacnoshon ěbi natameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocon natiamioshi. Adoac, Uněsebi, quiobi. ⁹ Uněs uatiad, utsibo qesho tantias, Ĕbibi měnchiquidtiapimboquimbi matses uněsacsho uincumequiděn ěbi měnchictsias, quequin tantiec tsadobi. ¹⁰ Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. ¹¹ Ĕbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiasun mimbi Pabado měnchiccoc. Mibi bědambocquid nec, Papa, quequin ma dadpenschun ambi naid chuipanuna.

Něbi mibi yacno nidenquo iquebi, quiaid

¹² Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquo yec tabadobi. ¹³ Ma tantiamenueshun abimbo chuiquin mibi dada uashunec nebi. Ĕmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. ¹⁴ Ĕběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bědamboec tabadosh, quequin utsibon chuisho tantias bědambo iquebi. Esuquidistu choanuc adquiequi Codinto yacnocquido tabadpashun, quec tsadebi.

¹⁵ Aden ěbi bědamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bědambo iquebi, quepashun, caimbi mibi. ¹⁶ Mibi isbidanec nidaid Masedonia caid yacno nidashic padpiden mibi isbětsenec choaibi. Aden isbětsenemi, qesho tantiasun nidaid Udeya caid yacno mimbi ěbi nidmetsiac, quequin mibi chiombi. ¹⁷ ĔUquěducshun, Nidenquo iquebi, quequin muaquindambi chuidio? Adenquiocquin chiombi.

¹⁸ Ambi chiacpadomboen nabanquidquo Nuquin Papa nec. Aid chuinu. Tantia. Abimbo chuiquidquo yec utsi yantiapimbo iquec. Adquidquo icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi. ¹⁹ Ambi chiacpadomboen nabanquidquo Nuquin Papan Madombo, ěmbi chuibeniaid, Esuquidistu nec. Aidi Sidasěn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquo yec utsi yantiapimbo iquec. Abi chuibenequidquo adquidbidi nec. ²⁰ Con Madon naden naindac, quequin Nuquin Papan chiacpadomboen Esuquidistun ěnden nabanac. Aden abi nabanec. Ambi chiacpadomboen naquidquo Esuquidistu nec, quequin tantiaquin ambi naid ěbipadquidon chuibanec. Aden chuibanac abi tantiaquidquo yanash, Abimbo iquec. Esuquidistun ambi chiacpadomboen naindac, quec tantiec nuqui

tabadec. ²¹ Nuquin Papan tantiamiac: Esuquidistu tantiaquid nebi, quiash, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac. ²² Adembidi aton bacuë icmiaid nuqui nec. Adembidi aton Mayan Nuquin Papan meniaid nuqui nec. Èbèd tabadquid aido nendac, quequin tantiamenuen Nuquin Papan aton Mayan meniac ma aidèmbi nuqui bédambo icmepanueshun.

²³ Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquio iccobi. ²⁴ Èmbi Esuquidistu chuibanac abi tantiaquid dadpen iquec. Aidon icbopenquio nebi. Aidon icbopenquiobidi Esuquidistu chuibanquid utsibo nec. Esuquidistu tantiec bédambo iquebi ma quenu, quequin chuibenequidquio nebi. Esuquidistu tantiaquid nebi, abimbo quequin aid tantesa uainquio mimbi iquendac.

2

¹ Aden tantiaquin comapenen chuiquin unèsquio icmenushe quec mibi yacno nidenquio iquebi caombi. ² Mibi unèsquio èmbi icmiac ¿tsuntsin èbi bédambo icnepatsiash? ¿Èmbi icsambo icmeboedènda èbi bédambo icmepadic? Padenquio. ³ Aden tantiaquin mimbi iste dada uaombi ma èbi bédambo icmequid unèsquio icmetiapimbo iquebi, qeshun. Bédambo iquebi, quequin èbi tantiec adquiobidi mibi icoatsiac, quequin tantiombi. ⁴ Unèsquio yec shubiquimbi mibi dada uashun, Meneta, caondambi. Unèsquio icmenu, quenquiocquin mibi comapenen tantiaquin dada uaondambi.

Abi icsaboed bèpiscudnueshun yued quiaid

⁵ Anocquidèn èbi unèsquio icmedenequimbi adembidi comapenquieic unèsquio mibi icmeoaosh. Aidi mibi chiondambi. ⁶ Aidi mibi dadpenshun cacumiac abi icsaid ènosh quec. ⁷ Adoachso abi icsaid bèpiscudshun aidi yuedoquin bédambo icme. Yuedenquio yac natiamianquieic unèstiadquio yantsiash. ⁸ Nuquibi iccuedednuna, quequin aid tantiaquin yued caimbi. ⁹ ¿Èmbi chiacpadomboen nabanquidioda neque? Isnu, quequin icsaquin cacumeta, quequin dada uaondambi. ¹⁰ Aden èmbi dada uacpaden mimbi cacumiac abi icsaid ènsho isun abi icsaid nibèdacbimboec bèpiscudshun yued. Adsho tantiahsun adomboembidi naimbi. Aidbèdi abentsèc yacimbocquido yanosh, qesho tantiahsun abi icsaid bèpiscudebi Esuquidistun tantianubi. ¹¹ Nuquí chieshèngquidèn Satanasèn aidi icsamenushe qeshun abi icsaid èmboed yuedta. Yuedenda, Satanasèn quequin tantiamiac onqesho tantienda.

Nuquin Papan con Mayan meniaid adquid èbèdi tabadtequid nec, quiaid

¹² Esuquidistu chuibanuec shubu dadpen icquid Todoas caid yacno èbi chonoc, Tiantianu, quec cho-choquid dadpen icpondash. ¹³ Adquid dadpen icnubi èmbi con utsi caid, Tito, mibi yacnoèsh choabi icnuc ambo yuec tabadtiapimbo iccobi. Adash, Bèquednu, quianec nidaid Masedonia caid yacno nidoapobi.

¹⁴ Bédambocquid mibi nec, Papa. Mimbi Esuquidistu tantiaquid èbi yacpadquido icmeshun mimbi, Esuquidistu chuibeneta, caid èbitedi nec. Èmbi chuibanaid noadte bédabimboecquid nec. Noadte bèda pushudec noadsho uano-uanoc tabadquidon shèdec. Adembidi, Esuquidistu èbi yacpadquidon chuibenesho uano-uanoc tabadquidon tantiec. ¹⁵⁻¹⁶ Esuquidistu chuibanac noadte bédan danoshquiaid shèdacbimboen utsibon tantiec. Adembidi, Esuquidistun èbi chuibeneta caido Icho isachimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ènèdenquio yec abèd icquido aiteddi iquendac. Aden nuqui isquin Esuquidistu tantiesa icsho Nuquin Papan nèsiatequid iquendac. ¿Tsutsi Esuquidistu-padquidquio icpec? Adquid nibèdec. Adesa icsho ambi, Èbi chuibeneta, caidquio nebi. Adquid icquin chuibenenubi ¹⁷ piucquid bedte bunquin utsin-utsinquin Esuquidistu chuibanec. Adesa èbipadquido iquec. Piucquid bednuequin èbi yacpadquidon Esuquidistu chuibanenuquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

3

¹ ¿Pabado bédamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bédamboec tabadquin Esuquidistu Pabado chuibanosh, quequin dada uata, èmbi cac mimbi dada uaidtambi buampe? Padenquio. ² Mibèdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chèshèten pinchuquèn tansiachimboecnuc paucudtiapimboecnoc Nuquin Icbon tantiamioshi. Adembidi icsamboec tabadboedi nèbi bédamboec tabadsho isun Pabado Esuquidistu chuibanaido Codinto yacnocquido nec, quequin adomboembidi tantiabededec utsibon. ³ ¿Abi tantiaquid icsho

isun bēdamboec tabadmenuequin ambi cuēnote bedshun dada uampicpadquidta mibi meniondash? Padenquio. Esuquidistu tantiaشو isun unēstiapimbocquid aton Mayan abipadquidquio mibitedi meniondash.

⁴ Nuquin Papan tantiacpadomboen Esuquidistun, Ēbi chuibeneta, cac chuibanac Esuquidistu tantiaquid mibitedi yanacsho tantiec ěmbi chuibanaido aidtedi nec, quequin tantiembi. ⁵ Ēmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiembi. ⁶ Ēmbibi Esuquidistu chuitiapimbo icsho Nuquin Papan Mayanēn tantiamiac Esuquidistu chuibenecquidquio nebi. Ambi, Nadomboen nata, quequin dada uamiampicpadomboen chuibanta caidpenquio nebi. Ambi nadomboen nata, quequin dada uamiampidtedi natiapimbo yec aidbēdi matses tabadtiapimbo iquec. Aton Mayan meniaidbēd tabadtequid nec.

Abi tantiaquido bēdambo icmetequid aton Mayan

⁷ Nuquin Papan nadomboen nata quequin chiaid cuēnoten dada uacpaden nainquio yec matses abi yacno tabadtiapimbo iquec, quequin dada uampid meniac abi chēnquiacpadec Moisesēn bētantiatie comapenec bēchomauanquiec chēnqueboedi macuēsh budec bēdiambo chēnquesho isadaidbon bēstiapimbo icpampic. ⁸ Nēbi Esuquidistu tantiaquid bēdambo icmequid aton Mayan abipadquid meniaid ěnēdenquiocquidquio nec. ⁹ Ēmbi nadomboen nata quequin chiaid niacquid ěbēdi tabadtiapimbo iquec, quequin dada uaid Nuquin Papan meniac buanshun Moisesēn aton matses ěnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ěnēdtiapimbocnoc tabadmendac. ¹⁰ Nēbi Esuquidistu unēsaid tantiaquid ěnēdtiapimbocquid nec, quequin chiac ambi dada uaid meniampid ěnēdabimbocquid nendac. ¹¹ Ai, nadomboen nata quequin chiaid Moisesēn bedshun meniaid ěnēdtequid icnubi bēdambo icmiantequid Nuquin Papan chomiaid icsaisa ěnēdtiapimbo iquec.

¹² Aden tantiaquin, Esuquidistu nuqui tantiaid icsaisa yec ěnēdtiapimbocquid nec, quequin chuibenecquid nebi. ¹³ Moises Nuquin Papabēd onquec bēchomauanquiecboedi auēshquio nidec ushma-ushmactšēcquio yanash matses ismenquiocnuec bēpucudpampic. Adesa icquin ompoenquiocquin utsibon ma tantianu, quequin Esuquidistu chuibenecquido nuqui nec. ¹⁴ Nuquin Papan dada uaid Moisesēn bēaid tantiate bunesa abēd icquido icpampic. Adquibidi pamumēdabimboc isadaidbo abi tabadec. Nuquin Papan cuēnoten dada uacpadquid isec onquec nēbi adquibidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac. ¹⁵ Nadomboen nata quequin dada uaid Moises menepampid isec onquec pamumēdabimbocquid isadaidbo utsi-utsiec iquec. ¹⁶ Esuquidistu tantiaquid icsho Nuquin Papan Mayanēn paucquin tantiamiaid nendac. ¹⁷ Nuquin Icho icsaisa icquin ěnden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. ¹⁸ Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquio icsaisa icquin abipadquid nuqui meniac aton Mayanēn adquid nuqui icmebanec.

4

Nuquin Papan nadatiambocquin nadenequin Esuquidistu chuibenemiaid

¹ Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. ² Icsash ompodquid icboedi nēbi muesa icquin Nuquin Papan chiaid utsi uainquio yec nuqui bēdamboec tabadec. Nuquin Papan isec, quec adequi nuqui tabadec. Adecec tabadec ěbipadquid utsi yansho isash Nuquin Papan chiaid tantiate utsibo bunquiopec. ³ Esuquidistu chuibansho utsin-utsinquien bēdamboen tantiatiapimbo iquec. Adquid Nuquin Papabēd tabadtiapimbocquid nec. ⁴ Nuquin Papapadquid Esuquidistu tantiaquid icnushe queshun icsamianuequidēn Satanasēn pamunacimboben utsi-utsien tantiamenquio iquec. ⁵ Ēmbibi naid chiesa nebi. Matsesēn Icho Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. ⁶ Abitedi uanuna, queshun, “Inchēshquio icboedi uēshēmbō yanquiota,” capampic Nuquin Papan. Adomboembidi Nuquin Papan chiaid pamumēdabimboben tantienquiocboedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

⁷ Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenecquid icmiondashi. ⁸ Aden chuibansho mēyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? quesho Nuquin Papan dayacquio icmedenebi. ⁹ Ēbi chieshēnquid dadpen icnubi ěbi bēdambo icmequid aidi iquec. Comapenen cuestanec, Unēsec, queshun nianaqui abi Esuquidistu chuibenembi.

¹⁰ Esuquidistu mëyanquin unës uacpaden mëyanquin unës uatsen-unës uatsenshobi dayacquio icmedenioshi. Adoacsho uincuenaidën dayacquio icmedeniaid nec, quequin utsibon isbededebi. ¹¹ Adembi Esuquidistu chuibansho unës uatsiashi, quequin chuibenec nebi. Aid chuibansho unës uatsenaqui abipadquid unësesa yanebi, quec bëdamboec tabadebi. ¹² Aden tantiaquin aid chuibanac abi tantiaquid yanash aibëdi tabadec unësesa mibitedi yanendac. ¹³ Ambi chiapadamboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. ¹⁴ Aden tantiaquin Nuquin Papan Esuquidistu uincuemiacpaden aibëdi tabadmenuen mibitedibëdtabi ëbëd icquidtedi uincuemendac, quequin chiombi. ¹⁵ Aid tantiaquid ma mibi icpanueshun chuibansho mëyanaid nebi. Mëyanahui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bëdambo iquec, Papa, quequin ma Nuquin Papa utsibon chuiapanuna. ¹⁶ Aden tantiec dayactiapibi quenquo iquebi. Tsusio budquimbi badiadquidën-badiadquidënquien Esuquidistu tantiadonequidquio yanebi. ¹⁷ Natiamiantequid ënëndendac. Natiamiaid yashic Nuquin Papa yacno tabadec bëdamboshë iquendabi. Esuquidistu-padquid icsaisa yec unësesa yanash ënëndtiapimbo iquendabi. ¹⁸ Aden tantiec, Èbi natiamiaid iquec, quiashic, Nuquin Papabëd tabadendabi, quequin comapenen tantiec tsadebi. Èmbi isaidtedi ënëndendac. Nuquin Papa yacnocquid ëmbi isacmaidtedibëd ënëndtemaid iquendabi.

5

Nuquin Papabëd tabadte iquendac quiaid

¹ Con nami shëniбудash unësash nibëdnuc Nuquin Papabëd tabadec nami chuca uaid iquendabi. Nami chuca uaid ënëndtemaid matsesën nachnenacmaid nec, quequin tantiembi. ² U abucquio nidabi yec uëshquequid nebi. Adquiocsho nami chuca uaid ënden meniondac, Cuishon, quetsiabi. ³ Aden meniac ëbibimboec isadsho isendac, quec tsadebi. ⁴ Nami chodquequid icnuc uëshquec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec. ⁵ Con Mado Esuquidistu tantiaquid ëbëd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec.

⁶ Aton Mayan meniaid iquec nami chodquetequid abi iquequi chieshenquio yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec. ⁷ Aton Mayan meniac nuqui isacmaid Esuquidistu cainec nuqui tabadec. Èmbi isaid ëmbi caintemaid nec. ⁸ Aden aid cainsho nami chodquesa badedquio menepashuni. Aden meniac Nuquin Icbobëd iquendabi, quequin nuqui tantiec. ⁹ Aden tantiec nidaidën tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiembi. ¹⁰ Adembiidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiembi. Utsi-utsien, Mimbi bëdamboen nabanoc, quequin chuibanendac abitedishun naid cuidquin.

Ma utsibotsen abi tantiaquid icpanu quequin chuibanaid

¹¹ Aden ambi tantiacpaden nabansho, Bëdamboen mimbi nabanoc, Nuquin Icbon ëbi caindac, quequin tantiaquin ma utsibotsen Esuquidistu tantiapanueshun mibi chuibenec nebi. Aid tantiaquin nabanec bëdamboec tabadsho Nuquin Papan tantiec. Ai, adec Pabado tabadsho ispombi, quequin adembiidi mimbi chuiplashun, quec tsadebi. ¹² Aden tantiaquin, Mibi bëdambo iquec, ëbi camenuen mibi dada uashunenquio iquembi. Èbi chienquiocquin, Bëdamboec tabadquin ismiacimbocquidën ëbi icsamboen chuisho aido chuita, quequin mibi dada uashunembi. ¹³ Aido, Pabadon tantiate icsabudosh quec. Adembiidi, Nuquin Papan chiapadamboen ëmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenquiocnobi. ¹⁴ Chian anëdënquequid icsambocquid nësianushe quiash matses icsaid bedshunash abided cuidadec icsaisa Esuquidistu unëspaneđdash, quequin ma utsibon tantiapanueshun chuibenec nebi. ¹⁵ Ma ëmbi naid chiac ëbi tantiaquido ma ëbëdi icpanu, quiash unësash uincuempaneđdash Esuquidistu.

¹⁶ Adec unësash Esuquidistu uincuempaneđdash, quequin matses unësash uincuenta iquec, quequin abi tantiaquidon tantiec. Ènden, matsesquio Esus nec, quiondaidi nëbi, Nuquin Papan Chomiaid yec matses tantiec unësash uincuempaneđdash, quequin tantiembi. ¹⁷ Abi tantiaquid ambi tantiamiaid nec. Ènden matsesën tantiacpadquiec icboedi Esuquidistun tantiacpadquiec bëdamboec tabadec abi tantiaquidquio. ¹⁸⁻¹⁹ Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unëspaneđdash, quequin tantiaquin ma aidquio utsibon tantiapanu qeshun ambi naid nuqui chuibenec. ²⁰ Nuquin Papan

Esuquidistu chuibeneta cac nebi. Adquid icquin chiac abi tantiaquid yanash, Ēbi icsaid bedshunash Esuquidistuded cuidadpanēdash, quequin abēd icnuequin aid tantiaquiota. ²¹ Ambi cuidtiadquid nuqui icnubi Esuquidistu icsaisaded Nuquin Papan cuidpanēdash ma Esuquidistu ambi cuidaidpadquid tantiaquidtedi icsaisa yampanueshun.

6

¹ Matses bēdambo icmenu, quequin Nuquin Papan chiaid bēpiscudmane qeshun ambi tantiamiacpaden nabanec tabadta. ² Nuquin Papan chiampid chuinu. Tantia. “Mibi bēdambo icmete ushē chonoc cuēnsho tantiombi. Tantiesa icboedi nēid ushēnquio mibi tantiamiombi.” Aden Nuquin Papan chiampicpadomboen bēdamboen tantia. Nēbi Nuquin Papan bēdambo mibi icmenu cac, Ai, cata. Nēid ushēnquio ambi aton bacuē icmete ushē nendac.

Pabado natiamiaid

³ Icsamboec tabadquimbi Pabado Esuquidistu chuibansho, Tantiatiapibi, utsibo quetiapimboec bēdamboec tabadec nebi. ⁴ Nuquin Papan chuimiaid yec naded tabadebi: Chieshenquio yec dayacquiocquin ambi chiaid chuibenec bēdamboec tabadec nebi. Natiamiaid yec adequi tabadebi. ⁵ Utsin cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ěmbi chuibanac cuesnanubi padenquio yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquiec bēdamboec tabadebi. ⁶ Icsainquio yec bēdamboec tabadebi. Nuquin Papan chiaid tantesa uainquio yec bēdamboec tabadebi. Tantiatiapimbo yec utsibo tabadsho isun adembi Nuquin Papan chiaid chuibenec nebi. Naden chiac tantiatsiash, qeshun chuibenembi. Adembi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi. ⁷ Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiapadomboen nabanec nebi ma utsibon abi icsaid ěmpanueshun. ⁸ Ēbi chiec: Pabado bēdambo iquec, quenubi adequi tabadebi. Utsin ěbi chuioaic: Pabado icsambo iquec, quenubi adequi bēdamboec tabadebi. Ēbi icsamboen chuinubi adequi bēdamboec tabadebi. Ēbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. ⁹ Ēbi isquidēmbi, Ēmbi isacmaid Pabado nec, caqui ěmbi chuibansho tantiaboedo nec caimbi. Ēbi unēs uate bunubi abi chuibanec capucuenebi. Mēyanaqui unēsabi yec nidebi. ¹⁰ Unēsquio icmiaqui Esuquidistu tantiec bēdambo iquebi. Con na nibēdsho isun adembi Esuquidistu chuibanec nebi ma Esuquidistu tantiec utsibo bēdambo icpanueshun. Con na nibēdsho isash Nuquin Papan bacuē yec aton natedi con na nec, quequin tantiec tsadebi.

¹¹ Chuitiapibi, quenquiocquin ěbi natiaboedtedi mibi chuibanombi. Mibi comapenen tantiaquin ěmbi nabanaid mibi chuibanombi. ¹² Mibi tantiaquioquin chuibanquid ěbi icnubi ěbi tantiaquin chienquio mimbi iquec. ¹³ Pabado con bacuēbo caido nebi, quequin mimbi naid mimbi tantiaidbēda ompoenquiocquin ěbi chuiban, caimbi mibi.

Esuquidistu tantiesabēdtambi icsain nainda quiaid

¹⁴ Esuquidistu tantiesabēdtan icsamboen nainda. Adembi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, qesa aton papa. ¿Nuquin Papan bēdambo icmiaidēnda ambi chiaid niacquidbēdtan nabampadic? ¿Nuquin Papan Mayanēn tantiamiaidēnda Icho chieshēnquidbēdtambi chieshēmpadic? ¹⁵ ¿Esuquidistu Satanaspadquidta nedic? Padenquio. ¿Esuquidistu tantiaquid abi tantiesapadquidta nedic? Padenquio. ¹⁶ ¿Nuquin Papan ambi uaidbimboecnuc matsesēn nacnenaid tantiaquidta aton Mayan Nuquin Papan meniaid icpadic? Padenquio. Abi tantiaquid aton Mayan menec. Nuquin Papan dada uamiampid dada uanu. Ista.

“Ēbēd icquidbēd iquendabi;

Aidbēdi capuebi;

Aton papa nebi;

Con matses adquido nec,

¹⁷ Con matses icquin ěbi tantiesan ěmbi chiaid niacacpadomboen nainda.

Adecbidi aid icsacpadeb tabadenda.

Adecbidi icsainquio yec tabad.

Adquid ěbēd iquec cho caindambi.

¹⁸ Adquidon papa iquendabi;

Adquid ěmbi con madobēd con champi caid iquendac, quec Nuquin Papa.” Abi tantiaquido nadatiambocquidēn aden chiec.

7

¹ Naden nanuna, quequin Nuquin Papan chiac nuqui naid icsatedibēdtabi nuqui tantiaid icsatedi ēnu, quequin Nuquin Papan chiacpadomboen nabanec tabadtenenuna.

Unēsquo icboedi mimbi naid tantiaish bēdamboshē iquebi quiaid

² Adembidi, ēbēdtabi ēbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. ³ Pabado tantienquoio yec icsaobi mibi camenuen nēid chuiquin dada uainquo iccombi. Mibitedi tantiec tsadebi, quequin padpiden chiembi. Abimbo caimbi. Unēssequi mibi bēshuntiapimbo iquendabi. ⁴ Mimbi chiacpadpenquiochoedēmbi naosh, quequin choquidēn chioshi. Aden chuisho tantiaishun, Nuquin Papan chiacpaden nabanquidquoio nec, quequin mibi chiec nebi. Unēsquoio icboedi mimbi naid tantiaish bēdamboshē iquebi. Utsin natiamiaid icshobi bēdambo iquebi, mimbi ēbi camioc.

⁵ Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedēmbi tantesa uatsiash, quec quenenenquoio iccobi. ⁶ Unēsquoio icsho ēbi tantiaquin Nuquin Papan Tito padpiden chomiosh ēbi bēdambo icmeoanuen. ⁷ Choashun mimbi aid tantiaquin nabanaid Titon chioshi. Adembidi, ēbi iste mibi bunaid chioshi. Mimbi dada uaid isash unēsquoio icquin, Codinto yacnocquidon mimbi chiacpaden nabanosh, quequin Titon chioshi. Aden chiac bēdamboshē yanobi ad yenquoio icboedi.

⁸ Mimbi dada uaid isash Codinto yacnocquido unēsquoio iccosh, qesho tantiaish, Icsambo icchitobi, quenquoio iquebi. Aden dada uaic icsambo iccobi, quetiapiambo yequi mibi unēsquoio yacpadequi unēsquoio iccobi. Yuec mibi ad yenquoio iccoc. ⁹ Adecbidi nēbi bēdambo iquebi. Ēmbi mibi unēsquoio icmiac mibi icsaid ēnquin Nuquin Papan chiacpaden nabanec, quec utsibo. Aden chuisho tantiaquin mibi unēsquoio icmequin mibi icsabudmiambo iccombi. Unēsquoio icmiaqui mibi bēdambo yanoc. ¹⁰ Unēsquoio icmiac, Nuquin Papan chiaid niaccombi, quiash unēsquoio icquin mibi icsaid mimbi ēnac. Adsho isun Nuquin Papan ēnēdtiapimbo cnoc aiddē mibi icmendac. Aden unēsquoio icmiaqui, Bēdambo iquebi, mibi quendac. Adecbidi mibi icsapadec icsainquoio mibi icpendac. Padnuen Nuquin Papan chiacpaden niacquin ēnesa abi natiamiaiduidi tantiec Nuquin Papa yacno puduedtiapimbo iquendac. ¹¹ Padnuen mibi unēsquoio icmiac nēbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ēnoc. Adembidi, Ēbi padpiden bēdamboen is, quequin Nuquin Papa mimbi chioc. Icsashun chienquiochoedēmbi nēbi cuembo bēdamboen chuinu, quequin mimbi chuibanoc. Aden mibi icsaid ēnacsho isun mibitedi icsaquin ēntiapimbo icquidēn nacpaden naisa nec, quequin tantiembi. ¹² Icsaquid ambi icsa uanaidbēdtabi chuinuen mibitedi dada uainquoio iccombi. Abentsēc icsash abitedi unēsquoio iquec. Adquiecbidi ēbi unēsquoio icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin ¹³ ēmbi tantiacpaden naquin mimbi bēdambo iquebi camiaid nebi.

Adembidi Tito yuedquin mimbi bēdambo iquebi camiaidbidi niosh. Ēbi yuedenquioctsiash queboedi niosh. Yuedoshi, Tito qesho tantiaish bēdamboshē iquebi. ¹⁴ Mibi nidmembidi, Tito, qeshun, Ēbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ēmbi chuibocpadomboen mimbi nashunac. Aden tantiaish, Abimbo chiombi, quepobi. Ēmbi mibi muainquiocquin chuibanacpadec adquibidi mibi nabanec tabadaid abimbo iccosh. Adomboembidi Titon mibi isbanosh. ¹⁵ Ēbitedi chushcatsiash, quequin mibitedishun Tito yuedpanēdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito. ¹⁶ Adoaidi ambia tantiaquid icquin ēmbi chiac mibitedishun nabanendac, quequin tantiembi. Aden tantiec bēdambo yec tsadebi.

8

Aton na nibēdquid icsho aton na dadpen icquid menequid

¹ Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nēbi bēdamboen nabanec tabadaid chuinu. Tantaia. ² Natiamiaqui bēdambo iquebi quec aido tabadec. Adec tabadquin Esuquidistu tantiaquid utsibo tantiaquin menuequin aton na daēdpactsēc musucshun dayun uaosh. ³ Ēmbi, Meneta, cainquiocnobi aton na bedtequid naimbudtsēcquien menuequin bedbanosh. ⁴ Esuquidistu tantiaquid utsibo, nidaid Udeya caid yacnocquido, aton na nibēdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. ⁵ Mitsana daēdpactsēc icnuc utsibo mimbi menetiapiambo icpec, quequin chuinu quenubi Nuquin

Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. ⁶ Adomboen menenun bedbamposh. Adosho isun Tito nadombi. Mimbi ënden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ⁷ Ambichiactedta bedbanoshe? Isnu, qeshun istanta, quequin Tito chiombi. ⁸ Naden naquid Codinto yacnocquido nec, quequin mibi tantiemi. Nuquin Papan Mayanën tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin ëmbi chiacpadomboen badedquio comapenen naquidquio mibi nec. Adembidi ëbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

⁸ Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. ⁹ Nuquin Icho Esuquidistu abuc tabadec abitedishun Icho icboedi nuquitsen abuc abëdi tabadmenuec matesash nidaidën tabadnuc aton na nibëdpadenec. Aidën matses tantiaquin nabanacpaden utsibo tantiaquin nabanta.

¹⁰ Ëmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac. ¹¹ ¹² Aden nanuna, qeshun mimbi chiacted ënquinda bedshun dayun uao? Padenquiocquin adota. Mitsana daëdpactsëc icnuc daëdpactsëc musucshun menesho isash, Dadpen meneta, quenquio Nuquin Papa iquec.

¹³ Aton na nibëdquid icsho, Natiacquin meneta, quenquio iquebi. Aton na nibëdquid icsho aton na dadpen icquidën menec. ¹⁴ Mitsana dadpen icquid mimbi musucshun meniac aton na nibëdquid bëdambo iquebi, quepec. Aden meniac mibëdi aton na nibëdquid bëdambo iquendac. ¹⁵ Nuquin Papan dada uamiampid nad iquec. Chuinu. Tantia. Petequidëmpi Nuquin Papan mana caid meniaid chuiquin: “Shubun tabadquid dadpeshun aitedaidtedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aited bedbanshun peshun napi uaid nibëdosh.” Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

Tito Codinto yacno nidte

¹⁶ Nëbi Tito mibi chuinu. Tantia. Ëbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiashe isec, Mibi bëdambo iquec, Papa, quec tsadebi. ¹⁷ ¹⁸ Codinto yacno tsutsi nidpatsiashe? quequin ëmbi chiac, Ëbibi nidebi, quiosh Tito. ¹⁸ Tito mibi yacno nidnuesho tantiashe nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chiec. Bëdamboquid nec. ¹⁹ Nidaid Masedonia caid yacnocquidon, Esuquidistu tantiec iccuededquidon ëmbi dayun uaid Pabadobëdtan buanec nid caidbidi Titobëd nidquid nec. ²⁰ Aid daëd ëbëdi nidsho isash, Nuqui na buanquin ampetsiashe, quetiapimbo utsibo iquec. ²¹ Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobëdtambi buanshunembi.

²² Tsyuec nidebi, quequin utsibobëda Tido mibi yacno nidmembi. Ëmbi nata cac bëdamboen nabanquid aitedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. ²³ Mibi nashunquin ëbëdtambi Esuquidistu chuibanquid Tito nec. Aidbëdi Esuquidistu tantiaquid utsi nidec. Esuquidistu tantiec iccuededquidon nëuëshquio puduanec Codinto yacno nidta caboedi Titobëd nidec. ²⁴ Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ëmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapanuna.

9

¹ Ënden Esuquidistu tantiaquid utsibo tantiaquin nashunta quequin ëmbi chiac, ² Adonona, qeshun mitsana bedbanquin mimbi tauaondac. Adsho isun nidaid Masedonia yacnoësh Esuquidistu tantiec iccuededquido mimbi menuequin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanembi, queoposh. ³ Aden aidon chuisho tantiashe nuqui con utsi caido mibi yacno nidmembi mimbi chiondacpaden bedbanambo icnushe qeshun. ⁴ Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec.

Aidobēdi mibi yacno choshon ěmbi chiacpaden mimbi bedbanambocsho isash, Abimbo chiacbimboen chuichitombi, quec natiac bēpiutsiabi. Adquiecbidi mibi icoaic. ⁵ Adquio icnushe qeshun utsiboba mibi yacno nidmembali. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiacted bedbanquin dayun uambochoedēmbi nēbi mimbi bedbampec. Aden mimbi bedbanquin mibi menete bunacteduidtsēqui mimbi menec. Utsimbic, Menetiapibi, queboedēmbi utsin, Bec cho, cac aton piucquid tantiec unēsquo icquin menetsiash. Aden tantiaquin menenda.

Nuquin Papan na dadpen bedmiadēn aton na nibēdquid menequid

⁶ Nuquin Papan chiaid chuinu. Adembi tantiata. Tied icbon daēdpactsēc nitsinac caniaš ěshēacsho aidtedtsēcbidi bedpec; dadpen ambi nitsinac caniaš ěshēacsho dadpen bedpec.

⁷ Adquibidi aton na icquid iqueque. Tantia. Chuinu. Nēitded menuequin ambi chiacted menequid. ěmbi meniaid tantiash bēdambo iquebi, quepec adquid. Utsimbic, Menetiapibi, queboedēmbi utsin, Nēitded bec cho, cac menepec. Aden utsin chiacted meniaš, Bēdambo iquebi, quetiapimbocquin menec. ⁸ Mitsana menete bunquin mimbi chiacted menesho isun Nuquin Papan uesadmenquocquin mimbi bedmec na utsi-utsien menebampanueshun. ⁹ Nuquin Papan dada uamiampid adomboembidi chiaid nad iquec: “Nuquin Papan dadpen bedmiosi, quequin tantiaquin aton na nibēdquid utsi-utsien menebanec.

Aden menequid tantiaquin ěnenquiocquin ambi naboed Nuquin Papan chuibanendac.”

¹⁰ Ambi meniaido menequidēn bēdambo icmec, quequin ambi chiacpadomboen Nuquin Papan matsesēn na daēd uaindac. Adecbidi ambi uaid tiedēn caniquid ěshē abentsēc siaid dadpen yanec. Matsesēn petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec na mimbi meniaid bēdtambi icpanueshun. Aden mimbi dadpen menebanac aidontsen ambi bedaid musucshun utsi meneopec. ¹¹ Aden mimbi meniac utsibotsen, Bēdambo iquebi, quec tabadec. Adecc tabadquin mimbi meniaid tantiaquin, Nuquin Papa bēdambo iquec, quequin mimbi meniaidon chiendac.

¹² Nuquin Papa tantiaquid icquin aton na nibēdquid Esuquidistu tantiaquid dadpen icsho menebanquin mimbi bēdambo icmiaid dadpen iquendac. Adembidi, Nuquin Papa bēdamboshē iquec, quequin aidon chuibanendac. ¹³ Meniacsho isash, Esuquidistu tantiaquid nebi, quequin abimbo chuiquidquio aid nec, quequin mimbi meniaid bēdtambi utsibon mibi chuibanendac. ¹⁴ Adquidquio nec, quequin utsibon mibi chiec. Mimbi tantiamiacpadomboen nabanquidquio Codinto yacnoquido nec. Aido bēdambo icme, Papa, quequin mimbi meniaidon adomboembidi chiendac. ¹⁵ Aden aidon chuinubi naden nuqui Nuquin Papa chiec. Mimbi chomiaid Esuquidistu ěbi bēdambo icmenuec ěbi icsaid bedshunash abided cuidadec unēsash uincuempandash. Aidpadquid utsi nibēdec, Papa, quequin nuqui chiec.

10

Ěmbi dada uacpaden mibi yacno choshon adomboembidi nabanembi quiaid

¹ Comapenec chushquenquiocquin matses bēdamboen tabadmenuequin chuibanquid Esuquidistu icpanēdash. Mibi yacno choshon Esuquidistupadquid icnuequin ěbi chieshēnquid bēdamboen tabadmenuequin chuibanendambi. ěbi chieshēnquido naded onquequin ěbi naden chiec, quec. Nuquibēd tabadquin dacuēdacbimboecquin comapenen Pabado chushcainquio iquec. Utsi yacno nidshun dada uaquin comapenen chushcaic, quiosh. Mibi chiec adosh. ² Adsho tantiash mibi yacno choash tabadquin chushcante bunenquio icquimbi, Ambibi tantiacpaden nabanquid Pabado nec, quequido bēdamboen chuibanembi.

³ Esuquidistu tantiaquid yanshun icsaquidēn tantiacpaden nabanesa nebi. ⁴ Mibi yacno choshon matsesēn tantiacpadpenquiocquin Nuquin Papan tantiamiacpaden ěbi chieshēnquido Satanasēn icsamboen tantiamiaido Nuquin Papan chiaid chuibanendambi.

⁵ Satanasēn tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibēdec, qeshun ěmbibi tantiacpaden naic bēdambo iquec, quequin tantiamiaido nec. Aden tantiaquid icsho isun ambi icsamboen tantiec pamumēdacbimboe yaid ěmenu quequin Nuquin Papan chiaid ěmbi chuibanubi abi pamumēdacbimboe yaid padpidec pausdtiapimboec pauchanshun ambi tantiacpaden Nuquin Papan pausunendac ma ambi chiacpadomboen namenuquin. ⁶ Aden chuibanshun Nuquin Papan chiacpadomboen utsin-utsinquien abi icsaid ěnabicsho isun comapenen cuidendambi.

⁷ Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsēcquio isadtsec, quepec aido. Aden chuiquido, Esuquidistu tantiaquid nebi, ěbi qesho tantiash, Muec nec, quetiapimbo iquec. ⁸ Abi

tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ëbi chieshënkuido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmoshi, quequin tantiec, Adesa nebi, quetiapimbo iquebi. Aden tantiaquin ëmbi chiapaden naimbi mibi yacno choshon caimbi. ⁹ Adquid nebi, quequin, Dacuëdampamboquid Pabado nec camenuen dada uainquo iquembî. ¹⁰ Mibi aden dachuëdmenu, quenquo icnubi ëmbi dada uaondaid bedshun isun naden utsin ëbi chiosh quec. Chuiquidën comapenen chushquequin chiapadomboen Pabado dada uaic. Nëmbo choshon ambi dada uaquin chiapaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimbo noc chuibanondash, quequin aidon ëbi chiec. ¹¹ Aden ëbi chiec onquequidën bëdamboen tantiaata. Chuinu. Ëmbi dada uacpaden mibi yacno choshon adomboembidi nabanembi caimbi.

¹² ¿Esuquidistun, Ëbi chuibeneta, caid nebi, quepecta ëbi chieshënkuido iquec? ¿Adenda Esuquidistun, Ëbi chuibeneta, caidënkuido utsi icsamboen chuipéc? ¿Esuquidistun, Ëbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquo iquebi. Esuquidistun, Ëbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. ¹³ Ëbien Nuquin Papan tantiamiacpaden chuibanquid nec. Ambi tantiamiacpaden mibitëdi chuibanquid nebi. ¹⁴ Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi. ¹⁵ Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquo iquebi. Mibëdi tabadquin ëmbi chuibanac aid tantiaquid mibitëdi yanondac. Adsho isash Esusquidistu tantiadonequidquio yampashun, quec mibi tantiec tsadëbi. ¹⁶ Esuquidistu ëmbi chuiban-chuibanac aid tantiadonequiec mibitëdi tabadsho isash Esuquidistu utsin chuibanacmanombo chuibanoaic nidendabi caombi. ¹⁷ Aden Esuquidistu chuibanac, Ëbibi bëdambo ictiapimboquid mimbi bëdambo icmiaid nebi, Papa, quequin ma Nuquin Papa Esuquidistu tantiaquidtedishun chuipapana. ¹⁸ Bëdamboen nabanombi, abibi quesho Nuquin Papan bëdamboen istiapimbo iquec. Ambî, Bëdamboen mimbi naoc, cauidi ambi bëdamboen isaidquio nec.

11

Pabado muesa icnubi muaquido

¹ Nëbi ëmbi dada uaid isash, tantiesa onquiacimboen mamëmenuequin Pabado chiec, quenquiocpashun caimbi mibi. Aden tantiatiasish, quequin abi dada uaimbi. Nëid bedash ëmbi abia dada uaondaid isec mibi onquiacpadeç nëbi nëid mimbi iste dada uaid isec onqueta. ² Nuquin Papan tantiamiacpadeç mibitëdi cudasquidquio nebi. Adeç cudasquin aton champi utsin, Bednu, cashunac utsin, Bednu, cac Bedadenda, quequin amën aton champi chiacimboen, Esuquidistun bednu caid yec icsamenuequidën, Bednu, cac, Bedadenda, caimbi. Esuquidistu ëmbi chuibanaido mibitëdi bedec choëque. ³ Ëmbi chuibanac Esuquidistu tantiauidquimbi nisi bëdambo isadachimboecquidën muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadëbi. ⁴ Adeç ëbi tsadnubi Codinto yacno choshon utsin Esuquidistu ëmbi chuiboed utsi uain chuisho badedquio tantiec aidon. Adembidi, Mayan utsi iquec, quesho tantiasish, Ëbi mene, quec mibi. Adembidi, Mibi bëdambo icmequid Esus utsi iqueque. Aid tantiaata, quequin ëmbi chiaid utsi uain chuisho, Abimbo iquec, quequin tantiec mimbi. Aden utsibon ëmbi chuiboed utsi uain chuisho tantiec, quesho tantiasish Esuquidistu tantesa uatsiasish, quec tsadëbi. ⁵ Esuquidistun ëbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bëdamboenshë utsibon chuibanacpaden Pabado chuibanenquo iquec, quesho tantiasish, Icsamboen chiombi, quetiapimbo iquebi. ⁶ Utsibon bëdamboenshë chiacpadeç Pabado onquenquo iquec, mibi quenuc Esuquidistun, Ëbi chuibeneta, quequin ambia tantiaquidën tantiamiacpadomboen mibitëdi chuibanombi bëdamboen tantiaquin.

⁷ ¿Codinto yacnocquido ma Esuquidistun bëdambo icmepanueshun chuibanequi, Bec cho, quenquo yectabi icsape? ⁸ Mibi Esuquidistu chuibanu quiash Esuquidistu tantiec iccuëdquid utsibon na ampiacimboec tabadobi. Aidon aton na meniaqui aido nashunenquo yec mibi yacno nidash tabadquin mibi nashunquin Esuquidistu chuibanondambi. ⁹ Adeç mibi yacno tabadquin Esuquidistu chuibanec bunec tsadec, Bec cho, quenquo iccondabi.

Nidaid Masedonia caid yacnoësh choquidëmbini meniondash. Aden ënden, Bec cho, mibi cainquio iccondacpadec nëbi adquecbidi tsadebi. ¹⁰ Esuquidistun chuimiaidquio nebi. Adquid icquin adquid nebi quequin chiembi mibëdi nidaid Acaya caid yacnocquid utsitedi, Padi. Aden chienda, quetiapimboconoc. ¹¹ ¿Atotsi quiashini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabodon tantiaid nec, quequin Nuquin Papan tantiec. ¹² Aden mibi tantiaquin, Bec cho, cainquiocquin Esuquidistu chuibenec nebi mimbi bëdamboenshë chuibanquid caid: Pabado nabanec tabadacpadec tabadebi, quetiapimbo icnubi.

¹³ Aido Esuquidistun ëbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. ¹⁴ Aido tantiamequin ismequid Satanas nec. Nuquin Papan abi yacnoash uaid mayan bëda aibëdi tabadquido icsaisa yacpadquid nebi, quequin abipenquiocnoc chuiquin ismequin tantiamiac ¹⁵ adquecbidi ambi namiaidtedi bëdambocquidbimboec capucededec. Cuidte ushë chonoc aido icsaid Nuquin Papan comapenen cuidquin chiendac.

Pabodon abi mëyanaid chuibanaid

¹⁶ Adembidi chuinu. Tantia. ¿Mamëmenuequin tantiesa onquiacbimboendambi ëbi icaid chuibandio? ¿Utsin aden chuibansho tantianu, quepecta mibi ictsia? Aden chuibanenquiocquin ëbi icaid chuibanuna, ¹⁷ Chuita, Nuquin Icbon cainquiocnobi. ¹⁸ Abi icaid utsin-utsinquin chuibanec, quequin tantiaquin adomboembidi ëbi icaid chuibanuna. ¹⁹ Bëdamboen tantiaquidquio nebi, qeshun mamëmenuequin ambembi chiacbimboen chuisho tantiec mimbi. ²⁰ Ambembi chiacbimboec, Yuanu, qesho tantias icsamboen tantiaquidbimboec mibi yuadete bumpec. Ambembi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquio yec tabadec mibi. Aden mitsana ambembi isash, Mibi chuiquid nebi, qesho tantias, ¿Tsuntsin mibi adquid icmiosh? quenquiocquin aidën chiacpaden nabanec mimbi. Aton yuabimboecnuc mibi mëyanahui, Min yuapenquio nebi, quenquio iquec mibi. ²¹ Nuquin Papan yua icta cac, Padi, quetsias, quequin aden mibi chuitiadquidëmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabodon abi icaid chiec, Codinto yacnocquido quetsias, quequin tantiaquin ëbi icaid chuibanu. Tantia. ²² ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Èbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembidi, Èbi Abadauanën tsyuecquid nebi, caimbi. ²³ ¿Esuquidistu chuibanquid nebi, quepecta aido iquec? Èbibi Esuquidistun ëbi chuibeneta caidquio nebi. Esuquidistu chuibanquid ëbi yacpadquid utsi nibëdec. ¿Mibi mamënsnumenuequindambi aden chuijadi? Padenquio. ¿Èbi yacpadquid utsida iqueque? Tantiata. Chuibanu. Utsi bëdiactšëc chonoadnuc comapenen chonoadobi. Adecbidi quënën nauedaid utsi icnubi quënën nauedteniaid nebi. Adecbidi utsi bëdiactšëc cuesaid icnuc yuen cuesto-cuestoaid nebi. Mëyanac nëstsenobi, utsi quenubi aden mëyanac unëstsen-unëstsemboedi nebi. ²⁴ Isadaidbon cueshanten 39ted tambanquin cacuestoniondashi. Yuecshun aitedembidi. Yuecshun aitedembidi. Yuecshun aitedembidi. Yuecshun aitedembidi yuenquio cacuestonioshi. ²⁵ Adembidi cuesten cuesoshi. Yuecshun padpiden. Yuecshun padpiden. Adembidi cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi. ²⁶ Adecbidi quenenuquio yec capucenequin Esuquidistu chuibeniombi. Adec utsi-utsec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquio yec matses nibëdacno capuceniobi. Adecbidi acte dapan capuceniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquio yec capuceniobi. ²⁷ Con na bednuec chonoadec uëshquiobi. Padpiden-padpidemboen ushenquio icquin chuibanombi. Piasac acte bunquin adembi Esuquidistu chuibanombi. Iquenquimbi chuibanombi. Dashcute icsactšëcquid dasiuidquimbi chuibanombi. Yuedenquio yaqui adembi chuibudombi. ²⁸ Èmbi chuiboe Esuquidistu tantiabenicquido icpec, quequin capucenequin chuibeniombi. Utsi yacno nidshun, Èmbi chuiboe bëpiscudnushe qeshun mibitedi chuiquin dada uaombi. ²⁹ Esuquidistu tantiaquid chieshec dayactiapimbo icpec. Adquibidi iccobi, quequin tantiec tsadebi. Esuquidistu tantiaquid icsaosh, qesho tantias unësqiuo yec, Nëbimbobi icsamianquid comapenen cuidta, Papa, quec tsadebi.

³⁰ Aidedt ëbi icaid icnuc chieshenquo yec ëbi dayacquo yaid chuiabanombi. Nëbi ëbi cuenonndaic chuinu. Tantia. ³¹ Abia Yampidën, Nuquin Icho Esuquidistun Papan nabanaid ënenquiocquin chuitequidquo iquec. Aidën nabanaid chuiabanec muesa Pabado nec, quequin ëbi cuenonndaic Nuquin Papan tantiec. ³² Ëbi cuenonndaic nad icpondashe. Chuinu. Tantiata. Damasco yacnocquido ancanquidën Adetas cuëmëdquidën Pabado Damasco yacnoësh puduensho bedta quequin shubu dadpen daquënë uaid dapa shëcuëtedi sondaco ëctabëdmepondash. ³³ Adec daquënë uaid shëcuë cuëmanquo uaid dapa tabadnubi bednushe queshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiac ancanquidën bedadiapimbo yec cuempondabi.

12

Nuquin Papan Pabado ismiaid

¹ Ëbi icaid chuiabanquin ëmbi dada uaid isbanash, Esuquidistun ëbi chuiabeneta caidquo Pabado nec, quequin Codinto yacnocquidon tantiatsiash, quequin adobamboedtedi chuiabanquin dada uaombi. Ëbi icaid chuiabanquin ëmbi dada uaid isash, Abi natiamiaid dadpen icpec, quetsiash, quenquiocquin dada uaombi. Adembidi Nuquin Papan ëbentsëqui ismiondaic chuinu. Tantia. Nad iccondashe. ² Endenquimbo seta 14ted matamequin Nuquin Papan bëdamboshë yacno indopondashi. Intacchobi abuc indopondashi, quetiapimbo iquebi. Tantienuo iquemb. Adecbidi ëmbi tantiateuidi indoac, quetiapimbo icoaibi. Tsaudi, tantienquo iquemb. Nuquin Papambien tantiec. ³ Abuc bëdamboshë yacno indopondashi, quequin abimbo chiemi. ⁴ Abucshun utsi chütemaidquo tantiapondambi. Ëmbi tantiondaic chuitiapimbo icpebi. ¿Mitsipadentsimbi ëmbi abucshun tantiaobed con onqueten chuiatsiaba? ⁵ Bëdambocquid icsho Nuquin Papan abi yacno indondashi, quetiapimbo iquebi. Natiamientequid dadpen icnuc ambo abuc nidabi yec bëdambocquid nebi, quetiapimbo iquebi. ⁶ Abuc nidshun ëmbi isonndaic chuiabanquin dada uaid isash, Bëdambocquid Pabado nec, quequin tantianushe queshun padenquin iquemb. Ëbi bëdamboec tabadsho isash, Pabado bëdamboec tabadec, quesho tantiash bëdambo ictsiabi. Adecbidi chuibansho tantiash, Abimbo chuiquidquo Pabado nec, quesho tantiash adecbidi bëdambo ictsiabi.

Satanasën natiamiaid

⁷ Bëdambocquid yansho Nuquin Papan abuc indoshon ismiondashi, quequin Pabado chuinushe queshun Satanasën chomiaidën ëbi natiameded-natiamededshe isash, Chën, quenquo Nuquin Papa iquec. Satanasën chomiaidën natiamiac pinchuquën siadaid namïn nidaëdaic chictiapimbo yachimboec con dada bëdanenquo iquec. ⁸ Adec con dada bëdantiapimbo icnubi, Ëbi natiamequid cueme, Icho, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. ⁹ Adoaquien, Padi. Bëdambocquid icmenuequin naid nec. Mibi dayacquo icmequid con Mayan mibëdi iquec, quequin Nuquin Icho chiondashi. Adoaqui, Bëdanambo icsho Nuquin Icho ëbi dayacquo icmec quequin tantiec bëdambo iquebi, quec tsadebi. ¹⁰ Aden tantiec con dada icsambo icnubi Esuquidistu chuibenec capuebi. Ëbi icsamboen chuiquin mamëshunaqui adecbidi Esuquidistu chuibenec capuebi. Utsin natiamiaqui adquecbidi Esuquidistu chuibenec capuebi. Utsin mëyanaqui adquecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquo icmiac tsadiapimboquin chuibenec capuebi.

Esuquidistu tantiabemenuen chuiabanombi quiaid

¹¹ Ëbi yacpadquid utsi nibëdec, quequin chienquioctadquidi niobi. Esuquidistu chuiabanquid utsibon chiaid tantiatequidquo iquec, queshun mibëdicquidon ëbi icsamboen chiosh quesho tantiashun Pabado Esuquidistu chuibenequid nec, quenquo utsibo iccosh, quesho tantiashun ëbi icaid chuiabanquin dada uaombi. Bëdamboen tantiacimboen chuiabanquid dadpen iquec. Aidon icsactsëcquo isadtsec, quequin ëbi chiec onquenubi Esuquidistu chuibenequidquo nebi. ¹² Natiamiaqui chieshenquiocquin Esuquidistu ëmbi chuibansho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuiabeneta caidquo Pabado nec, quequin chuitiadquidëmbi padenquo mimbi icpondac. ¹³ ¿Esuquidistu tantiec iccueddquido utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquo iccondabi. ¿Bec cho, queshoda ëbi bëdamboen mimbi tantiatsemponda? ¹⁴ Enden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquo iquendabi. Mitsana bunesa nebi. Esuquidistu tantiaquidquo ma icpanu

quequin mibēdi tabadquin chuibanendambi. Aton bacuēbo tantiaquin amēn anibēdtan ambia tantiaquid icquin tied uaic adembidi shubu uaic bacuēmpibon nabantiapimbo icnubi. ¹⁵ Adquibidi mibitedi tantiec Esuquidistubēd icquido yampec quec chonoadec tsusiobudquimbi chuibenendambi. ¿Ēmbi mibitedi comapenen tantiasho isunda mimbi ēbi tantienquo yampe? ¹⁶ Bec, cho, quenquo yec mibēdi tabadondabi. Adsho isash, ¿Piuquid bedenquo icpecta Pabado tabadash? Muaquin chuiquin bedpash icnui, quec mibi. ¹⁷ ¿Mitsipadentsimbi bedpa? ¿Ēmbi mibi yacno nidmiadonda muaquin chuiquin mitsana bedpash? Padenquo. ¹⁸ Titobēdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquo icboc. Aidbēdi abentsēc yacchimboen tantiaquidquid nebi. Aduidequi tabadquid ēbi daēdi nebi. ¹⁹ ¿Pabado ampesa nec mibi camenuendambi dada uaqin chuibampo? Padenquo. Esuquidistu tantiaquid icquin mibi aid tantiabemenuen chuibanombi. Ēmbi chuibanaid abimbo iquec, quequin Nuquin Papan tantiec. ²⁰ Mibi yacno choash ēbēdi abentsēc yacchimboen tantienquo icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibēdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bēdambo icquid ēbi icnubi utsi padenquo iquec qesho tantiamane qeshun adembidi dada uaimbi. Mimbi tantiapdenquiocquid icsho isash comapenec cuēdcuededsho tantiamane qeshun adembidi dada uaimbi. ²¹ Ai, mibi yacno choashun adquid icsho isun, Ēmbi Esuquidistu chuibanaiido nec, quequin Nuquin Papa chuitiapimbo yec natiaic bēpiuacimboc tsadmane qeshun dada uaimbi. Icsadenequidēn abi icsaid ēnabi icsho isash aido unēsacimbocquid nec, quaiush unēsquo icmane qeshun dada uaimbi. Aidon naid utsin istemaidquo nec. Ambibi ambi chudtemaid chudtedchudtedec icsambo yequi, Bēdamboquid nebi, quec muacuededec.

13

Icsaid ēnesa chuiquin cuidendambi quiaid

¹ Mibi yacno daēdec puduedashic padpidec puduedendabi. Choshon, Icsadenequid iquec, quequin daēdshun-daēdshunquien chuisho tantienquidambi. Abentsēcshun: Icsaquid iquec, quequin chuisho tantiatiapimbo iquendabi. ² Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ēnta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobēdta comapenen chuiquin cuidembi, quequin chiondambi utsitedishun tantianubi. ³ Esuquidistun tantiamiacpaden Pabado dada uaid nec, quequin ¿mitsipadentsimbi tantiape? quequid comapenec onquequin chuibanembique. Tantiapiota, caimbi. Esuquidistun nadatiambocquin nacpaden ēmbi nasho mibitedishun ispondac. Aidēn tantiamiac padpidec puduedshun adomboembidi mibi ismeoaimbi. ⁴ Aidi matesash nadatiapenquo icquidimbocsho isun cuesten declampanēdash. Adoacsho Nuquin Papan uincuemiac unēsesa yanquopanēdash. Aid tantiaquidquid icquimbi ēmbibi nadatiambocquin nabantiapimbo icpebi. Abi chuiquid Nuquin Papan icmiosi. Aidēmbi ēbēdi icquin icsadenequid comapenen chuiquin naquidbidi ēbi icmeoaindac.

⁵ Esuquidistu tantiaquid nebi, qeshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, qeshun Esuquidistu ēbēd ictiapimbo iquec, quequin tantia. Aid mibēd icnuic ambi chiaid niac-niaquenuquo mimbi iquendac. ⁶ Adecbidi, Pabado Esuquidistun ēbi chuibeneta caidta neque. Isnu, quequidēn ēbi nabanec tabadsho isun, Pabado abimbo chiosh, capashuni mimbi. ⁷ Aden tantiaquin Codinto yacnocquido bēdamboen tabadmeta, Papa, quequin chuided-chuidedembi. ¿Mibi bēdamboec tabadsho isash, Pabado chuibanaiido nec, quequin mibi isquidon chuitsiash, quequindambi Nuquin Papa chuided-chuidedpadi? Padenquo. Esuquidistun ēbi chuibeneta caid Pabado nec, quequin tantiesha utsi-utsiec icnubi, Nuquin Papan chiacpadomboen nabanquidquid Codinto yacnocquido nec, quequin utsibon chuisho tantiatiaquid iquebi. ⁸ Nuquin Papan chiaid abimbo iquec, quequin ambi chiaidquid chuibanquidquibidi nebi. Ambi chiaid utsi uain chiesa nebi. ⁹ Mibi bēdamboec tabadsho isash bēdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. ¹⁰ Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibēdsho isun comapenen chienquo icpanu quequin Esuquidistun tantiapaden

Nuquin Papan nua pausunaid ma icpanueshun chuibanec nebi. Mibi comapenen chuiti-
apimbo iquebi. ¹¹ Nēbi ēnquin dada uaimbi. Icsaisa icnu quec Nuquin Papan chiacpadec
bēdamboec tabadta. Ĕmbi dada uain chiaid isquin adobanta. Abentsēc yacbimboen
tantiaquin nabanec tabadteneta. Adec tabadsho isash tantianquidquo utsibēd bēdamboec
tabadquidquo Nuquin Papa mibēdi iquendac. Aidēnquo mibi adquidquibidi icmendac.
¹² Ĕbi isec cho cananta. ¹³ Mibi tantiec tabadebi, quec nēmbo tabadquido Nuquin Papan
bēdambo icmebanaido. ¹⁴ Nuquin Icbo Esuquidistun bēdambo icmiaido nebi, quequin
mibitedishun tantiaquiota. Adembidi, Nuquin Papan tantiaid nebi, quequin tantiaquiota.
Adembidi aton Mayan ēbēd iquec, quequin tantiaquiota.

Padi. Aidedi dada uaimbi.

CADASIA YACNOCQUIDON ISTE

Pabado tauamboen chiaid

¹ Pabado nebi. Esus chuibenquidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uncuemenëdaid Nuquin Papantsen: —Con mado Esus chuibeneta —caidquo nebi. ² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquio iquec. Adembidi tantiec nëmbo icquido Esus tantiaquidtedi: —Unësquio iquec —quiosh. ³ Mibi tantiaquin Nuquin Papa chianembi naden. —Min Mado Esuquidistubëdëtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. ⁴ Matses bëdambo icmequid Esus nec. —Ëbi tantiesabo tabadacimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiapadec abi tantiaquido cuidmenquo icnuec abided cuidadec Esus unëspac caondash. ⁵ Aidën Papa tantiaquin: —Nuquin Papa bëdamboshë iquec —canuna ënenquo icquin.

Esusuidi tantienquo yanaid

⁶ —Esus tantienquo yanosh —quequin mimbi naid chuisho tantias shubitiadquo iccobi. ¿Ëbi chonobida badedquo Esus tantienquo yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbëda tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. ⁷ ¿Aidon chiaidta bëdambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiasahun: —Abimboen cachitec —queshun mimbi Esus tantienquo yampac. ⁸ —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiasahun aidtsen: —Nuquin Papan cuidpashun —catsiambi. Utsibontsen muaquin chuisho tantiasheidtsen: —Cuidpashun —quiobi. ⁹ Tantia. Adembidi mibi chuinu. Ëmbi chuibanac mimbi Esus tantiabonondac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muauaquin chuiquido. ¹⁰ —¿Matsesën: “Mibi bëdambo iquec,” mabi canu —quequindambi aden chuibampadi? Padenquo. Nuquin Papan chiapadomboen mambi natiadquo yoc. —Bëdambo iquec —Nuquin Papa camenuen mambi chuibampaboc. Matsesën chiapadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

Esusën chiaidquo chiec nebi, quiaid

¹¹ Tantia, con utsibo. Mibitedi chuinu. —Esus tantiasho Nuquin Papan matses bëdamboen isbentsias —quequin ëmbi chuiboed amben chiaidpenquo nec. ¹² Matsesën chiaibi Esuquidistun tantiamiac ambi chiaidquo chuibanombi.

¹³ Tantia. Aden Esusën ëbi tantiamiondaid mibi chuinu. Con matses isadaidbon chiapadomboenuidi natiadquo icquin Nuquin Papa tantiesabo danquin Esus tantiaquido comapenen chieshënnquin cuesun secatiadquo icpadenebi. Ëmbi adodened ëmbi chuisho mimbi tantiondac. ¹⁴ Nuquin Papa tantiatiadquo icquin con matsesën chiaid abitedimbo natiadquo ictenebi. Èbëda tishaidon caniabon bëdiactsëc natiadquo icnubi con tsusedpabon chiaiduidi natiadquo ictenebi. Adquid icquin Esus tantiaquido comapenen chieshëndenembi. ¹⁵ Adshobini Nuquin Papan aton Mado Esus tantiamiondash. Ëbi tishabi icnubi ëbi caic: —Con Mado Esus tantiameshun bëdamboen isquin ¹⁶ Pabado: “Matses utsibo isadaidpëmbo con Mado Esus chuibeneta,” caindambi —quequin ambi chiapadomboen Esus tantiamiondashi. Adoac: —Esusën chiaid ëbi chui —quequin matses chiambo iccondambi. ¹⁷ Shubu dadpen icquid Edusaden caid yacnocquido Esusbëd icnëdaido ambia Esus chuibanëdaido chuitanambo iccondambi. Utsibo chienquo yec nidaid utsi Adabia caid yacno matses nibëdacno badedquo nidanondabi. Adashic yuec-yuecpambo ictanec auëshquo choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsëc chotsecnuc matametane Edusaden yacno Petedo isec nidanondabi. Adec nidash 15tedec ushec aibëd tabadondabi. ¹⁹ Ambobi Nuquin Icho Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo. ²⁰ Abimbo chuiquin nëid dada uaic nebi. Ëmbi aden chuibansho tantias: —Ai, abimbo caic —quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquo nidshun nidaid utsi Sidisia caid yacno istanondambi.

22 Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi. ²³ Ëmbi naid chuishouidi tantiapac caondash. —Nuquipadquid Esus tantiaquido cuesun secatiadquio icnëdaidëmbi Esus tantiabenshun Esusquio chuibeniosh —quequin ëmbi naid chuishouidi tantiapac caondash. ²⁴ Aden ëmbi naid chuisho tantias: —Nuquin Papan nac Pabado bëdambo iquec. Adomboen Pabado tantiamec Nuquin Papa bëdamboshë iquec —quepac caondash Udeya yacnocquido.

2

Edusaden yacno nidoaid

¹ Yuecash seta 14ted matamiash Edusaden yacnobidi nidoapondabi. Ëbëdi Bednabe caid nidpondash. Titotsen buanondambi. ² Adec Nuquin Papan tantiamiacpadeac ambo nidshun Esus tantiaquido chuiquid dapabo caiduidtsëqui cho-chomeshun ëmbi nabode chuibanondambi. —Ëmbi chiabi yac aidon: “Muequi neque. Pabado chuisho tantienda,” canushe —queshun naden chiondambi. —Nuquin matsespenquio isadaidpembo matses utsibo Esusquio chuibeniombi. “Esusuidi tantiasho Nuquin Papan nuqui bëdamboen istsiash,” quequin chuibeniombi. ¿Adembidida mimbi tantiae? —capondambi Esus tantiaquido chuiquid dapabo chuiquin. Ëmbi adoac: —Ai, adembidi tantiembi —quepondash aido. ³ Ëbëd icquid Tito caid isadaidpembo icshobi: —Shui dëbid dëteshune —cainquio iccondash chuiquid dapabon abi utsibon: —Adotiad —canubi. ⁴ Adec: —Shui dëbidien dëteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsëqui tantiasho Nuquin Papan nuqui bëdamboen isec,” quequin con tsusedpan chiaid niacsho tantianu —quiash ëbi yacno puduedpondash. Adec puduedshun tantiasic: —Mimbi icsamboen chiec. Nuquin tsusedpa Moisesën chiampidtedi nasho Nuquin Papan bëdamboen istsiash —quepondash. ⁵ Adec aido: —Nuquin tsusedpan chiampicpadomboenuidien nametiaid —quesho: —Padi. Mimbi icsamboen chiec —quequin aidën chiacpadomboen nainquio iccondambi. —Ma matses utsibon: “Esusënuidtsëqui Nuquin Papa ëbi bëdamboen ismec,” quequin ma Esusquio tantianu —queshun nainquio iccondambi.

⁶ Aden Esus tantiaquido chuiquid dapa caidon Esus tantiaquidën natequid utsi chienquio iccondashi. —Esus tantiabenascho isun nuquin tsusedpan chiacpadomboentsen nameta —quequin chienquio iccondashi. ¿Esusbëd icnëdaidën: —Moisesën chiaidtsen nameta —cactambi nametsemponda? Padenquio ictsenondambi. ¿Atotsi Nuquin Papan aido capec? —Esusbëd iccondaidquio neque. Bëdamboen isun —¿capenda iquec? Padenquio. ⁷ Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusën naid chuibeniac. Nuquin Papan chiacpadomboembidi Petedon nuquin matses isadaidbo Esusën naid chuibeniosh. Petedon nacpadomboen mimbi bëdamboen nac —capondashi. ⁸ —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac ⁹ —queshun bëdamboen ispondashi. —Adembidi nanuna. Mimbi isadaidpembo Esusën naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquio mibi nec —queshun chuiquid dapabon Bednabebëdta mëdimbampondashi. Nëidic Petedo. Nëidic Acobo. Nëidic Uan. Aidtedishun chuiquid dapabo icquin adondashi. ¹⁰ Nadentsen chuipondashi. —Aton na nibëdquido bëdamboen isnuna —capondashi. Adsho tantias: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash ëbi iccondacno shubu dadpen icquid Antioquiya caid yacno Petedo chopondash. Auëshquio icsashobimbi bëisquiquin chushcapondac. ¹² Abëdtan Esus tantiaquido matses utsibon codocaid pec bëdamboec tabadboedi aton pete isuidanec aidobëd cuëshëdec Petedo icsapondash. Ambo choash Esus tantiaquido con matsesëmpenquio codocaid pec bëdamboec tabadondash. Adnubien Acobon: —Ambo istan —cac con matses Moisesën chiampid tantiaquido cho-chopondash. Aido cho-chosho isash: —Moisesën chiampid niacquin matses utsin codocaid pesho chushcanushe —quec dacuëdquin isadaidpembon pete meniaid isuidampondash Petedon. Adec abëdtan Esus tantiaquido matses utsibobëd cuëshëdec icsapondash. ¹³ Adsho isash anocquido isadaidbotsen abëdtan Esus tantiaquido matses utsibobëd tabadenquio yec cuëshëdpondash. Adsho isash ëbëd icquid Bednabetsen adecbidi cuëshëdec icsapondash. ¹⁴ Adec icsaquin Esusën chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bëdamboen naoque? Tantia. Chuinu. Isadaidbo tsusedpan chiaid matses utsibo

mimbi namec. Isadaidbo icquimbi matses utsibon codocaid pec aibëdi mibi bédamboec tabadoc. Aidon piaid pec bédamboec tabadboedi nēbi aibëd mibi cuēshēdoc. Adsho isash mimbi nianaïdo: “Petedon matses isadaidbo tabadacimboec tabadshouidien Nuquin Papan nuqui bédamboen ischitotsiash,” quepec icsamboen chiec. Aden mimbi icsamboen tantiaimeque. Tantia. *¿Atotsiequin mimbi naoque? —capondambi Petedo chushcain.*

Nuquin Papan bédamboen iste chiaid

¹⁵ Naden con matses Petedo chiondambi. —“Moisesēn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaïdo nec. ¹⁶ Adquid icquin: “Moisesēn chiaiduidi naquin Nuquin Papa bédamboen ismembï,” quedenedi nēbi nuqui utsien chiec. “‘Abided cuidadaïd Esusēnuïdtsēqui Nuquin Papa ēbi bédamboen ismec,’ quequin Esus tantiaho Nuquin Papan nuqui bédamboen isec,” quequin nuqui tantiec. Adshun matses utsibobēdtambi nuqui Esus tantiaqueic. “Moisesēn chiaïd niaquesa nibēdsho isun Nuquin Papan matses abitedi bédamboen istiapimbo iquec,” quequin tantiaashun nuqui bédamboen ismequid Esus nuqui tantiabonondac —quequin Petedo chiondambi.

¹⁷ Adashic Petedobidi chui-oaic: —“Esuïdï tantiaho Nuquin Papan nuqui bédamboen istisash,” queshun Esus tantiabonondacsho nuquin matsesēn icsambo capondashi. “Nuquin tsusedpan chiapadomboen nainquïo yec mibi icsambo iquec matses utsibobimboec,” capondashi nuquin matsesēn. *¿Ada Esuquidistun matses icsambo icmepec? ¿Ambi chiapadomboen naïca nuqui icsape? Padenquïo.* ¹⁸ “Nuquin tsusedpan chiampicpadomboen nashoen Nuquin Papan nuqui bédamboen isec,” quequin nuquin matsesēn chiaïd nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaïduïdi naquin Nuquin Papa bédamboen ismembï,” queshun abi bédamboen ismequidquïo Esus tantienquïo yequini icsambo icchitotsiac. ¹⁹ Con tsusedpa Moisesēn chïactedï natiadquïo ictenebi. Adquid bédamboen iste danquin abitedi natiadquïo icquimbi abitedi nainquïo iccondambi. Adshun: “Moisesēn chïactedï ambembï matsesēn natiapimbo iquec,” queshun ëmbimbo naïd ënondambi. Nēbini Esus tantiec Nuquin Papan chiapadec tabadec. ²⁰ “Ambi con tsusedpa Moises chuïactedï nashouïdi Nuquin Papan nuqui bédamboen istisash,” quedenedi Esus tantiec adenquïo yanondabi. Nēbi ëmbi tantiaïdquïo nainquïo yec Esuquïdistubēdi cuēshēdenquïo yec bédamboec tabadebi. “Èbi tantiec ëbi cuidmenquïo icnuec abided cuidadec unēsac caondash,” quequin tantiahoeni Esusēmbi bédamboec tabadquïd icmec. ²¹ “Abided cuidadaïd con Mado Esuïdï tantiaho matses bédamboen isendambi,” quequin Nuquin Papan chuïpanēdash. Aden Nuquin Papan chiaïd niactiapimbo iquebi. Moisesēn dada uapampid ambi chiaïd niaquesa icsho Nuquin Papan bédamboen istsenac. Ambi chiaïd niaquesa nibēdec. Adquid Nuquin Papan chiaïd niaquesa icnuc: “Matses cuidmenquïo icnuec ëbided cuidadec unēsnu,” queboedi Esus padenquïo ictsempañēdash —capondambi Petedo chuïquin.

3

Nuquin Papan aton Mayan tabadmiïd

¹ Tantia. —Cadasia yacnocquido piushbimboecquin tantienquïo yanosh —quequin chuïsho tantiaashun mibitedi chuïnu. *¿Tsuntsin: —Tantienda —cac Esus tantienquïo yano? —“Cuesten dectanac abided cuidadaïd Esusēnuïdtsēqui Nuquin Papa nuqui bédamboen ismec,” quequin Esus tantiaho Nuquin Papan nuqui cuidenquïo iquec —quequin mibi chuïbanondambi. ¿Esus tantiatiapimboda ique? ² Mimbi tantiaïd ëbi chuï. Tantanu. ¿Atotsi quïash Nuquin Papan Mayan mibēdi tabadanondash? ¿Nuquin Papan ambi chiaïd Moises dada uamepampid mimbi nabanuda mibēd tabadanondash? Padenquïo. Èmbi chiondaïd Esusquïo mimbi tantiabensho isashien mibēd tabadanondash. ³ ¿Pabiate shēcuē choquïdida mibi nendac? Tantia. ¿Atotsieshun tantienquïo ique? Mibēdi tabadquin Nuquin Papan Mayanēn mibi bédamboec tabadquïd icmec. ¿Nēbi Esus tantienquïo yanecta mibi bédamboec tabadpatsia? Mibembï bédamboec tabadtiapimboen mibi iquec. ⁴ ¿Aden Nuquin Papan aton Mayan mibēdi tabadmiïd icquimbida Esus tantienquïo yano? ⁵ Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquïo. Èmbi chiondaïdquïo Esusquïo tantiaho Nuquin Papan aton Mayan mibēdi tabadmec.*

Nuquin Papa tantiaquidquïo Abadauan chiaïd

⁶ *¿Tsutsi Nuquin Papa tantiaquidquïo icpampic? Abadauan nepampic. Nuquin Papan chïac Abadauan: —Abimbo mimbi caic —quesho: —Adquid bédamboen isembï —queshun Nuquin Papan bédamboen isbempampic. ⁷ Adec Abadauan: —Nuquin Papan abimbo*

caic —quequin tantiapampicpadomboen nēbi matsesēn Esus tantiasho Nuquin Papan bēdamboen isendac ambi Abadauan ispampicpadomboen. ⁸ —Esus tantiaquido iquendac —quequin naden Nuquin Papan Abadauan chuipampic ēndenquimbo. “Abadauan, mibi unēsān yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasho bēdambo icmendambi,” quequin Nuquin Papan chiaid con tsusedpan dada uapampic. ⁹ Abi tantiaquidquio icsho ambi Abadauan bēdamboen isampicpadomboen nēbi aton Mado Esus tantiasho Nuquin Papan nuquitsen bēdamboen isec.

¹⁰ Utsiboen Nuquin Papan cuidtequido nendac. —Moisesēn chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquio icsho Nuquin Papan cuidendac. Aden ēnden Nuquin Papan chiaid dada uapampic. “Ambi chiacledi nainquio icsho Nuquin Papan cuidendac,” quepampic. ¹¹ —Ambembi Moisesēn chiampicpadomboenuidi nasho matses bēdamboen isendambi —¿quecta icpanēdash Nuquin Papa? Padenquio. Ambi chiaid niacquidoidquio icsho bēdamboen istiapimbo icquin Nuquin Papan naden chuiquin dada uamepampic. “‘Nuquin Papa ambi chiacpadomboen naquidquio nec,’ quequin abi tantiec tabadquidien Nuquin Papan bēdamboen isec,” quequin dada uamepampic. ¹² ¿Ēmbembi Moisesēn chiacledimbo nanuequidta Nuquin Papambo tantiec tabadpec? Padenquio. “Moisesēn chiacledi naquid Nuquin Papabēd tabadendac,” quequin chiampicpaden ambembi matsesēn natiapimbo iquec. Natiapimbo icsho Nuquin Papan bēdamboen istiapimbo iquec.

¹³ Aden Nuquin Papan matses abitedimbo bēdamboen istiapimbo icnuc Esuquidistu: —Ēbided cuidshun ēbi tantiaquido ma con Pan cuidenquio icnu —quiash abided cuidadec unēs spac caondash cuesten dectanac. Aidquio chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquio nec,” quequin Nuquin Papan chiaid dada uapampic. ¹⁴ Adec matses utsi-utsien abi tantiaquido cuidmenquio icnuec abided cuidadec Esus unēs spac caondash. Ēndenquimbo con tsusedpa Abadauan chiec: —Yuecshun bēdambo icmendambi —quequin Nuquin Papan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unēs spac caondash.

Abadauamba chuishun Moisesesen Nuquin Papan chiaid

¹⁵ Tantia, con utsibo. Mibitedi chuinu. Min matsesēn nadoquid. —Naden naindambi —quequin dada uashun: —“Abimbo chiaidquio nec,” ma isquidon canu —queshun abi cuēmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —queshun. Adembi ambi chiaid utsi uatiapimbo icquid icquin ¹⁶ Nuquin Papan: —Nadomboen naindambi —quequin Abadauan chuipampic. —Mibi nibēdanān yuecquimbo ictaneshun min tsyuecquid abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquio icpampic. ¹⁷ ¿Ada tantie? Ēndenquimboshē Nuquin Papan Abadauan chuiquin: —Min tsyuecquidēn matses bēdambo icmendac —capampic. Adshumbic yuecquio ictaneshun seta dadpenquio 430ted matameshun Moises utsintsen chuiquin Nuquin Papan dada uamepampic. Ambi Abadauan chiampid niaquenuio icquin Nuquin Papan ambi chiaid utsi Moises dada uamepampic. Muenquio icquin Abadauan chuipampic. ¹⁸ ¿—Ēmbi chiaid ēmbi Moises dada uamiapadomboen nashouidi mibi bēdamboen isembi —queshunda Nuquin Papan Abadauan bēdamboen isbempampic? Padenquio. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ēndenquimboshē chiampicpadomboen nēbi matses bēdambo icmequin Esus tantiaquido Nuquin Papan bēdamboen isec.

¹⁹ ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuqui tabadchitec,” quequin ma matsesēn tantianu —queshun Moises dada uamepampic. Nuquin Papan Abadauan chiampid Esuquidistu choabi icnuc adpampic. Nuquin Papan abi yacnoshon uaido mayan bēdabon Moises chuuiampampic. Adoac Moisesēn aton matses Nuquin Papan chiaid chuibampampic. ²⁰ Nuquin Papanquio Abadauan chuipampic. Abadauan caic: —Chuitan —cainquio icquin Nuquin Papanquio Abadauan chuipampic.

Matses abi icsaid tantiamete chiaid

²¹ Aden Nuquin Papan Abadauamba chuishumbic Moisesesen chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquina Nuquin Papan Moises chuipampic? Padenquio. ¿Matses bēdamboen isnuenda Nuquin

Papan ambi: —Naden nata —quequin chiaid Moises dada uamepampic? Padenquo. — Matses bēdamboen isnu —qeshun ambi chiaid Moises dada uameshun ambi chiaid niaquesa bēdamboen isun unēsascho abēdi tabadmetsiash. —Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. ²² —Ēmbi chiaid isun: “Nuquin Papan chiaid matses abitedishunquien niac-niacchitec, Mētaniac abembi mēnchiquidtiapimbo yacimboc abembi bēdambo ictiapimboen icchitec,” quequin ma matsesēn tantianu —qeshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsēqui Nuquin Papan bēdamboen isec.

²³ Esus choabi icnuc nadquo matses icpanēdash. Moisesēn chiapadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yacimboc aidēn chiapadec bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash. ²⁴ Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esutsen tantiamiac: —Esus tantiasho Nuquin Papan nuqui bēdamboen isec icsaisabimboecnuc —nuqui quendac. ²⁵ Aden tantiec: —Isadaidbo tsusedpan chiactedi nashouidi Nuquin Papan matses bēdamboen istsiash —quenquo nuqui iquec. —Esus tantiasho Nuquin Papan nuqui bēdamboen isquin bēdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec. ²⁷ Adec: —Esus tantiaquid nebi —qesho acten mentoaid yec Esuspadquo ictiadquo nuqui iquec. ²⁸ Aden Esus tantiasho Nuquin Papan nuqui bēdamboen isec. Isadaidbo yec isadaidpembo yec matses yuaido yec matses yuapenquo yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bēdamboen isec. ²⁹ Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

4

Yuabimboecquid isadaidbo yaid

¹ Tantia, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsan con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsan caniabi yec utsibon yuabimboec aton mado iquec. ² Caniabi icquin utsibon chiapadomboen naindac aton madon. Adashic aton papan chiapadec canishun aton papan na bedash yuabimboecboedi adquidpenquo yanendac. ³ Adquo yuabimboecquido con matses isadaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen tantienquo icpanēdash. —Tsusedpabon chiapadomboen Nuquin Papan: “Naden nata,” quequin chiaiduidi nanu —quiashi abembi bēdamboec tabadtiapimbo icpanēdash. ⁴ Adnubien ambi ēndenquimbo tantiampicpadēn Nuquin Papan Esus chomepanēdash. Isadaidbon chidon tishaid icquin Nuquin Papan: —Naden nata —quequin chiaid naquidquo Esus nepanēdash. ⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanēdash. Adsho isash matses cuidmenquo icnuec abided cuidadec Esus unēsac caondash. Nēbi Esus tantiasho: —Con mado mibi nec. Con champi mibi nec —quequin Nuquin Papan nuqui bēdamboen isec.

⁶ Adec: —Con bacuēbo nec —qeshun Nuquin Papan nuquibēdi Esusēn Mayan tabadmec. Adoac bacuēn amē: —Ēbi, papa —cachimboen Nuquin Papa nuqui chianec. ⁷ Esus tantiami Moisesēn dada uapampiduidi namenuequido yuabimboecquido ichoedi nēbi Esus tantiasho Nuquin Papan: —Con bacuēbo nec —nuqui capec. Aden nuqui bēdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸ Tantia. Nēbi matses utsibo mibi chuoanu. Ēnden Nuquin Papambo tanties icquin matses uaquidpenquiobi utsi mimbi tantiapandac. Papa quequin mimbi tantianēdaidēn

yuabo yec mētaniacimboecquido mibi icpanēdac. ⁹ Nēbi Nuquin Papa mimi tantiabenondac. ¿Mimbembida adonda? Padenquoio. Aidēmbi mibi tantiamepanēdash. Aidēn tantiamiaidombo icquin ¿atotsiequin aid tantienquoio yanoai? ¿Moisesēn dada uapampiduidi namenuequido tanshoda Nuquin Papan mibi bēdamboen ispec? Padenquoio. Adquid mētaniacimboecquid nec. ¿Mētaniacimboecquid icoatiadquioda ique? ¹⁰ Aden Nuquin Papa tantienquoio icquin mimi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidtsēqui nanuna. Nuquin Papan cuidnushe —quequin mimi icsamboen chiec. Mimi chiacpadomboen naquid Nuquin Papan bēdamboen iste danquin mimi icsamboen chiec. ¹¹ Mibi caic: —Adosh —quesho tantiaish shubitiadquio iquebi. —¿Ēmbi chiondaidonda Esus tantienquoio yampash? —quequin tantiac mibi unēsquio iquec.

¹² Con utsibobimboecquido mibi neque. Tantia. Mibitedi chuinu. Isadaidpembro yec mibi: —Moisesēn chiampiduidi nanu —quenquoio yacimboec yanondabi. —Ēmbemi Moisesēn chiampid naquin Nuquin Papa bēdamboen ismembimbi —quedenedi ēnēdondabi. Nēbi Esusuidi tantiaquid nebi. Ademibidi Esusuidi tantiaata.

Ēbi adsho tantiaish chieshenda. Tauamboen ēmbi Esus chuisho mimi ēbi chieshēnenquoio iccondac. ¹³ Mibi yacno tauamboec choshon daicsabudtsēcshumbi mibi Esusēn naid chuibanondambi. ¹⁴ Istiapicpambo yec daicsabudacshobi mimi ēbi cacumenquoio iccondac. Ēbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bēda choacimboecnuc mibi cuishonquiondac. Nuquin Icho Esuquidistu choacimboecnubidi mibi adondac. ¹⁵ —Min ēshē chicshun ēbi mene —ēmbi cac mimi ēbi menetsenondac. Aden ēbi mimi tantiaquiondac. Adondaiddi ¿atotsi quiaish chieshcueno? ¹⁶ ¿Nēid abimbo chuiquindambi mibi chieshēmpē? Padenquoio iquembi. ¿Aden chuisho mimbidabi chieshēmpē?

¹⁷ Ista. Esus chienquoio icquidon ambi chiacpadomboen mibi nametiadquio iquec. ¿Mibi tantiaquioquin bēdamboen namenuenda mibi chuipec? Padenquoio. Ēbi chieshēmenuembien ambi chiacpadomboen mibi nametiadquio icchitec. Mibi abibi tantiamenuen naic. ¹⁸ Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimi ēmbi chiaidquio tantiabenondac. Ēbēd icquimbi Esus bēdamboen tantiaboedombi ēbi nidtsēcubimbi mimi badedi utsi tantiac. ¹⁹ Aden mimi naid tantiac mibi unēsquio iquec. Anin bacuē tantiacimboen mibi tantiaquiembi. —Esusbimboec icpashun. Aid tantiec ambi chiacpadec bēdamboec tabadpashun —quequin mibi tantiembimbi. ²⁰ Mibēd icquin bēisquioquin mibi chuitsiambimbi. Mibēd iquenuquoio icquimbi mibi bēisquioquin chiacimboen dada uaquin mibi naden chiembi. —¿Atotsieshun Esus tantienquoio yanoao? —caimbi.

Abadauanēn mado daēd chiaid

²¹ ¿—Moisesēn chiacpadomboenuidi naquin Nuquin Papa bēdamboen ismembimbi —quequido icquinda mimi Moisesēn chiampid bēdamboen tantieque? Tantia. Mibi chuinu. ²² Naden chuiquin Moisesēn dada uapampic. Abadauanēn madombo daēd icpampic. Aton chidon yuaid chido bedshun tishmiaid abentsēc icnuc aton shanunquoio aton chidon tishaid abentsēcubidi icpampic. ²³ Abadauanēn chudac badedquio bacuē usundoshon chido yuaidēn aton mado tishpampic. Abadauanēn chidombo naido icsho: —Mimbi bacuē tishendac —quequin ambi chiacpadomboen Nuquin Papan naidopenquoio icmiac aton mado tishpampic. ²⁴⁻²⁵ Aidi Sada nepampic. Chido yuaid Acad nepampic. Aidēn tishaid yec aton mado yuabidi nepampic. Icbon chiacpadomboenuidi nepampic. Yuaidēn madobimboecquido Moisesēn dada uapampiduidi namenuequido nec. Adquobiidi Edusaden yacnocquido iquec. Esus tantienquoio yec Moisesēn chiaiduidi tantiate bunquiec. Nidaidd utsi Adabia caid yacno macuēsh dapa Sinai caidēnshun Nuquin Papan ambi chiaid Moises dada uamepampic. Aid macuēsh matses utsin Acad capec. Aden tantiaquin: —Chido yuaid Acad caidēn madobimboecquido Moisesēn dada uapampiduidi namenuequido nec —caombimbi. ²⁶ Edusaden caid utsi iquec. Nuquin Papa tabadacnombo Edusaden caoapēc. Ambo Esus tantiaquido yec nuquibi tabadendac. Yuaidēn madobimboecquido Moisesēn dada uapampiduidi namenuequidoen padenquoio iquendac. ²⁷ Nuquin Papan ambi chiaidd dada uamepampicpadec Esus tantiaquido dadpenquoio iquendac. Naden dada uamepampic.

“Tantia, chido. Naido icsho mibi chuinu.

Bacuē tishtiapimbo yequi bēdambo icta.

Bacuē paēmbi icnuc tishacmaid yequi cuishonqueta.

Bēnē choquidēn bacuē dadpen tishquidēn bacuēn tsyuecquido daēdpacktsēc yanubi

Bacuē nibēdquidēn min matses dadpenquioshē yanendac.”

quequin ambi chiaidd Nuquin Papan dada uamepampic.

²⁸ Tantia, con utsibo. Mibi chuinu. ¿Ada Nuquin Papan Abadauan chiampid tantie? — Min chido naido iccondaidën tishaid Isac cuëmédquidën tsyuequid tantiaquido bédamboen isendambi —quequin Nuquin Papan Abadauan chuipampic. Abadauan chiapadomboen aton Mado Esus tantiasho Nuquin Papan: —Con mado nec. Con champi nec —nuqui caindac. ²⁹ Ènden Nuquin Papan naidopenquo icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshëndac. ³⁰ Aden Abadauanën mado bëyucquidën aton utsi chieshënsho isun zatotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuequido dadpenquo caidmequin bédamboen tabadmembì. Yuaidën madoembì padenquo iguendac,” quequin Nuquin Papan Abadauan chiaid dada uapampic Moisesën. ³¹ Sada caidën mado Isac caidpadquid yuapenquo nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidsëqui Nuquin Papa ëbi bédamboen ismec —quequin Esusquo tantiaquid yec: —Èmbembi Moisesën chiactedi naquin Nuquin Papa bédamboen ismembì —quenquo icnuna.

5

Esus tantiasho Nuquin Papan bédamboen iste chiaid

¹ Aden: —Esusënuidsëqui Nuquin Papa ëbi bédamboen ismec —matses camenuc abided cuidadec Esus unëspac caondashe. Aidquio tantiata. Muaquidën: —Moisesën chiampic-paden nasho Nuquin Papan nuqui bédamboen istiashe. Aidën chiapaden nanuna —quequin chuisho tantienda. Aden muaquin chiapaden naic isadaidbo tsusedpan yuabimboec mibi yantsiaque.

² Mimbi isondaid Pabado nebique. Tantia. Mibitedi chuinu. Moisesën chiactedi naquid Nuquin Papan bédamboen iste danquin Esus tantienquo yanec muaquidën chiapadec shui dëbid dëteshuniadacsho isun Esusën Nuquin Papa mibi bédamboen ismetiapimbo ictsi-ashe. Adenda. ³ Aden Moisesën chiaid abentsëc natsëcshun aidën chiaid utsitedi nainquo icsho Nuquin Papan mibi bédamboen istiapimbo ictsiashë. Moisesën dada uapampiduidi namenuequido tanenda. ⁴ Aido Esus tantiesabo nec. Aden abi bédamboec ismianquid Esus tantienquo icsho Nuquin Papan aido bédamboen istiapimbo iquec. ⁵ Esus tantiaquidoen Nuquin Papan Mayanën tantiamiapaden naden tantiec. —Esus tantiashouidi ambi chiaid niac-niacacmaidimboecnuc bédamboen isquin Nuquin Papan: “Mibi bédambo iquec,” nuqui caindac —quequin nuqui tantiec. ⁶ Shui dëbid dëteshuniaiidën Esus tantiasho Nuquin Papan bédamboen isec. Adembidi shui dëbid dëtiaacmaidontsen Esus tantiasho Nuquin Papan bédamboen isoaic. Aden Esus tantiabenash: —Ambi chiapadomboen Nuquin Papan matses tantiaquid ëbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

⁷ —Bednu —quequin nadancachimboen aiduidtsëqui tantiaquin mimbi Esusquo tantiondac. ¿Tsuntsin muaquin chiac Esus tantienquo mimbi yanoape? ¿Atotsiequin abimbo chiaid niacpe? ⁸ ¿Nuquin Papan nacta Esus tantienquo yano? Padenquo. Ma aidëmbi mibi Esus tantiametiaquid yoc. ⁹ Muaquido tantienda. Nadquio aid iquec. Tosho bedquid abentsëcshun bedmebanac abitedi toshoqueuededec. Adembidi muaquid abentsëcshun chiac matses dadpenshun abimbo tantienquo yantsiashe. Muaid tantienda. ¹⁰ —Nuquin Icho Esusën tantiamiac ëmbi chiapadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiapaden shui dëbid dëteshuniaiuidtsëqui Nuquin Papan bédamboen istiashe,” queposh Pabado —quequin ¿tsundanquieni muuapac caosh? ¿Adendambi chuidio? Aden ëmbi chuisho adembidi chuiquid chieshënenquo ictsenoshi. Esus chienquo icsho ëbi chieshënenquo ictsenoshi. Abi tantiaquid cuidmenquo icnuec abided cuidadec unësaid Esusuidi chuisho mabi chieshëmpaboc. ¹² Mibi muaquin chuiquid Moisesën dada uapampiduidi namenuequido caic: —Auëshquio cuemepashun —cainbi.

Esus tantiaquido bédamboec tabadte chiaid

¹³ —Èbi cuidmenquo icnuec abided cuidadec unësaid Esusquo tantiasho Nuquin Papan ëbi bédamboen isec —camenuc Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Èbi icsate bunaid nanu —quenda. Nëbi Esus tantiaquin mibi icsate bunaid ënquin mëmunta. Esus tantiaquido yec tantiananquiecnashunanta. ¹⁴ Adomboen Nuquin Papan Moises naden chuimiapadomboen mimbi natsiac. “Mibibi min dada datantiadachimboen utsibotsen bédamboen tantiaquiota,”

quequin Nuquin Papan ambi chiaid Moises dada uamepampic.¹⁵ —Opa penantiadpambo yacbmboec nëishnanash chushcananosh —quiosh mibi caic. Aden naic mibi icsacuded-
eque. Esus tantienquoio mimbi yaneque. Bëdamboec tabadta.

Nuquin Papan Mayanën bëdamboen tabadmete

¹⁶ Nuquin Papan Mayanën tantiamiacpadomboen naic bëdamboec tabadta. Aden mibi icsate bunaid mimbi nainquoio ictsic. ¹⁷ Nuqui icsate bunaid naiqui Nuquin Papan Mayanën tantiamiacpadec bëdamboec tabadiapimbo nuqui ictsic. Nuquin Papan Mayanën tantiamiacpadomboenuc tantiaquin nuqui icsate bunaid ënquin nuqui mëmuntsiac. ¹⁸ Nuquin Papan Mayanën tantiamiacpadomboen tantiec: —Esusënuidsëqui Nuquin Papa ëbi bëdamboen ismec —qeshun: —Moisesën chiactedimbo naquin ëmbimbo Nuquin Papa bëdamboen ismemb —quequin tantienquoio nuqui iquec.

¹⁹ Nadquoio icsateuidi bunquid matses iqueque. Tanta. Chuinu. Nëidic aton chidopenquoio chudquido. Nëidic aton bënëpenquoio chudmequido. Nëidic dada daëd chichudnanquido. Nëidic opabimboec chudnante bunquin matses ismequin adoquido. Nëidic tsienbëdta shui chuibudquin icsamate bunquido. ²⁰ Nëidic Nuquin Papan chiaid niacniacquin ambi matsesbimboecnuc nacenaidi papa caquido. Nëidic nënëchoquido. Nëidic dauë icsa bedash icsa uanquido. Nëidic chieshëmënquido. Nëidic chieshëmë nec chushcananquido. Nëidic cudasquido. Nëidic nëishëmënquido. Nëidic ambi naiduidi naquido. Nëidic abitedi cuësh-cuëshëdmianquido. Nëidic: —Utsin chiaid tantiatiapimbo iquebi. Èmbentsëqui bëdamboen chiemi —quequido. ²¹ Nëidic utsin na natiambo bunec chieshëmënquido. Nëidic tantiadenuen paëmbo icquid acquido. Inchëshën ushenquoio icquin adoquido. Adquidtedishun icsamboen naic. Adec abi icsaid ëntiapimbo yec unësash Nuquin Papa yacno tabadiapimbo iquec. Aden mibi chuibanondambi ënden.

²² Padnuen Nuquin Papan Mayanën namiaid yec nadquiec tabadquid. Nuquin Papan bëdta matses tantiaquiec tabadquid. Esus tantiec cuishonquec tabadquid. —Nuquin Papan ëbi bëdamboen isec —quec bëdambo yec dacuëdenquoio yec tabadquid. Utsibon chieshënaqui chieshëmënenquoio yec tabadquid. Nëishëmënenquoio yec tabadquid. Bëdamboen isquin utsibo nashunec tabadquid. Muainquoio yec tabadquid Nuquin Papan namiaid. ²³ —Con naidi namibi. Èbiuidtsëqui bëdambo iquec —quenquoio icquin utsibo bëdamboen tantiec tabadquid. Abi icsate bunaid ënquin mëmunec tabadquid. Adquoio yec Nuquin Papan Mayanën namiaido Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquoio. —Icsamboec tabadenda —quequin icsamboec tabadquid chuipampic. Nuquin Papan Mayanën tantiamiacpadec tabadquin aden chuipampid nuqui niaquenquoio iquec. ²⁴ Adoenquoio icquin cuesten decetan abided cuidadec unësaid Esus tantiaquin nuqui icsate bunaid ënquin nuqui mëmuntsiac. ²⁵ Aden icsamboen nainquoio yec bëdambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

²⁶ —Èbiuidtsëqui bëdambo iquec —quenda. Adenquoio yec nuqui chuiquid dëniacte bunenquoio yec bëdamboec tabadnuna. —Èbi bunacpaden ëbi namianenquien ichchitec. Utsien namechitec —quec chieshëmë nec tabadenda. Nëishnanenquoio yec bëdamboec tabadnuna.

6

Esus tantiaquido bëdamboec isnante chiaid

¹ ¿Nuquin Papan Mayanën tantiamiacpadomboen bëdamboen tantiaquidta icpec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque. Bëdamboec tabadta —caquid yendac. —Nëishëc ëbitsen icsamane —qeshun nëishenquoio icquin aden chuiquid yendac. Abibi datantiadec. —Icsaquid nebi. Esus bëdamboen tantienquoio yec adecbidi icsatsiabi —quequin tantiec: —Bëdamboec tabadta —quequid yendac. ² Adec bëdamboec isanec: —Bëdamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

³ Utsien: —Utsibëd onquetiapimbo iquebi. Èbiuidtsëqui bëdambo iquebi —quec abibi muauadquid icsambo iquec. ⁴ Adenquoio yec mibibi datantiadta. —¿Nuquin Papan chiacpadectabi bëdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bëdambo icta. —Utsitedi icsambo icnubi èbiuidtsëqui bëdambo iquebi —quenda. ⁵ ¿Mimbi utsibon naid chuibanshoda Nuquin Papan: —Mibi bëdambo iquec —capatsiash? Padenquoio. Mimbi bëdamboen naid isun: —Mibi bëdambo iquec —catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷ Piacbo sequidbimboec matses iquec. Tantienquoio icquidën icbompin

uestsaidi siac canienquo ictsiash. Padnuen tantiaquidën êshê bêdaidquo siac bêdamboec canitsiash. Tantienuo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unêsash Nuquin Papa yacno nidti-apimbo iquec. Padnuen Esus tantiaquid ambi chiapadomboen naic unêsash Nuquin Papa yacno nidendac. Êbi adsho tantiash: —Icsaido Nuquin Papan cuidenquo ictsiash —quec muaic tabadenda. Ambi chiapadomboen mibi cuidendac. ⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanën tantiamiapadomboen naquidien bêdamboec tabadec unêsash Nuquin Papa yacno tabadendac. ⁹ Êmbi aden chuisho tantiash bêdamboec tabadta. Bêdamboec tabadec chieshtoenquo icsho isun ambi tantiapadën Nuquin Papan abêdi nuqui tabadmendac. ¹⁰ Adec bêdamboec tabadquin utsibo bêdamboen isquin nashununa. Aden utsibo bêdiactêc tantiec Esus tantiaquido yec tantiananquieq nashunanquionona. —Shubu abentsêquën tabadquidobimboec Esus tantiaquido iquec —qeshun adonona.

Pabadon ênquimbi chiaid

¹¹ Is. Nua-nua icnuc dada uaquin êmbimbo ênquimbi dada uanu. ¹² Muaquin chuiquidon mibi con tsusedpan chiapadomboenuidi nametiadquo iqueque. Aidon chuisho tantienda. Con matses isadaidbo: —Mibi bêdambo iquec —camenuen mibi adometiadquo iqueque. —Esusuidi chuisho con matsesën chieshênquin cuidnushê. Moisesën chiapadomboen namenu —quequin mibi shui dêbid dêteshunemetiadquo icchitec. Aido muasho tantienda. ¹³ Aden mibi: —Adota —caquidombi Moisesën chiacledi nainquien icchitec. Adquid yec: —Is. Bêdambo iquebique. Êmbi chiapadomboen nêidon naosh —quenuembien mibi shui dêbid dêteshunemetiadquo icchitec. Aidon chiapadomboen nainda. ¹⁴ Êbien adtiapimbo iquec. Esus tantiesabimboec: —Êbibi bêdambo iquebi —quetiapimbo iquebi. Esusuidtsêqui bêdambo iquec. Abi tantiaquid cuidmenquo icnuec abided cuidadec unêspac caondash cuesten dectanac. —Aidquo tantiec bêdambo iquebi —caimbi. Aden Esus tantiec: —Êmbimbo Moisesën chiacledi naquin Nuquin Papa bêdamboen ismembî —quec ênêdondabi. Adecbidi Esus tantiec êbi bunaid ênash icsate bunenquo iquebi. ¹⁵ —Moisesën chiacledi naquiduidi Nuquin Papan bêdamboen istsiash —quetiapimbo iquebi. Shui dêbid dêteshunaidêmbi Esus tantienuo icsho Nuquin Papan cuidtsiash. Adembidi shui dêbid dêtiacmaidën Esus tantienuo icshobidi cuidtsiash. Nuquin Papan Mayanën chuca uaidien Esus tantiaquid Nuquin Papan bêdamboen isquin bêdamboen tabadmec. ¹⁶ Êmbi aden chuisho tantiash: —Ai, abimbo mimbi caique. Adonona —qesho: —Aido Nuquin Papan bêdamboen isquin bêdambo icmepashun —caimbi. Adquido Nuquin Papan: —Con matsesquio nec —caindac.

¹⁷ —Abimbo chienquien icchitec —êbi cainda. Esusën chiaidquo chiombi. Aidquo tantiaquin ambi chiapadomboen nabanta. Êmbi Esusën chiapadomboen nasho isun chieshênquin cuesaniondashi. Cuesondaid bish abi iquec. ¹⁸ Tantia, con utsibo. Mibi Nuquin Papa chianembi naden. —Mimbi nabocpadomboen con Icho Esuquidistubêdta Cadasia yacnocquido bêdamboen ista, Papa —quequin Nuquin Papa chianembi. Padi. Aidedti chuiquin dada uaombi.

EPESO YACNOCQUIDON ISTE

¹ Pabado nebi. Nuquin Papa bunacpadomboen Esuquidistun, Èbi chuiheneta, caid nebi. Adquidquo icquin mibitedi Nuquin Papan bédambocquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedta.

² Aden Nuquin Papan bédambocquid icmenu caidombo icquin ma Nuquin Papan Nuquin Icho Esuquidistubédtan ènenquiocquin èbi bédamboen isec, quequin mibitedishun tantiapashun. Adembidi, Nuquin Papan bédambo icmenu caido yec abéd iquebi, quequin tantiapashun mibitedishun.

Nuquin Papan abéd abuc bédamboec tabadacpadquiocnoc icmiaid

³ Edoen, Nuquin Papa, Nuquin Icho Esuquidistun Papa bédambocquid nec. Esuquidistu adquidquibidi neoaic. Aid tantiaquid icsho abéd abuc bédamboec tabadacpadquidquo nuquitedi icmiac. Adoaid yec, Mibi bédambocquid nec, Papa, quequin chiec nuquitedi onquedenec. ⁴ Nidaid abubédta uabicquin aidénquiocquitedi uabicquin, Nèdtedquo Esuquidistu tantiaquido icsho èmbi cuèmbanaido iquendac, quequin Nuquin Papan tantiapampic. Ambi tantiampicpaden ma nuqui icsaisa icmepanuna. Aden nuqui tantiaquin ⁵ abi bunacpadomboen Nuquin Papan, Esuquidistu tantiaquido con bacuèbo icmendambi, quiampicpadomboen nèbi adobanec. ⁶ Esuquidistu tantiaquid nuqui icsho abéd icquid nuqui icmenuen Nuquin Papan abi yacpadquidquo icmebanec. Adoac, Bédambocquid mibi nec, Papa, quequin Nuquin Papa nuqui chuidenec. ⁷ Matestedi icsaid bedshunacsho Nuquin Papa cudasaidquo Esuquidistu icsambocquidbimboecnuc cuesten decantanquin unès uapanédash. Adosho isash, Nèbi Esuquidistu tantiaquid èmbi bédamboen isaidquid nec. Mibi cuidenquo yec mibi icsaid bèpiscudobi, quec Nuquin Papa. ⁸ Naden nanuna, quequin ambi tantiampicpadomboen aton bacuè icmebanac abéd icquido nuqui nec. ⁹ Abi bunacpadomboen, Icsaquid cuidte bedshunash unèsquid con Mado Esuquidistu iquendac, quequin ambi matses tantiamenquo icpampid nèbi ambi cuèmbanaido Nuquin Papan tantiamebanec. ¹⁰ Adoaid iquec con mado abun icquido nidaid yacnocquidobéd chuiquid abentsèqui iquendac, quequin Nuquin Papan tantiampicpadquioibi adquidquo icmenu caidquo Esuquidistu iquendac.

¹¹ Esuquidistu tantiaquid icsho isun ambi tantiampicpadomboen, Con bacuè icmiaido nec, quequin Nuquin Papan cuèmbanaido ¹² abia tantiaquido nuqui bédamboec tabadsho isash, Nuquin Papa bédambo iquec, quequin chiec ma utsibo cuèdèmpanuna. ¹³ Mibi icsaid bedshunash abided cuidadec Esuquidistu unèsapanédash, quequin chuibanac abi tanti-aquido mibitedi yansho isun, Esuquidistun na nec, quequin aton Mayan mibi meniaid abi iquec. ¹⁴ Aidèmbi mibi bédambo icmiac Nuquin Papabéd tabadendac. Mibitedi bédamboec tabadsho isash Nuquin Papa bédambo iquec, quequin chiec ma utsibo cuèdèmpanuna.

Nuquin Papa chiec onquianaiaid

¹⁵ ¿Bédamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abéd icte bunanec iccuededec, quequin chuisho tantiapombi. ¹⁶ Aden tantiashun mibitedi bèpiscudenquiocquin badiadquidèn-badiadquidènquien naden Nuquin Papa chian-chianembi. ¹⁷ Esuquidistun Papa, icsaisambo, tantiaquidquo mibi cadoque. Mibi bédamboen tantiaquid yacpadquiocnoc min bacuèbo Epeso yacnocquido min mayan icmeban, Papa. Adquido min Mayanèn icmiac mibi tantiadonequidombo ma icpanuna. ¹⁸ Adecbidi, Abuc èbèdi mibi iquendac, quequin mimbi chiacpaden tantiamenquin pausunac mibéd icnuequin cainquidombo Epeso yacnocquido ma icpanuna, Papa. Aidèn tantiamiac, Mibi yacno Esuquidistu tantiaquid utsibobéd bédamboec tabadendabi, quequin Epeso yacnocquidon ma tantiapanuna, Papa. ¹⁹ Aden tantiamiac Nuquin Papan nadatiambocquin nabanquin Esus unèsacsho uincuemènèdacadpaden èbi uincuemendac. Adembidi nadatiambocquin nabanquin Esus tantiaquid èbi icmiac. Adembidi èbi bédambocquid icmebanec, quequin ma Epeso yacnocquidon tantiaquiopanuna, Papa. ²⁰ Esuquidistu unès uacsho uincuemeshun mibi yacno aidi indoshon min dayunquo mimbi tsadumpanédac, quequin tantiec Nuquin Papan nadatiambocquin naidquid nec, quequin adomboembidi èbi indoapec, quequin tantiacpadomboen ma Epeso yacnocquidon tantiapanuna, Papa. ²¹ Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibèdec, quequin Esuquidistu

min dayunquo tsadunquin utsibo mimbi ismepanēdac, Adquid nebi, chuiquid utsi queti-apimbocon. Nuquin Papan nadatiambocquin nac ĕnenquocquin abitedi chuiquidquō Esuquidistu iquendac, quequin Epeso yacnocquidon ma tantiaquiopanuna. ²² Abitedishun con icbo caidquō Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquō nec. ²³ Ambi ĕndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsēcquiobi Esuquidistu icquin abēd icquido nua pausunaido yec abi yacpadquō ictequid yec abentsēc yacximboec abēdi nuqui tabadendac.

2

Nuquin Papan Esuquidistubēd icmiaido

¹ Mibi icsaquid yec Nuquin Papabēd ictiapimbo iccondac. Adboedi nēbi aidēmbi ĕnenquocquin abēd icquido mibitedi icmiac. ² ĕnden Nuquin Papa chieshēnquin mimbi tantiacpadomboen nabanondac. Adquid icsho Nuquin Papa chieshēnquid dapan Satanāsēn yuaido mibi iccondac. Aidēn Nuquin Papan chiaid niacacpadomboen mibitedishun niacbededpondac. ³ Adquiduidquō yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobēdta Nuquin Papan cuidnu caido nuquitedi icpondac. ⁴ Adec cuidnu queboedēmbi nuqui tantiec unēsquiocquin Nuquin Papan comapenen nuquitedi tantiampepondash. ⁵ Ambi cuidnu caido icsaquido yec abēd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abēd icquido Nuquin Papan nuquitedi icmiac. ⁶ Esuquidistu nuqui icsaid bedshunacsho abided cuidquin unēs uapanēdash. Unēsacsho isun uincuemeshun abi yacno Nuquin Papan indopanēdash. Adshun abi tantiaquidtedi abuc Esuquidistubēdta ambi indoacximboecquido icsho Nuquin Papan nuqui bēdamboen isec. Adecbidi abuc Esuquidistubēd icquid nendabi, quequin tantiec nuqui tabadec. ⁷ Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubēd icquido nuqui icmec. Ma adquid icsho isash utsibo, Nuquin Papan naid nec, ma quepanuna. ⁸ Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, ĕmbibi tantiembi, quetiapimbo nuqui icnubi, Mibi tantiamiomique. ĕbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abēd icquido nuqui nec. ⁹ Icsaquido icquin bēdamboen naic nuqui icsaid cuidatiapimbo nuqui iquec. Bēdamboen naic cuidadpebi, quiaish abi icsaquid yequi, Bēdamboquid nebi, quec tabadsho isun utsibon icsamboen tantianushe queshun Nuquin Papan icsaisa aton Madoded cuidpanēdash. ¹⁰ Nuquin Papan uaido nuqui nec. Aidēmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanushun.

Esuquidistubēd abentsēc yacximboecquido

¹¹ Nuquin Papan, Cuidnu, quenquiocquin comapenen tantiamiaidquō mibitedi icquin mibi ĕnden tabadaid tantiaata. Shui dēbid dētemesa isadaidpembo nec, quequin isadaidbon shui dēbid dētemequidon mibi cuēnondash. Nuquin Papan matsesquō nebi, quequin shui dēbid dētemequidquō isadaidbo nec. ¹² Adquidquō isadaidbo icnu, Nuquin Papan chomiaid choec, quequin tanties mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, ĕbi yacno yuedanquid iquendac, quequin Nuquin Papan chiaid tanties mibitedi icpondac. Adecbidi, Abēdi ĕnēdenquō yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tanties mibitedi icpondac. ¹³ Adec aid tanties yec icsaquid yec, Nuquin Papa yacno pudednu, quetiapimbochoedi, Matses icsaid bedshunash abided cuidadec Esuquidistu unēsapanēdash, quequin tantiaquid icsho aidēnquō abi yacno yuedendac. Nēbi aid tantiaquid yec abi tantiaquid utsibobēd abēdi tabadacximboecsho Nuquin Papan nuqui bēdamboen isec.

¹⁴ Isadaidpembo isash isadaidbo, ĕbēd icquidpenquō nec, quequin tantiec datamēncuenepondash. Adecbidi isadaidbo isash adquiecbidi isadaidpembo datamēncuenepondash. Adquido icboedi ĕbi icsaid bedshunash Esuquidistu unēsapanēdash, quequin isadaidbo utsin-utsinquin tantiec. Adembi isadaidpembo utsin-utsinquin aid tantiec. Adec aid tantiaquid yanash datamēncuenquō yec matses abentsēc yacximboecquido yanac. ¹⁵ Esuquidistu matsesash nidaidēn tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanēdash icsainquocquin. Adec tabadquin naimbudsho icsaquidximboecnuc unēs uapanēdash. Aden unēsmesho isec Nuquin Papa, Padi. Chēn,

quenquo icpanēdash. Ēbi yacno isadaidbo isadaidpembobēdtabi con madon yuedendac, qianash chēn quenquo icpanēdash. Datamēncueneboedi aido Esuquidistu tantiaquid yanash datamēnenquo yanac. ¹⁶ Naden nata, quequin chiaidtedi nuqui natiapimbocon nuqui icsaid bedshunash Esuquidistu unēsapanēdash, quequin tantiaquido isadaidbobēdi isadaidpembo yanac. Ambi tantiaid Esuquidistu yanash datamēncueneboedi adec datamēnu quetiapimbo yanec Esuquidistun shubun icquido yanoaic. ¹⁷ Matsesedi bēdamboen iste Nuquin Papa bunec quequin ambi chuibeniacpadec abided matses icsaid bedshunash unēsquin isadaidbo isadaidpembobēda Nuquin Papan bēdamboen isaido icmepanēdash. ¹⁸ Adoac nēid isadaidbo nec. Nēidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidēn tantiamiac, Mimbi ēbi tantiec, quec Nuquin Papa chiec Esuquidistu tantiaquidombo onquedenec.

¹⁹ Aden chiec onquec ambi yuedtiapimbo icboedi nēbi Esuquidistu tantiaquido yanash Nuquin Papan shubun ēnden icnēdaidobēd tabadtequid mibitedi iquec. ²⁰ Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquo isadeque. Chuinu. Tantia. Esuquidistu abia yampid abi yacno yuedanquidquo yec abia nitsinaid cuestas nidquidimbocquid nec. Nuquin Papan chiaid chuibampampidobēd Esuquidistun ēbi chuibeneta caido shubu nitsinaidimbocquid neoaic. ²¹ Aided abia icquid icnuc isadaidbobēd isadaidpembo Esuquidistu tantiaquid dadpen yansho Icbon tabēcshun tanebanaidimbocquido neoaic. Abi tabadte Icbopadquid icsaisa yampec. ²² Mibi Epeso yacnocquido Esuquidistu tantiaquid utsibobēd Nuquin Papan Mayan meniaid yec Nuquin Papa tabadtebidi mibi nendac.

3

Isadaidpembo Esuquidistu chuibenequid Pabado

¹ Isadaidpembobēdi ma Nuquin Papa tabadte icnu quequin Esuquidistu chuibenesho quēnēn nauedaid icquin aidēn chiacpadomboen mibi chuibanquidquo nebi.

² Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. ³ Ēbi yacno yuedanquid Esuquidistu iquec, quequin Nuquin Papan tantiamiacpaden ēnden dada uaquin mibi chiondambi. ⁴ Ēmbi dada uaondaaid bēdamboen isec onquequin Nuquin Papan ēbia Esuquidistu tantiamiacpaden mimbi tantiapec. ⁵ Ēndenquo Nuquin Papan Esuquidistu nidmēmbi, quequin chienquiocpampidēmbi nēbi ambi, Esuquidistu matses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidēmbi aton Mayanēn tantiamiac. ⁶ Ambi nēbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobēd Nuquin Papa yacno ēnēdenquo yec tabadtequido nendac.

⁷ Nuquin Papan, Cuidnu, quenquiocquin nadatiambocquin ēbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquo nebi. ⁸ Esuquidistu tantiabicquid utsi bēdiactsēc icsaquid icnubi comapenec icsaquidquo icsho Nuquin Papan Esuquidistu tantiaquid icmeshun Esus bēdambo yaidbēdtabi abēd tabadte bēdaidquo tantiamenuequid pondashi. Adembidi ambi, Esuquidistu chuibeneta, caidquo nebi. Adquid icquimbi Esuquidistun matses bēdamboen tabadmenu, quequin tantiaid dadpen icnuc aidtedi uesquin chuitiapimbo iquebi. Aidedi matsesēn bēdamboen tantiatiapimbo icoapec. ⁹ Ēbēdtambi abitedi uampidquo Esuquidistu aid tantiaquido ēbi yacno yuedquid iquendac, quequin Nuquin Papan tantiamenuequid nēbi matses tantiamenuen Esuquidistu chuibeneta caidquo nebi. ¹⁰ Aden ēbipadquid Esuquidistu chuibeneta icsaquid icboedi Esuquidistu tantiaquid dadpen yanac. Adsho isun aitedi Nuquin Papan Esuquidistubēd abentsēc yacimbocquid abipadquid ambi tantiampicpadomboen icmēbanec. Aden icmēbansho isun abi yacno tabadquin namequidon tantienquidobedēmbi nēbi tantiadec. Nuquin Papan, Yuecshun naden nanuna, quequin ambi bēdamboen tantiampicpadomboen nabanac nēbi abēd icquid dadpen iquec, quequin Nuquin Papan abi yacnoshon uaidon tantiec. ¹¹ Matses bēdambo icmetequid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icho icmepanēdash. ¹² Aton mado Esuquidistu ēbi icsaid bedshunash unēsash uincuenash Nuquin Papan dayunquo iquec, quequin tantiec dacuēdenquo yec Nuquin Papa chiec nuqui onquec. ¹³ Adecbidi, Esuquidistu chuibenesho bedshun Pabado quēnēn nauedac, quequin tantiec chieshenquiocquin Esuquidistu tantia, Epeso yacnocquido mibi caimbi. Ēmbi chuibanac Esuquidistu tantiaquid yansho Nuquin Papan abēdi tabadmenuequin Nuquin Papan ambi, Bēdamboquid icmenu, caid mibitedi neque. Chieshenda. Adembidi

Pabadon chiac ëbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

Epeso yacnocquido tantiec Nuquin Papa chiec Pabado onquiaid

¹⁴⁻¹⁵ Nuquin Papan isadaidpembo Esuquidistu chuibeneta cac, chuibenesho quënën nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiec onquebi. ¹⁶ Mibi icsaisa icquin mimbi tantiacpaden Epeso yacnocquido nua pausun, Papa, ma natiamantequid icnuc Esuquidistu tantiesa yanenquioapanuna. ¹⁷ Aden pausunac ma aido Esuquidistu tantiadonequidombo icpanuna. Aido mimbi tantiamiac ënëdenquio yec utsibëd tantiananec tabadquid ma Epeso yacnocquido icpanuna. ¹⁸ Aden pausunac, Èbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuequid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aidtedi icsaid bedshunacsho Nuquin Papan cuidpanëdash, quequin ma Epeso yacnocquidon tantiaapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquioapanuna, Papa. ¹⁹ Aden tantiaquidquio yec Esuquidistu unësnëdash, quequin tantiec papuduedash Esuquidistun matses tantiacpadquidquio Nuquin Papan ma mibitedi icmebampanuna.

²⁰ Nadquid Nuquin Papan ëbi icmetsiash, quequin nuqui tantiatiapimbofnobi nadatiambocquinc nabanquin ambi tantiacpadomboen abi yacpadquidquio nuqui icmebanendac. ²¹ Adoac ma abi tantiaquidon ënenquioquin Nuquin Papan Esuquidistubëdta naid chuibampanuna. Ma aidon tsyuequidontsen adembidi chuiopanuna. Ma nuquin tsyuequidon tsyuequidontsen adembidi chuiopanuna. Ambi uaid utsitedi naimëdec, quenubi ma adomboembidi Nuquin Papan Esuquidistubëdta naid matsesën chuibanopanuna. Ai, ma ënenquioquin adopanuna.

4

Abentsëc yachimboecquido Esuquidistu tantiaquido

¹ Nuquin Papan isadaidpembo Esuquidistu chuibeneta cac chuibenesho bedshun quënën nauedaid icquin naden mibi chiembique. Tantia. Esuquidistu tantiaquido aton shubun icquido yec Icho bëdamboec tabadacpadquiec tabadteneta. ² Utsi icsambochsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. ³ Nuquin Papan Mayanën abi utsibëd bëdamboec tabadaid tantiamiacpadquiec Esuquidistu tantiaquid utsibobëd bëdamboec tabadteneta. ⁴ Esuquidistu tantiaquidtedi abentsëc yachimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec. ⁵ Abentsëcquiobi mibitedishun con Icho caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yachimboecquid nec. ⁶ Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

⁷ Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. ⁸ Èndenquio chiampicpadembi nëbi pausumbanec. Naden ënden chiampid neque. Tantia. Chuinu.

“Nuquin Papan abucquio indoac, Èbi tantiaquidtedi ëbëdi tabadendac, quequin Esuquidistun bedbanshun buanachimboecquido aido nec.

Nadquidquio iquendac, quequin ambi tantiacpadomboen pausumbanac,”

quequin ënden chiampid nec. ⁹ “Abucquio indoac,” quequin çmitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ëbided cuidadnu, quianacsho nidaidënsnun chidon tishpanëdash. ¹⁰ Aid nidaidënsnun tishacsho unës uacsho uincuemequin Nuquin Papan aidquio abuc abi yacno indoshon abitedi chuiquidquio Esuquidistu icmepanëdash. Adquid icmiac ma ëbi tantiaquidobëd icpanueshun abipadquidquio aton Mayan aido menebanec. ¹¹ Aden aid menebanac aidënquio Esuquidistu tantiaquido utsi-utsien nadquid icmebanec: Esuquidistu chuibenequid utsi-utsien icmebanquimbi, Nuquin Papan naden nanuna, quequin chiaid chuibanquid utsi-utsien icmebanoaic. Adquid icmebanquin utsi-utsien Esuquidistu chuibenequidon, Esuquidistu chuibanta, caidbidi aido icmebanquin utsi-utsien abëd iccudedquido isbanquin chuiquin tantiamequid icmebanoaic. ¹² Bëdamboec

tabadtenequido ëbi tantiaquidtedi icmeta, cac aidën tantiacpadomboen adquido icmebanac¹³ ma shubu dapan icquid dadpen yanec abentsëc yacimboc abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

¹⁴ Ambi pausunaidquio icquin abimbo chiacimboc utsibon chuisho tantiabenicquidën badedquio tantiacpaden tantienquio nuqui iquendac. ¹⁵ Tantianec abimbo chuinanquido Esuquidistu tantiadonequido icmiac chuiquid Esuquidistupadquid yanash abëdi abentsëc yacimbocquid nuqui yanendac. ¹⁶ Ëbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yacimbocquid nuqui iquec. Esuquidistun pausunacpadomboen abentsëcshun-abentsëcshunquien nabanequi tantianquiec abi tantiaquidtedi Esuquidistupadquidquio abëdi abentsëc yacimbocquid yanendac.

Esuquidistun nua pausunacpadquiec tabadteniaid

¹⁷ Esuquidistubëd abentsëc yacimbocquid abi tantiaquidtedi iquendac, quiash, aidpadquid icnu, quec ënden icsamboec tabadnëdacadquiec tabadenda caimbi mibi. Esuquidistun ëbi chuiheneta caidquio icquin dada uaquin mibitedi aden chiemi. Esuquidistu tantiesan ambibi tantiacpadomboenuidi tantie. Adecbidi ambibi tantiacpadomboen nabanec. ¹⁸ Pashuachimboc tantienquio iquec. Nuquin Papabëd tabadte iquec, utsibo qesho tantiesha yec, Tantiatiapibi, quepec aido. ¹⁹ Icsaquid nebi, quequin badedquio chienquio aidon iquec. Adquid icsamianquidën yuaid yec, Icsanu, quiacpadec tabadec. Adec icsasho utsin istemaid nec. ²⁰ Adpenquio Esuquidistun tantiamequin pausunaid iquec. ²¹ Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiasun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash. ²² Adoac mimi tantianëdacadec tabadoaında. Mibi ënden icsamboec tabadacadquiequi mibi icsaded-icsadedondac. Icsaquid yequi, Bëdamboquid nebi, quec mibi muadenepondac. ²³ Mibi icsate bunaid ënta. ²⁴ Adsho isun ma Esuquidistun tantiacpadomboen tantiapunu qeshun Nuquin Papan Mayanën mibi nua pausunendac. Adoac adomboembidi mimi tantiapec. Adecbidi aid bunacpadquiec bunoapec. Adoaid yec mibi bëdamboquid icnuec icsaisa yanec mibi bëdamboec tabadtenendac. ²⁵ Adquid icnuec Esuquidistun shubun icquido nebi, quec muainquio yec Esuquidistu tantiaquid utsibobëd abimbo chuinanquidombo icta. ²⁶ Nëishëc icsaında. Nëishash abi ushëmbi bëdanta. ²⁷ Satanasën yuanushe quiash badedquio bëdanta. ²⁸ Ampequid icboedi Esuquidistu tantiaquid yanshun ampenda. Adquid icboedi chonoadquin mitsana bedshun utsin na nibëdsho isun menequid icta.

²⁹ Icsaquid onquiacimboc onquenda. Utsi tantiaquin bëdamboquid icmenuequin chiech onqueta ma Nuquin Papan aidtsen bëdambo icmepanu quiash. ³⁰ Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda. ³¹ Utsi icsamboen chuinu, quequin tantiaid ënta. Adecbidi comapene nëishash bëdanta. Utsi cuestiadquio yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. ³² Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacadquiec utsi icsaid bëpiscudoata.

5

¹ Nuquin Papan bacuëbo yec ² tantianec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquio icsho isun Nuquin Papan bëdamboen isaidquio Esuquidistu icpanëdash.

³ Esuquidistu tantiaquid yec, Mimi inacmaid isec chudnu, quesambo icta, dada. Adecbidi, Ëbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. ⁴ Adecbidi, Esuquidistu tantiaquid yec tsienbëdta shui icsamboen chiech onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamëshuneshambo icta. ⁵ Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequinuidi bedquid yec Nuquin Papa yacno

Esuquidistun shubun icquid ictiapimbo iquec. Aden nabanquid Nuquin Papabéd Esuquidistu con icbo nec, quetiapimbo icoaic. ⁶ Ambembi chieq onquaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. ⁷ Adquidbéd icsainda.

⁸ Ènden Esuquidistu tantiesa icquin inchèshquiocnoc isacimboben tantienquo icboedi nèbi Esuquidistu tantiaquid mibitedi yansho ambi tantiamebaniaido icquin badiadnuc isucunacimboben tantiaquiota. Aden tantiec Nuquin Papan bacuèbo yec Nuquin Papan tantiamiacpadquiec bédamboec tabadteneta. ⁹ Esuquidistun ambi tantiacpadomboen pausunac abi yacpadquiec nuqui bédamboec tabadtenendac. Adembidi aid yacpadomboen abimbo chuidenequid icta. ¹⁰ ¿Nadec tabadshodabi Nuquin Papan bédamboen istiashe? Tanu, quequin adomboen nabanec tabadteneta. ¹¹ Utsibéd icsainda. Utsi icsadenenubi mibi bédamboec tabadtenesho isun abi icsaid utsin èmpec. ¹² Icsaquidèn ompoquin naid chuitemaid nec. ¹³ Adquidèn Esuquidistu tantiaquid bédamboec tabadtenesho isun, Icsambocquid nebi, qeshun Esuquidistu tantiabempec. ¹⁴ Bédamboec tabadquin ismedeniac icsambochoedèmbi bédamboen tantiabentsiash. Esuquidistu tantiaquido chuiquin dada uaid nad iqueque. Tanti. Chuinu.

“Unèsacimboben tantienquicoledi isucunshun tantiabnacimboc bédamboec tabadta.

Adquid icsho Esuquidistun mibi nua pausunendac.”

¹⁵ Adec bédamboec tabadnuc Esuquidistun tantiamiacmaid tabadacpadec tabadenquo yec Esuquidistun tantiamiacpadquiec tabadteneta. ¹⁶ Icsaquid dadpen iqueque. Aidpadquid iquenda. Esuquidistun pausunaid mibitedi bédamboec tabadtenesho isec ma Esuquidistu tantiesa icboedi abi tantiaquid yampanuna. ¹⁷ Mimbi icsamboen tantiacpaden nabanenda. ¿Atotsi mimi èbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. ¹⁸ Icsachitomane quequin nua paèmbocquid aguenda. Aden aquec icsaindac. Icsate bunenquiocquin Nuquin Papan Mayanèn tantiamiacpadomboen nua pausunaid icquin bédamboen nabanta.

¹⁹ Adec icsate bunenquiocquin Esuquidistu tantiaquid utsibobédan Nuquin Papan chiaid chuiquinc, chuiquid dapa Dabidèn dada uampid sadmo caid utsi-utsien chuiquinc, cuèdènte utsi chuiquinc cain chieq cuèdènteneta. Adec cuèdènquin Nuquin Icbon naid chuideneta. ²⁰ Esuquidistu tantiaquid icsho Edoenèn Nuquin Papan bédambo icmiaidtedi yec aidèn naid chieq onquedeneta.

Utsi tantiaquin nashunta quiaid

²¹ Esuquidistu con icbo nec, quequin ambi chiaid niacmane qeshun utsi tantiaquin nashunta.

²² Adembidi Esuquidistun chiacpadomboen dadan inaidèn min bènèn chiacpadomboen nabanta. ²³ Adembidi abi tantiaquidtedi chuiquidquo Esuquidistu nec. Abi yacno indoshon ènèdenquo yec icsainquiocnoc tabadmendac. Adembidi aton chido chuiquidbidi aton bènè nec. ²⁴ Esuquidistun chiacpadomboen abi tantiaquidon nabanacpadomboen aton bènèn chiaid naquidquo aton chido neoaic.

²⁵ Esuquidistu abuc tabadboedi abi abuc bédamboec tabadtequid tantienquo yec unès uanushe quenquo yec matses tantiec nidaidènshun tishaid yec matses icsaid bedshunash abided cuidadec unèsapanèdash. Abuc èbèdi abentsèc yacimbocnuc tabadmenu, quec unèsapanèdash. ²⁶ Adecbidi, Èbi tantiaquido icsaisa icmenu, quiaq abided cuidadec unèsapanèdash. ²⁷ Adecbidi, icsaid nibèdquid bédaidquo abi tantiaquido icmèshun Nuquin Papa yacno yuedshun, Èmbi yuedboed min shubun ictequid nendac, quequin ismembì, quec Esus unèsapanèdash. ²⁸ Adomboembidi chido inquidèn abibi tantiadacpadomboen ma con chido tantiaquin, Bédambocquid icmenu, quequin nashundeniash ma aidbèdi bédambocquid icsho Nuquin Papa yacno Esuquidistun yuedpanuna. Aton chido tantiaquid abibi tantiaquidbidi nec. Aidbèdi abentsèc yacimbocnuc neoaic. ²⁹ Abibi chieshèmèdesa dada nec. Bunquioquin peshun aquec. Adembidi iquenquin cuète cuèc. Esuquidistun abi tantiaquid abèd icquido icsho aido tantiaquin nabanacimboben ³⁰ dadan abèd icquid aton chido icsho aidi tantiaquin nashunquid. Dadaba uashun aidèn shictodobi chichshun chido uapampic. Adoshon dadan nami aton canitebèda chido uashun daèd uac abentsèc yacimbocnuc aid daèdi yanac. ³¹ Nuquin Papan ènden dada uampid nad iqueque. Tanti. Chuinu. “Aidbèd icnu, qeshun bedash aton papa aton titabèda nianacimbocnuc daèdash aton chidobèdi abentsèc yacimbocnuc tabadtenec.” ³² Adec dada aton chidobèd daèdash abentsèc yacimbocnuc nami icmiampicpadec Esuquidistu tantiaquido aton shubun icquido abentsèc yacimbocnuc tabadendac, quequin chieq. ³³ Nèbi adomboembidi chido inquid ambi inaidbèda chuioimbique. Tantiata. Mibibi tantiadacpadomboen min chido bédamboen tantiata dadan. Con bènè èbi chuiquid nec, quequin aidèn chiaid tantiata chidon.

6

Bacuëbobëdta bacuëchoquid tantiamequin chuibanaid

¹ Bacuëbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. ² Nuquin Papan, Naden nata, quequin ambi chiaid cuënoten dada uaid Moises meniampid abentsëc nad iqueque. Tantia. Chuinu: “Ëbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: ³ “Amën anibëdttan chiacpadomboen naquid Nuquin Papan bëdambo iquebi camiaidquio iquendac. Adecbidi nidaidën yuec tabadnuequin adobanta,” quepampic.

⁴ Amën anibëdttan con bacuëbo chieshmemane qeshun bëdamboen chuiquin tantiamequin isme. Adembidi, aido pemeshun acme. Adembidi, Ëmbi chiacpadomboen ma nabampanueshun Nuquin Icbon chiaid tantiamenu, quequin adobanta.

Utsin yuaido yuaquidobidi tantiamequin chuibanaid

⁵ Yuan mimbi Esuquidistun chiacpadomboen nabanacpadomboembidi mibi yuaquidën chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiacpadomboen nabanta. ⁶ Min icbon chuishun isnuc ambi chiacpadomboen bëdamboen mimbi nabanacpadomboembidi min icbon isenquiocnoc nabanoata. Esuquidistu con Icho nec, quequin aidën chiacpadomboen nanuna, quequin nidaidënshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. ⁷ Min Icho Esuquidistun aton Papan chiacpadomboen chieshenquiocquin nacpadomboen nidaidënshun min icbon chiacpadomboen chieshenquiocquin nabanta. ⁸ Bëdamboen nabanquido yuacmaidbëdta yuabo Nuquin Papan bëdamboen cuidquin menendac, quequin tantiaquin bëdamboen nabanta.

⁹ Yuaquidon min yuabo chieshënenquiocquin bëdamboen chuibanta. Mibi cuesnu, quenquiocquin ancata. Min Icho abucquio tabadquid min yuabon Icbobidi nec. Aidën abitedi isec: Nëdic yua icsho daëdpectsëc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

Satanas cuemetequid dasiuidaid

¹⁰ Nuquin Icho nadatiambocquin nabanquid iquec, quiash aidënquio nua pausunaid icta. ¹¹ Satanac cacumetequid dasiinu, quiash, Nuquin Papa mibi nua pausunuesho, Ai, cata Satanasën mua uaquin bedchitoshe qeshun. ¹² Matses isadacpadpenquio nami intacbëd isadesa Satanasbëd icquido nec. Aidtedi Nuquin Papan abi tabadaid tédion tabadmec. Aido icsamianquido nec. Matses yuanuequid Satanac nec. Nuquin Papan uaid tantiaish bëdambo mibi iquendac, quequin muaquin aidon chiech. ¹³ Aden muaquin chuiquid aidtedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushë chonoc Satanac mibi icsamenuec choacsho bëcuniacbimboen cacumec abi mibi nidtoash Esuquidistu tantiaquid yec nidendac. ¹⁴ Aid cacumec abi nidquid icnuec Nuquin Papan abimbo chiaidquio nacrëshëdadbimboec tabadteneta. Adembidi, Nuquin Papan abi bëdamboec tabadtequid shictoncacbimboec tabadteneoata. Adec tabadec abi nidtoash mibi nidendac. ¹⁵ Adecbidi, Esuquidistu tantiaquid ëbëd icquid iquendac, quequin Nuquin Papan tantiamequin pausunaidën tapucudacbimboen adomboembidi chuibenequin Satanac cacumec nidacbimboec abi mibi nidendac. ¹⁶ Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquio dëcatemënquiash abi mibi nidendac. Aden Nuquin Papan tantiamequin pausunaidënquio dëcatemënquiash Satanasën abi tantiamenequin pian sedo-sedoacbimboen pausntemaid yec abi mibi nidendac. ¹⁷ Adecbidi, Esuquidistu tantiaquid ëmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiacbimboec tantiec tabadteneta. Aden pausunac tabadquin Satanac, Esuquidistu mibi bedec choenquio iquendac, qesho cacumiaish abi nidquin mimbi ënenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanën tantiamiaidquio icquin mimbi chuisho tantiaish Satanac cuenendac. ¹⁸ Adecbidi, Nuquin Papan chiaid aton Mayanën tantiamiaid icquin utsibo tantiaquin baded-badedquic Nuquin Papa chiech onqueta. Satanac icsamenushe quiash Esuquidistu tantiaquid utsibo Nuquin Papa chiech onquedeneta.

¹⁹ Ëbitsen tantiaquin Nuquin Papa chuioata. Dacuëdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime,

Papa, quequin ëbitsen chuioa. ²⁰ Esuquidistun chuibeneta caid icquin abi chuibenesho mêtaneshun quënën nauedaid nebi. Adoaid ëbi icnuc mimbi tantiacpaden chuibanquid Pabado icme, Papa, quequin chuioata.

Ënquin chiaid

²¹ Nëbi ëbëd icquid chiembique. Tanta. Tiquico mibi yacno nidec. Aighbidi Esuquidistu tantiaquid icsho nuqui con utsi caid nec. Nuquin Icbon chuimaidquio aidi nec. ²² Mibi yacno puduedshun ëmbi naidtedi ëbi tabadaidbëdta mibi chuibanendac. Ëbi mimbi chuisho tantiash, Bëdambo iquebi, quependac Epeso yacnocquido, quequin Tiquico mibi yacno nidmembi.

²³ Mibëd icquido Esuquidistu tantiaquid utsibobëd ma bëdamboec tabadpanuna caimbi mibitedi. Esuquidistun Nuquin Papabëdtan abi tantiamiantequidbëdta utsi tantiatequid pausunaid ma icpanuna caimbi mibitedi. ²⁴ Ënenquiocquin Nuquin Icbo tantiaquidtedi ma abipadquid icpanuna.

PIDIPOS YACNOCQUIDON ISTE

Pabadon tauamboen chiaid

¹ Esuquidistun yuambo Pabado nebi. Esusën yuabidi Timoteyo caidbêd iquebi. Aidbêd icquin shubu dadpen icquid Pidipos yacnocquido Esus tantiaquidtedi mibi chuiquin dada uaambi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. ²—Con Icho Esusbêdan Pidipos yacnocquido bêdamboen isquin bêdambo icmeta, Papa —quequin mibi Nuquin Papa chianembi.

Pabadon Nuquin Papa chianiaid

³ Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bêdamboen namiaido nec. Aden namequid yec mibi bêdambo iquec, Papa —quequin chianembi. ⁴ Aden mibi tantiaquin Nuquin Papa chiec bêdambo yec cuishonquebi. ⁵ Ênden êmbi chuibanac Esus tantiabenquin mimbi êbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nêbi adembidi êbi menete mimbi bêmeoac. Aden mimbi bêmeoaid isash mibi tantiec cuishonquebi. ⁶ Nuquin Papan tantiamiac mimbi Esus tantiabenondac. Adembidi Esus tantiaquid Nuquin Papan mibi bêdamboen tabadmec. Esus padpidec chote ushën abêdi tabadmenuen Nuquin Papan adembidi mibi bêdamboen tabadmendac. Adembidi mibi tantiec cuishonquebi. ⁷ —Êbêd tantiananquidombo nec —quiash adebi. Esus chuibenesho quênên nauedondashi. Aden quênên nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondambi. Aden chiac puduemenquio icquin abi quênên tsadunebi. Adquid icsho chieshênquio icquin mimbi êbi bêdamboen tantiec. Nuquin Papan êbi icmiacpadquid chieshtoenuio icquid icquin mimbi êbi adoe. Adsho mibitsen tantiemi. ⁸ Esusën matses tantiacpadomboen mibi tantiac usnêquio iquec. Mibi istiadquio iquebi. Êbi adsho tantiash Nuquin Papatsen: —Abimbo caic —quendac. ⁹ Aden mibi tantiaquin Nuquin Papa chianembi. —Aido bêdiactsêc tantianansho comapen tantianamequio, Papa. Adembidi mibimbo tantiaquinc Esus tantiaquinc mimbi chiaid tantiaquinc cata. ¹⁰ Aden tantiamiac: “Nadec tabadec bêdambo ictsiabi. Adec tabadenquio yec icsambo ictsiabi,” quequin bêdamboen tantienac, Papa. Aden tantiaquid yec chieshtoenuio icquin Esus tantiec bêdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. ¹¹ Adec con Icho Esus tantiec bêdamboec tabadsho isun: “Bêdamboen tabadmec Nuquin Papa bêdambo iquec,” quetsiash utsibo, Papa —quequin Nuquin Papa chianembi mibi tantiaquin.

Utsibon Esus chuibeniaid

¹² Quênên nauedac êmbi Esus chuibenetiapimbo icnubi utsibon chuibeniac utsinutsinquien Esus tantiabenac caosh. ¹³ Nêshun shubu dadpen icquid Doma yacnoshon: —Quênên nauedaid cuenushe —quequin êbi isquido sondadon: —Esusën naid chuibanasho Pabado quênên nauedac —quequin tantiec. Aidon chiac nêmbi icquido utsitedishun adembidi tantiec. ¹⁴ Quênên nauedaqui dacuêdenquio iquebi. Êbi adquo icnuc: —Pabadon nacpadomboen dacuêdenquio icquin Esusën naid chuibanembi —quepac caosh Esus tantiaquido dadpen. Adshun dacuêdboedombi dacuêdenquio yanquin Nuquin Papan chiaidquio chuibeniac caosh.

¹⁵⁻¹⁶ Aidon êbi bêdamboen tantiaquin Esusën naid chuibenec. —Pabado tantiemi. Esusën naid chuibenesho bedshun quênên nauedac aidên natiapimbo icnuc êmbiquien nanu —quequin êbi bêdamboen tantiaquin Esusën naid chuibeniac caosh. Utsibombien êbi chieshênquimbi Esusën naid chuibeniac caosh. —Quênên tsadunac ma Pabado mëyadbudchitono. ¹⁷ Aidên chuibantiapimbo icnuc êmbiquien nanu. Aden êmbentsêqui chuibanac dadpeshun tantiaashun: “Mibi bêdambo iquec,” êbi catsiash —quequin Esusquio tantienquio icquimbi Esusën naid chuibenec. ¹⁸ —Êbi chieshênec —¿quiashabi nêishpe? Padenquio. —Êbi chieshênquidon êbi bêdamboen tantiaquidobêdtambi Esusën naid chuibanac matses utsibo utsi-utsiec Esus tantiaquido yanec —quiash bêdambo yec cuishonquebi. Adecbidi cuishonquebi: ¹⁹ —Pidipos yacnocquidon Nuquin Papa êbi chianiaid caosh —quiash. —Mëyadsho Pabado chieshtomenda, Papa. Abi quênên nauedquidon puduemequin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenuio iquendabi. Adembidi aidên nac quênên tsadenquio iquendabi. ²⁰ Êmbi naondacpadomboen dacuêdenquio icquin Esusën naid chuibantiadquio iquebi. Chieshtotiapimbo iquebi. —Ma utsibon:

“Esuquidistu bēdambo iquec,” canu —quiash aduidequi iquebi unēsabi yec. Utsin: —Cuesunechitono —caqui adecbidi chieshtoenquo ictsiabi.

²¹ Unēsabi Esuquidistu tantiec bēdambo iquebi. Unēsash Esusbēd tabadequic bēdamboshē ictsiabi. ²² ¿Mitsipadtebi bumpeba? ¿Unēstedabi bumpeba? ¿Unēsenquo yec tsadtedabi bumpe? Unēsabi icquin ėm̄bi Esusēn naid chuibanac utsibon Esus tantiabentsiash. ²³ Nuquin Papa yacno nidash Esus isec bēdamboshē ictsiabi. Esus iste bunquiebi. ²⁴ Aden tantiequi: —Unēsabi yec Pidipos yacnocquido Esus tantiaquido Esus bēdamboen tantiamec ano nidtsiabi —quequin tantiec unēstiapimbo icoaibi. ²⁵ Unēsabi yec mibi yacno nidoatsiabi. Aden tantiec: —Nuquin Papan nēbi ėbi unēs uamenquo iquec —queoaiibi. Mibēd tabadquin Esusēn naid bēdamboen chuibantsiambi. Adoac bēdiactsēc Esus tantiatsēcboedombi Esus tantiaquiec mibi bēdambo ictsiac. ²⁶ Ėbi choacsho isash: —Pabado padpidec chomequid Esus bēdamboshē iquec —mibi quetsiac. Adec mibi cuishonquetsiac.

Chieshtoenda, quequin Pabodon chiaid

²⁷ Ėbi ano nidtiapimbo icnuc Esusēn chiapadec chieshtoenquo yec bēdamboec tabadta. Quēnēn ėbi nauedboedēn puduemiac mibi yacno nidshun mibi bēdamboec tabadsho isash: —Pidipos yacnocquidon ėm̄bi chiapaden naic —quetsiandabi. Nēbi mibi yacno nidtiapimbo iquebi. Adnuc mibi istanquidon: —Chieshtoenquo icquin Esus tantiec cuēshēdenquo yec Pidipos yacnocquido bēdamboec tabadosh. ²⁸ Esus chieshēnquidon: “Esusēn naid chienda. Cueschitomane,” caqui dacuēdenquo icquin Esusēn naid adembi chuibanosh —quequin mimbi naid chuisho tantiahi bēdambo ictsiabi. Adec cuisambo yec nuqui: —Nuquin Papan icmiapadec dacuēdenquo iquebi. Ėbi dacuēdenquo icmequidēn ambi chiapadomboen ėbi chieshēnquido unēsacsho icsambo icquido cuidacno nidmendac. Ambi chiapadec Esus tantiaquid yec unēsashini Nuquin Papa yacno tabadendac —quequin nuqui tantiatsiac. ²⁹ —Con Mado Esus tantiaho utsibon chieshēntsiandac —quequin Nuquin Papan tantiaquidomboen utsibon mibi chieshēnendac. ³⁰ Ėbi nacpadomboen mibi chieshēnoaic. Mimbi isnuc ėbi chieshēnondash. Adembidi ėbi chieshēnoaic nēbi. Nēid dada uaid isquin: —Pabado padpiden chieshēnoac —quequin mimbi tantiendac.

2

Utsi tantiec tabadta, quiaid

¹ Tantia, con utsibo. Mibitedi chuinu. ¿Mitsipadquio Esus tantiaquido icpec? Esuquidistu tantiaquiec dayacquio yachimboec iquec. Adecbidi Esusēn tantiaido yec bēdambo icquido nec. Adecbidi Nuquin Papan aton Mayan abēd icmequin bēdamboec tabadquid icm̄iaidobidi nendac. Adoaido matses tantiaquidombo nec. ² —Adquidibidi nebi —quec adquiecbidi bēdamboec tantianancuededta. Ėbi cuishoncamenuec adta. Abitedi: —Esusēn chiapadomboen nanuna —quecuededec chieshēnanenquo yec bēdamboec tabadta. ³ Nadec onquec tabadenda. —Ėbiuidtsēqui bēdamboshē iquec. Con nauidtsēqui nanu. Con nauidtsēqui bednu —quec mibiuidtsēqui tantiadec tabadenda. —Ėbi bēdapabi icnuc utsibo bēdamboshē iquec. Aido nashuntiaquio iquebi —quec bēdamboec tabadta. ⁴ Mimbi tantiaquidomboenuidi nainquo icquin utsin tantiaquidomboentsen nata. Mitsanauidi tantienquo icquin utsibo nashuntetsen tantiatia.

⁵ Esuquidistun nacpadomboen naid mibi bēdamboshē ictsiac. Aidēn chieshtoenquo icquin Nuquin Papan chiapadomboenuidi napanēdash.

⁶ Aton Papa Nuquin Papapadquidquio yec Esus abitedishun Icbombo nepanēdash. Aton Papabēd yec bēdamboshē icboedi: —Padi icnuna. Nuquibi namec bēdambo iquebi —quenquo yec Nuquin Papan chiapadomboen naic auēshquio chopanēdash.

⁷ Adec aton Papan yuabimboecquid yanash ambi chiapadec matsespanēdash chidon tishac.

⁸ Adashic matses yec aton Papan chiapadequi abided ciudadec unēspac caondash. Matses icsamboshē icquido cuidacimboen cuesten dectanquin icsaisambobi Esus unēs uapac caondash.

⁹ Aden ambi chiapadomboenuidi Esusēn nasho isun Nuquin Papan uincuemeshun abi yacno chomeoashun abēdi Esus tabadmepanēdash.

Aden abitedishun Icbombo icmeoapanēdash.

¹⁰⁻¹¹ —“Nuquin Icbombo Esuquidistu bēdamboshē iquec,” ma abitedi quenu —queshun aden Nuquin Papan abitedishun Icbombo Esus icmeoapanēdash.

—Ėm̄bi ėbi yacnoshon uaido mayan bēdabo yec nidaidēn tabadquido matses yec unēsacsho uincuemiaido yec quequido: “Nuquin Icho Esuquidistu bēdamboshē iquec. Abi abitedishun Icho icmeoquid Nuquin Papatsen bēdamboshē iquec,” ma quenu —queshun adopanēdash.

Utsibo Esus tantiamete chiaid

¹² Mibi tantiaquiembique. Tantia, con utsibo. Mibitedi chuinu. Esusën nacpadomboen mimbitsen bédamboen nata. Èbi mibéd icnuc mimbi nadeniondacadomboen èbi nibédnuc adembidi bédamboen nata. —Nuquin Papa dacuédampambo icquidën chiaid niacmane —quiash ambi chiacpadomboen naic aibdèdi tabadnush bédamboec tabadta. ¹³ —Ma bédamboec tabadnu —quequin Nuquin Papan ambi chiacpadec tabadte bumequin nuqui bédamboen tabadmeque. Bédamboec tabadta.

¹⁴ Adec bédamboec tabadec chushcananenda. Adecbidi: —Bédamboen nanuna —cac chieshec tabadenda. ¹⁵ —Esus tantiaquido icsambo iquec —utsibo quenush. Adenda. Nuquin Papan: —Con mado nec. Con champi nec —caido yec bédamboec tabad. Matses dadpenquo icsamboshè icnubi aдеqui bédamboec tabad. Adec bédamboec tabadquin icsambo icquido mimbi Esus bédamboen tantiametsiac paposhquiabimboecnuc. ¹⁶ Mimbi adoac utsin: —Esus tantiasho Nuquin Papan èbi bédamboen isec. Nèbi bédambo yanec unèsashini aibdèd tabadendac —quequin tantiaziash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidën padpidec chote ushën bédambo ictsiabi. —Èmbi chuibanondaido Pidipos yacnocquido ambi Esus tantiamiaidobèd choeque. Is —quec bédambo ictsiabi. ¹⁷ —“Bédambo mibi iquec,” Nuquin Papan mabi canu —qeshun Esus tantiaquin mimbi bédamboen nac. Utsibo nashunquin Esusën naid chieshtoenquo icquin mimbi chuibanac. Mimbi adoaid chuisho tantiasun: —Mibi unès uanu —caquini bédambo ictsiac. —Aido bédambo iquec —qeshun mibi tantiec bédambo yec cuishonquetsiabi. ¹⁸ Èbi unès uaid chuisho tantiash adecbidi bédambo icta. —Esus tantiec chieshtotiapimbo icsho Pabado unès uac —quiash bédambo icta.

Pabado Timoteyo chiaid

¹⁹ Con madobimboecquid èbèd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bédambo ictsiabi. ²⁰ Timoteyopadquid utsi nibèdec. Aid abentsëcshumbi èmbi nacpadomboen mibi tantiaquiec. ²¹ Utsibombien aton nauidsèqui tantiaquin Esuquidistun chiacpadomboen natiapimbo iquec. ²² —Timoteyon bédamboen naondash —quequin mimbi tantiec. Mimbi tantianubi èbèdtan Esusën naid chuibanondash con mado icbobimboecquin. Aid bédambo iquec. ²³ Adquid icsho mibi yacno: —Istan —catiadquo iquebi. Èbi quènën nauedquido èbi caic: —Unès uanu —qesho tantiabono. Tantiashun: —Èbi quènën nauedquidon chiaid Pidipos yacnocquido chuitan, Timoteyo —catsiandambi. ²⁴ Èbitsen nèbi mibi yacno nidtiadquo iquebi. Èbi caic Nuquin Icho: —Ma nidnu —quenuc anobi nidtsiabi.

Epapadodito chiaid

²⁵ Epapadodito con buchibimboecquid mimbi: —Pabado nashuntan —cac Pidipos yacnuësh chonèdaid nèmbo iquec. Utsibon chieshënubi dacuèdenquo icquin èbèdtan Esusën naid chuibanondash. Adondaiddi nèbi: —Mibi iccondacno tabadec nid, buchi —caombi. ²⁶ Aid mibi tantiec unèsquo yec tsadpish. —Èbi unèstsemboed con matses chuineuc Pidipos yacno nidaccosh —quiash mibi ismete bunquiec shubiantiadtsècquo tsadpish. Adsho isun: —Min shubuno nidec nid —caombi. ²⁷ Adec unèstsenquiondash. Adshobien Nuquin Papan bédamboen isquin bédamepondash. Èbitsen bédambo icmenuen Nuquin Papan adopondash. Epapadodito unèsquo icnuc èbi shubiec tsadsho isash: —Aid unèsan unèsquo icnuc Pabado mëyadnush —qeshun Nuquin Papan Epapadodito bédamepondash. ²⁸ Adoacsho mibi yacno aid badedquo nidmetiadquo iquebi. Aibdèd iquec mibi bédambo ictsiac. Mibi yacno nidsho isash èbitsen bédambo ictsiabi. ²⁹ Epapadodito nidacsho bédamboen ista cuishonquequin. —Nuquin Icho mibi bédamiac. Aid bédambo iquec. Mibitsen bédambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bédamboen ista. ³⁰ Esuquidistun chiacpadomboen naic èbèdi tabadec Epapadodito chondash. Chieshëmènkido dadpen icnubi èbi nashunec tabadec daicsabadash unèstsenondash. Chotiapimbo icquin mimbi: —Pabado nashuntan —cac choash nibèdantsenondash. Mibi yacno nidacsho bédamboen ista.

3*Esuidsèqui tantiasho Nuquin Papan bédamboen isaid*

¹ Nuquin Icho Esus tantiec cuishonquenuna. Aduidequi icac bédambo ictsiash. Tantia, con utsibo. —Tantienquo yanush —quequin èmbi chiondaid dada uaqin padpiden mibi chiuoanu. ² Muaquidon chuisho tantienda. Aidon: —Shui dèbid dèteshun secaidoditi

Nuquin Papan bédamboen istsiash —quequin chuisho tantienda. Aden chiec icsa uanquidombo neque. Uimanēmēnquidoen nechitec. ³ —Shui dēbid dēteshun secaid nec —žqeshunda Nuquin Papan nuqui bédamboen ispec? Padenquo. Aidon Esus tantienquo icscho bédamboen isenquo icquin aton Mado Esus tantiaquidoen Nuquin Papan bédamboen isec. Aton Mayanēn tantiamiac: —Nuquin Icho Esuquidistu bédamboshē iquec. Abided cuidadec unēsaid tantiasho Nuquin Papan nuqui bédamboen isec. Ĕmbembi naquin Nuquin Papa bédamboen ismetiapimbo iquebi —quequin nuqui tantiec. ⁴ Matsesēn tsusedpan chiaiduidi tantiasho Nuquin Papan bédamboen iste icnu nadtsiabi. —Tsusedpan chiaid utsibon daēdpactsēc nanuc Ĕmbimbo naquin dadpenquo nabanombi. Aden Ĕmbimbo dadpenquo nasho Nuquin Papan Ĕbi bédamboen isec. Adembidi isadaidbombo icscho Ĕbi bédamboen isoaic —quetsiabi. Nēbi adtiapimbo iquebi. ⁵ Isadaidb nebi. Isadaidbon chidon tishacsho sietetedec ushun Moisesēn chiampicpadomboen shui dēbid dēteshunenēdaidquo nebi. Con mates tsusedpa Benamin yampid icnu Ebedeyombo nebi. Isadaidbo caimbidi Ebedeyo capec. Adquid yec aidēn onqueten onquequid nebi. Moisesēn chiampid namequidquo padiseyobo caid niondabi. ⁶ Adquid icquin icsambo icquido danquin Esus tantiaquido cuesun secatiadquo iccondabi. Nuquin Papan chiacpadomboen natiadquo iquequi adondabi. Moisesēn chiampiduidi nate bunquiondabi.

⁷ Adquid icquin Esus tantiabi: —Ĕmbimbo naic bédamboshē iquebi —quequin icsamboen tantiapondambi. Adondaide Esus tantiabenash: —Ĕmbimbo naiquini icsambo iccō. ⁸ Nēbi con Icbombo Esuquidistu tantiec bédambo iquebi —quequin tantiabenondambi. Aiduidtsēqui tantiatiadquo icquin icsa secacimboen Ĕmbimbo naid Ĕnondambi. ⁹ Esus tantiate bunquiebi. Adquid yec: —Moisesēn chiampicpadomboen Ĕmbimbo naiquini bédambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bédamboen isquin Ĕbi bédamboen tabadmec —quequin tantiabenondambi. ¹⁰ Aden tantiabenshun Esusuidtsēqui comapenen tantiatiadquo iquebi. —Comapenen tantiaquin Nuquin Papan uincuemaiad icquin Esusēn bédamboen tabadmet-siashi —quec Esus tantiate bunquiebi. —Nuquin Papan chiacpadomboenuidi nasho mēyanac Esus unēsac caondash. Adembidi Nuquin Papan namiacpadomboen nasho mēyanac chieshtotiapimbo ictsiabi. ¹¹ Unēsambo icscho Esusēn bédamboen tabadmetsiashi. Unēsascho Nuquin Papan uincuemetsiashi —quec adec Esus tantiate bunquiebi.

Nuquin Papan chiacpadomboenuidi nate bunaid

¹² Tanta, con utsibo. Mibitedi chuinu. —Nuquin Papan chiaid niaquesambo nebi —žquectabi ique? Padenquo. Adquo ictiadquidi adquo yenquieni icchitec. —Bédamboshē icmenuen Esuquidistun yuapondashi —quequin tantiec bédamboshē icte bunquiebi. ¹³ Adec bédambo yanabi yec: —Ĕmbi naboed naic bédamboshē iquebi —quenquo icquin Esusquo tantiaquin ambi chiacpadomboen natiadquo iquebi. ¹⁴ —Bēdnu —quequin bedteuidtsēqui tantiec titinquiacimboen Esusquo tantiaquiec ambi chiacpadquiec bédambo ictiadquo iquebi. —Adec tabadec unēsascho Nuquin Papan abi yacno Ĕbi tabadmec —quec bédambo icte bunquiebi.

¹⁵ Nuquin Papan chiacpadomboen natiadquo icquin Ĕmbi chuibocpadomboen mimbi tantiatsiac. Utsien: —Padi. Pabadon chiaid abitedi nainquo icquin abentse-abentsen naindambi —quesho Nuquin Papan ambi tantiaid bédamboen tantiametsiash. ¹⁶ Nēbi nuqui icbocpadquiec tantiananquiec bédamboec tabadnuna.

¹⁷ Ĕbi yacpadquiec bédamboec tabadta. Ĕmbi chiacpadomboen utsibon nasho isun adomboembidi bédamboen nata. ¹⁸ Ĕmbi chuideniondacadpadomboen mibi padpiden chiemi shubiqimbi. Mibi yacno utsi-utsiec icsamboec tabadpec. —Abided cuidadec cuستن dectamēdaid Esus tantiaquid nebi —quetsēcboedi icsamboec tabadec. Adquido Esus tantiaquidpenquo nec. ¹⁹ Peteuidtsēqui tantiec icsambo yequi: —Bédambo iquebi —quec tabadec. Nuquin Papa tantienquo icquin nidaidēn icquiduidtsēqui tantiec. Unēsash Nuquin Papa yacno nidtiapimbo yec icsambo icquido cuidacno nidendac. ²⁰ Padnuen Nuquin Papan bédamboen isaído yec aidbēd tabadtequido nuqui nec. Abi yacno buanuec abucuešh Nuquin Icho Esuquidistu chosho isnuec nuqui tabadec. ²¹ Choshon aidēmbi nuquin dada chuca uaindac aton dada chuca uacpadomboen. Adoac unēstiapimbo icquiduidquo nuqui iquendac. Abitedishun Icbombo icquin ambi chiacpadomboen abitedi namequidquo icquin aden nuquin dada chuca uaindac.

¹ Ēbi aden chuisho tantiash Nuquin Icbon chiaid niaquenquo yec bēdamboec tabadta. Mibi tantiaquin mibi istiadquo iquebi. Mibi caic: —Ēmbi chuibanondaido Esus tantibenash bēdambo ictiadquo iccondash —quec bēdambo iquebique. Adquiec chieshtoenquo icquin Esus tantiec bēdamboec tabadta.

² Tantia. Nēbi chido daēd Ebodia caid Sintique caidbēdtatsen chuinu. Amicananenda. Esus tantiaquido yec: —Ai, Nuquin Icho Esusēn tantiacpadomboembien natiad —quec tabadta. ³ Tantia, buchi. Ēbēdtan Esus chuibanondaid icsho mibitsen chuinu. Aid chido daēd chuiquin: —Bēdamboec isnanta —cata. Utsibon chieshēnubi ēbēdtan aid daēdshun Esusēn naid chuibeniondashe. Adembidi Quedemente caidētsen ēbēdtan chuibanondash. Adembidi utsibontsen. Adquidotedi Nuquin Papan: —Esusbēdta ēbi tantiaquido mibi neque. Ēbēd tabadec cho —caindac.

⁴ —Nuquin Icho Esus tantiaquiec bēdambo yec cuishonquenuna —caimbi. Esus tantiaquiec cuishonquenuna. ⁵ —Ma utsibo: “Esus tantiaquido chieshēmēnenquo yec bēdambo iquec,” ma quenu —quiash bēdamboec tabadnuna. Nēbi Nuquin Icho Esus choeque.

⁶ Adecbidi chishpiquec tabadenda. —¿Atotsimbi napeba? ¿Atotsimbi pepeba? ¿Nēbida con matses unēspeba? —quequin uesquin tantienda. Padenquo icquin nuqui dacuēdquin tantiaidtedi Nuquin Papa chuinuna. —Ēbi nashunquin utsibotsen nashunta, Papa. Aden nashunec mibi bēdambo iquec, Papa —quequin Nuquin Papa chuinuna. ⁷ Aden nuqui chiac aidēmbi nuqui bēdambo icmec dacuēdenquo icnuc. Adoac bēdambo icnuc utsibo: —¿Mitsipadec dacuēdenquo yampash? —quetsiash. Nuquitsen: —¿Mitsipadequini bēdambo yampo? —quetsiac. Adec: —Nuquin Papan ēbi nashunquidquo nec —quequin Nuquin Papa chianequin Esus tantiaquiec nuqui dacuēdenquo yec bēdamboec tabadtsiac.

Bēdamboshē iquec, caiduidi tantiata, quiaid

⁸ Tantia, con utsibo. Nēidtsen chuinu. ¿Atotsi abimbo chiaid icpec? Adquid tantiata. ¿Atotsi bēdambo icpec? ¿Ttsutsi bēdamboec tabadquid icpec? Adquidtsen tantiata. Aden: —Bēdambo iquec —caidtedi tantiata. ⁹ Adembidi ēmbi chuisho mimbi tantiondac. Aden ēmbi chiondaid tantiaquin ēmbi naondacpadomboen nata. Adsho isash mibi dacuēdenquo icmequid Nuquin Papa mibēd iquendac.

Pidipos yacnocquidon bēmiaid

¹⁰ Nēbi mimbi bēmiaid bedash bēdambo iquebi. Ēnden mimbi aden menianiondashumbic yuectaneshun nēbi ēbi tantiaquin mimbi meneoaid bēacsho bedombi. —Nuquin Icbon tantiacpadomboen padpiden Pidipos yacnocquidon ēbi ma menuequin piucquid bēmiac —quiash bēdambo iquebi. ¿Ēbi tantienquioda mimbi ictionda? Ēbi tantiaquin ėnden bēmetiadquidi tsundan bētiambo icnuc mibi nepanēdac. ¹¹ —Con na nibēdeque. Becho —¿quectabi ique? Padenquo. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. ¹² Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi. ¹³ ¿Ēbenquiodabi adti? Padenquo. Esusēn namiaquini adquo iquec. Aidēmbi namiac ambi chiacpadomboen naimbi. ¹⁴ Adnuc: —“Mēyadec,” quioish —qeshun mimbi ēbi ma menuequin bēmiaid bēdambo iquec.

¹⁵ Min nidaid Masedonia caid yacnuēsh nidsho Esus tantiaquido shubu utsinquinidon uanocquidon menenquo iccondashi. Adnubi tauamboen menequin mimbiuidtsēqui ēbi meniondac. Esus tantiabentsēcshun mimbi adondac. ¹⁶ Adoquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibēdec,” quioish —qeshun mimbi piucquid bēmiaccondac. Yuectaneshun adembidi. Adshumbic padpiden. ¹⁷ —Mimbi bēmiaid bēdambo iqueque. Utsi becho —¿quequindambi aden chuipe? Padenquo. —Pidipos yacnocquido Esus tantiaquido bēdambo iquec —Nuquin Papa camete bunquin: —Mimbi bēmiaid bēdambo iccosh —caimbi. ¹⁸ Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiaidbēd daēdash ēbi bunaid dēniaquec con na dadpenquo yanac. —Mibi bēdambo iquec —Nuquin Papa camenuen mimbi bēmenēdac. Adsho isash Nuquin Papa: —Adquido bēdambo iquec —quependac. ¹⁹ Abitedishunquo Icho Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquo nec. ¿Ada mitsana nibēdnuc mēyadacimboec tabadpe? Adec mēyadsho isun Nuquin Papan mitsana icmendac. Unēsquo icsho aidēmbi mibi bēdambo icmendac. Adecbidi: —Chieshtotiadquo icchitebi —quesho Nuquin Papan nac mibi chieshtoenquo iquendac. —Aid nibēdnuc unēsebi —mimbi caid Nuquin Papan icmendac. ²⁰ Ēbi adsho tantiaashun: —Bēdamboshē mibi iquec, Papa —quequin Nuquin Papa chuinuna ēnenquo icquin.

Pabadon ěnquimbi chiaid

²¹ Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. ²² Adembidi němbo Doma yacnoshon Esus tantiaquido abitedishun mibi tantiec. Chuiquid dapa Sesad caiděn shubun icquido Esus tantiaquido icquin adembidi mibi tantiec. ²³ Mibi tantiaquin: —Con Icho Ěsuquidistubědtan Pidipos yacnocquido bědamboen isquin bědambo icmeta, Papa —quequin Nuquin Papa chianembi. Padi. Aidtedi chuiquin dada uaombi.

CODOSAS YACNOCQUIDON ISTE

¹ Pabado nebi. Nuquin Papa bunacpadomboen Esuquidistun ëbi chuiheneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec.

² Aidbëdtambi ënenquocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquocquin ambi bëdamocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

³⁻⁴ Nuquin Papa, Nuquin Icho Esuquidistun Papa chiec naded onquebi. Bëdamocquid icquin mibipadquiocnoc Codosas yacnocquido Esuquidistu tantiaquido bëdamocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. ⁵ Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. ⁶ Ëbi icsaid cuidtiadtsëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquin Esuquidistu tantiaquid yanshun abi bëdamboec tabadaid ademibidi ismebanoaic. Adoac nidaid utsin-utsinquec tabadquidon Esuquidistu tantiashun adomboembidi ismebanoaic. ⁷ Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. ⁸ Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

⁹ Aden Epapadasën chiac mibi tantiec baded-badedquiec Nuquin Papa chiec onquian-onquianebe. Mimbi tantiacpadomboen min Mayanën pausunacsho Codosas yacnocquido bëdamboen tantiambe, Papa, quequin chian-chianembi. ¹⁰ Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bëdamboec tabadec. Adecc Codosas yacnocquido tabadsho isash, Bëdambo iquebi, ma Esuquidistu quepanuna. Adecc bëdamboec tabadquin nabanquidquio utsi iquendac. Adecc tabadquido mibi tantiadonequido yanendac, Papa. ¹¹ Ademibidi mimbi dayacquo icmenu caid Codosas yacnocquido iquec natiatquid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa. ¹² Mimbi bëdamocquid icmebanac icsaquid nibëdacno mibi tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

¹³ Ënden adquidpenquio yec Satanasën yuaido yec, Nuquin Papa tantianu, quesu nuqui iccondac. Aidën yuaido icsho Nuquin Papan nuqui mënichpondash. Aden nuqui mënichquin abi cudasaquido aton Madombo Esuquidistu icsaisapadquid nuqui icmenuquin aidi Nuquin Papan nuqui tantiambepondash. ¹⁴ Abipadquid icmenuc matses icsaid bedshunash abided cuidadec unëspanëdash. Adoacsho Esuquidistu tantiaquid icsho cuidenquio yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

Abia yampidquio iquec abitedishun icombo Esuquidistu nec quiaid

¹⁵ Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquin utsi abitedi ambi uaid nec. Ambi uaidtedi aton na nec. Aidon icho Esuquidistu nec. ¹⁶ Nidaid abubëdtabi uashun aidënenquocquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquio nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icho nebi, quepec. Adecbidi matses queoaindac. Aidotedi Esuquidistun uaido nec. Aidotedishun icho Esuquidistu nec. ¹⁷ Esuquidistu abia yampidquio iquec. Aidëmbi, Ëmbi uabanaido namebanu, quequin ambi chiacpadomboen namebanec. ¹⁸ Nidaid utsi-utsiec

yacnocquido abi tantiec iccuededquidtedi chuiquidquio Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unēsspanēdash. Adsho Nuquin Papan abia uincuemeshun abi tantiaquidtedi chuiquid abentsēcquiobi abipadquid icmepanēdash. ¹⁹ Utsi abipadquid ictiapimbo iquec. Aidēn nabanacpaden natiapimbo utsi iquec. Ēbipadquidquid con mado nec, quiash, Bēdambo iquebi, quec Nuquin Papa tsadec. ²⁰ Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ēbided cuidadec unēspebi, abi quiampicpaden matsesēn cuesten dectanac unēsspanēdash. Adoacsho isun ambi bēdamboen istiapimbochoedi Esuquidistu tantiaquid yansho isun aidtedi Nuquin Papan bēdamboen isec.

²¹ Ēnden Nuquin Papan matsespenquio mibitedi iccondac. Icsamboen tantiec icsaquid yec Nuquin Papa chieshēnquido mibitedi iccondac. ²² Adquid icboedi, Ēbi yacno yuednu qeshun Esuquidistu tantiaquidotedi cuidenquio yec abi icsaid bēpiscudquid Esuquidistu icsaisapadquiocnoc aido isembi, quec Nuquin Papa tsadec. ²³ Ēnenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ēnenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

Esuquidistu tantiadoneta, quequin Pabadon chuibanaid

²⁴ Ēbi tantiaquid Nuquin Papan bēdamboen isendac. Aden isac, Ēbēd icquido iquen-dac, quequin Esuquidistun ambia chuibansho matsesēn mēyampanēdash. Adomboembidi Esuquidistu chuibansho mēyamposhi. Adoaqui, Cuishon, quebi. Ēnden abi tantiaquid yanacsho isun, Ēbi chuibeneta, quequin chuishumbic, Ēbi chuibansho mibi mēyante dadpen iquendac, quequin Esuquidistun chuioapondashi. Aden aidēn chiondacpaden mēyanaid nebi. Ma abi tantiaquid dadpen yanu quequin chuibenembi ambi tantiatedi mēyante yanuc. ²⁵ Ai, Nuquin Papan, Esuquidistu ambi naiddēta chuibeneta, caidquio nebi. Abi chuiquidquio nebi. ²⁶ Nuquin Papan ambi tantiampicpaden chienquicochoed nēbi aid tantiamiac Esuquidistu tantiaquido yanec. ²⁷ Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ēbi yacno ēbēdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

²⁸ Aden ēbēdan ēbipadquidon Esuquidistu chuibeniāc Esuquidistu tantiaquid yansho isash, Esuquidistu tantiec bēdamboec tabadteneta, quequin Nuquin Papan chiacpadom-boen chuibenec nebi ma abi yacno chosho adquidquio Nuquin Papan yuedpanu qeshun. ²⁹ Badiadquidēn-badiadquidēnquien aton Mayanēn nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

2

¹ Aden dayacquiocquin Nuquin Papa chuiquin mibitedi tantiembi. Adembidi chuiban-quin Daudiseya yacnocquido tantiembi. Adembidi utsi-utsiec yacno iccuededquido ēbi isacmaidobi Nuquin Papa chuiquin tantiembi. ²⁻³ Esuquidistu tantiadonequido ma yampaneshun dayacquiocquin chuibenec nebi. Abentsēc yacnimboec tantiananquidquio ma yampaneshun dayacquiocquin chuibenec nebi. Adquidquio yanshun utsin abimbo chuisho tantiaash, Abimbo chuiquid nec, quequin ma bēdamboen tantiananuna. Adembidi, abimbo chiacimboen chuisho tantiaashun, Icsamboen chiec, quequin ma tantiaquiopana. Nuquin Papan tantiamenquicochoed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. ⁴ Comapenen tantiaquid icquin, Utsi tantiata, quequin Esuquidistu-penquio chuisho ma tantienquio mibitedishun icpanu, quequin aden mibi tantiaquin chiec nebi. ⁵ Mibēd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ēnēdenquio yec iccuededquin aiduidtsēqui tantiadonec, quequin mibi yacnoēsh choquidon chuisho tantiaash bēdambo iquebi.

Esuquidistu tantiaquid iquec utsin chiacpaden naic abuc nidendabi, quequin tantienda.

⁶ Adecbidi Esuquidistu tantiaquid yec abēd icquido iquec, Aidi con Icho nec, quec ambi chiacpadquieq tabadteneta. ⁷ Adec tabadquin cuēte tapun uquēducquiocquidēn cuēte uidēnash canidoacimboen Esuquidistu tantiaquid icquin tantiadonequiota. Aden Esuquidistu chuiquin ēbipadquidon mibitedi chuipondash. Aid tantiadonequid icquin, Mibi tantiaquieq bēdambo iquebi, quequin baded-badedquien Esuquidistu chuidoneta.

⁸ Adembidi aid tantiadonequid icquin aid tantiesan êndenquio ambembi chiec onquiampic-paden nèbi icquidên adomboembidi chuisho Nuquin Papan chiacpadomboen chiesa nec, quequin tantiaquiota.

⁹ Matsesash Nuquin Papapadquidquibidi Esuquidistu icpanêdash. ¹⁰ Esuquidistubêd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibêd icquid Esuquidistu nec. ¹¹ Aidên, Êbêd icquid nec, quequin mimbi tantiaid icsa cuête cuidi pateshuniacimboen mibi êmebanec. Chêshsten tiacimboen nainquiocquin bêdamboen fantiamequin aton Mayanên mibi icsaid êmendac. ¹² Adembidi Esuquidistu unêsascho chococacimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincuenêdacimboecnuc icsaisa icmenu, quequin acten mentotanquin mibitedi cadobampondash.

¹³ Ênden Nuquin Papan matsespenquio icquin mimbi tantiaid icsa icnuc unêsacimboec icquin Nuquin Papan ênden, Naden nata, quequin chiaid tantienquiocquin niacquido mibitedi iccondac. Adquid ichoedi Esuquidistu tantiaquid icsho isash, Con madobêd icquido nec, quec Nuquin Papa nuqui icsaidtedi bêpiscudac. ¹⁴ Ênden, Matses icsaid bêpiscudnu, quenquiocquin, êmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanêdash. Adquid icshobi icsaquidimboecnuc matsesên unês uaquin cuستن dectanac matses icsaidtedi bedshunash abibi ciudadec unêsapanêdash. Aid unêsô isun, Matses icsaid cuidosh, quequin abi tantiaquidquio icsaid ambi naden nata quequin dada uamiaid ucacimboen tantiec bêpiscudtenec Nuquin Papa. ¹⁵ Esuquidistuidi Nuquin Papan naden nata quequin chiaid niaquesa yec matses icsaid bedshunash abided ciudadec unêsash uincuenquin Nuquin Papan chiaid niacquido mayan icsabo dêniaquec Esuquidistu abitedi chuiquid yampanêdash. Aden dêniaschun, Nêidtedi êbi tantiaquido chuiquid ictiapimbo iquec, quequin bedshun mêtaneshun buanacimboen Nuquin Papa Esuquidistun ismepanêdash.

¹⁶ Aden chuiquid utsitedi dêniasquid Esuquidistu nec, quequin tantiash, Nadquid peshun nadquid utsi acsho Nuquin Papan êbi bêdamboen isec, quenda. Adembidi, Nêid ushêmbi abi tantiec iccuededsho isun Nuquin Papan êbi bêdamboen isec, quenda. Adembidi, ushê chuca choaid usudsho isec cuêdênsho Nuquin Papan êbi bêdamboen isendac, quequin tantienda. Esuquidistuidi tantiaquidquio icsho Nuquin Papan êbi bêdamboen isec, quequin tantiata. ¹⁷ Matses icsaquid yec ambi naidênquio abembi bêdantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Êmbi bêdamboen isaidquio matses bêdambo icmequid choendac, quequin tantiaquin ambi naden nata quequin chiaidba Moises menepampic. ¹⁸ Esuquidistun bêdambo icmiaid nebi, qeshun utsi icsamboen chiec onqesho tantienda. Ambibi chiec onqesho tantiashun Esuquidistu tantesa uaindac. Adquidbêd Esuquidistu ictiapimbo iquendac. Adquidên, Mibi chuiquidpenquio nebi, qeshumbic ambia tantiaquidimboecquin ambi tantiaid Nuquin Papan uaid mayan bêda mibi tantiamenuequin chuibansho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tantia, quequin ambembi chiec onqesho tantienda. ¹⁹ Adquidên Esuquidistu abi tantiaquidon icbombo nec, quequin tantienquio iquec. Adecbidi Nuquin Papan tantiacpadquiec Esuquidistu tantiaquid dadpen yanash aton utsibobêd tantiananec nashunanec aton icbopadquid yanec, quequin tantiesa adquid nendac.

²⁰ Tantienu. Êbi chui. ¿Atotsi quiash Esuquidistu tantiaquid yanash êbi icsaid cuidnuec Esuquidistued unêsash uincuenacimboec bêdamboec tabadebi, qeshumbic, ²¹ Nêid bedtemaid nec. Aid bedsho mayanên mibi cuidendac, quequin utsi chuisho mimbi tanti-ape? Adembidi ¿atotsieshun mimbi tantiaid icsa unêsascho chococabi yacimboen, Nêid petemaid nec. Aid pesho mibi cuidendac, qesho mimbi tanti-ape? Aden Esuquidistu tantienquio icquidêmbimboen, Nêid mishtemaid nec. Aid misho mibi cuidendac, qesho mimbi tantiapec. ²² Nadquid petemaid nec. Nadquid mishtemaid nec, quequin matsesên ambibi chuiquin tantiamete nec. Ambi petemaidbêdi ambi mishtemaid ênêndac. ²³ Matsesên bêdamboen tantiacimboen chiaid aitedi nec. Nêid êmbi tantiaid nec, qeshun aid bêdamboen ismenuen naden nanuna, quequin matsesên chiec. Aden ambibi tantiashun, Naden nata, quequin mibi chuitiapimbo iquebi, qeshumbic namenuequin comapenen adquidên chuibanec. Adecbidi, Damêyamêdsho êmbi tantiaidên êbi bêdamboen istsiash, quequin ambibi tantiash damêyamêdec. Adec damêyamê-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

3

Bêdamboec tabadaid chiaid

¹ Esuquidistu tantiaquid yec abia uincumenêdac abuc nidash Nuquin Papa yacno icsate bunquid nibêdacno tabadacpadquiec tabadteneta. Adec tabadec, Nuquin Papan dayunquo Esuquidistu tsadec bêdambo iquec, quequin abêd icte bunquin Esuquidistu tantiadonec tabadta. ² Abuc abêdi êbi icnuc aton na con na iquendac, quequin tantiaquin nidaidênshun bednu, quequinuidi tantienda. ³ Esuquidistu unêsaid tantiaquin aidbêdtabi mibi icsaid chococashunacimboec icsatiapimbo yec nidaidên tabadta. Adecbidi Esuquidistu uincuenash abuc Nuquin Papa yacno nidash, Êbi tantiaquidtedi bêdaidquio iquec. Aido êbi cudasaidquo nec, quequin aidên dayun uaid nuqui nec. ⁴ Aidên padpidec choshon abi yacno buanac abipadquidquo bêdaidquio nuqui iquendac.

⁵ Adec abi yacnoêsh abêdi bêdaidquio iquendabi, quequin mibi icsaidtedi cuesun se-cacimboen êmbanta. Êmbi inacmaid chudnu, quenquiocquin ênta dadan. Adembidi, Êbi inesa chudmenu, quenquiocquin ênta chidon. Adembidi, Chudnu, quequinuidi tantiaid ênta dadan. Adembidi, Chudmenu, quequinuidi tantiaid ênta chidon. Adembidi mibi bunaid icsatedi ênta. Adembidi aton na daêdpectsêc icquidêmba ma bednu, quenquiocquin, Êmbia bednu, quequin tantiaid ênta. Aden ênshun, aton na daêdpectsêc icquidêmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesên ambibi nacnenaid tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatipimbo iquec. ⁶ Abi bunaid icsabêdta ambi tantiaid icsa ênesa icscho matsesên naid chuibante ushê choan adquidtedi Nuquin Papan comapenen cuidendac. ⁷ Adquid icboedi ⁸ nêbi adenquiocquin ênash bêdamboec tabadteneta. Adecbidi comapenec nêishboedi adenda. Adecbidi, cuesanti-adquo yec nêishboedi adenda. Adembidi, utsi icsambo icmeboedêmbi adoenda. Adecbidi, utsi icsamboen chuiboedi adoenda. Adecbidi, tsienbêdta shui chedo chiec icsamboen tantiec onqueboedi adenda. ⁹ Adecbidi, mua uanamboedi ênêdta. Adquid icboedêmbi icsactsêcquid niacimboen mibi icsaid ênta. ¹⁰ Min tantiate chuca uacimboecnuc abi tantiadonequidquo icnuequin mibi tantiamequid tantiadted-tantiadedta. ¹¹ Adquid Nuquin Papan icmiac Esuquidistu tantiaquid utsibo naden mimbi tantienquo iquendac. Nêid isadaidno nec. Nêidic isadaidpembo nec, quequin tantiesa mibi iquendac. Adecbidi, nêid shui dêbid dêtemequid nec. Nêid shui dêbid dêtemesa nec, quequin tantiesa mibi neoaic. Adecbidi, Nêid chotac nec. Nêidic mayu nec, quequin tantiesa mibi neoaic. Adecbidi, Nêid yua nec. Nêidic yuaquid nec, quequin tantiesa mibi neoaic. Adquid Esuquidistu tantiaquid icnuc abêd icquid aton matses nec. Abi tantiaquidtedi chuiquid dapa abentsêcquiobi Esuquidistu nec.

¹² Aden Nuquin Papan cuênaido yec ambi bêdamboecquid icmebanaidobi abi cudasaido yec ambi tantiamiaid nêbi, quiash bêdamboecquid isadacimboec naded tabadteneta. Utsibo natiamiaid icscho isun bêdambo icmenuequin nashumbanta. Adecbidi, Mimbia bedan bedembi, quequid icta. Adecbidi, Mibia nashunu, quequid icta. Utsi icsaid êmenuec comapenec chushquenquiocquin bêdamboen chuiban. Tantesa uasho isun ismeded-ismededta. ¹³ Mimbi nacpadomboen utsibon natiapimboesho isun, Padi, quenquiocquin abi tantiameban. Adecbidi utsin mibi icsamboen nasho isash cuidnanenquo yec bêpiscudta. Nuquin Papa êbi icsaid cuidenquo yec bêpiscudosh, quec adta. ¹⁴ Adec tabatnec tantiananta. Adec tantiananec Esuquidistubêd abentsêc yacimboec icsaisa mibitedi yanendac.

¹⁵ Adec Esuquidistubêd abentsêc yacimboecnuc icmiaid nêbi, quequin tantiec bêdamboec tabadtenenu, quec mibitedi tabadteneta. Adec tabatnecquin, Mibi bêdambo iquec, Papa, quequin chuideneta. ¹⁶ Nuquin Papan Esuquidistu tantiadonemiaido icta. Adquido yec abi tantiaquid utsibobêd Esuquidistu chuinanec, Bêdamboec tabadta, quec adquecbidi tabadec ismenanta. Aden naic chuiquid dapa Dabidên dada uampid sadmo caidbêdta cuêdênte utsi Nuquin Papan mibi bêdambo icmiaidbêdtabi ambi naid utsi chiec cuêdêncuededta. ¹⁷ Adec tabadquin Esuquidistu tantiaquid nêbi, quequin Esuquidistun chiapadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bêdambo iquebi, Papa, quequin Nuquin Papa chuideneta.

Aton shubun icquidbêd tabadaid

¹⁸ Bêdamboec tabadnu, qeshun nadota. Chidon min bènên chiapadomboen nabanta. Esuquidistu tantiaquid icquin adobanta.

¹⁹ Chido inquidên, Con bènêbêd tabadec bêdambo iquebi, camenuen yuacimboecquin aid chuiquin min chido namenda. Mibibi tantiadquinuidi min chido namenda.

²⁰ Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bëdambo iquebi, quependac Nuquin Papa.

²¹ Anibëdtan min bacuëbo namenuc comapenen cuëdquin chieshmenta.

²² Yuan mibi yuaquidën chiacpadomboen nabanta. Aidën aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bëdamboen isendac. Nuquin Icho, Esuquidistu tantiaquid nebi, qeshun adobanta. ²³ Con Icho Esuquidistu nashunu, quiacbimboen mibi yuaquidën chiacpadomboen chieshenquiocquin bëdamboen nabanta. ²⁴ Con Icho Esuquidistun abi yacno ëbi nidacsho isun ëmbi bëdamboen nabanaid cuidquin ambi ismiambo yaid menendabi, quequin tantiaquin adobanta. Nidaidënsnun abi nashunquid mibi neque. Adobanta. ²⁵ Min icbon chiacpadomboen nata. Abi chieshënuquid icbon cuidendac. Adembidi Nuquin Papan Esuquidistu tantiaquid nebi, qesho abi chieshënesa menequin bëdamboen cuidendac. Abi chieshënuquid menenquiocquin comapenen cuidendac. Adenuidi tantiaquin cuidendac.

4

¹ Yuanquidën, mimbi yuaido ambi nabanacpaden bëdamboen menebanta. Abuc con Icbombo iquec, quequin tantiaquin mimbi yuaido bëdamboen menebanta.

Chuibanaid utsi

² Esuquidistu tantiaquid utsibo natiateguidbëd abi icsaid iquec, quequin tantiec badedbadequic Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta. ³ Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mëtaniaid nebi. ⁴ Pabado isun onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. ⁵ Esuquidistu tantiesan ëbi tabadaid istenec, quequin tantiec bëdamboec tabadteneta. Adecc tabadquid Esuquidistu tantiesatsen tantiamenucquin Esuquidistu chuideneta. ⁶ ¿Mitsicquid mimbi tantiaid icpec? quetsiash tanties. Adsho tantiashun mibi onquiaidbëd sa batambo iquec daëdacbimboecnuc Esuquidistu mimbi tantiaid utsibo chuita ma aidon tantiapanu qeshun.

Abëd icquid chuibanaid

⁷ Nëbi ëbëd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquico icscho ëmbi con utsi caid nec. Aid Nuquin Icho nashunquid neoaic. ⁸ Èbëd icquid utsibo naic tabadaid mibitedi tantiamenucquin aidi mibi yacno nidmemb. Adoac mibi yacno nidash puaedshun ëbi naic tabadaidbëdtabi Nuquin Papan chiaid chuibanac mibitedi ëbi tantiec unësqiocioedi cuishon queta. ⁹ Onesimobëd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbëd icquidon nabamboed mibitedi chuibanendac.

¹⁰ Nëbi mibi yacno nidesa chuinu. Tantiata. Adistadico ëbëd icnuc abembi quënën naedadondaid nec. Aidëmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosën chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. ¹¹ Esus cashumbic Ustus caidën, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aiddtedtsëqui isadaidbo nec. Aidon ëbëdtambi Esuquidistu chuibanquïn ëbi bëdambo icmequido neoaic. ¹² Epapadas mibi yacnoshon tishaid Esuquidistu chuibanquidquico nec. Aidëmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenucquid icnuc mibi bunacpaden tantiadonemenucquin mimbi Codosas yacnocquido abi tabadme, Papa, quec badiadquidën-badiadquidënquic Nuquin Papa chiec onquec Epapadas. ¹³ Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquico yec Esuquidistu tantiadonequidombo ma icpanu quiash mibitedi chiec onquedenec. ¹⁴ Adembidi Ducasën dauëchoquidën Demasbëdtan, Codosas yacnocquido tantiec tabadebi, quequin chiacpadomboen dada uaimbi.

¹⁵ Codosas yacnocquidon nëid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuëmëdquidën shubun Esuquidistu tantiec iccuededquido chuioata. ¹⁶ Adembidi, nëid ëmbi dada uaid isec onquequin mibëd iccuededquido tantiameshun Daudiseya yacno iccuededquido tsusiobo menequin, Nëid Pabado dada uaid

isec onquequin mibëd iccuededquido tantiameoa, quequin chui. Adembidi ëmbi Daud-iseya yacnocquido tantiaquin dada uaid bedshunshun isec onqueshun mibëd iccuededquido tantiameoata.

¹⁷ Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

¹⁸ Mibitedi tantiaquin ëmbibi nëid dada uaombique. Ëbi tantiec nidtiapimbo yec Pabado quënën tsadeque. Aid puduemetata, Papa, quequin Nuquin Papa chiec onquedeneta. Nuquin Papan ma mibitedi bëdamboen ispanu, quec tsadebi.

Padi. Aitedi dada uaombi.

TESADONICA YACNOCQUIDON ISTE 1

Pabado tauamboen chiaid

¹ Pabado nebi. Shubu dadpen icquid Tesadonica caid yacnocquido Nuquin Papabêdta Nuquin Icho Esus tantiaquido mibi chuiquin dada uaic nebi. —Nuquin Papan Esuquidistubêdtan bédamboen isquin bédambo icmepashun —caimbi mibi. Èbêd icquin Sidbano caidbêdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

² Naden mibi Nuquin Papa chianembi. —Tesadonica yacnocquido bédamboen namequid yec mibi bédamboshê iquec, Papa. ³ “Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icho Esuquidistu padpidec choec,’ quequin chieshtoenquo icquin Esusên naid chuibanosh,” quetuidpoh Timoteyo. Ma adembi aidon napanuna, Papa —quequin mibi Nuquin Papa chianembi. ⁴ Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenêdash naden. ⁵ Ambembi chiaid chienquo icquin Esusên naid mibi chuibanondambi. Aden chuibanac Nuquin Papan Mayanên tantiamiacpadomboen: —Abimbo caic —qeshun mimbi Esus tantiabonondac. Adembidi Esus tantiamenuc Sidbanochedobêd bédamboec ëbi tabadsho isun: —Adquid abimbo chuiquid nendac —quequin mimbi ëmbi chuisho tantiondac. ⁶ Aden Nuquin Papan Esus tantiamiaido yec ëbi Nuquin Icho yacpadec chieshtoenquo icsho isash mibitsen chieshtoenquo iccondac. Èmbi Nuquin Papan chiaid chuibanac Nuquin Papan Mayanên namiacpadec cuishonquequin mimbi Esus tantiondac utsibon: —Padi. Chên —quequin comapenen chieshênquionobi. ⁷ Adec mibi bédamboec tabadaid chuisho tantiash min nidaidên icquido Masedonia yacnocquido Esus tantiaquido mibi yacpadquiec tabadtiaquido icpac caosh. Adembidi tantiash nêid nidaid Acaya caid yacno tabadquidotsen adtiaquido icpac caosh. ⁸ ¿Anocquidonuidida mibi Esus tantiec bédamboec tabadaid tantiapash? Padenquo. Mimbi chieshtoenquo icquin Esusên naid chuibanac nidaid utsi-utsiec yacno tabadquidon tantiac caosh. Adashic aido mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiashun: —Tantiash —qeshun nêmbi icquido mimbi naid chienquo iccombi. ⁹ Mimbi naid naden chuisho tantiombi. —Pabado chedon Esus chuibanasho tantiash: “Nuquin Papapadquid utsi nibêdec,” qeshun Nuquin Papabêdta Esus tantiabonac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiacpadomboen natiadquido yanac caosh —quequin chioshi. ¹⁰ Adashic: —Adquid yec Nuquin Papa yacnuêsh aton mado Esus nidaidên padpidec chosho istiadquido iquec. “Èbi cuidmenquo icnuec abided cuidadec unêsascho Nuquin Papan uincuemiaid Esus choec,” qeshun aid istiadquido iquec —quequin mimbi naid chioshi.

2

Pabado bédamboen chuibanondaid

¹ Mibi yacnoshon tauamboen ëmbi chuibanac Esus tantiaquid yanshun mimbitsen utsibo Esus chuibanondac. ² Shubu dadpen icquid Pidipos caid yacnoshon quênên nauedac ëbi mëyadec tsadboedi pudumeshun nidmiac mibi yacno nidshun Esusên naid mibi chuibanondambi. Utsibo dadpenshun chieshênubi Nuquin Papan namiacpadomboen cuesambo icquin mibi Esus chuibanondambi. ³ ¿Èmbi naidquido namenuendambi adodi-onda? Padenquo. ¿Èbi tantiamenuendambi chuibandionda? Mambi padenquo iccondac. ¿Ambembi chiaidtambi mibi chuibandionda? ⁴ Mambi mibi abimbo chuibanpondac. Matsesên naidtedi tantiaquidênquo Nuquin Papan: —Aidên abimbo chuibantsiashe. Con Mado Esusên naid chuibenequid icmenu —caidquido nebi. Adquid yec matses: —Mibi bédambo iquec —cameteuidi bunenquo iquebi. Nuquin Papa: —Mibi bédambo iquec —camenuembimbi ambi chiacpadomboen naic. ⁵ Èmbi tantiacpadomboen mibi namenuc: —Mibi bédambo iquec —quenquo iccondabi. Min piucquid bednuen muaquin chiambo iccondambi. Nuquin Papan isnubi abimbo chiondambi. ⁶ ¿—Pabado bédambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusên naid tantiamenuembimbi bédamboen chuibanondac.

⁷ —Èbi chuibeneta —Esuquidistun caidquido nebi. Adoaid icquin tsusio dapan chiacimboen: —Nata —quequin ¿ancabudquindambi mibi chuibandionda? Mambi padenquo

iccondac. Anin bacuë nëishmenquo icquin bēdamboen namiacbimboembimbi nëishmenquo icquin mibi chuibanondac. ⁸ Mibi tantiaquiquin chieshtoenquo icquin Esusēn naid chuibanec yuec mibēd tabadondabi. Aden naic tabadec bēdambo iccondabi. ⁹ ¿Ada tantie, con utsibo? Aden Esusēn naid chuibanquin nidaidēn capuquid yua bitsibi tuscaquin shubumpi nacnendeniondambi. Mibi caic: —Ēbi menianiac aton piucquid naimēdnushe —quiash con piucquid bednuec chonoadteniondabi. Mimbi isnubi adondabi.

¹⁰ Mibēd yec Nuquin Papan chiaid niaquenquo yec bēdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanēdashi. ¹¹ Amēn aton mado: —Naden na —quequin nëishmenquo icquin chiacbimboen mibi abentse-abentsen bēdamboen chuibanquin ¹² mibi bēdambo icmepondambi. —Nuquin Papan: “Icsatiapimbo icquid icmequin ēbēdi tabadmendambi,” quequin Esus tantiamiaido mibi nec. Adquid Nuquin Papan chiacpadec bēdamboec tabadquid neque. Ambi chiaid niaquenquo yec bēdamboec tabadnuna —mibitedi cadeniondambi.

¹³ Aden Nuquin Papan chiaidquo chuibanac: —¿Ambembida chuidiosh? Nuquin Papan chiaidquo ma Pabadon chuiboc —mibi quianondac. Aden Nuquin Papan chiaidquo tantiash Esus tantiaquido yanash aidquibidi chuisho tantiash mibi bēdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bēdamboen tabadmequid yec mibi bēdamboshē iquec, Papa —quequin Nuquin Papa chianembi. ¹⁴ Nidaid Udeya caid yacnocquido yapadquiech chieshtoenquo icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquido icquin chieshēnac chieshtoenquo iccondash. Adomboembidi aid matses mibi yacno tabadquin chieshēnac mibi chieshtoenquo iccondac. ¹⁵ Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unēs uapac caondash. Adomboembidi chieshēnquin mibi yacnoshon cuemepondashi. Aden Nuquin Papa chieshēnquinc matses abitedi chieshēnquinc caquin ¹⁶ isadaidbon matses utsi isadaidpembō ēbi chuimetiapimbo icpondash. —Esus tantiasho Nuquin Papan bēdamboen isquin mibi cuidenquo iquendac —quequin ēmbi chuisho: —Padī. Aid chienda. Cueschitomane —capondashi. Aden ambi chiaid ēnenquo icquin niac-niacsho Nuquin Papan aido cuidquendac.

Pabado istante bunaid

¹⁷ ¿Mibi yacnoshon aden chieshēmēnquidon cuemiach mibi tantienquiodambi ictionda? Mibi unēsquo icnuc mibi instantiadquo iccondabi. ¹⁸ Adec: —Padpiden istanu —quesho Satanasēn nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasēn nacbidi padenquo iccondabi. Nēbi adecbidi mibi instantiadquo iquebi. ¹⁹ Nuquin Icho Esuquidistu choan aidbēd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ēmbi chuibanac Esus tantiabenondaido neque —capatsia? Mibibimbi caic. ²⁰ —Esus tantiec bēdamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bēdamboen naondac. Mimbi chuibanac ēbi tantiabenondash —ēbi caindac Nuquin Icbon.

3

Istan, quequin Timoteyo chiaid

¹ Aden mibi tantiec: —“¿Mitsipadec tabadpec?” quequinuidtsēqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ēbēd icquid utsi Sidbano chuiquin: —Timoteyo nidan nuquiuuidtsēqui icnuna —caondambi. ² Ēmbi: —Nid —caonaid Timoteyo Esus tantiaquid yec nuquin utsi nec. Ēbēdtan Esus chuibeneguidquo nec. Adquid icsho nadopondambi. —Tesadonica yacno nidshun Esus bēdamboen chuibantan. Adembidi: “Esus tantiec chieshtoenquo yec nadquiech tabadquid nendac,” quequin bēdamboec tabadquin ismetan, Timoteyo. ³ Aton matsesēn comapenen chieshēnac chieshtoshon Esus tantienquo yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi. ⁴ Aden mibēd icquin chuideniondambi. Adsho ēmbi chiacpadomboen nuqui chieshēnondash. ⁵ —“Ēbi nidan chieshēnac ¿adecbidida Tesadonica yacnocquido chieshtoenquo icpatsiashba?” quequinuidtsēqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiach chieshtoshon Esus tantienquo yanushe. Istan. ¿Ada ēmbi Esus chuibanondaido bēdamboec tabadeque? —caondambi Timoteyo chuiquin.

Timoteyon chuituidaid

⁶ Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquio iquebi,” quiosh Tesadonica yacnocquido —queposh Timoteyo. Adembidi mibi istantiadquio iquebi. ⁷ Timoteyon chuiboed tantiasbēdambo yanobi. Nēmbō icquidon chieshēnac shubiantiadtsēcquio iccobi. Adboedi mibi caic: —Chieshtoenquio icquin Esus tantiosh —quesho tantiasbēdambo yanobi. ⁸ Mimbi aden naid tantiasbēdambo yanobi. ⁹ Aden tantiasbēdambo yanobi. —“Tesadonica yacnocquido bēdambo iccosh,” quesho tantiasbēdambo yanobi, Papa. Mimbiuidtsēcqui namiac chieshtoenquio iquec. Aden namec mibi bēdambohē iquec, Papa. ¹⁰ Aido istiadquio iquebi. Mimbi chiaid bēdiactsēc tantiasbēdambo aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

¹¹ —Nuquin Icho Esusbēdtan Nuquin Papan nēbimbobi ambo nidmepashuni —caimbi. ¹² Adec mibēd ictiadquio icquin Nuquin Papa mibi chianembi. —Ēmbi aido tantiaquicpadomboen utsibobēd tantianameta, Papa. Bēdiactsēc tantianantsēcboedobi comapenec tantianamequiota, Papa. Adembidi utsibotsen bēdamboen ismeta. ¹³ Aden bēdamboec tabadquid icmeta, Papa. Mimbi adoac chieshtoenquio yec bēdamboec tabadtsiasb. Adsho mimbi mibi yacnoshon uaido mayan bēdabobēd nidaidēn padpidec choshon con Icho Esusēn: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

4

Chidobēd bēdamboec tabadte chiaid

¹ Tanta, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuc bēdamboec tabadta —quequin ěmbi chiondacadquiecbid tabadta. Nuquin Icho Esus tantiaquiecbid adta. —Bēdamboec tabadosh —quesho tantiasbēdambo yanobi. —Adquiecbid tabadta —caimbi mibi. ² Nuquin Icho Esusēn namiac aidēn chiaidquio mibi chuibanonambique. Aid tantiaquiecbid bēdamboec tabadta. ³ Nuquin Papan tantiamiacpadquiecbid tabadquidēn nadoquid yendac. Utsin chido chudenquio icquin aton chidouditsēcqui chudquid yendac. Adembidi chidon dada utsi chudmenquio icquin aton bēnēuidtsēcqui chudmequid yendac. ⁴ Adec Nuquin Papan chiaid niaquenquio yec abi bunaid mēmunc dada ambi inaidquio aton chidouditsēcqui chudec aidbēd bēdamboec tabadsho: —Bēdambo iquec —catsiasb Nuquin Papan. ⁵ Nuquin Papa tantiesabimboec tabadenda. Esus tantiesambien comapenec tsien bunquin aton chidopenquio chudendac. Adembidi Nuquin Papa tantiesabimboec chidon utsin shui bunquin aton bēnēpenquio chudmendac. Adec tabadenda. ⁶ Bēnē nidan aton chido abentsēcqui uequid istuidshun chudenda. Adoquid Nuquin Papan cuidendac ěmbi chiondacadomboen. ⁷ —Opabimboec chudnanec ma icsamboec tabadnu —zquequinda Nuquin Papan Esus tantiaquido nuqui icmediac? Padenquio. —Ma bēdamboec tabadnu —quequimbien Esus tantiaquido nuqui icmiaque. Bēdamboec tabadnuna. ⁸ Aden chuiquin aton Mayan nuqui menequidēn Nuquin Papan chiaid chiecbid nebi. Aden ěmbi chuiboed niacquin Nuquin Papan chiaidquio mimbi niactsiac.

Adecbid tantiananquiota, quequin chiaid

⁹ —Bēdamboec tantiananta —quequin padpiden chienquio iquemb. Nuquin Papan tantiamiac Esus tantiaquido yec mibi tantiananec. ¹⁰ Min nidaid Masedonia caidēn tabadquido Esus tantiaquido utsibotedi mimbi tantiecbid. Mibi yacpadquiecbid tantiananquioquin utsibotsen tantiaquiota. ¹¹ Ēmbi chiondacadquiecbid chieshēmēnenquio yec bēdamboec tabadta. Utsi icsaiduidi chienquio yec bēdamboec tabad. Chieshenquio yec dayacquo yec chonoadta. ¹² Adash bunenquio mibi ictsiac. —Con na nacenambo iccombique. Mitsana beccho —mibi quenquio ictsiac. Mibi adquio icsho isash Esus tantiesabo: —Esus tantiaquido bēdamboec tabadec —quetsiasb.

Esusēn abi yacno abi tantiaquido buante chiaid

¹³ Tanta, con utsibo. —“Esusēn abi tantiaquido uincuemendac,” quequin chuisho mimbi tantiaibi icnushē —quesbun mibi bēdamboen chuinu. Esus tantiesabo: —Ēmbi tantiaidquio padpidec isadenquio iquec —quec yuequid shubiabimboec shubienda. —Ēbipadquid Esus tantiaquid Nuquin Papa yacno istuidendambi —quec ma yuequid shubianenquio icnueshūn Esusēn uincuemete mibi chuinu. ¹⁴ —Unēs uaqi Esus uincuenacpadecbid nuquitsen uincuenendac. Esus tantiaquido unēsacsho uincuemeshun Nuquin Papan abi yacno aton Mado Esus buamendac —quequin nuqui tantiecbid. ¹⁵ Tanta, Nuquin Icho Esusēn chiaidquio mibi chuinu. Nuquin Icho Esus nidaidēn padpidec chonoc

aid istuidec Esus tantiaquido unēsabi icquido abia nidenquo iquendac. ¹⁶ Padenquo icnubien Nuquin Papa yacnuēsh choec Nuquin Icho Esusba nua cuēdtuidendac. Adnubien Nuquin Papan abi yacnoshon uaido mayan bēdabo chuiquid dapatsen nua cuēdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusēn abi tantiaquido unēsaidotedi abia aton dada chuca uaqin uincuemendac. ¹⁷ Adoquien aidobēdi Esus tantiaquido unēsabi icquido tsidadash aidotedi abuctoendac Nuquin Papabēd tabadec nidec. Abitedi abuctoquimbi abi bēquedec Esus chosho istuidendac. Adash Esusbēd Nuquin Papa yacno nidash anobi nuqui quenendac. ¹⁸ Ēbi adsho tantishun nadota. Aton matses unēsaid tantiec shubiquido bēdambo icmenuen ěmbi chuiboed chuita.

5

Esus chote chiaid

¹ Tantia, con utsibo. Mibi chuinu. —Nēidtedec ushash Esus padpidec choec —quequin chuitiapimbo iquebi. Adembidi: —Nēidted seta matamiash choec —quequin dada uatiapimbo iquebi. Tantienguo iquembi. Naden mibi chiondambi. ² —“Nēid inchēshēmbi ampequid choec,” quequin tantiatiapimbo yacimboec: “Aid ushēn Nuquin Icho choec,” quequin tantiatiapimbo icnuc Esus choaindac —quequin mibi chiondambi. ³ Esus tantienguo yequi matses dadpen: —Cuesnanenguo yec nuqui bēdamboec tabadec —queshobien ambi: —Ēbi cuidendac —cacmaidēnquo padpidec choshon cuidquiendac. ¿Mitsipadquo chido bacuē usunquid icpec? —Aid ushēnquo tishembi —quequin tantiatiapimbo yequi badedquido nēncuenc. Adecbidi ambi: —Choec —cacmaid Esus badedquido chosho abi tantiesabon cuenēntiapimbo iquendac. ⁴ ¿Esus chonoda nuqui dacuēdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nēbien Esus chochitec —quec bēdamboec nuqui tabadnubi Esus chonoc nuqui dacuēdenquo iquendac. ⁵ ¿Pacuēnēdabimboecquidoda nuqui nedi? Padenquo. Pabiata paposhquiacimboecnuc Esus bēdamboen tantiamiaido yec bēdamboec tabadquido ma nuqui neyoc. Adecbidi bēdamboec tabadnuna. ⁶ Ushquin pabiaten tantienguo yacimboen utsibon Nuquin Icho Esus tantienguo iquec. Adec tabadenquo icnuna. —Esus tantienguo icmane —queshun nuqui icsate bunaid nainquo icquin mēmūnuna. Nuquin Icho chosho istiadquio yec bēdamboec tabadnuna. ⁷ Esus tantiesaboen inchēshēn ushquin tantienguo yacimboec iquec. Adquiecbidi tantiadenuen acte paēmbo icquid acquido nec. ⁸ Adquidpenquo yec Esus tantiaquido yec bēdamboec tabadnuna. Nuqui icsate bunaid nainquo icquin mēmūnuna. Sondado: —Shocosh tsasimbo icquid shictonquenu. Sicsenushe —quiacimboec icnuna. Satanasēn Esus tantiamenguo icnushe. Esus tantiaquiquin matsesetsen tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacimboecbidi icnuna. Satanasēn icsamboen tantiamenguin chieshtomenushe. —Esus tantiasho cuidenguo icquin Nuquin Papan abi yacno ěbi tabadmendac —quequin bēdamboen tantianuna. ⁹ ¿Cuidnuenda Nuquin Papan nuqui Esus tantiamediac? Padenquo. Abēdi tabadmenuen Nuquin Icho Esuquidistu nuqui tantiamiac. ¹⁰ Aidi abi tantiaquid cuidmenquo icnuec abided cuidadec unēsac caondash. Aidēn padpidec choshon abi tantiaquidotedi buanshun abēdi tabadmendac. Unēsaid uincuemiaidobēda unēsabi icquidotedi adoendac. ¹¹ Ēbi adsho tantishun mimbi nabocpadomboembidi Esus tantiec bēdambo icnuec ěmbi chuiboed chuinanquiota. Adecbidi bēdamboec tabadec: —Adequi tabadnuna —cananta.

Bēdamboec tabadte Pabadochiaid

¹² Esus mibi chuibanquido bēdamboen ista. —Nuquin Icbon chiacpadomboen chieshtoenquo icquin nuqui chuiquidēn nuqui bēdamboen chuibanec —quequin aido bēdamboen tantia. Mibi nashunquidombo neque. Aidon: —Nuquin Papan chiaid niaquenquo yec bēdamboec tabadnuna —quequin chuisho bēdamboen tantia. ¹³ —Nuquin Papan chiaid bēdamboen tantiaquidombo nec —quequin bēdamboen ista. Adec chieshēmēnenquo yec bēdamboec tabadta. ¹⁴ Mibēd icquido naden chuiban. Chieshquid icsho: —Mibitsen chonoada —cata. Dacuēdsho: —Dacuēdenda —cata. Esus bēdiactsēc tantiatšescho bēdamboen chuiquin Esus tantiamequiota. Dada padishquo icsho nashunta. Aden nēishenguo icquin abitedi bēdamboen ista. ¹⁵ Utsin chieshēnac cuidnanenguo yec bēdamboec tabadta. Mibēdtan Esus tantiaquidobēd bēdamboec isnanquin utsibotsen bēdamboen ista.

¹⁶ Aden Esus tantiec ēnēdenquo yec cuishonquianeta. ¹⁷ Adembidi Nuquin Papa chianequin: —Ēmbi chiacpadomboen ěbi nashunquin utsibotsen nashunta, Papa, —quequin chianeta. ¹⁸ ¿Mimbi chiacpadomboen Nuquin Papan nasho isunuidida mimbi: —Nuquin Papa bēdambo iquec —cape? Nadoac bēdambo ictsiash. Bēdambo tabadquin: —Mibi

bēdambošē iquec, Papa, —cac bēdambo ictsiash. Daicsabudshumbic adembidi nac bēdambo ictsiash. Paēmbo icnubi adembidi. Mitsana icnuc adembidi. Mitsana nibēdnubi adembidi. Utsibon chieshēnaqui adembidi: —Mibi bēdambošē iquec, Papa —cac bēdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac. ¹⁹ Nuquin Papan Mayanēn Nuquin Papan chiaid tantiamiac pamumēdacimboec tabadenda. ²⁰ Aden Nuquin Papan Mayanēn tantiamiac utsibontsen chuisho: —Mue nec —badedquoio cainda. Chuishoba tantiata. —Nuquin Papan chiaidquoio chuinu —quesho mamēnshunenda. ²¹ Adenquoio icquin: —¿Nuquin Papan chiaidquobida chuibaneque? Tantiabono —cata. Aden tantiashun Nuquin Papan chiaidquoio isbanta. Aden isbanquin abimbo chuisho tantiashun: —Ai, Nuquin Papan chiaidquoio chiec —queshun aidēn chuisho bēdamboen tantiata. ²² Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquoio chiec —queshun aidēn chuisho tantienda. Aidēn chiacpadomboen nainda.

²³ Mibi Nuquin Papa chianembi. —Matses bēdambo icmequid icquin mimbi chiacpadomboen aido name, Papa. Mimbi chiaidquoio bēdamboen tantiamequin bēdamboen tabadme, Papa. Mimbi adoac bēdamboec tabadnuc choashun con Icho Esusēn: “Aido bēdambo iquec,” catsiash, Papa —quequin Nuquin Papa chianembi mibi. ²⁴ Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquoio iquendac. ²⁵ Nuquin Papa ēbi chianeta. —Abēd icquidobēdta Pabado bēdamboen nameta, Papa —quequin Nuquin Papa chianeta. ²⁶ Ambocquido Esus tantiaquidotedi chuiquin: —Pabado chedon nuqui tantiaquieic —quequin chuiban. ²⁷ Nuquin Icbon tantiacpaden chuiquin dada uaombique. Ēmbi dada uaoboed nēid isquin ambocquido Esus tantiaquidotedi chuiban. ²⁸ —Nuquin Icho Esuquidistun bēdamboen ispashun —quequin mibi tantiembi. Padi. Aidedi dada uaombi.

TESADONICA YACNOCQUIDON ISTE 2

Pabaddon tauamboen chiaid

¹⁻² Pabado nebi. Tesadonica yacnocquido Nuquin Papabēdta Nuquin Icbo Esus tantiaquido mibi chuioaquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

Nuquin Papan Esusbēdtan matses cuidte chiaid

³ —Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactšēc tantiatsēchoedombi nēbi Esus tantiabededosh,” quiošh, Papa. “Adecbidi bēdiactšēc tantianamboedi nēbi comapenec tantiananosh,” quiošh. Aden aido bēdambo icmec mibi bēdamboshē iquec, Papa —quequin chianembi mibi. ⁴ Mimbi aden bēdamboen naid Esus tantiaquido utsibo chuibeniombi. —Dadpeshun chieshēnaqui chieshtoenuio icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵ Adec chieshtoenuio icquid icquin nuqui naden tantiec. —Ēbi chieshtomenquio icquid abitedishun naid tantiaquidquio nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenuio icquin Esus tantiaquo Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac. ⁶ Nuqui chieshēnquidon naidtsen tantiaquid icquin Nuquin Papan aido cuidendac. ⁷ Aden nuqui chieshēnquido cuidquin aidon nuqui natiamiaid nuqui bēpiscudmendac. Abi yacnuēšh mayan bēdabo ambi comapenen tantiaquin namiaidobēd choshon Nuquin Icbo Esusēn adoendac. ⁸ —Icsaisambo yec matses cuidquid nebi —quequin tantiamenuc bēchamauanquiec choshon Nuquin Papa tantiesabo cuidendac. —“Nuquin Icbo Esus tantiaquo Nuquin Papan mibi bēdamboen istšiasih,” quequin chuisho tantiatipimbo iquebi —quequin abi tantienquio icsho Esusēn cuidendac. ⁹ Cacumiachimboen abi yacno puduedmenquio icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icbo yec bēdamboshē isadsho isec tabadtiapimbo iquendac. ¹⁰ Aden ambi icsaido cuidte ushēmbi Esus chosho abi tantiaquido: —Ēbi cuidmenquio icnuec abided cuidadaid Nuquin Icbo bēdamboshē iquec —quequin aton Icbo isec tabadendac. Ēmbi Esus chuibanac aid tantiabonadaido icquin mimbitsen Esus chosho isendac.

¹¹ —Aidbēdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquio iquebi,” qesho ambi chiacpadomboen name, Papa. Comapenen tantiaquidquio mibi neque. Adota, Papa. ¹² Aden mimbi con Icbo Esuquidistubēdtan bēdambo icmiac Esus tantiec bēdamboec tabadtsiasih, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec. Aton Icbo Esuquidistubēd Nuquin Papa bēdamboshē iquec,” quependac utsibo, Papa —quequin Nuquin Papa chianembi mibi tantiaquin.

2

Icsamboshē icquidba chote chiaid

¹ Tantia, con utsibo. Mibitēdi chuinu. —Abi yacno tabadmenuen buanuec Nuquin Papa yacnuēšh Nuquin Icbo Esus ěnden choac —qesho tantiašh ² dacuēdtanenda. Mibi yacnoshon ųtsuntsin adec muaquin chuiposh? Aidon: —Tantia. Nuquin Papan Mayanēn tantiamiacpadomboen chuinu. Nuquin Icbo Esus ěnden choac —quec muapash. Ambembi chiaidien chuichitash. —Naden Pabaddon chiaid iquec —quequin ěmbi dada uaidbimboecquid isquimbien chuichitash. ³ Adec muaid tantiašh: —Abimboen cachitosh —quenda. ųNuquin Icbobada chopadic? Padenquio. Utsibain choendac. —Nuquin Papa caidēn chiaid tantiatipimbo iquebi —quec matses icsamboec tabadnubien Nuquin Papa chieshēnquidquio icsamboshē icquidba choash matses dadpenquio chuiquid dapa iquendac. Aid Nuquin Papan cuidtequidquio nendac. Aidba choabi icnuc Esus choenquio iquendac. Icsamboshē icquidbain choendac. ⁴ Aid chuiquid dapa yanashic Nuquin Papa dēniacte bunquiec Nuquin Papa tabadte shubu uashunaidēn puduedshun: —“Comapenen tantiaquin ěbi nashunquidquio nec,” quequin mimbi Nuquin Papa caid nibēdeque. Ēbiuidtsēqui tantia —caindac matses abitedi chuiquin.

⁵ Aden mibi chuideniondambi. *¿Tantienquioda ique?* ⁶ Nuquin Papan tantiacpadênquio chomenuen uidênacu icsamboshê icquid nêbi choenquio iquec. Nuquin Papan tantiacpadênquio choendac. Êmbi chiondacadpadquid abi chomenquio icquid mimi tantiec. ⁷ Nêbi isadenquio icquidên Satanasên namiac matsesên Nuquin Papan chiaid niac-niacbededec. Padnuen icsamboshê icquid choabi iquec. Aid chomenquio icquid nidabi icnubi icsamboshê icquid chuiquid dapa yantiapimbo iquendac. Abi chomenquio icquid nidmiambien ⁸ icsamboshê icquid matses chuiquid dapa iquendac. Adnubien Nuquin Icho Esusên: — Êbien matsesên Icbombo nec —quequin matses abitedi tantiamenuc choshon icsamboshê icquid: —Unêsta —caquinuidtsêqui unês uashunendac.

⁹ Adec Esus choabi icnu icsamboshê icquid chuiquid dapa yanendac. Adquid yanshumbic Satanasên tantiamiacpadomboen comapenen tantiaquin dadpenquio nabanquin ismendac. —Comapenen tantiaquidquio nebique. Istac —quequin ambembi chiaid tantiamenuen aden nadatiambo icquin nabanquin ismendac. ¹⁰ Adec icsauidequi tabadquid yec comapenec muasho tantias: —Abimbo caic —quependac Esus tantiesabo Nuquin Papan cuidequido yec. Aidon Esus chuibenequidên Nuquin Papa yacno tabadte abimbo chuisho pamumêdabimboen tantiatipimbo icquin ambembi chaiduidtsêqui tantiadac. ¹¹ Aden ambi chiaid niac-niacuidequi icsho Nuquin Papan: — Abi bunaidquio ambembi chiaidquio chuisho ma tantiapanuna —quequin namiac: — Mue nec —quequin tantienquio iquendac. Utsi muasho tantias badedi: —Abimbo chiec —quetsiash tantienquio yec. ¹² Aden ambi chiaidquio tantiatipimbo icquin aid niac-niacquec icsateuidi bunsho Nuquin Papan cuidquiendac.

Nuquin Papan tantiamiaid

¹³ Nuquin Icbon mibi tantiaquie. Êndenquimboshê matses uabi Nuquin Papa nuqui caic: —Êbi yacno tabadmenuen Esus tantiamequin aido bédambo icmendambi —quepampic. Adshumbic aidên chiacpadomboen aton Mayanên namiac Nuquin Papan chiaidquio tantias Esus tantiec mibi bédamboec tabadcuendac. —Adquibidi iccosh —quesho tantiashun Nuquin Papa chianembi naden. —Aden aido bédamboen namequid yec mibi bédamboshê iquec, Papa —quequin chianembi mibi tantiaquin. ¹⁴ Nuquin Papan chiaidquio êmbi chuibanac mimi Esus tantiabonadac. Abi yacnoshon Nuquin Icho Esuquidistupadquio bédamboshê icmenuen aden Nuquin Papan mibi Esus tantiamiac. ¹⁵ Êbi adsho tantiashun êmbi chiondacadomboen chieshtoenquio icquin Esus tantia. Êmbi mibi béisquin chiondaidbêdta êmbi dada uaquin abimbo chiondaid bêpiscudenda.

¹⁶ Nuquin Icho Esuquidistubêdta Nuquin Papan nuqui tantiaquin bédamboen isec. Adembidi: —Nuquin Papa yacno Esusbêd iquendabi —quequin tantiamequin dayacquo yacnimboecnu nuqui icmec. ¹⁷ Adquid icsho chianembi naden. —Tesadonica yacnocquido chieshtomenquio icquin Esus tantiamequin bédamboec tabadquid icme, Papa. Adembidi bédamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

3

Nuquin Papa êbi chianeta, quiaid

¹ Tantia, con utsibo. Mibi chuinu. Nuquin Papa êbi chianeta. —Nidaid utsi-utsiec yacno nidmeshun Pabado chedo matses dadpenquio Esusên naid bédamboen chuibame, Papa. Mimi bédamboen chuimiac êmbi Esus tantibenonadpadomboen utsibon dadpenshun Esus tantiabentsiash, Papa. ² Aden Esus chuibansho isun Esus tantiesabo chieshêmênquidon: “Pabado cueschitono,” casho cuesmenda, Papa —quequin Nuquin Papa êbi chianeta. ³ Nuquin Icho bédambo iquec. Muesambo icquin ambi chiacpadomboen nuqui bédamboen dayun uaindac. —Êbi tantienquio yanushê —queshun nuqui chieshtomenquio icquin Satanas nuqui yuametiapimbo iquendac. ⁴ —Aden Nuquin Icbon bédambo icmiac êmbi chiacpadomboen naboedi adembidi Tesadonica yacnocquidon naindac —quequin tantiombi. ⁵ Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan êbi tantiaquie,” quequin Tesadonica yacnocquido tantiameta, Papa. Esusên chieshtoenquio icquin nacpadomboembidi aido chieshtoenquio icquid icmeta, Papa —quequin Nuquin Papa chianembi.

Esus tantiaquido uspuenquio icquid

⁶ Tantia, con utsibo. Nuquin Icho Esuquidistun: —Êbi chuibeneta —caidquio icquin mibi chuinu. Esus tantiaquido utsi-utsiec êmbi mibi chiondaid niac-niacquec chieshuidequi icsho isash aibêd chieshec tabadenda. ⁷ —“Êbêd iquec Pabado dayacquo iccondacadquiech chieshenquio yequien tabadtiad,” quiosh —quiosh mibi caic. Abimbo mimi cac. Mibêd

yec dayacquio iccondabi. Chieshenquo yec chonoadteniondabi. ⁸Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Ëbi meniac aton na naimēdnushe —quiash con piucquid bednuec chonoadteniondabi. ⁹—Esus tantiaquidon abi chuibanquid menenquo icquid —¿quectabi ique? Padenquo. Esusēn naid chuibanquid ambi chuibanaidon meniaquien bēdambo ictsiash. —Chieshenquo icquin ěmbi nacnensho isun ma adembidi Tesadonica yacnocquidontsen nanu —quiashini chonoadteniondac. ¹⁰Mibēd tabadquin naden chiondambi. —Aton na nacnenenquo yec chieshuidequi icsho pemenuio icquid —quequin chiondambi.

¹¹Mibi caic: —Utsi-utsiec chieshuidequi tabadosh. Utsi icsaiduidquo chiec tabadosh —quetuidosh. ¹²Uspun tantia. Nuquin Icbo Esuquidistun chiaid mibi chuinu. Chieshuid-equi tabadenda. Mitsanabi penuec chonoadta. ¹³Nuquin Papan chiapadomboen naic chieshtoenda. Chieshtoenquo icquin bēdamboen-uidi nata. ¹⁴Nēid dada uaquin ěmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu —quiash abēduidi iquenda. ¹⁵Aid chieshēnenquo yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bēdamboequien tabadtiad —quequin chuita.

Pabadon ěnquin chiaid

¹⁶Mibi tantiaquin Nuquin Papa chianembi naden. —Bēdambo icmianquidquo icquin Con Icbonquo ma aidu dacuēdenquo icquid icmepanuna, Papa. Aidobēd ma Esus tēshēdenquo icpanuna, Papa —quequin Nuquin Papa chianembi. ¹⁷—Ista. ěmbimbo dada uaid nēid neque —quequin ěmbi nēidtedpactsēc dada uaid isun: —Pabadon chiaidquo nec —quequin mimbi tantiendac. ¹⁸—Nuquin Icbo Esuquidistun bēdamboen ispashun —caimbi mibi. Padi. Aidedi dada uaombi.

TIMOTEYON ISTE 1

Tauamboen chiaid

¹ Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi. ² Ëmbi chiondac Esus tantiabenash con mado icbobimboecquid mibi neque. Mimbi iste nêid dada uanu. Mibi tantiec: —Nuquin Papan aton Mado Nuquin Icho Esuquidistubêdtan con mado bédamboen isquin bédambo icmepashun —quiobi.

Chiaid utsi chienda, quequin chiaid

³ Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibêdta nactsusuaquin Nuquin Papan chiaid chienda —cata. ⁴ Nadembidi chuibanta. —Tsusedpabon ambembi chiampiduidi chiec tabadenda. Adem-bidi utsibon: “Nuquin matsesën mado nepampic. Aidën bababic nadec cuëmêdpampic. Aidën tsyuecquiduidtsëqui bédambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bédamboen tantiamepe? Adenuidi chuiquim mimbi Esus tantiamenquio iquec. Aden mimbi ambembi chiaid chuisho tantias: “Mimbi icsamboen chiec. Ëmbimboen bédamboen chiec,” quec mibêdi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquio icquido aden chuita. ⁵ Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiasnun Esus tantiec bédamboec tabadec matses bédamboec tantianantsiash —cata, mado. ⁶ Mimbi aden chiacpadomboen nainquio icquidoen Nuquin Papan chiaid bédamboen tantienquio yec abembi onquec. ⁷ Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

⁸ —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bédambo iqueyoc. —Nêid tantiasnun ma abi icsaid ënu —queshun aid abimbo chiac bédambo ictsiash. ⁹ ¿Bédambo icquid chuiquinda Nuquin Papan Moises dada uamepampic? Padenquio. Icsambo icquido chuiquimbi adopampic nadquido chuiquin. Nêidic Nuquin Papan chiaid niac-niacquido. Nêidic aton chuiquidën chiaid niac-niacquido. Nêidic Nuquin Papa tantiesabo. Nêidic Nuquin Papa mamênshunquido. Nêidic anibi cuesunequido. Nêidic amêbi cuesunequido. Nêidic cuesunianquido. ¹⁰ Nêidic aton chidopenquio chudquido. Nêidic aton bënêpenquio chudmequido chido. Nêidic aton chido bunenquio yec dada daêd chichudnanquido. Nêidic matses utsi bedshun yuaquido. Nêidic muaquido. Nêidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. ¹¹ Adembidi Esus chuibenequidon: —Adquid icsambo iquec —quequin chiec. Bédamboshê icquin Nuquin Papan aden Esus chuibenequido chuimec. Esus chuibenequidibidi icquin adembidi chiembi.

Nuquin Icbon Pabado bédamboen isbenaid

¹² Tantia, mado. Mibi chuinu. Nuquin Icho Esuquidistun: —Pabadon ëbi bédamboen chuibantsiash —quequin tantiasnun: —Ëbi chuibenequid icta, Pabado —queshun ëbi bédamboen namec. Adoaid icquin: —Ëbi namequid yec mibi bédamboshê iquec, Icho —quequin Nuquin Icho Esus chianembi. ¹³ Ënden adenquio iccondabi. Nuquin Papan Madopenquio danquin Esus icsamboen chuishunondambi. Abi tantiaquido chieshênquin cuesun secate bunondabi. —Aton Mado Esus tantiasho Nuquin Papan ëbi bédamboen istsiash —quenquio icquin adopondambi. Adshobini: —Pabadon abimbo tantiabi iquec —queshun Nuquin Icbon cudenquio icpanêdash. ¹⁴ Adec icsambo icquid icsho Nuquin Icbon tantiamiac: —Abi tantiasho ëbi bédamboen isbentsiash —quequin Esusquio tantiabenondambi. Esus tantiaquin matsetsen tantiaquiembi.

¹⁵ Tantia, mado. Naden chiaid bédambo iqueque. —Icsambo icboedën abi tantiasho cuidmenquio icnuec Esus matsesac caondash —quequin chiaid bédambo iquec. Ëbibil icsamboshê icpondabi. Utsibon Nuquin Papan chiaid bêdiactsec niac-niacnubi ëmbimbo compenen niac-niaccondambi. ¹⁶ Adec ëbi yuec icsambo icsho Nuquin Icho Esusën baded

cuidenquo icquin abibi tantamequin bédamboen isbempodashi. —Pabado bédamboen isaid chiac utsibo: “Pabado icsambo icboedi Nuquin Papan bédamboen isbenac. Adembidi Esus tantiasho Nuquin Papan ëbitsen bédamboen isendac,” quequin ëbi tantiendac. Adquid unësacsho ëbi yacno tabadmendambi —qeshun abi tantamequin Esusën bédamboen isbempodashi. ¹⁷ Aden tantiaquin nadoembi. —Nuquin Papa ambiuidtsëqui abitedi namequid yec abitedishun Ichombo nec. Unëstiapimbo icquid nec. Isadenquo icquid nec. Adquid abentsëcquiobi icnuc abipadquid utsi nibëdec. Adquid icsho abitedishun: “Mibi bédamboshë iquec, Papa,” capashun ënenquo icquin —caimbi.

Matsesën mibi chiondacpadombota, quiaid

¹⁸ Mibi con mado icbobimboecquid neque. Ëmbi chiacpadomboen Nuquin Papan chiaidquo chuibanta, mado. Ënden mibi Esus chuibanquid yanabi chiuqen Nuquin Papan oncamiac nuquibëdta Esus tantiaquidën mimbi chuibante chuipondash. —Esus bédamboen chuibanquon Timoteyon Esus tantiaquido bédamboen namendac —quequin mimbi chuibante chuipondash. Aidën chiacpadomboen chieshtoenquo icquin Nuquin Papan chiaidquo chuibanta. ¹⁹ Aden Nuquin Papan chiaid niaquenquo icquin Esus tantiaquieç bédamboec tabadta. Utsiboen adenquo iquec. Icsamboec tabadquin Nuquin Papan chiaidquo niac-niacquin Esus tantienquo yanosh. ²⁰ Adecandedo caidbëdta Imeneyo caidën aden Esus tantienquo yanosh. Aid daëdshun Nuquin Papa muauaquin icsamboen chuisho nadopombi. —Adquid Satanasën natiambo icnepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

2

Nuquin Papa bédamboen chianete chiaid

¹ Tantia. Utsibotedi chinu. Matses abitedi tantiaquin Nuquin Papa chianenuna. —Matses abitedi min Mado Esusbëdta mibi bédamboen tantiamequin bédamboen ista, Papa. Matses nashunquidquo yec mibi bédamboshë iquec, Papa —quequin Nuquin Papa chianenuna. ² Adembidi Nuquin Papa chuiquin: —Chuiquid dapambo pedesidente caidte-dibëdta chuiquid dapa utsibotedi bédamboen tantiameta, Papa. Adoac aidon bédamboen namiac cuesun secananquo yec matses abitedi bédamboec tabadtsiash. Adnubi abi chieshënquido nibëdnuc Esus tantiaquido abi tantieç bédambo ictsiash, Papa —quequin Nuquin Papa chianenuna. ³ —Con matses Esus tantiameta, Papa —quequin nuqui aden chianesho tantias: —Bédamboen chieç. Ëbi bunaidquo chieç —quendac Nuquin Papa nuqui cuidenquo icquin abëd tabadmequid. ⁴ Matses abitedimbo cuidenquo icnuen matses bédamboen iste bunquid yec: —Ma ëmbi chiaid tantiashun abided cuidadec unësaid ma tantiapanu —quec Nuquin Papa. ⁵ Nuquin Papan chiaidquo tantiashun nuqui naden tantieç. —Nuquin Papa matses uaquid abentsëqui icnuc abipadquid utsi nibëdquieç. Abëd icboedi matsesun: “Nuquin Papapadquid icquin aid tantiamequid nebi,” quequin aton Madon matses chuipanëdash. Adeçbidi aton Papa matses bédamboen ismequid yampanëdash Esus. Aid abentsëqui Nuquin Papa bédamboen ismequid nec. ⁶ Abi tantiaquid cuidmenquo icnuec abided cuidadec unëspac caondash —quequin chiaidquo nuqui tantieç. Nëbien Nuquin Papan tantiacpadomboen matsesën aden chiaidquo chuibenchuibenec. ⁷ Adomboembidi Esus chuibenequidquo nebi. —Matses utsibo isadaidpembo ëbi chuibeneta —Esusën caondaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

Esus tantieç cuëdënacnoshon nate chiaid

⁸ Tantia. Dadatedi chinu. Cuëdënacno puduedshun Nuquin Papa chinuuec bédamboequien tabadtiad. Nëish bédanash chieshënanenquo icquimbien Nuquin Papa chuitiad. ⁹ Chidobotsen chinu. Esus tantieç Esus tantiaquido cuëdënacno nidnuec: —Mabi isnu —quequin tantienquo yec bédamboec dasiuidta. Bédamboec tabadquid dasiuidacimboec dasiuidta. Chido chishpidabimboec dasiuidenda. —Mabi isnu —quenquo yec Esusquo tantianuec Esus tantiaquido cuëdënacno puduedta. ¹⁰ —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bédamboec tabadta.

¹¹ Esus tantiaquido cuëdënacnoshon dadan Nuquin Papan chiaid chuibansho tantiaquid chidon. —Aidën chiacpadomboen natiapimbo iquebi —quequin tantienquo yec bédamboen tantieç otacquo tabadquid chido. ¹² Esus tantiaquido cuëdënacno puduedshun dada chuibanesa chidon. Adembidi dada ancaisa chidon. —Otaçquien tabadquid chido —caimbi. ¹³ Dada Adan caidba Nuquin Papan matses uapampic. Adshumbic aton chido Eba caidtsen. ¹⁴ Aden dadabëdta chido nacnenacsho isumbien Satanasën: —Icsamequin

tanu —qeshun muauac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. ¹⁵ Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nèbi Esus tantiaquid yanash ambi tishaido bédamboen namequid nendac. Esusèn chiacpadomboen natiadquio icquin matses tantiaquid nendac. Nuquin Papan chiaid niaquenquio icquid nendac. Aton bènèuidtsèqui chudmequid yendac Esus tantiaquid chidon. Adquid Nuquin Papan bédamboen isquin abèdi tabadmendac.

3

Esus chuibanquid chiaid

¹ Tantia. Utsitsen mibi chuinu. —Esus chuibanquid ictiadquio iquebi —quesho: —Bédamboen nate mibi bunec —cata. ² —Nuquin Papan chiaid chuibanquid nadquien ictiad —quequin anocquido chuita. —Bédamboec tabadquid nec —utsibon caidquio Nuquin Papan chiaid chuibanquid nendac. Adquid chido abentsèc inquid nendac. Abi bunaid ènshun mèmunquidquio nendac. —Bédamboen tantiaquidquio nec —utsibon caidquio nendac. Isedanquido bédamboen isquid Nuquin Papan chiaid chuibanquidèn. Nuquin Papan chiaid bédamboen tantiamequin chuibanquid nendac. ³ Tantiadenuen acte paëmbo icquid aquenquio icquid nendac. Badedquio nèishenquio icquid nendac. Uimanèmènenquio icquid nendac. Chushcananteuidi bunenquio icquid Nuquin Papan chiaid chuibanquid. Piuquid bedteuidi bunenquio icquid nendac. ⁴ Aidèn chiacpadomboen aton chidon aton bacuëbobèdtan naquid. Chieshenquio icquin aton papan chiacpadomboen naquid aton bacuëbon. ⁵ ¿Ambi chiacpadomboen aton chidobèda aton bacuëbo bédamboen namenquio icquinda Esus tantiaquido bédamboen namepatsiashe? Padenquio ictsiashe. ⁶ Ènden Esus tantiabenondaid chuiquin: —Èbi chuibanquid icta. Èbi bédamboen chuiquin èbi bédamboen nameta —Esus tantiaquidon cac bédambo ictsiashe. Nèbimbo Esus tantiabenquid aden chienda. Chuibanquid icmiac adquidèn Nuquin Papan chiaid badedquio niactsiashe. Satanashimboec: —Èbiuidtsèqui bédamboshè iquebi —quetsiashe. Adquid: —Èbi chuibanquid icta —cainda. ⁷ Ènden Esus tantiabenondaid mibi chuibanquid icmenun Esus tantiesabon: —Bédambo icquid nec —casha tantia. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamènshuntsiashe. Adquid Satanashèn badedi yuatsiashe. —Icsambo icquid nec —caid: —Èbi chuibanquid icta —cainda.

Esus tantiaquido nashunquid chiaid

⁸ Tantia. Esus tantiaquido nashunquidtsen chuinu. —Nuqui chuibanquidèn chiacpadomboen èbitedi nashunquid icta —quequin nadquid chuita. Utsibon: —Bédambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidèn. Piuquid bunquin ampenquio icquid nendac. ⁹ Nuquin Papan chiaid bédamboen tantiaquinc Esus tantiaquinc caic bédamboec tabadquid Esus tantiaquido nashunquid. Adquid bédambo ictsiashe. ¹⁰ Esus tantiaquido nashunquid icmenun: —¿Bédambo icquidida nèid nec? —quequin chuimiac utsibo: —Ai, bédambo icquid nec —abitedi queshe tantiashe: —Esus tantiaquido nashunquid icta —cac bédambo ictsiashe. ¹¹ Adquidèn chido: —Bédambo icquid nec —utsibon caidquio nendac. Utsi icsaiduidi chienquio yec bédamboec tabadquid adquidèn chido. Tantiadenuen acte paëmbo icquid aquenquio icquid aton chidon. Ampenquio yec bédamboec tabadquid. Adquidquio Esus tantiaquido nashunquidèn chido bédambo ictsiashe. ¹² Esus tantiaquido nashunquidèn chido abentsèqui inquid. Ambi chiacpadomboen aton chidon naquid. Adembidì aton bacuëbon. ¹³ Abi nashunquidèn Esus tantiaquido bédamboen nashunsho isun utsibon bédamboen isendac. Adoidèn dayacquio icquin abi utsibo nashumbanquin dacuèdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ènquin chiombi.

¹⁴ Tantia. Utsi mibi chuinu. Mibi yacno nèbi nidtiadquio iquebi. —Nidenquio icmane —qeshun nèid dada uaic nebi. ¹⁵ Èbi mibi yacno badedquio nidabi icnuc: —“Esus tantiaquidon nadoquid,” quequin Pabodon chiacpadomboen nanuna —cata. ¿Tsutsi tantiaquido nuqui nepe? Unèstiapimbo icquid Nuquin Papambo nec. Aid tantiaquido yec shubu abentsèquèn tabadquidobimboec nuqui iquec. Adquid icquin Nuquin Papan chiaidquio tantiaquin nuqui Esus chuibenec. ¹⁶ Èndenquio abi bédamboen ismequid ambi tantiamiabi icnèdaidi nèbi Nuquin Papan tantiamiaid Esus bédamboshè iquec. Aid Nuquin Papan matsesmepepandash. Nuquin Papan Mayanèn: “Nuquin Papapadquidquio icsaisambo Esus nec,” quequin tantiamec.

Matsesën unës uaqui uincuenaid yec Nuquin Papan abi yacnoshon uaido mayan bédabon isaidquo Esus nec.
 Abi chuibenequidën nidaid utsi-utsiec yacno nidshun chuibeniác utsin-utsinquier Esus tantiabenac caosh.
 Aidquiobi Nuquin Papan abuc nidmeshun abëdi tabadmeoapanédash.

4

Utsibon icsamboen chiaid

¹ Tántia, mado. Nuquin Papan Mayanën tantiamiaid mibi chuinu. —Esus chote nëbi icnuc abi tantiaquidon utsin-utsinquier Esus tantienquo yanendac. Satanasën yuabo podobitsi icsabon muaquin pausunac matsesën chuišo tantiaashun Esus tantienquo yanendac —quequin Nuquin Papan Mayanën abimbo tantiamioshi. ² Aden muaquidon: —Abimbo caimbi —quequin bédambo icquid damianquier aden muaquin chiendac. —Nuquin Papan cuidnushë —quequin tantienquo iquendac. ³ Adquidon naden chiendac. —Dadan chido bedenda. Chidon dada bedmenda. Padenquo yec tabadta —quequin icsamboen chiendac. Adembidi: —Aidquo petemaid neque. Penda —quequin pete abentse-abentsen chiendac aid pete bédambo icnubi. ¿Atotsi quequin Nuquin Papan pete uapampic? —Ëmbi chiaidquo bédamboen tantiaashun Esus tantiaquidon: “Nuquin Papan pete uaid bédambo iquec,” quequin ma penu —quequin Nuquin Papan pete uampic. ^{4,5} Aidën pete uaidtedi bédamboshë iquec. —Ëmbi pete uaid bédambo iquec. Ma penu —qeshun Nuquin Papan pete icmiaid ma petequid neyoc. —Mimbi pete uaid bédambo iquec, Papa —qeshun pete isuidenquo icquin penuna.

Esus chuibanquid icquin bédamboen nata, quiaid

⁶ Esus tantiaquido ëmbi chuibocpadomboen chuibanquin mimbi bédamboen natsiac, mado. Bacuëctšëcsho min matsesën Nuquin Papan chiaidquo mibi chuibanédash. Aidën chiaid tantiaquid icquin Esusën chiacpadomboen nate bunquin ëmbi chiacpadomboen mimbi chuibantsiac. ⁷ Con tsusedpabon ambembi chiampidbédta nëbi matsesën adembidi ambembi chiaid tantienda. Nuquin Papan chiaidquo niactiapimbo yec bédambo icte bunquiota. ⁸ Aton dada uidënquo icmenuec titinquetanequid nuquin matses nec. Esus tantiaquido bédambo icnuec ¿mitsipadquo icpec? Nuquin Papa tantiaquieci ambi chiaid niaquenquo yec bédamboec tabadquid nec. Adquid unësash Nuquin Papa yacno nidash bédamboshë icquid iquendac. ⁹ Èbi adsho tantiaash: —Abimboen caic —queta. ¹⁰ Adec: —Abi yacno abëdi tabadendabi —quequin Nuquin Papan chiacpadomboen ënenquo icquin nanuna. —Esus tantiaquid unësacsho cuidenquo icquin unëstiapimbo icquidën Nuquin Papan abëdi tabadmendac —quec chieshtoenquo yec bédamboec tabadnuna.

¹¹ Ëmbi chuiboed chuibanta, mado. —Nuquin Papan chiacpadomboen nanuna —quequin chuibanta. ¹² Mibi nëbi caniaid neque. Bédamboec tabadta, mado. Ènden caniaidën: —Nëbi caniaid icquin Nuquin Papan chiaid mimbi tantienquo iquec —canushe. Bédamboec tabadta. —Esus tantiaquido utsibotsen ma ëbi yacpadec bédamboec tabadnu —quiash adta. Bédamboen chuibanquinc matses tantiaquinc Esus tantiaquinc Nuquin Papan chiaid niaquenquo icquinc caic bédamboec tabadta.

¹³ Èbi ano nidabi icnuc Nuquin Papan chiaid adenuidi chuibanta. —Nuquin Papan chiacpadec bédamboec tabadnuna —quequin Nuquin Papan chiaid isbanquin matses chuibanta. Aden bédamboen tantiameta. ¹⁴ Ènden mibi mamishquin chiondaid ¿ada tantie? Ènden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bédamboen chuibanquid Timoteyo iquendac —quequin chuipondash. Chieshtoenquo yec adquid icta, mado. ¹⁵ Ëmbi dada uaquin chuiboedtedi isbanshun ënenquo icquin ëmbi chiacpadomboen bédamboen nabanta, mado. —Ëmbi adosho isun ma ëmbi chuibanaidon: “Nuquin Papan chiaid chuibanquidquo yanosh,” ma ëbi canu —qeshun bédamboen chuibanta, mado. ¹⁶ —Nuquin Papan chiaid niacmane —quec mibibi bédamboec tantiadta, mado. —¿Adabi bédamboec tabadpeba? ¿Adambi Nuquin Papan chiaidquo muainquo icquin chuibampoba? —quec mibibi tantiadta. Bédamboec tabadquin Nuquin Papan chiaidquo ënenquo icquin chuibanta. Aden Nuquin Papan chiacpadomboen naic aidbéd mibi tabadendac. Mimbi chuibanaidobidi adoaindac.

5

Esus chuibanquidën bédamboen chuite

¹ Nuquin Papan chiaid chuibanquid icquin dada ènden caniaid chushcainda, mado. —Esus tantiaquidën nadoquid yendac —quequin bédamboen chui: —Con pabimboecquid nec

—quequin. Nēbi caniquid: —Con utsibimboecquid nec —quequin ademvidi bēdamboen chuiban, mado. ² —Con tabimboecquid nec —qeshun macho bēdamboen chuiban. Chido machobudabi icquidtedi chibibimboecnuc isquin: —Nēid chudtiadquio icchitebi —quenquio icquin Nuquin Papan chiaidquio chuibanta, mado.

Chido niantembo chiaid

³ Tanta, mado. Esus tantiaquidon abēdtan Esus tantiaquid icsho niantē nashunte chuinu. Niantē aton matses nibēdquid: —¿Tsuntsimbini nashumpatsiashba? —quequid Esus tantiaquidon nashunquid. ⁴ ¿Ada nianten tishaido icpec? Aidēmbi ani nashuntsiash. ¿Ada aton baba icpec? Aidēmbi aton chichi nashuntsiash. Aidēmbidi aton shanuachotsen nashuntsiash. —Ēbi nashundenē neque. Nēid nashunu —qeshun nashuntsiash. Aden ambi chiapadomboen nasho isash: —Bēdamboen naic —quetsiash Nuquin Papa. ⁵ Padnuc aton matses nibēdquidēnquio nianten Nuquin Papa chianequid: —Nuquin Papan ēbi nashuntsiash —qeshun. —Mimbi ēbi tantiaquieque. Ēbi nashunta, Papa —quequin Nuquin Papa chianequid niantē icsho abēdtan Esus tantiaquidon nashunquid. ⁶ Niantē utsimbien ambi tantiauidi naic. Petebēdta acteuīdi tantiaquin abi bunaiduidi naic. Adquidēn unēsacimbboecquin Nuquin Papa tantienquio iquec. Adquid Esus tantiaquidon nashunquio icquid. ⁷ Ēmbi aden niantē nashunte chuiboed Esus tantiaquido utsibotsen chuita, mado. —Aton matses nibēdquid niantē nashunenquio icsho: “Esus tantiaquido icsambo iquec,” utsibon canushe —qeshun chuita. ⁸ Aton shubun icquidotsen Esus tantiaquidon nashunquid. Abēd icquido menenquio yec pemenquio yec quec nashumēnenquio icquid icsamboshē iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquio icquid icsamboshē iquec.

⁹ —Nēidtedi chido Esus tantiaquido nashunquidombo iquec —quequin abi cuēmēdquid abi cuēmēdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquio 60ted matamec machobudaidquio. Aton bēnēuidtsēqui chudmedenedquio. ¹⁰ —Matses nashunquid nec —utsibon caid. Bacuē bēdamboen canuadened machon. Isedanquido bēdamboen isquid. Esus tantiaquido nashundenēquid. Matses daicsabudacsho nashunquid. Adec bēdamboec tabadquid: —Esus tantiaquido nashunquid icta —cata.

¹¹⁻¹² Utsi niantē machobudabi icquid: —Adquid icta —cainda. —Esusuidtsēqui tantiaquin abi tantiaquido nashunembi —queboedēmbi dada bunquin ambi chuiboedi nicabidansho isun utsibon: —Icsambo icquid nec —catsiashe. ¹³ Adquid shubu utsin shubu utsinquien isedben-isedbenec uspumbo yanash onqueteuidtsēqui buntsiash. Utsibo icsaiduidi chuibenēquidquio ictsiash. ¹⁴ —Adquid niantē machobudabi icquid dadan bedac bēdambo ictsiash —caimbi. Adoac bacuē tishoatsiash. Adshun codocaquin sicaquinc daēdcaquinc catsiash. Adec bēdamboec tabadsho: —Icsambo icquid nec —Esus tantiesabon catiapimbo ictsiash. ¹⁵ Adquid niantē machobudabi icquidēn utsin-utsinquien Esus tantienquio yanshun Satanasēn tantiamiapadomboen nac caosh. ¹⁶ Niantebēd icquid utsi ¿ada Esus tantiaquid chido icpec? Aidēmbi niantē nashunac bēdambo ictsiash. —Ēmbi nēid nashumbanuc niantē utsi aton matses nibēdquidquio Esus tantiaquido utsibon nashuntsiash —qeshun abēd icquidēn nashunac bēdambo ictsiash.

Esus tantiaquido chuibanquid chiaid

¹⁷ Tanta, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidēn bēdamboen naosh? Adquidēn Nuquin Papan chiaid bēdamboen tantiamēquinc Esus bēdamboen chuibanquinc casho ambi chuibanaidon bēdamboen isquin nashunquid. —Ma penu —qeshun menēquid. ¹⁸ Adembidi chuiguin Nuquin Papan ambi chiaid dada uamepampic. “‘Penuche,’ qeshun adosbitsecquid bitsi secamenuen manemiaid baca bēnē utsibon dēnēshquid. ‘Adec chonoadquidēn ma penu,’ qeshun isadaidbon dēnēshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “‘Naic cho. Mibi bēdamboen cuidquinc menenu,’ cac chonoadsho abi chonoa uaquidēn menēquid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

¹⁹ Padnuc Esus chuibanquid caic: —Nuquin Papan chiaid niac-niacsho isombi —quequin matses abentsēcshun chuisho: —Abimboen cachitec —cainda. Daēdshun chuisho: —Abimboen cachitec —cata. Adembidi abentsēc hotsecquin chuisho tantiata. ²⁰ Esus chuibanquidēn Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpenshun tantianubi adota. —Aden chuisho tantiashe dacuēdec: “Ēbitsen adembidi chushcapanundac,” qeshun ma utsibon Nuquin Papan chiaid niaquenquio icnu —qeshun chushcata. ²¹ Esuquidistubēdtan Nuquin Papan nuqui isec. Adembidi

Nuquin Papan abi yacnoshon uaido mayan bēdabon nuqui iseque. Ēmbi chuibocpadomboen nata. Min matsesēn mimbi tantiaidēnquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses ēmbi tantiaidquio neque. Chushcainquio iquembī —cainda.

²² Nuquin Papan chiaid chuibanquid icmenuen nuqui naondacpadomboen badedquio mamishenda. Mibi naid yuen isquioshon ambi chiaid yuen tantiaquioshon: —Bēdambo icquid nec —quequioshon nata. —Esus chuibanquid icta —mimbi badedquio caboedēn Nuquin Papan chiaid badedquio niacsho isash: —Ambi: “Adquid icta,” caidbēd Timoteyo icsamboshē iquec —utsibo quenushe. —Ēbēdtan chuibanquid icta —badedquio cainda. ²³ —Daicsabudteniaccosh. “Pucu paēmbō yan-yanebi,” quiosh —quiosh mibi caic, mado. Acteuiddi acashien mibi niaque. Actequid utsi paēmbō icquid pistsēc ac ma pucu bēdanuequin. ²⁴ Tantiā. Mibi padpiden chuinu. —Ēbēdtan namembi —canuen matsesēn naid bēdamboen tantiaata. Utsi aton matses ismec icsasho: —Icsambo icquid nec —badedi catsiash aton matsesēn. Utsibic ismenquio yec icsasho: —Icsambo icquid nec —quequin badedquio tantienquio icquin yuecshun istuidshumbi adotsiash. ²⁵ Utsien ismequin bēdamboen nasho: —Bēdambo icquid nec —badedi catsiash aton matsesēn. Utsimbic ismenquio icquin bēdamboen nabansho: —Bēdambo icquid nec —quequin badedquio tantienquio icquin yuecshun istuidshun adembidi tantiaisiash. Ēbi adsho tantiaishun: —Nuquin Papan chiaid chuibanquid icta —badedquio cainda.

6

Matses yuaido chiaid

¹ Matses yuabo Esus tantiaquido icsho naden chuita. —Min icbo Esus tantiesa icsho bēdamboen isquin ambi chiapadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiapadomboen nata —quequin yuabo chuita. ² Utsibi chuiquin: —Min icbo Esus tantiaquidbidi icsho: “Ēbipadquidi nec. Ambi chiapadomboen natiapimbo iquebi,” cainda. “Ēbipadquid icsho aid tantiaquin con icbon chiapadomboen nanu,” quequin min icbo bēdamboen nashunta —quequin yuabo chuita. Ēmbi chuiboedtedi Esus tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

³ Mimbi: —Nuquin Papan chiaid niaquenquio yec bēdamboec tabadnuna —quequin Nuquin Icbon chiaidquio chuisho: —Aden chuisho tantiatapimbo iquebi —quequin ambembi chiaid chuidquid icsambo iquec. Adquidēn chuisho tantienda, mado. ⁴ Aden icsamboen tantiaquidēn: —Ēmbi chiaiduidtsēqui bēdambo iquec —quequin icsamboen chuibanendac. —Mimbi icsamboen chuinuc ēmbimbo bēdamboen chiec —quec chushcanantiadquio iquendac. Abembi onqueteuidi bunendac. Adquid yuec onquesho tantiaish: —Utsi onquetiapimbo icnuc abentsēqui onquebudec —quec utsibo nēishendac. Adquidbēd chushcananec muauananec icsamboec tantiaishunanendac. ⁵ Pabiate shēcūē nibēdacimboen Nuquin Papan chiaidquio bēdamboen tantienquio yec chushcananendac. Nuquin Papan chiaid chuibanquidēn piucquid dadpen bedte danec chuibanquidbidi ictiadquio iquendac.

⁶ Nuquien Nuquin Papa tantiaquiec bēdamboec tabadec nuquin na dadpen bedte bunenquio yec bēdambo ictsiac. ⁷ Tishac chucactsēcnuc nuquin na nibēdpanēdash. Adem-bidi unēsquin nuquin na nuqui buantiapimbo iquec. ⁸ Nuquin pete dashcutedēd icnuc utsi bunenquio yec bēdambo nuqui ictsiac. ⁹ Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquio bednuen mēmunenquio icquin icsamboen nabantsiash. Aden Nuquin Papan chiaid niac-niacquin icsamboen naic quenenash adenuidi naic unēsash icsambo icquido cuidacno nidendac. ¹⁰ Adec piucquid natiambo bunquido aid bednuec baded-badedquiec icsadenendac. Adquido: —Esus tantiembi —queboedobi padenquio yanash: —Esus tantienquio yanchitombi —quec natiaic tabadendac.

Bēdamboec tabad, quiaid

¹¹ Mibi Nuquin Papa tantiaquidquio neque. Piucquid bedteuidi bunenquio yec bēdamboec tabadte bunquiota, mado. Nuquin Papan chiaid niaquenquio yec chieshtoenquio icquin Esus tantiaata. Matsesten tantieć nēishēmēnenquio yec bēdamboec tabadta. ¹² Utsibon chieshēnaqui chieshtoenquio icquin Esus tantiaquieć bēdambo icta. Unēsash Nuquin Papabēd tabadnuec adta. —Con Mado Esus tantiaquieć unēsacsho ēbēdi tabadmendambi —queshun Nuquin Papan Esus tantiamiac mimbi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimbi

tantiamiondaque. Adembidi aid tantiaquieç bēdamboec tabadta. ¹³ Abitedi uampidēn Nuquin Papan nuqui iseque. —Adquid nebi —quequin ancanquid dapa Ponso Pidato chieç dachuēdenquio icnēdaidēn Nuquin Icho Esuquidistuntsen nuqui iseque. ¹⁴ Esus tantiaquin chieshtoenquio icquin aidēn naidquio chuibanta. Nuquin Icho Esuquidistu choabi icnuç ěmbi chuiboed niaquenquio yec bēdamboec tabadta. —Esus tantiaquido icsambo iqueç —utsibo quetiapimbo icnuc adta. ¹⁵ Nuquin Papan tantiacpadēnquio aid ushēmbi Esuquidistu nidaidēn padpidec choendac. ¿Esus chomequid mitsipadquio icpec? Icsaisambo yec bēdamboshē icquid nec. Aid abentsēcquiobi abitedishun Icombo nec. Aidēmbi chuiquid utsibo abitedi namendac. Aidquio chuiquid utsin dēniactiapimbo iquendac. ¹⁶ Aid abentsēcqui unēstiapimbo icquid nec. Bēchamauanquieçsho istiapimbo yec utsibo tabadec. Aidi matsesēn istiapimbo icquid nec. Adquid icsho: —Mibiuidtsēcqui abitedishun Icho yec mibi bēdamboshē iqueç, Papa —quequin Nuquin Papa chianenuna ěnenquio icquin.

Aton na dadpen dayun uaquido chiaid

¹⁷ Aton na dadpen dayun uaquido naden chuita, mado. —“Con na dadpenquioshē icnuc ěbiuidtsēcqui bēdambo iquebi,” quenda. Nibēdantiapimbo icquid danquin mimbi dayun uaiduidtsēcqui tantienda. Nuquin Papambo tantiaquiota. Aidēmbi matses bēdambo icmuen aton na bedmec —cata. ¹⁸ Adquidobidi chuiquin: —Bēdamboec tabadquin utsibo nashumbanquiota. Adembidi cudasenquio icquin mitsana utsibo menianeta. ¹⁹ “Mimbi bēdamboen naoque. Ēbēdi tabadmequin mibi bēdambo icmendambi,” Nuquin Papa camenuen adota. Adash unēsacsho Nuquin Papan abēdi mibi tabadmendac padpidec unēstiapimbo icnuc —quequin aton na dadpen dayun uaquido chuita.

Pabadon ěnquin chiaid

²⁰ Ęmbi chuiboedquibidi adembidi bēdamboen chuibanta, mado. Nuquin Papan chiaid chienquio yec abembi onquesho tantienda. —Bēdamboen tantiaquin abimbo caimbi —quequidobi muasho tantienda. Adquidobēd chushcananenda. ²¹ Aden icsamboen chuisho tantiashun: —Abimbo caic —quequin utsin-utsinquien Esus tantienquio yanondashe. Adquido tantienda. Chieshtoenquio icquin Esusquio chuibanta. —Nuquin Papan con mado bēdamboen ispashun —quequin mibi tantiembi. Padi. Aidtedi chuiquin dada uaombi.

TIMOTEYON ISTE 2

Tauamboen Timoteyo chiaid

¹ *Pabado nebi.* Nuquin Papan tantiacpadomboen Esuquidistun: —Èbi chuibeneta —caidquio nebi. —Ambi chiampicpadomboen aton Mado Esuquidistu tantiaquid unèsacsho Nuquin Papan abèdi tabadmendac —quequin Esus chuibeneguidquio nebi. ² *Con mado icbobimboecquid mibi neque.* Mibi chuiquin nèid dada uanu, Timoteyo. —Nuquin Papan aton Mado Nuquin Icho Esuquidistubèdtan bédamboen isquin bédambo icmepashun —quequin mibi tantiambi.

Chieshtoenquo icquin Esus chuiban, quiaid

³ *Con tsusedpabon nacpadomboen Nuquin Papauidi tantiaquin ambi chiacpadomboen natiadquio iquebi.* Adquid icquin Nuquin Papa mibi chianembi. —Mibi tantiaquid Timoteyo bédambo iquec, Papa. Adquio icmec mibi bédamboshè iquec. Adquiouidi icmeta, Papa —quequin Nuquin Papa chianembi. ⁴ —Èbi nidnu —quesho tantiaash mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. ⁵ *Naden mibi tantiambi.* —Aton chichi Doida caidèn ani Eunisebèdtan aid daèdshumba Esus tantiabenguiacpadomboen Timoteyontsen nèbi Esus tantiaquiec —quequin mibi tantiambi. ⁶ *Adquid icsho mimbi tantiondaid padpiden mibi chuinu.* —Min Mayan nèidbèd tabadmeguin cuesambo icmequin Esus chuibame, Papa —quequin mibi mamishquin Nuquin Papa chiondami. Adoac aton Mayan mibèd tabadmiaic. Adoaid icquin dacuèdenquo icquin Esus chuibanta, mado. ⁷ *¿Nuquin Papan aton Mayan nuquibèd icmiacta nuqui natia dacuède? Padenquo.* Comapenen tantiaquid yec nuquibèd icquin nuqui cuesambo icmec. Adembidi Nuquin Papan Mayanèn tantiamiac nuqui matses bédamboen tantiec. Adembidi nuqui icsate bunaid namenquo icquin mēmunquidquio icnuc nuqui bédambo icmec.

⁸ —Adoaid nebi —queshun dacuèdenquo icquin Nuquin Icho Esus chuibanta. Adembidi dacuèdenquo icquin: —Pabado tantiaquiemi —cata. —Quènèn nauedtsaid Pabado tantiatipi —quenda. Utsibon cuestiadquio icquin chieshènaqui Nuquin Papan namiacpadechieshtoenquo icquin Esus chuibanuna. ⁹ *Nuquin Papan: —Bédamboec tabadquid icmequin con Mado Esus tantiamembi —caido icquin adonona.* ¿Nuqui bédamboecuidi tabadshoda Nuquin Papan nuqui bédamboen isbempondash? Padenquo. Èndenquimboshè nidaidbèda matses uabi Nuquin Papan: —Èmbi chiaid niac-niaquec icsambo icboedèmbi con Mado Esus tantiaasho cuidenquo iquendambi —quequin ambi chuipampicpadomboen nuqui Esus tantiamiac. ¹⁰ *Aden ambi chuipampid tantiamiabi icshumbic nèbi Esuquidistu matsesmeshun matses tantiamiac.* Adoac: —Abi tantiaquid unèsacsho ic-saido cuidacno nidmenquo icquin unèstiapimbo icquid icmequin Nuquin Papa yacno abèdi Esuquidistun tabadmendac —quequin nuqui tantiec. ¹¹ *Aden tantiaquin Esus chuibeneguidquio nebi.* —Èbi chuibeneta —Esusèn caondaic yec Nuquin Papabèda Esus tantiameguidquio nebi. ¹² *Aden chuibeneshobini chieshènquin quènèn nauedondash.* Adoacqui chieshtotiapimbo icquin Esus tantiambi. —Èmbi tantiaidquio comapenen tantiaquin nabanquidquio Esus nec. Adquid icquin: “Èbi tantienquo yanushe,” qeshun abi tantiameguin èbi chieshtomenquo iquendac. Nidaidèn choabi icquin Esusèn èbi chieshtoenquo icquid icmendac —quec dacuèdenquo iquebi. ¹³ *Tantia, mado.* Mibi chuinu. Èmbi abimbo chiondaidquio chuiban: —Nuquin Papan chiaidquio nec —queshun. Esuquidistu tantiaquinc matses tantiaquinc caquin adenuidi chuibanta, mado. ¹⁴ *Nuquin Papan Mayan nuquibèd iqueque.* Aidèn namiac èmbi chiondacadomboen Nuquin Papan chiaidquio chuiquin Esus chuibanta, mado.

Onesipodo chiaid

¹⁵ *Èmbi: —Cho —cac choenquo icboed mimbi tantiac, mado.* Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adechidi Piquedo caid chedo. ¹⁶ *Onesipodo caidèn nèbi bédamboen isposhi.* Èbi quènèn nauedacsho dacuèdenquo icquin isuan-isuanquin bédambo icmiosi. Adsho isun: —Aton shubun icquidobèda aid bédamboen ista, Papa —quequin Nuquin Papa chianembi. ¹⁷ *Aidèmbi nèmbi shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibèmbenequin istuidpondashi.* ¹⁸ *Mimbi isnubi Epeso yacnoshon aidèmbi baded-badedquien nashundeniondashi.* Adsho tantiaashun: —Nidaidèn padpidec choshon Nuquin Ichon Onesipodo bédamboen ispushun —caimbi.

2

Chieshtoenuo icquin chuiban, quiaid

¹ Chieshtoenuo icquin Esus chuibanta, mado. —Esuquidistun ëbi bédamboen isec. Aidën bédambo icmiac dayacquio icquin naimbi —qeshun chieshtoenuo icquin Esus chuibanta. ² Matses dadpeshun tantianuc ëmbi chuibansho mimbi tantiondac. Ëmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nëidën chieshtoenuo icquin Esus chuibantsiash —qeshun: —Mimbitsen chuiban —cata, mado. ³ Sondado bédambo icquidën nachimboen chieshtoenuo icquin bédamboen nabanuna. Matsesën chieshënuubi Esuquidistun chiapadomboenuidi nanuna chieshtoenuo icquin. ⁴ Sondadon: —Mibi bédambo iquec —camenuen aton chuiquid dapan chiapadomboenuidi naquid. Ambi tantiaid nainquio icquinc utsibon chiapadomboen nainquio icquinc caquin aton chuiquid dapan chiapadomboenuidi naquidquio sondado nec. Adomboembidi Nuquin Icbon chiapadomboenuidi nanuna, mado. ⁵ Ma nuquin matses titinquequidquio. ¿Mitsipadquio icpec? Aton uidën tanec aton matsesën chiaction abia titinquec chosho: —Bédamboec titinquiash —qeshun mauete menequid. Ambi chiaction titinquiabi icsho mauete menenquio icquid. Adembidi: —Mimbi bédamboen nao —Nuquin Icho camenuen ambi chiapadomboen chieshtoenuo icquin nabanuna, mado. ⁶ Ma nuquin matses tied uaquidquio. ¿Mitsipadquio icpec? Chonoadquidënuo dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ënenquio icquin. Adoac utsibon Esus tantiabentsiash. ⁷ Aden ëmbi chuiboed tantiata. Adsho Nuquin Icbon mibi bédamboen tantiametsiash.

Esuquidistu tantiata, quiaid

⁸ Utsibon chieshënuubi Esus tantiata, mado. Aidi matsesash isadaidbo tsusedpa Dabidën tsyuecquid nepanëdash. Nuquin Papan uincuemënëdaidquio yec abn iquec. Aidquio tantiaquota. Aid chuibenequidquio nebi. ⁹ Aden chuisho chieshënuubi bedshun icsambo icquid uidën uacimboen shocosh nacnenaidën mëtanac mëyadebi. ¿Ëbi aden uidën uacimboenda Nuquin Papan chiaid uidën uapadic? Padenquio. Ëmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. ¹⁰ Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquio icquin abëdi tabadmendac —quec chieshtoenuo iccobi quënën nauedonda yequi. ¹¹ Naden abimbo chiaidquido tantiash chieshtoenuo iccobi. —Abi bunaid ënshun Nuquin Icbon chiapadomboen naquid chieshëmënuquidën unës uacsho Nuquin Icbon abi yacno abëdi tabadmendac. ¹² Utsibon chieshënaqui chieshtoenuo icquin Esus tantiec unësash abi yacno nidendac. Nidacsho chuiquid icmiac utsibo namendac. “Esus tantiatiapimbo iquebi,” quequidobic: “Ëmbi tantiacmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac. ¹³ Aden abi tantiesabon ambi chiaid niac-niacsho isun Nuquin Icho Esusën ambi chiapadomboen naquidquio icquin icsaido cuidendac. Adembidi ambi chiapadomboen abi tantiaquido bédambo icmendac —quequin chiaid tantiashun ambi chiapadomboen naquin Esusën naid chuibanuna chieshtoenuo icquin.

Nuquin Papan chiaid isbanta, quiaid

¹⁴ Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquio chienquio yec ambembi chiaid chiec mibi chushcananqueque. Adenda. Adec chushcanansho tantiash matses icsambo yaneeque. Padi —cata, mado. ¹⁵ —Mibi bédambo iquec —Nuquin Papa camenuen bédamboen nata. —Dacuëdtiapimbo iquebique. Ëmbi naid ma Nuquin Papan isnu —qeshun adota. Ambi chiaid bédamboen isbanshun chieshtoenuo icquin Nuquin Papan chiaidquido chuibanta, mado. ¹⁶ Ambembi chiaid chuiquidobëd onquec tabadenda. Adec onquequido icsambo icboedi buëdanquec Nuquin Papan chiaid niac-niaquec icsamboshë yaneeque. ¹⁷ Tosho bedacimboec adquidën chiaid tantiaquido dadpen yaneeque. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. ¹⁸ Aidon Nuquin Papan chiaidquido chienquio icquin muaquin chiec. —Esus tantiaquido unësabi icquido nëbimbobi uincuenacimboec icpec. Unësacsho aton dada chuca uaquin uincuemenuquio iquendac —quequin muaquin chuisho tantiashun utsibon Nuquin Icbon chiaid tantienquio yanac. ¹⁹ Aidon Esus tantiabien icchitash. Nuquin Papan Esus tantiamiac ënenquio icquin Esus tantiatsempanëdash. Padnuc Esus tantiaquidombo dadpen iquec. Adquido chuiquid

ambi dada uamepampicpadomboen: “Ēbi tantiaquidombo nec,” quequin Nuquin Icbon tantiec.” Adnuc Esus tantiaquidēn: —Con Icho Esus nec —queshun ambi icsamboen naid ēnendac.

²⁰ Esus tantiaquido nadquio iquec. Shubu dapan tsitsan tabēcaid tabadac bimboecquid nec. Tsitsan abentse-abentsec icsactsēcquio icnubi utsi-utsiec bēdambo iquec. Icsactsēcquidēn icsa secanun sandoquid yendac. Bēdambo icquidēn di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ēnabi: —Esus tantianu —quetsēcquid iquec. ²¹ Esus tantiaquidquio ictiadquio yec: —Muaid chuisho tantiatipimbo icquin nēbi Nuquin Icbon chiapadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bēdamboen nametsiash.

²² Caniabon mēmunenquio icquin abi bunacpadomboen naquid tanenda, mado. Adenquio yec bēdamboec tabadte bunquiota. Nuquin Papan chiaid niacte bunenquio yec: —Nuquin Icho Esus nec —quequidobēdan chieshtoenquio icquin Esus tantiata. Matsesentantiec bēdamboec isanec bēdamboec tabadta. ²³ Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiapē? —cac chienda. Adquidēn chuisho tantiash matses chushcananondashe. Aidēn chiac chienda. ²⁴ Nuquin Papan chiaid chuibanquid chushcananenquio icquid nendac. Chieshēmēnenquio icquin aton matses bēdamboen isquid nendac. Adembidi nēishēnenquio icquin Nuquin Papan chiaid tantiamequid nendac. Utsibon chieshēnaqui chieshēnanenquio icquid nendac. ²⁵ Esus tantiesabon: —Mimbi Nuquin Papan chiaid chuisho tantiatipimbo iquebi —cac adembi nēishenquio icquin Nuquin Papan chiaidquio chuibanendac. —Nuquin Papan ambi chiaidquio tantiamiac: “Icsamboen naombi,” quequin ma Esus tantiesan tantianenu —quequin aden chuibanendac. ²⁶ —Aden Nuquin Papan ambi chiaidquio tantiamiac Esus tantienquio icboedēmbi Esus tantiabenshun abi yuaquidēn Satanasēn namiaid ēnendac. Aden Nuquin Papan chiapadomboen naidac —queshun chieshtoenquio icquin Nuquin Papan chiaidquio chuibanendac abi chuibanquidēn.

3

Icsambo icquido iquendac, quiaid

¹ Tantia, mado. Mibi chuinu. Esus padpidec choabi icnuc matses dadpenquioshē icsamboshē iquendac. ² Nadquido iquendac. Nēidic utsi tantiatipimbo yec abiuidsēqui datantiaidquido. Nēidic piucquid bedte comapenec bunquidombo. Nēidic: —Is. Ēmbimbo naiduidi bēdambo iqueque —quequido. Nēidic utsibo chieshēnec icsamboec onquequido. Nēidic amēn chiaid niac-niacquido. Nēidic anin chiaid niac-niacquido. Nēidic aton na nashunaqui nashumēnenquio icquido. Nēidic Nuquin Papan chiaid niac-niacquidombo. ³ Nēidic aton matses tantiesabo. Nēidic chiesh bēdanesabo. Nēidic muuanquido. Nēidic abi icsate bunaid ēnenquio icquido. Nēidic cuesanquido. Nēidic bēdambo icquid chieshēnquido. ⁴ Nēidic bēdambo icquid damianquiashic cuesunianquido. Nēidic bēdamboen tantienquio yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. ⁵ Nēidic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

⁶ Adquidon mibi yacnoshon shubu utsin shubu utsinquien isben-isbenac caosh. Adash chidoidquio icnubi shubun pudedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquieci tabadac caosh aid chidobo. ⁷ Aden icsambo icquidēn ambembi chuidenesho tantianeshun Nuquin Papan chiaidquio tantiatipimbo icpac caosh aid chidobo. ⁸⁻⁹ Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquio chuisho tantiashun aidon: —Mue nec. Ēmbimbo comapenen tantiaquin ismenu —queboedombi bēdiactsēc tantiaquin nacnenuidpampic. Adsho isun: —Abimbo cainquio iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiashun matses dadpenshun: —Muequi nec —capendac.

Nuquin Papan chiaid isbanec bēdamboec tabadte

¹⁰ Ēbien muaquidpenquio nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquio icquin matses tantiaquin Esusēn naid chuibeniondambi. Chieshēnaqui chieshtoenquio icquin

adembi chuibeniondambi. ¹¹ Ĕmbi aden chuibansho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —cāsho Nuquin Icbon nac padenquo icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquo bedshun cuēnoten se-sequin unēs uatsempondash. Adsho Nuquin Icbon nac unēsenuo iccondabi. ¹² Ĕbipadquido Esus tantiaquidotedi bēdamboec tabadtiadquo icsho adembidi utsibon comapenen chieshēnendac. ¹³ Padnuen chieshēmēnquidobēd bēdambo icquid damianquieic muaquido bēdiatsēc icsambo icboedi mauuananquieic buēdanquieic icsamboshē yanendac. ¹⁴ Mibi adquidpenquo nec, mado. —Ĕmbi isonaidon bēdambo icquidon abimbo chuibanondashi —quec Nuquin Papan chiaid niaquenquo yec bēdamboec tabadta, mado. ¹⁵ Ĕnden bacuēmpi icquin Nuquin Papan chiaidquo min matsesēn chuibansho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabēnēdac. Aden Nuquin Papan bēdamboen iste tantiametemo Nuquin Papan chiaid nendac. ¹⁶ Nuquin Papan chiaid aton Mayanēn tantiamiac matsesēn dada uapampic. Aidēn chiaid abitedimbo bēdambohē iquec. Aid isec onquequin: —Nuquin Papan chiacpadec bēdamboec tabadnuna. Esus tantiaquido yec icsainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec. ¹⁷ Nuquin Papan: —Ĕmbi chiaidquo tantiahsun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquo dada uamepampic.

4

Nuquin Papan chiaid chuisho tantienquo yaid

¹ Nuquin Papabēdan Esuquidistun mibi iseqe. Bēdamboen nata. Esusēn nidaidēn padpidec choshon abitedishun Icbomuo icquin unēsaido uincuemiaido unēsabi icquidobēdta chiendac. —Nēid ēbi tantiaquid ēbēdi tabadmembī. Nēid ēbi tantiesa cuidembi —quequin chiendac. ² Aidēn chiacpadomboen naquin Nuquin Papan chiaidquo chuibanta, mado. Matsesēn tantiatiaquido icnuc adota. Tantiatiapimbo icnubi adembi chuibanta. Esus tantiaquido icsasho isun: —Esus tantiaquido adesambo neque. Bēdamboembien natiad —quequin nēishēmēnenquo icquin chuīta, mado. Utsibo bēdamboec tabadsho: —Mibi bēdamboec tabadoc. Aduidequi tabadta —quequin chieshtoenquo icquin chuīta. Bēdiatsēc tantiatēcquido: —Esus tantiaquidon nadoquid —quequin chuibanta, mado. ³ —Yuecshun Nuquin Papan chiaidquo matses dadpenshun tantiatiapimbo iquendac —queshun nata, mado. Aden tantiatiapimbo icquidēn Nuquin Papan chiaidpenquo chuisho tantiahs: —Mimbi ēbi bunaidquo chuisho tantianu. Ĕbi chiec cho —quequin muaquid utsi-utsien abi yacno puduedmendac. ⁴ Pamumēdacimbocquin Nuquin Papan chiaid tantienquo icquin tsusedpabon ambembi chiampiduidi tantientac. ⁵ Aidēn nacpadomboen nainda, mado. Nuquin Papan chiaidquo bēdamboen tantiaquid yec bēdamboec tabadta. Adsho utsibon chieshēnaqui chieshtoenquo icquin Esusquo tantiahs, mado. Adembidi Nuquin Papan bēdamboen iste Esus tantiesabo chuibanta. —Esus chuibanquidēn nadoquid —caidtedi nabanta, mado.

⁶ —Ĕbi unēs uan ēmbi nacpadomboen: “Adota,” mibi caquid nibēdtsiasih —queshun mibi aden chiec nebi. Nēbi Nuquin Papan tantiacpadēn chieshēmēnquidon ēbi unēs uaic. ⁷ Utsibon chieshēnubi ēnenquo icquin Esusēn naid chuibeniombi. —Ĕbi bunaid bednu —quec comapenec tintinuiacimbocquin dayacquo icquin Nuquin Papan chiaidtedi naombi. Chieshtoenquo icquin Esus tantiaquidquo nebi. Adshobini nēbi unēs uaic. ⁸ Unēs uacshobini matsesēn naid abitedimbo tantiaquidēn Nuquin Icbon: —Ĕbi tantiaquin ēmbi chiacpadomboenuidi naic mibi bēdambo iccoque. Nuquin Papa yacno ēbēdi tabadmequin mibi bēdambohē icmendambi —caindac. Abi chote ushēn choshon aden Nuquin Icbon ēbi chiendac. Adembidi abi chosho iste bunquidotedi abi tantiaquido Nuquin Icbon abēdi tabadmendac.

Timoteyo: Cho, caid

⁹ Nēbimbobi ēbi isec cho, mado. ¹⁰ Utsibo nidanebon ēbentsēqui tsadebique. Demas caid aton na bedteuidi bunec ēbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobc nidaid utsi Damasia caid yacno nidosh. Aidtedi nidanebon ¹¹ Ducas abentsēqui ēbēd iquec. Madcos bedbētsenec cho, mado. Ĕbēdtan aidēmbi nēshunquo Esus chuibantsiashe. ¹² Tiquico caid Epeso yacno mibi yacno nidmiombi. ¹³ Shubu dadpen icquid Todoas caid yacno Cadpo cuēmēdquidēn shubun con na niamēdaccondashe. Con dashcute ēmbi dada uaidbēdta bedbētsenec cho, mado. —Abitedi buantiapimbo iquebi —queshun nēish yua bitsi nacnenaid dada uaiduidtsēqui bēta.

¹⁴ Shocosh nacnenquidën Adecandedo caidën comapenen chieshë nondashi. Aid Nuquin Papan cuidendac, mado. ¹⁵ Nuquin Papan chiaid ëmbi chuisho tantiatipimbo icquin icsamboen chuishunondashibique. Choquin aid isenda: —Ëbitsen icsamboen chuishunushe —qeshun. ¹⁶ Ënden tauamboen bedshun: —Quënën nauednu —cac cuidte chuiquid dapa ëmbentsëqui chuibampondambi. —¿Mitsipadosho isun ëbi bedo? Icsamboen nambo iccombi —capondambi. —Ëbëd icboedon dadpeshun: “Bëdambo icquid nec,” quequin ëmbi naid chuibanac ëbi quënën nauedquidon ëbi nidmetsiash —qeshun ëbëd icboedo: —Chiec cho —caqui choenquo iccondash. Aden ëbi cacuidondaido tantiaquin: —Nuquin Papan aido cuidenquo icpashun —caimbi. ¹⁷ Nuquin Icbombini nianenquo iccondash. —Isadaidpembo matses utsibo ma ëmbi naid chuibenenu —quequin cuesambo icmepondashi. Adondaic icshobini chieshëmënquidon: —Cuesnu —cabededpondash. Nuquin Icbon nac aid matsesën unës uainquo icpondashi. ¹⁸ Padpiden chieshëmënquidon ëbi caic: —Ma mëyanac chieshtoshon Esus tantienquo yanu —casha Nuquin Icbon nac chieshtoenquo ictsiabi. —Nuquin Icbombidi abi yacno ambi matses dadpen namiacno abëdi ëbi tabadmendac —qeshun: —“Nuquin Icho bëdamboshë iquec,” canuna ënenquo icquin —caimbi. ¹⁹ Mibi yacnocquido: —Mibi caic: “Unësquo iquec,” quiosh Pabado —quequin chuiban, mado. Nëidic Aquida caid. Nëidic aton chido Pidisida caid. Nëidic Onesipodo caid chedo. Aidedi aden chuiban. ²⁰ Mimbi isondaic Edasto caid shubu dadpen icquid Codinto yacno tëshëdondash ëbi chonoc. Utsibic Tëdopimo caid aton dada icsabudacsho shubu dadpen icquid Mideto caid yacno nianondambi. ²¹ Ue tsasi iquenuanquid taënushe. Baded cho, mado. Doma yacnocquido nëmbo icquidon: —“Timoteyo unësquo iquec,” quequin dada ua —caposhi. Nëidic Eyobudo caid. Nëidic Pudente caid. Nëidic Dino caid. Nëidic Quëdaudia caid. Nëidic Esus tantiaquido nëmbo icquido utsibotedi. Aidedi adosh. ²² —Nuquin Icho Esusën abëd icquin con mado bëdamboen ispashun —quequin mibi tantiambi. Padi. Aidedi chuiquin dada uaombi, mado.

TITON ISTE

¹ Pabado nebi. Nuquin Papan chiacpaden chuibenequid nebi. Adembidi Esuquidistun, Èbi chuibeneta, caidbidi nebi. Aden chuibanac Nuquin Papan cuènaido Esuquidistu tantiadonequidquo ma icpanuna. Adquid iquec ma bédamboec tabadpanuna. ² Muesa Nuquin Papa nec. Adquid icquin, Èmbi ènden chiampicpadomboen ènenquiocquin Esuquidistu tantiaquido èbèdi tabadendac, quequin ma aidon tantiapanueshun adomboen chiaid chuiquidquo Esuquidistun icmiondashi. ³ Ambi tantiampicpadèn ambi chuiampicpid Esuquidistu tantiameneuquin aidèn chuibeneta caid nebi.

⁴ Èmbi chuibanac Esuquidistu tantiaquid mibi yampondac, Tito. Adquid yanshun Esuquidistubèd icquid nebi, quequin èmbi tantiacpaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash èbi icsaid cuidenquo yec Nuquin Papa bèpiscudac, quequin ma ènenquiocquin mimbi tantiapanuna. Adecbidi Nuquin Papabèd tabadendabi, quequin tantiapanuna, Tito.

Quideta yacno nidshun Titon natequid

⁵ Èmbi nauidboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma Quideta yacnocquidon èmpanuna. Adembidi, shubu dadpen icquid uano-uanoecquid yacno nidshun èmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bédamboen tabadmenuequin chuiquid icta, quequin adquiduidquo chuita, Tito. ⁶ Mimbi Esuquidistu tantiaquid utsibo isbanquin bédamboen tabadmequin chuiquid icta caid nadquo ictiad, Tito. Bédamboec tabadquid ictiad. Adecbidi chido abentsèc inquid ictiad. Aton bacuèbotedi Esuquidistu tantiaquidobidi ictiad. Adquidèn bacuèbo icquin bédamboec tabadquin aton papan chiaidbèdta aton titan chiaid chieshenquiocquin nabantiaid. ⁷ Aidi utsibèd bédamboec tabadquin, Nuquibi nanuna, qeshun utsibèd onquenquiocquin ambibi tantiacpadomboenuidi nabanesa ictiad. Adecbidi badedquo nèishesa ictiad. Adecbidi paèmbocquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. ⁸ Adecbidi Esuquidistu tantiaquid utsibo yuedquid ictiad. Adecbidi utsibobèd bédamboec tabadte bunquid ictiad. Adecbidi utsi bédamboec tabadsho tantias, Cuishon, quec tabadquid ictiad. Adecbidi bédamboen tantiaquin, Naden naic icsatsiabi, qeshun naisa ictiad. Adecbidi, Naden naic bédambocquid yantsiabi, qeshun adomboen naquidquo ictiad. Adecbidi abimbo chuiquidquo ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bédamboen tabadmequin chuiquidquo icta, quequin chuita, Tito. ⁹ Aden utsibo isbanquin bédamboen tabadmenuequin chuiquid icta, cashun nèid aido chuita. Nuquin Papan chiaid chuca uainquiocquin bédamboen chuiban. Aden mimbi chuisho tantias ma utsibo bédamboec tabadpanuna. Adembidi Nuquin Papan chiaid chuca uaquidèn chuibansho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsias, quequin mimbi utsibo chuiquid icta caido chuoata, Tito.

¹⁰ Quidetabo nad iqueque. Chuinu. Tantia. Abi chuiquidèn chiacpaden naisa Quidetabo dadpen iquec. Abimbo chiosh, camenuquin abimbo chiacbimboec aido onquec. Dadpeshun isadaidbon nacpadomboen nanuequin, Shui dèbid dètemeta, quequin Quidetabon chiec. ¹¹ Adquidon shubu utsin-utsinquec puduedshun ambi tantiaid icsa chuibanac utsin-utsinquent tantias cuèshèdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bédamboen chuibanquin ambi muaquin chiaid èmeta, Tito. ¹² Quidetabon matses ènden icnèdaid abentsècshun naden aton matses chuipanèdash. “Quidetabo muaic chuinanquidommo nec. Aben icquid yuatemaibimboec uimanèmènkido nec. Chonoadenquocquin nua peshun nua actenequido neoaic,” quequin Quidetabo ènden icnèdaidèn chuipanèdash. ¹³ Abimbo chuiquidènquo aden chuipanèdash. Aden chuipanèdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. ¹⁴ Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tantiasa ma icpanuna. Aden mimbi chuibanac abimbo chuiquidèn chiacbimboen niacquidon chuisho ma tantiasa icpanuna. ¹⁵ Nuquin Papan Esuquidistu tantiamiaidèn icbon chiaid bédamboen isoaic. Adomboembidi ambi uabanaid isec. Adash abitedi bédambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nèid mishtemaid nec.

Nëid utsi petemaid nec. Nëid utsi actemaid nec, quequin chuibanquidën chiaid tantiec. Aden tantiec aton tantiate icsabudec, Icsaobi, quequin tantienquio iquec. ¹⁶ Nuquin Papa tantiembi, qeshumbic Nuquin Papan chiacpadomboen niacquin tantiesa nebi, quichimboc tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquio adquid neoaic. Naid bëda natiapimbo icquid neoaic, Tito.

2

Esuquidistu tantiec iccuededquido tantiametequid

¹ Icsateuidi bunquid icnubi mimbi Esuquidistu tantiaquido abi tantiadonequidquio icmenuequin chuibanquin tantieme. ² Mimbi paëmbocquid nua aquenquio icteniacpadomboen Esuquidistu tantiaquid tsusiobo chuibanquin tantieme. Adembidi, Mibi bëdambocquid nec, utsibo camenu, quec bëdamboec tabadtenequin tsusiobo ismequin tantiemeoa. Adembidi, Naden naic icsatsiabi, qeshun mimbi nainquio yacpadomboen mimbi bëdamboen tantiaid aido chuibanquin tantiemeoa. Adembidi, Naden naic bëdambocquid yantsiabi, qeshun adomboembidi naquid nebi, quequin tsusiobo chuibanquin tantiemeoa. Adembidi mimbia Esuquidistu tantiadoniacpadomboen pausunaid icquin ma adquiobidi tsusiobotsen yampanueshun tantiemequin chuibanta. Adembidi, Esuquidistu tantiec utsibobëd tantiananec mibi tabadteniacpadomboen chuibanquin tantieme. Adecbidi, natiatequid iquendac, quequin Esuquidistu tantiesa uainquioquin abi choate mimbi caimbudacpadomboen chuiquin tantiemeoata, Tito.

³ Adembidi, Esuquidistu tantiaquid ënden machoaido tantiamenuequin chuiban. Nuquin Papan bëdambocquid icmiaid nebi, quec bëdamboec mibi tabadteniacpadomboen tantiemequin chuioa. Adembidi, utsi icsamboen chuiquid iquenda, quequin chuibanquin tantiemeoa. Adembidi, mimbi paëmbocquid nua aquenquio yacpadomboen chuiquin tantiemeoa. Mimbi bëdamboen nabanaid nëbi machocuenaido ismequin tantieme, quequin ënden machoaido chui, Tito. ⁴ Aden chiac ënden machoaidon aton bënë aton bacuëbo chedobëd abi tabadaid tantiamenuequin nëbi machocuenaido bëdamboen ismepec. ⁵ Adembidi aidën bëdamboen tantiaquin, Naden naic icsatsiabi, qeshun nainquio iquec. Naden naic bëdambo ictsiabi, quequin naquid, quequin ënden machoaidon nëbi machocuenaido chuibanquin tantiemeoapec. Adembidi, Mibi inesa chudmenquio yec tabada, quequin ënden machoaidon nëbi machocuenaido chuiquin tantiemeoapec. Adembidi, aton shubun tabadquin ambi nabanacpadomboen ismequin aidon nëbi machocuenaido tantiemeoapec. Adembidi, utsibo bëdamboen tantiaquin ambi nashunacpadomboen ismequin ënden machoaidon nëbi machocuenaido tantiemeoaic. Adembidi, aton bënë chiacpadomboen nabanquin nëbi machocuenaido ismequin tantiemeoaic. Aden ënden machoaidon abi ismiacpadomboen nëbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

⁶ Adembidi, caniabo chuibanquin tantieme, Tito. Naden naic icsatsiabi, quequin nainquio iquemi, quequin mimbi bëdamboen tantiacpadomboen caniabo tantiemequin chuioa. Adembidi, Naden naic bëdambo mibi icpec, quequin mimbi bëdamboen tantiacpadomboen aido tantiemequin chuioa. ⁷ Bëdamboec tabadaid tantiemequin ismenu, quec mibibi bëdamboec tabadteneta. Mibibi icsainquioquin ismequin tantieme. Adembidi mamënenquioquin bëdamboen chuiquin tantieme. ⁸ Adec mibibi bëdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chieshëquid mibi icsamboen chuitiapimbo yec tabadendac.

⁹ Adembidi yuabo chuiquin, Bëdambo iquebi, min icbo camenuequin ambi chiaidtedi chieshenquioquin nabanta, quequin tantiameta, Tito. ¹⁰ Adembidi, min icbon na ampenquioquin bëdamboen dayun uaquin nashunquin min icbo ismeta, quequin yuabo tantieme. Aden Esuquidistu tanquin nabansho isun min icbo: Con yua Esuquidistu tantiaquid yec bëdamboshë yanac. Con yua bëdambo icmequidën chiaid tantianu, quendac icbo.

¹¹ Nuquin Papan matses abëd icmenuequin matses icsaid bedshuntequid Esuquidistu icmenuequin chomepanëdash. ¹² Aden chomiatic nidaidën tabadquin utsibo tantiaquin Nuquin Papan chiacpadomboen naquin ismiatic adomboembidi naic bëdamboec tabadquid. Nuquin Papan bëdamboen tantiamiac bëdamboen tantiasho, Aidën bëdambo icmiaid icquin naden naic bëdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantieme, Tito. ¹³ Nuquin Papapadquid con Icbo Esuquidistu choaic, quequin caimbudec bëdamboec tabadebi, quequin chuiquin tantiemeoa. ¹⁴ Nuqui cainaid: Èmbi con utsibo caid ëbipadquid iquendac,

quiash nuqui icsaid bedshunash abided cuidadec unēspanēdash. Adacsho aid tanti-
 aoidquio yec bēdamboec tabadquid nec, quequin chuiquin tantiamē, Tito. ¹⁵ Ĕm̄bi chui-
 boedtedi chuibanquin tantiamē. Mimb̄ia tantiaquid icquin, Ĕm̄bi chiacpadomboen na-
 banec tabadteneta, quequin Quidetabo chuioata. Mimb̄i chiacpadomboen nainquiocsho
 isun cuembo chuioata. Adecbidi, utsibon mibi icsamboen chuitiapimbocnoc bēdamboec
 tabadteneta.

3

Utsi tantiaquin nabantequid

¹ Esuquidistu tantiaquidtedi bēpiscudmenquiocnuequin naden chuibanta, Tito. Min tsu-
 sibon bēdamboen chiaid naquimbi adembidi mibi chuiquid utsibon bēdamboen chiaid
 chieshenquiocquin naban. Adembidi, utsibo tantiaquin nashunta, quequin Quideta
 yacnocquido chui. ² Adembidi, Utsi muaquin chienda, quequin chuioata. Adecbidi,
 Utsibobēd tantiananec bēdamboec tabad, quequin chuioa. Adembidi, Mimb̄i naiduidi
 tantienquiocquin nabanta, quequin chuioa.

³ Ĕnden Esuquidistu tantiesa nuqui iccondac. Adquid icquin Nuquin Papan chiacpadom-
 boen nainquio nuqui iccondac. Adquid icquin nuqui bunacpaden nabanec nuqui icsaded-
 icsadedondac. Utsibobēd icsamboec nuqui cuidnampondac. Adembidi, utsin bēdamboen
 isaid icsho isash nuqui nēishpondac. Adecbidi utsibobēd nēishash nuqui chushcanpon-
 dac. ⁴ Adquid nuqui icnuc matses tantiec abēd icquid icmenuec nuqui icsaid bedshunash
 abided cuidadec Esuquidistu chopanēdash. ⁵⁻⁶ Adec choash cuidadsho isun Nuquin Papan
 Esuquidistu nuqui tantiamiac. Adoac abi tantiaquid icsho isun adquidtedi Esuquidistun
 aton Mayan meniac. Adoac, Bēdamboen nasho abi yacno tabadmendac, quenquio yec
 nuqui tabadec. Aidēnquio nuqui icsate bunaid tantiamequioquin nuqui ěmec. ⁷ Adec
 aton Mayan nuquibēd icsho isun, Bēdambocquid nec. Aidtedi ěbēdi tabadendac, quequin
 Nuquin Papan tantiec. ⁸ Ĕm̄bi chuita, quequin chiaidtedi abimbo iquec, Tito. Aden
 tantiaquin Quideta yacnocquido chuiban Esuquidistu tantiaquid icquin ma adomboen
 nabanec bēdamboec tabadpanuna. Ĕm̄bi chiacpadomboen Esuquidistu tantiaquidtedishun
 nadenec utsibobēd bēdamboec tabadquid nec, quequin chuita.

⁹ Adec tabadec min tsusedpabo chiec utsibēd nēishnanash icsamboec onquenda, quequin
 Quidetabo chuita, Tito. Adembidi, aton tsusedpabon naden nata quequin chuinēdaid
 chuiquin chushcanu qesho adembidi adenda, cata. Aden chiaid Nuquin Papa yacno
 mibi puduedmetemaid nec, quequin chuita. ¹⁰ Adec onquequin Esuquidistu tantiaquido
 cuēshēdmenequioquin chuibanquid icsho bēdamboen tantiamenuequin chuiban. Aden chiaqui
 niacbidanquin adombobidi aidēn chuioasho tantiashun aidi comapenen chuibanquin
 tantiameoa. Aden chiaqui padpiden niacbidanquin adombobidi chuioasho tantiashun
 cacumeta, Tito. ¹¹ Adquid ambi icsamboen tantiacpadecuidi tabadquid neque. Adota.
 Mimb̄i chiaqui adecuidi tabadquid Nuquin Papa yacno nidtiapimbo yec abibi cuidadte-
 quid nendac.

Utsibo chuiquin chiaid

¹² Nēbi utsibo chuinu. Tantia. Adtemas Tiquico chedo ěbēdi iquec. Abentsēqui Quideta
 yacno nidmembi. Aid mibi yacno choambien mimb̄i tantiamedonequin chuibanquin
 naimbudnu quiash Nicopodis yacno nidoata, Tito. Ue dapa sequenuc Nicopodis yacno
 tabadnu, quianec nidendabi. ¹³ Matses icsasho cuidte chuiquid, Senas mibi isbidanec
 Apodosbēd udi nidec. Aid daēdi mibi yacno chosho yued. Nidnu, qesho aton na nibēdsho
 isun menequioquin bēdamboen nidme. ¹⁴ Peshun acnu, quequin Esuquidistu tantiaquidēn
 chonoadquin nabanquid. Utsi nashunquin adombobidi nabanec tabadquid. Aden
 nabanec tabadsho isash utsibo Esuquidistu tantiaquidquibidi yanendac.

¹⁵ Mibi tantiec tabadebi, quequin Tito chuita, ěbēd icquidon cacpadomboen dada uaimbi.
 Adembidi mibēd icquido Esuquidistu tantiaquido tantiec ěbēd icquido tabadoaic.

Esuquidistun, Bēdambo iquebi, camiaido ma mibitedi icpanuna. Padi. Aidted chiombi,
 Tito.

PIDEMONËN ISTE

¹ Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon. ² Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiacobimboen Esuquidistu tantiaquid icsamenuequiv cacumequid Adquipo nec. Aido min shubun Esuquidistu tantieci iccuededquido iqueque. Ëmbi dada uaid bedash isec onquequin aido chuiota, Pidemon. ³ Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icanuna.

Nuquin Papa chiec onquiaid

⁴⁻⁵ Pidemon Nuquin Icho tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantias, Pidemon tantieci bëdambo iquebi, Papa, quequin Nuquin Papa chiec onquebudebi, Pidemon. ⁶ Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mibi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

⁷ Aden ëmbi Nuquin Papa chuibudacpadomboen mibi naic. Pidemonën Esuquidistu tantiaquid utsibo tantiaquin nashunec, qesho tantias bëdambo iquebi, Pidemon.

Onesimo tantiaquin chuidoniaid

⁸ Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mibi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquemb. ⁹ Tantiananquid nuquibi icquin aden chienquio iquemb. Tsusio budobi. Adquid icquin Esuquidistu chuibansho padpiden quënën nauedoshi. ¹⁰ Quënën nauedaid icquin ëmbi Esuquidistu chuibanac abi tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mibi nashunondacpaden aidi bëdamboen tantiaquin nashunoatsia? Pidemon. ¹¹ Ënden min yua icquin mibi chiacpadomboen mibi nashunenquio iccondaidëmbi nebi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

¹² Aidi mibi yacno nidmeoaimbi. Con dayunquio icquid nidmenu, quiash aid tantieci unësqiuo tsadebi, Pidemon. ¹³ Esuquidistu chuibansho quënën nauedshun tataniac caputiapimbocsho mibi ëbi nashuntiapimbo iquec. Adec mibi nashumëntiapimbocnobi Onesimombini nashunosh, qeshun nidmetiapimbocquimbi mibi yacno nidmemb. ¹⁴ Onesimo ëbëdi tabadmenuequin chuita, mibi catiapimbo iquebi. Mimbibi aden chiac bëdambo ictsiash. ¹⁵ Yuecash cuëshëdenquio yec Pidemombëd Onesimo tabadoaindac, quequin Nuquin Papan tantiondacpadquic mibi yacnoësh cuenëdaid mibi yacno nidash Onesimo tabadtsiash. ¹⁶ Onesimo min yua iccondaid Esuquidistu tantiaquid yansho mibi con utsi caid aidi nendac. Ëbëd icquin natiapimbocsho aidën nashunec. Mibi yacno nidshun mibi chuisho Esuquidistu tantiaquid icquin chieshenquiocquin bëdamboen mibi nashunendac.

¹⁷ Pabado ëbëd isedanquid nec, qeshun mibi ëbi yuedondacpaden Onesimo yuedta, Pidemon. ¹⁸ Con na utsibëdtabi con na bedtequid Onesimon bedaccondash, quequin mibi chiacdedi mibi meneoaimbi. ¹⁹ Aidtedi meneoaimbi, quequin ëmbibi dada uaimbique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon. ²⁰ ¿Aden ëbi nashunuequinda mibi Onesimo ëbibimboecsho bëdamboen tantiaquin nashumpatsia? Aden mibi aid nashunuc bëdambo ictsiabi. ²¹ Ëmbi chiacdedi daëd uaquin mibi natsiac, quequin tantieci tsadebi, Pidemon.

²² Nëidtsen chinu. Tantia. Ëmbi tantienquiocnoc Pabado chonoshe qeshun abi ushondaid nacneneshun nacnenta, Pidemon. Mibi ëbi tantieci Nuquin Papa chiec onquiacpadomboen badedquio Nuquin Papan mibëd icmepashuni.

Utsibo chinu quiaid

²³ Esuquidistu tantiaquid utsibo ëbëdi iquec. Aidon chiaid chuinu. Tantia. Epapadas, abembi ëbëd icnuec quënën nauedadondaidën: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon. ²⁴ Madcos yec Adistadico yec Demas yec Ducas yec quec ëbëd icquido iquec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidedishun ëmbi Esuquidistu chuibanac-padomboen chuibanoaquido nec.

²⁵ Nuquin Icbo Esuquidistun mibitedi bëdambocquid icmebanacpadquiec ma tabadoapana, Pidemon.

Padi. Aidedtada uombique. Isec onqueta.

EBEDEYON ISADAIDBON ISTE

Abi yacnoshon ambi uaidon Icbombo Esuquidistu nendac

¹ Ĕndenquimboshē Nuquin Papan ěmbi chiacpadomboen chuibanta cac adomboembidi abēd icquido tsusedpabon chuibanoapampic. Abentsēc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bēda budmiac aidēn chiacpadomboen tsusedpabon chuioapampic. Adembidi nadatiambocquin uabanquin ismequin chiac adomboembidi chuioapampic. ² Nēbi tsyuecquio Nuquin Papan chiacpadomboen abipadquiocquidēmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubēda uashun aidēnquiocquidtedi aton Papabēdan uabanampidquio aton Madombo nec. ³ Aidi, aton Papa bēdaidquio yampidpadquidquioibidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubēd aidēnquiocquidtedi adquiuoidi iquec. Aidi aton Papan chiaid niaquesambo yec matses icsaid bedshunash abided cuidadec unēsash, Ĕmbi bēdamboquid icmebanaid matses nendac, quequin tantiashic abuc nidoash Nuquin Papabēd tabadoapanēdash aidquioibi. ⁴ Ad icnuc ambi abi yacnoshon uaido abipadquid nibēdec. Aidon con Icbombo caidquio nec. ⁵ ĤAmbi abi yacnoshon uaid mayan bēda isec:

“Con mado mibi nec.

Ĕbi min papa nendac, quepecta Nuquin Papa iquec? Padenquio.

Adecbidi:

ĤNēidēn Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

⁶ Abēd Abiambo Yampidi nidaidēn tabadash choasho isun Nuquin Papan ismequin:

“Nēid con Madombo Abentsēqui nec. Aidquio tantiec con Icho nec, quec cuishon quec, ambi naid chiec cuēdēn, cac aden ambi abi yacnoshon uaido mayan bēdabo chuibanec cuēdēncuededendac.”

⁷ Ambi abi yacnoshon uaido mayan bēdabo naden Nuquin Papan chiec:

“Ĕmbi chiacpadequi cunquequid yanec.

Adecbidi, ěmbi chiacpadequi cuēte nēdēnquedote iquendac.”

⁸ Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ĕnenquiocquin ěbēdan Chuiquid Abentsēcquio mibi iquendac.

Adecbidi namequid bēdaidquio mibi iquendac.

⁹ Ĕbipadquid iquec bēdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ěbi yacpadquidquio Icho Abentsēcquioibi mibi nec. Mibēd icquido adquid nibēdec.

Mibi abentsēqui adquidquio iquec. Adquid iquec, Bēdambo iquebi, quec mibi cuishon quendac.”

¹⁰ Adembidi Nuquin Papan naden aton Mado chuioaic,

“Tauamboen nidaid abubēda uashun aidēnquiocquidtedi mimbi uabampampic.

Aidtedishun icbombo mibi nec.

¹¹⁻¹² Aidtedi ěnēdendac.

Mibien nibēdantiapimbo yec abi tabadendac.

Aidtedi dashcute shēnibudaid niacbimboen chuca uaindac.

Mibien Abiambo Yampid yec abi ěnēdesa mibi iquendac.

¹³ Nēbi cainec ěbēdquio tabadec cho.

Mibi chieshēnquidtedi nibēdquio icmenun nabono. Chiata,”

quequin Nuquin Papan chiampic. ĤAmbi abi yacnoshon uaido mayan bēda aden chuipampidta nepadic? Padenquio. Esuquidistu aden chuipampic. ¹⁴ Ambi abi yacnoshon uaido mayan bēdabo Nuquin Papan, Ĕbēd tabadtequidombo nashunta, caido nec.

2

Ambi chiaid tantiesa icchitomane, queshun tantiadonequiota caid

¹ Adec abitedishun Icbombo aton Mado icnuc ambi chiaid chieshēnchitomane queshun tantiadonequieq tabadnuna. ² Ĕndenquimboshē ambi, Naden nata, quequin chiaid ambi abi

yacnoshon uaido mayan bédabo chuimiapadomboenuidi naisa icsho isun Nuquin Papan cuidpampic. ¿Aden éndenquimboshê ambi chiaid chieshênquid ambi cuidpampicpaden ³ nêbi icquidtsen ambi chiaid chieshênsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanêdash. Adoac, Êbi yacno Yuedanquid nebi, quequin aton Madonquio Esusêmba chiambic adomboembidi abi tantiaquidontsen chuiopondashi. Aden Esusên chiaid tantiaquidon chuibanubien, ⁴ Êmbi chiaidquio chuibanoapec, quequin ismenuequin aton Mayanên Nuquin Papabêd icquidên tantiamebanacpadomboen nadatiambocquin utsi-utsien bédamebanquinc, mayan icsa dapuduedmequinc, unêsaid uincuemquinc caquin adquidên-adquidênquien nabededpanêdash.

Matses icnu quiash Esuquidistu matsespanêdash

⁵ Adembidi chuinu. Tantiata. Abi yacno Esuquidistu tantiaquido choash tabadsho isun, Nêido êbi yacnoshon êmbi uaido mayan bédabo mibi chuiquid nec, quenquio Nuquin Papa iquendac. ⁶ Éndenquimbo aden tantiaquin dada uaquin naden Nuquin Papa chiec Dabid pado onquepampic:

“Tantiaquiono. Êbi chui, Papa. ¿Atotsieshun matses mimbi uaid pistêcquio icsho mimbi comapenen tantiatequid aido icpec? Papa.

Adembidi, ¿Atotsieshun Adanên tsyuecquido mimbi nashumpe? Papa.

⁷ Nêbi chuitan mimbi cac mibi yacnoshon uaid mayan bédan adomboembidi chuioc matsesên nabanec.

Yuecquiocshon mibipadquid matses mimbi icmendac.

⁸ Adquid icmeshun mimbi uaidtedishun icbombobidi aid mimbi icmendac,”

quequin abimbo chiampid nec. Nêbi abitedishun icho matses mimbi icmiambo iquec.

⁹ Utsien Nuquin Papapadquidquio yequi matsesun Nuquin Papan tantiamiapaden ambi abi yacnoshon uaido mayan bédabon chiac nabamboedi nêbi aton Papabêd tsadec abitedishun Icbombo yanac. Aidi Nuquin Papan chiacpadomboen nanuec nidaidênshun tishac matsesash matses tantiec matses icsaid bedshunash abided cuidadec unêsash abitedishun Icbombo yampanêdash.

¹⁰ Nuquin Papa abitedi uaquidquio icnuc ambi tantiapadec iquec. Adquid icquin ambi, Matses icsaisa icmeshun con bacuê icmembali, quequin tantiapaden êbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanêdash. Aidi matses yec natiamianquiequi icsaisa yec unêsash uincuenash bēyucanec abi yacno dectatonepanêdash ma Nuquin Papan, Matses con bacuê icmembali, quequin tantiaido êbi tsibanec dectatonepanu quiash. ¹¹ Matses bédambo icmequid Esuquidistun Papa ambi bédambo icmebantequidon Papabidi nendac. Aton Papa Abentsêqui icnuc Esuquidistu Nuquin Papa yacno choash, Con utsibo nec, quependac ¹² aton Papa chiec:

“Mibi chuiquin con utsibo tantiamenu, Papa.

Aidobêd tabadquimbi mibi chuinu. Tanti, Papa, quependac.”

¹³ Adembidi chuioc:

“Mibi tantiaquin mimbi chiampicpadomboen nabanash choaobi, Papa.

Êbi tsibantequid mimbi bédaidquio icmiaidquio bēc choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuiampic.

¹⁴ Matses namibêd intacchoquid yec unêstequid icsho mênchicquid icnu quiash Esuquidistu matsesash unêstequid yampanêdash. Ma matses mayan icsan dacuêdmequinc dēcatemēntiapimbo yampanu quiash matsesash unêstequid yampanêdash ¹⁵ ma mayan icsan ambi dacuêdmiaido ambi yuaido icboedi matses êmbi mênchictequid ma icpanuna. ¹⁶ Êmbi uaido mayan bédabo unêstequid icsho mênchicnu, quenquio yec matsesash Esuquidistu unêsapanêdash. Abadauanên tsyuecquido mênchicnu, quiash matsespanêdash. ¹⁷ Aden ambi chiapaden nanuec matsespadquid yampanêdash. Adec matsesash matses nēnacpadquieic nēmpanêdash. Abi bundoacpadquieic bundopanêdash. Abi natiacpadquieic natiatequid icpanêdash. Mayan icsan icsamenuequin tanaidbidi icpanêdash. Matses yanash icsaisa yec matses icsaid bedshunash abided cuidadec unêsbandêdash matses Nuquin Papan bédamboen istequid icmenuec. Adecbidi, Matses icsaisa yanabi yec chuibanec Nuquin Papabêd onquetiapimbo iquec, quec matses chuibanec Nuquin Papabêd aidi onquec. ¹⁸ Matsesacsho mayan icsan: Nuquin Papan chiaid niacmenu, quequin tanac niaquesa Esus icpanêdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe êbi dayacquio icmec cho, cac badedquio choquin chieshesa nuqui icmendac.

3

Abi yacno yuedanquidquo icquin Moises dēniacquid Esuquidistu

¹ Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ēbēd onquequid dapa icoata caid Esuquidistu nec, quequin aidquio tantiaquionona. ² Nuquin Papan chiacpadomboen chieshenquioicquin naquido Nuquin Papan shubun icquido abi tantiaquido iquendac, quequin Moisesēn chuided-chuidedampicpaden Esuquidistun adomboembidi chuibampanēdash. ³ Aidi Abiambo Yampid yec, Ēbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. ⁴ Nēitded con shubun ēbēdi tabadendac, quequid shubu icho nec. Aden Nuquin Papan chiacpadomboen aton shubun icquido bēdamboquid icmequid Esuquidistu nec. ⁵ Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuīta, cacpadomboen chuiquid Moises icpampic. ⁶ Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanēdash. Aidēn shubun icquid nebi, qeshun chieshenquioicquin cainquidquio aton shubun icquidquio nuqui nendac.

Chieshenda

⁷ Aton shubun tabadnuequid naden Nuquin Papan Mayanēn ambi chiaid mibi bēdamboen tantiamenuen chieque. Tantiata:

“Nēbimbobi Nuquin Papan chiaid chieshēnenquio yec tabadta.

⁸ Equipito yacnoēsh cuēte nibēdacno capuquin tsusedpabon, ĵNuquibēdida Nuquin Papa iqueque? Tantiabono, qeshun ambi chiaid chieshēmpampicpaden chieshēnenda.

⁹ Cuēte nibēdacno seta 40ted matamec capucuenquin tsusedpabon Nuquin Papan nadati-ambocquin naded-nadedsho isquimbi

ĵAmbi chiaid niacshoda Nuquin Papan ēbi cuidpeba?

Isbono, quiacpadquieic tsusedpabo icsamboec tabadpampic.

¹⁰ Adec tabadsho isash nēishpondabi.

Ēmbi chiaid chieshēnec ambibi tantiacpadequi icsadenepampic.

¹¹ Adquid icsho isun chushcain: Ēmbi abitedi uabanquin nainash

ēbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,”

quequin Nuquin Papan isadaidbo chiampid nec.

¹² Abiambo Yampid Nuquin Papa abi iquec, quequin tantiash cuēshēdchitomane qeshun tantiadonequiota. ¹³ Nuquin Papan chiacpadquieic tabadnuna, quec badiadquidēn-badiadquidēnquieic chuinanec onqueta ma adoac icsamianquidēn chiac Nuquin Papan chiaid chieshēnenquioapanuna. ¹⁴ Esusbēd icquid nebi, quiondaccpaden tantiadenequin caimbudec aton matses yec Esus yacno nidanetequidquio mibi nendac. ¹⁵ Nuquin Papan chiampid utsitsen chuīnu. Tantiata:

“Nēbimbobi Nuquin Papan chiaid tantesa uampicpaden tantesa uainda.”

¹⁶ ĵTsuntsin Nuquin Papan chiaid tantiashun chieshēmpampic? ĵEquipito yacnoshon bēyucanquin Moisesēn buanaido Nuquin Papan chiaid tantiash chieshquido yanenuquioda icpampic?

¹⁷ ĵTsutsibidi seta 40ted matamec chiesho isash Nuquin Papa aidtedbidi seta matamec nēishted-nēishtedpampic? Adoac ĵCuēte nibēdacnoēsh icsaquidtedi unēshudnenquioda icpampic?

¹⁸ ĵAbitedi uabanquin nainash ēbi tabadacno puduedmenquio iquembi, quequin tsutsi Nuquin Papan chuipampic? ĵAmbi chiaid chieshēnquid Nuquin Papan chienquioda icpampic?

¹⁹ Ai, tsusedpabon Nuquin Papan chiaid tantiash, Bēdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshēnsho Nuquin Papan abi yacno puduedmetiapimbo icpampic.

4

Ēbi yacno puduedash ēbēd tabadtequid quiaid

¹ Ēbi yacno puduedash ēbēd tabadtequid iquendac, quequin Nuquin Papan chiampicpadomboen nēbimbobi chuioaique. Ēbi yacno abēdi ictiapimbo icchitomane quequin Esuquidistu tantiadonequionona. ² Ēbi yacno puduedash tabadtequid iquendac, quequin ēndenquimboshē Nuquin Papan nuquin tsusedpabo chiampicpadomboen nēbi nuqui chuioaic. Aden ēndenquimbo chuīsho tantiash, Nuquin Papan chiaid abimbo iquec, quīash tantienquio yanash, Aid cainu, quetiapimbo tsusedpabo utsi-utsiec yampampic. ³ Ambī chiaid tantiaquidomboen nēbi aidbēdi tabadec.

“Ënden yampidon tantienquiocsho isash, Abitedi uabanquin nainash ëbi tabadacno choti-
apimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadom-
boen abitedi uabanquin nainash Nuquin Papa quenenash tabadpampic. ⁴ Abi tabadaid
chuiquin Nuquin Papan naden dada uamiampique. Tantia: “Seistedac ushquin abitedi
uabanash badiad utsin ënash tabadpobi.” ⁵ Ashumbic nadentsen dada uamiampic:

“Ëbi ënash tabadacno ëmbi chiaid chieshënquido chotiapimbo iquendac,”
quequin chuipampic.

⁶ Aden chuimiatic ëndenquimboshë ambi chiaid tantiesa icquin niac-niacquec Nuquin
Papabëd tabadtiapimbo icpampid icnubi ambi chiacpadomboen naquin cainpampidobëd
nëbi nidaid utsi-utsiec icquido Nuquin Papabëd tabadtequid nendac. ⁷ Ambi tantiacpadën
Nuquin Papan chuimiapaden Dabid padon:

“Icsachitomane qeshun Nuquin Papan chiaid tantiaquiota,”

quequin dada uapampic. ⁸ Chuiquid dapa Dabid tishambocnoc Equipito yacnoësh nidaid
Canan yacno abi chuiquid dapa Osuebëd isadaidbo cho-chopampic. Capuec ënëdash nidaid
Canan yacno cho-choash isadaidbo ënëdenquio yec tabadte icnuc, Ëbi yacno ënëdenquio
yec tabadte iquendac, quequin Canan yacno choash tabadquidon tsyuecquid Dabid pado
Nuquin Papan chuimenquio ictsenampic. ⁹ Aden Dabid pado chuimiatic tantias
abi tantiadonequidombo Nuquin Papabëd tabadquido nendac. ¹⁰ Aden uabanquin nainash
Nuquin Papa tabadacpadec ambi bëdambo icmenuequin tantiactedi nabanquin nainash
aidbëdi tabadendac. ¹¹ Nuquin Papabëd tabadnuequin ambi tantiacpadec icnuen nainu,
qeshun Esuquidistu tantiaquionona. Nuquin Papan chiaid tantiesa yanash tsusedpabo
puduedenquiocpampicpadec icmane qeshun adonona.

¹² Nuquin Papan chiaid ambia chuipampidquido abi iquec. Nadatiambocquin tantiamete
ambi chiaid nec. Shocosh siante abiuc daëdi cuënumbocquidën siaid uguëduc sënquin
nami icsaid isendac. Adomboembidi Nuquin Papan chiaid chiac papuedequin matsesën
tantiaidtedi uguëduc sënaid isacimbocnoc abi icsaid tantiamendac. Ambi, Naden na-
nuna, quequin chiabi yaidtedi abi bunquin ambi chiabi yaidtedibidi matses tantiamequin
naden: Mimbidi tantiaid icsa nëid icnubi mimbidi tantiaid utsi bëdambo iquec. Adecbidi,
mibi bunaid icsa nëid icnubi mibi bunaid utsi bëdambo iquec, quequin tantiamebanshun
mimbidi tantiaid icsa mibi bunaid icsabëdtabi ënta, quequin Nuquin Papan chiaidënuquio
mibi tantiamendac. ¹³ Abitedi isquidquido Nuquin Papa nec. Adquid icquin matses
ompodtiapimbo noc isendac. Adembidi, Ëmbi chiacpadomboenda matsesën nabanoshe.
Tantianu, qeshun, abi yacno tabadnuequin cainquido bëisquioquin ambi nabanaidtedi
chuimendac.

Matses chuibanec Nuquin Papabëd onquequid dapa Esuquidistu

¹⁴ Adec Nuquin Papa abitedi isquidquido icnubi icsambocquid icquin ambembi matsesën
aid chuitiapimbochsho isun abi tantiaquido chuibanec Nuquin Papabëd onquequid dapa
ënden abi yacno dectatonëdaid Esuquidistu nec. Aidi Nuquin Papan Madombo nec,
quequin tantiesa yanchitomane qeshun aidquido tantiaquionona. ¹⁵ Matses chuibanec
Nuquin Papabëd onquequid dapa matses yequi natiamiaidbimboec tsadpondash,
quetiapimbo nuqui iquec. Matsesacsho mayan icsan, Nuquin Papan chiaid niacmenu,
cac niaquenquio Esuquidistun icpanëdash. ¹⁶ Adquid nuqui chuibanec Nuquin Papabëd
onquequid dapa iquec, quequin tantiec dacuëdenquio yec abi yacno ënden Esuquidistubëd
puduedquidëmbimboen Nuquin Papa ëmbitsen chuinuna. Icsashun Nuquin Papa chiac,
Con mado Esus mibi icsaid bedshunash abided cuidadpanëdash, quequin tantiec mibi
icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin
Papan Mayanën mibi chieshmenquiocquin dayacquio icmendac.

5

¹ Ëndenquimbo Nuquin Papan, Min matses chuibanec ëbëd onquequid dapa icta, caid
isadaidbo utsi-utsiec icpampic. Adquid Nuquin Papan icmiac, Con matses icsapash icnu,
qeshun nidaidën capuquid yua cuesunedenequin taudienepampic. Adembidi, Mibi
bëdambo iquec, Papa, quequin ismequin, Nëid menenu, cac Nuquin Papan naden nata
cain chiacpadomboen naquin aton matsesën bëaïdo cuesuneshun taudienepampic. ² Aton
matses chuibanec Nuquin Papabëd onquequid dapan aton matses icsasho isun, Con mat-
sesbëdi icsaquid nebi, quequin ³ nidaidën capuquid yua utsi-utsien cuesunedenequin.

⁴ Aidi, Con matses chuibanec Nuquin Papabëd onquequid dapa icnu, quenquio icpampic.
Nuquin Papambi, Min matses chuibanec ëbëd onquequid dapa icta, caid nepampic. Min
matses chuibanec ëbëd onquequid dapa icta, Nuquin Papan abia caid Adon cuëmëquid
icpampic. Aidi unësan abi tsibanquid-abi tsibanquidquien Nuquin Papan, Min matses

chuihanec ëbëd onquequid dapa icta, caid icpampic. ⁵ Adembidi Nuquin Papan, Matses chuihanec ëbëd onquequid dapa icta, caid Esuquidistu iquec. Èbibi adquid icnu, quenquico Esuquidistu icpanëdash. Aton Papambien:

“Mibi con Madombo neque.

Con shubun icquido mimbi icmiaido chuihanec ëbëd onquequid dapa icta,”

capampic aton Papan Esuquidistu chuiquin. Adembidi Esuquidistu chuiquin aton Papan:

“Matsesash icsaisa yec min utsibo icsaid bedshunash cuidadec unësash uincuenash matses chuihanec ëbëd onquequid dapa icta,”

capampic. ⁶ Ambi chiaid utsi nad icpampic:

“Matses chuihanec ëbëd onquequid dapa Medquisedec yampidpadquid mibi nendac.

Adquid yec ënëdenquicoctequidquid mibi nendac.”

⁷ Adec, Con Pan chiampicpadquid icnu, quish matsesacsho unës uaquin mëyante nendabi, quequin tantiec shubiec nadpanëdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiapadomboen natiadquico iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquico icmepanëdash. ⁸ Nuquin Papan Madombo iquequi matsesacsho mëyanac Nuquin Papan chiapadomboen tantiabempanëdash. ⁹ Aden tantiabenash matses icsaid bedshunash abided cuidadash Nuquin Papa yacno Yuedanquid yanquopanëdash. ¹⁰ Adoacsho isun, Nëbi matses chuihanec ëbëd onquequid dapa Medquisedecpadquid icta, cain Nuquin Papan Esus chuipampic.

Nuquin Papan chiaid ënden tantiaboedi tantiesa yanenda

¹¹ Ambia matses chuihanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidedi chuitiadquicoquin mibi eme uacsho ¿mit-sipadomboentsimbi chuihanquin mibi tantiamete? ¹² Mibia utsin tantiamiaid icquin ënden tantiabempatecnëdan mibedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiapaden tantiaquid icquin Nuquin Papan chiaid tantiatipimbo mimbi icpec. ¹³ Shuma chishquid bacuëmpi, Bëdamboen nata, quequin chiaid tantiesa nec. ¹⁴ Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquicoquin nabanec. Adomboembidi Nuquin Papan chiaid tantiamiac tantiabenquidquico yanshun adomboen nabanenec. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquicoquid.

6

¹ Aden Esus chuiquin abia tantiamiaid bëdamboen tantiashun abipadquid icnequin abi chuiquin tantiamiaid utsi tantiaquionona. Abia tantiamiaid nad iqueque. Tanta. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquico icta. ² Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquico icta. Adembidi, Abi tantiesa cuidtequid iquendac, quequin tantiec bëdamboec tabadteneta. ³ Aidedi mimbi tantiec. Aidedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. ⁴ Aden Esuquidistu tantiasho isun aton Mayan Nuquin Papan meniaid icboedi ⁵ Nuquin Papan chiapadomboen nadatiambocquin nabamboed, ⁶ Esus matsesquico yec icsamboquid nepanëdash, quish, Esus cuesten dectan, quequidbimboecquid icsho Nuquin Papan aid isendac. Aidën oncain Esus mamëshunec. Aden Esus tantienquico yanacsho bëdamboen tantiamenuen chuiquin, Icsaobique. Èbi icsaid ënu, cametiapimbo Nuquin Papan iquendac.

⁷ Baded-badedquic ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuihanec abi tantiaquiosho Icbon yuedaido iquendac. ⁸ Echobëd cana shëta chedo ëshë idash dadpen yanushë qeshun nëdëncatequid nendac. Adecbidi icsamboen chiaid tantiaquid uquë nësiatequid nendac.

⁹ Aden mibi chuiquimb, Nuquin Papan nësiatemaid mibi nec, quequin tantiambi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. ¹⁰ Adoac abi tantiaquid utsibo tantiaquin mimbi nashundeniaid Nuquin Papan bëpiscudenquicoquin tantiec. ¹¹ Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac. ¹² Aden nabanec chieshenquicoquin Nuquin Papan chiaid tantiaquicoquin tsusedpabomba caimbudec unësash Nuquin

Papa yacno puduedampicpadec Esuquidistu tantiaquioquin ënenquiocquin caimbudequima Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³ Ëndenquimboshë Abadauan bëdamboec tabadsho isun ambia tantiaquidquio abi yampidquibidi icquin, Ëmbibi tantiacpadomboen nanuna. Abimbo caimbi, quequin Nuquin Papan naden chuipampic: ¹⁴ “Mimbi tishmiaidën tsyuecquido dadpen iquendac, queshun ëmbi chiacpadomboen nabanquin mibi, Bëdambo iquebi, camembi,” quequin Nuquin Papan Abadauan chuipampic. ¹⁵ Aden chuisho tantiahashun caimbudquin tishtiapimbocquidëmbi Abadauanën chidon aton mado tishpampic.

¹⁶ Abimbo caimbi, quequin abitedi tantiaquidënuquo Nuquin Papan chiac utsi, Muenec, quetiapimbo iquendac. ¹⁷ Adembidi, Ëbi yacno tabadte iquendac, quequin ënden yampidën Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuipanëdash. ¹⁸ Adec Nuquin Papa muatiapimbo icquin ambi chiacpadomboen naquidquio Nuquin Papa nec. Adembidi, Ëbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ëbi puduedmequid Esus iquec, quequin caimbudquid nuqui nendac. ¹⁹ Aden caimbudquin, Ënden Nuquin Papa yacno puduedshun ëbi yuedquid iquec, quequin nuqui tantiec. ²⁰ Nuqui caintequid Esuquidistu ënden Nuquin Papa yacno bëyucanec abi tantiaquido chuibanec Nuquin Papabëd onquenuc puduedash Medquisedecpadquid yampanëdash.

7

Medquisedec matses chuibanec Nuquin Papabëd onquequid dapa

¹ Medquisedec nad icpampic, Saden yacnocquido chuiquid dapa nepampic. Ambi Saden cain cuënaidi yuecshun Edusaden cain cuënoapampic. Aiddidi Nuquin Papan, Matses chuibanec ëbëd onquequid dapa icta, caid nepampic. Adquid icquin aton mado bedboedo tsibanshun cuesuniash Abadauan chosho bëquedshun, Nuquin Papan bëdamboen isaidquio mibi nec, quequin Medquisedequën Abadauan chuipampic. ² Adsho tantiaash, Nuquin Papan con mado bedmiaid nebi, quequin ambi cuesuneboedën na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanën menepampic. Bëdamboen tabadmequid icsho Medquisedec cuëmpampic. Adembidi, Saden yacnocquido chuiquid dapa icquin bëdamboen tabadmequid icsho Medquisedec cuëmpampic. ³ Aidi aton papabëd aton tita nibëdquid nec. Nëid ushën tishaid nebi, quetiapimbo aid iquec. Abi unëste ushë adquibidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabëd onquequid dapa yanash adquiduidquio iquec. Utsi yantiapimbo iquec.

⁴ Aidi ëbi chuibanec Nuquin Papabëd onquequid dapa nec, quequin ismequin ambi bedaid aton na musuctanquin Abadauanën Medquisedec menepampic. ⁵ Yuecquioschon Nuquin Papan: Min matses chuibanec ëbëd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton utsibonquio aton na musucaid bedquid icpampic. ⁶ Medquisedequëmbien tsyuecquidpenquio icquimbi Debin tsusedpa Abadauanën na musucaid bedshun, Nuquin Papan bëdamboen isaidquio mibi nec, quequin Abadauan chuipampic. ⁷ Bëdambo mibi icmenu, quequin Nuquin Papan chiaid ambia chuiquid Medquisedec icpampic. ⁸ Yuecshun ambia chuibanec Nuquin Papabëd onquequid dapapadquiocquin aton matsesëd na musucaid bedquid Debi unëspampic. Adembidi aton tsyuecquido unëspampic. Padnuen Abadauanën na musucaid bedquid Medquisedec unësesa yampampic. ⁹ Adquid icsho Debin buchisio Abadauan caidën, Con tsyuecquid dadpen iquendac, quequin tantiaquin, Con na musucshun menu, queshun Medquisedec menepampic. ¹⁰ Aton tsyuecquid tishambocnobi Debin buchisio Abadauan caidën Medquisedec bëqueduidshun menepampic.

Medquisedec yampidpadquid Esuquidistu

¹¹ Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bëdamboquid icmian Medquisedecpadquid choenquio ictsempampic. ¹² Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabëd onquequid dapa yampanëdash. Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. ¹³ Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. ¹⁴ Aton tita Uda cuëmëdquidën tsyuecquid icnuc matsesash Udan

tsyuecquid Nuquin Icho Esuquidistu nec. Adquid icquin Debipadquidën nadeniampic-paden natiapimbo Esuquidistu icpanëdash. Adembidi ambi tantiaiduidi chiec Moises, Udan tsyuecquid Debipadquid nec, quenquo icpampic. ¹⁵ Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. ¹⁶ Aton matses chuibanec Nuquin Papabëd onquequid Debi unësan Debin tsyuecquid aton matses chuibanec Nuquin Papabëd onquequid icpampic. Adquidpenquo Esuquidistu yampanëdash. Matsesash icsaisa yec unëssh uincuenpanëdash. Adec uincuenquid yec unëstiapimbo iquec matses chuibanec Nuquin Papabëd onquequid dapa yanquiopanëdash. ¹⁷ Aid chuiquin Nuquin Papan nadopampic: “Ënenquiocquin matses chuibanec Nuquin Papabëd onquequid dapa Medquisedecpadquid mibi nendac,” quequin chuiampic.

¹⁸ Aden chiambien matses chuibanec Nuquin Papabëd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiapadomboen nadenequin aton matses icsaisa icmetiapimbo icpampic. ¹⁹ Adoaid Nuquin Papa yacno puduedtemaid matses icpampic. Nëbien bëyucanec puduedash Nuquin Papa yacno abi tantiaquido chuibanec Nuquin Papabëd onquec tabadec, quequin abi yacno yuedte caimbudec nidaidën Nuquin Papabëd tabadachimboec nuqui tabadec.

²⁰ Abimbo caimbi. ¿Matses chuibanec Nuquin Papabëd onquenu quec puduedquid ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuiampic. Aden Debi chienquiocquin aton madouidsëqui chuiampic. Debi unësan aton tsyuecquid aton matses chuibanec Nuquin Papabëd onquequid dapa icpampic. ²¹ Nëbi Nuquin Papan aton Madombo caic:

“Icho icquin matses chuibanec ëbi chiec puduedoata, mado, quequin abimbo chiemi. Aden chuiquin chuca uainquo iquemi.

Ëndenquo yampid yec ëbi yacno utsi puduedmenush ëbi chiec puduedash ënëdenquo yec tabadquid mibi nec, quequin abimbo chiemi,”

quequin chiampicpadec aton Madombo adquid yanquiopanëdash. ²² Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibëd aton tsyuecquid adecbidi adquid ictiapimbo iquec.

²³ Debi adecbidi aton tsyuecquido unëstequidquo iquec yuen chuibanec Nuquin Papabëd onquequid dapa ictiapimbo iquec. ²⁴ Esusien abi yacno chuibanec bëyucanec puduedash ënëdenquo yec Nuquin Papabëd onquequid dapa nendac. Adquid utsi nibëdendac. ²⁵ Adec Nuquin Papa yacno ënëdenquo yec tabadquin abi tantiaquido chuibanec aton Papabëd onquedenenec abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

²⁶ Adec aidi abi yacno yuedanquid, icsa nibëdquid, icsa uatiapimbocquid, icsa nibëdquiec yacno tabadquid yec abi tantiaquido chuibanec Nuquin Papabëd onquequid dapa yampanëdash. ²⁷ Debipadquidpenquo yec, Matses icsaquid neque. Nuquin Papa chiampicpaden baded-badedquien nidaidën capuquid yua cuesunenu, quenquo icpanëdash Esuquidistu. Matses icsaid bedshunash abided unëspanëdash padpidec unësenquo icnush. ²⁸ Debibëdi abipadquid icsaquid icsho, Min matses chuibanec Nuquin Papabëd onquequid dapa aid icmeta, Nuquin Papan cac Moisesën Debi adquid icmepampic. Nëbi Medquisedecpadquidien Bëdamboquid icpampid ëbëd onquec ëbi yacno Puduedquid Abentsëcquiobi mibi iquendac. Abimbo caimbi, quequin Nuquin Papan chiampidquo Esuquidistu nendac.

8

Matses chuibanec Nuquin Papabëd onquec abi yacno puduedquid

¹⁻² Adec Esuquidistu abi tantiaquido chuibanec Nuquin Papabëd onquequid dapa Nuquin Papa tabadacnombobi puduedoash aton Papa Abiambo Yampidbëdquid onquec tabadec. Debipadquidon aton matses chuibanec nidaidënshun Nuquin Papa tabadte shubu uashunaidën puduedash auëshquo Nuquin Papabëd onquepanëdash.

³ Con matsesbëdi icsaposh icmanendac, qeshun aid shubun puduednu qeshun umanuchun nidaidën capuquid yua aidon cuesunepampic. Adembidi Nuquin Papa tantiaquin menenequin aton matsesën bë-bëaid bedshun nadenepampic. Esusien Nuquin Papa yacno puduedoanush, Èbi icsaid ëbibi cuidadnu, quenquo yec matses icsaid bedshunash abided cuidadpanëdash. ⁴ Aidi unëssabi yec nidaidën tabadnuc Moisesën chiapadec Debipadquid matses chuibanec Nuquin Papa chiec onquequid icpanëdash. Adquid icnuc nidaidënuësh matses chuibanec Nuquin Papabëd onquequid dapa ictiapimbo Esuquidistu icpanëdash. ⁵ Nidaidën tabadquin Nuquin Papa tabadte shubu

uashunaidën puduedshun Debipadquidën nashumpampic. Ëndenquimbo Nuquin Papan shubu naden icchitec, quequin abi tabadte shubu uanu, qesho tantiaashun: “Macuësh yacnoshon chuibocpadomboen shubu uame,” Nuquin Papan cac Moisesën chuiopampic. Aden chiac Nuquin Papa tabadte shubu uashumpampic. ⁶ Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabêd onquec puduedpanêdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabêd onquec abi yacnombo yuedanquid ictiapimbo icpampic. Esuquidistuen Nuquin Papabêd abia yampid bëyucanec abi yacnombo nidoash abi tantiaquido chuibanec Nuquin Papabêd onquequid yec yuedanquidquo nec.

⁷ Ëndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempañêdash. ⁸ Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ëmbi chiaid utsi iquendac.

Aid isadaidbo chiendambi. Aidbidi Udán tsyuecquido chiendambi.

⁹ Aidën tsusedpabo Equipito yacnoshon bëyucamequin

ëmbi chiacpadpenquiocnoc chiaid utsi iquendac.

Ëmbi abia naden nata cain chiaid Isadaidbon chieshënsho

utsibon natiacquin mëyansho isun isadaidbo mënchicamboccondambi.

¹⁰ Ënden chiaid adquio icnuc:

Nëbi ëbêd tabadmetequid chiaid nendac, quequin isadaidbo chiembi.

Ëmbi nadomboen nata cain chiaid isadaidbo pausunendambi tantiate bunquionoc.

Aden tantiamash aton Papa iquendabi.

Adecbidi adquidquio con matses iquendac.

¹¹ Adoaid Nuquin Papa tantiaquid icta, qesa iquendac.

Abitedi ëbi tantiaquidquio iquendac.

Nëdtedishun ëbi tantiendac:

Nëdic, bacuëbo; nëdic, caniabo; nëdic, tsusiobo aitedshun.

¹² Aido icsaidtedi padpiden tantienquio yec bëpiscudendabi,”

quequin Nuquin Papan chiaid utsi nendac. ¹³ Chiaid utsi nec, quequin ënden abia nadomboen nata cain chiaid ënêdendac.

9

Nuquin Papa tabadte shubu uashunaidën puduedshun naid

¹ Nuquin Papan ambi, Ëbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ëbi tabadte shubu uashun cacpadomboen abi nidaidën tabadte shubu uashumpampic. ² Nuquin Papa tabadte shubu uashunaid nitsinaid anquënë uaid daëd icpampic. Baded-badedquiec puduedte anquënë uaidën tabote dectantebêd pan sante cueste nacnenaic icpampic. Icsaisa anquënë uaid nec caid niosh. ³ Aid nuntambidi bitsipamocquid daëdcashun dectanêdaid shëcuë anquënë uaid dayun uequid Isaisa Bêdaidquio cain chianiaidquio niosh. ⁴ Aid nuntan bêdambo noadquid sandoshon tauite shocosh icpampic. Ambobidi cueste dabitacaid shocosh icpampic. Aid cuesten sauedaid mana caid isadaidbon piampid dayun uaid icpampic. Aid sauedaid utsi Adonën cueste tiaid dëyucapampic. Aid sauedaid utsi cuënote pada uashun Nuquin Papan nadomboen nata quequin dada uaid icpampic. ⁵ Aid sauedte matincash tabadquid ambi abi yacnoshon uaid mayan bêdamocquidbimboecnuc nacnenaic daëd icpampic. Aid daëd Nuquin Papa icsaisambo bëchomauanquiec nac-nacquio ismiantequid icpampic. Nidaidën capuquid cuesuniaidën intac daseccaid isun Nuquin Papan matses cuidenquioctsiash, quequin aidën podon dëcatequin dectanaid diadpampic. Aid Icsaisa Bêdaidquio anquënë uaid sanaidtedi chiombi.

⁶ Aden shubu uashun aidën icquidtedi nambanash icsaisa anquënë uaidën baded-badedquiec puduedquidon Nuquin Papan Moises chiacpadomboen uesquin nabampampic. ⁷ Padnuen Isaisa Bêdaidquio anquënë uaidën setan-setanquiec matses chuibanec Nuquin Papabêd onquequid dapa puduedpampic. Baded-badedquiec puduedtemaid aid nec. Ëmbi con matsesbêd tan Nuquin Papan chiaid niacposh icmanendac, quequin nidaidën capuquid yua cuesuneshun intac bedshun buanec nuntan bitsipamocnoc daëdcashun dectanêdaid shëcuë anquënë uaid dayun uequid Icsaisa Bêdaidquio caidën puduedquid abentsëqui nepanêdash. Unësaidën intac buanenquio yec puduedtemaid aid anquënë uaid nec. ⁸ Adec aid anquënë uaidën puduedquid isadaidbo abentsëqui icnubi Nuquin Papa yacno aton matses puduedte nibêdec, quequin Nuquin Papan Mayanën tantiamete nendac. ⁹ Adembidi, baded-badedquien nidaidën capuquid yua cuesunedenec, Ëbibi bêdamocquid

nec, quetiapimbo icpampic. Adembidi aton matses icsaisa icmetiapimbo icoapampic. ¹⁰ Adecbidi, Nēidic petequid nec. Nēidic actequad nec. Nēid nanush mēpamēdtequad nec, quequin chiacpadomboen nabanquin icsaisa icmeternaibidi nendac. quequin Nuquin Papan Mayanēn nuqui tantiamec.

Esuquidistu abided unēsac intac chiuidaid

¹¹ Ambi chiaid utsi tantiamenuec ambi uacmaid yec abipadquid Esuquidistu Nuquin Papabēd tabadboedi nidaidēn budash matsesash icsaisa yec matses icsaid bedshunash abided cuidadec unēsash Nuquin Papa yacno matses chuibanec aton Papabēd onquequin chuiquid dapa iquec abi yacno Yuedanquid yampanēdash. ¹² Nidaidēn capuquid yua cuesuneshun intac bedshun buanec Nuquin Papa yacno puduedenquo Esuquidistu icpanēdash. Aidi abia yampidi icsaisa matses icsaid bedshunash abided cuidadec unēsasho cudan siac aton intac chiuidash Nuquin Papa yacnombo puduedoapanēdash. ¹³ Aidi matses icsaid bedshunash abided cuidadabincuc nidaidēnshun natemaid nasho matses cušhēdmepanēdash. Adoac utsibēd ictiapimbocho siun nidaidēn capuquid yua cuesuneshun aidēn intacbēdta sisapuc daēd uashun daseccac icsaisa icmiabi yequi aton shubun puduedoapanēdash. ¹⁴ Abia abēd yampid unēsasa aton Mayambēd iquec Esuquidistu icsaisambo yec, Matses icsaid bedshunash ēbided cuidadebi, Papa, quianec unēsasho siac aton intac chiuidacsho isun uincuemaidēn nuqui pauquec ma Nuquin Papan chiacpadomboen nate bunquidquo nuqui icpaneshun. ¹⁵ Adoaidi Nuquin Papan chiaid utsi chuiquin tantiamequid Esuquidistu icpanēdash. Ēnden matses yampid icsaidbēdtabi nēbi matses icsaid bedshunash abided cuidadec unēsapanēdash ēbi tantiaquido ēbēdi tabadmenu quiaish.

¹⁶ Adnubien abi unēste tantiec, Ēbi unēsān ēmbi chiacpadomboen con na abitedi menebanta, matses quepec. Aden chuiquid unēsō isun ambi chiacpadomboen menebanec.

¹⁷ Aden chuiquid unēsabi icnuc ambi chiacpadomboen utsibon menetiapimbo iquec. Icbon na abi iquec. Aid unēsān aidēn na icboedi utsin na yanec. ¹⁸ Adembidi ambi nadomboen nata cain chiaid Moises menequin, Ēmbi chiaidtedi nadenesho isun ēmbi chiacnombo mibi buanembi, quequin Nuquin Papan chuipampic. Aden menequin chiac Moisesēn nadopampic. ¹⁹ Nuquin Papan chuibocpaden chuishun nidaidēn capuquid yua cuesuneshun intac bedshun actebēdta daēd uain cacushun cuēte shubi madquēnaid podo mēsequiabicquid bedshun sedquid piu uaid potaneshun daēd uaboed nēnanshun Nuquin Papan chiaid dada uaidbēdta matses daseccabampic: ²⁰ “Nēid Nuquin Papan chuibocpaden mimbi natequidquo nec,” quequin ismequin Moisesēmba abitedi daseccabampic. ²¹ Adoshombic Nuquin Papa tabadte shubu uashunaidbēdta aidēn tabēcaidtedi daseccabampic. ²² Cuesuniaidēn intac daseccatequid nec. Shubu chedo cuesuniaidēn intaquēn daseccabquid mishtemaid nec. Adecbidi cuesuniaidēn intac chiuidenquiocnoc matses icsaid Nuquin Papa bēpiscudenuquo iquendac.

²³ Nuquin Papa yacnombo puduednush icsaisa unēsēndac, quequin ismenuen matses chuibanec Nuquin Papabēd onquec nidaidēn capuquid yua cuesuneshun intac bedshun buanec Nuquin Papa nidaidēn tabadte shubu uashunaidēn puduedpampic. ²⁴ Esuquidistu matses icsaid bedshunash abided cuidadec unēsash nidaidēnshun Nuquin Papa tabadte-bimboecnuc shubu uashunaid yacno puduedenquo icpanēdash. Abi tabadacnombo abi tantiaquido chuibanec aton Papabēd onquec puduedash abi tabadec. ²⁵ Ambo puduedash, Matses icsaid bedshunash ēbided padpidec cuidadnu, quenquo yec tabadec. Nidaidēnshun setan-setanquien Nuquin Papa tabadte shubu uashunaidēn puduedquin aton intapenquo bedshun daseccadene. ²⁶ Matses icsaid bedshunash abided cuidadec unēsambo yec Nuquin Papa yacno puduedoash padpidec nidaid yacno choash unēsash abuc Esuquidistu puduedoatsiandac. Adenquo iquec matsesash abi unēste ushēnquibi matses icsaid bedshunash abided cuidadpanēdash nēid nidaid naimēdbudte anoentsēqui icnuc. ²⁷ Nidaidēn icquid unēste ushē abentsēc iquec. Unēsasho ambi naid Nuquin Papan chuitequid ushē choendac. ²⁸ Adecbidi matses icsaid bedshunash abided cuidadec Esus unēste ushē abentsēc icpanēdash. Matses icsaid bedshunash cuidadoanu, quenquo yec aidquo padpidemboec choendac. Abi cainquido abi yacno puduedmenuec choindac.

10

Abided cuidadec unēste abentsēquēnquibi

¹ Setan-setanquien nidaidēn capuquid yua cuesuneshun intac bedshun buanec puduedsho isun matses icsaid bedshunash abided unēsash abi tantiaquido chuinec bēyucanec Nuquin Papa yacnoēsh yuedanquidquo choec, quequin nuquin tsusedpabon tantiabempampic. Nidaidēn capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abēd onquetiapimbo icpanēdash. ² Aidēnquo

daseccaquin matses icsaisa icmiac nidaidën capuquid yua padpiden cuesunenquoio ict-sempampic. Adecbidi, Icsambocquid nebi, quenquoio matses ictsiandac. ³ Aton matses isaisa icmetiapimbocquin setan-setanquien nidaidën capuquid yuaded cuesunepanëdash. ⁴ Adshun yuan intac bedshun daseccaidën matses icsaisa icmetiapimbo iquec.

⁵ Adoquien Esuquidistu nidaidënshun tishac caniasn onquec:

“Nidaidën capuquid yua cuesuneshun ìmbi chiacpadomboen matsesën natiapimbo iquec queshun yua cuesunete bunenquoio mibi iquec, Papa.

Matsesën tishtequid mimbi icmiaidquoio nebi, Papa.

⁶ Adecbidi nidaidën capuquid abichobi taudeniatic matses abi icsambo iquec, quiash, Padi. Adoenda, mibi quec, Papa.

⁷ Adsho isun mimbi chuiquin dada uamiampicpadomboen naimbi, Papa.”

⁸ Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinnuc ⁹ mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. ¹⁰ Aden Nuquin Papa bunacpadomboen nash unëstiapimbo yanshun abi unëste ushënquoio abi tantiaquid paucpanëdash.

¹¹ Aden matses icsaid paucpec, quetiapimboconoc badiadquidën-quien nidaidën capuquid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquendac. ¹² Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. ¹³ Ambobi tabadquimbi abi chieshënquido ambi chiacpadomboen naquidquoio icmete ushë cainec. ¹⁴ Abided unëste ushënquoio abi tantiaquid ambi icsaisa icmiaid abëd cuëshëdesambo yampanëdash.

¹⁵ Adembidi Nuquin Papan Mayanën Nuquin Papan chiaid utsi naden chieci:

¹⁶ “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ëmbi chiacpadomboen nate bunquidquoio icmendambi, quec Icbo.”

¹⁷ Adshumbic Nuquin Papan chiaid utsi abi chieci aton Mayan:

“Abi icsaidtedi padpiden tantianu quenquoio yec bëpiscudendabi, queoac Icbo,”

quequin chuipanëdash aton Mayanën. ¹⁸ Adeccabi icsaid bëpiscudash nidaidën capuquid yua cuesuneta quenquoio Nuquin Papa iquec.

Nuquin Papa yacno puduedte cainta

¹⁹ Adoaidi Esuquidistu unësacsho isun cudan siac aton intac chiuidun, Ambi paucaid nebi, quec dacuëdenquoio yec Nuquin Papan shubu icsaisa caid yacnombo puduedte ushë nuqui cainendac. ²⁰ Matsesash abided cuidadec unësash Nuquin Papa yacno puduedash tabadquid Esuquidistu nec. ²¹ Ambo nidash Nuquin Papabëd onquequin aton shubun icquido nuqui Esuquidistun chuibanubi. ²² Ambi paucaid ambi dapanacimbocquidbidi nebi, quequin tantiaquin abi yacno choacimbocno nidaidënshun Nuquin Papa chieci onquec tabadnuna. ²³ Nuquin Papa ambi chiacpadomboen naquidquoio nec, quequin abi tantiaquid yec abi yacno puduedebi, quequin caimbudnuna. ²⁴ Aden tantiaquin abi tantiaquid utsibobëd tantiananec bëdamboec tabadquin nashununa. ²⁵ Aden nabanec abi tantiaquid utsibobëd iccuededtiapimbo iquebi, utsi-utsieci quiacpadec adenquoio icnuna. Adeccicuedec, Nuquin Papan chiacpadquieci bëdamboec tabadnuna, quec chuinanata. Niacquid dadpen icsho isash, Matsesën naid chuibanquin cuidte ushë badedquoio choec, quiash baded-badedquieci chuinanata bëdamboec tabadte bunec.

²⁶ Èbi icsaid bedshunash abided cuidadec Esuquidistu unësapanëdash, quequin tantias icsaded-icsadedquid iquec, Adquidquoio Esus nec, quetiapimbo iquec. ²⁷ Aid cuidte ushë chonoc nëishun comapenen chushcaindac Nuquin Papan abi chieshënquido nibëdamequin. ²⁸ Nadomboen nata cain Moisesën chiaid niacsho isun daëdshun chiac niacquid unësmiampic. ²⁹ Nuquin Papan abia naden nata cain chiaid niactenequid adomboen cuidnushe quiash èbi icsaid bedshunash abided cuidadec Esuquidistu unësapanëdash, queboedi, Èmbi tantiaboed Nuquin Papan Madopenquoio matsesquoio ëbipadquid icsacsho cuesuniatic, quequin chieshënsho ¿comapenen Nuquin Papan cuidenquioda icpadic? Adquid Nuquin Papan Mayanën bëdamboecquid icmenu quequin chiaid chieshënquid nec. ³⁰ Nuquin Papan: “Èmbimbo èmbi chiaid chieshënquid cuidendambi,” quequin chiaid nec, quequin nuqui tantieci. Adembidi: “Abi tantiaquid icboedëmbi tantienquoio yansho cuidquidquoio Nuquin Icbo iquendac. ³¹ Abi cuidantequid dacuëdampambo iquec,” quequin Nuquin Papan chiaid nec.

³² Esuquidistu tantiaquid yanash mibi bëdamboec tabadondacpaden tantiamec chuinan-deneta. Esuquidistu tantiabencacchuca icsho chieshëmënnquidon mëyanaqui, Esuquidistu

tantiaquid nebi, quec dayacquio yec bēdamboec mibi tabadteniondac. ³³ Dadpen tabadnubi, ěm̄bi tantiaid Esus nec, qesho mibi utsibon mamēnshunondash. Adembidi aidon natiambocquin mēyanac. Adomboembidi Esuquidistu tantiaquid utsi mēyanasho isun, Aidbēd icquid nebi, quequin ismequin mimbi nashundenepondac. ³⁴ Esuquidistu tantiaquid utsi quēnēn nauedaid icsho isash abēdi tabadacimboec natiamianqueic unēsquo yec mibi tabadpondac. Adecbidi mibi chieshēnquidēn mitsana bedacsho isash Nuquin Papan ěbi menetequid ampetiapimbo iquec, quequin tantiec, Bēdambo iquebi, quec mibi tabadpondac.

³⁵ Adoaidi Nuquin Papan bacuē yec bēdambo iquebi, quiash dacuēdenquo yec bēdamboen nabanec mibi ěnden dayacquio iccondacpadqueic adqueiebidi tabadteneta. Adquid Nuquin Papa yacno puduedquid nendac. ³⁶ Utsin mēyanaqui Nuquin Papan chiaid chieshenquiocquin tantiadeneta. Adec tabadquin Nuquin Papa bunacpadomboen nabanash abi yacno tabadendac. ³⁷ Nuquin Papan chiaid nadquo iquec:

“Chiata. Nēbien mimbi cainaid mibi mēnchictequid choendac.

³⁸ Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. ³⁹ Aid cainuidash utsi tabadnubi abi choate nuqui cainec. Abi cainesā abi yacno puduedmenquiocquin Nuquin Papan chian anēdēnquequid nēsiatequid nendac. Nuquien abi cainquid yec Nuquin Papa yacno puduedtequid nec.

11

Nad iquendac, quequin tantiaquin cainquid

¹ Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abēd icte ushē nuqui cainendac. Aden cainquin, Con icbo ěm̄bi isacmaid nec, quequin aid isbenacimboen ěm̄bi tantiaid nec, quec tabadquidquo nebi. ² Adembidi tantiec tsusedpabo tabadsho isun, Bēdamboen mimbi tantiec, capampic Nuquin Papan aido chuiquin.

³ Adembidi Nuquin Papan: “Abubēdi nidaid yanquiota,” cashumbic: “Aidēnquiocquidtedi yanquiota,” cac ambi tantiacpadqueiqui yampampic, quequin nuqui tantiec. Aden tantiec ěm̄bi nēbi isaidtedi nibēdnuc ěmitsipadomboentsi aidtedi icmebampampiba? quenquo nuqui iquec. Nuquin Papan: “Yanquiota,” quequin tantiacpadqueiqui abitedimbo yampampic.

⁴ Adembidi, Mibi tantiaquin mibi bunacpadomboen nidaidēn capuquid con yua cuesuneshun tauinu, quequin chuishun Abedēn naid Nuquin Papan bēdamboen isaidquo icpampic. Aton utsin Cain caidēn aden tantienquiocsho Nuquin Papan icsamboen isaid icpampic. Adosho isun Cainēn aton utsimbo cuesuniambien Abedēn Nuquin Papa tantiaquin naid chianetequidquo abi iquec.

⁵ Adnubien adecbidi abi tantiaquidquo Enoc icsho isun Nuquin Papan buanac unēsesa icpampic. Bēdamboquid nec, quequin Nuquin Papan buanacsho nibēnquin Enoc istuidambocpampic. ⁶ Abi tantiesā icsho isashien, ěm̄bi bēdamboen isaidquo nec, quetiapimbo Nuquin Papa iquec, quequin tantiasā aid tantiaquid icsho, Abi yacno puduedetequid nebi, quequin tantiaquid ambi bēdamboen isaidquo nec.

⁷ Adnubien adembidi Nuquin Papa tantiaquin Noe caidēn, Nuquin Papan chiacpadomboen nanuna, qeshun, ěbēd icquid unēs uanushe qeshun, Con utsibo Nuquin Papan chiaid tantiesā yec unēstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bēdamboen isaidquo aidquo icpampic.

⁸ Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. ⁹ Adembidi Nuquin Papa tantiec abi capuacmanombo choash, Con nidaid iquendac, quiasā yuedacmaidimboec quenenenquo yec daēdcaid shubumpi buan-buanequi aid nidaidēn tabadpampic. Adecbidi aton mado Isactsen aid shububidi buanash tabadoapampic. Adecbidi Isaquēn mado Acoboten tabadoapampic. ¹⁰ Nuquin Papa yacno ambi tantiampicpadomboen shubu uaidēn tabadendabi, quequin cainec quenenenquo yec nidaidēn Abadauan tabadtenepampic.

¹¹ Adembidi Abadauanēn Nuquin Papa tantiaquin aton chido Sada machobudash bacuē tishtiapimbocquid icnubi, Nuquin Papan chiacpadqueic con mado iquendac, quequin tantiacpadomboen Abadauanēn chidon machobudquioshon aton mado tishpampic. ¹² Adoac Abadauan tsusiobudaidēnquo tsyuecquid dadpen uispatedi yampampic. Masitedbidi yanoapampic.

¹³ Aden Nuquin Papan aid nidaid ěbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquo yec nidequi unēsampic. Adomboembidi tantiequi

aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. ¹⁴ Nuquin Papa tantiaquid yec Nuquin Papabëd tabadendabi, quish nidaidën quenenenquo yec aidtedi tabadpampic. ¹⁵ Èbi tishondacnombo tantiec unësquo iquebique. Ambo nidoaibi, quish nidtsempampic. ¹⁶ Adenquo yec, Nuquin Papa yacno tabadendabi, qesho tantias, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

¹⁷⁻¹⁸ Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Èmbi chiaid tantiaquidquoda Abadauan neque. Isnu, qeshun, Min mado abentsëc Isac caid cuesuneshun èbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. ¹⁹ Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

²⁰ Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

²¹ Adnubien adembidi Nuquin Papa tantiaquin tsusio budash unësbudquimbi aton cuate bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

²² Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebiq. Mibitedi: Aid nidaid yacno nidnu, qeshun con canite buanta, quequin chuiopampic Osen.

²³ Adnubien adembidi Nuquin Papan bëdambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquin dacuëdenquiocquin aton mado adopampic.

²⁴ Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshë nec, Aidën madopenquo nebi, queopampic. ²⁵ Ancanquid Nuquin Papa tanties nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic. ²⁶ Yuecshun Nuquin Papa yacno yuedac bëdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quish tabadquin Moisesën caimpampic. ²⁷ Adembidi tantiaquin, Equipito yacnoësh èbi nidsho isash nëishun ancanquidën con matses nidmenquo icpec, quenquo yec Nuquin Papa isachimboec Moises tabatenepampic. ²⁸ Yuecash Equipito yacno choashun adembidi tantiaquin, Bëyuec tishaid unësmetequid èmbi èbi yacnoshon uaid mayan bëda èmbi budmiaid min shubu datamenuen èmbi chiacpadomboen nabanta, Nuquin Papan cac ambi chiacpadomboen naquidquo Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ècnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

²⁹ Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuc abi chieshënkido Equipito yacnocquido acte chomiaidën mentoadbudnepampic.

³⁰ Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscaïn tambanec dacuenadtanec shubu dadpen daquënë uain tsasi uaid sec uebudpampic.

³¹ Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido èmbi yuedac èbëd icquido cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquo yec chiesho Daban matses utsibo cuesuneguimbi.

³² Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpen-shun Nuquin Papan chiacpadomboen naindac, quequin cainquido icpampic. Abitedi

chuitiapimbo iquebi. ³³ Aido utsin-utsinquein: Abi ancaidobēdtabi ancanquid Nuquin Papa tantiesha nec, qeshun cuesunepampic. Adembidi, Mibi bēdambo icmenu, quequin Nuquin Papan chiaid tantiaquin cainec adquidquio icpampic. Adquid icsho isun, Pemenu, qeshun bēdi nibēdquid deon caid tabadacno buanshun nebudpampic. Adosho isun piantiapimbo noc Nuquin Papan quiuēccac deonēn penquiocpampic. ³⁴ Utsin-utsinquein adembidi Nuquin Papa tantiaquid icsho, Nēdēncashun tauinu, cac taboadaidēn pichiquenquiocquid icpampic. Adembidi tantiec utsi-utsiec chēshten senuesho isun mēnchicquin cuemepampic. Adembidi tantiequi dayacquiocpampic boedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. ³⁵ Adembidi utsin Nuquin Papa tantiaquin nianten bacuē unēsboed uincumetanquin ani menepampic. Adembidi tantiec tsadsho isun Nuquin Papa tantiesha nebi, camenuequin shoyombededsēcquien cuesuniaqui, Nuquin Papan chiaid tantiesha uainquio yec Nuquin Papa yacno nidebi, quiash unēspampic. ³⁶ Utsi-utsien shocosh bucin mētaneshun quēnēn nauedacsho isun mamēnshunquimbi cueshcanten cuesaqui Nuquin Papabēd tabadte tantiec dacuēdenquio yec tsadpampic. ³⁷ Adembidi utsitsen cuēnoten seshunepampic. Adembidi utsitsen sēnten nacsēnshunepampic. Adembidi utsitsen nidaidēn capuquid bitsi nacnenaid dasiuidpampic. Aton na nibēdnubi mēyanaqui Nuquin Papa tantiaquidquio yec aidtedi tabadpampic. ³⁸ Nuquin Papa chieshēnquid ēbēd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shēcuē uaidēn utsi tabadpampic.

³⁹ Aidtedishun, Ēbi yacno mibi chuibanec ēbēd onquequid bēyucanec yuedanquid iquendac, quequin Nuquin Papan chiaid tantiaquin cainec aidtedi unēsbudnepampic. ⁴⁰ Aidtedi icnubi abi icsaid bedshunash abided cuidadec unēsash uincuenash abi yacno nidoash Yuedanquid Abentsēcquiobi Esuquidistu yanabi icpampic adboedēmbi ma nuqui nēbi icquidobēdta yuedpanuna.

12

Aton bacuē Nuquin Papan dayacmenuequin namiaid

¹ Aden Nuquin Papa tantiec chieshesa dadpen icpampic, quequin dada uasho isun ēbi chieshtometequid utsi ēbi icsaidbēdtabi nainquiocquin ēnuna. Adembidi dayacquiocquin Nuquin Papan chiacpadomboen nabanec tabadnuna. ² Esuquidistu, abitedishun icombo abia yampidquio ēbi chuibanec Nuquin Papabēd onquec bēyucanec abi yacno puduedash yuedanquid nec, quequin tantiaquin aid isachimboen adonona. Aidi, Ēbi yacno matses yuednu, quiash aton Papabēd tabadteneboedi matsesash icsamboquidimbimeocnec cuesten dectanac chieshenquio yec unēsacsho uincuen uaid yanash aton Papabēdi Icbombo iquec. Aidquio tantiec isachimboec nidaidēn nuquibi tabadnuna. ³ Abi chieshēnquidēn natiacquin mēyanaqui chieshenquiocquid Esuquidistu icpanēdash, quequin aid tantiec ma chieshtoenquio icpanuna.

⁴ Ēbi icsaid padpiden nainquio icnu, qeshumbi natiateguid icnuc mimbi ēnambo iccoc. ⁵ ¿Con bacuē cain Nuquin Papan mibi dayacquio icmenuequin chiaid bēpiscudecta icco? Nad iqueque. Tantia:

“Abuido, min Icbon dayacquio icmenuequin chiaid cacuidenda.

Adecbidi ambi natiamianquiopec camiaid icash chieshenda.

⁶ Ambi natiamianquiopec camiaid dayacquio icmenuequin nametequid con bacuēbo nec,”

quequin Nuquin Papan chiampid nec.

⁷ Natiateguid mibi dayacquio icmetequid nendac. ¿Ēbi cudasaidquio con mado dayacquio icmenuequin namebanesa nebi, quecta aton papa icpadic? Padenquio. Ambi: Con bacuē nec, caid natiateguid icnuc, Dayacquio icmenu, quequin ancaquin chono uaic. ⁸ Natiateguid icnuc ambi dayacquio icmenu quequin namiaidpenquio yec, ambi, Con bacuē nec, caidpenquio mibi nec. ⁹ Ēnden dayacquio icmenu quequin mibi ancaquidēn mibi tishmequidēn chiacpadomboen natiateguid icnuc naquidquio mibi icpondac. Nēbi Nuquin Papan dayacquio icmenu quequin chiacpadomboen natiateguid icnuc naquidquio icnuna abēdi tabadnuen. ¹⁰ Abi tishmequidēn ambibi tantiacpaden dayacquio icmenu quequin aton bacuē yuen nametiapimbo iquec unēsendac. Padnuen Nuquin Papan abipadquid icsaisa icmenu quequin natiaquionoc nuqui namendac. ¹¹ Adoac nuqui natiaguec tabadec. Adoaidi yuecash nuqui bēdamboec tabadendac. Adecbidi natiateguid icnuc dacuēdēnesa nuqui yanec. Adecbidi Nuquin Papabēd icquid nebi, quequin tantiaquidquio yec natiateguid dacuēdēnesa nuqui yanec.

¹² Aden tantiec dayacquio ictiapimbochoedi: Abipadquid iquendabi, quiash dayacquio yec tabadta. ¹³ Adenuidi naic tabadquin utsibo isme ma dayacquio ictiapimbochoquin niaquec cuëshēdte bumboedi bēdambo yampanuna.

¹⁴ Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquiec nuquibi icnuna, quiash aid tantiec tabadec isnanec chuinanec adquid yanta. Adoesa Icbobēd tabadtiapimbochoquid nendac. ¹⁵ Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bēdamboec tabad, quequin chuiban. ¹⁶ ¿Ada aton chidopenquio chudquid icpec? Adecbidi, ¿Ada adembidi aton bēnēpenquio chudmequid icpec? quequin isnuquoin adquid istuidshun Nuquin Papan chiaid chuiquin bēdamboen tabadmeta. Adembidi, Esaupadquid icnushe queshun ¿ada Nuquin Papan bēdamboen tantiaid chieshēnquin isuidquid icpec? queshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unēsnu tusio icquin con pan bēdamboen tantiaid chuisho mimbi tantiaata, quequin aton papan bēdambo icmenu quequin chiaid chieshquin Esaun tantienquiocpampic. ¹⁷ Yuecshun, Aton utsi Acobo aton papan chuibanosh, quesho tantiaish shubiquin, Mimbi bēdamboen tantiaid ēbitsen chui, papa, cac chuitiapimbochoquidēmbi, Ēnden nibēdquiocnoc uesquin min utsi chiombi, quequin Esau chuipampic aton papan.

¹⁸ Adembidi, Nuquin Papan nadatiambocquin uabanaid tsusedpabon isampicpadomboen mimbi isabicoc. Macuësh Sinai caid yacno choshon aidon isbenampid nēid iquec: natia nēdēnquedote; utsibic, inchēshacimboc isadquid; utsibic, cunquequid dapabimboec isadquid; ¹⁹ utsibic, shocosh shoncaten shoncacimboc onquenec pabiante paēboshē icpampic. Adec onquesho tantiaishun, Papa, mibi onquesho tantiac dacuēdampambo iqueque. Mibi chuitequid Moises icme, capampic. ²⁰ Adec macuësh yacnombo icquin: “Ēmbi nadatiambocquin uabanaid ismenubi macuësh yacno anoentsēqui choenda. Adecbidi matses adecbidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan. ²¹ Aden Nuquin Papan nadatiambocquin uabansho isash: “Dacuēdampambo iquec, quiash, Dacuēdebi,” queoapampic Moisessten uēdēquec.

²² Mibien dacuēdenquio yec Macuësh Sion cashumbic Edusaden Chuca Bēdambochoquid caid Nuquin Papa ēnēdesambo tabadacno choachimboec mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ěmbi nashunaidtedi, Esus tantiaquid chotequid iquec, quiash bēdambo iquebi, quec cuēdēndonec tabadendac. ²³ Abi tantiaquidtedi Nuquin Papan bacuē icbo yacpadquiec aton shubu abentsēquēnuēshi Icbobēd onquec ěnden mibi taēpoc. Aidi mimbi naid cuidquid ambi chiapadomboen nadenequid mibi nēsesa icsaisabidi icmequid Nuquin Papa nec. Aidbēd ěnden tabadacimboc abēdi onquec mibi taēpoc. ²⁴ Abēd icquin Nuquin Papan ambi ěnden chiaid ěmeshun ambi nēbi chuioaid, mibi chuibanec aton Papabēd onquec bēyucanec yuedanquid Esuquidistubēd ěnden mibi onquepoc. Mibi icsaid bedshunash abided cuidadece unēsō isun cudan siac intac chiuidnēdaid tantiec aidbēdi mibi onquepoc. Abedēn nidaidēn capuquid yua cuesuniampicpadquidēn intac chiuidec unēsaid tantiec Icbobēd mibi onquetiapimbo iquec.

²⁵ Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ěnden chiaid chuiquid tantiate bunesa cuidpampic. ¿Adembidi ambi nēbi chiaid abi yacno yuedanquid aton Madombo Esuquidistu tantiesā Nuquin Papan comapenen cuidenquioda icpadic? ²⁶ Ēnden Macuësh Sinai yacno Nuquin Papan chiacnoshonquio nidaid ishcumpampic. Nēbien: “Padpidemboen nidaidbēdta abu ěnēdmenuen ishcunoaindambi,” quec Nuquin Papa. ²⁷ Aden chuiquin ambi uaidtedi ěnēdmenuen padpidemboen ishcunoaindac abi yacno choaidtedi icsaisa icmiaido yec ěnēdtiapimbo iccuedednuc.

²⁸ Adoaidi Nuquin Papabēd abi tantiaquido ambi bēdambo icmiaido yec abēd tabadte ěntiapimbochoquin Nuquin Papan nadatiambocquin nabanaid tantiec cuēdēndonec tabadta. ²⁹ Nadatiambocquid Icsaisabidi icquin aidēmbi, Esuquidistu tantiaata, quequin nēbi chiaid tantiesā chian anēdēnquequid nēsacaindac.

13

Nadomboen nata cain chiaid

¹ Esuquidistu tantiaquid yec aid tantiaquidtedi con utsibo nec, quiash tantiananec nashunanta. ² Adembidi Nuquin Papa yacnoësh choquid abi tantiaquido nashuntequid ambi uaido mayan bēdabo chosho yuedampicpaden mimbi isacmaidquio Esus tantiaquid chosho yuedta. ³ Adembidi quēnēn nauedaid iquec utsi iste buntsiabi, queshun quēnēn nauedaid istan-istanta. Adecbidi buntsiabi, queshun menetan-menetanta. Adembidi utsin mēyanaid tantiec shubioata.

⁴ Adec tabadec con chidopenquoio chudnu quesa iquec chido utsi isuidquid icta. Adesa icsho Nuquin Papan mibi cuidendac. ⁵ Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bēdambo iquebi, quec tabadta. Adec tabadquid Nuquin Papan ēnden dada uamiampid naden chiec: “Mibēdi iquebi.

Nianenquiocquin mibi dayun uanuna.”

⁶ Adsho tantiaash:

“Con Icbombo ēbēdi iquendac.

Aidēmbi ēbi cudasquin dēcatiac chieshēmēnquid dacuēdēnenquoio iquembi,”

nuqui quendac. ⁷ Adembidi nidaidēn icquid mibi chuiquid dapabo Nuquin Papan chiaid mibi tantiamenuequin chuiquido bēshunenda. Aido Esus tantesa uainquoio yec bēdamboec tabadpanēdash. Aido tanec bēdamboec tabadoata. ⁸ Con Icbombo Esuquidistu nec. Abia Yampidquoio yec nēbi adquiobidi iquec. Aidi ēnēdtiapimbo yec abi tabadec.

⁹ Adquid Esus icnuc Nuquin Papa chieshēnquidēn chuisho tantiesia icta. Aidēn naden chiec, Nēid petequid icnubi nēid utsi petemaid nec, quequin chiec. Mimbi piaidēn mibi bēdambo icmetiapimbo iquec. Padnuen matses icsaid bedshunash abided cuidadquidēn, Nuquin Papan madonquoio paucaid iquebi, quequin tantiaquidquoio icsho isun Icbobēd tabadmequin ambi bēdambo icmiaidquoio nendac. ¹⁰ Matses icsaid bedshunash abided cuidadash uincuenash abi tantiaquidbēd ēnēdenquoio yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidēn capuquid yua cuesuneshun nibēdquiocnoc tauaiidēnquoio matses Nuquin Papabēd tabadmetiapimbo iquec. Adembidi aidēnquoio nuqui icsaisa icmetiapimbo iquec.

¹¹ Isadaidbo icsapash, qeshun nidaidēn capuquid yua cuesuneshun aidēn intac bedshun, Nēid intac Icsaisa Bēdaidquoio anquēnē uaid nuntan buanshun daseccacsho isun abi yacno puduedacimbocesho Nuquin Papan isadaidbo isec, qeshun nuntan buanshun daseccapampic. Adnubien matses nibēdacno nami buanshun uesquin tauipampic. ¹² Adembidi matses tabadenquoio yacno Esus buanshun dectanac unēsacsho siac aton intac chididiepanēdash nuqui icsaisa icmenuc. ¹³ Adoaidi abi tantiaquid yec abēd icquid nebi, quequin ēnden chiampicpaden nainquiocsho isun isadaidbo Esuquidistu tantiesan cacumiaqui chieshenquoio yec tabadta. ¹⁴ Adquid iquec nidaidēn yuec tabadesa icquimbien Edusaden Chuca caid Nuquin Papa ēnēdtiapimbocquidbēd tabadaid cainquidquoio nuqui nendac.

¹⁵ Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bēdambo iquec, quequin Nuquin Papa chuidenenuna. ¹⁶ Adodonequin utsibobēd tantiananquin nashunquin aton na nibēdquid menequid icta. Adsho isash, Con mado yec con champi yec quec bēdamboec tabadquid nec, quiaash bēdambo iquebi, quepadac Nuquin Papa.

¹⁷ Ambia Esus tantiaashun chuiquidon chiapaden nabanta. Nuquin Papan, Ēbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiapadomboen naquin ma aido bēdambo iquebi camepanuna. ĸChieshecta mibi bēdambo icpe? Padenquoio.

¹⁸ Chieshenquiocquin ēbēd icquid Nuquin Papa chui. Bēdamboen nabanec tabadteniobi. Adequi tabadebi utsibo: Icsambocquid nec, quetiapimbocnoc. ¹⁹ Adembidi ēbi tantiaquin Nuquin Papa chuidoneta. Mimbi adonoc badedquoio mibēd iquendabi.

²⁰ Adembidi utsibēd bēdamboen tabadmequid Nuquin Papan aton Mado matsesacsho utsibon unēs uashun siacsho isun uincuemiac bēyucanec abuc puduedoash abitedishun Icbombo nec. Abi tantiaquido chuinuen yuedquid aidi Nuquin Papan icmepanēdash. ²¹ Adquid Esus icmeshun ambi tantiapadomboen ma Nuquin Papan mibi icmepanuna. Adoac, Ēbi puduedmuen Nuquin Papan naid nec, quequin ēnenquiocquin chuiquid ma icpanuna.

²² Mibi tantiamenuen ēmbi dada uaquin chiaid daēdpactsēcquoio icsho bēdamboen isec onquequin tantiadoneta.

²³ Nēbi utsi chiembique. Tantia. Timoteyo quēnēn nauedboedi nēbi puduemiac aid badedquoio nēmo choan aidbēdi mibi yacno nidendabi.

²⁴ Mibēd icquid Esus tantiaquid utsibobēda mibi chuiquidtedi tantiec tsadebi quequin Pabadon dada uaosh, quequin chuita. Adecbidi ēbitsen tsadebi quequin chuiolata, queoapec nēuēsh Itadia yacno tabadquido.

²⁵ Nuquin Papan bēdambo icmiaid ma mibitedi icpanuna. Padi. Aidtedi dada uaombi.

SANTIACON DADA UAID

¹ Santiacono nebi. Nuquin Papan namiaidquio, Nuquin Icho Esuquidistun namiaidquio-bidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

Natiametequid

² Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaïd icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. ³ Adaïd icnuc, ¿Èbi tantiaquidquioda neque? Isnu, quequin, Nuquin Papan èbi dayacquio icmec, quequin tantiec adecbidi tabadoata. ⁴ Aden tantiec tabadsho isun bédamboec tabadte uesquin tantiabənquidquio mibi icmendac ma Esuquidistupadquid yampanueshun.

⁵ Mimbi tantienquio yaid Nuquin Papa chuita. Aden chiaquien, Ma tantianu, qeshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. ⁶ Èbi tantiamē, queboedi, èbi tantiamenquiocpec quequin tantienda. Èbi tantiamēpec queboedi padenquio yanec cuëshēdec capuidequi yampec. ⁷ Adquid Nuquin Icbon pausuntiapimbo icpec. ⁸ Adquid, Nuquin Papan èbi tantiamēc, queboedi capuidequi icquidbimboec icpec.

⁹ Shubu abentsëquën tabadacpadquiec tabadquid icta. Adec tabadec mitsana daëdpactsëc icquid yec, Con na daëdpactsëc iquēc, quequin mitsanauidi tantienquiocquin naden tantiatata. Nuquin Papan bacuë nebi. Abëdi cuëshēdenquio yec tabadebi, quequin aiduidtsëqui tantiec tabadteneta. ¹⁰ Aton na dadpen icquidombien aton na bēdiactsec tantiaquin naden tantientiac: Con na nëidic chodquec; utsibic chiuidec. Adecbidi con nami shēnibudequi Nuquin Papan bacuë nebi. Abëdi cuëshēdenquio yec tabadebi quequin tantiec tabadta. ¹¹ Tanunquiocquidēn tiedēn caniquid unēsec podo tididiquec. Bédamboeboedi nibēdquiec. Adquiecbidi icho aton nabi bedbanequi aton nami shēnibudequi unēsec. Icho ichoedi icho ictiapimbo yanec. Adec icho ictiapimbo yanēbi, quequin mitsana comapenen tantienda.

¹² Adecbidi natiaic shubitequid icnuc Nuquin Papan chiaïd niaquēnquio yec dayacquio yec tabadquid Nuquin Papan bédambo icmiaïd nendac. Adquiecbidi, Èmbi chiaïd niaquēnquio yec mibi tabadsho isembi. Èbēd icquid mibi neque. Pudued. Nēuëshquio mibi unēstiapimbo iquēc, quēndac Nuquin Papa. ¹³ Mibibi icsash, Nuquin Papan namiac nebi, quēnda. Nuquin Papa Icsapenquiocquid nec. Aidi icsa uantiapimbo iquēc. Icsa uanesa nec. ¹⁴ Nidaïdēn tabadquidien icsate bunec abibi icsaic. Adecbidi ambibi tantiacpadec icsaoaic. ¹⁵ Icsamane quequin tantienquio yec unēsacsho abi yacno puduedmenquiocquin Nuquin Papan uquē nēsecaindac adquid.

¹⁶ Utsibo, Nuquin Papan chiaïd chieshēnesa nebi, quec mibibi mua uadenda. ¹⁷ Nuquin Papan pausunaid bédambouidi iquēc. Utsi uaquin namiantiapimbo iquēc. Adenuidi namec. Adquiouidi Nuquin Papa iquēc. ¹⁸ Èmbi chiaïd tantiaquidquio icsho con bacuë nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquio aton Mado Esus nidaidēn budmepadēnec. Adec budash nidaidēn capusho isash abēd ichoedo abi tantiaquido nuquitedi nec. Adquid icsho ambi bēyuc bacuë icmiaïdo, con nabo cain, Nuquin Papan cuēmbanoshi. Aden ambi bēyuc bacuë uaido icquin chuibanac ma tantiaquidquio dadpen yampanuna.

Nuquin Papan chiaïd tantiaquin nabanta quiaïd

¹⁹ Nēid bédamboen tantiatata. Chuinu. Nuquin Papan chiaïd bédamboen tantiaquid icta. Ambi chiaïd bédamboen tantienquiocquin aid badedquio chiēnda. Adecbidi badedquio nēishēnda. ²⁰ Badedquio nēishquidēn Nuquin Papan chiapadquiec bédamboec tabadaïd ismesa nec. Adquid, Bédamboen mimbi naoc, Nuquin Papan catiapimbo iquēc. ²¹ Bédamboec tabadesa icquēn mimbi icsamboen tantiacpaden naid ēnquiota. Aden ēnu quiaish, Icsaobique. Mimbi chiaïd tantiaquiono. Èbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquēc aton Mado Esuspadquio yec cuëshēdenquio yec abēdi mibi iquendac.

²² Nuquin Papan chiaïd tantiaquin nainquio yequi Nuquin Papan chiaïd bédambo iquēc, quec mibibi mua uadenda. Nuquin Papan chiaïd tantiabocpadomboen nabanta. ²³ Nuquin Papan chiaïd tantiaquin nana isnanten ²⁴ bēisadash bēpiscudacimboec bēpiscudēndac. ²⁵ Padnuen Nuquin Papan nēbi chuiboed utsin comapenen tantiadēd-tantiadēdec. Aden tantiaquin, Con Mado Esuquidistu tantiaquid con bacuë caimbi, quequin Nuquin Icbon

chiacpadomboen nabanec tantesa uainquiocquid adquid nendac. Aden tantiaquin nabanquid Nuquin Papan bédambo icmendac. ²⁶ Padnuen, Nuquin Papan chiaid tantiaquid nebi, queboedi ana bédamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquio chuiquid nec. Adquid-bidi bédamboec tabadaid ismesa nec. ²⁷ Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsécquid chonoadsho isun nashuntiad. Nati-aic camiaid icsho isun adembidi nashunoatiad. Adembidi shiadimpi machoabictsécquido tantiaquin nashunoatiad. Adembidi niante machobo utsin bedabi samédquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Èmbi chiaid tantiaquin naquidquio nec. Con Madopadquidquio icsaisa nec, quendac Nuquin Papa.

2

Nëid bédambo iquec. Nëidien icsambo iquec, quesa icta quiaid

¹ Utsibo, Nuquin Icho Esuquidistu Bédaidquio nec. Aid tantiaquid mibi nec. Adquid icquin, Nëid bédambo iquec. Nëidien icsambo iquec, quenquiocquin icsamboen nainquiocta. ² Mibi iccuededacno Esus tantiaquid mimi isacmaid choec. Abentséc bédaidquio dasiuidash nac-nacquiocquid mësiuidquid puduednubien utsi icsactsécquiocquid dasiuidt-sash puduedec. Aid daéd chosho isun ¿mitsipadentsi mimi tantiapatsia? ³ Bédaidquio dasiuidquid isun naden mimi tantiatsiac: Bédambocquid nec. Aton na dadpen icquid nec, quiacimboen, Tsusion dayunquio tsadec cho, quequin mimi aidi tsadumpec. Adshumbic, icsactsécquiocquid dasiuidquid isun, Aton nain nibédchitec, quiacimboen uano tsad mimi caoapec. ⁴ ¿Nëid icsambocquid nec. Nëidien bédambocquid nec, quiacimboen Esus tantiaquid utsibo mimi tsadunenquioda ictio? ¿Aton na tantiaquin adoenuioda ictio? Aden naquin bédamboen tantiaquin naisa mibi neyoc.

⁵ Nuquin Papan chiaid tantiesabimboecquin mimi naid nec. Mimi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin ëbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iguendac. ⁶ Aidi bacuëbimboecnuc mimi uano tsadumpec. ¿Utsibic tsusio dapabimboecnuc mimi dayunquio tsadumbocpadquidën utsin-utsinquien chono uashun mibi daédpactséc menenquioda ictiosh? ¿Adquidon mua uain chuiquin mibi utsi-utsien quënën nauedmenquioda ictiosh? ⁷ ¿Adoanquidën baded-badedquien Esus quec onquequin mamënshunenquioda ictiosh?

⁸ Nuquin Papan chiaid nad iquec: “Utsin naden ëbi nashuntiadquio iquec quequin, mimi tantiacpadomboen nashunta.” Nuquin Papan chiacpadomboen tantiaquin nashunquidquio iquec mibi bédambo icpec. ⁹ Nëid bédambo iquec. Nëidien icsambo iquec, quiacimboen naquid icnuc Nuquin Papan chiaid niacquid mibi iquec. ¹⁰ Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. ¹¹ “Mimi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunequid mibi iquec Nuquin Papan chiaid niacquid mibi nepec.

¹² Mibi tantiaquin mibi icsaid pauquec Esuquidistuded icsambocquidbimboec yec unëspaneédash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bédamboec tabada. ¹³ Esuquidistu tantiaquid utsi icsambocquid nec quesa icta. Èbi icsaid Esuquidistun paucac. Adomboembidi abi tantiaquid utsi icsaidbidi paucac quequin bédamboen naban. Icsambocquid nec quiacimboen icsamboen nabansho isun Nuquin Papan adomboembidi mibi chuiquin cuidoaindac. Èbèdta Esuquidistun paucaid nec quequin utsi tantiaquin nashumënquid icquin icsambocquid nec quiacimboen icsamboen nashuntiapimboquid mibi nec.

Esus tantiaquid nebi quequin ambi tantiacpadomboen nabanquin isme quiaid

¹⁴ Utsibo, Nuquin Papan bacuë nebi, qeshun ¿Icbon chiaid nainquiocquinda utsi bédambo mimi icmepadi? Padenquio. ¹⁵ Esus tantiaquid abi dasiuidtebéd pete nibédquid, Bec cho, qesho ¹⁶ menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimi cacta bédambo icpadic? Padenquio. ¹⁷ Adembidi, Nuquin Papan bacuë nebi, qeshun Icbon chiacpadomboen naisa Icbon bédambo icmiaidpenquio nec. Nuquin Papan bacuë nebi, qeshun naisa Nuquin Papa yacno puduedtiapimbo icoaic.

¹⁸ Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daédshun tantiacpadomboen mimi tantieque? Chui. Tantanu, quequin mimi chuitsiac.

Adoaqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusên chiacpadomboen naquin mibi ismembí, caimbi. ¹⁹ Nuquin Papa Abentsêcquiobi iquec, quequin mimbi tantiec. Aden tantiaid bêdambo iquec. Adembidi, Nuquin Papa Abentsêcquiobi iquec, quequin mayan icsatedishun tantiaoaic. Aden tantiaquin niacquido yec uêdêquec.

²⁰ Icsamboen mimbi tantieque. Tantia. Chuinu. Nuquin Papa Abentsêcquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec. ²¹ Nuquin Papa tantiembi, qeshun ambi chiacpadomboen naquidquío icpampid chuinu. Tantia. ¿Abadauan êbi tantiaquidquioda neque? Tantanu, qeshun, Min mado abentsêc mibi cudasaidquío êbi tantiaquin cuesuneshun tauita, cac Abadauanên Nuquin Papan chiaid niacmane qeshun tauinuequin aton mado abentsêc setsempampic. Chêshtempti sanandosho isun, Padi. Chên. Êmbi chiacpaden nanuesho mibi bêdambo iquec, quequin mibi bêdamboen isembi, ¿quequin chienquioda Nuquin Papan icpampic? ²² Abadauan Nuquin Papan chiaid cacuidenquío yec, Con Icho Nuquin Papa nec, quec abi onquiacpaden ismepampic. ²³ “Mimbi tishmiaidên tishmiaid dadpenquioshê iquendac,” quequin chiondashumbic Nuquin Papan yuechshun adembidi: “Min mado abentsêc cuesuneshun tauita,” quequin chuoaqui, Nuquin Papa abimbo chuíquidquío nec, qeshun ambi chiaid niacchitomane quequin, Abadauanên aton mado abentsêc setsempampic. Adosho isashien Nuquin Papa, “Êbi tantiaquin naquidquío Abadauan nec. Adquid con matsesquío aidi nec. Aden aidi tantiaquin êmbi yuecquiocshon nanuequin tantiaid Abadauan chiembi,” quepampic Nuquin Papa.

²⁴ Nuquin Papan bacuê nebi, qeshun ambi chiaid naquidquío Nuquin Papa tantiaquidquío nec. Nuquin Papan bacuê nebi, qeshun ambi chiaid naisa niacquid nec. ²⁵ Adashic, Nuquin Papan chiaid tantiashun naquid utsi icpampic. Aidi isadaidbon chidopenquío, Daba cuêmêdquid, dada dadpen chudmequid icpampic. Isadaidbon Icho nadatiambocquid nec, qesho tantiashien, Adquid abu nidaidbêdta aidênquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidên matses nec, qeshun abi yacnouidsêqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbêd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedên chuibocpadquíobi Dababêd icquido cuesunianenquío yec isadaidbobêd icquidobimboec isec tabadpampic. ²⁶ Nuquin Papa tantiaquid Daba yanshun bêdamboen nasho isun mênchicaid Nuquin Papan con matses caidbêd tabadpampic. Padnuen, Esus tantiaquid nebi, qeshun Icbon chiacpadomboen naisa cuêshêdabimboec tabadec.

3

Anan icsamboen chiec onquiaid icsa ênta quiaid

¹ Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac. ² Chuibanquidtedishun chua-chuatsêquien chuibantsec. Nuquin Papan chiaid cuembo chuibanquid yec icsaisa yanec adquid. Bêdamboec tabadaid uesquin tantiaquin ismequidquío adquid nendac.

³ Cabayo anêshquin dêchêdêdcash uidên uash tsadquin nidmec. Aden uidên uaquin bidiacmec. ⁴ Adembidi uncaten cano dapa tsibidiacoaic. Cunquequidên comapenen bêcunetiadquiocnobi adembidi icbon nidmec. ⁵ Cabayo canobidi nua icnuc abi bidiacmete aniactêsêc iquec. Adecbidi icbo nua icnuc aton ana aniactêsêc iquec. Aniactêsêquidi oncamequin icbon ambi naid dadpen comapenen chuibanec. Adembidi oncamequin onquiaid icsa chuibanec. Nêdênquiaid dêtsisidash badedquío nidabimboec onquiaid icsa badedquío nidoaic. ⁶ Ana onquiaid icsa chuibanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

⁷ Nidaidên capuquid podochoquidbidi matsesên yuampicpaden abi yuaid iquec. Yua quenenash cuenenquiocquid. ⁸ Ad yenquío ana iquec. Quenenenquío yec ana onquebudec. Onquiaid icsa adecbidi ênêditiapimbo iquec. Ana onquiaid icsa tantiamenec adecbidi icsabudquieic tabadendac.

⁹ Nuquin Icho bêdambo iquec, qeshumbic ana icbon, Nuquin Icbon uaid matses icsamboen iquec, quequin chuibanoaic. ¹⁰ Ana shêcuên utsi bêdamboen chuishumbic utsi icsamboen chuioaic. Aden nuqui chienquío ictiad. ¹¹ ¿Acte batapenquiocquid choaidênueh

batambocquidta chopadic? Padenquo. ¹² Adecbidi ¿cuète bacuë batambocquidën ëshë bëchi chopecta dëyuctic? Padenquo. Adecbidi, ¿[sitodo dataniadaidën bacuë batambo yecta dëyucpadic? Padenquo. Aidi adesa yacpadquiec Esus tantiaquidën ana shëcuën utsi bédamboen chuishun utsi icsamboen chiesa ictiad.

¿Tsutsi Nuquin Papan chiaid tantiabenquidquo icpec? quiaid

¹³ ¿Tsutsi Nuquin Papan chiaid tantiabenquidquo icpec? Adquid yec comapenen Esus tantiaquid nebi, quenquiocquimbi bédamboec tabadquin ismequid utsi-utsien ma icmebampanuna. ¹⁴ Utsin tantiamenushe qeshun ëmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. ¹⁵ Adembidi, utsin dëniacnushe qeshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. ¹⁶ Aden aidën icsamboen tantiacpadomboen abéd icquidon adomboembidi tantiec. Aden tantiec, Utsi dëniacnu, quiash utsi-utsiec dëniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquiec. Ad icnuc icsateuidi bunquid yampec. ¹⁷ Nuquin Papan tantiacpadomboen pausunaid ad yenquo iquec. Ambi tantiacpadomboen pausunaid yec utsibéd bédamboec tabadquid iquendac. Adembidi utsi tantiaquin nashunquidquo icoaindac. Adembidi ëbédtan nabanec cho cac nabanendac. Adembidi, Icsamboquid nec, quenquiocquin bédamboen nabanquin ismendac. Adembidi, Esus tantiaquid nebi, abi quiacpadomboen bédamboen naic. Adecbidi utsibo chiec muaisa nendac. ¹⁸ Ambia tantiaquid utsibéd bédamboec tabadquin ismiac adecbidi utsibéd bédamboec tabadquid dadpen yanendac.

4

Ëbi nua pausun, quequin chiash Nuquin Papan dayunquo tsadta quiaid

¹ ¿Atotsi quiaish Esus tantiaquido cuiddianante buncuededpec? Mibi icsate bunacpadecuqi mibi cuiddianante bunec. Aiduidquo tantiabudequi mibi chushcananedec.

² Nëid bunebi, queboedëmbi bedtiapimbo yanquin mimbi cuesunec. Adecbidi, Utsi dëniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. ³ Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

⁴ Mímibi inaiduidi chudenquo yacpadquiequi Nuquin Icbouidi tantienquo yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshënquid nec. ⁵ Adenquiocquin Esus tantiasho isun aton Mayan Nuquin Papan Esus tantiaquidtedi meniic bédamboec tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tantiata. Chuinu. Con bacuë nec, quequin aton Mayan Nuquin Papan Esus tantiaquido menec. Aden tantiaquin meniic, ¿Esuquidistu tantiaquido cudasquin dëcatenquioda aidën icpec? ⁶ Aidëmbi abi chieshenquo yacpaden tantiamebanac icsamane quiaish chieshenquo yec bédamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bédamboen tantiatiapimbo iquebique. Ëbi tantiame, Papa, qesho Nuquin Papan nua pausunac aton icbo chieshënenquiocquid iquendac adquid.”

⁷ Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquo tsadacimbocquid ambi chiaid tantiata. Nuquin Papa chieshënquid mayan icsan yuadenda. Adquidën yuatiapimbo iquebique. Nuquin Papan chiaidquo nabanu, qeshun nabanuc mayan icsa cuenendac. ⁸ Aton dayunquo tsadquidimbocquidbéd tabadquidquo Nuquin Papa nec. Icsash uano tsadquid icboedi bëchishash acten dapanudacimbocquid mimbi tantiata icsa ënta. Adash, Tantiataid bëda pausumenu, quiash Nuquin Papan dayunquo tsadacimbocquid chieshenquiocquin ambi chiaiduidi tantiadeneda. ⁹ Aden tantiec tsadboedi, Ëmbibi tantiembi, quec Nuquin Papa chieshënuquid dayunquo uano tsadashic, Con Icbo tantiec unësqquo iquebi, quiaish shubiec mamënenquo yec tsadta. Mibibi uano tsadquid yash unësqacimbocquid icboedi choec isadcuenacimbocquid Nuquin Papan dayunquo tsadacimbocquid yec chieshenquo yec bédamboec tsadoata. ¹⁰ Uano icboedi choash, Ëbibi icsaobi. Nëbi icsate bunenquo iquebi. Mimbi chiapadtiadquid iquebi, Papa, quequin chui. Aden mimbi chuisho tantias, Pudedash nëmbo ëbéd tsadacimbocquid mibi yanoaic, quependac Nuquin Papa.

¹¹ Utsibo, Esus tantiaquidtedi min utsibimbocquid nec. Mibéd icquid icsamboec chuinanenquo yacpadquiec Esus tantiaquid utsibéd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiacimbocquid nec. ¹² Nuquin Papa Chuiquid Dapa

Abentsëcquiobi iquec. Ambi chiacpaden naquidquo nec. Nuquin Papa abitedi Isquidquo Abentsëcquiobi nec. Aden isquin: Nèid icsambocquid nec. Nèidien bédamboquid nec, quequin Chuiquidquo abentsëcquiobi aidi neoaic. Adquid icquin ambi chiaid nabanquid abèdi tabadmec. Ambi chiaid niacquidien abèdi tabadmenquiocquin uquë nèsecaindac. Nuquin Papan ambi chiacpadomboen naquidbèdtabi ambi chiacpadomboen naisa isquidquo icquin ambi isacpaden cuidendac. ¿Adquidbidida mibi ne? Padenquo. Adquidpenquo icquin ¿atotsieshun, Icsambocquid nec, quequin mimbi chuipe?

Ma badiadshun nanun chiaid tantiesa neyoc, quequin chiaid

¹³ Tantiacquidquo nebi, quiash, Piacquid bednuec seta abentsëc matamec chonoadec nidebi, quequid chuinu. Tantia. ¹⁴ Ma adquid badiadshun nanun chiaid tantiesa mibi neyoc. ¿Tetsi seta matamec mibi tabadpe? Badiadbudnuc cuen-cuempambo yash badedquo nidachimboec matses nidaidèn tabadash adecbidi mibi nibédandac. ¹⁵ Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcambi, quetiad. ¹⁶ Aden chienquiocquimbi mibi utsi dèniaquec onquiaid mimbi chiec. Aden chiec icsaic. ¹⁷ Nuquin Papan chiaid tantiembi, qeshun adomboen natiacquidi naisa iquec icsaic.

5

Na dadpen bedbanquin dayun uaquido chiaid

¹ Nèbi aton na dadpen bedbanquin dayun uaquido chiembique. Tantiata. Mibi unèsun mimbi bedbanquin daèd uaid mimbi tantiaidquo buantiapimbo mibi iquendac. Aden mimbi bedbanquin daèd uaiduidtsèqui icscho isun Nuquin Papan mibi cuidendac. Adquid nebi, quequin tantiaish shubita. ² Unèsosh, quequin chiac mimbi dadpen dayun uaid nibènquin isac ènden chodquiac. Adembidi mimbi bédaidquo dectanaid capishton ènden piac. ³ Min shocosh piucquid ènden chiuidac. Adecbidi min piucquid utsi ènden tiadac. Adenuidi tantiaquin bedbanquid unèsacsho abi yacno yuedquin, Bédamboen mimbi naoc, quetiapimbo Nuquin Papa iquendac. Tanunènquo shubu nédènquish nibédacpadquiec mimbi bedbanaid nibédquiendac. Adenuidi tantiaquin, Esus èbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. ⁴ Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquiec. Aidi mimbi menenquo yaid Esuquidistu tantiaquido Nuquin Papan tantiaido nec. Adembidi, Con tiedèn caniquidtsen dayun uanu, quequin mimbi bedmiado uèshquiec bunec sidquesho Nuquin Papan, Nadatiambocquid Abentsëcshun tantiec. ⁵ Aido bunec sidquenubi chonoadengquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudachimboen mibi bunaiduidi bedbanquin dadpen dayun uaquido mibi nec. Aden nabanquin bédamboec tabadaid ismesa mibi nec. Adec tabadec unèsash abi yacno mibentsèqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidèmbi mibi cuidendac. ⁶ Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daèdpactsëc mimbi menebampoc. Aden nabanec mimbi cuesuniachimboec bunquiec chonoadequi unèsposh.

Ma Nuquin Icho chono quiash chieshesa icta quiaid

⁷ Nèbi utsibon chono uaido chuinu. Tantiata. Nuquin Icho choec quequin tantiec chieshenquo yec tabadta. Nitsinash ma caninu quianec pec nidash cainec icho tabadec. ⁸ Adembidi, Nuquin Icho èbi bednuec choec, quec bédamboec tabadquin caimbudta. ⁹ Adec tabadquin Esus choate cainec Esuquidistu tantiaquid utsibobéd chieshènanenda. Adec utsibobéd bédamboec tabadsho isun abitedi tantiaquidènquo Chuiquid Dapan mibi menequin bédamboen cuidendac. Adesain menenquiocquin cuidendac. Adembidi, Nèidèn bédamboen naosh. Nèidèmbien icsamboen naosh, quequin èbi Chuiquidènquo chiendac, quec chieshenquo yec bédamboec tabadta.

¹⁰ Utsibo, natiatèquid icnuc Nuquin Papan chiaid ambi chuimaido chieshenquiocpampic. Aidquo chuibanu. Tantia. ¹¹ Natiad icnuc chieshenquiocsho isun Nuquin Papan bédambo icmendac, quequin nuqui tantiondaid nendac. Natiac cametèquid icnuc Nuquin Papa chieshènenquiocquid Obo icpampic. Aton na dadpen icboedi icsatèquid utsi-utsiectsëcquiequidèn uesac nibédquiocsho isash, Con nabèd con nabo nibèdnuc Nuquin Papa bédambo iquec, quec chieshenquiocpampic Obo. Adquid icscho isun daèd uaquin Nuquin Papan meneopampic. Matses tantiaquin naquidquo Nuquin Papa nec, quequin ¹² abimbo chuiquidquo icta. Utsin: ¿Ada naden natsia? cac, Ai, quiacpadomboen nabanta.

Adembidi, Padenquo, quiacpaden nabanoata. Mua uanec onquequid Nuquin Papan cuidendac.

Nēdic bēdampec quequin abimbo tantianuc quiaid

¹³ ¿Natiambo icsatequid icnuc dayactiapimbo icquidta icpec? Adquidēnquo Nuquin Papa chuitiad. ¿Bēdambo iquebi, quec tsadquidta icpec? Adquid Nuquin Papan naid chiec cuēdēntiad. ¹⁴⁻¹⁵ ¿Aton dada icsabudquidta icpec? Adquidēn ambia Esus tantiaquido chuiquin, Nuquin Papa ēbi chiec cho, catiad. Adsho tantiash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuēte bacuē ēnē chīnshun dashunquinqin, Mimbī utsibo bēdamenēdācpadomboen mimbī tantiacpaden nēidtsen bēdame, Icho, quequin chuita. Aden Nuquin Papa chuīnun mibi icsaid icnuc, Icsaobi, quequin mimbī naid Nuquin Papa chui. Adembidi dada icsabudaīd chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bēdamepanuna. ¹⁶ Abi icsaid uesquin Nuquin Papa chiash bēdamboec tabadendac. Adquidēn chiac dada icsambocquid Nuquin Papan bēdamendac.

¹⁷ Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasēn tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic. ¹⁸ Adembidi, aidēmbi yuecshun, Ue secame, Papa, cac ue sequenuc tiedēn caniquid canipampic.

¹⁹ Esus tantiaquidēn Nuquin Papan chiācpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaīd chuībanac Nuquin Papabēd yācbimboec icoāindac. ²⁰ Aden mimbī chiac chieshenquo yec tabadsho isun Nuquin Papan uquē nēsīatiapimbo adquid iquendac. Adecbidi abi icsaid bēpiscudoaic Nuquin Papa.

Padi. Mibi tantiaquin aidted dada uaombi.

PETEDON DADA UAID 1

Petedon tauamboen chiaid

¹ Petedo nebi. Abéd icquid icsho Esuquidistun: —Ēbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidēnshun ěnden cuemenēdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nēid dada uaic nebi. ² Ēndenquio Nuquin Papa: —Ēmbi tantiactedi matses ěbēdta Esus tantiamendambi —quepampic. Nēbi ambi tantiacpadomboen aton Mayanēn Esus tantiamequin nuqui bēdamboec tabadte bumec. Adoac: —Icsambo icquid cuidmenquio icnuec abided cuidadaid Esus tantiasho Nuquin Papan ěbi bēdamboen isec. Aidēn chiacpadomboen natiadquio iquebi —quequin Esus tantiec nuqui bēdamboec tabadec. Aden tantiaquin Nuquin Papa chianembi naden. —Ēnenquio icquin aido bēdamboen ista, Papa. Adembidi dacuēdenquio icnuc bēdambo icmeta, Papa —quequin Nuquin Papa mibi chianembi.

Esus tantiaquid Nuquin Papa yacno tabadte chiaid

³ —Nuquin Icho Esuquidistun Papa Nuquin Papa bēdamboshē iquec —canuna naden tantiaquin. Icsaquido cuidte bunenquio icquin utsiacimbocnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unēstiapimbo iquendac. Adembidi nuqui unēsacsho uincuemeshun Nuquin Papan abi yacno nuqui tabadmendac padpidec unēstiapimbo icnuc. ⁴ Ambi chiampicpadomboen bēdamboshē yacno Esusbēdquio ěbi tabadmendac. Unēstequid nibēdec icsabudtequid nibēdec chodquetequid nibēdec quiacnombo Esusbēdquio nuqui tabadmendac —quequin nuqui tantiec. ⁵ Aden Esus tantiaquid icsho isash: —Con Mado Esus tantienquio yanushe —quiash nadatiambo icquin nabanquid yec Nuquin Papa nuqui cudasec. —Esus chote ushēn ěbi yacno tabadmendambi —quec Nuquin Papa nuqui cudasec.

⁶ Ēmbi aden chuisho tantiash mibi cuishonquendac. Esus tantiesabon chieshēnac shubiantiadtsēcquio yec natiaboedi mibi bēdambo yanendac. —Nuquin Papabēd tabadec quenenendabi —quec yuec nuqui shubienquio iquendac. ⁷ Nuqui cudasquid yec ĵatotsi quiash Nuquin Papa: —Padi. Chēn. Esus tantiaquido natiamenda —queboedi adenquio icted-ictedpec? Matsu nacnenquidēn: —Ma tsasinu —quequin ambi nacnenaid tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacnenquidēn: —ĵBēdambo icquidida neque? Isnu —quetanquin matsu tauiec. Adembidi: —ĵEsus tantiaquidquiboda neque? Isnu —quequin: —Natiamenda —cainquio iquec Nuquin Papan. Aden natiamiaqui chieshtoenquio icquid icsho Esuquidistun padpidec choshon: —Mibi bēdambo iquec. Ēbēdi tabadec cho —quequin utsibo tantiamequin chuishun abi yacno buanendac.

⁸ Aden mimbi isacmaidi Esus mimbi tantiaquiec. —Nēbi isadenquio icquidi Nuquin Papan Madombo Esus ěbi bednuec choendac —quec mibi cuishonquianec. ⁹ —Abi tantiasho ic sano nidmenquio icquin Esusēn abi yacno ěbi yuedendac —quec Esus tantiec mibi cuishonquianec.

Esus chote tsusedpabon chiampid

¹⁰ Ēndenquimboshē Nuquin Papan tantiamiac isadaidbo tsusedpabon Nuquin Papan chiaid chuiquidon Esusēn matses cuidmenquio icte dada uapampic. Esusēn nate abitedi tantienquio icquin daēdpactsēc tantiaquin: —ĵMitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon. ¹¹ Aidobēd icquin Esuquidistun Mayanēn tantiamiac Esus chote abentse-abentsen chuipampic. —Matsesēn chieshēnquin cuestas dectanac matses cuidmenquio icnuec abided cuidadec unēsēndac. Adec unēsacsho uincuemiatic padpidec abitedishun Icho icoaindac —quequin Esus chote chuipampic. —ĵTsutsi chopec? ĵTeductsi yash chopec? —quequin abitedi tantiatiadquio icquimbi daēdpactsēc isadaidbo tsusedpabon tantiapampic. ¹² Naden Nuquin Papan tantiamepampic. —Mibi nibēdanan ěmbi chuiboed ěmbi matsesmiacsho utsibon isēndac —quequin tantiamiac Esusēn nate chuipampic. Aden chiampicpadomboen Esusēn naondash. Nuquin Papan Mayanēn tantiacpadomboen aid chuibenquidon aidēn naid mibi chiac caondash. Aden Esusēn naid Nuquin Papan abi yacnoshon uaido mayan bēdabontsen tantiatiadquio icquimbi abitedi tantienquio iquec.

Bëdamboec tabadte tantiamiaid

¹³ Ëmbi chuiboeed Esus tantiaquido icquin paposhquiacimboen Esusuidi tantianuna. Nuqui icsate bunacpadec icsainquo yec bëdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquo icquin. ¹⁴ Ambi: —Con mado nec. Con champi nec —caido icquin Nuquin Papan chiacpadomboen nanuna. Ënden Nuquin Papan chiaid tantiabi mibi bunaid naic mibi icsanëdacpadec icsainda. ¹⁵ Mibi Esus tantiamequid icsaisambo Nuquin Papa neque. Ambi chiaid niaquenquo yec bëdamboec tabadnuna. ¹⁶ Nuquin Papan ambi chiaid naden dada uamepampic. “Nuquin Papa icsaisambo nec,” quiaish icsaisa ictiadquo yec bëdamboec tabad,” quequin Nuquin Papan ambi chiaid dada uamepampicpadec bëdamboec tabadnuna.

¹⁷ Papa quequin nuqui chianeboed Nuquin Papa matsesën naidtedi chuiquid nendac. —Nëid ëbi tantiesa neque. Icsano nidmenu. Nëid ëbi tantiaquid neque. Èbëdi tabadmenu —quequin matses abedte chiendac. —Abëdi tabadmenuquid icnushe —quiaish Nuquin Papabëd icte bunec bëdamboec tabadnuna. ¹⁸ Nuquin tsusedpabon chiaiduidi naquin Nuquin Papa tantienquo nuqui icpondac. Aden Satanasën yuaido icsho Nuquin Papan nuqui bëdamboen istiapimbo icpanëdash. Adshun Satanas nuqui bedshunuen žpiucquidida Nuquin Papan menepanëdash? Padenquo. Adquid icsabudtequid menenquo icquin ¹⁹ aton Mado Esus icsaisambo icsho matsesmenepanëdash. Aden matsesmiacsho chieshëmënuquidën cuesten dectanac Esus aton intac chididiquec abided cuidadec unëspondash. Nëbi aton Mado Esus tantiaquido bëdamboen isquin Nuquin Papan Satanas bedshunec. Aden Nuquin Papan bedshunaid yec bëdamboec tabadnuna. ²⁰ Ëndenquimboshë abitedi uabi Nuquin Papa nadpampic. —Ëmbi tantiacpadënyuecash matsesash matses cuidmenquo icnuec mibided cuidadec unësta, Mado —quepampic. Aden ambi chiampicpadomboen badedquo namenquo ichoedëmbi nëbi nameshun Esus tantiasho mibi bëdamboen isec. ²¹ Abi tantiasho Esusëmbi Nuquin Papatsen nuqui tantiamec. Adoac nuqui naden tantiec. —Esus unësacsho uincuemeshun abëdi tabadmequin abitedishun Icbombo Nuquin Papan icmeoapanëdash. Ambi chiacpadomboen naquidquo Nuquin Papa nec. Èbi unësacsho uincuemeshun abi yacno ëbi tabadmendac —quequin Nuquin Papatsen nuqui tantiec.

Esus tantiaquido tantiananquiate chiaid

²² Nuquin Papan chiacpadomboen naic bëdambo yanshun mibëdtan Esus tantiaquido utsibo mimbi tantiec. Adecbidi muenquo yec tantiananquionona. ²³ Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibëdantiapimbo icquid icnuc ambi chiaid bënudtiapimbo iquec. Aidën chiaid tantiashun mimbi Esus tantiabempanëdac. ²⁴ Ambi chiaid bënudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unësquid matses nec.

Cuëte bacuëec bëdamboshë isadboedi badedquo chodquequid nec. Adecbidi matses: ‘Con nabëdi bëdamboshë iquebi,’ queboedi badedquo unësquid nec.

²⁵ Nuquin Papain nibëdantiapimbo icquid nec. Adnuc ambi chiaid bënudtiapimbo iquec,” quequin abimbo chuiampic. Aidën chiaidquo mibi chiac caondash.

2*Nuquin Papan chiaid iste bunquionona, quiaid*

¹ Aden Nuquin Papan chiaid tantias chieshëmënecc tabadenda. Utsi muauainda. —Esus tantiaquid nebi —quiaishi icsamboec tabadenda. Utsin na isash: —Adquid con na nibëdec —quec chieshëmënecc tabadenda. Utsibo chieshënecc icsamboec onquenda. ² Adenquo yec Nuquin Papan chiaid iste bunquionona. Tishac chuactsëc bacuëmpi shuma chishte bunquiacimboec Nuquin Papan chiaid iste bunquionona. —Bëdiactsëc tantiaboedi aid isban-isbanquin Nuquin Papan chiacpadomboen natiadquo yantsiabi —qeshun Nuquin Papan chiaid isbanuna. ³ —Esus tantiec bëdambo iquebi —qeshun Nuquin Papan chiaid isbanuna.

Buintadbimboecquid Esus nec, quiaid

⁴ Nuqui tantiaid nadquo iquec. Shubu uanun buintadquo nacnitsinuen istuidshun: —Nëid bëdambo iqueque. Nëidquo naimbi —quiacimboen Nuquin Papan: —Ëmbi tantiaidquo yec mibi bëdambo iqueque. Ëmbi chiacpadomboen mibi namenu —capanëdash Esus. Adoaidi matses dadpenshunquo Esus chieshënondash. Padnuen nuqui: —Nuquin Papa yacno puduedmianquid bëdambo iquec —quequin nuqui Esus tantiabempondac. ⁵ Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantiamc, Papa —quequin Nuquin Papa chianequid

nuqui yanec. —Nuquin Papa bēdambohē iqueque. Ambi chiacpadomboenuidi natiadquio iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic. ⁶ Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinembi,’ quiacbimboen Edusaden yacno ēbi bēdamboen ismequidquio isadaidbohēd tabadmendambi.

Aid caic: ‘Nēid tantiasho Nuquin Papan abi yacno nuqui tabadmendac,’ quequin abi tantiaquido unēsacsho ēbi yacno tabadmendambi.”

quequin Nuquin Papan ambi chiaid dada uamepampic. ⁷ Aid tantiec: —Bēdambohē iquec —quependac Esus tantiaquido. Utsibombien Esus chieshēnac. Ēndenquimbo Esus choabi icnuc aidēn nate chuiquin Nuquin Papan dada uamepampic naden.

“Buintad bēdambo icquid istuidashi: ‘Nēidquio shubu uanun nitsinembi,’ quetiadquidi isuidacimboen Nuquin Papan namiaid chieshēnac.

Aden buintad isuidaid utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh.”

quequin Nuquin Papan dada uamepampic. ⁸ Adshumbic Esus chieshētetsen dada uamepampic naden chuiquin.

“Nuquin Papan abipadquidquio Edusaden yacno isadaidbohēd tabadmiacsho ambocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantienquio yec nidec tocoshquetanec uebudacimboec

ēbi bēdamboen ismequid tantienquio yec unēsash icsano nidendac.”

quequin Nuquin Papan ambi chiaid dada uamepampic. Aden Nuquin Papan chiaid tantiatiapimbo icquin Esustsen tantiatiapimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unēsash icsano nidendac.

Nuquin Papan matses nuqui nec, quequin chiaid

⁹ Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaidi nuqui Esus tantiamepondash paposhquiacbimboecnuc. Adoac: —Nuquin Papa bēdambohē iquec. Ambi chiacpadomboenuidi natiadquio iquebi —quec bēdamboec tabadquid nuqui yanec. Adembidi: —Con matses Esus tantiameta, Papa —quequin Nuquin Papa chianequid nuqui nendac. Adecbidi: —Nuquin Papa bēdambo iquec —quequin utsibo chuibanquid nuqui nendac. ¹⁰ Ēnden abi tantiesabo icsho Nuquin Papan mibi bēdamboen istiapimbo icquin: —Con matses mibi nec —mibi catiapimbo icpanēdash. Nēbi Esus tantiasho Nuquin Papan mibi bēdamboen isquin: —Con matses mibi nec —mibi caindac.

Bēdamboec tabadte chiaid

¹¹ Ēmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesa icsate bunacpadec icsainda. —Esus tantienquio yamane —quiash bēdamboec tabadta. ¹² Esus tantiesabobēdi bēdamboec tabadnuna. —Ma aidontsen Esus tantianu —quiash adnuna. Adec mibi bēdamboec tabadsho isun mibi chieshēnquin icsamboen chuishumboedombi Esus tantiabenshun Nuquin Papa naden chiendac. —Mimbi namiaido bēdamboec tabadsho isun Esus tantiabenshun. Mibi bēdambo iquec, Papa —quendac.

¹³ Bēdamboec tabadnuna. —Con Icho Esus matsesēn chieshēnushe —qeshun matses chuiquid dapatedishun chiacpadomboen nanuna. Nuquin nidaidēn tabadquido abitedi chuiquid dapa pedesidente caidēn chiacpadomboen nanuna. ¹⁴ Aidēn: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiacpadomboen nanuna. ¹⁵ Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin icsamboen chuiboedombi ambi icsamboen chiaid ēntsiash.

¹⁶ Satanāsēn yuaido icsho Esusēn bedshunaid yec nēbi icsambo icquidēn yuapenquio yec bēdamboec tabadnuna. Icsanuec: —Utsin yuapenquio yec ēbi bunaiduidi naimbi —quenda. Nuquin Papan yuambo yec bēdamboec tabadnuna. ¹⁷ Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantias bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

Yuabo chiaid

¹⁸ Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bédambo icquid icnuc adota. Min icbo dacuèdampambo icquid ancanquidquio icnubi adembidi nata. ¹⁹ Adec Nuquin Papa tantiaquid yec bédambo icsho cuesaqui chieshēmēnenquio icsho: —Aid yua bédambo iquec —quequin Nuquin Papan mibi bédamboen istiashe. Min icbon chiacpadomboen nata. ²⁰ ¿Icsamboec tabadquid cuesac chieshēmēnenquio icquidta Nuquin Papan: —Aid yua bédambo iquec —capatsiash? Padenquio. Nuquin Papan chiacpadquiec bédamboec tabadquid cuesaqui chieshtoenuio icsho: —Aid yua bédambo iquec —Nuquin Papan catsiashe. Bédambo icta.

Chieshtoenuio yec Esus unēsaid

²¹ —Chieshēnaqui chieshtotiadquio iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenuio icnu —qeshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquio icnuec abided cuidadec mēyadec unēspondash. ²² Nuquin Papan dada uamepampicpadquio “muesambo yec icsaisambo icpondash.” ²³ Adquid icsho abi chieshēnquidon mamēnshunaqui Esusēn chushcainquio icpondash. Aidon matonbudnetanquin buanshun cuesten dectanac: —Mibitsen cuidendambi —cainquio icpondash. Adenquio yec nadpondash. —Nuquin Papan matsesēn naidtedi tantiaquid icquin bédambo icquid abēdi tabadmequin icsambo icquid cuidquin icsano nidmendac —quiash chieshēmēnenquio icpondash. ²⁴ Adash: —Ēbi tantiaquid ma icsaid ucudacimboec bédamboec tabadnu —quiash nuqui icsaid bedshunec abided cuidadec unēspondash. Adec aton Madoded cuidadec unēsacsho isash nēish bédanshun Nuquin Papan aton Mado tantiaquido bédamboen isec. ²⁵ Yuan icbo cuenēnacimboen Nuquin Icbo nuqui tantienquio icpondac. Adoboedi nēbi: —Con Ichon ēbi bédamboen dayun uaquin ēbi bédamboen namendac —qeshun nuqui Esus tantieque. Bédamboen nanuna.

3

Bēnēbēdta chido chiaid

¹⁻² Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bédamboec tabadsho isun Nuquin Papan chiaid tantienquio icboedēmbi con bēnēn Esus tantiabentsiash. “Mimbitsen Esus tantiabenta,” quequin ēmbi chiambobi Esus tantiabentsiash —qeshun min bēnēn chiacpadomboen nata. ³ Bédamboec tabadquid ictiadquio icquin casēdu payuteuidi tantienda. Adembidi dashcute bédambo icquid dasiuidteuidi tantienda. —“Bédambo isadec. Mibi bédambo iquec,” mabi canu —quiash nacnemēdteuidi tantienda. ⁴ —Bédambo mibi iquec —camenuc bédamboec tabadta. Nēishēmēnenquio icquin bédamboen nabanta. Chieshenquio icquin min bēnēn chiacpadomboen naquid icta. Mibi adquio icsho isash: —Mibi bédambo iquec —quendac Nuquin Papa. ⁵ Ēndenquimbo isadaidbo tsusedpan chido Nuquin Papa tantiaquid yec adquio icpampic. Aton bēnēn chiacpadomboen naic bédambo icpampic. ⁶ —Con bēnē con icbobimboec iquec —quequin aton bēnē Abadauan caidēn chiacpadomboen Sada caidēn napampic. Esus tantiaquid icsho mamēnshunaqui min bēnē dacuèdēnenquio icquin aidēn chiacpadomboen naic bédamboec tabadec Sadapadquio mibi ictsiac. Adquid bédambo iquec. ⁷ Tantia. Bēnētsen chuinu. Abia uimabudquid icsho min chido bédamboen ista. Mibēdtan Esus tantiaquid yec Nuquin Papa yacno mibēdi tabadtequid neque. Min chido bédamboen ista. —Ēbi bédamboen ista, Papa —quequin mimbi chiaid Nuquin Papan tantienquio icnushe. Min chido bédamboen ista.

Bédamboec tabad, quequin chiaid

⁸ Nēbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bédamboec isananuna. Cuishonquequidbéd cuishonquec shubiquidbéd shubinuna. Adec tantiananquionona. —Ēmbi naiduidi naimbi —quenuio icquin utsibon chiaidtsen nanuna. ⁹ Mibi chieshēnaqui cuidnanenda. Mibi chieshēnquin icsamboen chuishunaqui cuidnanc icsamboec chuishunanenda. Adenquio icquin Nuquin Papa chianeta. —Ēbi chieshēnquid bédamboen isquin bédamboen tabadme, Papa —quequin Nuquin Papa chianeta. —Ēmbi bédamboen isaidon ma aton matses utsibo bédamboen isnu —qeshun Nuquin Papan nuqui Esus tantiaquido icmiaye. Bédamboec tabadnuna. ¹⁰ Adec bédamboec tabadte chuiquin Nuquin Papan dada uamepampic naden. “Bédamboec tabadte bunquidēn nadoendac.

Adonante bunenquio icquidēmbi utsibo muauainquio iquendac.

Chieshēnquin utsibo icsamboen chienquio iquendac.

¹¹ Icsamboec tabadboedi bédamboec tabadendac. Utsibo chieshēnansho isash: ‘Padi. Chieshēnanenda,’ quendac.

¹² Adec bédamboec tabadsho Nuquin Papan bédamboen isendac.

Aden bédamboen isaidon: ‘Èmbi chuisho tantia. Èbi bédamboen ista, Papa,’ quequin abi chuisho Nuquin Papan tantiendac.

Icsamboec tabadshoen bédamboen istiapimbo iquendac,”
quequin Nuquin Papan dada uamepampic.

Cuesaqui dacuèdenda, quequin chiaid

¹³ ¿Bédamboec tabadshoda bédambo icquidèn badedquo mibi cuespatsiash? Padenquo ictsiash. ¹⁴ Bédamboec tabadsho isun icsambo icquidèn cuesacsho mibi Nuquin Papan bédamboen istsiashe. Mibi chieshènquido dacuèdèndenda. ¹⁵ Dacuèdènenquo icquin: — Con Icho Esuquidistu nec —quequin ambi chiacpadomboen nanuna. Aden mimbi Esus tantianuc utsibo: —¿Atotsieshun Esus tantie? —quesho: —“Abided cuidadec unèsaid Esus tantiasho Nuquin Papan èbi bédamboen isquin unèsacsho abi yacno èbi tabadmendac,” queshun Esus tantiambi —quequin Esus tantiesabo chuibanuna. ¹⁶ Aden nèishèmènenquo icquin Esusèn naid chuibanuna. Aden bédamboen chuinuéc Esus tantiaquiec bédamboec tabadnuna. —Èbi bédamboec tabadsho isash èbi chieshènquin muauaquid: “Bédambo icquidi muuachitombi. Icsachitobi,” ma quenu —quiash bédamboec tabadnuna. ¹⁷ — Èbi tantiaquid utsibon chieshènendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshènendac. Bédamboec tabadquid icsho utsibon chieshènaqui nuqui chieshtoenuico icsho isash: —Mibi bédambo iquec —quetsiash Nuquin Papa nuqui caic. Icsambo icsho quènèn nauedaidi nèishenquo icsho: —Mibi bédambo iquec —cainquo ictsiash Nuquin Papan.

Esus unèsaid tantia, quiaid

¹⁸ Chieshènaqui Esusbimboec chieshtoenuico yec bédamboec tabadnuna. Aid icsaisambo yequi nuqui icsaid bedshunec abided cuidadec unèspondash. Aden Nuquin Papa abi tantiaquido bédamboen ismenuéc abentsecquiobi unèspondash padpidec unèsenuico icnuéc. Aton dada unèsambi aton tantiate unèsabi icpanèdash. ¹⁹ Adec aton dada unèsambi aton tantiate icnuc èndenquimboshè Noe caidèn matses abi tantiesabo icsho Nuquin Papan cuidquin unès uampido uidèn uashun quènèn sauedampicno Esus nidpanèdash. Ambo nidshun Nuquin Papan cuidpampido Esusèn ambi naboed chuibanpanèdash. ²⁰ Naden Nuquin Papan aido cuidquin unès uapampic. Èndenquimboshè aton matsesbèd tabadec Noe bédambo icnubi aton matses icsamboshè icpampic. Adnubien Nuquin Papan: —Matses icsaquido abitedi uesquin unès uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuipampic. Adoac badedquo cano dapa nacnemèdenquo yacpadembi Nuquin Papan badedi cuidenquo icpampic: — Ma abi icsaid ènshun èbi tantianu —queshun. Adnubien cano dapa nacnentanec Noe chedo Stedpactsèc cano dapa antabèdtopampic. Adnubien aido antabèdtoaid cano dapa acten bedtoac nuadtopampic. Utsiboen acte mabudadmiaidèn mentoadbudnepampic. Noe abi tantiaquidquo icsho Nuquin Papan cuidenquo icpampic.

²¹ Adembidi Esus tantiasho nuqui cuidenquo iquec. —“Esus tantiaquid nebi,” quequin utsibo ismequin acten mentomembi —queshun nuqui acten mentomec. ¿Bèchish ucquinda nuqui adodi? Padenquo. Nuquin Papa naden chuiquin: —Esus tantiaquin icsaid ucacbiboen mimbi chiacpadomboen natiadquo iquebi, Papa —quequin nuqui adoc. Aden abi tantiasho Nuquin Papan uincuemenèdaidèn Esuquidistun nuqui cuidmenquo iquec. ²² Aidi uincuenash Nuquin Papa yacno nidash aidbèdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bédabo bédamboen namequimbic Satanas aton yuabo mayan icsabobèda Esusèn cuidendac.

4

Bédamboec tabadnuna, quiaid

¹ Nuquin Papan tantiacpadomboen nasho utsibon chieshènquin mèyanaqui Esus chieshtoenuico icpondash. Adembidi chieshèmènquidèn chieshènaqui adecbidi chieshtoenda. Abided cuidadec unèsaid Esus tantiaquin nuqui icsaid nuqui ènendac. ² Aden nuqui tantiacpadomboen nainquo icquin Nuquin Papan chiacpadomboen natiadquo nuqui iquendac. ³ Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bènè chudmequinc tantiadenuen acte paèmbo icquid acquinc: —Nèid papa canu —quequin matsesbimboecnuc nacnenquinc mimbi capondac. Adec icsateuidi bunec mèmuntiapimbo mibi icpondac. Adquid iccondaidi nèbi bédamboec tabadta. ⁴ Adec bédamboec tabadsho isun mibèd icsaondaidèn: — ¿Atotsieshun nuqui naondacpadomboen nainquo ique? Mimbi Nuquin Papa caid nibèdec

—quequin mibi icsamboen chuiquin mibi mamēnshunendac. ⁵ Aden mibi mamēnshunquid Nuquin Papan cuidendac. Cuidnunci matsesēn naidtedi tantiaquid icquin Nuquin Papan: —¿Mitsipaden nao? ¿Ada bēdamboec tabado? —cac ēnden unēsaidobēdtan unēsabi icquidotedishun ambi naidtedi uesquin chiendac. ⁶ Aden abēdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unēsquid icmiacpadec unēsquid yec unēsashic Nuquin Papabēd tabadendac padpidec unēsenuo yec.

Utsibo nashununa, quiaid

⁷ Tantia. Mibitedi chuinu. Nuquin Papan cuidte nēbi iqueque. Esus tantiec nuqui icsate bunaid ēnash mēmuncē bēdamboec tabadnuna. —Ma ēmbi abi chianesho Nuquin Papan bēdamboec tantianu —quiash adta. ⁸ —Tantiananquido chieshēnancē cuidnante bunenquio iquec —quiash ēnēdenquio yec tantiananquionona. ⁹ Nuquibēdtan Esus tantiaquido isedec chosho bēdamboen isnuna. Shubu utsinquido ēnapuēsh chosho adembidi chieshēnenuo icquin min shubun yued. ¹⁰ Nuquin Papan tantiamiacpadomboen nuquibēdtan Esus tantiaquido nashuntiad. Esus tantiaquidquio icmuenen chieshenquio icquin nanuna. ¹¹ ¿Ada Nuquin Papan Esusēn naid chuibanquid mibi icmiac? Adquid icquin Nuquin Papan chiaidquio chuibanquiota. ¿Ada Nuquin Papan mibēdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunēmbi —quequin Esus tantiaquido nashunta. —“Ēbi nashunquid bēdamboen namequid Nuquin Papa bēdambohē iquec,” ma ēmbi nashunaido quenu —qeshun utsibo nashununa. —Abitedishun icombo yec Nuquin Papa bēdambohē iquec —canuna ēnenquio icquin.

Chieshēnaqui chieshtoenuo icte chiaid

¹² Ēmbi tantiaido mibi neque. Tantia. —¿Atotsieshun matsesēn ēbi chieshēmpēba? —¿quecta ique? ¿Mibentsēquida chieshēndic? Ma Esus tantiaquido dadpenquio chieshēmpayoc. ¹³ —Chieshēnquin Esuquidistu comapenen mēyanacimboen Esus tantiesabon ēbitsen mēyanosh. Esus tantiaquid icshoēni adochitosh —quiash Esus tantiec bēdambo icnuna. —Ūtsibon chieshēnaidi abi tantiaquid ambi namiacno buanuec Nuquin Icho Esus choec —quiash abi chote ushēn cuishonquenush adnuna. ¹⁴ —Esuquidistu tantiaquid nec —qeshun chieshēmēnquidon natiamiaid mibi bēdambo iquendac. Nuquin Papan Mayan mibēd tabadquin Nuquin Papa yacno tabadte mibi tantiaquid mibi bēdambo icmendac. ¹⁵ Utsibo icsasho abi chuiquidēn natiaquid cuidquid. Cuesunianquid yec ampequid yec chieshēmēnquin icsamboen chuishunquid yec quec icsasho chuiquidēn cuidsho isun: —Bēdambo iquec —catsiambi. Adec icsainda. ¹⁶ Esus tantiaquid icsho utsibon chieshēnac dacuēdenda. Adec dacuēdenquio icquin: —Nuquin Papa bēdambohē iquec. Aton Mado Esus tantiaquid icmiac bēdambo iquebi —quequin ēnenquio icquin Esus tantianuna. ¹⁷ —Nuquin Papan cuidte ushē nēbi icnuc ambi con matses caido Esus tantiaquido chieshēmēnquidon natiamendac —quiacpaden nēbi tauaquin mibi natiamec. Adsho isun: —Chieshēmēnquidēn chieshēnac ēmbi tantiacpadomboen abi icsaid ēntsiash —qeshun Nuquin Papan: —Natiamenta —cainquio iquec. Aden abi tantiaquido icsaid ēmete bunquin nashun ¿bēdiactśēcta abi tantiesabo cuidpec? ¹⁸ Naden chuiquin Nuquin Papan dada uamepampic. “Aden chieshēndeniāc natiambo yan-yanequi unēsash Nuquin Papabēd abi tantiaquido tabadendac. Nuqui adnuc ¿bēdiactśēcta ambi chiaid niac-niacquido Nuquin Papan cuidpec? Padenquio. Comapenen cuidendac,” quequin dada uamepampic. ¹⁹ Nuquin Papan tantiacpadec mēyadec Esus tantiaquid ma nadpanuna. —Ēbi uaquidēn Nuquin Papan ambi chiapadomboen ēbi bēdamboen namec. Aid tantiec bēdambo iquebi —quiash ma bēdamboec tabadpanuna.

5

Esus tantiaquido chuibanquid Petedon chiaid

¹ Tantia. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nēbi. Paēmbohē icmequin Esuquidistu unēs uasho isondambi. Aidēn padpidec nidaidēn choshon abi yacno buanuen nuqui beduaneque. Tantia. ² Icho yua cudasachimboec mibēd icquido Esus tantiaquido cudasta. —Esus tantienquio yanushē —qeshun: —Nuquin Papan chiaid niaquenquio yec bēdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquio icquimbi naimbi —quenquio icquin: —Aden Esus tantiaquido nashumbantsiambi —quec Esus tantiaquido chuibanquidquio icta. —Piucquid dadpen bednun nanu —quenquio icquin Nuquin Papan chiapadomboen natiadquio yec Esus tantiaquido chuibanquid icta. ³ —Nēidtedi Esus tantiaquido bēdamboen name —caidtedi bēdamboen isequi chushcanenda. Adenquio yec: —Ēbi yacpadec ma tabadnu —quec bēdamboec tabad. ⁴ Aden Esus tantiaquido

chuiبانquidën bēdamboen namesho isun Nuquin Icbon nidaidën padpidec choshon utsibo ismequin: —Nēid bēdambo icquid nec —qeshun chuiبانquid ambi namiaidobēda abi yacno buanendac.

Esus tantiaquidon nate utsi chiaid

⁵ Tanta, caniabo. Mibitsen chuinu. Mibi chuiquid dapabon chiaid niaquenquo icquin aidën chiacpadomboen nata. Aidtedtsēqui caniabo chuishumbic mibi yacnocquidotedi chuinu. —Ēbiuidtsēqui bēdambo iquebi. Ēmbimbo naiduidi naimbi —quenquo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquo icquin aton matses utsibo tantienquo icquin ambi naiduidtsēqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bēdamboen isquin bēdambo icmec,”

quequin Nuquin Papan ambi chiaid dada uamepampic. ⁶ Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshēnaqui chieshtoenquo icnuna. Adec chieshtoenquo icsho ambi tantiacpadën utsibo ismequin: —Ēbi tantiaquidquo mibi neque. Ēbēdi tabadec cho —nuqui caindac Nuquin Papan. ⁷ Aidën nuqui tantieque. —¿Atotsimbi pepeba? ¿Ēbida cuespeba? ¿Con matsesta unēspeba? —quequin nuqui dacuēdaidtedi Nuquin Papa chuinuna.

⁸ Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasën nuqui chieshēnquie. Esus bedshunuen nuqui icsametiadquo icquin bēdin nēish nibēnacimboen ambi icsametequid Satanasën ēnenquo icquin nibēmbeneque.

⁹ Ista. Icsamenda. Chieshtomenda. —Satanasën icsamechitoshe —qeshun Nuquin Papan chiaid niac-niaquenquo icquin Esus tantiaquionona. —Ēbi chieshēnacpadomboen Esus tantiaquid utsibo nidaid utsi-utsiec yacno tabadquido utsibon chieshēnac caosh —qeshun chieshtoenquo icquin Esus tantianuna. ¹⁰ Aden utsibon chieshēnaido yec yuec-yuecpectsēc nuqui tabadec. Adshobien abi yacno buanquin nuqui bēdambo icmequidën Nuquin Papan Satanas nuqui icsa uamenquo iquendac. Adembidi Nuquin Papan nuqui bēdamboen isquid icquin dayacquio yacimboecnuc chieshtoenquo icquid nuqui icmendac. ¹¹ Ēmbi aden chuisho tantiasun: —Mibi bēdamboshē iquec, Papa. Mimbi tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ēnenquo icquin.

Petedon ēnquimbi chiaid.

¹² Esus tantiaquidquo Sidas caid nēidtedtsēqui ėmbi dada uaboed mibi yacno buamembi. —Esusquo isondambi. Aid tantiasho Nuquin Papan matses bēdamboen isbenendac —quequin abimbo mibi chiombique. Chieshtoenquo icquin Esus tantianuna. ¹³ Nuquin Papan tantiamiac nuquibēdtan Esus tantiaquido ėmbi Babidonia caid yacnocquidon: —Aido unēsquo iquec —mibi caosh. Babidonia caidbidi Doma caic. Con madobimboecquid Madcosën —Aido unēsquo iquec —mibi caosh. ¹⁴ —Ēbēdtan Esus tantiaquido nec —quiash: —Mibi unēsquo iquec —cananuna. —Ma Nuquin Papan mibi Esus tantiaquidotedi bēdambo icmepanu —quequin Nuquin Papa chianembi. Padi. Aidtedi chuiquin dada uaombi.

PETEDON DADA UAID 2

Tauamboen chiaid

¹ Petedo Simon caid nebi. Abèd icquid yec aton yuambo icsho Esuquidistun: —Èmbi naid chuibeneta —caidquio nebi. Èbèdtan Esus tantiaquido mibi neque. Mimi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bédamboen isaido nuqui nec. ² Èbèdtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsécsho mibèdta Esus tantiamequin bédambo icme, Papa. Aido bédamboen isquiota, Papa —quequin Nuquin Papa chianembi.

Nuquin Papan bédambo icmete chiaid

³ Comapenen tantiaquid icquin Nuquin Papan namiac aidèn chiaid niac-niacte bunenquio yec Esus tantiaquido bédamboec tabadec unèsash Nuquin Papa yacno tabadendac. Abipadquid utsi nibèdnuc bédamboshè icquid icquin Nuquin Papan Esus tantiamiaido nuqui nec. ⁴ Abipadquidquio Esusèn chiondacadomboen abi tantiaquidobèdta Nuquin Papan aton Mayan tabadmequin bédambo icmec. Aden abipadquio icnuc bédambo icmiac icsate bunenquio yanec nuqui bédamboec tabadec. Utsibo icsateuidi bunec icsaquionobi nuqui bédamboec tabadendac.

⁵ Aden Nuquin Papan Esus tantiamiaido yec dayacquio yacnimboec ènèdenquio yec bédamboec tabadnuna. Adecbidi Nuquin Papan chiaidquio tantiec tabadnuna. ⁶ Aden Nuquin Papan chiaidquio tantiec nuqui icsate bunacpadec icsainquio icquin mèmununa. Aden mèmunquid yec nuqui chieshènquidbèdi chieshènanenquio yec chieshtoenquio icquin Esus tantianuna. Nuquin Papatsen tantiec bédamboec tabadnuna. ⁷ Aden Nuquin Papabèdta Esus tantiaquido yec nashunanquionona. Adece nashunanquioquin Esus tantiesabo tantianuna. ⁸ Èmbi chuiboedtedi nabanquin chieshtoenquio icquin adenuidi nanuna. Aden naquin Esus bèdiactséc tantiatsécboedèmbi chieshtoenquio icquin nuqui Esus tantiaquotsiac. ⁹ Èmbi chuibocpadomboen naisa pamumèdacnimboec iquec. Adquidon: —Aton Mado Esus tantiasho icsaid ucudacnimboecnu Nuquin Papan nuqui bédamboen isec —queboedombi bèpiscudquin tantienquio yanec.

¹⁰ Èbèdtan Esus tantiaquido mibi neque. Tanta. Mibitedi chuinu. Èmbi aden chuisho tantias chieshtoenquio icquin Esus tantiec bédamboec tabadnuna. Adece tabadquin naden nuqui tantierendac. —Èndenquimboshè èbi tishabi icnuc èbi caic: “Esus tantiamendambi,” quequin ambi chiampicpadomboen Nuquin Papan nèbi tantiamiac Esus tantiabonombi —quequin nuqui tantierendac. Aden tantiec Esus tantienquio icquid nuqui yanenquio ictsiac. ¹¹ Adece bédamboec tabadash unèsacsho: —Èbi tantiaquid mibi neque. Èbèdi tabadec cho —qeshun ambi namiacno abèdi tabadmequin Nuquin Icho Esuquidistun nuqui bédambo icmendac padpidec unèsenquio icnuc. ¹² Èmbi aden chuiboedtedi mimi tantiondac. Aden tantiabosh Esus tantiec mibi bédamboec tabadcuendaci. Aden mimi tantiondaidi mibi chuided-chuidedendambi. ¹³ —Nèbi unèsendabi —queboedi èbi unèsabi yapadambi mibi chuided-chuidedendambi. ¹⁴ —Adènquio mibi unèsendac —quequin Nuquin Icho Esuquidistun chiacpadèn nèbi unèsebi. ¹⁵ —Èbi unèsan èmbi chiondaid ma bèpiscudenquio icnu —qeshun mibi chuiquin dada uanu.

Nuquin Papan Esus chiaid

¹⁶ ¿Muaquindambi mibi Esus chuidionda? Padenquio. —Nadatiambo icquin nabanquin Esusèn ismedenepondash. Adquid yec abuc nidnush: “Padpidec nidaidèn choaindabi,” quepondash Esus —¿quectabi muadionda? Padenquio. Èmbimbo isondaidquio mambi mibi chiondac. —Nèid con Madombo nec —quequin Nuquin Papan ismiac Esus isondambi. ¹⁷⁻¹⁸ Nadquio iccondash. Macuèsh dapan dectatoash Esus bèchamauanquec iccondash. Adnubien Nuquin Papan: —Con Madombo nec. Èmbi tantiaquido yec bédamboshè iquec. Nèid isec bédambo iquebi —quequin abucshun dacuèdampamboecnu chuipondash.

¹⁹ ¿Èmbentsèquidambi Esus chuibanquin nape? Padenquio. Èndenquimboshè Esus chote tantiamequin Nuquin Papan isadaidbo tsusedpabo dada uamepampic. Pacuènèdacnimboen utsibon tantienquio icnubi paposhquiacnimboecnu Esus chote tantiamenuen dada uamepampic. Aden Nuquin Papan chiaid isec onquequin bédamboen tantianuna: —Muaquidon chuisho tantiamane —qeshun. —Abitedishun Icbombo nebi —quequin ismenuc padpidec Esus choabi yapadambi Nuquin Papan chiaid bédamboen tantianuna. ²⁰ —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquio. ²¹ Ambembi chiaid dada uainquio

icquin Nuquin Papan chiaidquio dada uapampic. Nuquin Papan Mayanën tantiamiac abimbo chuipampic.

2

Muaquido iquendac, quequin chiaid

¹ Nuquin Papan chiaidquio isadaidbo tsusedpabon chuinubien utsibo: —Nuquin Papan nadoendac —quec muapampic. Nēbi adquidbidi iquendac. Mibi yacno puduedash ambembi chiaid chiec muasho tantiaashun: —Mibi muequi nec —badedquio cainquio mimbi iquendac. —Abided cuidadec unēsaid Esus tantiaquid nebi —queboedi: —Esusēn chiacpadamboen natiapimbo iquebi. Adshobi Nuquin Papan ēbi cuidenquio ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac. ² Aden muaquidēn chuisho tantiaashun Esus tantiauidtsēchoedombi dadpen-shun aidēn chiaid tantiendac. Adashic Nuquin Papan chiaid niac-niaquec muaquido tabadacimboc padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon. ³ Muaquido tantienda. Aidon piucquid comapenec bunquin ambembi chiaidquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiaashun aido cuidendac. —Adquid icsano nidmequin cuidendambi —quequin ambi ēndenquimboshē tantiapampicpadamboen comapenen Nuquin Papan cuidendac.

⁴ Ambi chiaid niac-niacsho icsano nidmequin cuidquid Nuquin Papa nendac. Ēndenquimboshē nidaid uabi icnuc ambi abi yacnoshon uaido mayan utsin-utsinquien: —Ēmbiquen abitedi namenu —quequin ambi chiaid niac-niacsho isun Nuquin Papan icsamboshē yacno nidmequin cuidpampic. —Chian anēdēnquiacno nēsecanumbi nabono —qeshun aden tauamboen Satanas chedo cuidpampic. ⁵ Adshumbic yuecquio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unēs uapampic. Noeuidtsēqui padambo icpampic. —Bēdamboec tabadnuna —quequin Nuquin Papan chiaid chuibanquid icsho Noe chedo Stedpactsēc Nuquin Papan cuidenquio icpampic. ⁶ Adshumbic yuecquio ictanquin matses utsibon Nuquin Papan chiaid niac-niacsho cuidquin nēdēncapampic. Shubu dadpen icquid nēid daēd icpampic. Nēidic Sodoma caid. Nēidic Comoda caid. Ambo tabadquido aton shububēdi abucūesh taboadampamboec paēdquidēn pichiquepampic matses nibēdquio yec. —Aden icsambo icquido cuidquid nebi —quequin Nuquin Papan adopampic. ⁷⁻⁸ Sodoma caid yacnocquid abentsēqui Dod caid pichiquenquio icnuc Nuquin Papan cuemepampic. Bēdambo icquid yec: —Nuquin Papan chiaid niac-niaquec nēmo icquido icsamboecuidi tabadec —quec shubiec tsadsho cuemetsaidi pichiquiambo ictsampic. ⁹ Aden abi tantiaquido daēd Noebēdta Dod Nuquin Papan cuidambo icpampic. Adembidi nēbi abi tantiaquido cuidenquio icquid Nuquin Papa nendac. Utsibon chieshēnaidi abi tantiaquido bēdambo icmequid nendac. Icsambo icquido cuidquid icquimbi matses cuidte ushē choabi icnuc nēbi tauaquin icsambo icquido Nuquin Papan cuidendac.

¹⁰ Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shēcuē nibēdacimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsēqui bunebi —qeshun ambi nauidtsēqui naic. Dacuēdtiadquidi dacuēdenquio icquin Esus tantiaquido chuiquid dapa caic: —¿Bēdamboen namequidta nedic? —quequin icsamboen chuishunec. ¹¹ Padnuen Nuquin Papan abi yacnoshon uaido mayan bēdabon adec muaquido chuishuntiapimbo iquec. Muaquido bēdiactsēc tantiaquido icnubi comapenen tantiaquido icquin mayan bēdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsēqui tantiaquid Nuquin Papa nec —qeshun adoenuo iquec. ¹² Padnuen ēmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bēdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

¹³ Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquiec inchēshēn icsash badiadēnsen icsaic: —Bēdambo iquebi —quec adquido cuishonquec. Esus tantiaquin penuec mibi cho-choacno mibēd tabadec muaquidotsen chopac caosh. —Esus tantiaquidbidi nebi —quiaish mibēd tabadec aid icsasho isash: —Esus tantiaquid abitedi icsaic —quependac utsibo. ¹⁴ Muaquido utsin chido mēismec tabadec. Nuquin Papan chiaid niac-niaquec icsaic ēndenquio iquec. Adquid icquin Esus tantiaatsēcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. ¹⁵ Nuquin Papan chiaid niac-niaquec icsateuidi

bunquieq. Ĕndenquimboshē matses utsi Beyod caidēn mado Badan caid Nuquin Papan chiaid chiuquid yequi piucquid dadpen bunec Nuquin Papan chiaid niactiadquio icpampic. ¹⁶ Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Auchbidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

¹⁷ —Mibi bēdambo icmete chuinu —quequin muaquidon chuisho tantias: —Ai, mimi chiacpadte bunebi —queuidtsiash matses. Uispa dadpen icboedi badiadnuc abu chēshēn bētinaesho isash: —Tanunquien badiadec —queuidacimboc: —Ambi chiacpadquio bēdambo icnu —queuidtsiash matses. Adec muasho tantias: —Adquid chian anēdēnquiacno nēsecaindambi —quendac Nuquin Papa. ¹⁸ Adec muaquido abembi onqueuidequi onquec. Utsin chiaid tantienquio icquin ambi tantiaiduidi chiec naden. —Mibi bunacpadec mibitsen icsata —cac Esus tantiatšēcquin Nuquin Papan chiaid nauidsēcquimi abi icsaid ēnuidboedi padpidemboec icsaquieq. ¹⁹ Muaquidon: —Nuqui bunaiduidi nanuna. Adec nuqui bēdambo ictsiac —quequin chuibanec. Adboedi abi icsaid ambembi ēntiapimbo yec icsamboshē iquec. Adec icsamianquidēn chiacpadomboen naic matses icsaquad nendac. Adecbidi ambi naiduidi naic icsaquad matses nendac. ²⁰ Nuqui cuidmenquio icquid Esuquidistu tantiatšēcquin abi icsaid ēnuidboedi padpiden Nuquin Papan chiaid niac-niaquec icsamboshē muaquido yanec. ²¹ Ĕnden Esus chiondac: —Ai, aid tantiembi —quetsēccondaidi aden Esus tantienquio yanec icsamboshē yansho isun: —“Esus tantiembi,” quenquio icpatecnēdan —caimbi. ²² Adquid chuipanēdash naden. —Ambi ucbauid opan chequid. Opa nesmiaqui nidaidēn nocoshquec padpidec bēchishoaquid —quepanēdash. Adecbidi Esus tantiauidtsēcquido icsaid ēnuidboedi muaquid padpidemboec icsadenechitequien iquec.

3

—Esus chote chiaid

¹ Tantia. Ĕmbi tantiaido mibi neque. —Pabiate cuembo icquin Nuquin Papan chiaid tantiaquieq bēdamboec tabad —quequin mibi chiuquin dada uaondambi. Adomboembidi mibi chiuquin nēid dada uanu. ² Esus chote chiuquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidēn Nuquin Icho Esusēn chuibanondash. Aidēn chiondaid abēd ictened utsin mibi chuiniēdash. Aden chiaid tantiaata. Aidbidi chuinu. ³ Esus nidaidēn padpidec choabi icnuc Esus tantiesabon abi icsate bunaiduidi nauin Esus mamēnshunendac. ⁴ —“Utsi uanuec padpidec nidaidēn choaindabi,” ¿quenēdaida chopec? Ma choenquio icpayoc. “Nēbi Esus choec,” quenedi con mēdimbo abitedi unēsbudniac. Esus choambobi —quependac Esus tantiesabo. Nadembidi chiendac. —Taēec nidaid yanubi matses nidaidēn tabadpampic. Adecbidi aton tsyuecquido tabadpampic. Nēbi adecbidi matses nidaidēn tabadec. Ĕbi nibēdnuc adiquendac. Utsi uanuec Esus choenquio iquec —quependac Esus tantiesabo. ⁵ ¿Abimboda capec? Aden chiuquin Nuquin Papan chiaid tantienquio iquec. Ĕndenquimboshē ambi uaidtedi nibēdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nēnantan yampampic. Aden Nuquin Papan abitedi uapampic. ⁶ Aden abitedi uambic yuecquio ictianash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unēs uapampic. ⁷ Aden ambi chiacpadomboen Nuquin Papan naindac. Ambi icsambo icquido cuidte ushēn abu nidaidbēda nēdēncaindac. Adembidi matses Esus tantiesabo cuidendac.

⁸ Ĕmbi aden chia: —¿Tedectsiash Esus chopeba? —¿quecta ique? Tantia. Mibi chuinu. Ambi tantiacpadēmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsēcbimboecquid nec. Adecbidi seta abentsēqui icquidquio iquequi dadpen seta icquidbimboecquid nec —quequin Nuquin Papan tantiec. ⁹ —Ĕndenquio: “Padpidec choendabi,” quenēdaidi Nuquin Icho Esus choenquien icchitec —quenubien Nuquin Papan: —Chiata. Cuidte bunenquio iquebique. Utsibontsen Esus tantiashun Ĕmbi chiaid niac-niacboedi ēnushe. Isbono. Ĕnacsho icsamboshē yacno nidmenquio ictsiambi —queshun Nuquin Papan Esus chomiabi iquec.

¹⁰ Adnubien matses: —Nēbi choec —quenquio icnuc Esus badedquio choendac. —¿Nēid ushēmbi ampequidēn con na ampec —quequinda tantiapec? Padenquio. Adembidi: —Nēbi choec —quequin tantienquio icnubi Esus choendac. Choshon acquimboen toncac abitedi nibēdanendac. Uispa yec inchēshēn ushē yec badiadēn ushē yec queboedi nibēdquecnc nēdēncaindac. Nidaid abichobimbo nēdēnquenec aidēn icquidtedi nēdēnquendac nibēdquio yec. ¹¹ —Nuquin Icbon nac adquidtedi nēdēnquendac —quiash Esus tantiec bēdamboequien

tabadtiad. ¹²⁻¹³ Esus chobon Nuquin Papan cuidquin ambi uaidtedi nēdēncaindac. Abu yec uispa yec inchēshēn ushē yec badiadēn ushē yec queboedi nēdēncaindac nibēdqiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidēn bēdambo icquidoudiquio nuqui tabadmendac. Ēmbi aden chuisho tantiash: —Ma Nuquin Papan Esus chomenu —quequin utsibo tantiamequin Esusēn naid chuibanec bēdamboec tabadnuna.

¹⁴ Ēmbi tantiaido mibi neque. Tantia. —Choshon abi yacno Esusēn nuqui tabadmendac —quec chieshtoenquo yec bēdamboec tabadnuna. Choshon Esusēn: —Mibi icsambo iquec —cainquo icnuc Nuquin Papan chiaid niaquenquo yec bēdamboec tabadnuna. ¹⁵ Adec tabadquimbi Ēmbi chuiboed tantiashun naden tantia. —“Utsitsen ma Esus tantiaquid yanu. Aden Esus tantiasho aid cuidenquo ictsiambi,” qeshun Nuquin Papan Nuquin Icbo chomiabi iquec —quequin tantiec tabadta. Adembidi mibi chuiquin nuquin buchibimboecquidēn Pabadon dada uapaccondash. Nuquin Papan tantiamiac bēdamboen chiaccondash. ¹⁶ Ēmbi chuiboedbidi chuiquin dada uadenepaccondash. —Pabadon dada uaid abentse-abentsec badedquo tantiadenuquo iquec —qeshun utsibon aidēn chiacpadomboen chienquien icchitosh. Nuquin Papan chiaid niac-niactiadquio icquidon Pabadon chiaidquio tantienquo icquin icsamboen chiosh cashnad-cashnadachbitsēcquiecnuc. Nuquin Papan chiaidquio nuquin tsusedpabon dada uapampidtsen isbanshun adembidi tantienquo icquin icsamboen chiec. Adquido Nuquin Papan cuidendac.

¹⁷ Ēmbi tantiaido mibi neque. Tantia. Chuinu. —Abimbo tantienquo icquin Nuquin Papan chiaid niac-niacquidon muauaic —ēbi qesho tantiashun: —Esus tantienquo yamane. Muasho tantiatipimbo iquebi —quequin ēnenquo icquin Esus tantianuna. ¹⁸ —Abi tantiaquid cuidmenquo icnuec abided cuidadec Esus unēspondash. Aid tantiasho Nuquin Papan nuqui bēdamboen isec —quequin Esus bēdiactsēc tantiatsēcshun comapenen Esus tantiaquionona. Adshumbic: —Nuquin Icbo Esuquidistu bēdamboshē iquec —canuna ēnenquo icquin. Pađi. Aidtedi chuiquin dada uaombi.

UANËN DADA UAIDËMPI 1

Nuquin Papabéd ënëdenquoio yec tabadte chianiaidquoio

¹ Abia Yampidënenquoio matsesun Esuquidistun chuibansho ëbéd icquidobédtan tantiapadenembi. Aidi ëbéd icquidobédtan ispadenembi. Aidi ëbéd icquidobédtan mishpadenembi. Aidi Nuquin Papabéd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bédamboen ista. ² Aid, abuc Nuquin Papabéd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabéd ënëdenquoio yec tabadte ismequin chianiaidquoio ëbéd icquidobédtan isteneshun chuibanec nebi. ³ Aidi ëbéd icquidobédtan ispadened adembidi ëbéd icquidobédtan tantiapadenec chuibanec nebi ma mibitedishun tantiaquid shubu abentsëquën tabadac bimboec ma tabadpanu queshun. Nuquin Papa tantiaquid icquin aton Madombo Esuquidistu tantiec Nuquin Icbobéd shubu abentsëquën tabadac padec nuqui bédamboec tabadendac. ⁴ Esuquidistu tantiaquidtedi shubu abentsëquën tabadac bimboecquido nec, quequin chuiquin dada uaimbi ma aid tantiaquid, Cuishon. Bédambo iqebei, quiacpadec ma mibitedi tabadpanueshun.

Nuquin Papa Bédambocquid Abentsëcquiobi nec quiaid

⁵ Esuquidistun Nuquin Papa chuibansho nuqui tantiondacadomboen chuoaimbique. Tantiata. Nuquin Papa Bédambocquid Abentsëcquiobi nec. Icsapenquiocquid aidi nec. ⁶ Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. ⁷ Nuquin Papan chiacpadomboen nabanquidquoio iquec abi tantiaquid utsibobéd shubu abentsëquën tabadac bimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnëdaidënenquoio nuqui icsaidtedi paucbantequid nendac.

⁸ Icsaisa nebi, quequi mua uadquin abipenquoio chuiquid nendac. ⁹ Icsaobique. Ëbi pauc, Papa, qesho tantiaquid, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. ¹⁰ "Matses icsaisa nibëdquiec", quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiac bimboec adquid onquepec. Aden chuiquid Nuquin Papan pausuntemaid nendac. Adquid Esuquidistu tantiesha nec.

2

¹ Ma icsainquoio icnu queshun con nabo quequin adembi mimbi iste dada uaimbique. Isec onqueta. Icsaobi, quiaquid chuenenda. Abi tantiaquid icsasho isun Esuquidistun Nuquin Papa chiendac. Ëbi tantiaquid paucoata, quequin Nuquin Papan chiaid niaquesa icquin aton Madonquoio Esuquidistun nuqui icsasho aden chiendac. ² Aidi matsestedi icsaid bedshunash abided cuidadec unëspondash.

³ Ambi chiacpadomboen nabanquin Esuquidistu tantiaquid nebi, qeshun nuqui tantiendac. ⁴ Esuquidistu tantiaquid nebi, qeshun Icbon chiacpadomboen nainquiocquin abipenquoio chiendac adquidë. ⁵ Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbéd icquid nebi, quequin nuqui tantiendac. ⁶ Aden pausunac Nuquin Papan Madonquoio bédamboec tabadquin nabanacpadomboen naimbi, quec nidaidën bédamboec tabad.

⁷ Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. ⁸ Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquid nabanquin Esuquidistun ismiondash. Adembidi Esuquidistupadquiocquin utsin ismiac mibi Esuquidistu tantiesha icboedi nëbi abipadquiocquin utsi tantiaquid nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmënenquid icboedi aidën pausunac tantianquidquoio yanec.

⁹ Esuquidistu tantiaquid nebi, qeshun abi tantiaquid utsi chieshënec Nuquin Papan tantiacpadomboen pausunacmaid adquid nec. ¹⁰ Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquoio yec bédamboec tabadquin ismequid nendac. ¹¹ Esuquidistu tantiaquid utsi chieshënquid Nuquin Icbon pausunacmaid nec. Inchëshquoio icnuc capuac bimboecquid adquid nec. Mayan icsan yua icquin ambi natiadquoio yaid tantiesha nec.

12-14 Esuquidistu tantiaquid icsho Nuquin Papan cuidenquocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ĕmbi con nabo caidtedi chuiquin dada uaid nĕid nec. Abia Yampidĕnquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ĕmbi dada uaid nĕid nec. Ĕmbi tsusiobo caid ambia tantiaquidĕn ismiac caniabobimboecquin comapenen tantiaquin tantesa uainquocquido utsi-utsiec iquec. Aden comapenen tantiec mayan icsan yua icboedi nĕbi Nuquin Papan chiaid tantiabentsĕcquido yanash nĕbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ĕmbi caniabo caidtedi ĕmbi chuiquin dada uaid nĕid nec. Ĕmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

15 Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. 16 Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshĕnquid nec. Adquid icquin Nuquin Papan chiaid mua uaquin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ĕmbitsen nanu quequin adoata. Dadpen bednu quequin utsi dĕniacnueshun adota. Adec icsamane quenquiocnoc mayan icsan Nuquin Papan chiaid mates chieshĕmec. 17 Mayan icsan tantiaid ĕnĕdendac. Aidĕn tantiacpadomboen tantiaquid icbobĕd Nuquin Papa yacno tabadtiapimbo iquec. Nuquin Papan chiacpadomboen naquidien ĕnĕdenquio yec Icbobĕd tabadendac.

Esuquidistu chieshĕnquid dadpen choendac, quequin chiaid

18 Adembi chiembique. Ĕmbi con nabo caidon tantiaata. Nĕbi nĕid nidaid naimbudec. Adecbidi Esuquidistu chieshĕnquid dadpen choendac, quequin chiondacadpadquiec ĕnden cho-choac. Dadpen cho-choacsho isun, Nĕbi nĕid nidaid naimbudendac, quequin nuqui tantiendac. 19 Esuquidistu chieshĕnquid nuquibĕd iccuededboedi ĕnden nidanepac. Nuquin Papan shubu abentsĕquĕn tabadacpadpenquiocquid Esuquidistu chieshĕnquid iquec nidaniac. Nidaniacsho isun, Esuquidistu tantiesa iquec nuquibĕd shubu abentsĕquĕn tabadacpadpenquio icquido niosh, quequin nuqui tantiendac.

20 Esuquidistu chieshĕnesa mibi nendac. Nuquin Papan aton Mayan meniac abimbo chiaid tantiaquid mibi nendac. 21 Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac. 22 ¿Tsutsi muaquid nepec? ¿quepecta mibi ique? Nuquin Papan Madombo nidaidĕnshun chidon tishac masesash aton Papan chuimaidquio nec, quesa muaquid nendac. Adquid Esuquidistu chieshĕnquid nendac. Abentsĕcquidquiobi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. 23 Nuquin Papan Madombo Esuquidistu nec, quesu Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

24 Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubĕd shubu abentsĕquĕn tabadacimbocquido mibi iquendac. 25 Ĕbĕd shubu abentsĕquĕn nidaidĕn tabadacimbocquido ĕbĕd abuc ĕnĕdenquio yec tabadte iquendac, quequin Esuquidistun chiaid nendac.

26 Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. 27 Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiaish bĕdambo iquebĭ, mibi quendac. Aden Esuquidistun tantiamiaidquio yec abĕd cuĕshĕdesa icnuec adequi tabadta.

Nuquin Papan chiaid tantiaquid ambi bacuĕ icmiaid

28 Adembidi con nabo quequin mibi chuioaimbique. Adembi tantia. Esuquidistun chiaid tantiadonequiec tabadteneta. Adec tabadquin Esuquidistu choasho isash cuenenquio yec, Ĕbi, ambi paucaid, bednuec choec, quependac mibi. Abĕdi nidebi, quequin caindonec tabadta. 29 Nuquin Papa bĕdamocquid nec, quequin tantiaquin nuqui Nuquin Papan chiacpadomboen aquin, Ambi con bacuĕ caidquio nebi, quequin nuqui tantiendac.

3

¹ Matses tantiaquin naquidquo Nuquin Papa nec. Ma ëmbi unësquioquin comapenen tantiaido ëbëdi tabadpanueshun con bacuëbo caimbi, quequin Nuquin Papan icsaisanquo tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquo Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. ² Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquo mibi icmendambi, ¿ada Nuquin Papa capec? Padenquo. Esuquidistupadquioquin nabanquid Nuquin Papan nuqui icmec, quequin nuqui tantiadonetequidquo nendac. Esuquidistu nuqui bedec chosho isash, Nëbi aidpadquidquo Nuquin Papan nuqui icmendac, quequin tantiembi, nuqui quendac. ³ Aid choabicnuc, Abipadquid iquendabi, quequin caindonequido nëbi Esuquidistu icsainquo yec tabadacpadquieq tabadte bunquid nuqui nendac.

⁴ Nuquin Papan nadec bëdamboec tabadta, quequin chiaid niacquid abibi icsaquid nendac. ⁵ Adnubien, Esuquidistu abuc tabadboedi nidaidëshun chidon tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquioquid Esuquidistu nec. ⁶ Icbopadquidquo icnu quiash Esuquidistubëd tabadac bimboecquid icsadenesa nec. Icsadenequid, Nuquin Papan Esuquidistu tantiamioshi, queti-apimbo iquec. Esuquidistu tantiesa adquo iquec.

⁷ Con nabo, tantesa uamane queshun muaquin chuibanaid tantiesa icta. Esuquidistu bëdamboec tabadacpadquieq tabadquid icsaisa nec. ⁸ Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquid iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadtiapimbo yampanuna. ⁹ Nuquin Papan con bacuë caido icsadenesa nec. Ambi con bacuë caido Nuquin Papapadquidquo yec icsadenetiapimbocquid nendac. ¹⁰ Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquo nendac.

Esuquidistu tantiaquido tantiananaid

¹¹ Esuquidistu tantiaquid utsibo tantiaquiota, quequin chiaid nuqui abia tantiondaid nendac. ¹² Aton utsimbo chieshënnquid Cain icpampidpadquid iquenda. Mayan icsan yua icquin aton utsi cuesunepampic. Aden cuesuniaidën aton utsi Abedën abi tantiaquin nadenesho Nuquin Papan aid bëdamboen isnubi Cainën abimbi tantiacpaden nadenesho Nuquin Papan bëdamboen istiapimbo icpampic. Aden icsa Cainën aton utsimbo Abed chieshënnquin cuesunepampic. ¹³ Cainën aton utsimbo chieshënnacpadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshënnsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. ¹⁴ Esuquidistu tantiaquid tantienquiochoedi Esuquidistu tantiaquid yanash abi tantiaquid utsibo tantiaquidquo nuqui nendac. Aden abi tantiaquid utsibo tantiaquid icquin, Nuquin Papabëd tabadquid bimboecquid nebi, quequin nuqui tantiendac. Aton utsibo tantiesa cuëshëdabimboecquid nec. ¹⁵ Aton utsibo chieshënnquid, Con utsi cuesunenu, quiacbimboecquid nec. Adquid Nuquin Papabëd tabadtemaid nendac, quequin nuqui tantiendac.

¹⁶ Matses tantiaquin nashunquidquo Esuquidistu icpondash. Nuqui tantiec, ma ëbëd ënëdenquo yec tabadpanu quiash unësmanc, quenquo yec nuqui icsaquido icsho cuid-nushe quiash abided cuidadec unëspondash. Abi tantiaquid icquin abi tantiaquid utsibo tantiaquin nashunec unësmanc quenquo yec nuqui tabadendac. ¹⁷ ¿Aton nachoquid icnuc Esuquidistu tantiaquid utsin na nibëdquiocsho isec, Con utsi menenquo iquemb, quequid Nuquin Papapadquioquin tantiaquidta nepec? Adquid Nuquin Papan chiaid pausunacmaid nec. Nuquin Papapadquioquin nashunu quesa adquid nec. ¹⁸ Ëmbi con nabo caid, Utsi tantiec bëdamboec tabadquidquo nebi, quec onquequinuidi tantiec tabadenda. Utsi tantiembi, quequin mimbi chiacpadomboen nabanquin ismeta. ¹⁹ Aden mimbi chiacpadomboen nabansho isun Nuquin Papan tantiamiac dacuëdenquo yec Nuquin Papa chuinu quiash abi yacno puduedquid bimboecquid nuqui chuided-chuidedec. ²⁰ Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquioquin ëbi chuita, quependac Nuquin Papa adquid caic.

²¹ Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidĕnquo Nuquin Papa bĕisquidĕmbimboen, Ēbi menepec, quequin dacuĕdenquiocquin chianendac. ²² Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bĕdamboen isquin menendac. ²³ Naden tantiata, quequin Nuquin Papan chiaid nad iquec: Abĕd Abia Yampidquo, Esuquidistu, nidaidĕnshun chidon tishac matsesaid Nuquin Papan chomiaid aton Madombo nec quequin nuqui tantiaidquo nendac. Adembidi Esuquidistun chiacpadec abi tantiaquid utsibobĕd tantiananendac. ²⁴ Aden ambi chiacpadomboen naquidbĕd Nuquin Papa iquec. Adquiduidquo Nuquin Papabĕd ictequid nec. Abibimboecquid Nuquin Papan aton Mayan meniac ĕbĕd tabadquin tantiamiac, Nuquin Papabĕd icquid nebi, quequin nuqui tantiendac.

4

¿Nuquin Papan chiaidquiobida chuibanoshe? Isnu, qeshun Nuquin Papan chiaidquo isteneta quiaid

¹ Utsibo, Nuquin Papa chieshĕnquidĕn chuimiado dadpen iqueque. Aidĕn chuimiadĕn chuisho tantiashun, ¿Nuquin Papan chiaidquiobida chuibanoshe? Isnu qeshun Nuquin Papan chuiquin dada uamiaidquo isteneta. ¿Adquiobida iqueque? Isnu, qeshun isteneta. ² Nuquin Papan pausunaidĕn naden chiendac: Nidaidĕnshun chidon tishac matsesaid Nuquin Papan chomiaid aton Madombo nec, quequin chuibanendac. ³ Nuquin Papa chieshĕnquidĕn chuimiadĕn naden chiendac: Nuquin Papan chomiaid Esus niondash. Aid aton madopenquo nec, quequin chiendac. Aden chuiquid Esuquidistu chieshĕnquid nec. “Ēmbi chomiaid chieshĕnquid choec,” quequin Nuquin Papan chiampid mimbi tantiec. Aden chuiquid ĕnden dadpen cho-choac.

⁴ Con nabo quequin Nuquin Papan aton Mayan meniac aidĕnquo tantiamiac Esuquidistu chieshĕnquidon chuisho, Tantanu, quesa mibi nendac. Nuquin Papan meniadĕn tantiamiac Nuquin Papan chiaid chiac dĕniacacpadquiec mibi chieshĕnquid cuenendac. ⁵ Esuquidistu chieshĕnquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. ⁶ Aidĕn chuisho tantiesa nuqui nec. Nuquin Papan con bacuĕ caid nuqui nec. Adoac ambi tantiamiacpaden nuqui chuibanosho Nuquin Papa tantiabenuid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibanosho, Tantanu, quesa iquendac. Adsho isun, Abipenquo chuiquidĕn yua nec, quequin nuqui tantiendac.

Nuquin Papan ismiac adecbidi tantiananquidquo ma nuquitedi icoapanuna quiaid

⁷ Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobĕd tantiananquin ma nabanoapanuna. Utsi tantiaquidquo Nuquin Papan bacuĕ nendac. Adquid Nuquin Papa tantiaquidquo nec. ⁸ Utsi tantiaquidquo Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec. ⁹ Matses tantiaquin Nuquin Papan aton Mado Abentsĕcquiobi Esuquidistu matsesmiac matses icsaid bedshunash abided cuidadec unĕspondash. Adoac abi tantiaquido abĕdi ĕnĕdenquo yec tabadendac. ¹⁰ Aden Nuquin Papan matses tantiaquin naid dĕniactiapimbo nuqui iquendac. Aidĕmbien nuqui tantiabudquin aton Mado Abentsĕcquiobi nidaidĕn chomiaid nuqui icsaquido icsho cuidmenquiocnoec abided cuidadec unĕspondash. ¹¹ Nuquin Papa compenen tantiaquidquo icquin Nuquin Icbopadquiocquin Esuquidistu tantiaquid utsi tantiaquiotiad. ¹² Nuquin Papa matsesĕn istiapimbocquid iquec. Abi tantiaquid utsi tantiaquiocsho isash Nuquin Papa nuquibĕd tabadec. Aden aton Mayan meniac aidĕn tantiamiac Nuquin Papapadquiocquin nuqui tantiaquidendac.

¹³ Aton Mayan meniac ambi tantiamiaidquo yec Nuquin Papa ĕbĕd iquec, nuqui quendac. ¹⁴ Nuquin Papan Madomboen nuqui isaidquo icpadenec. Aden isboshon uquĕ nĕsiatiadquido nuqui icsho mĕnchicquid Nuquin Papan chomiaid chosh, quequin nuqui chian-chianec.

¹⁵ Esuquidistu Nuquin Papan Madombo nec, quequin tantiaquidquo Nuquin Papan pausunquin aton Mayan meniad nec. ¹⁶ Aden aid meniad icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobĕd icquidquo nendac. Adecbidi Icho abĕd icquidquo nendac. ¹⁷ Nĕid uquĕ nĕsecatequid nec; nĕid ĕbĕd icquid nec, quequin Nuquin Papan chuibante ushĕ chonoc, Abĕd icquid nebi, quec dacuĕdenquo yec Nuquin Papa tantiaquid aton Madopadquiocquid Nuquin Papa yacno puuedendac.

¹⁸ Nuquin Papan tantiaid dacuĕdenquo iquendac. Ambi tantiamiaid dacuĕdesa nec. Abi tantiesa, Ēbi icsaquid icsho cuidtsiash, quec dacuĕdendac. Aidi utsi tantiesa yec dacuĕdec.

¹⁹ Nuquin Papa Ambia Tantiacid icquin ismiac tantiananquidombo nuqui nendac.

²⁰ Ēmbi isacmaidquo Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshĕnquid iquec muaquid nendac. Ambi isteniaid chieshĕnquid iquec ambi isacmaidquo Nuquin Papa chieshĕnquid nendac. ²¹ Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiat.

5

Nuquin Papan Madombo abimbo tantiaquid

¹ Nuquin Papan Madombo aton Papabĕd abuc icboedi nidaidĕn chomiac matsesaid Esuquidistu nec, quequin tantiaquid Nuquin Papan con bacuĕ caid nendac. Ambi con bacuĕ caidĕnquo Nuquin Papa tantiendac. Adembidi Nuquin Papan con bacuĕ caid utsibo nuqui tantiendac. ² Ambi con bacuĕ caidĕn Nuquin Papa tantiaquin ambi chiacpadomboen naquidquo icquin ambi con bacuĕ caido nuqui tantiendac. ³ Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamientemaid nec. ⁴ Aden Nuquin Papan con bacuĕ caid icquin ambi chiacpadomboen nabanec tabadquin dĕniacacimboen icsamenuequid nuqui cuemendac. Adembidi Abia Yampid nidaidĕnshun chidon tishac matsesash tabadec aton Papabĕd cuĕshĕdesa Esuquidistu nec, quequin tantiaquid nuqui icnuc icsamenuequid cuenendac. ⁵ Esuquidistu Nuquin Papan Madombo Yampid nec, quequin tantiaquidĕnquo ismiac icsamenuequid cuenendac. Ai, icsamenuequidĕn yuadesa Esuquidistu tantiaquidquo nendac.

⁶ Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidĕnshun chidon tishac matsesash capusho acten mentoacsho: “Ēmbi bĕdamboen tantiaidquo mibi nec. Mibi isash bĕdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unĕsec aton Papa chiec: “Ēbi yuedta, Papa,” quiaish Esuquidistu unĕsacsho naciac aton intac chididiquepondash. Adashic, Nuquin Papa abimbo chuiquidpadquidquo icquin aton Mayanĕn tantiamiac, Esuquidistu Nuquin Papan Madombo nec, quequin tantiaquin chiendac nuqui. ⁷ Nuquin Papa yec aton Mado yec aton Mayan yec quequin abuchshun aidtedishun abentsĕc yacimbocquin Esuquidistu Nuquin Papan nidmiac chosho nidaidĕnshun tishac matsesaid nec, quequin chuided-chuidedec. ⁸ Adecbidi nidaidĕnuĕsh Esuquidistu matsesacsho isun, Nuquin Papan Madombo nec, quequin ismenuec aton Mayan abucuĕsh budash aidbĕd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadec unĕso isun, Con madombo nec, quequin inchĕshacimbocnuc icmequin Nuquin Papan nadatiambocquin ismebampondash. ⁹ Aden ismiac isondaidĕn naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unĕso isombi, quequin isondaidĕn chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac. ¹⁰ Adembidi Nuquin Papan Mayanĕn tantiamiac, Esuquidistu Nuquin Papan Madombo nec, quequin tantiaquin adomboembidi chuiopac nuqui. Esuquidistu Nuquin Papan madopenquo nec, quequid, Nuquin Papa muaquid nec, quiacimboen chuiquid nendac. ¹¹ Con Madombo, Esuquidistu nec, quequin Nuquin Papan chiaid tantiaquidquo abi yacno nidash abĕdi ĕnĕdenquo yec tabadendac. Matses icsaid bedshunash abided ciudadec aton Mado unĕspanĕdash, quequin tantiaquid Nuquin Papa yacno tabadtequid nuqui nendac. ¹² Esuquidistu tantiaquid ĕnĕdenquo yec Nuquin Papa yacno tabadendac. Aid tantiesa aidbĕd tabadtiapimbo iquendac.

Ma tantiaquidquo mibi icpanuequin chiaid

¹³ Nuquin Papan Madombo Esuquidistu nec, quequin tantiaquid, Icbobĕd ĕnĕdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. ¹⁴ Adec abĕd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac. ¹⁵ Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

¹⁶ Esuquidistu tantiaquid nebi, queboedi icsasho isun, Cuĕshĕdnushe queshun aid bĕdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuĕshĕdnushe queshun aid bĕdamboen tabadme, Papa, cainda. Nuquin Papan chiaid tantiate bunesa aid nec. ¹⁷ Nuquin Papan chiaid niaquec icsaic. Padnuen, Nuquin Papan

bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquoio yec Nuquin Papabëd tabadendac.

¹⁸ Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsate bunesa nebi, quiacpaden nanuesho tantiamequin pausunendac. Adoac Nuquin Papa chieshënquidën adquido yuadtiapimbo iqendac. ¹⁹ Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënquidën yua nec, quequin nuqui tantiec. ²⁰ Nuquin Papan Madombo abuc abëd icboedëmbi nidaidënsun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquoio yec nuqui tabadendac, quequin nuqui tantiendac.

²¹ Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaid ismequin, Nuquin Papa neque. Nëid tantiaquiota, cac tantienda. Esuquidistu nebi, qesho adembidi tantienda.

Nëbi padi. Aideded chiombi.

UANËN DADA UAIÐËMPI 2

Nuquin Papan chiaid abimbo iquec, quequid tantiaid

¹ Ëmbia Esuquidistu tantiondaidquio Uan nebi. Nëid chido Esuquidistu tantiaquid nendac, quequin Nuquin Papan tantiacpadquieic icquin mibéd Nuquin Papan chiaid tantiec iccuededquidobédta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantias mibitedi tantiec tsadebi. ¿Ëbentsëquidabi mibitedi tantiec tsadpe? Padenquio. Aden chuisho tantiash utsibotsen adecbidí mibi tantiec tabadoaic. ² Nuquin Papan chiaid abimbo iquec, quequin ënenquiocquin nuqui tantiendac.

³ Uquë nësiatiadquido nuqui icsho isash abëdi ënëdenquio yec nuqui tabadmenuec nuqui icsaid bedshunash abided cuidadec Esuquidistu unëspondash. Adembidi ambi chiaid tantiaquido utsibobédta bédamboen tabadmiaido nuqui nendac. Nuquin Papabédtan aton Mado Esuquidistu adquid icmiac, Ambi chiaid abimbo iquec, quequin tantiec utsibobéd tantiananquidquio nuqui nendac.

⁴ Mimbi chiac utsi-utsiec Nuquin Papan chiacpadomboen nabanec tabadsho isash bédambo iquebi. ⁵ Naden nata, quequin chiaid utsipenquio nëid dada uaid nendac. Esuquidistu tantiaquidtedi nuquibi tantiananuna. ⁶ Esuquidistu tantiaquid utsibéd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquieic ma tabadpanuna.

Muaquin chuiquid

⁷ Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënuquid nec. ⁸ Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Icbon chiacpadomboen nadeneta. ⁹ Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabéd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobéd tabadac bimboec tabadendac. ¹⁰ Esuquidistu Nuquin Papan Madombo nec, quequin chiesa chosho isun yuedenda. Adembidi, Bédambo icta, quequin adquid chienda. ¹¹ Adquid yuedquid ambi yuedaidbédtan muaquin chuiquin ismequid nendac.

Ënquin chiaid

¹² Dadpen dada uatiadquio icquimbi mibi yacno nidiadquio icquin daëdpactsëc dada uaombi. Mibi yacno nidash mibëdi onquebi.

¹³ Mibitedi tantiec tsadebi, quequin chuita quiosh ëbéd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

UANËN DADA UAIDËMPI 3

Cayon naid chuiquin utsibon chiaid

¹ Ëmbia Esuquidistun tantiondaidquo Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

² Mimbì Nuquin Papan chiaid tantiacpadquiec min nami bëdambo icpashun. Adem-bidi Nuquin Papan chiacpadec tabadquin ismiac ma utsibobëd bëdamboec tabadpanuna. ³ Mibëd icquidon nëmbo choshon naden chioshi. Esuquidistun chiacpadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. ⁴ Mimbì chuibanac Esuquidistu tantiaquin muainquocquin utsibon chuioaic, quequin chuisho tantiash bëdambo iquebi, quec tsadebi. Ëmbi con mado caidën bëdamboen naid chuisho tantiash bëdambo iquebi.

⁵ Mimbì yuedaidon naden chioshi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioshi. ⁶ Mimbì yuedshun nashunaid utsi-utsiec nëmbo choshon mimbì abi tantiaquin nashunaid nëmbocquido Esuquidistun tantiec iccuededquidobëdta chuibanoshi. Bëdamboen mimbì naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimiaidquo nec. ⁷ Aido isadaidpëmbo chuinuec nidshun adquid yacno choshon Esuquidistu tantiesha nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quiaish mibi yacno puduedendac. ⁸ Esuquidistun chiaid tantiaquid icquin Esuquidistu tantiaquid ambi chuimiaido yuedtiad. Adoquin aidobëdtambi Esuquidistun nacpadomboen ismendac.

Diotedepesën icsamboen naid

⁹ Mibëd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. ¹⁰ Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiash: “Padi. Yuedënda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

Demetedio caid bëdamboquid nec, quequin chiaid

¹¹ Aidën nacpadec icsainda, caimbi mibi. Nuquin Papan Icsaisanquo chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquo yec tabadquid nendac. ¹² Utsien Demetedio caid bëdamboquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquo nec, quequin ëbëd icquidobëdtan chuioaimbi. Uanën chiaid abimbo iquec, quequin mibitedishun tantiendac.

Ënquin chiaid

¹³ Dadpen dada uatiadquocquimbi daëdpectsëc dada uaombi. ¹⁴ Daëdec ushtanquin mimbì ispashuni. Mibi yacno nidash mibëdi onquendabi.

¹⁵ Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuibanoata.

Padi. Aited dada uaombi.

UDASËN DADA UAID

Tauamboen chiaid

¹ Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquiquin Nuquin Papan mibi Esus tantiamiac. Adoac aid tantiasho isash: —Ëbi tantienquo yanushe —quiash Esus mibi cudasec. ²—Aido bédamboen isquin bédambo icme, Papa —quequin Nuquin Papa chianembi mibi tantiaquin.

Muaquido iquendac, quequin chiaid

³ Ëmbi tantiaido mibi neque. Tantia. Nuqui cuidmenquo icnuec Esus abided cuidadec unèsaid tantiateuidi mibi chuitiadquo iccobi. Adnuc: —Esus tantiaquido iccuededacno muaquido puduedosh —quesho tantiaboshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquo mimbi chiech. Aid tantiatipimbo iquebi —cata. Nuquin Papan tantiacpadomboen Esusën abéd icquido chuibanèdaid nuqui tantiaid neque. Utsi tantienda. ⁴ Esus tantiaquido mimbi danubi mibi icsamenuc mibi yacno muaquido puduedac caosh. Ambi èndenquo tantiacpadomboen Nuquin Papan icsano nidmetequido aido neque. Muasho tantienda. —Nuquin Papan bédamboen isaïdo icsauidequi icsho nuqui cuidtipimbo iquec. Chido chishpidambo yec dada cuididimbo yec quec icsashobi nuqui bédamboen isec —quec comapenec muaique. Muasho tantienda. Esuquidistu Nuquin Icho abentsëchshun chiaid niac-niaquec icsaïque.

⁵ Adquid Nuquin Papan comapenen cuidendac. Tantia. Nuquin Papan cuidampid mimbi tantianèdaid mibi chuinu. Equipito yacnoshon unèsmenuen ancanquidën icsamboen chonoa uasho isun ashunquo Nuquin Papan con mases isadaïdo tsusedpabo puduamepampic. Adoac yuetcanquin puduamiaiombi ambi chiaid niac-niacsho isun Nuquin Papan uesquin unès uapampic. ⁶ Adembidi utsibotsen cuidpampic. Abéd icpampido ambi abi yacnoshon uaido mayan chedo abèdtan namequido icboedobi Nuquin Papan chiaid niac-niacne buncuenash Nuquin Papabéd icte bunenquo yampampic. Adec Satanas chedo abéd icte bunenquo icsho isun puduentiapimbo yacno icsamboshë yacno Nuquin Papan nidmepampic. —¿Ada mibi bédambo icti? Mibi icsamboshë iqueque. Mibi cuidnu —quetequid ushën padpiden uesquin cuidnumbi adopampic. ⁷ Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquo chudnubi adembidi chidon aton bënëpenquo chudmepampic. Dada aton dada utsibèdi chichudnanquidquo icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nédëncapampic nibèdqüecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anèdënquiacono nësëcaindac —quequin nuqui tantiec.

Muaquido icsaid

⁸ Cuidte tantienquo yec adecbidi muaquido icsamboecuidi tabadec. Aton dada utsibèdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic. ⁹ Mayan bédabo chuiquid dapa Miqued caidën adotiampimbo icpampic. Aïdi Moises unèsacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquo icpampic Miquedën. Adenquo icquin: —Nuquin Papambien mibi cuidec —capampic Miqued caidën mayan bédabo namequid dapa icquin. ¹⁰ Muaquidombien ambi tantienquo yaid icsamboen chuishunec. ¿Ada bédabo cuidnushe quepadic? Adembidi abi cuidte tantienquo icquin ambi tantiaiduidi naic tabadsho Nuquin Papan cuidendac.

¹¹ Cain caïdbimboecquid muaquido nec. Nuquin Papan chiaid niac-niacquin abi bunaid naiqui icsaic. Badan caidën piucquid bednuen Nuquin Papan chiaid niactiadquo yampampic. Adembidi piucquid bednuen muaquidon ambenquiobi chiech. Code caidën abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac. ¹² Muaquido icsambo iquec. Mibi icsametiadquien icchitec. Esus tantiaquidon pebededacno puduedshun mibèdtambi muaquidon piac caosh. —Esus tantiaquidquo nebi —quiash puduedash dacuèdenquo yec icsaïqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquo. Ambi naiduidi naquin ambembi chiaid chiac mases nadquo iquec. Uispa dadpen icboedi badiadnuc abu chëshën bëtinaçsho isash: —Tanunquien badiadec —queuidacimboc mases iquec. Pete ambi nitsinaid unèsacsho

istuidash: —Pete nitsinuidombi —quiacbimboec muaquidon chuisho tantiaquido: — Bëdamboen chiaid tantianu —queuidendac. ¹³ Acte tēcuaunquequidën cuëmano nushan uaquin icsa uacbimboen icsaquin muaquidon mibitsen icsamec. Abi capuaid tantienquo yequi: —Ëbi capuaid tantiaquidquo nebique. Isec cho —queboedi bënudtaniacimboen: — Nuquin Papan chiaid tantiamequidquo nebi —queboedëmbi tantiamenquo iquec. Adec muasho cuidquin Nuquin Papan puuentiapimbo yacno icsamboshë yacno nidmendac.

¹⁴ Adquido con tsusedpa Enoc caidën chuipampic. Abia matses uaid Adanën madon baban tishmiaidën baba Enoc nepampic. Naden chuipampic. “Nuquin Papan abi yacnoshon uaid mayan bëdabo dadpenquioshë Nuquin Icbobëd choendac. ¹⁵ ‘¿Ada mibi bëdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. ¹⁶ Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshëmë nec tabadec. Abi bunacpadecuidi icsaquiec. —Ëmbentsëqui bëdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquo mibi nec —quec muaic.

Esus tantiaquionona, quiaid

¹⁷ Ëmbi tantiaido mibi neque. Tantia. Esusbëd iccondaidon chiaid mibi chuinu. ¹⁸ Nadpondash. “Esus padpidec choabi icnuc Nuquin Papan chiacpadec bëdamboec tabadsho Esus tantiesabon mamënsnunendac. Nuquin Papan chiaid niac-niaquec abi bunacpadec icsaquiendac,” quepondash. ¹⁹ Adquido muaquido iquec. Aton padi yec icsaqui chieshëmëquin mibi cuësh-cuëshëdmec. Nuquin Papan aton Mayan aidobëd tabadmenquo iquec.

²⁰ Adquid icsacpadec icsainquo icquin Esus tantiatsëcboedëmbi Nuquin Papan chiaid isban-isbanquin ënenquo icquin Esusbëdta Nuquin Papa tantianuna. Nuquin Papan Mayanën tantiamiacpadomboen Nuquin Papa chianenuna. ²¹ —Abi tantiaho bëdamboen isquin abi yacno Esusën nuqui tabadmendac —qeshun Esus chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna. ²² Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiaho: —¿Abimbobida capeba? —qesho tantiaho nëishenquo icquin Nuquin Papan chiaidquo tantiamenuna. ²³ Bacuëmpi cuëten pichiquetsensho: —Baded bed. Taidnushe —quiacbimboen —Icsano nidmequin Nuquin Papan cuidnushe —qeshun utsibo Esus tantiamenuna. Icsaquadotsen bëdamboen isnuna. Esus tantiamenuen aido bëdamboen isec: —Ëbitsen icsamane —quiash aido icsacpadec icsainda. ²⁴ Nuquin Papa bëdamboshë iquec. Aid tantiaho nuqui icsamenquo iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac. ²⁵ Aden tantiaquin nadonona. —Abipadquid utsi nibëdnuc abentsëcquiobi Nuquin Papa iquec. Nuquin Icho Esused cuidshun abi tantiaquido cuidenquo icquid nec. Abitedishun Icbombo Nuquin Papa nec. Nadatiambo icquin nabanquidquo nec. Abitedi chuiquid dapambo yec abitedi namequidquo nec. Bëdamboshë iquec —canuna ënenquo icquin. Esus tantiaquido icquin adonona. Padi. Aidedi chuiquin dada uaombi.

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquoio chuibanquin dada uaic nebi. Esusbëd ictenedquoio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ² Adoac Nuquin Papan chiaidbëdta Esuquidistun ismeboedquoio chuibanquin dada uaic nebi. Abimbo caimbique. Tantia. ³ Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquoio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdta bëdamboen isquin bëdambo icmepashun. Adembindi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵ Aton Mado Esuquidistu Nuquin Papan bëdamboen iste tantiamequidquoio nec. Abia aton dada unëstiapimbo icquid icmequin uincuemiaidquoio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquoio nuqui tantiaquidquoio yec nuqui icsaid bedshunec abided cuidadec unëspondash. ⁶ Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquoio nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquoio icquin. ⁷ Aidquoio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquoio isendac. Con matses ambi unë uaondaidquoio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

⁸ Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquoio nebi. Nidaid uabi yec ictenedi nebi. Nëbi adquid yec nibëdantiapimbo icquidquoio nebi. Adquid yec abitedishun Icbombo nebi —queposh Nuquin Papa. Aidquoio tantianuna.

Dacuëdampamboecnuc Esusën ismiaid

⁹ Esusbëd ictenedi Uan nebi. Mibëdta Esus tantiaquid yec min utsibimboecquid nebi. Mibi yacpadembidi Esus tantiasho Esus tantiesabon chieshëmpondashi. Adoac Esusën namiacpadec chieshtoenquoio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacimboen cuemenquoio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. ¹⁰ Dominco ushën Esus tantiec tsadshobini Nuquin Papan Mayanën tantiameposh. Adoac cachocush shoncate shoncacimboec comapenec onquesho tantiapombi. Ushenquoio icquimbi ushquin isacimboen tantiombi. ¹¹ Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidtedishun iste dada uashun buame —quequin comapenec onquequin chuiposhi.

¹² Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaidquoio neposh. ¹³ Aid nënantanquoio Esusquoio icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiacosh. Abi shictonquete bëshpiu-bëshpiuctsëcquid nuacquid dapambo icposh. ¹⁴ —Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquoio nec —camenuc cuëte isquidbimboec aton

ëshë isquid-isquidquio icposh. ¹⁵—Utsin: “Èmbiquen abitedi namenu,” catiapimbo icnuc abitedimbo namequid nec —camenuec shocosh piu nacnenaibimboec nac-nacquo aton taë icposh. —Nuquin Papapadquidquio nec —camenuec acte chododoquiabimboec comapenec onqueposh. ¹⁶Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquio nec —camenuec adposh. Aton bètantate ushëbimboec bëchamauanquiecposh. —Bëdambo icquidquio nec —camenuec ad icposh.

¹⁷Dacuëdampamboecsho istanequini Esusèn dayumbi uebudpaccoc unësaniciabimboec padishec. Adshobini Esusèn camishquin bëdameposh. —Dacuëdenda. Nuquin Papapadquidquio nebi. Nidaid uabi yec ictenedi nëbi adquid yec nibëdantiapimbo icquidquio nebi. Adquid yec abitedishun Icbombo nebi. ¹⁸Adquid yequi matsesèn unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Èbi tantiesaboembi icsaido cuidacno nidmendac —queposh Esus.

¹⁹Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. ²⁰Tantia. Èmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuedquido chuibanquido 7tedbidi icoaic,” quequin tantiaquin uispa 7tedi ismec nebi. “Èmbi namiaido nec,” quequin uispa sananquin ismec nebi. “Èbi chuibanquidën chuibancho tantiec iccuedquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi —quequin aden ismeposhi Esusèn.

2

Epeso yacnocquido Esusèn chiaid

¹Aden Esusèn uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. —Èbi tantiaquido chuibanquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. ²Mimbi naidtedi tantiaquid nebi. Dayacquo icquin ëmbi chiapadomboen mimbi dadpen nabanoc. Utsibo chieshtonobi chieshtoenquio icquin mimbi ëbi tantioc. Èbi tantiaquido icsamenuen chiec: ‘Esusèn namiaidquio yec mibi chuinuc chopobi,’ quequin muaquidon chuisho: ‘Mua. Nuquin Papan chiaidpenquio mibi chuibanque. Utsibo chienda,’ quequin mimbi aidon chiaid tantienquio iccoc. Aden mimbi bëdamboen naoc. ³Adembidi utsibon chieshënaqui chieshtoenquio icquin Nuquin Papan chiaidbëdta ëmbi naid mimbi chuibanoc.

⁴Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadene. Aden ëbi tantiaquidquio icquin mimbi utsibotsen tantiaquiopadene. Adodenedëmbi pacuënëdabimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuedec. ⁵Èmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ qeshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquio icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuec mibi pudued-puduedenquio ictsiandac. ⁶Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi. ⁷Nëbi ëbi tantiaquido utsibo chuinu. Èmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoenquio icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied nënantan icquid cuëte matses unëstiapimbo icquid icmete icmepampic. Aid cuëte bacuë meniabimboecnuc mibi padpidec unësenquio icnuc ëbëdi tabadmendambi,” quequin ëmbi chuiboed dada uata —quequin Esusèn chuiposhi.

Esmidina yacnocquido Esusèn chiaid

⁸Adshumbic Esusèn padpiden chuiaoposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmëquidon unës uacsho chococaqui uincuempaccondash. Adondaid yec unësaid uincuemequidquio nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi

chuiu. ⁹ Èbi tantiaquido icsho utsibon chieshènac mimbi dayun uaid nibèdquendac. Nèbi mitsana nibèdquid yequi con Pa yacnuèsh dadpen dayun uaquidbimboec mibi bédamboshè iquendac. Chieshèmènquidon mibi icsamboen chuishumboedtsen tantiembi. Mibi yacnoshon Satanasèn namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquo yec Satanasèn yuaboen nec. ¹⁰ Aido tantiash: ‘Ashibi mèyampatsiash,’ quec dacuèdenda. Satanasèn: ‘¿Ada Esus tantiaquido chieshtoenquo ictsiashe? Tanu,’ quequin namiacpadomboen chieshèmènquidon mibi utsi-utsien quènèn nauedbanendac. Adoac daèdpectsèc ushec mibi mèyadendac. Pduenabi yec chieshtoenda. Chieshèmènquidon: ‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun èbèdi tabadmendambi. ¹¹ Nèbi èbi tantiaquido utsibotsen chuiu. Èmbi Esmidina yacnocquido chuibocpadomboen con Mayanèn mibitsen tantiametsiashe. Pabiate cuembo icquin èmbi chiaid tantiata. Chieshtoenquo icquin èbi tantiasho isun icsaïdo cuidquiacno nèsecainquo iquendambi,” quequin èmbi chuiboed dada uata —quequin chuiposhi Esusèn.

Pedcamo yacnocquido Esusèn chiaid

¹² Adoshombic ana shècuènuèsh chèshte cuènumboshè icquid cueshqueboedèn Esusèn naden chuioposhi. —Pedcamo yacnocquidon èbi tantiaquidon iste èmbi naden chuiboed dada uata. “Tantia, Pedcamo yacnocquido. Mibitedi chuiu. ¹³ Mibi yacno Satanasèn yuabo dadpen icnuc èbi tantiec mibi chieshtoenquo iquec. Ènden Satanasèn namiac mibi yacnoshon chieshèmènquidon con yua Antipas caid cuesunepondash. Aidèn chieshtoenquo icquin èmbi naid chuibansho cuesuniacsho isumbic adembidi chieshtoenquo icquin mimbi èbi tantiaquopondac. Aden mimbi bédamboen naid tantiembi.

¹⁴ Adondaid tantiaquin mibi icsaidtsen chuiu. Mibi cuèdèncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Èndenquimboshè matses utsibo chuiquid dapa Badac caidèn: ‘Isadaidbo aqec cho,’ cac comapen tanti-aquidèn Badan caidèn isadaidbo Nuquin Papan chiaid niacmenuequin chuitampampic. Aidèn chiapadomboen Badac caidèn matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquo tantiamenuen ambi papa quequin dasamboed nèish pichicaid pebededacno buampampic. Aden Nuquin Papan chiaid niac-niacmec icsamianquido mibéd iquec. Aido cuemepatecnèdan mimbi. ¹⁵ Adec nicadaitabo caido èbi tantiata shubun puduedash mibèdi cuèdèncuededec icsami-ante bumpec. ¹⁶ Aidon chiaid tantienda. Èmbi chiaid mibi niac-niacmenushe. Aidobéd tabadenda. Mibi cuèdèncuededacno chomenda. Èmbi chuiboed niacbidansho isun con ana shècuènuèsh cueshqueboedèn chèshten cuesacimboben mibi cuidtsiambique. ¹⁷ Nèbi èbi tantiaquido utsibotsen chuiu. Èmbi Pedcamo yacnocquido chuibocpadomboembidi con Mayanèn mibitsen tantiametsiashe. Pabiate cuembo icquin èmbi chuiboed tantiata. Chieshtoenquo icquin èbi tantiasho bédambo icmendambi. Nuquin Papan isadaidbo mana caid pemedenequin dayun uacpadomboen mibi bédamboen tabadmendambi. Adshumbic: ‘Èmbi tantiaquido yec èbi yacno puduedquid nec,’ queshun cuènote ushu menendambi. Abi cuèmedquid icnubi utsi uain cuènquin aid cuènoten dada uatanquin menendambi. ‘Èmbi meneboedènuidsèqui ma isnu,’ quequin adoendambi,” quequin èmbi Pedcamo yacnocquido chuiboed dada uata —quequin chuiposhi Esusèn.

Tiatida yacnocquido Esusèn chiaid

¹⁸ Adoshombic aidèmbidi padpiden chuioposhi. Cuète isquidbimboec aton èshè isquid-isquidquo yequi aton taè shocosh piubimboec nac-nacpambo icpsh. —Icsaisambo yec Nuquin Papan Madombo nec. Adquid yec abitedishun naid tantiaquidquo icquin matses cuidquidquo nec —camenuc adquo isadquidèn naden chuiposhi. —Tiatida yacnocquidon èbi tantiaquidon iste èmbi naden chuiboed dada uata. ¹⁹ “Tantia, Tiatida yacnocquido. Mibitedi chuiu. Mimbi naid abitedi tantiembi. Èbi tantiaquin mimbi utsibotsen bédamboen tantiec. ‘Aton Papabèdtan Esusèn bédamboenshè natsiash,’ quequin chieshtoenquo icquin mimbi èbi tantiec. Adquid icquin èbi tantiamenuen utsibo nashunquido mibi nec. Èbi tantiesabon: ‘Padi. Esus tantienda,’ caqui mimbi chieshtoenquo icquin èbi tantiapac. Tauamboen èbi tantiaquin daèdpectsèc naondaidi nèbi èbi tantiaquishon èmbi chiapadomboen mimbi dadpen naid.

²⁰ Adec utsi-utsiec bédambo icnubi icsamianquid chido abi iquec. Aid mimbi cuemepatecnèdan. Aid cuemenquo yec mibitedi icsaic. Mimbi cacumiabi mibi iccuededacno isadaidbo tsusedpan chido Èsabad caidbimboecquid chido icsamboshè icquid muanuec puduedposh. Puduedshumbic: ‘Nuquin Papan chiaid chuiquid nebique. Tantia. Chuiu,’ quequin abi bunaiduidquo chuibanosh. Adoac èbi bèdiactsèc tantiauidtsècboedi aidèn

chiacpadec icsacuededposh. Nuquin Papanquoio utsibon papa caid tantiabededacno puduedposh. Adshumbic aidon papa quequin dasamboed nëish pichicaid pec tabadcued-edquimbi aton chidopenquoio chudbededposh. ²¹ Adsho isun aid chido: ‘Ma abi icsaid ènu,’ qeshun badedquoio cuidenquoio iccombi. Adoboqui abi icsaid ènte bunenquoio iccosh. ²² Adec abi icsaid èntiapimbo icsho isumbimbi nëbi cuidendac. Èmbi nac daicsabudash mëyadquieac aton ueten uendac. Ambi chiacpadomboen naquido ademibidi mëyadquionoc cuidendambi. Aidon ambi naid ènshoembi cuidenquoio ictsiac. ²³ Aid chido cuidquoiquimbi aton bacuëbobimboecquido aidèn chiacpadomboen naquin èntiapimbo icquido ademibidi cuidquindambi. Èmbi adosho isun èbi tantiaquidtedishun: ‘Matsesèn otacquoio tantiaid tantiaquidquoio Esus nec. Adquid icquin abi icsaid ènenquoio icquido cuidquin abi tantiaquido bédambo icmendac,’ quequin tantiatsiash.

²⁴ Tantia. Ambocquido èbi tantiaquidombotsen chuinu. Aden Satanasèn chuimaidèn chuisho: ‘Aden chuisho tantiatiapimbo iquebi,’ mimbi capoc. Aden bédamboen nasho isun utsi chienquoio iquembi. ²⁵ Nèiduidtsèqui chuinu. Mimbi bédamboen nabocpadomboen chieshtoenquoio icquin èbi tantia. Èbi choabi yacpadembi adota. ²⁶ Choshombimbi chieshtoenquoio icquin èmbi chiacpadomboen naquidombo èbèdtan chuiquid dapabo icmendac. Adoac èbèdtan matses utsibo abitedi namendac. ²⁷ Aden Nuquin Papan aido èbèdta chuiquid dapa icmiacsho utsibon: ‘Dèniacquin èmbiquen nanu,’ catiapimbo iquendac. Èbi chieshènquido: ‘Esus dèniacquin èmbiquen matses namenu,’ qesho tantiaashun matsu nacnenquidèn ambi nacnenaid icsambo icsho isun pos-posacimboen cuidquindambi. ²⁸ Badiadte anoentsèc uispa dapa choded-chodedbocpadquieac ènèdenquoio yec èbi tantiaquidobèd iquendabi. ²⁹ Èbi tantiaquido utsibotsen chuinu. Èmbi Tiatida yacnocquido chuibocpadomboen Nuquin Papan Mayanèn mibitsen pausuntsiashe. Pabiate cuembo icquin tantiaata. Chieshtoenquoio icquin èbi tantiasho ademibidi bédambo icmendambi,” quequin èmbi chuiboc dada uata —quequin chuiposhi Esusèn.

3

Sadis yacnocquido Esusèn chiaid

¹ Adoshombic Nuquin Papan Mayan abi tantiaquidobèd tabadmequidquoio icquin Esusèn padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedèn naden chuiposhi. —Sadis yacnocquidon èbi tantiaquidon iste èmbi naden chuiboc dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bédamboec tabadquido danquin utsibon: ‘Bédambo icquido nec,’ mibi canubi èmbien adotiapimbo iquec. Mibi bédapenquoio iquec. Unèsacimboen mimbi èbi bédamboen tantienquoio iquec. ² Isucunacimboen èbi padpiden tantiaquiota. Nuquin Papan chiacpadomboen mimbi nauidtsèccoque. Mimbi èbi tantienquoio iqueque. ‘Nuquin Papan chiacpadquieac bédamboec tabadnuna. Esus tantiaquionona,’ cananta. ³ Mimbi èbi tantiabenondacpadomboen èbi tantiaquiota. Bèpiscudenda. Nèbi mibi icsaid ènshun èmbi chiacpadomboen naoata. Isucunenquoio yachimboen èbi tantienquoio icshoembi mibi cuidendac. ‘Ampequid choec,’ quequin tantienquoio yachimboen èmbi cuidte tantienquoio icsho mibi cuidtsiambi. Èbi tantiaquiota.

⁴ Mibi yacno icsaquido dadpen tabadnubi utsi-utsiec daèdpectsèc ambi naid icsa ucudachimboec icsainquoio yec bédamboec tabadec. Adec bèchish ucudachimboec abi icsaid ènash bédamboec tabadsho isun èbèdi tabadmequin icsaisa icmendambi. ⁵ Èbi tantiaquido utsibotsen chuinu. Èmbi chuibocpadquidèn chieshtoenquoio icquin èbi tantiasho ademibidi bédamboen isun Nuquin Papa yacno èbèdi tabadmequin icsaisa icmendambi. Aido cuëmèdquid cuëmèdquidquien Nuquin Papa chuibanendambi. ‘Aido èbi tantiaquidotedi neque. Nuquibèd tabadmenuna,’ quequin adoendambi Nuquin Papan abi yacnoshon uaido mayan bédabotsen tantianuc. Aden dada uaid ucudenquoio yachimboen bèshunenquoio icquin èbèdi tabadtequido abitedi tantiembi. ⁶ Èmbi Sadis yacnocquido chuiboc Nuquin Papan Mayanèn mibitsen tantiametsiashe. Pabiate cuembo icquin bédamboen tantiaata. Chieshtoenquoio icquin èbi tantiasho ademibidi bédambo icmendambi,” quequin èmbi chuiboc dada uata —quequin Esusèn chuiposhi.

Pidadepia yacnocquido Esusèn chiaid

⁷ Adoshombic icsaisambo icquin ambi chiacpadomboen naquidènquoio Esusèn padpiden chuiposhi. Con tsusedpa Dabid yampicpadquid matses namequidquoio yec amentsèqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidèn naden chuiposhi. —Pidadepia yacnocquidon èbi tantiaquidon iste èmbi naden chuiboc dada uata. ⁸ “Tantia, Pidadepia yacnocquido. Mibitedi chuinu. Mimbi naid tantiembi. Mibi yacno èbi tantiaquido daèdpectsèc iquec.

Adquid yec: ‘¿Ada nuquitedictsèqui chieshtoenquo icpatsiaba?’ queded-quededtsèccuien mimi ìbi tantiaquoc. Chieshènaqui: ‘Esus tantiatiapimbo iquebi,’ quenquo mibi iccoc. Adec chieshtoenquo icsho isun èmbi namiac èmbi naid mimi chuiban-chuibanendac utsibon èmetiapimbo icquin. ⁹ Aden isadaidbon mibi èmetiadquo iquec. Aido: ‘Con matses isadaidbouditsèqui Nuquin Papan bédamboen isendac,’ quec muaboedo Satanasèn yuabo niosh. Èmbimo namiac mibi yacno cho-choso mimi chuibanendac. Adoac: ‘Ai, abimboen mimi caoc. Nuquin Papan Madon Esusèn tantiaidombo mibi nec,’ aidon mibi caindac. ¹⁰ Èmbi chiacpadec chieshtoenquo icquin èbi tantiasho isash mibi cudasendabi. ‘¿Ada Esus tantienquo yantsiashe? Tanu,’ qeshun nidaid utsi-utsiec yacno tabadquido abitedi Satanasèn natiambo icmendac. Adosho mibi chieshtoenquo icquid icmendambi.

¹¹ Tantia. Nèbi choendabi. Utsibon chieshènaqui mibi icbocpadquic chieshtoenquo yec bédamboec tabadta. ‘Èbi adenquo icsho isun Esusèn abi yacno puduedmenquo ictsiashi,’ quiash bédamboec tabadta. ¹² Aden chieshtoenquo icquin èbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacimbocnuc con shubun icquido mibi icmendambi auèshquo cuentiapimbo icnuc. ¿Mitsipaden icbon: ‘Con na nec,’ quequin abi cuèmèquid dada uaqin ismepec? Adembidi abitedi ismequin: ‘Con Pabèdtan con matses nec,’ mibi caindami. ‘Nuquin Papa yacno èbi tabadaid Edusaden chuca caid abucuèsh budtequid yacno tabadtequidombo nec,’ mibi caindami. Nuquin Papan abitedishun Icbombo icmiac èbèdtambi chuiquid mibi icmendambi. ¹³ Èmbi Pidadepia yacnoquido chuibocpadomboen Nuquin Papan Mayanèn mibitsen pausuntsiashe. Pabiate cuembo icquin bédamboen tantiaata. Chieshtoenquo icquin èbi tantiasho adembidi bédambo icmendambi,” quequin èmbi chuiboed dada uata —quequin Esusèn chuiposhi.

Daudiseya yacnoquido Esusèn chiaid

¹⁴ Adoshombic abitedishun naid tantiaquin abimbo chuiquidènquo Esusèn padpiden chuioaposhi. Nidaidbèdta abitedi uaquidènquo abitedishun Icbon chuiposhi naden. — Daudiseya yacnoquidon èbi tantiaquidon iste naden èmbi chuiboed dada uata. “Tantia, Daudiseya yacnoquido. Mibitedi chuinu. ¹⁵ Mimi naid tantiemi. Chieshtoenquo icquin èbi tantiaquid ictiadquidi adquidpenquo mibi nec. ¿Èbi bédamboen tantiaquidon adopendactic? Padenquo. ‘Esus tantiaquid nebi,’ quiondaidèmbi mimi naiduidi naquin mimi èbi bèdiactsèc tantiatsèccoc. Adsho tantiaashun: ‘Dayacquo yacimbombo èbi tantiaquiopashun,’ caimbi mibi. ¹⁶ Mibi adec chieshtonoc èbitsen chieshtotiadquo iquebi. ‘Cacumiacimbombo Nuquin Papa yacno èbèdi mibi tabadmenquo iquendambi,’ mibi catiadquo icchitebi. ¹⁷ ‘Nuquin Papan chiaid niac-niaquec icsapobi,’ quetiadquidi: ‘Èmbemi con na dadpen bedshun dayun uaic utsi bunenquo yec bédambo iquebi,’ mibi quepoc. ‘Esus tantienquo yec Nuquin Papabéd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubi-uatiadquo iquebi. Bèchish ucabi yacimbombo mibi icsaid ènabi icsho mibi bédamboen istiapiimbo iquebi. Pacuènèdacimbombo èbi tantienquo mimi iquec. ¹⁸ Adboedèmbi Nuquin Papabéd tabadte bunquin èbi tantiaquiota. Èbi tantiaquin bèchish ucacimbombo mibi icsaid ènta. Adsho icsaisabimboecnuc mibi bédamboen isquin èbèdi tabadtequid icmetsiambique. Pacuènèdaid paposhquiabimboecnuc èmbi naid mibi bédamboen tantiametsiambique. Èbi tantiaata.

¹⁹ Èmbi tantiaido bédamboen tantiamembi. Aton papan: ‘Padi, mibi icsambo iquec,’ quequin bacuè èmiacimbombo èbi tantiaquido icsasho isun ambi naid èmenuequin natiambo icmendambi. Èbi tantiaquin mimi icsamboen naid ènash bédamboec tabadta. ²⁰ Mibi tantiaquiambique. ‘Èbi tantiaata,’ èmbi cac mibi: ‘Ai,’ qesho tantiashe mibèd iquendabi. Pec tabadec bèisanquiabimboec mibèd iquendabi. ²¹ Tantia. Èbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aidbèdi tabadquid nebi. Adquid yec aidbèdi abitedishun Icbombo nebi. Adembidi èmbi con Pan chiaid nacpadec chieshtoenquo yec èbi tantiec tabadsho èbèdi tabadmequin èbèdtan chuiquid icmendambi. ²² Èmbi Daudiseya yacnoquido chuibocpadomboen Nuquin Papan Mayanèn mibitsen pausuntsiashe. Pabiate cuembo icquin bédamboen tantiaata. Chieshtoenquo icquin èbi tantiashe adembidi bédambo icmendambi,” quequin èmbi chuiboed dada uata —quequin Esusèn.

¹ Asia yacnocquido Esusèn ëmbudquin chuipon abuc ispombi. Adshun isquien shëcüe shëcniacimboec isadpec. Adnubin chuibocpadquiec shoncacimboec comapenec onqueoposh. —Nëmbö cho. “Nadquid iquendac. Nadotsiandac,” quequin mibi dadpen ismenu —caposhi.

² Adoac Nuquin Papan Mayanèn tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo chuiquid dapan tsadte dapanquo tsadpec. ³—Chuiquid dapa abentsëcquiobi nec. Bëdamboshë iquec —camenuc matses bunaidquio casëdubimboec nac-nacquio yec piumbo yec bëdamboshë isadposh. Abi tsadaid nënantanquo uenquebudpamboec uen podquedbipamboec umu-umupambo icposh. —Bëdamboshë icquidquio nec —camenuc adquio icposh. ⁴Nuquin Papa nënantan icnuc abi dacuenadec matses tsusiobo Esus tantiaquido chuiquid 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquio dasiuidcuededposh. Chuiquid dapan maetemo shocosh nacenaidquo maucuededposh. ⁵ Adnubin Nuquin Papa yacnuësh abubimboec bed-bedquetanenubien abu tesquianiabimboec cuëdtoposh. —Abitedishun Icbombo nec —camenuc adec cuëdposh. Nuquin Papan bëntsiacquo tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiaquidobëdtsen icoaic —camenuc aden ismeposhi. ⁶ Bëntsiacbidi actepenquio chian dapa acte-actetsëcquio isadposh.

Nuquin Papa tsadaid anoen daëdtsëcquio abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquio. Abimbouidquio istequidquio icposh. Cachoc icnubi tachiduc adquiobidi icposh. ⁷ Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh. ⁸ Icbo-icboec aton podo uicchnën podobimboec 6tedi icposh. Podonotsen adquiobidi ëshëuidquio isadposh. Podo ananquio adquiobidi icposh. Aidonquiobi ënenquio icquin Nuquin Papa chuiposh nadec cuëdënquin.

—Icsaisambo yec bëdamboshë icquidquio mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquio mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquio nec —quec badiadquidën badiadquidënquiec cuëdënashic inchëshëntsen cuëdëdeneposh.

⁹ Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun ademibidi: “Bëdambo iquec,” mibi cac bëdambo ictsiasih, Papa —Nuquin Papa cadonenubi ¹⁰ tsusiobo 24ted icquido ambo tabadquido danëshën tinguëbudcuededposh. Adtanquimbi maete chicededtanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbic aidontsen Nuquin Papa chuiposh nadec cuëdënquin.

¹¹—Mibi bëdamboshë iquec, Papa. Adembidi abitedishun mibi: “Bëdambo iquec,” capashun. Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiacpadomboen mibiuidtsëcquiobi abitedi uapampic.

Adoac tsimbi tantiacpadequid mibi uaido nibëdanabi yec abi iquec.

—quec tsusiobo cuëdëncuededposh.

5

Nuquin Papan chiacpadomboen namequid Esus isadaid

¹ Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —qeshun 7ted icnuc bitacatempin bitaccabanaid neposh. ² Adnubin Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitacaid chichanquin chuibampatsiasih? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiasihba? —quequin tantiec adposh. ³ Adoquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aidtedi dada uaid bedshun bitacaid chichanquin istequid nibëdposh. ⁴ Adsho isashini unësqüo icnuc shuipoc: —Aid dada uaid bedshun chichanquin chuibanquid nibëdec —quiash. ⁵ Adshobini

anocquid tsusion: —Otac. Shubienda. Ēnéd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dēniacadiapimbo icquid nec. Aidēmbi chieshtoenquio icquin Nuquin Papan chiacpadamboenuidi naquidquio icquin aid dada uaid bedshun namendac —caposhi.

⁶ Adoac isquien isadaidbon Nuquin Papa cuidmenquio icnucen abided unēs uaid obeca bacuēbimboecquid Nuquin Papabēd abi tsadacnombo isadtsec. —Matses icsaid bedshunuec abided cuidadec unēsaid Esusquio nec —camenuc adec isadposh. Utsibo dacuenadec tabadnuc nēnantanquio Nuquin Papabēdquio icposh. Anoentsēqui dadanobi ēshēcquido dacuenadec tabadnuc abi uquētsēc tsusiobuidquio dacuenadec tabadposh. Padnuc obecabimboecquid yec aton pais 7tedi icnuc aton ēshēmbō aidtedquibidi icposh. —Abitedishun Icbombo yec utsin dēniacadiapimbo icquid Esusquio nec —camenuc aden pais ismeposhi. Adembidi: —Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodēmēdtiapimbo icquid Esus nec —camenuc ēshē 7tedi ismeposhi ushquin isacimbocnuc. ⁷ Adshumbic obecabimboec isadboedēn Esusén Nuquin Papan abiucshunquio sananaid dada uaid bedposh. ⁸ Bedsho istanequien dadanobi ēshēcquidobēd tsusiobō 24ted icquido Esus ismec danēshēn tinquebucuededposh. —Bēdambohē icquidquio mibi nec —quiasch adcuededposh. Tsusiobon icbo-icboen ten-tencate sananquimbi utsiucshun shocoshēmpi bēdambo nuadnuc tauitempi sanamposh. —Ēmbi ten-tencamequin Nuquin Papa cuishoncamiacimboc Esus tantiaquido cuēdēnaid iquec —quequin aden ten-tencate sananquin ismeposhi. Adembidi: —Nēshun tauiac nēid pushudquid Nuquin Papa yacno nidacimboc Esus tantiaquidon chianiaid iquec —quequin bēdambo nuadnuc tauitempi sananquin ismeposhi. ⁹ Adashic cuēdēnte chucan Esus chiec cuēdēncuededposh tsusiobo.

—Mibi bēdambohē iquec.

Nuquin Papan chiacpadec matses cuidmenquio icnuc mibided cuidadec unēsondaidquio mibi nec.

Nēbi icsambo icboedombi mibi tantiasho Nuquin Papan bēdamboen isendac.

Aden Nuquin Papan chiacpadomboen naquidquio mibiuidtsēqui nec.

Mimbiuidtsēqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bēdamboen isendac.

Nēidtedi matses caimbi. Nēidic matsesquio.

Nēidic matses utsibo.

Nēidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bēdamboen isendac.

¹⁰ Adoac min yuabo yanshun Nuquin Papa yacno mibēdi tabadquin: “Mibi bēdambohē iquec,” caded-cadedendac.

Mimbi tantiacpadēn nidaidēnuēsh mibēdtan chuiquid iquendac

—quec cuēdēncuededposh tsusiobo.

¹¹ Adnubien abi yacnoshon Nuquin Papan uaido mayan bēdabotsen cuēdēncuededposh dadpenquioshē. 10,000 X 10,000tedi udimbo dēniacash cuēte podotedi tambantiapimbo yactedimbo comapenec cuēdēncuededposh. Nuquin Papa Esusbēdi nēnantanquio icnuc anoentsēqui dadanobi ēshēcquidoidquio dacuenadec tabadposh. Abi uquētsēc dacuenadec tsusiobuidquio tabadposh. Aid uquētsēc dacuenadequic mayan bēdabotquid tabadposh. ¹² Adec tabadec mayan bēdabo abitedimbo cuēdēncuededposh naden chiec.

—Isadaidbon obeca bacuēded cuidacimboc matses icsaid bedshunuec abided cuidadec Esus unēspondash.

Esusquio bēdambohē icquidquio nec.

Adquid icsho: “Abitedishun Icho icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibēdec,” abitedishun capashun.

Adembidi: “Mibi bēdambohē iquec. Mibi tantiaquiembi,” abitedishun capashun

—quec cuēdēncuededposh mayan bēdabo Esus tantiec.

¹³ Adnubien Nuquin Papan uaido abitedimbo cuēdēndocuededposh. Abi yacnocquidotedi yec nidaidēn icquidotedi yec unēsaid uincuemiaidotedi yec acten icquidotedi yec quec cuēdēncuededposh naden chiec.

—“Abitedishun Icbombo yec tsadte dapan tsadquidquio Nuquin Papa bēdambohē iquec.

Obeca bacuëbimboecquid abided ciudadec unësaid Esutsen bëdamboshë iquec,” canuna, ènenquo icquin.

“Abiuidtsëqui Nuquin Icho nec. Utsi adquid ictiapimbo iquec.

Aidën nac nuqui bëdamboshë iquec.

Abipadquid utsi nibëdec,” canuna ènenquo icquin

—quec cuëdëncuededpoh abitedimbo.

¹⁴ Adsho tantiash dadanobi èshëcquido: —Ai, abimbo caic —quenubi tsusiobo 24ted icquido: —Nuquin Icho bëdamboshë iqueque. Ismenu —quetanec Nuquin Papabëdta Esus ismec danëshën tinquebudcuededpoh.

6

Bitaccaid chicaid chiaid

¹ Adnubien Esusèn Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicpoh chicabi icquid 6tedi icnuc. Aid chicnubien Nuquin Papabëd icquid dadanobi èshëcquidën abentsëcshun abu cuëdabimboec comapenec cuëdquin: —Cho —capoh. ² Adoac cabayo ushumbö icquid catsadec dada canti sanampamboec chosho ispombi. Adec chosho isun: —Mibi chieshënquido uesquin cuesun secaquidquo mibi nec —quetanquin chuiquid dapan mauetempo mauemepoh. Adoac adecbidi abi chieshënquido cuesun secanuec nidpoh.

³ Adnubien Esusèn dada uaid bitaccaid utsi udictsëcquid chicpoh chicabi icquid 5tedi icnuc. Aid chicnubien dadanobi èshëcquid utsin: —Cho —cac ⁴ cabayo piumbo icquid catsadec dada chopoh. —Matses cuesun secananenquo icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —qeshun chështe dapa matses siante dapa menepoh. Adomboen Nuquin Papan matses cuidte tantiameposhi.

⁵ Adnubien Esusèn dada uaid bitaccaid udictsëcquid chicpoh chicabi icquid 4tedi icnuc. Aid chicnubien dadanobi èshëcquid utsinsen: —Cho —cac cabayo chëshëmbo icquid catsadec dada chopoh. —Pete daëdpactsëc icmete chiec —camenuen pete yuë tante sanampoh. ⁶ Adnubien dadanobi èshëcquido dacuenadec tabadnuc nënantanshunquo Nuquin Papan cabayo chëshëmbo icquid catsadquid chuipoh. —Piucquid dadpenquo meniac aton yuë daëdpactsëcnuc tambanshun pete utsi-utsien daëdpactsëc menianquid iquendac —quequin pete utsi-utsien nibëdte chuipoh. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquo icquin nata —quequin chuipoh. —Nuquin Papan cuidac adec pete nibëdnuc matses pete bunquiendac —quequin cuidte utsi aden ismeposhi.

⁷ Adnubien Esusèn dada uaid bitaccaid udictsëcquid chicpoh chicabi icquid 3tedi icnuc. Aid chicnubien dadanobi èshëcquid utsinsen ènquimbi chuiquin: —Cho —cac ⁸ cabayo bëdiactsëc ushu-ushupactsëcquid catsadec dada chopoh. —Aid matses unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon naniac cuesun secananec dadpen naimëdbudnendac. Bunambi aitedbidi unësbudnendac. Daicsaidëmbic aitedebidi. Aben icquid uinsadpambo icquidën aitedebidi acshun secaindac —quequin Nuquin Papan cuidte utsi ismeposhi.

⁹ Adnubien Esusèn dada uaid bitaccaid utsi chicpoh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquo icquin Nuquin Papan chiaidbëdta Esusèn naid chuibanec bëdamboec tabadsho aden cuesun secaido niosh. ¹⁰ Adoaido icquin comapenec cuëdquin Nuquin Papa chuidonepoh. —Abitedishun Icbombo icquin mimi tantiacpadomboen namequidquo mibi nec. Ic-saisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaoboed ztedectisshun mimi cuidpe? —caquin chuidonepoh. ¹¹ Adoquien: —Chiata. Yuec-yuepactsëcshun naindambi. Min utsibobimboecquido ëbi tantiaquido utsibo ëmbi tantiacted chieshëmënuquidon ma cuesun secabono. Adoacsho isun cuesun secanquido cuidendambi —quepoh. Adshumbic Nuquin Papan: —Èbëdi tabadmequin icsaisa mibi icmembic —qeshun abitiombi dasiuidbudte ushumbö icquid dasiumbampoh.

¹² Adshumbic Esusèn dada uaid bitaccaid utsi chicpoh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëquepoh. Nidaid uëdëquenubi abucuësh chënquequidtedi dacuëdampambo yampoh. Ushë dashcute chëshën bëpucacimboec inchëshquo icpoh. Inchëshën ushëbic intacimboec piumboshë isadpoh. ¹³ Uispabic natiambo cunquenec cuëte bacuë tididiquiacimboec nidaidën tididiepoh. ¹⁴ Abubic dashcute bidiquiacimboec isadpoh. Macuësh dapabic abitedi

manëdcuededposh. Acte nënantan nidaid icquidic abitedi manëdcuededposh. ¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nèidic chuiquid dapabo dadpenquio. Nèidic aidobëdtan chuiquid utsibo. Nèidic sondado chuiquid dapabo. Nèidic aton na dadpen dayun uaquido. Nèidic cuesambo icquido. Nèidic matses yuabo. Nèidic matsesën yuacmaido. Aidedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. ¹⁶ Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided cuidadec unësaid Esusëntsen cuidnushe. ¹⁷ Aidon ambi tantiacpadëñquiobini nëbimbobi cuidchitec. Padtembo. ¿Tsutsi cuidenquio icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

7

Isadaidbo Nuquin Papa tantiaquidombo bësiaid

¹ Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uquin cuncamenquio icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenuc icsa uanushe —geshun adoposh. ² Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaqin bësete sanamposh. Aidën cunquequid uidën uaquido comapenec onquequin chuituidposh. ³ —Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëda cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

⁴ Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidedi tambanac 144,000tedi icpoch dadpenquioishë. ⁵ Nèidic Acobo caidën mado Uda caidën matses tsyuecquido 12,000tedi. Nèidic Acobon madobidi Duben caidën matses tsyuecquido 12,000tedbidi. Nèidic Acobon madobidi Cad caidën matses tsyuecquido 12,000tedbidi. ⁶ Nèidic Acobon madobidi Ased caidën matses tsyuecquido aidtedquiobidi. Nèidic Acobon madobidi Netadi caidën matses tsyuecquido aidtedquiobidi. Nèidic Acobon madobidi Manases caidën matses tsyuecquido aidtedquiobidi. ⁷ Nèidic Acobon madobidi Simeyon caidën matses tsyuecquido aidtedquiobidi. Nèidic Acobon madobidi Debi caidën matses tsyuecquido aidtedquiobidi. Nèidic Acobon madobidi Isacad caidën matses tsyuecquido aidtedquiobidi. ⁸ Nèidic Acobon madobidi Sabadon caidën matses tsyuecquido aidtedquiobidi. Nèidic Acobon madobidi Ose caidën matses tsyuecquido aidtedquiobidi. Nèidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icpoch —quequin chuiposhi mayan bëdan. Aden Nuquin Papabëda Esus tantiaquido dadpenquioishë ismeposhi. —Adquido iquendac —quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioishë tabadpec. Tambantiapimbo yactedi iquec. Nèidic nidaid utsi-utsiec yacno tabadquido. Nèidic matses utsibo. Nèidic matsesquio. Aidedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesën chuiquid dapa ismiacbimboen: —Nuquin Papa bëdamboshë iqueque. Ismenu —quequin niste podobiequid sananquin uic-uiccaposh. ¹⁰ Aido comapenec cuëdëncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuëded cuidacbimboen aton Mado Esusded cuidpanëdash.

Adoac nuqui icsaid bedshunuec abided cuidadec unëspodash Esus.

Aid tantiaho icsaido cuidacno nidmenquio icquin nuqui abëdi tabadmec.

Aton Papabëd bëdamboshë iquec

—quec cuëdëncuededposh.

¹¹ Adsho tantiaho ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënënantanquio Nuquin Papabëd Esus tabadnuc abi uquëtsëc dacuenadec dadanobi

ëshëcquido 4tedi icquiduidquio tabadposh. Abi uquëtsëc dacuenadec tsusiobo 24tedi icquiduidquio tabadnuc abi uquëtsëc dacuenadequic mayan bédabouidquio tabadposh. ¹² Aid mayan bédabotedi danëshëñ tinquebudcuededequi comapenec cuëdëncuededposh.

—Aden abi tantiaquido abëdi tabadmequid bédamboshë iquec.

Esusbëdi Nuquin Papa bédamboshë iquec.

Adembidi abitedishun: “Mibi bédambo iquec, Papa,” quequin chuipashun.

Esusbëdi Nuquin Papa bédamboshë iquec.

Abipadquid utsi nibëdec.

Comapenen tantiaquidquio icnuc ambi tantiacmaid utsi nibëdec.

Aiduidtsëqui bédamboen tantiaquidquio nec.

Aidën nashunac bédamboshë iquebi.

Nadatiambo icquid nec. Abitedishun Icbombo nec.

“Esusbëd Nuquin Papa bédamboshë iquec,” canuna

—quecuededposh mayan bédabotedi.

¹³ Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiuëshquio aido chosh? —cac: ¹⁴—Tsaudi, tsusio. Mimbibien tantiec —capombi. Adsho tantiash: —Tantia. Mibi chuinu. Satanasën: “¿Ada chieshtoenquio ictsiashe? Tanu,” qeshun natiamboshë icmiac Esus tantiec chieshtoenquio ictenedo nec. Adec chieshtoenquio icsho isun Satanasën tantiacpadomboen chieshëmëñquidon unës uapondash. Abided cuidadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh. ¹⁵ Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquio icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” qeshun abëdi tabadmequin bédamboen dayun uaic. ¹⁶⁻¹⁷ Isadaidbo matsesën nëish yua obeca dadpen dayun uacpaden abided cuidadec unësaidën Esusn abi tantiaquido bédamboenshë dayun uaindac padpidec unëstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuësh ushën pichiquenquio iquendac. Chun mëyadenquio iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamante nibëdquiec iquendac. Unësquio icmiente nibëdquiec iquendac. Bacuë shubisho anin bëucquin bédambo icmiacimboen abi yacnoshon Nuquin Papan Esus tantiaquido bédambouidquio icmendac —quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusn nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. —Dacuëdampambo iquec —quec media oda yec yuec-yuecpectsëc otacquo tantiec tabadposh. ² Adnubien Nuquin Papan abi yacnoshon uaido mayan bédabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. ³ Adnubien mayan bëda utsi ambobidi choposh. Choash bédambo nuadquid tauinuequin shocosh nacnenaïd tauite dapa dayun nidtuidposh. Shocoshëmpin bédamboshë nuadnuc tauitempi utsi sanamposh. Adsho isun bédambo nuadquid nua meneposh. Adoac: —Nëid tauiac pushudquid Nuquin Papa yacno nidacimboec Esus tantiaquidon chianiaïd iquec —quequin bédambo nuadquid sanshun tauite nacnenaïd dapan tauiposh bédambo nuadnuc. ⁴ Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaïd abi yacnoshon tantiashun Nuquin Papan abi tantiaquido chieshënquido cuidendac —quequin aden ismeposhi. ⁵ Adshumbic aid mayan bédan tauite dapan samëdquid cuëte dëtsisadaïd isquidquio icquid bedshun shocoshëmpin sandoposh. Aden sandotanquimbic shocoshëmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquianiacimboec cuëdtoposh. Adnubien nidaïd abichobi saca-sacaquemboc uëdëqueposh. —“Nuquin Papan ëbi chieshënquido cuidpashun,” quequin Esus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

Shoncate shoncaquin ismiaid

⁶ Matses tabadacno cuëte dëtsisadaïd isquidquio icquid masiabudnubien shoncate bedboedon mayan bédabon shoncanuen sanamposh. ⁷ Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuëte dëtsisadaïd isquidquio icquid yec intac yec quenuc chomeposh ue dapa choacimboecnuc. Aden chomiaïdën nidaïd nuamboshë taidposh. Cuëte dadpenquioshë taidposh. Uasin dadpenquioshë pichiqueposh.

⁸ Adnubien mayan bëda utsin shoncaposh 5tedishun shoncabi icnuc. Shoncanubien macuësh dapatambi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. ⁹ Adec intac yanaidën acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

¹⁰ Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotëbimboec nëdën-nëdënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh. ¹¹ Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

¹² Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoaquien bëdambo chënqueboedi bëdiactëcquio chënquiantsëccosh.

¹³ —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësquioshë iquec. Shoncabi icboedon mayan bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

9

Mayan bëda utsin shoncanuc isaid

¹ Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictepi meneposh. Podobitsi icsabo uidën uacno nidaid shëcuë uquëducquio icquid bëtashte chichte neposh. ² Aid chictepin chicaquien uquëducuësh tied nëdënquedoacpamboec pushudtoposh. Abuc inchëshquio pushudquid icnuc ushë isadenquio icposh. ³ Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquio niosh. ⁴ Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbëdta cuëte podo penda. Usaintsen penda. Ademibidi Nuquin Papan cudasquin bësëmiaido abi tantiaquido sebudneta. Aido senquio icquin Esus tantiesabo bësiadabi icquidoudquio sebudneta —quequin chuiposh. ⁵ Adshumbic: —Unësnuc seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsebiecquidën sebudnequin ismeposhi. ⁶ Aid tsectsebiecquidën siac natiamboshë yec matses unëste bunquiendac. Unëste bunquidi badedi unësenquio iquendac.

⁷ Aden tsectsebiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsebiecquid isadposh. Shocosh mauetëbimboecquid mauëcuededposh. Matsesën bëtantetembobi bëisadposh. ⁸ Chidon tëbucshumbimboec isadposh. Bëdin shëtabimboec aton shëta icposh. ⁹ Bëntsiauc shicdiadquid cudaste shocosh nacnenaïdbimboec sictsasimbo icposh. Aid abi maisi cuensho tantiac tied nëdënquiacbimboec comapenec cuëdposh. ¹⁰ Aid tsectsebiecquid chishpichoquid yec chichumbimboec sianquidquio neposh. Inchëshën ushë 5tedi nidmequin adquidën dadpeshun natiamboshë icnuc matses sebudneposh. ¹¹ Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaïdbon onqueten abadon caposh. Quidieco matsesën onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³ Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien taute dapa Nuquin Papan bëntsiauc tsadunaid yacnuëshquio onquedosho tantiombi. ¹⁴ Adec onquequidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. ¹⁵ Aden chuitan aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac —quequin tantiacpadomboen adoposh. ¹⁶ Adoaquien ambi namiado cabayo catsadquido sondado chedo matses utsibo cuesun secanuec chochoposh. Aido tambanaïdtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

¹⁷ Ēmbi isboedquo nadquo icposh. Abi catsadaid cabayobēdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bēshpiu-bēshpiu icquid yec queposh. Cabayon mapi bēdi dapan mapibimboec isadposh. Ana shēcuēnuēsh nēdēnquepamboec pushud-pushudpambo yec choposh. Cachinan bacuē pisenaid nuadacimboec asupede caid icsamboshē nuadposh. ¹⁸ Adshumbien ana shēcuēnuēsh choaidēn matses dadpenquioshē cuesun secabudneposh. ¹⁹ Aid cabayo chedon ana shēcuēnuēsh matses cuesun secate icnubi aton incuentembi mapi utsi iccondash. Nisin mapibimboecquid pianquidquo niosh. Aidēntsen matses dadpenquioshē unēs uabudnequin ismeposhi.

²⁰ Adnubien aden Nuquin Papan cuidaidēn unēs uamiabi yaidon matsesēn abi icsaid ėntiapimbo icposh. Ambi nauduidi nabamposh. Ēntiadquidi abi icsaquioposh. Nuquin Papa tantienquo icquin podobitsi icsabo tantiaquin ėntiapimbo icposh. Adembidi ambibi nacne- naid ambi papa caid ėnenquo icquin tantiaposh. Utsibon shocosh nacneaid tantiaposh. Utsibombic cuēnote. Utsibombic cuēte. Adquid ambibi nacneshun tantiabededposh. Ambi nacneaid anan onquetiapimbo icposh. Pabiaten tantiatiapimbo icposh. Taēn caputiapimbo icposh. Adquid papa quequin tantiabededposh. Aid tantienquo icquin Esusquo tantiatiadquidi ambi nacneaiduidi tantiaposh. ²¹ Cuesanquidon abi cuesun secaposh. Nēnēchoquidombic abi unēs uabudneposh. Cuēte podo dauē icsa chodcaquidombic adembidi matses dadpen unēs uabudneposh. Aton chidopenquo chudquidombic adembi utsi chudshumbededposh. Adembidi aton bēnēpenquo chudmequidēn abi icsaid ėntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushē. Ēbi icsaid ėnu —quetiadquidobi adenquo icposh.

10

Mayan bēdan dada uaidēmpi pemiaid

¹ Cabayo uinsadpambo icquid ismeboshombic utsitsen ismeposhi. Adoac mayan bēda chuiquid dapa utsi dacuēdampambo icquidquo Nuquin Papa yacnuēshquo budsho is- pombi. Abu ushubimboec isadec abitiombi dasiuidbudpaccosh. Uen podqued uen- quebudacchipamboec mapino icposh. Ushēbimboec bētantete bēchamauanquiecposh. Buin- tad nitsinaid nēdēnquiachipamboec isquid-isquidpambo nidte icposh. ² Dada uaidēmpi bēcadotsaid sanamposh. Budash nidtuidposh. Tsiembudcuenshun taē abiucshun chian dapa mad caid nētincaquimbi taē opiocshon mananuc tincaposh. Ēnapenquioshē icquid niosh. ³ Adashien bēdi noshquiacimboec nuamboshē cuēdtoposh. Adec cuēdquin chiac abu 7tedec cuēdtonēquin ėcbedtonēposh Nuquin Papan chiaid chuiquin. ⁴ Aden abu cuēdquin ėcbedtonesho tantiashun: —Abu cuēdquin chiaid dada uanu —qeshobi: —Padi —caposhi Nuquin Papa yacnoshon chuiquin. —Abu cuēdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquo iccombi.

⁵ Adnubien mayan bēda tsiembudcuenshun chian dapa nētincaquin utsiucshun man- anuc tincaboedēn ambibi podo abiucquo cadoposh. —Nuquin Papan isnubi abimbo chuiquidquo nebi —quequin tantiamenuen aden ambibi podo abiucquo cadoposh. ⁶ Adotanquin chuiposhi. —Tantia. Mibi chuinu. ¿Tutsi nidaid uabi yec ėndenquimboshē icpampic? Aidi Nuquin Papa nēbi adquid yec nibēdantiapimbo iquendac. Adquid icquin abitedi uapampic. Abu uashun aidēn icquidtedi uapampic. Nidaid uashun aidēn ic- quidtedi uapampic. Acte uashun aidēn icquidtedi uapampic. Aden abitedi uaquidēn chi- aidquo chuinu. Nēbi Nuquin Papan ambi tantiapadomboen icsambo icquido cuidquimbi abi tantiakuido abēdi tabadmendac. ⁷ Ēbi padquid mayan bēda utsin shoncate sanam- boedēn: “Nēbi nainquin shoncanu,” cacpadēnquo Nuquin Papan ambi chiampicpadom- boen adoendac —queposh mayan bēda chuiquid dapa dacuēdampambo icquid Nuquin Papan matses cuidquin naimpanuda.

⁸ Adnubini abucuēsh cuēdquidēn chuiposh. —Aid mayan bēdan sanamboed dada uaid bed —cac: ⁹—Dada uaid becco —capombi. Adoquien: —Nē bed. Bedshun che. Batambo icboedi min ana mucambo yanendac —caposhi. —Nēid bedshun chiacimboen Nuquin Papan chiaid chuishonquequin isban-isbanash mucambo yanacimboec Nuquin Papan cuidte tantiash shubitiadquid mibi yanendac —quequin tantiamenuen aden chuiposhi.

¹⁰ Adoac aid bedshun chiash adquo yanobi. ¹¹ Adquo yansho isun mayan bēdabo chuiquid dapan chuioaposhi. —Nuquin Papan ambi chiaid tantiamiac matsesēn nabante dadpen mimbi chuibanendac. Nidaid utsi-utsiec yacno tabadquidon nabantebēdta chui- quid dapabon nabante mimbi chuibanendac. Aden Nuquin Papan tantiapadomboen mimbi chuibanendac —quequin chuiposhi mayan bēdabo chuiquid dapan.

11

Nuquin Papan namiaidon daëdshun naid

¹—Nuquin Papan tantiapadomboen mimbi chuibanendac —quequin chuishumbic mayan bêda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bêdambo nuadnuc tauinuequin nacne- naid dapatsen tambanta. Adotanquimbic Nuquin Papa tantianuec aid shubun pudued- puduedquido tambanta. ² Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabud- nendac. Adash Nuquin Papa tabadte shubu uashunaid daquënë uaidën pudued- puduedendac,” qeshun aid shubu daquënë uaid tambanenda. Aden Edusaden icsa uaqin seta 3tedi matamendac —quequin chuiposhi. —“Muainquio icquin Esusbêda ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³ Adnubini Nuquin Papan chuiposh. —Aden Edusaden icsa uanubi matses daëdquibi ëmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiapadomboen chuibanendac. Adquid yec: “Matses abitedi icsamboshë icsho isash shubitiadquio iquebi,” quequin icsambo icquid abi icsaid ëmenuec dashcute icsactsëcquidquio dasiuidendac —quequin Nuquin Papan chuiposhi.

⁴ Adshobini mayan bêdan chuioposh. —Aido Nuquin Papan oncamaid daëd isadaidbo matses tsusedpan chuipampid nendac. “Nuquin Papan bêntsiauc cuëte odibos caid nitsinaid daëd bêdambo icquid iquendac. Ambobidi tabote daëd bêdambo icquid iquen- dac,” quequin chuipampid nendac. “Nuquin Papan Mayanën tantiamiaidquio icquin ambi chiaidquio chuibanendac,” camenuen aden chuipampic. ⁵ Aden abi chuibansho abi chëshëncquidën: “Mibi cuesunenu,” caqui cuesuniadenquio iquendac. Nuquin Pa- pan dayun uaid icquin ana shëcuënuësh choboedën nibëdquiecnuc pichicacimboen abi cuesunuequidotedi unës uaindac. Nuquin Papan cuidte tantiamenuen adoendac. ⁶ Adembidi Nuquin Papan cuidte tantiamenuen Nuquin Papan Mayanën namiaidquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intacuaindac. Adembidi ambibi tantiapadomboen comapenen tantiaquin dacuëdampamboecquin matses shubi- mendac Nuquin Papan cuidte tantiamenuen.

⁷ Aden Nuquin Papan chiaidtedi aid daëdshun nainquin naindac. Aden nainshobien matses chuquid icsamboshë icquidën bëdi dapabimboecquidën abidaëdi cuesun secain- dac. Satanasën namiacpadomboen adoendac. ⁸ Edusaden yacnoshon cuesun secashun chococainquio iquendac. “Ma cuesun secaid ischitono,” qeshun chococainquio icquin podqued ansanendac. Nuquin Icho Esus cuesten dectanacnoshonquio matsësën adoen- dac. Equipito yacno icpampido yec Sodoma yacno icpampido yec quequidimboec icsam- boshë icquin aden Nuquin Papan chiaid chuibanquido cuesun secaindac. ⁹⁻¹⁰ Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun choco- cainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abëd icquidobëd menen- cuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushqin aden ambi cuesun secaboed isbededec tabadendac —quequin chuiposhi mayan bêdan.

¹¹ Adashic abi onquec: —Abentsë chotsec ushqin isbededec tabadimbien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac. ¹² Adnubi Nuquin Papan abucshun cuëncuin: “Nëmbô cho,” cac abu ushu datanec cuesun secaboed daëd abuctoendac. Abi chëshëncquidon isnubi adendac. ¹³ Aid daëd abuctonco nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi ic- quido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatid,” quecuedendac —quequin chuiposhi mayan bêdan. ¹⁴ Aden chiqui dapan chuibocpadomboen mayan bêdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daëd chuibombien mayan bêdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdcuededpoh naden chiec.

—Nuquin Papabèdi aton Mado Esuquidistu abided cuidadec unèsaid bédamboshè iquec. Abi chieshènuquidon naid èmeshun aid abentsècshumbi matses abitedimbo namendac ènenquo icquin.

Abitedishun Icho nec

—quec cuèdèncuededpòsh. ¹⁶ Adashic Nuquin Papa yacnombo icho-ichoec tsadten tabadboedobi tsusiobon 24tedi icquido: —Mibi bédamboshè iquec —quequin ismec danèshèn tinguebudcuededpòsh. ¹⁷ Adtanequi naded cuèdèncuededpòsh.

—Nidaid uabi yec èndenquimboshè mibi icpampic, Papa.

Nèbi adquid yec nibèdantiapimbo icquid mibi nec.

Abitedishun Icbombo mibi icnuc:

“Èmbiquen dèniacquin namenu,” Satanasèn catiapimbo mibi iquec.

Nadatiambo icquid icquin mimbentsèqui matses abitedimbo mimbi namendac.

¹⁸ Nidaid utsi-utsiec yacno tabadquidon abi chuiquidobèdtan mibi chieshèndenec.

Mimbi uaidtedi icsa uadenec.

Adsho mimbi tantiacpadènquo nèbi mimbi cuidendac.

Matses abitedi uincuetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobèdta mibi tantiaquido abitedimbo mibi yacno mibèdi mimbi tabadmendac.

Chuiquid dapambobèdta chuiquidpenquo mibi tantiaquidotedi bédambo icmequin mimbi adoendac

—quequin tsusiobon Nuquin Papa chuisho tantiapombi ushquin isacimboben.

¹⁹ Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shècniacchobi icpòsh. Aid shubu nuntan isaquien Moisesèn ambi nacnenaid Nuquin Papan chiaid sandoampid icpòsh. —Èndenquimboshè ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden èbi ismenubien bed-bedquetanec abu teshquianiacimboboc nua cuèdtonepòsh. Nidaid saca-sacaquemboec uèdèquepòsh. Ue dapa nuamboshè choacimboboc ue tsasi chopòsh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

12

Chidobèdta nisibimboecquid dapa ismiaid

¹ Adoshombic Nuquin Papa yacnoshombidi utsitsen dacuèdampamboecquidbidi ismeoaposhi. Adoac chido ushè dasiuidacimboboc bèchamauanquiecscho ispombi. Inchèshèn ushè tincash tsadpòsh. Uispa 12tedi nacnenaid mauete mauepòsh. ² Bacuè nua usunec tishiadtsècquio yec shubibud-shubibudpòsh. —Isadaidbon chido Esus tishquid nec —camenuen aden ismeposhi. ³ Adnubien nisibimboecquid nuamboshè icquid chopòsh. Taèchopaidquio yec piumboshè icpòsh. Mapi 7tedi icpòsh. Pais 10tedi icpòsh. Aton mapitedi chuiquid dapabimboboc mauete mauècuededpòsh. Satanas niosh. ⁴ Adshumbic nisibimboecquidèn aton incuente ènapen icquid uic-uiccaquin uispa dadpen bedshun nidaidèn siabudpòsh. —Aden Nuquin Papabèd icquin Satanasèn abipadquido utsibo mayan bédabo ichoedo utsi-utsien yuapampic. Aden yuash aton yuabobèdi nidaidèn choshon matsetsen icsamete bunquiec —camenuen aden ismeposhi. Adshumbic chidon tishacsho bacuè penuen aiduidi bèisquin cainuidpòsh. ⁵ Adnubien chidon dada bacuè tishpòsh. Bédambo icquid matses abitedishun Icho ictequidèmpì niosh. Adshobien Nuquin Papan abi yacnombo buampòsh nisibimboecquidèn petiapimbo icnuc. Buanshumbic abipadquid abitedishun Icbombo icmiac. —Aden Satanasèn Esus nibèdametiapimbo iquec —quequin ismeposhi. ⁶ Adnubien chido nèbi bacuè tishboed nisibimboecquid dapa cuenènec matses nibèdacnombo Nuquin Papan tantiacnombo nidpòsh. Ambobi tabadsho isun Nuquin Papan bédamboen dayun uapòsh yuenquo seta abentsè chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nèidtedi isoapombi. Nèidic nisibimboecquid dapa Satanasquibò. Nèidic mayan bédabo ichobèdobi Nuquin Papan chiaid niac-niaquec icsash podobitsi icsabo yanaido Satanasèn yuaido. Nèidic Nuquin Papabèd icquidombo mayan bédabo dadpen. Nèidic aido chuiquid dapambo Miqued caid. Aidtedi ispombi. Adnubien Satanas nadpòsh. —Aton yuabo mayan bédabo cuemiash Nuquin Papa dèniacquec èbimbo abitedishun icho yantsiabi —quiash nicantiaquio icpòsh. Satanas chedo nidaidèn nidmiabi icnuc nepòsh. ⁸ Adshumbic: —Niunchitono —quequin bedbidanbedbidanaquien Nuquin Papan yuabo Miqued chedo uidènquo icquido yec niadenquo icpòsh. Adshumbic Miqued chedon nisibimboecquid Satanas chedo nicapòsh. Aton yuabobèdta Nuquin Papa yacnoshon nicapòsh. ⁹ Nicaquien matses tabadacno nidaidèn

choec Satanas chedo bud-budposh. Eba caid icsamepampid Satanas niosh. Nēbi matses dadpenquioshē icsamequin yuate bunquieci.

¹⁰ Adnubien Nuquin Papa tabadacnoshon anocquidēn comapenec onquequin chuibamposh naden chuiquin.

—Aden Nuquin Papan aton Mado Esusbēdtan abi dēniacnuequido dēniacmenquio icposh.

Nuquin Papa chieshēnquidquio icquin abi tantiaquido chieshēnquin icsamboen chuishunquid nec.

“¿Esus tantiaquido bēdambo icquidoda nedic? Ēmbi natiamiac aido chieshtotsiash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided cuidadec unēsaidbēdi dēniacadiapimbo yec abitedishun Icbombo nec

—queposh Nuquin Papa yacnuēsh cuēdec. ¹¹ Adashic padpidec auēshbidi:

—Nēbi ěmbi isac Satanasēn Esus tantiaquido chieshtometiapimbo icposh.

Satanasēn: “Chieshtomenu,” caqui:

“Padi. Esusēn yuambo nebi,” quec chieshtoenquio icposh.

Cuidmenquio icnuec abided cuidadec unēsaid Esus tantiec chieshtoenquio icposh.

Adsho abi chieshēnquidon matsesēn: “Padi. Esus tantienda. Cueschitomane,” caqui

chieshtoenquio icquin adenuidi Esus tantiasho cuesun secameposh Satanasēn aton yua icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ēbitedi cuishonquenuc nidaidēn tabadquido matses yec mibi cuishonquetiapimbo iquec.

Nēshun cuemiac mibi yacno budash Nuquin Papa chieshēnquieci Satanas chieshēmēnquieci tabadec.

Mibi icsamete bunquieci. “Nēbi Nuquin Papan ěbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac. Adoac natiaic mibi tabadendac

—queposh Nuquin Papa yacnuēsh cuēdec. Aden tantiameposhi.

¹³ Adshumbic ěmbi isadaidbon chido isboed padpiden ismeposhi. Adoac Esus tishquid isadaidbon chido unēs uanuen nadancasho ispombi. —Nuquin Papa yacnoshon nica-chitoshi —queshun chieshēnquin nisibimboecquid Satanasēn aid chido nadancaposh.

¹⁴ Adnubien Nuquin Papan chiqui dapan podobiecquid meniac bedanec aid podombi cuenec matses nibēdacnombo Nuquin Papan tantiacnombo chido cuemposh. Anoshombi nisibimboecquidēn icsa uatiapimbo icnuc Nuquin Papan aid chido dayun uaposh. Seta abentsē chotsecnuc matamequin dayun uaposh. ¹⁵ Adnubien nisibimboecquidēn: —Aid chido unēs uachitono —quequin ambibi ana shēcuēnshun chomequin acte dapa chido dayun uacno nua chomeposh. Aden Satanasēn Nuquin Papa tantiaquido isadaidbo matses nibēdametiadquio iquec. Adembidi Esus tantiaquido nibēdametiadquio iquec. ¹⁶ Acte dapa chomiacsho isun Nuquin Papan nidaid shēcuē uashun aid shēcuē acte nidmiosh chido yacno chiuidenquio icnuc. ¹⁷⁻¹⁸ Adsho isun nisibimboecquidēn Satanasēn nēishquioshon aid chidon bacuēbobimboecquido Esus tantiaquido chieshēnquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bēdamboen naquido Esus tantiaquido caimbi.

13

Bēdibimboecquid dapa ismiaid

¹ Esus tantiaquido cuesun secate bunquid ismēboshombic Satanasēmbidi chian dapa mad caid cuēmanshun cainquin ismeoaposhi. Aden cainubien acte uquēducūesh bēdi dapabimboecquid pudundoposh. Mapi 7tedi icposh. —Nuquin Papa caid nibēdquieci. Ēbiuidtsēqui abitedishun icbombo icnu —quequin aton mapitedi bēdada uadaid neposh. Pais 10tedi icposh. Aid paistedi chuiquid dapan mauete paisēn dectambampaccosh.

² Aton dada bēdin dadabimboec isadposh. Aton taē uinsadpambo icquid utsi oso caidēn taēbimboec isadposh. Ana shēcuē bēdi utsi tēbuchoquidēn ana shēcuēbimboec icposh. Adsho isun Satanasēn ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasēn matses icsamboshē icquid chuiquid dapa icmequin ismeposhi.

³ Adshumbic padpiden ismeposhi. Adoac aid bēdi dapabimboecquid acte uquēducūesh choboedēn mapi abentsēc mēmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —queshun matses abitedishun acte uquēducūesh choboedēn chuiquid icsamboshē icquidēn chiacpadomboenuidi nabededposh. ⁴ Adshumbic: —Ēbi chuiquid dapa namequid mibi nec —quequin

Satanas papa caquin matsesèn tantiabededposh. —Aden Satanasèn namiac èbi chuiquid dapapadquid utsi nibèdec. Comapenen tantiaquidquio icnuc utsibon nuqui cuesun secatipimbo iquec —queshun abi chuiquid dapa acte uquèducuèsh choboedtsen tantiaquipo-
 5 Aden matsesèn tantiaid icquin Satanasèn tantiamiacpadomboen Nuquin Papa chieshènquie: —Nuquin Papa caid nibèdquie. Èmbiuidtsèqui namembi —quequin matses abitedimbo namepòsh. Aden Nuquin Papan tantiacpadembi inchèshèn ushè 42tedi nid-
 neposh seta abentsè chotsecnuc matamequin. 6 Aidèn Nuquin Papa chieshènquin naden muauaposh. —Nuquin Papa caid nibèdquie. Abi tabadaidtsen nibèdquie. Abi yacno tabadquido abitedi nibèdquie. Ambembi chiaid niosh —quec muaposh. 7 Adshumbic Satanasèn tantiamiacpadomboen Esus tantiaquido dadpen unès uabudneposh. Adem-
 bidi matses nidaid utsi-utsiec yacno tabadquido abitedimbo ambi chiapadomboen namepòsh. —Matses icsamboshè icquid matses abitedi chuiquid dapa iquendac —quequin ushquin isac-
 bimboecnuc ismeposhi. 8 Aid caic matses abitedishun: —Nadatiambo icquid nec —
 quequin tantiaquiendac. Aid tantiaquido Esus tantiesabo nendac. Èndenquimboshè matses uabi Nuquin Papan tantiampicpadec abided cuidadec unèsaid Esusquio tantiesabo nec. —
 Adquido yec Nuquin Papan: “Èbèdi tabadmendambi,” quequin chiacmaidombo nec —
 quequin aden ismeposhi.

9 Pabiate cuembo icquin bèdamboen tantia. Esus tantiaquido icsho mibi chuinu.
 10 Nuquin Papan: —Èbi tantiaquid chieshènquin quènèn nauedquido cuidendambi —
 caindac. Esus tantiesabon Esus tantiaquido chèshten seshun secaindac. Adsho Nuquin
 Papan seshun secanquido cuidquiendac. Èbi adsho tantias mimbi nacpadequi chiesh-
 toenquio icta. Chieshtoenquio icquin Esus tantiaquin ambi chiapadomboenuidi nabanta.

Nidaid shècuènuèsh choboedtsen ismiaid

11 Adshumbic padpiden ismeposhi. Adoac aben icquidbimboecquid utsitsen nidaid
 shècuènuèsh puduensho ispombi. Obecan paisbimboec aton pais daèd icpòsh. Satanasèn
 ancanquidquio icmiacpadec dacuèdampamboec onquepòsh. Bèdambo icquid damianquien
 muaquin chuibanquidquio niosh. 12 Adsho isun Satanasèn abia chuiquid dapa icme-
 boedèn nidaid shècuènuèsh puduemboed chuiquid dapatsen icmiac abèdtambi matses
 abitedimbo ancaquin namepòsh. Aden namequin abi chuiquid dapa acte uquèducuèsh
 choboedèn chiapadomboen matses abitedi namepòsh naden chuquin. —Seshuniaid
 uincuemiondaidèn nuqui chuiquid dapan chiaiduidtsèqui natiad —capòsh. 13 Aden acte
 uquèducuèsh choboedèn abi chuiquid dapan chiaid namenuen comapenen tantiaquid
 icquin nidaid shècuènuèsh choboedèn dadpen ismepòsh. Matses dadpeshun isnubi
 abucshun ambembi taboadaid budmequin ismepòsh. 14 Aden Satanasèn namiacpadom-
 boen comapenen tantiaquin ismiac matses dadpeshun: —Abimbo caic —quequin abi
 chuiquid dapa icsamboshè icquidèn chiaid nabededpòsh Nuquin Papambo tantienquio
 icquin. Abi chuiquid tantiamequid nidaid shècuènuèsh choboedèn: —Nuqui chuiquid
 dapa uincuemiaidquio icsho tantiaquin abibimboecnuc nuamboshè icnuc nacnenta —
 cac matsesèn nacnemposh. 15 Nacnenacsho isun Satanasèn namiacpadomboen nidaid
 shècuènuèsh choboedèn abi chuiquid dapabimboecnuc nacnemboedi tibocameshun on-
 camepòsh. Adoquien nacnemboedquiobi chuiquid dapa icsabimboec onquequin: —Èbi
 tantiesabo neque. Cuesun secatan —cac yuabon abi chuiquid dapa tantiesabo cuesun
 secatampòsh. 16 Adnubien nidaid shècuènuèsh choboedèn: —Nuqui chuiquid dapan
 yuabo nuqui nec —quequin ancabudquien matses dadpenquio dada uaquin bèsiadmepòsh
 nèidtedi. Nèidic chuiquid dapabo. Nèidic chuiquidpenquio. Nèidic dadpen dayun uaquido.
 Nèidic aton na nibèdquido. Nèidic matses yuabotedi. Nèidic yuapenquio. Aidtedi matses
 dadpenquioshè dada uaquin bèsiadmepòsh. Utsi-utsien bètanteteno bèsiadmepòsh. Utsi-
 utsien mèdante abiucquio mèsiadmepòsh. —Acte uquèducuèsh choboedèn èbi chuiquid
 dapan yuabo nec —queshun namepòsh. 17 Adshumbic nidaid shècuènuèsh choboedèn
 chuipòsh. —Adec èmbi chiapadec siadambo icquido piucquidbèdta mitsana utsi
 menenda. Èmbi siadmiaduidtsèqui mene —quepòsh. Utsi-utsiec abi chuiquid icsamboshè
 icquid cuèmedquid dada uaquin bèsiadmiad nepòsh. Utsi-utsiec abi cuèmedaidbimboecquid
 naden 666 dada uaquin bèsiadmiad nepòsh. 18 ¿Ada èmbi chuiboed tantio? Bèdamboen
 tantiaquidèn: —Abi cuèmedquidquio chienquio icquin naden 666 chuiquin dada uapac
 —catsiash. —Adec matses icsamboshè icquidquio chuiquid dapa yansho isun bèdambo
 icquid danenda —quequin ushquin isacbimboecnuc aden ismeposhi.

¹ Adoshombic padpiden ismiac abided cuidadec unësaid Esusquo macuësh dapa Sion caid mananënquo tabadsho ispombi. Abëdi abi tantiaquido dadpenquo 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaqin bësëmiado niosh. —Adec Esus tantiaquido abëdi tabadadec —quequin aden ismeposhi. ² Adnubien Nuquin Papa yacnuësh *midapadpamboec cuëdtoposh?* Acte nua chododoquiabcipamboequien niacpish. Abu tesquianiabcipamboequien nechitosh. Ten-tencate dapa dadpen icbo-icboen sananquin ten-tencacpamboec comapenec cuëdëncuededposh. ³ Adec Esusbëdi macuësh mananënquo tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdta dananobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunec abided cuidadec unësaid Esus tantiaquidon matsesënuidsëqui aid cuëdënte chuca tantiec cuëdënosh. ⁴ Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatiapimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidomosh. ⁵ Chieshtoenquo icquin Esus tantiec muesabo icpanëdash. —Adquido iquendac —quequin ushquin isacimboecnuc aden ismeposhi.

Mayan bëda utsi 3tedshun chiaid

⁶ Aido ismehombic utsitsen ismiac Nuquin Papan abi yacnoshon uaid mayan bëda uicchun cuenacimboec abuc cuensho ispombi. Bënudtiapimbo icquid Nuquin Papan chiaidquido matses chuineuc niosh nëidtedi. Nëidic matsesquo. Nëidic matses utsibo. Nëidic nidaid utsi-utsiec yacno tabadquido. Aidedi chuiquin Nuquin Papan matses icsaido cuidte chuineuc niosh. ⁷ Abuc cuenquimbi chuibemposh. —Nuquin Papauidsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquido iquec,” quequin tantiata. Nëbi ambi chiaid niac-niacquido cuidquieque. Aidquido tantiata —quequin chuibemposh abuc cuenquimbi.

⁸ Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcachimboen matses utsibo abitedi Nuquin Papa tantiamenquo icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

⁹ Adnubien mayan bëda utsitsen abuc cuenoaposh. Aidënsen chuibenaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëduësh choboed tantiaquin aidbimboecnuc nacnenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiahs ambi tantiaidën chiacpadece utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. ¹⁰ Aidedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided cuidadec unësaid Esusënquo mayan bëdabobëdta isnubi adoendac. ¹¹ Ènenquo icquin adoendac. Aden Nuquin Papa chieshënquidquido tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquo icquin ademi cuidquiendac ènenquo icquin —quequin chuibemposh mayan bëdan. Aden ismeposhi.

¹² Èmbi chuiboed tantiahsun mimbi nabocpadomboembi chieshtoenquo icquin Esus tantiaquin ambi chiacpadomboenuidi nabanta. Utsibon chieshënquin: —Padi. Esus tantianda. Cueschitomane —caqui adenuidi ènenquo icquin Nuquin Papabëdta Esus tantiaquiota.

¹³ Adnubi Nuquin Papa yacnuësh comapenec onquequin chuioposhi. —Naden chuiquin dada uata. Chieshëmëncuquid: “Esus tantiec,” queshun cuesun secaido Esus tantiaquido cuishonquendac —quequin chuiposhi. Adnubien Nuquin Papan Mayanënsen: —Ai, abimbo caosh. Esus tantiaquido natiaic tabadtenedobi unësash bëdamboshë iquendac shubitiapimbo yacno tabadec. Ambi chiacpadquiec bëdamboec tabadec unësacsho Nuquin Papan aden bëdamboshë icmendac —quequin chuiposhi.

Intac nua icnuc Nuquin Papan cuidtequid chiaid

¹⁴ Adoshombic padpiden ismiac abu ushunquo Esus tsadsho ispombi. —Abitedishun Icbombo nebi —quec chuiquid dapan mauetembo shocosh nacnenaid maeshun chështebimboecquid sanamposh. ¹⁵ Adnubien mayan bëda utsin abi yacnuësh choquin

comapenec onquequin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata¹⁶—caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusèn buanendac —camenuen aden ismeposhi.

¹⁷ Adnubien mayan bëda utsi Nuquin Papa yacnuëshquibidi choposh chështebimboecquid sanampamboec. ¹⁸ Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquio icquid nidaid masiabudboedën tauite dapa dayunuëshquio choshon comapenec cuëdquin chuiposh. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando ¹⁹⁻²⁰—caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuëdaciampamboec cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesën intac chëuëdsho isombi ushquin isacimboen. —Aden Nuquin Papan abi chieshëncquido cuidendac —quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bëdabo niosh. —Aidon ambi chiapadomboen ënquimbi matses icsaido cuidsho isash Nuquin Papa nëish bëdanendac —quequin tantiaquin ispombi.

² Nuquin Papa yacnobidi chian dapa icposh. Actepenquio yec acte-actectscëcquio isadposh. —Nuquin Papa icsaquido cuidquidquio nec —camenuc tied nëdënquiacimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uguëducuësh choboedën chuiquid dapa icsamboshë icquidën: —Yuanu —cauidaido niosh. Chuiquid dapa icsamboshë icquidbimboecnuc nacenaid tantiatiapimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuëdëmec cuëdëncuededposh. ³ Nuquin Papan namiaid Moises: —Nuquin Papan nac ëbi chieshëncquidon ëbi cuesun secainquio icposh —quec cuëdëmpampicpadec cuëdëncuededposh. Nuquin Papa bëdamboen ismenuc abided cuidadec unësaidquio Esus aton Papabëdta tantiec cuëdëncuededposh naden chiec.

—Nadatiambo icquin nabanquidquio mibi nec, Papa.

Abitedimbo uaquidquio yec abitedishun Icbombo mibi nec, Papa.

Matsesën naid abitedi tantiaquidquio abimbo chuiquidquio mibi nec, Papa.

Mimbi naid bëdambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

⁴ Matses abitedishun: “Nuquin Icho dacuëdampambo icquid neque.

Ambi chiapadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiapadomboen icsaquido cuidquimbi bëdambo icquido mimbi bëdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

⁵ Adshun isquien isadaidbon: “Nuquin Papa tabadte nec,” quequin shubuampicpadquid shubu shënciacchobi icposh. Nuquin Papa tabadacnombo tantiamenuen aden ismeposhi.

⁶ Auëshquio Nuquin Papan chiapadec ëmbi isboedo mayan bëdabo 7tedi cho-choposh. Matses icsaquido cuidquido niosh aido. —Nuquin Papan yuabombo nec —camenuc dashcute nac-nacquio icquid dasiuidcuededash dashcute bëshpiu-bëshpiumbo icquid shic-tonquecuededposh. ⁷ Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacenaid icbo-icboen menebamposh. Unëstiapimbo icquidën Nuquin Papan nëishëncquioshon cuidte cushtoaid maspanëmpi niosh. ⁸ Adnubien Nuquin

Papa tabadaid nuntanuësh pushud-pushudpambo icposh. Adec dacuëdampamboecsho isash Nuquin Papa chuinuec puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadtiapimbo icquin —camenuen aden ismeposhi.

16

Maspanëmpin cushtoaid

¹ Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Mates yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

² Adoaquien abentsëcshun ambi bedboed maspanëmpin cushtoaid nidaidënshun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën nami-aidquio icsamboshë icquid tantiaquin abimbocnuc nacnenaid tantiaquido yec aton icbo cuëmëdquid dada uaquin siadmiaido icsho aden cuidposh.

³ Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacchipamboecnic intacuac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. ⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

⁶ “Ëmbi chiaid chuibanquidobëdta ëbi tantiaquido nua intac icnuc chieshëmënuquidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

⁷ Aden acte dayun uaquidën chuisho tantiaquin Nuquin Papa tantiaquin nëish pichicate dapa yacnuëshquio utsi cuëdsho. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

⁸ Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadecc matses baded-badedquieuc ushën pichiebudneposh. ⁹ Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadecc bëdamboec tabadnuna —quetiadquidëmbi chieshënuquin abi cuidquidquio Nuquin Papambo chushcabededposh.

¹⁰ Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiadobëd tabadacno chiuimbenequin. Adoaquien inchëshposh inchëshquio yec. Badiadenquio icposh. Adsho isash matses abitedi natiambo dacuëdcededposh. ¹¹ Adec dacuëdcededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadecc tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

¹² Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenequin aden acte uesadmeposh.

¹³ Adec aid matses cho-choabi icnuc ushë choacmishun cho-chometequidëmpi naden ismeposhi. Coqeshbimboecquid podobitsi icsa 3tedi ana shëcuënuësh cho-chosho ispombi. Nëdic nisi dapabimboecquid Satanasën ana shëcuënuësh choquid. Nëdic acte uquëducuësh choboed chuiquid dapa icsamboshë icquidën ana shëcuënuësh choquid. Nëdic nidaid shëcuënuësh choboedën Satanasën muauamequin oncameboedën ana

shëcüënuësh choquid. Aidedi chosho isombi. ¹⁴ Satanasèn yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. —Aidon namiac chuiquid dapabo abitedi aton yuabobëdi tsidadash ushë choacmiüëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuen mayan bëdan aden ismeposhi.

¹⁵ Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yachimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiachimboec icta ëbi cainec —queposh Esus.

¹⁶ Adnubimbi coqueshimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷ Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh. ¹⁸ Adnubien abu bed-bedquetanepamboec abu tesquianenuec natiamboshë shëc-shëcqueamboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. ¹⁹ Adnubien matses dadpen yacno Babidonia caid yacnuësh nidaid abichobi ichoedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquiosh. Adec nidaid uëdëquenubi nidaid utsi-utsien yacno shubu dadpen icquid yacno-yacnomboec shubu abitedi uesadec chimeshadbudneposh. ²⁰ Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. ²¹ Abucüëshquio ue dapa choachimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isachimboecnuc aden ismeposhi.

17

Chido chishpidabimboecquid ismiaid

¹ Adshumbic maspanëmpin icquid chiuimboedën abentsëcshun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquendac,” quequin mibi ismenu. ² Aido icsamboshë iquec. Matses utsi-utsien abi chuiquid dapabobëdta uisma uanten danoshcacimboen Nuquin Papambo tantiamenquio icquin ambi chiaid niac-niacmequiosh. Aido cuidsho isec cho —queposh.

³ Adshumbic ushquin isachimboecnuc ismeposhi. Nuquin Papan Mayanën tantiamiac masiuidquio yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquio iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducüësh choeboed chuiquid icsamboshë icquidquio nec —quequin aden aben icquid ismeposhi. ⁴ Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquio icquid chedo payuec aïdbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquidquidquio icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcacimboen: “Nuquin Papa caid nibëdquiec,” quequin tantiamequin matses utsibo dadpenquio icsamequiendac —camenuen aden ismeposhi. ⁵ Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadmequido nec —quequin dada uaid icposh. ⁶ Aid chido paëmbo icquid acachimboec Esus tantiaquidon intac acash tantiadenquio yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquibi.

⁷ Abdudquioshobini aid mayan bēdan: —“Tantiadenquo iquec,” ¿queta ique? Tantia. Chido chishpidabēda abi catsadaid aben icquid chuinu. ⁸ Mimbisboed aben icquid icsamboshē icquid ictenedi nēbi nibēdec. Yuecshun Satanasēn abi tabadacnoshon padpiden chomendac. Adoacsho yuecshun Nuquin Papan chian anēdēnquiacno nēsecaindac. Aden cuidabi Satanasēn chomebocsho isun Nuquin Papa tantiesabon: “Comapenen tantiaquidien nechitec. Matses nibēdanēdaid uincuenashien choachitosh. Aidi tantianu,” caindac. Matses uabi icquin Nuquin Papan: “Ēbi tantiaquido iquendac,” cacmaidonquido adoendac —queposh mayan bēda.

⁹ Adshumbic padpiden chuiposhi. —Tantia. Ēmbi chuiboed bēdamboen tantiamenuen chuinu. Naden tantiamenuen aben icquidēn mapi 7tedi icquid mibi ismiombi. “Babidonia caid yacno matses icsa uaquido tabadacno macuēsh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰ Aid chuiquid dapabo 5tedi nibēdnubi utsi abi iquec. Nēbi aidēn aton matses namec. Utsitsen choendac. Choshon aton matses nametantsequi badedquo nibēdanendac. ¹¹ Nibēdanēdaid choashic ēmbi ismeboed acte uquēducuēsh choboed chuiquid dapa icsamboshē icquidquido iquendac. Aidēn ēmbi chuiboedo chuiquid dapabo 7tedishun namiacimboen aton matses icsamboenshē namendac. Adoacsho isun Nuquin Papan icsaido cuidquiacno nēsecaindac —queposh mayan bēda.

¹² Adashic abi onquec: —Naden tantiamenuen aben icquidēn pais 10tedi icquid mibi ismiombi. Chuiquid dapa utsibo 10tedi iquendac. Nēbi aton matses namiabi iquec. Padabi. Adquido yanendac. Satanasēn acte yacnuēsh choboedbēda chuiquid dapabo icmiac matses icsamboenshē namiash yuec tabadabi badedquo nibēdanendac. ¹³ Nibēdanabi icquin aidon acte uquēducuēsh choboed abi chuiquid dapambo icmendac. “Aidēn namiac abi tantiaquidobēda Esus nuquitedishun cuesun secatsiac nibēdquo icnuc,” qeshun aden icsamboshē icquid abi chuiquid dapa icmendac. ¹⁴ Aden Esus chieshēnquidon: “Chieshtomenu,” cac Esusēn yuaido abi tantiaquidotedi chieshtoenquido iquendac. Aton Icho Esusēn abided ciudadec unēsaidēn namiac chieshtoenquido iquendac. Aden abi tantiaquidobēda chieshēnquin cuesun secanuec cho-choshō isun Esusēmbi cuesun secaindac. “Ēbien matsesēn Ichombo nec,” quetanquin adoendac —queposh mayan bēda.

¹⁵ Adashic padpidec: —“Nidaid utsi-utsiec yacno tabadquido dadpenquido Babidonia caid yacnocquidon icsamendac,” quequin tantiamenuen chido chishpidabimboecquid acte dapa bēntse tsadsho mibi ismiombi. ¹⁶ Aden Babidonia caid yacnocquidon nasho isun mimbisboed chuiquid dapa icsamboshē icquidēn abēdan chuiquid 10tedi icquidbēdan Babidonia caid yacnocquido chieshēnendac. Aden chieshēnquin cuesun secatanquin shububēdtabi nēdēncaindac nibēdquiecnuc. ¹⁷ “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquēducuēsh choboed chedo chuiquid dapabo icmendac. ¹⁸ “Matses utsi-utsien chuiquid dapabo aton matsesbēdtabi yuaquid abi iquec,” quequin mibi chido chishpidabimboecquid nēbi ismiombi —quequin mayan bēdan chuiposhi.

18

Nuquin Papan Babidonia caid yacnocquido cuidaid

¹ Aden Babidonia yacnocquido cuidte chuisho tantiaboshombic mayan bēda utsi Nuquin Papa yacnuēsh abucuēsh budsho ispombi. Nuquin Papan icmiacpadquid mayan bēdabo chuiquid dapa yec bēchamauanquiecposh. ² Choshombic nua cuēdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibēdquiecnuc abi tabadtenecnombo podobitsiuidpambo tabadendac. Ambobidi edesteuidquido tabadendac. ³ Babidonia caid yacnocquidon matses utsibo abitedimbo abi chuiquid dapabobēda Nuquin Papa tantiamenquido icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquido icposh. Adsho Nuquin Papan cuidquiendac —quequin mayan bēdabon chuiposhi. ⁴ Adnubien Nuquin Papa abucuēsh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobēdi icsasho ēbitsen cuidquionoshe,” qeshun aidon namiacpadomboen nainda. Auēshquio niqueta —qesho tantiombi. ⁵ Nuquin Papa yacnoshombidi utsin chuiposh. —Ēnēdenquido yec icsauidequi icsho isun ambi tantiacpadomboen Nuquin Papan cuidquiendac. ⁶ Babidonia caid yacnocquidon matses utsibo dadpenquido icsamequioposh. Aden icsamequido icsho Nuquin Papan nēbi nēishquioshon uesquin cuidquiopashun —queposh mayan bēda. ⁷ Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquido bedash: “Aidtedi dayun uaic bēdambo iquebi,” quepec Nuquin Papan cuidte tantienquido yequi. Adsho tantiaashun: “Natiambo icnuc comapenen cuidquiopashun,”

caimbi. Otacquo tantiec: “Nuquin matses yuabo dadpen icnuc nuqui bédamboec tabadec. Chido niantè bènè unèsaid mèyadacimboc mèyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatipimbo yec. ⁸ Adsho ambi: “Nèbi èbi cuidec,” cacmaidènquo cuidendac. Nuquin Papanquo abitedishun Icbombo icquin comapenen tantiaquin nacnenquidquo icquin badedquo cuidquiendac. Aden dadpenquo unès uabudniacsho isash natiambo sedenqueuedendac. Aton pete nibèdquecnu natia bunendac. Aton shububèdi dadpenquo nédènquendac —queposh mayan bèda.

⁹ Adashic abi onquec: —Adec Babidonia yacnuèsh nédènquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabedendac. ¹⁰ “Tantia. Nuqui tantiaido sidquebudneque,” quec uinte paèdtampamboec dacuèdtanash uanoshon isec tabadendac. Adec tabadec: “Aido unèsquimboshè iquec. Aton matses aton yuabobèdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unèsquimboshè iquec. Badedquo uesquin cuidquiopac,” quec sedenqueuedendac Babidonia caid yacnocquido tantiec —queposh mayan bèda.

¹¹ Adashic abi onquec: —Babidonia caid yacnocquido aden cuidacsho isash utsibotsen: “Èmbi meniaid bedshun piucquid dadpen menedenebi. Nèbi adquid nibèdquec. ¿Tsuntsimbini èmbi meniaid cuidquin piucquid menepatsiashba?” quec sedenqueuedendac. ¹² Aidobidi: “Nadquid Babidonia caid yacnocquido menequin piucquid dadpen bedtenembi. Nèdic shocosh piu. Nèdic shocoshquo. Nèdic casèdubimboecquid cuènote bédambo icquid. Nèdic dashcute bédambo icquid. Nèdic dashcute piumbo icquid. Nèdic dashcute umumbo icquid. Nèdic sèntebimboecquid nacnenaid. Nèdic aben icquid edepanten shèta nacnenaid. Nèdic cuète utsi bèdaidquo nacnenaid. Nèdic shocosh utsi nacnenaid. Nèdic cuènote nac-nacquo icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³ Utsitsen dadpen bedpadenec. Nèdic batambo icquid sabimboecquid. Nèdic bédambo nuadte. Nèdic bédambo nuadec danoshquete. Nèdic acte paèmboc icquid. Nèdic bèchi. Nèdic pan nacnentequid. Nèdic nèish yua baca caid. Nèdic nèish yua utsi obeca caid. Nèdic nèish yua cabayo caid. Nèdic matses antsadsho cabayon nimbanquin buante. Nèdic ambi chonoo uatequido matses ambi ampequin bedaido dadpen. Babidonia caid yacnocquidon aidtedi dadpenquo bedtenesho aton piucquid dadpen bedpadenembi,” quependac nidaid utsi-utsiec yacno tabadquido —queposh mayan bèda.

¹⁴ Adashic abi onquec: —Abi piucquid menedenedèn dayun uaid nibèdanesho isash: “Aid matses bunaidquo ambi dayun uaid pete nibèdquec. Ambi dayun uaid dashcute bédambo icquidbèd aton na utsi dadpen abitedi nibèdquec,” ¹⁵ quish natiambo dacuèdec uanoshon isec tabadec sedenqueuedendac abi piucquid menedenedo tantiec. ¹⁶ “Aid matses tantiac unèsquimboshè iquec. Matses dadpen yuaquin matses dadpen namepadenec. Aton matses dashcute bédambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casèdubimboecquid shocosh piu nacnenaid payudenec. Utsibic casèdubimboecquid utsi payuec mèsiuidtenec. Adec: ‘Con na dadpenquo icnuc bédamboec tabadebi,’ quepadenec Babidonia caid yacnocquido. ¹⁷ Adsho isun Nuquin Papan abi ushèmbi cuidquiac ambi dayun uaidbèd aid matses badedquo nibèdanac,” quec sedenqueuedendac abi piucquid menedenedo tantiec. Adecbidi nidaid utsin icquidotsen sedenqueuedendac. Nèdic cano dapa dancha icbo. Nèdic dancha icbobèd nidquido aton yuabo. Nèdic icbo piucquid meniash dancha antabèdtoquido. Nèdic nuècquid bedshun piucquid bednuen menequido. Aidtedi uanoshon isec sedenqueuedendac. ¹⁸ Nédènquec pushudtonesho uanoshon isash: “Adquido utsi nibèdec,” ¹⁹ quish natiaquec sedenqueuedendac. Adec shubiec: “Èbipadquid dancha icbon bèaidtedi bedshun piucquid dadpen menedenedo tantiac unèsquimboshè iquec. Is. Cuidquiac badedquo nibèdanaque,” quec sedenqueuedendac —queposh mayan bèda.

²⁰ Adashic mayan bédabidi: —Èbien cuishonquendac. “Nuquin Papa yacno tabadquidotsen èbèdi cuishonque,” quequin chiendambi. Esus tantiaquido chuiquinc Esusbèd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshènquin natiamiacpadomboen mibi chieshènquido Nuquin Papan uesquin cuidquioshe,” quequin chiendambi —queposh mayan bèda.

²¹ Adnubien mayan bèda utsin uidènquo icquidènquo nidaid moco nuacquid dapa yuèmboshè icquid cadotanquin acquimboen acte nènebidanquimbi chuiposh. —Èmbi acquimboen nènebopadomboen Nuquin Papan Babidonia caid yacnocquido uesquin cuidquidac nibèdquecnu. ²² Adoac aido ictenecnombo nadimbo iquendac. Tentencate ten-tencainquo iquendac. Utsibobic cuèdènquo iquendac. Utsibombic shoncate

shoncainquo iquendac. Cuëte chëshun nacnenenquo iquendac. Piacbo macuesenquo iquendac. Nadimboshë iquendac. ²³ Tabote taboadaid nibëdendac. Dada aton chido ambi nëbi bedaidbëdi mamënenquo iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiaequin icsamepadenec,” quendac. ²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënuquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bëda.

19

Chieshënuquido cuidacsho isash cuishonquaid

¹ Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquo Esus tantiaquido dadpenquioshë comapenec cuëdëncuededposh.

—Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided cuidadec unësaid tantiaasho matses bëdamboen isec.

² Muesambo icquin ambi chiacpadomboen naquidquido nec.

Abi tantiesabo ënëdenquo yec icsauidequi icsho cuidquidquido nec.

Adquid icquin: “Icsamboshë iquec,” quequin matses utsibo icsamequido Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh

—quec cuëdëncuededposh.

³ Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdënaquin Babidonia caid yacnocquido uesquin cuidquioshe

—quec cuëdëncuededposh Esus tantiaquido dadpenquioshë.

⁴ Adsho tantiaash Nuquin Papa chuiquid dapan tsadten tsadnuc abi dacuenadec tabadquido: —Nuquin Papa Nuquin Icbo nec —quequin ismenuec danëshën tinquebudcuededposh. Adec tinquebudcuededequi: —Abimbo caic. Nuquin Papa bëdambo iquec —quecuededposh dadanobi ëshëcquido 4tedi icquido tsusiobo 24tedi icquidobëdi. ⁵ Adashic auëshquiobidi abentsëc cuëdposh.

—Nuquin Papa matses uaquidquido yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna

—queposh.

Esusën abi tantiaquido beduante chiaid

⁶ Adsho tantiaash abu tesquianiabimboec acte nua chododoquiacbimboec Nuquin Papa yacnocquido dadpenquo cuëdëncuededposh.

—Abi chieshënuquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

⁷ Nuquin Papa tantiecuishonquenuna. Nuquin Papa bëdamboshë iquec.

Dadan aton chido buntacquo beduanachimboen abided cuidadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacnemëdquiacbimboec: “Nëbien con Icbo chochitec,”

quiash Esus tantiaquido bëdamboec tabadec.

⁸ Abi tantiaasho Nuquin Papan bëdamboen isaido yec abi icsaid ënash:

“Nëen con Icbo chochitec,” quiash bëdamboec tabadec.

Aden abi tantiaasho Esusën dashcute chuca ushumbo icquid dasiunacimboen abitedi icsaisa icmendac

—quec comapenec cuëdëncuededposh.

⁹ Adnubi mayan bëdan chuioposhi. —Ëmbi chuibocpadomboen dada uata. “Isadaidbo aton chido bedquin aton matses cho-chomiash pemec bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuishonquequiecc tabadendac,”

quequin dada uata. Abimbo caimbi. Nuquin Papan chiaidquio chiec nebi —queposh mayan bêda.

¹⁰ Adsho tantiashini Nuquin Icho danec ismenuec danëshën tinquebuduidpoc. Adshobini: —Ëbi aden ismenda. Nuquin Papauidsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobêd Esusën yua nebique. Ëbi aden ismenda —queposh mayan bêda.

Cabayo ushu catsadquid bêdamboshë icquid

¹¹ Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobêd cuëshëdtiapimbo icquid yec ambi chiacpadomboen naquidquio Esusquio nec —quequin tantiombi. Ambi chiacpadomboen icsaido cuidquidquio icquin icsaido cuesun secanuec niosh. ¹² —Matsesën ompodëmëdtiapimbo icquidquio nec —camenuc cuëte isquidquio icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bêdada uadaid tantiadenquio icposh. Utsibon tantiatiapimbo icnuc ambentsëqui tantiate niosh. —Nuquin Papabêdtan Esusën naidtedimbo matsesën tantiatiapimbo iquec —camenuc aden ismeposhi. ¹³ Abi cuëmëdquid utsiembi tantiatsëccoc. —Nuquin Papapadquidquio yec abi tantiamanquid nec —quequin cuënaid niosh. Aton dashcute bëntse icquid cuidaidën intaquën punacimboec piumboshë isadposh. —Abi tantiesabo cuidquidquio nec —camenuc aden ismeposhi. ¹⁴ Esus bëyuc nidnuc abi tsibanec abi tantiaquidobêd mayan bêdabo cabayo ushucquidquidquio catsadcuededec cho-choposh. Icsaisa icmiaido yec dashcute ushumbo icquid bêchish nibêdquidquio dasiuidcuededposh. ¹⁵ Abi bëyucquid ana shëcuënuëshquio chështe cuënumbo icquid cueshqueposh. —Ambi chiacpadomboen matses icsaido abitedi cuidquidquio Esus nec —camenuc aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ënë icnuc tish-tishacimboen nua intac icnuc cuesun secaindac. ¹⁶ Aton dashcute bëntse icquidën abi cuëmëdquid utsi dada uaccosh. —Abipadquid utsi nibêdnuc abitedimbo chuiquid dapambo yec abitedishun Icombombo nec —quequin dada uaccosh. Aton bëusudquid yacnombo adembidi dada uaccosh.

¹⁷ Adnubien ushë mëducquio tabadquin mayan bêda utsin edeste chedo abuc cuen-cuensho comapenec cuëdquin chuiposh. —Nuquin Papan cuidquin cuesun secaidon nami chec cho-cho. ¹⁸ Ëmbi chiacpadec cho-choshon matsesën nami mimbi nua tēpuisquin chendac nëidtedi. Nëidic matses utsi-utsien chuiquid dapabo. Nëidic sondado chuiquid dapabo. Nëidic dada cuesabo. Nëidic cabayo chedo abi catsadquidobêdtabi. Nëidic matses utsibo abitedimbo. Nëidic matses yuapenquio. Nëidic matses yuapenquio. Nëidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

¹⁹ Adshumbic mayan bêdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobêdta cuesun secanu —caqui ²⁰ cuesun secadenquio icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiacpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabêdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh. ²¹ Adshumbic Esusën ana shëcuënuësh chështe cuënumbo icquid cueshquequidën: —Ëbi chieshënuquidotedi unësta —caquin cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënuquido nibêdamendac —camenuc aden ismeposhi.

¹ Adshumbic padpiden ismeoaposhi. Adoac mayan bëda utsi Nuquin Papa tabadac-nësh budsho ispombi. Podobitsi icsabo Satanasën yuabo shëcuën tabadacno bêtashaid chictëbëdta shocosh bucubimboecnuc nacnenaïd dapa sanamposh. ² Adshumbic Eba icsamenuc nisipampid Satanasquïo bedposh. Bedtanquimbic shocosh bucubimboecnuc nacnenaïdën ambi sanamboedën uidën uaposh. ³ Uidën uatanquimbic aton yuabo uidën uacno shëcuë aneposh. Adotanquimbic shëcuë bêtashquioposh puduentiapimbo icnuc. Seta dadpenquïo 1000tedi matameshun bêtashte chicshun Satanas cuemenuen adoposh. — Aden seta 1000tedi matamiabi icquin abi uidën uactedembi matses muauaquin icsame-tiapimbo iquec —qeshun chicten bidiacquin uidën uaquioposh. Aden ismeposhi.

⁴ Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquïdo neposh. Aïdo Nuquin Papan icmiacpadquid abimbo chuiquïdo icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aïdo utsi-utsien mapi butiaïdo uincuemiaïdo neposh. Aïdo Esus tantiaquin acte uguëducuësh choboed chuiquid dapabëdta abibimboecnuc nacnenaïd tantiapimbo icquïdo neposh. Adecbidi: —Aïdën yua nebi —quec aid chuiquid icsamboshë icquid cuëmëdquid dada uadec bësiadiapiimbo icquïdo nïosh. Utsibic mësiadiapiimbo icquïdo nïosh. Adquïdo icsho icsamboshë icquïdon cuesun secaido nïosh. Aïdo Nuquin Papan uincuemiac tabadposh. ⁵ Unësaidotedi uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. ⁶ Adnubien tauaquin uincuemiaïdo bëdambo yec chuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “‘Esusbëd Nuquin Papa bëdamboshë iquec,’ canuna,” quequin chianequid nendac. Aïd seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

Satanasquïo chian anëdënquequid nëniaïd

⁷ Adshumbic aïdteduïdo seta 1000tedi matameshun uidën uaid chicquin Satanas cuemendac. ⁸ Adoacquien matses icsamenuc muaquin chiec nidaïd utsi-utsiec yacno niden-dac. Aden aïdën muquin namiaquien matses dadpenquïo Esus chedo cuesun sianuec tsidadendac. Nëidic nidaïd Coc caïd yacnocquïdo. Nëidic nidaïd utsi Macoc caïd yacnocquïdo. Nëidic matses utsibo abitedi cuëte podotedi dadpenquïoshë.

⁹ Aïdtedi tsidadash cho-choash Esus tantiaquïdo tabadacnombu Nuquin Papan tantiac-nobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. ¹⁰ Adshumbic aïdo icsa uamequidtsen Satanasquïo bedshun acte uguëducuësh chondaid chuiquid icsamboshë icquidbëdta nidaïd shëcuënuësh chondaid ënden nësecaondacnombu chian anëdënquequid Satanastsen nënendac. Adoac aïdo ënëdenquïo yec natiamboshë iquendac. Aden ismeposhi.

Icsambo icquïdo cuidte chiaïd

¹¹ Adshumbic padpiden Nuquin Papan matses cuidte ismeposhi. Adoac tsadte nu-acquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquïn Nuquin Papan icsambo icquïdo cuidendac —camenuc adec tsadposh. Icsambo icquïdo cuidquidquïo yec dacuëdampamboecshë Nuquin Papa isadnuc abubëdi nidaïd abichobi nibëdanaccosh padpidec isadiapiimbo yec. ¹² Nuquin Papa yacno unësaïdo uincuemiaïdo abitedimbo tabadposh. Adnubien bëshunenquïo icquin dada uaten dada uabanacnimboen Nuquin Papan abitedi tantiaquid icquin matsesën naidtedi abimbo chuibamposh cuidnombi. Abi tantiaquïdo abëdi tabadmequimbï abi tantiesabo comapenen cuidnun aden chuibamposh. ¹³ Unësaïdo abitedi icposh. Utsi-utsiec unësaçsho chian dapa mad caïd nëniaïdo uincuemiaïdo nïosh. Utsi-utsiec nidaïdën chococaid uincuemiaïdo nïosh. Adsho aïdon naidtedi Nuquin Papan chuibamposh. ¹⁴⁻¹⁵ Adshumbic Esus tantiesabo icsho documento nibëduidbimboecsho abi yacno tabadmenquïo icquin chian dapa anëdënquequid uesquin nësecabamposh. Aden Esus tantiesabo nësecan unëstequïdo utsibo nibëdposh. Esus tantiesabo aton dada unësan abi tantiate tabadacno utsibo tabadenquïo icposh. Adnubien Esus tantiaquïdo Nuquin Papa yacno tabadec unëstiapimbo icquidquïdo icposh. —Adquid iquendac —quequin aden ismeposhi.

21

Nuquin Papabëd tabadaïdquïo

¹ —Esus tantiesabo chian anëdënquequid nësecaindac —quequin ismëboshombic padpi-den ismeoaposhi. Adoac abu chucambo icsho ispombi. Nidaïdtsen chucambo icposh. Abubëdi nidaïd shëni nibëdnuc utsi chucambo icquidquïdo icposh. Ënden iccondaid

chian dapa mad caidtsen nibèdposh. ² Adnubien Esusbèdi Nuquin Papa tabadaidquio abichobi Edusaden chuca caid abucüesh budposh. Chido nèbi bedboedèn aton bènè cuishoncamiachimboec cuishoncamiachquid yec bédamboshè icposh. ³ Adnubien Nuquin Papa tsadacnüeshquio comapenec cuèdposh naden chiec. —“Con mates nec,” quiaish nèbi Nuquin Papa matesbèdi tabadendac cuèshèdenquio yec. Adsho isun aton yuabo icquin mates abitedishun: “Nuquin Icbombo nuqui tantiaidquio nec,” caindac. ⁴ Ambo Nuquin Papan abitedi chuca uacnombo aibdèdi tabadec mates shubitiapimbo iquendac bèun ucacimboc. Nidaid shènin tabadec abitedi unèstequiduidquio icboedi Nuquin Papa yacnüeshien mates unèstiapimbo iquendac. Adecbidi sedenquetiapimbo iquendac. Adecbidi paèmbu ictiapimbo iquendac —queposh Nuquin Papa yacnüesh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindami bédamboshè icnuc —queposh Nuquin Papa Esusbèdi. Adshumbic èbi chuiposh. —Èmbi aden chuiboed dada uata. Èmbi muesambo icquin abimbo chiaid nec —queposh Nuquin Papa Esusbèdi.

⁶ Adashic Nuquin Papa padpidec onquec: —Èmbi chuiboetedimbo nainquin naindami utsibon: “Padi,” catiapimbo icnuc. Èndenquimboshè nidaid uabi ictenedi nebi. Nèbi adquid yec nibèdantiapimbo icquid nebi. Adquid yec abitedishun Icbombo icquin èmbi tauaidtedi naindami. Adquid icquin acte bunacimboc èbèd tabadte bunquidon con Mado Esus tantiaisho èbèdi tabadmendambi. ⁷ Satanasèn: “Chieshtomenu,” cauidaido Esusbèda èbi chieshtoenquio icquin tantiaquido èbèdi tabadmendambi bédamboshè yacnombo. Èbi papa casho: “Ai, con mado mibi nec. Con champi mibi nec,” caindami. ⁸ Adshumbic utsibo chian dapa anèdènquequid icsamboshè nuadquid nèsecaindami. Nèidtedi icsamboshè icquido adoendambi. Nèidic èbi bèdiactèc tantiauidtsècboedobi chieshèmènquidon: “Cuesnu,” cac chieshtoash tantiesano yanoaido. Nèidic Esus tantiesabo abitedi. Nèidic icsamianquido. Nèidic chieshèmènec cuesunianquido. Nèidic dada aton dada utsibèdi chichudnanquido. Nèidic aton chidopenquio chudquido. Nèidic aton bènèpenquio chudmequido. Nèidic nènèchiquidobèdtabi cuète podon unès uante bunquido. Nèidic ambi nacnenaidi papa caquin tantiaquido. Nèidic muauanquido. Aidedi chian dapa anèdènquequid nèsecaindami —queposh Nuquin Papa.

Abi tantiaquido Esusbèd icte chiaid

⁹ Adnubien mayan bédan Nuquin Papan mates cuidte cushtoaid chiimboed abentsèc choshon chuioposhi. —Isec cho. Chido nèbi bedboedèn aton bènè cuishoncamiachimboen abided cuidadec unèsaid Esus cuishoncamequido tabadaid mibi ismenu. Cho —caposhi Esus tantiaquido ismenuen. ¹⁰ Adshumbic Nuquin Papan Mayanèn tantiamiac ushqin isacimboc isombi. Mayan bédan èbi buanquin ispombi. Aden buanshun macuèsh dapa mananènquio tsadumposhi. Adoac anoshon isquien abucüesh Nuquin Papa abi tantiaquidobèdi abi tabadaid abichobi shubu dadpen icquid budposh. Aid tabadaid Edusaden chuca caposh. ¹¹ Aid tabadaidquio aid shubutedi Nuquin Papa tabadaid yec abi yacpadquio abichobi bèchamauanquieposh. Casèdu bédambo icquidimboc isquid-isquidquio isadposh. ¹² Shubu abitedi nènantan icnuc abichobi daquènè uaid icposh. Abucquio icnuc daquènè uaid niosh. Daquènè uaid puduedte shècuè 12tedi icposh. Aid shècuè icbo-icboen isquid yec mayan bédabo 12tedbidi icposh. Aid shècuè bétashte 12tedbidi icposh. Aid bétashten Acobon mado cuèmedquid 12tedbidi dada uabampaccosh naden. Bétashten Acobon mado Ose cuèmedquid dada uatanquin bétashte utsin Acobon mado utsi Uda cuèmedquid dada uatanquimbic adenuidi bétashten bétashtenquien Acobon mado cuèmedquid cuèmedquidquien dada uabampaccosh. ¹³ Aid daquènè uaid puduedte shècuè ushè choauc 3tedi icposh. Ushè nibèdauc nodte yauc aidtedbidi shècuè icoaposh. Ushè nibèdaucbidi sud yauc aidtedbidi shècuè icposh. Ushè budac aidtedbidi shècuè icposh. ¹⁴ Ambo tauaquin daquènè uadoquin nidaid cuènote nuamboshè icquid dapa 12tedi bedshun Esusbèd icquido èbitedi cuèmedquid 12tedi aid cuènote dapan abentse-abentsen dada uabampaccosh naden. Cuènoten èbi cuèmedquid Uan dada uatanquin cuènote utsin Petedo cuèmedquid dada uapaccosh. Adenuidi cuènoten cuènotenquien Esusbèd icquido cuèmedquid cuèmedquidquien dada uabampaccosh. Adoshombic nidaid uèdèshcabanshun tauaquin sandoshon cuènote utsi tsindoaaid aid daquènè uaid niosh. —Esus tishabi icnuc Nuquin Papa tantiapampidobèdi Esus tantiaquido Nuquin Papa yacno Esusbèdi tabadendac —quequin tantiamenuen Acobon mado cuèmedquidotedi dada uaidbèda Esusbèd icquido cuèmedquid dada uaid aden ismeposhi.

¹⁵ Adshumbic èbi chuiboedèn mayan bédan shocosh bèdaidquio nacnenaid tambante sanamposh. —Nuquin Papa tabadacno tambanquin daquènè uaidbèdtabi puduedte shècuètedi tambanten tambanu —queposh. ¹⁶ Adoshombic cuèma abitedi tambanac cuèma tiombi-tiombimboec icposh. Cuèma auc abentsèc tanac quidometedos 2,200ted cactimbi

iccosh ènapenquioshè. Aidtionuidi iccosh cuèma abitedi. Adoshombic abuc yacmi cuembotsen tanac aidtionquiobidi icposh. ¹⁷ Nidaid cuènote nuamboshè icquid dapa tsindoquin daquènè uaid bitsipambo icquidtsen tanac nuamboshè bitsi icposh. Matsesèn nacenaid tambanten tanac metedos 65ted cactiombi icposh nuamboshè bitsipambo.

¹⁸ Daquènè uaid abichobi isquid-isquidquo isadposh. Bèdamboshè icposh. Padnuen shubu abitedi shocosh bëshpiu-bëshpiuctsècquid nacenaiduidquo yec nac-nacquio icposh. ¹⁹ Aid daquènè uaqin tauaqin sandoaid nidaid cuènote dapa casèdubimboecquid bèdambo icquid matses comapenec bunaidquo utsi-utsien dabitaccabanaid niosh. Abentsèc aspe caid umu-umuboctsècquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. ²⁰ Utsibic onise caid piumbo icquid. Utsibic conadina caid piu-piupactsècquid. Utsibic quidisodito caid bëshpiu-bëshpiupactsècquid. Utsibic bedido caid umu-umupactsècquid utsi. Utsibic topasio caid piu-piupactsècquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidedti dabitaccabanaccosh. —Nuquin Papa yacnombo bèdamboshè iquendac —camenuen aden ismeposhi. ²¹ Daquènè uaid puduedte shècuè 12tedi icposh. Aid bêtashtetedi acte chiumbimboecquidèn casèdu ushu uaid nuacquin dapambo abichobi-abichobien nacenaid niosh. Ambo shubu dadpen icquid nènantanquo podqued icposh. Aid podqued shocosh bëshpiu-bëshpiuctsècquid actectetsècquio icnuc mabiunaid icposh. —Esusbèd Nuquin Papa tabadacnombo bèdambo icquiduidquo iquendac —camenuen aden ismeposhi.

²² Ambobi abi bèisec tabadacnombo Nuquin Papa tabadte shubu uashunaid nibèdposh. Ambo Nuquin Icho Esus abided ciudadec unèsaidbèd Nuquin Papa icsho bèisiquioquin tantiec anocquido tabadendac. ²³ Ambobidi inchèshstanec badiadenquo iquendac. Badiadèn ushè isadenquo iquendac. Inchèshèn ushètsen isadenquo iquendac. Nuqui icsaid bedshunuec abided ciudadec unèsaid Esusbèd Nuquin Papa bèchamauanquieccquid icquin ambo ushèmbouidi icmendac. Inchèshaid tantiaidenquo iquendac. —Nuquin Papa icsaisambo icnuc abi yacno icsaido nibèdquo iquendac —camenuen aden ismeposhi. ²⁴ Icsaisambo icquin Nuquin Papan tantiamiac matses utsi-utsiec abi chuiquid dapabobèdi Esus tantiaquido yanendac. Adash Nuquin Papa yacnombo quenenecc tabad-cuenash: —Esusbèd Nuquin Papa abitedishun Icbombo nec. Abipadquid utsi nibèdec —quendac. ²⁵ Nuquin Papa matsesbèdi tabadacnombo inchèshenquo icnuc: —Icsambo icquido puduednushè. Bètashnu —quetiapimbo icsho isun daquènè uaid shècuè bêtashenquo iquendac. Shècniacchobi iquendac. ²⁶ Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daèdpactsèc tantiaquin matses daèdpactsèc namebampadenembi. Nuquin Papa aton Mado Esusbèdi comapenen tantiaquidquo yec abitedishun Icbombo nec. Abipadquid utsi nibèdec —quendac abitedi. ²⁷ Ambo icsambo icquid puduedtiapimbo iquendac. Adecbidi omposhon abi bunaiduidi naquidobèd muaquido puduedtiapimbo iquendac. Nuquin Papan bëshunenquo icquin dada uacimboen: —Icsambo icboedi abided ciudadec unèsaid con Mado Esus tantiaquido aido nec. Con bacuèbo nec —capendac. Aden ambi con bacuèbo caido abi yacno puduedendac. —Nuquin Papa yacno adquo bèdamboshèuidquo iquendac —quequin aden ismeposhi mayan bèdan.

22

Nuquin Papa yacno acte ismiaid

¹ Adshumbic aid mayan bèdan tsapden ismeoposhi. Adoac Nuquin Papa abided ciudadec unèsaid aton Madobèdquo tsadte dapan tabadacnuèsh matses unèstiapimbo icmete-quid acte bèdambo icquid nushan nibèdquidquo chèuèdsho ispombi. ² Nuquin Papa yac-nuèshquo choec chèuèdec ambo tabadquido Esus tantiaquido tabadaid shubu nènantanquo chèuèdposh. Aid cuèmambi matses unèstiapimbo icmete-quid cuètetsen icposh. Baded-badedquiecc bacuèquidquo niosh. Inchèshèn ushè choan-choanquiecc badedquio bacuèquid niosh. Aid cuète podo nidaid utsi-utsiec yacno tabadquido bèdambo icmete-quid niosh. —Aton Mado abided ciudadec unèsaid tantiaquido abèdi tabadmequin Nuquin Papan unèstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abèdi tabadmequin Nuquin Papan daicsabudtiapimbo icquid icmendac —camenuen cuète aton podobèdta ismeposhi. ³ Aden abitedi bèdambo icmiac cuidtequido nibèdquo iquendac. Icsambo icquido nibèdnuc Nuquin Papa aton Mado Esusbèd tabadac-noshon aid daèdi tantiaquiecc Esus tantiaquido tabadendac. ⁴ Adec: —Con bacuèbo nec —quequin Nuquin Papan abi cuèmèdquid dada uaqin bèsiaidon Nuquin Papambo bèisquiecc

tabadendac. —Nidaidën tabadec bédamboec tabadquido Nuquin Papabéd tabadec abipadquido bédamboshë yanendac —camenuen aden ismeposhi. ⁵ Ambo bédambouidquido yec inchëshenquio iquendac. Nuquin Papa bëchamauanqueiequidëmbi ushëmbouidquido iquendac inchëshaid tantiaenquio yec. —Aden abi tantiaquido bédamboen isquin ënenquio icquin bédamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶ Adshumbic mayan bédan chuioposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

Esus chote chiaid

⁷ Adnubini Esusënquio naden chuiposh. —Chieshtoenquio icquin ëbi tantia. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bédambo icmendambi —caposhi Esusën.

⁸ Uan nebi. Abimbo chuiquin nëid dada uaombi. Aden mayan bédan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinguëbuduidpoc ëbi ismequid mayan bëda ismenuec. ⁹ Adshobini: —Padi. Aden ëbi ismenda. Mibipadquid Nuquin Papan yuabidi nebique. Èndenquimboshë Nuquin Papan tantiamiac min tsusedpabo isadaidbon ambi chiaidquido dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsëqui tantiaquin aden ismeta —caposhi mayan bédan.

¹⁰ Adashic padpidec: —Èmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquio icquin Esus tantiec ma tabadnu,” qeshun dada uata. ¹¹ Nëbimbobi Esus chonoc Esus tantiesabo badedquido bédamboec tabadcuentiapimbo iquendac. Abi icsaid badedquio ëntiapimbo iquendac. Esus tantiaquido abi bédamboec tabadacpadquiecbidi bédamboec tabadpashun —queposh mayan bëda.

¹² Adnubini Esusën chuioposh. —Chieshtoenquio icquin ëbi tantia. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. ¹³ Nuquin Papapadquidquido nebi. Èmbi tantiacmaid nibëdnuc abitedi comapenen tantiaquidquido nebi. Nidaid uabi yec ictenedi nëbi adquidquido yec nibëdantiapimbo icquid nebi. Adquid yec abitedishun Icbombo nebi.

¹⁴ Icsambo icboedon ëbi tantiasho icsaisabimboecnuc Nuquin Papan bédamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmi-antequid cuëte bacuë chemiacimboen. ¹⁵ Padnuen ëbi tantiesabo bédamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquio chudquido. Nëidic aton bënëpenquio chudmequido. Nëidic cuesanquido. Nëidic papa quequin ambi nacnenaidi tantiaquido. Nëidic abi bunaiduidquido naic muauanquido. Aidtedi Nuquin Papa yacno puduedtiapimbo iquendac.

¹⁶ Èmbi chiacpadomboen mayan bédan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuiampid nebi. Isadaidbon cainaidquido nebi. Utsin: “Dëniacnu,” cadiapimbo icquid nebi. Adquid icquin matses abitedimbo namendambi —quequin chuiposhi Esusën.

¹⁷ Adsho tantiashun Nuquin Papan Mayanën tantiamiacpadomboen chuiquin: —Nëbimbobi Esus chonoshe. Aidquido tantiabenta —caindac Esus tantiaquidon Esus tantiesabo chuiquin. Èmbi chuiboed tantiaquidtedishun: —Nëbimbobi chonoshe. Aidquido tantianuna —cac bédambo ictsiash. Adsho tantiashe Esus tantiesabo acte bunacbimboec Esus tantiate bunsho Nuquin Papan bédamboen isendac. Nuquin Papa bédamboen ismenuen menete nibëdnuc Esusuidi tantiasho Nuquin Papan bédamboen isquin abëdi tabadmendac.

¹⁸ Tantia. Èmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ëbi ismeboedtedi dada uaombi. Èmbi dada uaboad tsitënquin ambembi chiaid dada uaina. Èmbi chuibocpadomboen Nuquin Papan mibi

cuidtsiashe. ¹⁹ Adembidi ëmbi dada uaboed utsi uainquio icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquio ictsiashe. Adembidi bédamboshë yacno abëdi mibi tabadmenquio ictsiashe.

²⁰ —Ma aitedi tantianu —quequin Esusën chiacpadomboen mayan bédan aitedi ismeposhi. Ëmbi chuibocpadomboen Esusën: —Nëbimbobini choendac —caposhi. Adsho tantiaashun: —Ai, nëbimbobi chota —capombi.

²¹ Mibitedi Esus tantiaquidotedi tantiaquin: —Ambi nabocpadomboen Nuquin Icho Esusën bédamboen isquin bédambo icmepashun —caimbi. Padi. Aitedi chuiquin dada uaombi.